



D  
S  
*Billith*

OR

CL

TO

\*\*\*



UNIVERSA  
THEOLOGIA  
DOGMATICO-SCHOLASTICA

PRO  
SACRÆ SCIENTIÆ STUDIO SIS ET AMATORIBUS  
CONCINNATA

*Bibliotheca Lib. Eremitar. Generalis A. Regulae Vigronensis.*

P. Fr. DALMATIO KICK,  
ORD. MIN. S. P. FRANCISCI REFORM. LECTORE EMERITO,  
AC PROVINCIÆ ANTONIANO-BAVARICÆ EX-PROVINCIALI  
ET DIFFINITORE ACTUALI.

---

TOMUS IV.

IN DUAS PARTES DIVISUS,

PRIMA PERTRACTAT

MYSTERIUM INCARNATIONIS,

ET

PER MODUM APPENDICIS AGIT

DE

CULTU SS. RELIQUIARUM, SS. ET PRÆROGATIVIS  
B. V. Mariæ.

ALTERA

TOTA ERIT IN EXPLANANDO TRACTATU DE JURE ET JUSTITIA,  
ET JUDICIIS PUBLICIS.

---

PERMISSU SUPERIORUM.

\*\*\*\*\*

AUGUSTÆ VINDEL. & OENIPONTI,  
SUMTIBUS JOSEPHI WOLFF, MDCCLXVII.



THEOLOGY

ECCLIASTICAL HISTORY

OF THE CHURCH

FROM THE APOSTLES TO THE PRESENT

BY J. H. W. L.

OF THE UNIVERSITY OF OXFORD

VOLUME IV

THE REFORMATION

IN THE NINETEENTH CENTURY

BY J. H. W. L.


OF THE UNIVERSITY OF OXFORD

IN TWO VOLUMES

THE SECOND VOLUME

THE REFORMATION





## Approbatio Censoris.

**I**N hoc Tom. IV. Author Clarissimus de Incarnatione, de cultu SS. Reliquiarum, & de Prærogativis B. V. Mariæ: nec non de Jure & Justitia, atque de Judiciis publicis eadem doctrinæ soliditate, & perspicuitate, quibus in præcedentibus Tomis materias Theologicas pertractavit, discurret, adeoque eandem cum prioribus laudem, & Lucem publicam eodem jure hic Tomus meretur. Augustæ Vindelicorum die 7. Decembris. 1766.

### *Imprimatur H. S.*


*Henricus Sigismundus de Fercher,*

SS. Theologiæ Doctor, Ecclesiæ Cathedralis Augustanæ Canonicus Capitularis, Serenissimi Elect. Palatini, ac Rev. & Ser. Principis & Episc. Augustani, Landgravii Hassiæ &c. Consiliarius Ecclesiasticus & Vicarius in Spiritualibus Generalis, Decanus Capituli Monheimensis & Parochus Civitatis Wemdinganæ.

*Josephus Herz,*

SS. Theol. Lic. Rev. & Sereniss. Princ. & Episc. Aug. Consil. Eccles. Visitator per Diocesim Gener. ac librorum Censor.





XX

## Facultas

*Reverendissimi Commissarii Generalis totius Cismontanae Familiae.*

Fr. Joseph Maria de Vedano Ordinis Minorum  
SS. P. N. Francisci Lector Jubilatus, coram summo Pon-  
tifice Episcoporum Examinator, & in universa Cismon-  
tana Familia tam Observantium quam Reforma-  
torum & Conceptionistarum Commissarius  
Generalis, & in Domino Servus.

Cum juxta Apostolicas, nostrique Ordinis Constitutiones  
de mandato nostro idonei Censores Tomum quartum  
Theologiae Scholastico - Dogmaticae ab Authore R. P.  
Dalmatio Kick nostrae Reformatae Provinciae Anto-  
niano - Bavaricae Lectore Emerito, ac Ex-Provinciali  
compositum, & in duas partes divisum recognoverint, illud-  
que ab ipsis revisum, & approbatum fuerit: Nos praesenti-  
um tenore ad salutaris obedientiae meritum facultatem fa-  
cimus, quatenus servatis de reliquo servandis idipsum Typis  
mandari possit & valeat.

*Dat. Romae ex Araceli  
die 17. Septembris 1766.*

Fr. Joseph Maria de Vedano  
Commissarius Generalis.

(L. S)

De Mandato Reverendissimi in Christo Patris  
Fr. Bernardini Maria Tusculanus  
*Secretarius Generalis.*

Appro-





## SERIES TRACTATUM

Dissertationum, Articulorum, Paragraphorum, &  
aliorum in hoc Tomo IV. Theologiæ universæ  
Scholastico-Dogmaticæ comp-  
henforum,

### INTRODUCTIO.

De Incarnatione Verbi divini.

pag. i

### TRACTATUS PRIMUS.

**D**ISSERTATIO I. De possibi-  
litate, cognoscibilitate, exi-  
stentia, & necessitate Incarna-  
tionis Verbi divini.

ARTIC. I. De possibilitate hujus  
Mysterii.

*Assertio.* Possibilis est Incarnatio  
Verbi divini. 3

*Objectiones.* 4

ARTIC. II. De cognoscibilitate  
Incarnationis Verbi divini. 10

*Assertio I.* Nullus intellectus cre-  
atus, sibi soli relictus, ac se-  
clusa omni revelatione, vel ma-

nifestatione potuit eviden-  
ter cognoscere possibilitatem  
hujus Mysterii, antequam il-  
lud peractum est. 11

*Assertio II.* Intellectus, sensibus  
alligatus, non potest ex viri-  
bus mere naturalibus eviden-  
ter cognoscere hoc Mysteri-  
um, etiam postquam jam actu  
peractum est. 12

ARTIC. III. De convenientia In-  
carnationis.

*Assertio I.* Mysterium Incarna-  
tionis fuit Deo conveniens. 14

*Assertio*





*Affertio II.* Incarnatio Verbi divini fuit etiam conveniens homini. 15

*Affertio III.* Eadem fuit & pariter conveniens toti Universo. ibid.

ARTIC. IV. De necessitate Incarnationis

*Affertio I.* Deus antecedenter ad suum decretum liberum non fuit absolute necessitatus ad ponendam Incarnationem. 2. Imo neque fuit ita necessitatus ex supposito mundi producti. 17

*Affertio II.* Incarnatio nec fuit necessaria supposito peccato primi hominis. 18

*Affertio III.* Neque fuit necessaria supposito, quod Deus voluerit hominem lapsum reparare. 19

ARTIC. V. De existentia Incarnationis, & adventu Christi.

§. I. Probatio prima. 20

*Solvuntur Objectiones* Judæorum. 22

*Solvuntur aliæ Objectiones* partim a Judæis, partim a modernis Criticis factæ. 26

§. II. Probationes ultiores. 30

*Solvuntur aliquæ Objectiones.* 35

ARTIC. VI. An Christus fuerit verus homo, & verus Deus? 39

*Affertio I.* Christus Dominus est verus Homo. 40

*Affertio II.* Christus est verus Deus. ibid.

*Dissertatio II.* De unione hypo-

statica, ejusque subjecto, & termino.

ARTIC. I. Quid, & qualis sit unio hypostatica? 41

*Affertio I.* Unio hypostatica, per quam natura humana uniebatur Verbo divino, est physica, ac modalis entitas, non tamen est entitative substantialis. 43

*Affertio II.* Unio hypostatica quoad entitatem non est maxima, seu nobilissima 2. Est tamen maxima in ratione Unionis. 3. Et doni. 44

*Affertio III.* Eadem est supernaturalis quoad substantiam. 45

ARTIC. II. Quomodo facta sit Unio hypostatica, an scilicet sine prævia dispositione, & an in unitatem suppositi, vel naturæ? 47

*Affertio I.* Unio hypostatica est immediate facta in natura humana sine præcedente dispositione. 47

*Affertio II.* Eadem facta est in unitate Personæ, ita ut in Christo una sit Persona. 2. & duæ distinctæ, inconfusæ naturæ. 48

*Affertio III.* Non potuit Verbum divinum assumere naturam humanam suppositatam propria Personalitate. 51

ARTIC. III. De subjecto actuali Unionis hypostaticæ, seu, quid Verbum actu assumpsit in Incarnatione? 52

§. I.





§. I. *Resoluntur* aliquæ conclu-  
siones. *ibid.*

*Affertio I.* Verbum assumpsit, seu  
sibi univit totam, & integram  
naturam humanam. *ibid.*

*Affertio II.* Sanguis Christi fuit  
proxime, & immediate unitus  
Verbo. 54

*Affertio III.* Verbo etiam im-  
mediate uniti fuerunt reliqui  
tres humores Pituita, bilis  
flava, & atra. 56

§. II. Ponuntur assertiones reli-  
quæ.

*Affertio IV.* Verbum etiam in  
triduo mortis fuit immediate  
unitum corpori, & animæ.

2. imo & sanguini, saltem il-  
li, qui in Resurrectione ite-  
rum erat assumendus intra  
corpus. 60

*Affertio V.* Anima, & corpus,  
ac omnes partes Christi sunt  
eodem instanti reali a Verbo  
assumptæ cum tota Humanita-  
te. 63

*Affertio VI.* Quamvis Verbum  
uno instanti reali simul assum-  
pserit naturam humanam, &  
ejus partes, tamen in hac as-  
sumptione intervenit aliqua  
prioritas signorum naturæ. 65

*Quæritur*, an post resurrectionem  
quædam particulæ sanguinis  
Christi, in passione effusi, in  
terris remanserint, num vero  
omnis omnino sanguis fuerit  
reassumptus intra corpus glo-  
riosum Christi? 68

ARTIC. IV. De subjecto possibi-  
li unionis hypostaticæ. 70

*Affertio I.* Potuisset a Verbo as-  
sumi non solum natura Ange-  
lica, verum & irrationalis. 72

*Affertio II.* Posset una Persona  
immediate assumere plures hu-  
manas naturas. 73

*Affertio III.* Potest Verbum divi-  
num etiam immediate assumere  
partes essentielles, seu unitas,  
seu non unitas physice. 74

ARTIC. V. De termino actuali  
Unionis hypostaticæ.

*Affertio I.* Sola secunda Perfo-  
na ex SS. Trinitate est incarna-  
ta. 76

*Affertio II.* Verbum divinum uni-  
tum est immediate humanitati  
secundum Personalitatem pro-  
priam, & proprietatem rela-  
tivam filiationis, non secun-  
dum essentiam communem tri-  
bus Personis. 77

ARTIC. VI. De termino possibili  
Unionis hypostaticæ. 83

*Affertio I.* Essentia divina, ut  
præscindit a Personalitatibus,  
& subsistit subsistentia absolu-  
ta, potest terminare dependen-  
tiam naturæ creatæ, eamque  
assumere, ac reddere subsi-  
stentem. 84

*Affertio II.* Plures Personæ divi-  
næ nequeunt simul immediate  
assumere eandem naturam hu-  
manam. 88

*Dissertatio III.* De causis Incar-  
nationis.

b

ARTI-





ARTIC. I. De actione, & causa physica Incarnationis.

*Affertio I.* Actio incarnativa, vel Incarnatio active sumpta pro actione productiva hujus Mysterii est actio productiva Unionis hypostaticæ. 91

*Affertio II.* Causa efficiens Incarnationis, & Unionis hypostaticæ est tota SS. Trinitas. 93

*Affertio III.* Nec B. Virgo Maria, nec alia causa physice influxit etiam ut causa instrumentalis in Unionem hypostaticam, & Incarnationem. 94

ARTIC. II. De causa finali, seu de fine, & motivo Incarnationis. 99

§. I. Motivum, & finis Incarnationis quoad substantiam spectatæ.

*Affertio.* Vi præsentis decreti Christus, & Incarnatio quoad substantiam est efficaciter decreta ante prævisum Adæ peccatum, & independentem ab eo, atque adeo Christus venisset, si Adam non peccasset. 100

§. II. *Solvuntur Objectiones.* 107

§. III. Motivum Incarnationis quoad modum spectatæ.

*Affertio I.* Christus venit in carne passibili ob redemptionem generis humani. 113

*Affertio II.* Christus venit defacto in carne passibili ut Redemptor reparativus non solum ob peccatum originale, sed & ob personalia, princi-

palius tamen ob originale. *ibid.*

*Affertio III.* Ob solum peccatum originale venisset Christus in carne passibili, etiamsi nulum personale a nobis fuisset committendum. 114

ARTIC. III. De causa meritoria Incarnationis. 116

§. I. An Christus Incarnationem, & Unionem hypostaticam quoad substantiam fuerit meritus, vel mereri potuerit per opera illum præcedentia?

*Affertio I.* Nec Christus in concreto, 2. nec natura humana, vel anima Christi in abstracto merita est ipsam Incarnationem quoad substantiam per opera eandem præcedentia. 117

*Affertio II.* Neque de absoluta potentia Dei Christus, aut Humanitas Christi potuisset de condigno mereri Incarnationem quoad substantiam per opera præcedentia pro signo naturæ Unionem hypostaticam. 120

*Affertio III.* De potentia Dei absoluta potuisset humanitas Christi mereri de congruo Incarnationem pro priori signo naturæ, qua uniretur Verbo, saltem si meritum de congruo in sensu largiori sumatur. *ibid.*

§. II. An Christus per opera subsequenter Incarnationem fuerit eandem meritus, vel saltem mereri potuisset?

*Affer-*





*Affertio* est negativa. 125

§. III. An non Christus meritus fuerit, vel mereri potuerit continuationem, & extensionem Unionis hypostaticæ, & aliquas ejus quasi proprietates?

*Affertio* I. Christus non est meritus. 2. de potentia tamen absoluta potuisset mereri continuationem Unionis hypostaticæ. 132

*Affertio* II. Idem non meruit sibi scientiam infusam, gratiam sanctificantem, aut gloriam animæ suæ, seu visionem beatificam, nec lumen gloriæ, aut alios habitus infusos. 134

*Affertio* III. De potentia tamen absoluta potuisset Christus mereri omnia in priore conclusione specificata. 136

*Affertio* IV. Christus tantum meritus est gloriam corporis, & animæ accidentalem. 137

§. IV. An Christus, B. V. Maria, ac Patres antiqui meruerint aliquas circumstantias Incarnationis?

*Affertio* I. De Christo est affirmativa quoad illas circumstantias, quæ non habent necessariam connexionem cum substantia Incarnationis &c. 138

*Affertio* II. B. V. Maria merita est maternitatem Dei. 2.

non tamen de condigno, sed solum de congruo. 142

*Affertio* III. Etiam, PP. antiqui de congruo meruerunt circumstantias aliquas Incarnationis. 144

*Dissertatio* IV. De Intellectu, & Scientia Christi qua Hominis.

ARTIC. I. De scientia Christi beatifica.

§. I. Statuuntur aliquæ conclusiones.

*Affertio* I. Anima Christi adhuc in terris, & in mortali corpore existens habuit intuitivam, & beatificam Dei visionem. 147

*Affertio* II. Anima Christi statim a primo instanti infusionis in corpus, & conceptionis habuit visionem beatificam. 149

*Affertio* III. Visio B. Humanitatis Christi non est comprehensiva Divinitatis. 150

§. II. Examinatur præcipua difficultas hujus articuli.

*Affertio* IV. Probabiliter anima Christi per visionem B. actu videt omnia, quæ ipsum Verbum intelligit, proinde omnes creaturas præteritas, præsentis, & futuras, ac possibiles. 150

*Affertio* V. Etiam probabile est, quod anima Christi in Verbo cognoscat quidem omnia, quæ cognoscit ipsum Verbum. 2

b 2 Non



Non tamen omnia actu. 3. sed habitu. 157  
 ARTIC. II. De Scientia infusa animæ Christi. 163  
*Assertio.* Præter scientiam beatam admittenda est in intellectu animæ Christi scientia infusa. 165  
 ARTIC. III. An Christus præter scientiam infusam, & beatam habuerit aliquam scientiam acquisitam, experimentalem?  
 §. I. Statuitur conclusio. 170  
*Assertio I.* Est affirmativa. 171  
 Aliquæ deductiones. 172 & seqq.  
 §. II. *Solvuntur Objectiones.* 176  
*Dissertatio V.* De Voluntate humana Christi. 179  
 ARTIC. I. An voluntas humana Christi semper fuerit divinæ conformis, & an semper fuerit impleta? 180  
*Assertio I.* Voluntas humana Christi efficax fuit in omnibus D. voluntati conformis tam quoad volitum materiale, quam quoad formale. 181  
*Assertio II.* Eadem voluntas efficax semper fuit impleta. 183  
*Assertio III.* Eadem tamen inefficax non fuit semper impleta 183  
 ARTIC. II. An voluntas humana Christi fuerit ligata veris legibus & præceptis? 184  
*Assertio I.* Est affirmativa de obligantibus vi directiva. 186  
*Assertio. II.* Christus fuit ligatus

quoad vim directivam præceptis naturalibus, stricte talibus. 2. uti & positivis illis, quæ ad ejus statum pertinent v. g. præceptum moriendi. 187  
 ARTIC. III. De Societate voluntatis humanæ Christi. 189  
 §. I. An & qualem gratiam sanctificantem habuerit Christi Humanitas?  
*Assertio I.* In Christo est gratia habitualis. 190  
*Assertio II.* Hæc formaliter sanctificabat, & dignificabat animam Christi ad vitam æternam. 191  
 §. 2. An, & quomodo natura humana Christi sanctificetur per Unionem hypostaticam, aut personalitatem Verbi, vel naturam divinam?  
*Assertio I.* Quamvis Unio hypostatica vocetur merito gratia Unionis 2. tamen ratione sui non formaliter, aut proprie sanctificat Humanitatem Christi. 194  
*Assertio II.* Neque Unio hypostatica ratione divinitatis, vel Personalitatis divinæ formaliter sanctificat naturam humanam Christi. 196  
*Assertio III.* Potest tamen dici, quod aliqua ratione natura humana Christi vere sanctificetur per sanctitatem increatam substantialem, & personalem simul sumptam. 198  
 ARTI-





ARTIC. IV. De impeccabilitate  
humanitatis Christi.

§. I. An voluntas humana Christi de potentia Dei absoluta potuerit peccare, peccato impeditivo, & destructivo Unionis? 199

*Affertio I.* Est affirmativa pro signo priori naturæ ante Unionem hypostaticam. *ibid.*

*Affertio II.* Neque de potentia Dei absoluta implicat, humanitatem a Verbo jam assumptam peccare peccato destructivo Unionis hypostaticæ. 202

§. II. An humanitas Christi de potentia absoluta potuisset peccare in sensu composito Unionis hypostaticæ?

*Affertio* est affirmativa. 203

§. III. Aliquæ illationes. 211

ARTIC. V. De libertate humanitatis Christi, & ejus concordia cum impeccabilitate

§. I. An, & quomodo Christus habuerit liberum arbitrium, seu libertatem proximam indifferentiæ?

*Affertio I.* Humana voluntas Christi fuit libera non solum libertate a coactione, sed etiam a necessitate, seu libertate proxima ad actus præceptos. 214

*Affertio II.* Eadem habuit libertatem physicam ad actus præceptos, & ad peccandum. 2. & simul necessitatem mora-

lem, strictissime dictam, non peccandi contra talia præcepta. 216

§. II. *Solvuntur Objectiones* contra præcedentem §. primum, & declaratur concordia libertatis humanæ Christi cum ejus impeccabilitate. 220

§. III. Referuntur, & rejiciuntur sententiæ oppositæ de libertate Christi, & ejus impeccabilitate.

*Affertio I.* Hoc negotium non satis explicatur dicendo: quod in Christo ad meritum in actibus præceptis ex dispensatione divina suffecerit indifferentia remota. 226

*Affertio II.* Neque per hoc, quod præceptum moriendi fuerit dispensabile ad nutum Christi: vel quod fuerit antecedenter a Christo Domino impedibile, ne ei imponeretur. 229

*Affertio III.* Nec potest dici, quod Christus in sensu composito præcepti, vel privative non potuerit mori: bene in sensu diviso, & præcisive. 230

*Affertio IV.* Eadem nec salvatur actu reflexo, & conditio- nato, quo Christus fuisset acceptaturus mortem, quamvis non fuisset præcepta. 231

*Affertio V.* Eadem non salvatur per hoc, quod præceptum mor-





mortis fuisset aliquo modo conditionatum, si nimirum Judæi voluissent Christum occidere, quam conditionem Christus potuisset pro libitu impedire. 232

*Affertio VI.* Non salvatur libertas indifferentiæ in Christo per hunc, vel illum actum in particulari, & individuo. *ibid.*

*Affertio VII.* Nec explicatur per indifferentiam ad circumstantias mortis &c. *ibid.*

*Affertio VIII.* Nec per præceptum minus rigorosum, quod esset iusta consilii onerosi, per quod nec Christus obligaretur in conscientia sub reatu odii, neque ad poenam, sed tantum sub conditione non conferendi bonum alias debitum, quod tamen conferretur, si actio præcepta fieret. 234

*Dissertatio VI.* De satisfactione, & meritis Christi.

ARTIC. I. An Christus vere & per quos actus, & pro quibus fuerit meritis.

*Affertio I.* Christus vere, & proprie meruit. 2. toto tempore vitæ suæ ab instanti conceptionis usque ad tempus mortis suæ. 3. per quoslibet actus liberos libertate physica, & Christo, qua viatori, convenientes. 236

*Affertio II.* Christus valde probabiliter meruit omnem gra-

tiam, & gloriam Angelis, & nostris primis parentibus in statu innocentiae. 238

ARTIC. II. An merita, & satisfactiones Christi valorem aliquem traxerint ex dignitate Verbi divini, & an Christus de condigno, & abundanter satisfecerit?

*Affertio I.* Merita, & satisfactiones Christi non solum per gratiam sanctificantem, sed etiam per Personam Verbi dignificantur. 241

*Affertio 2.* Christus non solum condigne, sed & abundanter satisfecit, & meritis est pro nobis. 242

ARTIC. III. An Christus satisfecerit ex rigore justitiæ?

*Affertio* est negativa. 245

ARTIC. IV. An satisfactio, & merita Christi sint valoris simpliciter, & intrinsece infiniti?

*Affertio* est iterum negativa. 247

ARTIC. V. An pura creatura potuisset de condigno satisfacere pro peccato mortali, vel peccatis omnibus mundi? 257

*Affertio.* De absoluta Dei potentia pura creatura immunis a peccato originali, & instructa plenitudine gratiæ potuisset satisfacere pro peccato mortali alterius hominis: imo pro peccatis totius generis humani. 158

*Dissertatio VII.* De communicatione





catione idiomatum, modo loquendi circa hoc Myſterium, dignitatibus Chriſti, & defectibus humanæ naturæ a Verbo aſſumptis: ubi ad finem de virtute patrândi miracula in Chriſto.

ARTIC. I. De Communicatione idiomatum, & modo loquendi circa hoc myſterium.

§. I. Generales regulæ de communicatione idiomatum. 266

*Aſſertio I.* In Myſterio Incarnationis ex Unione hypoftatica naturæ divinæ & humanæ in eadem Perſona oritur vera, & propria communicatio idiomatum, ſeu Prædicatorum inter Deum & hominem. 267

*Aſſertio II.* Per communicationem idiomatum prædicata divina non inſunt formaliter humanitati, nec prædicata humana divinitati. 268

Regulæ circa communicationem idiomatum. 268 & ſeqq.

§. II. Examinantur in ſpecie aliquæ propoſitiones. 271

ARTIC. II. De dignitatibus, & officiis Chriſti.

*Quæſt. I.* An Chriſtus, qua homo ſit Filius Dei naturalis? 276

*Quæſt. II.* An Chriſtus qua homo poſſit dici Filius Dei adoptivus? 277

*Quæſt. III.* An Chriſtus ut homo ſit verus Filius Mariæ? 278

*Quæſt. IV.* An Chriſtus qua ho-

mo fuerit caput Eccleſiæ? 279

*Quæſt. V.* An Chriſtus fuerit, & etiamnum ſit Sacerdos? 280

*Quæſt. VI.* An, & qualiter Chriſtus fuerit Rex? 281

*Quæſt. VII.* An, & qualiter Chriſtus habuerit dominium rerum temporalium? 282

ARTICULUS III.  
De Chriſto ut Advocato noſtro, &

ut adorando, & de defectibus humanitatis a Verbo aſſumptis. 283

*Quæſt. I.* An Chriſtus qua homo in terris fuerit, & in cælis ſit Advocatus noſter? 283

*Quæſt. II.* Quomodo Chriſtus, ejusque Humanitas ſit adoranda? 285

*Quæſt. III.* Quos defectus humanitatis aſſumpſerit Verbum? 286

*Quæſt. IV.* An Chriſtus inſluxerit phyſice, vel moraliter in miracula, quæ patravit? 288

*Diſſertatio VIII.* Appendix ad tractatum de Incarnatione: de cultu, & invocatione Sanctorum: de veneratione Reliquiarum, ac ſacrarum Imaginum: nec non de dotibus B. Virginis Mariæ. 289

ARTICULUS I.  
*Synopsis* hiſtorica, & prænotanda. *ibid.*

ART. II. An liceat Sanctos religioſe colere? 292

*Aſſertio I.* Licite, & recte col-





- coluntur Sancti tanquam amici Dei cultu religioso: idem est de Angelis bonis. *ibid.*  
*Affertio II.* B. V. Maria digna est cultu hyperdulæ. 294  
*Solvuntur Objectiones.* 295  
ARTIC. III. De invocatione Sanctorum. 299  
*Affertio.* Bonum, & utile est invocare Sanctos, ut pro nobis ad Deum intercedant. 301  
*Objectiones.* 304  
ARTIC. IV. De veneratione SS. Reliquiarum, & sacrarum Imaginum. 309  
§. I. Deciditur primum punctum hujus controversiæ. 310  
*Affertio.* Reliquiæ Sanctorum pie, & utiliter coluntur. *ibid.*  
§. II. Resolvitur secunda pars hujus articuli. 316  
*Affertio.* Pius, & licitus est SS. Imaginum cultus, nec idololatriæ arguendus. *ibid.*  
*Objectiones.* 320  
ARTICULUS V.  
§. I. An B. V. Maria sit Dei para? 322  
Respondetur affirmative. *ibid.*  
*Objectiones.* 325  
§. II. An B. V. Maria semper fuerit Virgo? 327  
*Affertio I.* B. Dei Genitrix fuit Virgo ante partum. 328  
*Affertio II.* Eadem mansit Virgo in partu. 329  
*Affertio 3.* Etiam post partum. 330  
Occurritur Cavillationibus Adversariorum. 331

## PARS II.

Tom. IV. Theologiæ, seu Libri III. sententiarum, tractans de Jure, & Justitia, ac Judiciis publicis.

- T** *Tractatus* primus de Jure & Justitia.  
*Dissertatio I.* De natura, & speciebus Juris.  
ARTIC. I. Quid, & quotuplex sit jus? 337  
§. I. Definitio Juris proprietatis.  
*Affertio.* Jus proprietatis activum est potestas legitima obligandi voluntarie alios ad actionem, vel omissionem actionis in bonum proprium. 338  
§. II. Divisio juris proprietatis. 341  
*Affertio I.* Jus proprietatis dividitur in *Jus, in re*, & *Jus ad rem.* *ibid.*  
*Affertio II.* Jus etiam dividi solet in *dominium perfectum*, & *imperfectum.* 342  
*Affertio III.* *Dominium* utile iterum varie dividi solet, ut in *usumfructum*, *usum*, *habitationem*.



nem, *Servitutem*, *Emphytheu-*  
*sin*, & *Feudum*. 345  
 §. III. Resolvuntur quædam du-  
 bia ex præcedentibus.  
*Dubium I.* An potestas acceptan-  
 di, retinendi, & abdicandi jus  
 sit ipsum formale jus, vel do-  
 minium? &c. *ibid.*  
*Dubium II.* Quid sit notandum de  
 servitute? 348  
 ARTIC. II. An usus distinguatur  
 a dominio in rebus, quæ uni-  
 co usu consumuntur? 350  
 §. I. Notanda, & conclusio. 351  
*Affertio.* Dominium potest sepa-  
 rari ab usu in iis rebus, quæ  
 unico usu absumuntur. 353  
 §. II. *Solvuntur objectiones.* 355  
*Quær.* Quid in hac re senserit Jo-  
 annes XXII.? 366  
*Dissertatio II.* De subjecto, &  
 objecto domini.  
 ARTIC. I. De subjecto & objecto  
 domini in communi.  
 §. I. De natura capace domini.  
 369  
*Affertio I.* Sola entia intellectum,  
 & voluntatem habentia sunt  
 capacia domini. *ibid.*  
*Affertio II.* Non requiritur ta-  
 men actualis usus rationis ad  
 dominium: etsi hic requira-  
 tur ad exercitium actuale do-  
 minii, vel ad dominium expe-  
 ditum. *ibid.*  
*Affertio III.* Deus est absolutif-  
 simus Dominus omnium re-  
 rum creaturarum. 370

*Affertio IV.* Etiam Christus qua  
 homo adhuc in terris vivens  
 propter Unionem hypostati-  
 cam probabiliter *saltem quoad*  
*Jus*, & *actum primum* ha-  
 buit dominium quoddam *uni-*  
*versale*, & *Excellentiæ* in om-  
 nes res creatas &c. 371  
 §. II. An dari possit dominium  
 ejusdem rei penes duos in so-  
 lidum? 373  
*Affertio I.* est negativa de domi-  
 nio permanente. 374  
*Objectiones.* 375  
*Affertio II.* Neque datur domi-  
 nium duorum in solidum in-  
 stantaneum circa eandem rem  
 379  
*Objectiones.* 380  
 ARTIC. II. Qualium rerum do-  
 minium homo habeat?  
 §. I. An sit Dominus vitæ?  
*Affertio.* Homo nec est Dominus  
 vitæ suæ, nec aliæ. 383  
 §. II. An homo possit seipsum  
 occidere? 385  
*Affertio* est negativa, secluso in-  
 stinctu divino. 386  
*Objectiones.* 387  
 Sequuntur aliquæ deductiones.  
 389  
 §. III. An liceat aliqua facere,  
 vel omittere, ex quibus cer-  
 to, vel probabiliter mors pro-  
 pria indirecte est secutura?  
*Affertio* est affirmativa, si justa,  
 & gravis adsit causa. 390  
 §. IV.



membrorum suorum? 393

*Affertio I.* est negativa. 393

*Affertio II.* Est affirmativa, si abscissio membri est necessaria ad conservandam vitam totius hominis. 395

*Affertio III.* Potest etiam aliquis seipsum mutilare, si tyrannus id imperaret sub interminatione mortis certæ &c. 396

§. V. An homo sit Dominus famæ, honoris, libertatis, actionum suarum liberarum &c.? 397

*Affertio* est affirmativa. 398

ARTIC. III. An, & quale dominium habeant Clerici sæculares?

§. I. Præmittuntur aliqua quæ sita. 401

*Quær. I.* Quotuplicis generis sint bona Clericorum? *ibid.*

*Quær. II.* An Clerici habeant dominium suorum bonorum patrimonialium, & quasi patrimonialium? 402

Quædam deductiones. 403

*Quær. III.* An distributiones quotidianæ sint bona quasi patrimonialia, si nulla est proportio inter laborem & distributionem? &c. 405

*Quær. IV.* Quid dicendum de redditibus Capellaniæ &c. sub onere Missarum &c. 406

*Quær. V.* Quis sit Dominus bo-

norum mere Ecclesiasticorum quarti generis? 407

§. II. An Clerici sæculares sint Domini bonorum beneficialium, præsertim superfluatorum? 408

*Affertio I.* Clerici sunt Domini reddituum beneficialium, ad congruam sustentationem necessarium. 410

*Affertio II.* Probabilius etiam bonorum beneficialium superfluatorum. 411

*Objectiones.* 413

§. III. An Clerici sæculares bona beneficialia superflua ex iustitia teneantur in pauperes, vel pias causas erogare? 417

*Affertio* est negativa. 418

*Objectiones.* 423

§. IV. Adstruitur nostra sententia de radice hujus obligationis.

*Affertio* Probabilius obligatio erogandi superflua in causas pias oritur ex sola Lege Ecclesiastica. 428

*Quær.* Contra quam virtutem peccet Clericus superflua non expendens in usus pios? 432

Probabilius contra virtutem Religionis. 434

§. V. Resolutiones practicæ, cum recapitulatione hucusque dictorum. 436

§. VI. An Clerici sæculares beneficiati valeant testari, vel mor.





mortis causa disponere de suis bonis? 441

*Affertio I.* Potest introduci consuetudo, ut hoc a Clericis valide fiat circa causas profanas. 442

*Affertio II.* Vi consuetudinis sic introductæ etiam licite testantur de bonis beneficalibus ad causas profanas. 445

ARTIC. IV. De dominio Religiosorum.

§. I. An Religiosi in communi sint capaces domini? 448

*Affertio* est affirmativa quoad res temporales mobiles, & immobiles: exceptis fratribus Minoribus de observantia, & Capucinis. 449

§. II. An Religiosi in particulari habeant dominium?

*Affertio I.* est negativa. 451

*Affertio II.* Aliqui tamen Religiosi non solenniter professi, sed emittentes vota simplicia, in Religione per Sedem Apostolicam approbata sunt capaces domini. 452

*Affertio III.* Religiosus etiam solenniter professus, in particulari potest habere dominium, vel quasi dominium rerum & jurium spiritualium. 453

§. III. Resolutiones practicæ.

*Resolutio I.* Religiosus ad Episcopatum elevatus non fit capax domini. 456

*Resolutio II.* Abbates &c. possidentes beneficia regularia, vel sæcularia vi Juris, & consuetudinis non habent quidem dominium, bene autem potestatem administrandi fructus suorum beneficiorum tam ad congruam sustentationem, quam ad pias causas. 457

*Resolutio III.* Alienationes &c. in testamento factæ a Religioso solenniter professio propria autoritate, sunt illicitæ, & invalidæ. 458

*Resolvitur IV.* Paupertas religiosa tam ad carentiam domini, quam ad non habendum usum simplicem facti activum rerum temporalium sine licentia Prælati obligat. 458

*Resolvitur V.* Superiores regulares nequeunt cuidam Religioso in particulari concedere bona immobilia, & stabilia etiam ad usum, & administrationem tantum. 459

ARTIC. V. De dominio conjugum, filiorumfamilias, & servorum.

§. I. Varia resolvuntur de dominio conjugum. *ibid.*

*Resolv. I.* Bona, quæ maritus aliunde, quam ab uxore habet &c. spectant ad ipsum: dominium autem *Paraphernorum*, & *deceptitiorum* ad uxorem. 461

*Resolv. II.* Dominium directum, &





- & utile dotis aestimatae &c. est apud maritum. 462
- Resolv. III.* Dominium contra-dotis naturale utile regulariter habet maritus : dominium vero civile illius , at sine usu-fructu, uxor. 463
- Resolv. IV.* Morgengebæ fructus ad virum durante matrimonio pertinet : dominium directum ad uxorem 464
- Resolv. V.* Bona communia , ac-quisita &c. ad quem Uxorum pertineant , præcipue defun-  
dum est ex pactis dotali-  
bus. 464
- §. II. De dominio , & peculio Patrumfamilias. *ibid.*
- Resolvitur I.* Filiusfamilias habet plenum dominium in pecu-  
lium castrense, vel quasi castren-  
se, ita ut proprietas, ususfru-  
ctus, & administratio sit penes  
eundem. 465
- Resolv. II.* De jure communi fi-  
liisfamilias habent dominium  
directum bonorum adventitio-  
rum. 467
- Resolv. III.* Peculium profecti-  
tium filiisfamilias pleno jure  
spectat ad Patrem &c. 468
- Dissertatio III.* De prima rerum  
divisione, & modis acquirendi  
dominium jure Gentium. 470
- ARTIC. I. De prima rerum divi-  
sione , & dominiorum parti-  
cularium origine. 471
- Affertio I.* Post peccatum hæc  
divisio licite est facta, & ra-  
tionabiliter. 472
- Affertio II.* Hæc divisio jure Gen-  
tium est introducta. 473
- ARTIC. II. De modis acquirendi  
dominium jure Gentium.
- §. I. Recensentur aliqui similes  
modi. 474
- Primus modus est *occupatio. ibid.*
- Secundus *Nativitas. ibid.*
- Tertius *alluvio. 475*
- Quær. I.* Ad quem spectet notabi-  
lis pars terræ a fundo alieno ab-  
repta, & agro tuo adjecta? *ibid.*
- Quær. II.* Quid dicendum de In-  
sulis recenter natis in mari, vel  
flumine? 476
- Modus quartus acquirendi do-  
minium est specificatio. 477
- §. II. Continuatur præcedens  
materia. 479
- Modus quintus acquirendi do-  
minium jure Gentium est *con-  
fusio. ibid.*
- Sextus modus est *commixtio &  
Permixtio. 480*
- Septimus modus est *accessio. 481*
- ARTIC. III. De Venatione.
- Resolutio. I.* Animalia , natura  
sua mansueta quocumque de-  
veniant, vel aberrant, manent  
Domini prioris. 484
- Resolv. II.* Animalia fera, quam-  
diu retinent naturalem liberta-  
tem, sunt nullius, & de jure  
naturali permissivo primi occu-  
pantis. &c. *ibid.*
- Resolv. III.* Animalia cicura-  
ta, quamdiu habent consue-  
tu-



- tudinem domum redeundi, sunt  
nostra. 485  
*Resolv. IV.* Idem dicendum de  
columbis. *ibid.*  
*Resolv. V.* Venatio potest ju-  
stis ex causis soli Principi re-  
servari. 486  
*Quæstio.* Quid dicendum de iis,  
qui in silva aliena ligna cædunt.  
487  
ARTIC. IV. De Inventione the-  
saurorum, & mineralium. 488  
*Affertio I.* De jure naturæ &  
Gentium thesaurus inventus  
pertinet ad dominium inven-  
toris, & occupantis. 489  
*Affertio II.* De Jure Cæsareo the-  
saurus in proprio fundo re-  
pertus est integer Inventoris:  
si fortuito in alieno fundo est  
reperitus, quoad medietatem  
unam spectat ad inventorem,  
quoad alteram ad Dominum  
fundi. 490  
Quæstiones variæ de hac mate-  
ria. 491 & seqq.  
*Quæst.* Ad quem spectent recens  
inventæ? 494  
ARTIC. V. Ad quem spectent  
bona inventa: item bona va-  
cantia, derelicta? 495  
§. I. Præmittuntur aliqua quæ-  
sita. *ibid.*  
§. II. An is, qui habet bona  
incerta ex delicto, possit ea si-  
bi retinere? 498  
*Affertio* est negativa. 498  
§. III. An bona incerta sine de-  
licto inventor possit sibi reser-  
vare? 500  
*Affertio* est affirmativa. 501  
*Objectiones.* 502  
*Dissertatio IV.* De modo acqui-  
rendi per præscriptionem, vel  
Usucapionem.  
ARTIC. I. Quid sit, & quid juris  
tribuat præscriptio? 507  
*Affertio I.* Definitur Præscriptio.  
*ibid.*  
*Affertio II.* Legitima præscriptio  
etiam pro foro conscientiae va-  
let, & liberat a restitutione. 508  
ARTIC. II. De bona fide.  
§. I. An ad præscriptionem re-  
quiratur fides theologicæ bo-  
næ? 512  
*Affertio* est affirmativa. 513  
§. II. An, & quale dubium ob-  
sit bonæ fidei, & Præscriptio-  
ni? 517  
*Affertio I.* Dubium practicum  
obest bonæ fidei tam in in-  
choatione, quam in continua-  
tione, nisi deponatur. 518  
*Affertio II.* Dubium tamen spe-  
culativum exortum in initio  
vel continuatione possessionis  
probabilius non obest regu-  
lariter bonæ fidei. *ibid.*  
*Affertio III.* Dubium practicum  
probabilius obest bonæ fidei,  
& præscriptionem impedit. 524  
§. III. De fide juridice bona ad  
præscriptionem requisita. 528  
*Affertio I.* Ignorantia, vel error  
invincibilis juris clari, & cer-  
ti tollit regulariter bonam fi-  
dem





dem juridicam, requisitam ad  
præscriptionem ordinariam.

529

§. IV. Aliqua quæsitæ de bona  
fide.

533

ARTIC. III. De possessione re-  
quisita ad præscriptionem.

§. I. Explicantur natura, &  
proprietas possessionis.

538

*Affertio I.* Definatur possessio fa-  
cti.

539

*Affertio II.* Divisiones variæ  
possessionis.

542

*Affertio III.* Possessionis com-  
moda, & privilegia.

545

§. II. An, & quomodo possessio  
sit necessaria ad præscriptio-  
nem?

*Affertio I.* est affirmativa.

549

*Affertio II.* Civilis possessio sine  
naturali sufficit ad præscriptio-  
nem, non autem naturalis si-  
ne civili.

550

ARTIC. IV. De titulo præscri-  
ptionis.

§. I. Varia de natura, & divi-  
sione tituli.

552

*Resolutio I.* Titulus existima-  
tus ad præscriptionem ordi-  
nariam sufficit, si fundetur in  
ignorantia facti alieni.

554

*Resolv. II.* Titulus putativus in  
ignorantia proprii facti sine  
iusta causa ignorandi non suf-  
ficit.

*ibid.*

*Resolv. III.* Ut tempore ordina-  
rio ex titulo emptionis rem ali-  
quam præscribas, non sufficit,  
quod rem talem tibi aliquis

tradat, putans, se eam tibi  
vendidisse, & tu illam ex si-  
mili erronea persuasione acci-  
pias.

555

*Resolv. 4.* Ad aliquas præscri-  
ptiones sufficit titulus præsum-  
ptus.

556

*Resolv. V.* Ad præscriptionem  
ordinariam requiritur titulus  
coloratus, vel existimatus.

558

*Resolut. VI.* Præscriptio extraor-  
dinaria corrumpitur, si detegatur ti-  
tulus vitiosus.

*ibid.*

§. II. Enumerantur varii tituli  
præscriptionis.

559

*Resolutio I.* Titulus præscriptio-  
nis alius est generalis, alius  
specialis.

*ibid.*

*Resolv. II.* Ex titulo *pro empto-  
re* usucapit, qui revera emit  
rem alienam emptione invalida.

*ibid.*

*Resolv. III.* Quæ sint notanda  
de titulo *pro hærede*.

*ibid.*

*Resolv. IV.* Titulus *pro donato*,  
sufficiens ad præscriptionem  
ordinariam, tunc datur, quan-  
do quid alicui donatur ab eo,  
qui creditur Dominus talis rei,  
& non est.

561

*Resolv. V.* Titulus *pro derelicto*  
non habet locum, si is, qui  
vere est Dominus rei eam de-  
relinquit, aut derelinquere  
creditur.

*ibid.*

*Resolv. VI.* *Pro dote* præscribit,  
qui rem alienam pro dote acci-  
pit.

562

*Resolv. VII.* Tituli generales *pro  
suo*





*suo*, & pro *soluto* ordinarie non recte allegantur sine suis specialibus, ex quibus ortum habent. *ibid.*

ARTIC. V. De objecto, & subiecto prescriptionis.

§. I. De objecto prescriptionis. 565

Res vitiosæ quæ præscribi nequeunt. *ibid.*

§. II. De subiecto prescriptionis.

*Affertio I.* Quinam non possint præscribere. 572

*Affertio II.* Contra quos non possit præscribi. *ibid.*

ARTIC. VI. De tempore ad prescriptionem requisito, & nonnullis aliis huc facientibus. 573

*Affertio I.* Res mobiles privatorum cum titulo, & bona fide regulariter præscribuntur triennio. 574

*Affertio II.* Ad præscribenda bona immobilia privatorum cum titulo de jure communi requiritur spatium 10. annorum inter præsentis: sine titulo autem utrobique sufficit tempus 30. annorum. 575

*Affertio III.* Ad præscribenda bona immobilia contra Ecclesiam aut alias pias causas cum, vel sine titulo ordinarie sufficiunt 40. anni, excepta Ecclesia Romana &c. 576

ARTIC. VII. De prescriptione actionum, servitutum, debitorum indefinite contracto-

rum, præstationum annuarum.

§. I. De prescriptione actionum, ac Servitutum. 580

*Resolv. I.* Servitus personalis præscribitur cum titulo & bona fide 10. annis inter præsentis, & 20. inter absentes: sine titulo autem annis 30. 582

*Resolv. II.* Idem dicendum de servitute reali. *ibid.*

*Resolv. III.* Ad prescriptionem servitutis continuæ etiam sine titulo, interveniente tamen scientia, & potentia adversarii sufficiunt pariter 10. anni inter præsentis, & 20. inter absentes. *ibid.*

*Resolv. IV.* Servitus discontinua absque titulo solum præscribitur tempore immemoriali. 583


*Resolv. V.* Servitutes extinguuntur per non usum longo tempore, seu annis decem inter præsentis, 20. inter absentes. 584

§. II. An, & quo tempore debita indefinite contracta possint præscribi a debitore sciente jus alterius? 587

*Affertio* Talia debita neque prescriptione longissimi temporis, seu 30. annorum possunt præscribi a debitore, sciente jus Creditoris. 588

§. III. An, & quanto tempore præscribi possint, aut extin-





tingui præstationes annuæ ?

592

*Affertio* Hujusmodi annuis debitis contra privatum 30. contra Ecclesias, & Monasteria 40. annorum cessatione præscribitur.

593

*Dissertatio V.* De justitia & injuria.

ARTIC. I. Quid, & quotuplex sit justitia, ac quale objectum habeat ?

§. I. Varia notanda de justitiæ natura, & divisione.

597

§. II. De justitia commutativa

*Affertio I.* Justitia commutativa est vere & proprie dicta Justitia, adeoque virtus specialis ab omnibus aliis distincta.

602

*Affertio II.* Ejus objectum materiale proximum est operatio externa, per quam alteri tribuitur jus suum, & ponitur æqualitas inter debitum unius, & jus activum alterius.

602

*Affertio III.* Ejus objectum formale quo est honestas æqualis, relucens in illa operatione externa, quæ est objectum materiale justitiæ.

605

*Quæstio.* Quale medium observet Justitia commutativa ?

606

§. III. De justitia distributiva, & legali, nec non retributiva.

608

*Affertio I.* Justitia distributiva est tantum analogice justitia.

*ibid.*

*Affertio II.* Justitia legalis est virtus specialis, ab omnibus reliquis distincta.

609

*Affertio III.* Neque justitia legalis est proprie, & univoce dicta justitia.

610

ARTICULUS II. Inter quos possit intercedere justitia commutativa ?

§. I. Præmittuntur notiora.

612

§. II. An Deus possit obligari creaturæ ex rigorosa justitia ? &c.

*Affertio* est negativa.

614

§. III. An creatura erga Deum possit exercere justitiam commutativam stricte dictam ?

*Affertio I.* Est negativa.

621

*Affertio II.* Potest tamen creatura erga Deum exercere actum Justitiæ, proprie dictum.

622

ARTIC. III. An homo possit satisfacere ex rigorosa justitia per actus iteratos ?

*Affertio* est negativa.

625

ARTIC. IV. De injustitia, seu injuria.

630

*Affertio I.* Scienti, & valide, ac efficaciter consentienti nequit fieri injuria.

*ibid.*

*Tractatus II.* De restitutione.

*Dissertatio I.* De materia, necessitate, & radicibus restitutionis.

§. I. Quid sit, & ad quam virtutem pertineat restitutio ?

634

*Affertio*





- Affertio I.* Restitutio est rei acceptæ redditio, vel damni illati compensatio secundum æqualitatem arithmeticam. 634
- Affertio II.* Restitutio est actus proprius solius justitiæ commutativæ. 635
- §. II. An oriatur obligatio restitutionis ex violatione justitiæ distributivæ? 636
- Affertio I.* Dignus, aut dignior unice ratione suæ etiam majoris dignitatis non habet jus strictæ dictum ad officia publica, & bona communia Reipublicæ redundantia. 637
- Affertio II.* Violatio solius justitiæ distributivæ non importat obligationem restitutionis. 639
- §. III. An non saltem justitia commutativa obliget ad restitutionem illum, qui inique distribuit bona communia? 640
- Affertio I.* Distributor iniquus officiorum sæcularium, & beneficiorum Ecclesiasticorum per se, & regulariter nihil tenetur restituere Personæ dignæ, aut digniori omiffæ. 643
- Affertio II.* Scienter & voluntarie eligens indignum, & ineptum ad beneficium Ecclesiasticum, aut officium sæculare publicum sæpe obligari potest ad restitutionem Ecclesiæ, vel Reipublicæ faciendam. 644
- Affertio III.* Qui ad officium, vel beneficium eligit notabiliter minus dignum, dummodo talis absolute dignus appareat, non tenetur ad restitutionem Ecclesiæ, vel Reipublicæ faciendam. *ibid.*
- ARTIC. II. De necessitate restitutionis.
- §. I. An restitutio sit necessaria necessitate medii, vel præcepti? 648
- Affertio* est negativa de necessitate medii: est tamen de necessitate præcepti. 649
- §. II. An præceptum restitutionis sit affirmativum, vel negativum?
- Affertio* Est potius affirmativum, quam negativum. 651
- Dissertatio II.* De radicibus restitutionis. 654
- ARTIC. I. De restitutione debita ex re accepta, seu a bonæ fidei possessore.
- §. I. Quid, & quantum possessor bonæ fidei debeat restituere de substantia rei alienæ? 655
- Affertio I.* Possessor bonæ fidei, ubi certo cognovit, rem hæcenus possessam, esse alienam, tenetur eam restituere, & quidem in individuo, per se seloquendo. 656
- Affertio II.* Si res possessa non quidem extat formaliter apud bonæ fidei possessorem, est tamen apud ipsum virtualiter, in quantum hic inde est factus ditor,





tior, tunc tenetur illud restituere, in quo ex re aliena factus est locupletior. 657

*Affertio III.* Si bonæ fidei rem alienam ita consumpsit, ut neque per eam factus sit ditior, ad nihil restituendum tenetur. *ibid.*

§. II. An bonæ fidei possessor una cum re aliena teneatur etiam restituere fructus ex ea perceptos? 659

*Affertio I.* Fructus mere industriales non tantum bonæ, sed & malæ fidei possessor pleno jure facit suos, ita ut nihil pro iis teneatur restituere, quamvis adhuc formaliter existant, vel possessor inde factus sit ditior. 660

*Affertio II.* Bonæ fidei possessor tenetur una cum re aliena restituere fructus necdum perceptos, seu a solo, vel a re fructifera necdum separatos, deductis tamen expensis utiliter factis, & æstimatione laboris. 661

*Affertio III.* Idem cum re aliena tenetur restituere fructus etiam perceptos tam naturales, quam mixtos, formaliter existentes, nisi sint hi jam legitime præscripti: potest tamen ab iis iterum deducere expensas utiles, æstimationem laboris, & industriae. *ibid.*

§. III. An bonæ fidei possessor etiam obligetur ad restituendos

fructus bona fide ante litis contestationem consumptos, quando ex illis factus est locupletior?

*Affertio.* Is ante præscriptionem probabilius tenetur restituere fructus tam naturales, quam mixtos, etiam æquivalenter existentes, seu in quantum factus est ditior: deductis tamen expensis & æstimatione laboris. 665

§. IV. Quid in genere debeat restituere malæ fidei possessor?

*Affertio I.* Is debet restituere rem, & fructus ejus naturales, & mixtos, tam pendentes, quam perceptos: etiam rem alienam, & fructus prædictos consumptos, quamvis inde non sit factus ditior. 675

*Affertio II.* Idem tenetur etiam illos fructus restituere, quos ipse quidem percepit, aut omnino consumpsit, Dominus autem nunquam percepisset. 676

*Affertio III.* Malæ fidei possessor tenetur etiam restituere illos fructus, quos ipse non percepit, percepisset autem Dominus. 677

*Affertio IV.* Non tenetur tamen is reddere fructus mere industriales, neque pro foro interno fructus, quos ipse non percepit, neque Dominus: quamvis





vis ipse, vel Dominus eos potuisset percipere. 678

ARTIC. II. De restitutione debita ex titulo injustæ acceptio- nis. 682

§. I. An ex sola culpa theolo- gica nascatur obligatio resti- tuendi? 684

*Affertio I.* Est affirmativa. 686

*Affertio II.* Nec Lex Aquilia, neque leges noxales obligant in conscientia ante sententiam Judicis, sine culpa theologica. 687

*Affertio III.* Post sententiam Ju- dicis legitime latam præstari debet etiam in foro conscien- tiæ culpa juridica etiam sine culpa theologica antecedente. 688

§. II. An, & qualis obligatio re- stituendi nascatur ex culpa the- ologica solum veniali? 690

*Affertio I.* Ex culpa veniali non plene deliberata non oritur ob- ligatio gravis compensandi to- tum damnum, vel partem no- tabilem damni. 691

*Affertio II.* Neque obligatio le- vis ad compensandum damnum grave, vel gravem ejus partem. 694

§. III. Continuatur præcedens materia.

*Affertio I.* Qui per plura fur- ta minuta, & peccata venia- lia plene deliberate commissa pervenit ad materiam gravis

damni, tenetur postea sub mor- tali illud refarcire. 698

*Affertio II.* Si quis unica actio- ne venialiter mala alterum læ- sit injuste, sciens quidem gra- vitatem materiale, non au- tem formalem damni, tenetur sub mortali ad restitutionem totius damni gravis. 699

ARTIC. III. An teneatur ad re- stitutionem, qui alterum im- pedit a consequendo bono, vel ipsi ex odio nocet? 700

§. I. An teneatur ad restitutio- nem, qui alterum negative tan- tum damnificat, se impedit a consecutione alicujus boni? 701

*Affertio I.* Qui alterum impedit a consecutione boni, quod ipsi jam est debitum ex justi- tia commutativa, peccat con- tra justitiam, & tenetur com- pensare damnum. 2. Qui au- tem aliquem impedit a conse- cutione boni, quod ipsi ex justitia commutativa non est de- bitum, nec peccat contra ju- stitiam, nec ad aliquam resti- tutionem tenetur, dummodo non impediat vi vel fraude. 703

*Affertio II.* Regulariter qui al- terum illegitima vi vel fraude, & mendaciis a consecutione boni libere, & licite conferen- di, impedit, peccat contra justi- tiam, & tenetur tantum restituere, quantum valebat spes boni impediti. 707

d 2

*Affer-*



*Affertio III.* Non tenetur ad restitutionem, qui aliquem vi illegitima, vel fraude &c. impedit a bono, quod talis non potest iuste accipere. 711

*Affertio IV.* Neque qui fraude, aut aliis malis artibus impedit alterum a bono, quod sine peccato gravi contra quamcunque virtutem etiam a iustitia distinctam non poterat accipere, aut alius non dare. *ibid.*

§. II. An actio externa, quæ secundum se non est contra ius alterius, aut contra iustitiam, fiat talis, si ea ponatur animo nocendi proximo? 714

*Affertio* est negativa, si quis sine vi vel fraude ab assequendo bono ex iustitia commutativa indebito impeditur: nec tenetur restituere, etsi impediat ex odio & mala intentione alteri nocendi &c. 715

ARTIC. IV. De obligatione restituendi ex contractu, & quasi contractu.

§. I. Notanda. 720

§. II. An casus fortuitus, & culpa juridica debeat præstari ex contractu?

*Affertio I.* In contractibus, in quibus dominium rei acceptæ non transfertur in accipientem, accipiens per se, & regulariter non tenetur ad restitutionem, ex casu mere fortuito. 722

*Affertio II.* De se loquendo ne-

mo sub gravi tenetur ad restitutionem in contractibus ante sententiam iudicis, nisi ex culpa theologica gravi: bene autem post sententiam. 726

§. III. De obligatione restituendi ex quasi contractu, & aliis huc pertinentibus.

*Affertio I.* Nemo per se loquendo obligatur ex quasi contractu ad compensationem damni gravis, nisi ob culpam theologiam gravem. 729

ARTIC. V. De obligatione restituendi ex damno per ignorantiam, errorem, aut per accidens dato.

§. I. De damno per accidens, & præter intentionem dato, per restitutionem iterum reparando, quæ sita varia. 734

§. I. An compensari debeat excessus damni invincibiliter ignoratus?

*Affertio* ejusmodi damnificator non tenetur compensare excessum damni invincibiliter ignoratum. 741

§. III. An errans in persona læsa teneatur ad restitutionem, & quidem ex titulo injustæ acceptionis? 746

*Affertio.* Qui furatur, consumit, aut destruit rem Titii, putans invincibiliter, esse Stichii, tenetur ad restitutionem, quamvis inde non evaserit ditor. 747

ARTIC.





Artic. VI. Reliqua de restitutione facienda a bonæ, & malæ fidei possessore.

§. I. An ille, qui rem alienam a fure emit, possit eam eidem restituere ad recuperandum suum pretium? 752

*Affertio* est affirmativa de emptore bonæ fidei. 753

*Quer.* An etiam emptor malæ fidei, dum eam postea pœnitet, possit rem furtivam emptam furi reddere ad recuperandum pretium? *responsio* est etiam affirmativa. 760

§. II. De causis cooperantibus ad injustam damnificationem. 761

Deducuntur resolutiones practicæ. 765

Artic. VII. De causis excusantibus a restitutione.

§. I. An accipiens, & absumens rem alienam in extrema necessitate teneatur ad restitutionem. 771

*Affertio* est negativa quoad pauperem re, & spe. 772

§. II. An excuset a restitutione impotentia restituendi in eodem genere? 775

*Affertio* est affirmativa. 776

*Tractatus III.*

*Dissertatio I.* De contractibus in genere.

Artic. I. De natura, divisione, & requisitis contractus.

§. I. Quid, & quotuplex sit contractus? 783

§. II. Qualis consensus requiratur ad contractum?

*Affertio.* Ad valorem contractus requiritur verus consensus internus. 786

Artic. II. An dolus, vel error obstent valori contractus?

§. I. Notanda, & aliquæ conclusiones. 790

*Affertio I.* Error, vel dolus circa substantiam rei non solum antecedens, sed etiam concomitans vitiat, & irritat contractum. 791

*Affertio II.* Error, vel dolus etiam antecedens, qui versatur circa accidentia qua talia, jure naturæ contractum non invalidat. 792

*Affertio III.* Talis error, vel dolus antecedens circa accidentia qua talia neque jure positivo irritat contractum onerosum: si ve is sit stricti juris, si ve bonæ fidei. 796

§. II. Continuatur præcedens materia.

*Affertio IV.* Si dolus circa qualitatem, qua talem, det causam contractui, & proveniat ab alio contrahente, vel saltem alter contrahens sit particeps doli, tunc contractus ejusmodi, si sit naturæ sua solubilis, potest rescindi ad arbitrium decepti. 799

Artic. III. De contractibus metu initis.

d 3

§. I.





§. I. Præmittuntur facilliora. 803

*Affertio I.* Valet in foro externo, & interno actus vel contractus metu gravi intrinseco initus, ita quidem ut neque propter ejusmodi metum possit rescindi. 806

*Affertio II.* Valent etiam, nec rescindi possunt contractus initi ex metu gravi extrinseco, juste tamen incusso. *ibid.*

§. II. Sequitur difficultas præcipua.

*Affertio III.* De jure naturali, & positivo valent etiam aliqui actus, & contractus ex quocunque metu gravi injusto, & directe ad extorquendum consensum incusso celebrati. 811

§. III. Aliqua quæsitæ. 817

*Dissertatio II.* De promissione, & testamentis in specie.

ARTIC. I. De promissione.

*Affertio I.* Ad promissionem validam, & obligantem in conscientia non sufficit semiplena de liberatio, vel voluntarium imperfectum, etsi promissio tantum sit levis: sed requiritur plena libertas & advertentia. 824

*Affertio II.* Plena libertas, requisita ad validam promissionem, votum, vel juramentum promissorium &c. potest stare cum ingenti passione inordinati amoris, iracundiæ &c. 825

*Affertio III.* Promissio ante acceptationem non parit obligationem in promittente. 826

*Affertio IV.* Promissio potest ex

fidelitate obligare, & tunc obligat solum sub levi etiam in materia gravi. 828

ARTIC. II. De ultimis voluntatibus.

§. I. Quid, & quotuplex sit ultima voluntas? 832

§. II. Aliquæ conclusiones de valore Testamentorum.

*Affertio I.* Testamentum privilegiatum, conditum in terris, & a personis Romano Imperio temporaliter subjectis, deficiens in aliqua solemnitate est irritum in foro externo, saltem regulariter. 840

*Affertio II.* Etsi Testamentum careat una, vel pluribus solemnitatibus, a jure civili requisitis, valet tamen etiam pro foro i. externo quoad legata, & Fideicommissa. z. imo etiam quoad institutionem hæredis pro casu, quo hæres, alias ab intestato succedens, ipsemet audivit, & fatetur voluntatem Testatoris. 843

*Affertio III.* Etiam in casu, quo hæres ab intestato factioni Testamenti non interfuit, valet Testamentum minus solemnne in foro interno quoad legata, & institutionem hæredis, quamdiu non promuntiatur invalidum. 846

§. III. Resolvuntur varia.

*Affertio I.* Etsi Testamentum profanum ob defectum solennitatum declaretur nullum, tamen legata pia, ei inserta, si de iis legitime constet, subsistunt. 851

*Affer-*





*Affertio II.* Regulariter corruente Testamento profano corruunt etiam legata profana, etsi forte sufficiens solemnitas pro legato adesset. 851

*Affertio III.* Legata ad profanas causas facta, pro Testamento sine solemnitatibus juris civilis confecto inserta, valent & sunt præstanda. 852

*Affertio IV.* Non tantum in tetrīs Pontificiis, sed etiam Romani Imperii, pro foro quoque externo valent testamenta, ad pias causas sine solemnitatibus juris civilis: dummodo habeant sufficientem probationem ultimæ voluntatis. 853

*ibid.*

*Affertio V.* Testamentum posterius insolemne, ad pias causas tamen factum, derogat priori solemnī, ad causas profanas. *ibid.*

*Affertio VI.* Potest etiam legari res aliena, servatis debitis conditionibus. 853

ARTIC. III. De contractu, & lucro ob turpem causam. 854

§. I. Quid juris tribuat contractus ob turpem causam?

*Affertio I.* Contractus turpis ante impletam conditionem turpem nec obligat promittentem ad solvendum pretium, neque alterum ad patrandum facinus, seu purificandam conditionem: imo uterque potest, & debet rescindi a contractu. 855

*Affertio II.* Regulariter, & in foro conscientiæ contractus de re

turpi, adimpleta turpi conditione, obligat promittentem ad solvendum promissum, & Promissarius potest illud acceptare, imo & exigere. 856

*Affertio III.* Præcedens assertio secunda etiam locum habet, etsi conditio turpis sit contra justitiam. 857

§. II. De conditione operis aliunde debiti.

*Affertio I.* Retineri potest, quod accipitur ob causam honestam, non debitam ex justitia. 863

*Affertio II.* Si opus honestum sit debitum ex justitia, nihil pro eo accipi potest. 865

ARTIC. IV. An licitus sit census Germanicus? 867

*Affertio* est affirmativa. 868

ARTIC. V. De contractu puro, conditionato, in diem, sub modo &c.

*Quer. I.* Quid sit contractus purus, & non purus? 870

*Quer. II.* Quid sit, & quotuplex conditio, quæ potest contractui adjici? 871

*Quer. III.* Quid sit causa? 873

*Quer. IV.* Quid sit demonstratio? *ibid.*

*Quer. V.* Quid sit modus? 874

*Quer. VI.* Quid sit obligatio, vel contractus in diem? *ibid.*

*Quer. VII.* An obligatio annua, vel menstrua sit pura, vel in diem? 875

*Dissertatio III.* Resolvuntur aliqua ex contractu de judiciis.

ARTIC.





ARTIC. I. An iudex debeat ferre sententiam secundum allegata, & probata, etiam contra propriam scientiam privatam? 880

*Affertio I.* Quando Iudex non habet omnino certam, ac indubitatam scientiam privatam, tunc tenetur eam deponere, & judicare secundum allegata, & probata. 881

*Affertio II.* Iudex regulariter non potest condemnare illum, qui quidem a iudice privata scientia scitur esse reus, sed in iudicio nec est confessus, nec convictus: a fortiori, si se in iudicio probaverit innocentem. *ibid.*

*Affertio III.* Quando Iudex habet certam scientiam privatam pro reo, id est, si prorsus indubitanter novit, eum esse innocentem, qui tamen secundum allegata, & probata ostenditur nocens, tunc primo tenetur omnia tentare pro liberando ejusmodi reo. 882

§. II. Continuatur præsens materia.

*Affertio IV.* In causis civilibus,

ubi agitur e.g. de debito solvendo, & in minoribus criminalibus, ubi agitur e.g. solum de multa pecuniaria, aut privatione officiorum, potest Iudex ferre sententiam secundum allegata, & probata, non obstante notitia privata innocentiae. 883

§. III. Resolvitur præcipua difficultas hujus articuli.

*Affertio V.* Nullo casu Iudici concessum est, ut hominem secundum publicas allegationes, & probationes convictum morti adjudicet, si ejus innocentiam privatim certo cognitam habet. 887

ARTIC. II. Resolvitur quæsitum notabile de reo, an reus legitime a iudice interrogatus teneatur fateri crimen, revera a se commissum, si ob illud timeat pœnam mortis, mutilationis, vel confiscationis omnium bonorum, aut aliam gravissimam, & per celationem veritatis spes sit evadendi? 893

*Responsio est affirmativa.*







# INTRODUCTIO.

## De Incarnatione Verbi Divini.



Mysterium hoc, quod præsens pars 1. Tom. IV. examinat, variis nominibus exprimi solet. S. Dionysius *ineffabilem Jesu in Carne apparitionem appellat*. S. Gregorius *Cardinem & Verticem omnium miraculorum*. S. Bernardus *mixturam singulariter mirabilem, & mirabiliter singularem*: alii dicunt *adventum, descensum, missionem, & œconomiam Verbi Divini*.

Magis tamen usitatum est vocabulum & nomen *Incarnatio*; quod Catholicis nihil aliud sonat, quam assumptionem totius naturæ humanæ in unitatem suppositi, & Personæ Divinæ. Quare Incarnatio formaliter spectata est Divinæ naturæ cum humana unio in eadem Verbi Divini Persona: seu est unio hypostatica Verbi Divini cum Natura humana.

Fundamentum hujus Vocabuli *Incarnatio* ministravit Evangelista illis sanctissimis verbis. Joan. 1. *Verbum caro factum est*: quæ exponens D. Augustinus L. 13. de Trinit. C. 19. ait. cum le-  
P. Kick Theol. Tom. IV. A



go : *Verbum caro factum est ; intelligo verum Dei Filium in carne humana , agnosco verum hominis filium : & utrumque simul in una Persona Dei , & hominis ineffabili largitate coniunctum.*

Ex quibus patet, *Incarnationem* accipi per *synechdochen*, ita, ut ex parte, seu carne intelligatur totum, seu tota natura humana : sic neque enim Verbum solam carnem, sed totam Naturam humanam ex anima & corpore integro constantem assumpsit. Quæ *synechdoche* etiam alibi adhibetur à Scriptura, ut Gen. 6. v. 12. *omnis quippe caro corruperat viam suam.* & Luc. 3. *videbit omnis caro salutare Dei :* ubi *Li omnis caro* in utroque textu idem significat, ac *omnis homo.*

Et quamvis non solum caro, sed & anima pro homine sumatur, tamen assumptio Naturæ humanæ potius à carne, quæ est pars ignobilior, dicta est, quàm ab anima, ob varias congruentias.

Imo enim caro assumpta tamquam pars ignobilior magis quam anima exprimit exinanitionem filii Dei in assumptione humanitatis. 2do. Quia hoc nomen exprimit magis infirmitates nostræ naturæ, quas esse assumptas à Verbo divino difficilius apparet nostro intellectui ; unde peculiari vocabulo exprimendum erat. 3tio. Caro magis cadit sub sensus, & est notior nobis, quàm anima ; atqui nomina desumi solent à notioribus. 4to. Quia hoc mysterium non videtur satis catholicè posse dici animatio ab anima assumpta, sicut dicitur Incarnatio à carne assumpta ; quia animatio significat unionem ad corpus per modum formæ informantis ; sed non potest sine errore dici, quòd Verbum habeat rationem formæ informantis respectu corporis Christi, ut ostendatur in decursu.

Rident quidem Hæretici hanc vocem *Incarnatio*, eo quod, ut ajunt, nec Ciceroniana, aut bene Latina, nec ab antiquis P.P. usitata sit. Verùm ipse Cicero eorum imperitiam ostendit, dum Academicorum 1. dicit : *dabitis profectò, ut in rebus inusitatis utamur verbis interdum inauditis, quod Græci ipsi faciunt.* & 1. *De natura Deorum :* sunt rebus novis nova ponenda nomina. Neque refert, quòd hæc vox in scripturis non reperiatur : etenim sal-

tem



tem fundamentum ejus ex Scriptura constat. Deinde licet etiam Ecclesiae ad rem pro varietate temporum melius explicandam, novum & in scripturis, & P.P. nondum expressum vocabulum adhibere. Testatur etiam Antonius Mayr, vocem *Incarnatio* in SS. PP. latinae Linguae optimè gnaris reperiri, ut S. Augustino L. 10. de civit. c. 24. & 29. & aliis.

Ceterum scire ea, quae in hac parte agitantur, maxime decet Sacerdotes, tanquam Christi Ministros, ne dum sermonibus ad populum de capite suo loquuntur, turpiter hallucinentur, ut sapienter monet quidam eximius, & jam laudatus Sacrae Theologiae Doctor in praefatione ad istum Tractatum. His praemissis sit.

## TRACTATUS I.

### DISSERTATIO I.

*De possibilitate, cognoscibilitate, existentia, convenientia, & necessitate Incarnationis Verbi Divini.*

### ARTICULUS I.

*De possibilitate hujus Mysterii.*

**A**SSERO. Possibilis est Incarnatio Verbi Divini: ita omnes Catholici. Prob. 1. Ab actu ad potentiam valet consequentia; atqui actu facta est Incarnatio; ut fides docet: *Verbum caro factum est.* Joann. 1. ergo potest fieri. 2

Prob. 2. Omnes repugnantiae apparentes, petita ex parte Personae assumentis, humanitatis assumptae, unionis & compositi resultantis ex tali unionis & assumptione possunt solvi, ut solutio objectionum ostendet, ergo hoc mysterium non implicat. Haec probatio videri potest in Scoto. 3. D. 1. q. 1. N. 4.

Ante solutionem objectionum nota ex nostro Frassen, & R. P. Viva, unionem hypostaticam, qua natura humana in Christo  
A 2 conjun-



conjungitur Verbo Divino, esse intrinsecam, & formaliter subiectatam in humanitate Christi, & esse solum terminatam ad Verbum Divinum, in quo minime recipitur; nec tamen esse penitus extrinsecam Verbo, seu Filio Dei, sed esse mediam inter intrinsecam & extrinsecam. Intrinseca Verbo Divino est, quatenus sicut aliae uniones reales substantiales, facit unum per se ex Verbo, & natura humana, exigit praesentiam realem Verbi in humanitate, & est ratio, cur humanitati unitae communicentur Idiomata, seu praedicata divina, & vicissim Deo, ac Verbo communicentur praedicata humanae naturae convenientia. Simul tamen est extrinseca Verbo, quia ad hoc solum extrinsecè terminatur, non vero formaliter in eo tanquam subiecto recipitur: etenim Deus, ac Verbum Divinum nullam formam creatam, (qualis etiam est unio hypostatica) recipere, bene verò extrinsecè terminare potest. Ea de causa unio hypostatica à DD. Angelico & Subtili nunc intrinseca, nunc extrinseca Verbo vocatur: est ergo intrinseca Verbo terminativè, non subiectivè, vel informativè.

## OBJECTIONES.

Objic. 1. Incarnatio repugnat Verbo Divino; ergo. A. prob. si Verbum D. incarnaretur, mutaretur intrinsece; atqui Verbo Divino repugnat omnis mutatio intrinseca; ut certum, ac de fide est; ergo Incarnatio repugnat Verbo Divino. R. N. a. ad prob. D. M. Verbum mutaretur, si unionem hypostaticam reciperet intrinsece per modum subiecti C. M. si Verbum Divinum unionem hypostaticam tantum intrinsecè terminaret per modum termini purissimi, qui perficit quidem, non verò perficitur N. M. Igitur verbum acquirendo per Incarnationem de novo unionem sibi terminative intrinsecam, habet quidem aliud intrinsecum de novo; non tamen se habet aliter intrinsece, nec mutatur intrinsece; quia in se per modum subiecti perfectibilis non recipit istam unionem, sed tantum terminat.

Dices. 1. Verbum Incarnatum est habens humanitatem. Ergo Deus Verbum est subiectum humanitatis R. d. a. est habens humanitatem receptive & subiective n. a. terminative terminatione intrinseca per unionem physicam in humanitate receptam, & ad Verbum terminatam c. 2.

Dices 2.



Dices 2. Murus à me visus non habet meam visionem, licet eam tanquam objectum terminet: ergo etiam Verbum D. Incarnatum non habet humanitatem, si eam tantum terminet, & non physice in se recipiat. R. N. C. & parit. visio mea non unitur reali unioni ipsi muro, nec vi unionis physicae exigit praesentia intima inexistere murus visioni, sicut Verbum incarnatum naturae humanae assumptae, & hypostaticae sibi unitae: ergo.

Dices 3. Verbum Divinum per Incarnationem transfret de potentia unibilitatis ad actum unionis. 2. Transfret de privatione ad habitum, seu de absentia unionis ad habendam unionem; sed sic transire est mutari; ergo. R. ad 1. D. a. Transfret de potentia unibilitatis ad actum unionis in se recipiendum N. a. terminandum intrinsece c. a. verum hic transitus, qui fit sine forma in se intrinsece recepta non est mutatio, quia per illum Verbum se intrinsece non habet aliter, ut dictum est. Ad 2. N. M. privatio enim est absentia formae in subiecto capaci; atqui Verbum Divinum non est subiectum capax alicujus novae formae recipiendae: etenim omnis forma nova recepta in subiecto reddit hoc aut perfectius aut deterius; atqui Verbum tanquam Deus non potest fieri perfectius, aut deterius: ergo neque potest recipere formam, per quam fieret perfectius, aut deterius.

Dices 4. Unio hypostatica affert Verbo novam perfectionem: ergo, quamvis verbum hoc hominem tantum terminet, tamen per eam perficitur, & mutatur. A. prob. propter hanc unionem potuit Verbum mereri, & condigne satisfacere; atqui posse mereri, & condigne satisfacere est nova perfectio: ergo. R. N. a. utrumque. Neque post unionem hypostaticam potest Verbum divinum, & Deitas Verbi mereri, vel satisfacere: meritum enim & satisfactio sunt actiones solis creaturis propriae: quia in iis requiritur aliqua subiectio, quae Deo nequit competere. Unde per unionem ad Verbum tantum actionibus humanitatis Christi accedit nova perfectio, & condignitas ad merendum, & satisfaciendum.

Dices 5. Saltem complexum ex Verbo & humanitate Christi est quid perfectius, quam solum Verbum: ergo humanitas Christi addit perfectionem Verbo Divino R. N. a. Jam in Tractu de



Deo uno dictum est, Complexum ex Deo & creatura non esse perfectius, quàm sit Deus solus, ex ratione, quia solus Deus continet eminenter omnes perfectiones creatas: ergo quia etiam Verbum Divinum est Deus, non erit complexum ex Verbo & humanitate Christi unita perfectius, quàm solum Verbum; quia etiam hoc solum eminenter continet, quidquid perfectionis in unione hypostatica & humanitate assumpta reperitur,

Dices 6. Si Deus de novo in tempore aliquid cognosceret, vel vellet, quod non cognovit, aut voluit ab æterno, mutaretur extrinsece: ergo etiam mutatur intrinsece, si de novo in tempore unitur humanitati, cui non fuit unitus ab æterno, R. N. C. & parit. Per novam volitionem & intellectionem in tempore conveniret Deo novum exercitium vitale in tempore, quod ei non convenisset ab æterno: & sic mutaretur saltem moraliter tali mutatione, quæ maximam imperfectionem in Deo argueret, fieret enim ex nesciente sciens, ex nolente, vel non volente volens: quod in Deo implicat, ut in Tractatu de Deo uno in quæstione de immutabilitate Dei dici solet. Ast talis mutatio Deo disconveniens non significatur per hoc, quod terminet unionem hypostaticam in tempore, sicut & per hoc Deus non mutatur, quod extrinsece terminet dependentiam creaturæ, quam non terminavit ab æterno.

4. Objic. 2. Repugnat etiam naturæ humanæ assumi & personari à Personalitate divina: ergo. A. prob. natura humana est finita, & Personalitas divina est infinita: ergo nulla est proportio inter hanc & illam; consequenter illa non potest per hanc assumi & personari. R. N. a. Ad prob. D. conseq. ergo nulla est proportio entitativa C. a. in ordine ad unionem N. a. etiam anima rationalis & corpus non habent proportionem entitativam; habent tamen in ordine ad unionem.

Dices 1. Personalitas creata est aliqua causa & effectus formalis; atqui Deus nequit supplere causam & effectum formalem: ergo Deus, seu Verbum nequit personalitatem creatam in natura humana supplere: ergo neque in ordine ad unionem hypostaticam, vi cuius Personalitas divina unitur naturæ humanæ, & eam personat, habetur proportio inter naturam humanam, & personalitatem Divinam. R. C. M. & D. m. Deus nequit supplere omnem effectum causæ formalis. C. m. aliquem N. m. subsistentia



sistentia & personalitas creata posito, quod consistat in positivo (quod videtur hæc objectio supponere) duo præstat. 1mo. afficit naturam creatam per modum formæ inhærentis: & hunc effectum non potest Deus præstare. 2do. Terminat naturam ultimate, & reddit eam incommunicabilem alteri distincto supposito, & sic terminando denotat illam subsistentem: & hunc secundum effectum Verbum supplere potest, non quidem largiendo connaturalem subsistentiam, qua potius privat, sed aliam æquivalentem, vel digniorem, puta propriam subsistentiam & personalitatem Verbi, quæ terminat ulteriorem communicationem supposito alicui alteri, & quidem longe præstantiori modo, quàm a propria personalitate terminaretur; quia a propria personalitate non haberet natura humana dignitatem illam, quam consequitur à Personalitate divina. Unde natura humana Christi per privationem & absentiam propriæ personalitatis non patitur violentiam, quia absentia hæc compensatur per aliquid melius, nimirum per suppositum divinum.

Dices 2. Personalitas D. Verbi, cum juxta Scotum non sit formaliter perfecta, non potest continere perfectionem personalitatis creatæ: ergo neque potest eam supplere. R. N. Conf. Non ideo Personalitas verbi potest supplere personalitatem creatam in natura humana, quia personalitas Verbi esset formaliter infinita, ac æquivalenter, vel eminenter contineret perfectionem creatæ personalitatis: etenim natura Divina, quamvis formaliter infinita sit, & omnes perfectiones creatas in se eminenter comprehendat, tamen non potest adæquate & ultimate formaliter supplere personalitatem creatam, & naturam creatam per se reddere ultimato formaliter incommunicabilem in ratione personæ, cum & ipsa Natura Divina in se præcise spectata non sit ita formaliter incommunicabilis: adeoque juxta Doctorem. in 3. D. 1. q. 1. non ex perfectione entis personalis colligitur, quod personalitas verbi possit supplere personalitatem creatam, sed ex hoc, quia Persona Divina in ratione personandi est independens in se formaliter; atqui omne independens in aliquo genere potest terminare dependentiam alterius, quod in tali genere dependentiam habet, posito, quod dependens ad independens sufficienter applicetur, & uniatur.



Instabis 1. Non potest natura humana existere per existentiam Verbi : ergo neque personari per personalitatem Verbi. R. N. C. existentia est identificata naturæ humanæ , non vero personalitas , quæ proinde à natura humana separari , & per divinam subsistentiam suppleri potest.

Instabis 2. Subsistere est stare per se ; atqui subsistere per alienam personalitatem non est stare per se , sed per aliud : ergo implicat , aliquam naturam subsistere per alienam personalitatem : ergo &c. R. D. M. subsistere est stare , seu habere suum ultimum complementum substantiale , & non esse unitum alteri supposito , quam illi , quod hic & nunc personat , & facit subsistere C. M. in alio sensu N. M. atqui etiam aliena personalitas impertit hoc ultimum complementum , & hos effectus.

Instabis 3. Sessio aliena non potest me facere sedentem ; ergo neque personalitas aliena potest naturam humanam facere personatam. R. N. C. Sessio aliena non potest me facere sedentem ; quia illi non sum unibilis ; cum vero natura humana sit unibilis personalitati divinæ , ab hac personari potest.

Instabis 4. Humanitas Christi non potest esse immensa per immensitatem Verbi ; neque sapiens per sapientiam Verbi , licet tam immensitati quàm sapientiæ Verbi uniatur : ergo neque potest personari per personalitatem Verbi , licet huic uniatur. R. N. C. & parit : Immensitas , Sapientia infinita , Omnipotentia sunt perfectiones soli Deo propriæ ; Personalitas vero , & complementum ultimum substantiale non est ratio soli Deo , sed etiam creaturis conveniens : hinc Verbum Divinum non potest tribuere naturæ humanæ unitæ illas perfectiones , bene vero personalitatem , quia natura humana illarum perfectionum non est capax , est tamen capax personalitatis.

Instabis 5. Si humanitas uniretur Verbo , tunc ubicunque verbum esset , ibi deberet etiam existere humanitas atqui humanitas incarnata non est ubique in sensu Catholicorum , ubi est Verbum : ergo. R. N. M. etiamsi pes uniatur animæ rationali , tamen non est in omni loco , in quo est anima rationalis ; quia hæc est etiam in capite ac reliquo corpore , in quo non est pes. Neque per hoc , quod humanitas unita Verbo moveretur de loco in locum ,  
etiam



etiam deberet localiter moveri ipsum verbum; quia hoc solum fieri deberet, nisi aliunde Verbum propter immensitatem suam jam esset in omni loco, ad quem movetur, vel moveri potest humanitas.

Objic. 3. Incarnatio repugnat etiam ratione unionis & compositi, quod ex tali unionem inter naturam humanam & Verbum Divinum deberet resultare: ergo A. prob. Ex verbo & natura humana deberet fieri unum per se; sed hoc repugnat: ergo. prob. m. repugnat unum per se fieri ex ente completo, & ex ente in potentia; sed natura humana in Christo est ens in potentia, & est complebilis per personalitatem, ac Verbum Divinum est ens completissimum & in actu: ergo repugnat ex natura humana & verbo D. fieri unum per se. M. Constat; nam ex materia prima tanquam ente in potentia, & complebili & ex angelo tanquam ente completo non potest fieri unum per se; ergo. R. N. a. ad cujus prob. N. m. ad hujus prob. D. M. ex ente in potentia, & ex ente completo repugnat fieri unum per se in ratione naturæ & principii operativi C. M. in ratione personæ, vel in ratione habentis & habiti, terminantis & terminati, sustentantis & sustentabilis N. M. ita R. P. Viva. R. 2do. forte melius D. m. Verbum Divinum est ens completissimum, & tamen adæquate & complete acceptum secundum omnia sua constitutiva non terminat communicabilitatem naturæ humanæ, nec complet hanc in ratione personæ C. m. secus N. m. Verbum Divinum ut completum, & adæquate acceptum involvit duo constitutiva, naturam scilicet Divinam, ac personalitatem; at tantum per personalitatem suam formaliter complet naturam humanam in Christo sub ratione personæ, per quod tamen minime negatur, quod natura humana in Christo etiam *mediate* uniatur naturæ Divinæ, & per hanc dignificetur.

Dices I. Magis distant Verbum Divinum, & natura humana, quam natura hirci & cervi: ergo magis repugnat naturam humanam & Verbum uniri in unum compositum, quam naturam hirci & cervi coalescere in unum. R. D. a. magis distant entitative C. a. in ordine ad unionem N. a. nam natura



hirci & cervi non possunt coalescere in unam naturam ; quia utraque jam est completa, nec in ratione sua ulterius complebilis : ast natura humana in Christo destituta propria personalitate, est incompleta in ratione personæ ; adeoque potest personari à personalitate verbi.

Dices 2. Saltem stante Incarnatione Deus foret pars componens cum humanitate Christi, quod dicit imperfectionem in Deo. ergo. R. N. a. pars est aliquid minus perfectum toto, & est perfectibilis à comparte ; neutrum convenit Deo, ac Verbo Divino, quod eminenter continet omnem perfectionem humanitatis, nec ab hoc perfici potest. Hinc Verbum Divinum dicitur tantum *terminus* intrinsecus, non autem pars Christi. Dicitur quidem Christus à Conciliis esse compositus, non vero ex veris partibus, quarum quælibet sit complebilis, & ulterius perficibilis. Ob quod hæc compositio est mirabilis & *singularis sine exemplo*, ut habet Toletanum XI., nihilque aliud dicit, quam plurium realiter distinctorum unionem in ordine ad constituendum unum Christum.

Dices 3. Complexum hoc, quod ex Incarnatione resultaret, esset Deus & homo, foret passibile & impassibile, creator, & creatura ; atqui hæc repugnant : ergo. R. C. M. & D. m. repugnant in eodem secundum idem c. m. secundum diversa n. m. esset Deus impassibilis & Creator secundum naturam divinam, esset homo passibilis, & creatura secundum naturam humanam, quæ non sunt contradictoria.

\*\*\*\*\*

## ARTICULUS II.

### *De Cognoscibilitate Incarnationis Verbi Divini.*

6 **I**ncarnatio potest dupliciter accipi. Imo. Universaliter, ac metaphysice pro Incarnatione Dei, præscindendo an sit tri-nus in Personis. 2do. Particulariter, ac physice, & prout modo facta est, pro Incarnatione solius secundæ Personæ Divinæ, ita quidem, ut nec prima, nec tertia Persona SS. Trinitatis fuerit Incarnata. Si



Si Incarnatio accipiat<sup>r</sup> primo modo, tunc, ut tradunt Lugo, & Gormaz, potuit intellectus creatus naturaliter habere suspicionem de possibilitate ejusmodi Incarnationis: quia ex omnipotentia Divina potuisset intellectus creatus inferre esse possibilem totalem unionem inter Naturam Divinam & humanam, qualem nos non possemus capere. Vide Antonium Mayr Tr. 9. n. 12. Verum nos hic solum loquimur de cognoscibilitate Incarnationis in secundo sensu acceptæ, & prout modo peracta est. His notatis.

Assero 1. Nullus intellectus creatus, sibi soli relictus, ac seclusa omni revelatione, vel manifestatione potuit evidenter cognoscere possibilitatem hujus Mysterii, antequam illud peractum est. Communis. Prob. 1. Incarnatio Verbi Divini à D. Paulo ad Ephes. 5. vocatur *Sacramentum absconditum à sæculis in Deo*, & Toletanum XI, de eo dicit: *si ratione ostendi posset, non esset mirabile, si exemplo, non esset singulare*: ergo per solam rationem naturalem non fuit cognoscibile, saltem antequam peractum est. 7

Prob. 2. Intellectus creatus præcisa omni revelatione & manifestatione Divinitus facta, ac ante peractam Incarnationem non potest suis viribus naturalibus evidenter etiam tantum illative attingere Mysterium SS. Trinitatis, adeoque nec Verbum Divinum, cujus tamen Personalitas in Incarnatione, prout modo peracta est, involvitur: ergo neque potest evidenter & naturaliter attingere ipsum hoc Mysterium, utpote quod non intelligitur evidenter, nisi & illa intelligantur evidenter, quæ in hoc Mysterio necessario involvuntur.

Confirm. Loquendo etiam de Incarnatione secundum se nequit intellectus evidenter cognoscere, nullam in ea involvi contradictionem; quamvis etiam ratio nostra lumine fidei illustrata apparentes contradictiones solvat circa hanc & ipsum Mysterium Sanctissimæ Trinitatis, non tamen ita, ut hæc Mysteria fiant evidentiæ: ergo naturaliter (præcisa omni manifestatione & revelatione Divina, & ante Incarnationem actu peractam) non possunt hæc Mysteria evidenter cognosci, quamvis de Incarnatione universaliter accepta possit naturaliter haberi aliqua suspicio, non tamen evidentiæ, ut n. 6. dictum est.



Objic. 1. Angelus novit naturaliter & evidenter, Deum posse, quidquid non involvit contradictionem; atqui Mysterium hoc non involvit contradictionem; ut constat ex articulo præcedente: ergo. R. D. m. Angelus etiam naturaliter novit, quod hoc Mysterium non involvat contradictionem N. m. novit quidem, quod Deus possit omne, quod non involvit contradictionem, non vero novit pro tempore Incarnationem præcedente, quod hoc Mysterium non involvat contradictionem c. m.

Objic. 2. Intellectus creatus non judicat hoc Mysterium esse evidenter impossibile: ergo judicat esse evidenter possibile. R. N. C. Inter possibile & impossibile non datur medium, datur tamen inter judicare, hoc est possibile, & inter judicare hoc esse impossibile; quia datur suspensio omnis judicii, quando non adsunt sufficientes rationes pro affirmanda determinate possibilitate vel impossibilitate.

Objic. 3. Angelus cognoscit evidenter omnia prædicata naturæ humanæ: ergo etiam potentiam ejus obedientialem ad unionem hypostaticam. R. D. a. omnia prædicata absoluta C. a. omnia relativa subdist. entitative spectata c. a. etiam terminative spectata N. a. potentia obedientialis est ipsa potentia suscipiendi omnem formam possibilem, ac supernaturaliter saltem unibilem; sed cognoscens, quod natura habeat potentiam suscipiendi omnem formam possibilem, non statim cognoscit evidenter hanc formam, id est, unionem hypostaticam esse possibilem, & supernaturaliter unibilem: ergo.

8 Afferro 2. Intellectus sensibus alligatus non potest ex viribus mere naturalibus evidenter cognoscere hoc mysterium, etiam postquam jam actu peractum est. 2. Bene vero intellectus creatus sensibus non alligatus, qualis est Angelicus, & animarum à corpore separatarum. Herinx p. 4. D. 1. n. 9.

Prob. 1. Nihil sensibile ostendebat in Christo hanc unionem: ergo intellectus sensibus alligatus, & tantum ex sensibilibus arguens latentes veritates, non habet medium evidenter cognoscendi hoc Mysterium, etiam postquam peractum est. A. prob.



tum quia ipsa unio in se non est sensibilis, seu sensu perceptibilis, est enim relatio, quæ nullo sensu in se directe percipitur: neque est sensibilis per causam; quia causa hæc fuit Sanctissima Trinitas, quæ est spiritualis, & nullo sensu attingi potest: neque est sensibilis per effectum; nam miracula & opera, quæ Christus præstitit, absolute potuissent etiam fieri per puras creaturas, si Deus cum illis extraordinario modo concurrisset: ergo.

Prob. 2dum. memb. Unio hypostatica est ens creatum, quod est proportionatum intellectui sensibus non alligato, ut Scotus 4. D. 10. q. 8. §. *Tertia conclusio* & ad argumentum n. 11. inter alia ita habet: *quantumcunque aliquid supernaturale ponatur in esse, postquam tamen positum est in esse, est quoddam ens naturale, & proportionatum potentie naturaliter cognoscenti, vel cognoscitivæ.* & n. 12. & ad tertium de malis Angelis: ait Doctor: *quod si absolute permittatur malus Angelus uti potentia cognoscitiva naturali, potest intelligere quodcunque intelligibile causatum, & sic exponenda est autoritas Ambrosii de Mysterio Incarnationis: neque obstat, quod Quodlib. 14. n. 22. & seqq. paulo aliter loqui videatur de visione Dei, tamen ibi solum agit disputative, & problematice: ergo.*

Objic. contra 2. memb. Unio hypostatica est supernaturalis quoad substantiam: ergo non potest cognosci naturaliter ab intellectu creato. R. N. C. supernaturalitas alicujus entis tantum desumitur à principio effectivo, non vero à potentia cognoscitiva: Illud enim supernaturale est, quod transcendit vires causæ efficientis pure naturalis, & nequit effici, nisi concurrat principium effectivum supernaturale, & quidem qua supernaturale: non vero exigitur, ut entitas supernaturalis solum supernaturaliter, & non etiam naturaliter cognoscatur.

Objic. 2. SS. Patres & D. Paulus negant, hoc Mysterium esse naturaliter cognoscibile: ergo R. SS. PP. & Textus, qui videntur nobis esse contrarii, vel loquuntur de hoc Mysterio pro tempore, quo nondum fuit positum, vel loquuntur de intellectu sensibus alligato, vel de dæmonibus, quos latuit ob extrinsece







nimirum, Bonitatem in Communicatione sui adextra, misericordiam erga hominem lapsum, justitiam in præstita satisfactione tam condigna & excellenti pro offensa divina, sapientiam & omnipotentiam in producendo opere tam admirabili: ergo.

Objic. 1. Dedecet Deum fieri creaturam passibilem, ac mortalem: ergo Incarnatio non convenit Deo. R. N. a. Quia Deus non ita factus est homo ut creatura passibilis, ac mortalis ut aliquid de sua Divinitate, impassibilitate, ac immortalitate perdiderit. Unde nec Deus in assumenda carne humana prodigus est, quia tantum donum conferendo creaturæ, nihil de suis bonis amittere potuit.

Objic. 2. Propter Incarnationem magis obligamur Filio, quam reliquis duabus Personis divinis; sed hoc est inconveniens: ergo. R. N. M. Filius Divinus Incarnatus est quidem donum collatum; conferens vero est tota SS. Trinitas, quæ benevola sua voluntate Incarnationem effecit; at gratitudinem non debemus dono, vg. pecuniis donatis, sed benevole donanti, & conferenti beneficium.

Assero. 2. Incarnatio Verbi Divini fuit etiam conveniens homini, utpote cujus naturam elevavit usque ad dexteram Dei, utilitatemque plurimam ei contulit. Neque obest, quod natura humana Christi fuerit privata Personalitate: quia propria personalitas fuit compensata per meliorem, seu personalitatem D. Verbi; quæ identice est infinite perfecta, sicut ipse Deus. IO

Assero 3. Incarnatio fuit quoque conveniens toti Universo. II Prob. homo habet quamdam cognationem cum omni creatura, ut ait D. Gregor. homil. 29. in Evang. *omnis creaturæ aliquid habet homo: habet namque esse commune cum lapidibus, vivere cum arboribus, sentire cum animalibus, & intelligere cum Angelis: ergo per assumptionem naturæ humanæ Verbum Divinum dignificavit omnem creaturam.*

Præterea convenientius fuit assumpta natura humana, quam Angelica. 1. ob rationem mox datam; quia scilicet natura Angelica non habet talem cognationem cum omni creatura, sicut natura 12



natura humana : nam Angelus materiae & corporis expers non ita convenit cum creaturis corporeis, sicut homo. 2. Quia Verbum Divinum ad reparandam naturam humanam in mundum venit : ergo convenientius sibi univit naturam humanam, quam aliam. 3. Quia si naturam Angelicam invisibilem assumpsisset, nulla visibilia virtutum exempla nobis reliquisset.

Convenientius etiam reparavit naturam humanam lapsam, quam Angelos lapsos. 1. Quia homines lapsi erant voluntate aliena sui Protoparentis, Angeli propria. 2. Quia Angeli erant expertes carnis fragilis, & sic fortiores natura humana : ergo homines lapsi magis erant digni misericordia, quam Angeli.

Convenientius etiam Persona filii, quam Patris & Spiritus S. fuit incarnata. Cujus rationem dat S. August. libr. de Ecclesiasticis dogmatibus C. 2. dicens : *non Pater carnem assumpsit, neque Spiritus S. sed Filius tantum, ut qui erat in divinitate Dei Patris Filius, ipse fieret in homine hominis matris filius : ne filii nomen ad alterum transiret, qui non esset aeterna natiuitate filius. Dei ergo Filius factus est hominis filius, natus secundum veritatem naturae ex Deo, Dei Filius, & secundum veritatem naturae ex homine hominis Filius, ut veritas geniti non adoptione, non appellatione, sed in utraque natiuitate filii nomen nascendo haberet, & esset verus Deus, & verus homo, unus Filius.* Confirmat hoc D. Anselmus lib. 2. cur Deus homo. c. 9. dicens : *Si qualibet alia Persona incarnaretur, essent duo Filii in SS. Trinitate, scilicet Filius Dei, qui & ante Incarnationem Filius est, & ille, cui per Incarnationem esset Filius Virginis.* 2. Filius Divinus in SS. Trinitate est imago Patris, ergo cum per Incarnationem reformanda erat imago Dei per hominem deformata, recte assumpta fuit Persona Filii ceu naturalis Dei imago, ad cuius similitudinem homo formatus reformari, & prima Divinae perfectionis lineamenta æmulari & referre posset. Plures ejusmodi rationes videre potes apud nostrum Frassen in Scoto Academico Tom. 3. Tract. I. Disput. I. Art. I. Dissert. 2. q. 3.

ARTI



ARTICULUS IV.

De Necessitate Incarnationis.

**A**ssero 1. Deus antecedenter ad suum liberum Decretum non fuit absolute necessitatus ad ponendam Incarnationem. 2. imo neque fuit ita necessitatus ex suppositione mundi producti. Communis.

13

Prob. 1. pars. Deus ad omnia opera adextra (intra quæ etiam est Incarnatio) est summe liber, & potest vel potuit ea ponere, aut omittere pro libitu: ergo non necessario potuit Incarnationem.

Prob. etiam 2. pars. Mundus naturalis productus non potuit exigere ens supernaturale, seu unionem hypostaticam, & potuisset Deus utique homines & Angelos relinquere in statu puræ naturæ, ut Tom. 3. lib. 2. Sententiarum dictum est, quo in statu nulla fuisset necessitas, aut exigentia entis cujuscunque supernaturalis, proinde nec tunc fuisset necessaria unio hypostatica, vel si voluisset Deus hominem elevare ad statum supernaturalem, & gratias spirituales ei conferre, potuisset id facere ex mera sua misericordia absque ullis meritis Christi; ergo etiam supposita mundi productione non fuisset necessaria Incarnatio Verbi Divini.

Objc. 1. Deus est perfectissimus artifex: ergo necessario debet semper facere optimum; atqui non faceret optimum, si non poneret Incarnationem, quæ est optima & perfectissima Communicatio Dei cum creatura: ergo.

R. D. C. debet facere optimum formaliter C. C. entitative, materialiter, & objective N. C. entitative optimum non debet facere Deus, alias deberet producere melius & perfectius, vel perfectissimum Universum: debet ergo solum producere optimum formaliter, seu conforme suæ liberæ voluntati: nam regula optimi non est perfectio entitatis productæ, sed voluntas Divina, quæ est mensura omnis honesti, & boni.



Objic. 2. Deus habet summam inclinationem se communicandi mundo : ergo saltem mundo supposito necessitatur ad unionem hypostaticam. R. D. a. habet summam inclinationem ante decretum Divinum , quo statuit se communicare N. a. post Decretum c. a. ante Decretum fuit liberrimus ad se communicandum adextra.

Objic. 3. Amor Dei erga Creaturas est infinitus : ergo Deum necessitat ad se communicandum creaturæ per Incarnationem. R. 1. invert. argument. etiam libertas Dei est infinita , vi cujus potuisset omittere Incarnationem : ergo non necessitatur ad Incarnationem. R. 2. D. a. est infinitus entitative , non tamen movet infinite C. a. secus N. a. amor Dei erga creaturas , quamvis entitative sit infinitus , tamen non movet , aut necessitat infinite ; alias enim Deum necessitaret ad producendas omnes creaturas , quia omnes amat amore complacentiæ : proportionatur igitur quadam ratione objecto , & utique magis sibi Deus complacet in creaturis perfectioribus , hasque magis amat ; magis etiam diligit B. V. Mariam , quam alium hominem inferioris ordinis &c.

14 Affero 2. Incarnatio nec fuit necessaria supposito peccato primi hominis. Scot. 3. D. 20. q. un. §. ad istam , & Th. Th. communissime.

Prob. Deus non necessitabatur ad reparandum genus humanum in Adamo lapsum : ergo neque necessitabatur ad Incarnationem supposito peccato primi hominis. C. fuit. a. prob. 1. reparatio generis humani est gratia , & favor gratuitus , proveniens ex mera misericordia Dei ; nam *secundum suam misericordiam salvos nos fecit* : ad Tit. 3. v. 5. ergo Deus non necessitabatur ad istam reparationem , tanquam indebitum , & prorsus liberum factum. 2. Deus non necessitabatur ad reparandos Angelos lapsos , sed potuit iuste permittere eorum perpetuum interitum : ergo neque necessitabatur ad reparandos homines lapsos. 3. *Quis tibi imputabit , si perierint nationes , quas fecisti ? non enim est alius Deus , quam tu.* Sap. 12. ergo.

Objic. 1. SS. PP. nominatim S. Anselmus lib. 1. Cur Deus Deus



Deus homo c. 4. & alibi videntur docere, quod supposito peccato Adami fuerit necessaria Incarnatio: ergo. R. Cum Suarez & aliis, ejusmodi dicta Patrum exaggerare nimium rem, & revera tantum loqui de mera convenientia, vel si loquantur de necessitate, tunc solum intelligenda esse de necessitate consequente Decretum Divinum, quo Deus misericorditer statuit per merita Christi reparare hominem lapsum, non vero de necessitate antecedente tale Decretum.

Objic. 2. Si Incarnatio & Passio Christi supposito peccato Adæ non fuit necessaria, tunc Deus injuste exegit tantam satisfactionem ab homine Deo præstandam; sequela est falsa: ergo &c. R. N. M. Christus factus est fideiussor pro nobis: ergo juste Deus Pater ab Ipso exegit satisfactionem pro nostris culpis.

Objic. 3. Si Incarnatio aliunde non fuit necessaria, tunc Deus inordinate egit, dum vitam longe nobiliorem in satisfactionem exegit pro vita & salute hominum aliorum longe inferiorum: nam inordinate aliquis agit, qui ut bonum minus obtineat, majus prodigit: sequela est falsa: ergo. R. D. M. si salus hominum respectu mortis Christi fuisset finis ultimus C. M. si finis ultimus fuit gloria Dei per mortem Christi, & salutem hominum procuranda N. M.

Affero 3. Neque Incarnatio fuit necessaria, supposito, quod Deus voluerit hominem lapsum reparare. Ita communis. 15

Prob. Deus potuisset aliter hominem reparare, quam per Incarnationem & merita Christi: ergo etiam supposita voluntate reparandi hominem lapsum non fuit necessaria Incarnatio Verbi Divini. a. prob. S. August. lib. 13. de Trinit. c. 10. refellit eos, qui dicunt, Deum non potuisse aliter reparare hominem, quam per Incarnationem. & S. Athanas. serm. 3. contra Arian. dicit: poterat sine ullo adventu Christi solummodo loqui Deus, & solvere maledictionem. S. Bernard epist. 190. quis negat, ad manum Omnipotentis fuisse alios & alios modos ratione Redemptionis & Iustificationis, & Liberationis.

Confirm. Potuisset Deus gratis remittere peccatum absque  
C 2 ulla



ulla petita satisfactione condigna, idque vel per meram extrinsecam condonationem, vel per infusionem gratiae sanctificantis independentis à meritis Christi, vel potuisset exigere satisfactionem tantum congruam, vel etiam condignam non dependentem à meritis Christi, de cujus possibilitate dicetur inferius: ergo potuisset Deus hominem etiam aliter reparare, quam per Incarnationem, & merita Christi.

Objic. 1. Judex non potest gratis remittere offensam: ergo neque Deus. R. D. a. offensam alteri illatam C. a. sibi illatam N. a. injuriam sibi illatam judex saltem supremus gratis remittere potest: ergo à fortiori potest Deus injuriam sibi illatam gratis condonare.

Objic. 2. Justitia exigit, ut peccatum puniatur: ergo peccatum non potest gratis remitti. R. D. a. ita exigit justitia juxta modernam ordinationem voluntatis Divinae C. a. juxta ordinationem Dei absolute possibilem N. a. illud solum justum est, quod voluntati Divinae concordat: si ergo Deus ordinasset, ut peccata manerent impunita, & gratis remittantur, etiam hoc justum esset. Ex his tandem fit, nec methaphysice, nec physice, nec moraliter necessariam fuisse Incarnationem Verbi Divini: id enim dicta probant.

Sunt hic debellandi hostes Incarnationis Verbi Divini Judæi & gentiles. Judæi quidem præcipue ex testimoniis veteris testamenti, cui & ipsi fidem habent; Gentiles vero maxime ex motivis credibilitatis, quibus omnia mysteria nostræ fidei & Religionis ipsis suadere solemus. Sit igitur.

\*\*\*\*\*

## ARTICULUS V.

### *De Existentia Incarnationis, & adventu Christi.*

§. I.

#### Probatio Prima.

16 **J**am diu advenisse promissum Messiam, contra Judæos probatur ex illo oraculo Jacobi. Gen. 49. v. 9. *Non auferetur sceptrum*



trum de Juda, & dux de femore ejus, donec veniat, qui mittendus est (seu Messias, ut vertit paraphrasis Caldæa) & Ipse erit expectatio gentium.

Ex hoc ita argumentor. Iuxta laudatum vaticinium Jacobi tunc venturus esse promittitur Messias, cum sceptrum seu regia potestas & Principatus ex Juda & gente Judaica defecerit: sed jam diu defecit hæc potestas in tribu Juda, & tota gente Judaica: ergo juxta laudatum vaticinium promissus Messias jam diu advenit. Minor prob. Jam diu est, ex quo exclusa gente Assamonæorum seu Machabæorum intrusus est Herodes alienigena, qui teste Josepho regnavit 37. annis, & sub cujus regni finem Christus est natus: ergo etiam jam diu est, ex quo promissus Messias venit.

Ad capiendam vim hujus argumenti notandum ex historiis, non simul unico quasi ictu corruisse Rempublicam, & principatum populi Judaici, sed quasi per gradus ad ultimam esse lapsam ruinam. Primum ad interitum gradum fecit Pompejus, dum teste Eusebio lib. 1. histor. c. 6. *Hierosolymam armis expugnavit, & ad intimum usque sacrarium progressus, templum poluit*, qui umbram quidem, & nomen imperii, ac regni Judæis reliquit, rem vero ademit. Alter ruinæ gradus fuit, dum ab Herode alienigena regnum & principatus Assamonæis, seu Machabæis ereptus, ac genus eorum extinctum est. Tertius gradus fuit, dum Archelao Herodis Filio Viennam relegato Judæa redacta est in Provinciam, cui Præses gentilis à Romanis est assignatus, cum anno 40. à morte Christi subversa per Titum Hierosolyma Judæi extorres, dispersi, errabundi, dum ubique servitute sub alieno imperio, sine duce, sine templo, sine victimis, sine sacerdote premuntur: quam eorum ruinam prædixit Osee c. 3. v. 4. *inquiens: Dies multos sedebunt filii Israel sine lege, & sine principe, & sine sacrificio, & sine altari, & sine ephod, & sine tephim.*

Ex quibus omnibus clare innotescit, potestatem regiam, ac Principatum omnem à tribu Juda, & Judæis jam multo abhinc tempore esse ablatum, adeoque Messiam jam pridem advenisse.



## Solvuntur Objectiones Judæorum.

17

Objic. 1. Jacobi vaticinium intelligi petit de Nabuchodonosore Rege Babylonis, qui mittendus dicitur tanquam Dei flagellum ad punienda peccata populi, ut habetur Jerem. 25. v. 9, & Ezech. 26. v. 7. qui & populum captivum abduxit, urbemque & templum evertit: ergo istud vaticinium non loquitur de Messia.

R. N. a. Jacobus illo vaticinio fausta & læta prædicere voluit Judæis, ut patet ex initio oraculi illius, quod ita habet: *Juda te laudabunt fratres tui: manus tua in cervicibus inimicorum tuorum, adorabunt te fratres tui — Non auferetur sceptrum de Juda &c.*: atqui adventus Nabuchodonosoris Judæis minime faustus ac lætus fuit. 2. Nabuchodonosor non fuit expectatio, sed execratio gentium. 3. Autoritas regia & principatus Judæorum per captivitatem Babylonicam, in quam abducti fuerant Judæi, non fuit penitus extincta: ex licentia enim Regis secundum suas leges vixerunt Judæi, Ducem ac Principem captivitatis habuerunt, & Evilmerodach Nabuchodonosoris Filius & Successor Joachim Regi Judæ regium titulum, & insignia concessit. 4. Reg. c. 25. v. 28.

Objic. 2. Oraculum Jacobi potest intelligi de Cyro Rege Persarum, qui à gentilibus expectandus, imo & Christus dicitur; hæc dicit Dominus Christo meo Cyro. Isa. 45. v. 1. ergo &c. R. N. a. non potest de Cyro intelligi vaticinium Jacobi; omnes enim ejus partes Cyro convenire nequeunt. Quippe Jacob prædixit, tunc sceptrum & principatum à Juda & Judæis auferendum, cum veniret, qui mittendus est; sed cum Cyrus venit, liberans Judæos à captivitate non tam ablatus est ab illis, quam restitutus principatus. 2. Quamvis cit. capit. 45. & præcedente 44. Isaias fere ducentis annis ante Cyrum aliqua de hoc, seu liberatore populi Judaici prædixerit, tamen omnia illa c. 45. prænunciata de Cyro intelligi non possunt, sed de ipso Messia sunt dicta: vg. ista: *rorate cæli desuper, & nubes pluant justum: aperiat terra, & germinet salvatorem. Tantum in te est Deus, absque te non est Deus. Vere tu es Deus absconditus, Deus Israel salvator.*



salvator. 3. Cyrus fuit figura Messiae liberantis nos à captivitate dæmonis.

Objic. 3. Toties laudatum oraculum Jacobi in hebræo ita habet : *non auferetur Ec. usquequo veniat Siloh, & erit obedientia populorum* : sed per to Siloh intelligitur urbs hujus nominis sita in tribu Ephraim, in qua sunt ductæ fortes pro divisione terræ promissionis Josue 18. & in qua mansit arca usque ad tempora Samuelis 1. Reg. 4. Consequenter textus ille de urbe Siloh, non de Messia intelligendus venit : ergo.

R. N. m. non potest per to Siloh intelligi urbs illa sine sensu satis absurdo ; nam si accipis verba, ut jacent, tum faciunt hunc sensum per se absurdum, *non auferetur sceptrum de Juda, & dux de femore ejus, donec veniat urbs Siloh.* Si accipis in sensu, quem affingunt Judæi, nimirum hunc ; quando urbs Siloh devastabitur, vel sedes arcæ desinet esse, accedet sceptrum & ducatus ad tribum Judæ, tunc manifeste loquuntur contra ipsum textum, qui loquitur de ablatione & discessu sceptri à Juda, & tu accipis de accessu sceptri & ducatus ad Judam. Neque toleranda est ista expositio : *non auferetur sceptrum de Juda, usquequo veniat Saul & Jeroboam in Siloh, ubi unguntur in Reges.* Etenim ante Saulem non fuit sceptrum in Juda, sed huic tribui primum delatum est post Saulem in Davide : ergo non potuit sceptrum tunc auferri à Juda, qui ipsum nondum habuit. Neque defecit in Jeroboam, licet hic imperaverit decem tribubus Israelis à Juda separatis, tamen perstitit regnum tribus Judæ, & Reges, qui tribui Judæ præerant, præcipui erant.

Adde : quando unctus est Saul, arca non erat in Siloh, sed Cariathiarim in domo Aminadab 1. Reg. 7. v. 1. Et quando unctus est Jeroboam, arca erat Jerosolymus, quo translata fuerat è Davide de Domo Aminadab. 2. Reg. 6. 2. Nec Saul, nec Jeroboam uncti sunt in Siloh ; sed primus in Ramatha 1. Reg. 10. alter in Sichem. 3. Reg. 12. v. 2.. 3. Nec Saul, nec Jeroboam erat expectatio gentium. Taceo plura alia, quæ huic expositioni ex sacra scriptura possunt opponi.

Vox *Siloh* tribuitur hic uni Messiae : vel enim derivatur à verbo



verbo, quod significat mittere: ut c. 9. v. 7. dicitur: vade: *lava in natatoria Siloe, quod interpretatur missus*. Vel desumitur à verbo, quod significat *pacificum esse*, ut vertit textus samaritanus: & sic optime congruit Messiae, qui Isai. 9. v. 6. appellatur *Princeps pacis*.

Objic. 4. Per sceptrum in citato textu intelligitur virga doloris, ut sensus sit: *non recedet à Judæis virga afflictionis, donec veniat Messias*: ergo nondum advenit Messias, quia à Judæis nondum recessit virga afflictionis, ut palam est. A. prob. quia in hebræo adhibetur vox *schebet*, quæ virgam doloris significat.

R. N. a Verba subsequencia: *Et dux de femore ejus* clare significant, non hic de virga doloris, sed regiminis esse sermonem. 2. Vox *Schebet* non significat virgam afflictionis, nisi aliquid additum fuerit, quod illam determinet ad hujusmodi significationem, prout fit Psal. 2. v. 9. *reges eos in virga ferrea*. & Isa. 10. v. 5. *Væ Assur virga furoris mei ipse est*. Si sine simili addito est, tunc potestatem imperandi significat, cujus symbolum est virga, seu sceptrum, ut Esther. 4. v. 5.

Objic. 5. Particula *Donec* in oraculo Jacobi non significat finem sceptri & Ducatus in Juda, sed ejus continuationem & perpetuationem etiam post adventum Messiae. Sic Gen. 8. v. 7. de corvo ex arca Noe dimisso dicitur. *Non revertebatur, donec siccarentur aquæ*: ubi particula *donec* significat corvum ne quidem post siccatas aquas esse reversum. Ita quoque Matth. 1. v. 25. dicitur: *Non cognoscebat eam (scilicet Joseph Mariam) donec peperit filium suum Primogenitum*. Ibi tamen minime asseritur, quod post Nativitatem filii sui Joseph Mariam cognoverit: ergo à pari particula *donec* non significat finem sceptri & ducatus in Juda, sed ejus continuationem: atque adeo iste textus à nobis male applicatur, & ad nostrum propositum, si sic exponitur, non servit.

R. N. a. ratio negandi primo est: in sacra scriptura particula *donec* significat quidem frequenter continuationem, sed multo frequentius finem rei. Ut patet ex illo Gen. 26. v. 13. *Isaac ibat succrescens, donec magnus effectus est*; id est, Isaac cessabat

fabat  
tur  
opp  
mo  
catu  
3. el  
falte  
turu  
nem  
fili  
tra  
men  
cipat  
ad f  
buun  
in ci  
meo,  
ficat,  
B. V  
factur  
donec  
& po  
fit fut  
sceptr  
certe  
N  
Juda  
jain  
figmen  
fugere  
tur,  
suum  
P. K.



fabat crescere, cum magnus est factus. Eum in modum legitur alibi S. Textus, ut Judicum 4. v. 24. *Elii Israel forti manu opprimebant Jobin Regem Canaan, donec deleverent eum.* 2do. quomodo potest *to donec* significare continuationem sceptri, & ducatus, quem jam ante plura sæcula non habent Judæi? Hinc 3. est contra Judæos, quod *to donec* importet continuationem saltem sceptri à Juda aliquando obtenti usque ad Messiam venturum, sicut in allatis textibus emissio corvi usque ad siccationem aquarum, & omisso usus matrimonii usque ad Nativitatem filii primogeniti, vel unigeniti adstruitur: sed hoc est contra Judæos expectantes etiamnum adventum Messiae, cum tamen jam ante mille & plures centenos annos sceptrum & Principatus ab ipsis fuerit ablati. Adeoque perperam confugiunt ad similem explicationem moderni Judæi, eique plus æquo tribuunt. Id quod ulterius roboratur, quia *to donec*, usquedum in citatis & aliis textibus, ut in illo; *dixit Dominus Domino meo, sede à Dextris meis, donec ponam inimicos tuos* solum significat, quid antea v.g. ante siccationem aquarum, ante partum B. V. Mariæ, & in sententia Judæorum ante adventum Messiae factum, vel non factum sit, non vero quid postea: ergo *to donec* significat in citato textu non esse auferendum sceptrum, & potestatem imperii à Juda ante adventum Messiae, quidquid sit futurum post adventum: ergo cum jam dudum ablatum sit sceptrum de Juda, Messiam jam pridem advenisse oportet: alias certe falsus esset textus scripturæ.

Neque dicant Judæi, se adhuc habere ducem quempiam ex Juda oriundum, imperantem in extremis Asiæ partibus. Benjamin Tudelensis scribit eum Bagdadi sedem habere. Nam hoc figmentum est insulsum, ad quod stabiliendum fuit necesse confugere ad incognitas mundi plagas. Præterea incredibile videtur, malle Judæos tam dura ubique servitute premi, quam ad suum ducem confugere, sub quo in pace vivere possent.



*Solvuntur alie objectiones partim à Judæis, partim à modernis criticis factæ.*

18

Objic. 1. Strabo, Josephus Scaliger, Cosaubonus, Tomiellus, Henricus Valesius, Huetius & c. videndi apud Honoratum Tournellii, existimant, Herodem non fuisse alienigenam: ergo dum Herodi delatus est ducatus populi Judaici, is non est ablatus à Judæis, nec translatus in alienigenam.

R. Non obstante præfatorum opinione Herodes, sub cuius regimine Christus natus est, alienigena & minime Judæus fuit. Nam. 1. S. Justinus Dial. cum Triphone Judæo refert ex Judæis ipsis, Herodem Ascalonitam, id est, Philistæum ex genere Canaan fuisse: Herodem, inquit, Ascalonitam fuisse dicitis. 2. Antigonus è Familia Assamonæorum, qui de regno cum Herode contendit, apud Josephum l. 14. Antiquit. c. 27. Herodem vocat hominem privatum, & Idumæum, hoc est semijudæum, qui nempe genere Idumæus, Judaicæ tamen religioni inutritus fuerat. 3. Julius Africanus apud Eusebium lib. 1. histor. c. 6. Herodem similiter alienigenam appellat, idem faciunt Ipse Eusebius, S. Hieronymus, August. Theodoretus & c. 4. S. Epiphanius hæres. 20. ait, Herodem & Idumæum, & Ascalonitam dici posse: quod nimirum ex Avo Ascalonita oriundus in Idumæa natus sit. 5. Varii secuti Julium Africanum (teste Herinx) faciunt illum genere Ascalonitam, etsi in Idumæa natum. Ex quibus habetur certum esse, quod fuerit alienigena, non descendens è tota gente Judaica Ab Abrahamo NB. per Isaac & Jacob prognata, seu dein fuerit Ascalonita ex genere Canaan, seu Idumæus ex familia Esau Fratris Jacob, qui distinctam à Judaica, gentem condidit.

Dices cum Scaligero: Idumæi fuere veri Judæi, utpote, qui postquam à Joanne Hircano 90. annis ante Christum natum fuere subacti, circumcisi, & iisdem ritibus ac Privilegiis cum Judæis usi sunt: ergo. R. D. a. fuere vere Judæi religione tanquam profelyti c. a. fuere Judæi genere & sanguine ex Jacob oriundi, de quibus hic quæritur. N. a. Prophetia Jacobi intelligenda



*§. I. Solvuntur aliæ objectiones à Judæis & criticis factæ. 27*

ligenda est de Judæis ex sanguine Jacob descendantibus : *& dux de femore ejus &c.* Ex quo patet disparitas inter Christianos & Judæos : Christiani enim fiunt per Baptismum , Judæi vero , de quibus nunc agitur , nascuntur.

Nec obest , quod Herodes pro vero Messia fuerit ab aliquibus Judæis habitus. Hoc enim accidit ex simulatione & adulatione hominum inertium. 2. Simon magus ac Dosithæus , Ambo samaritani , consequenter non Judæi , ab aliquibus Judæis fuere pro Messia habiti. 3. Josephus Assamoneus sacerdos eruditissimus adulationis studio Jacobi vaticinium in Vespasiano adimpletum esse dixit. 4. Ex his saltem deducitur , sub illud tempus , quo sub Herode , & Vespasiano collapsus est ducatus Judaicus , infudisse Judæis sententiam , Messiam jam venisse.

Dices 2. Nicolaus Damascenus teste Josepho L. 14. Antiq. c. 2. ait , *Herodem esse ortum ex primis Judæis redeuntibus ex Babylonia.* R. ex eodem Josepho L. 14. Antiq. c. 11. Nicolaum Damascenum ex adulatione , ut gratiam Herodis sibi conciliaret , illustre ei genus ex Judæis à captivitate reducibus asseruisse.

Unde quæ hinc inde affert Josephus pro asserto Damasceni facientia , tantum recitat , non approbat. Ipse enim est contrariæ sententiæ , ut ex variis locis patet. Caeterum Herodes , licet alienigena , tamen religionem judaicam coluit , tum quia circumcissus erat , & religione judæus , tum quia vidit id expedire rebus suis. Neque in observantia legis adeo scrupulosus fuit , sed eam sæpius violavit , ut ex Josepho scimus.

Denique , transmissio , quod in Herode nondum defecerit , ducatus & regia potestas à Judæis , saltem perfectissime defecit , quando amoto post Nativitatem Christi Archelao Herodis filio , judæa est redacta in provinciam , Præsede gentili à Romanis ei designato , vel certe tunc , dum extremum excidium Jerosolymæ à Tito sustinuit.

Neque hic mathematicè tempus dimetiendum est : sed sufficit , quod sub , vel circa illud tempus , quo Messias advenit ,



aliquibus annis ante, vel post ablata sit suprema Ducalis & regia potestas, & sic ablatio hujus, & adventus Messiae se aliquando in aestimatione morali contingant.

Objic. 2. Imperium & regia potestas serius incepit in tribu Juda: ergo illa prophetia Jacobi ad venturum Messiam non spectat. A. prob. à vaticinio Jacobi usque ad Davidem, in quo potestas regia ad tribum Juda devoluta est, effluerunt anni fere sexcenti & triginta; Eusebius integros mille annos numerat: ergo. R. C. a. N. c. in illo vaticinio Jacobi non est sermo de initio regiae potestatis in Juda, sed de ejus cessatione: sensus enim est, sceptrum, postquam ad tribum Juda pervenit, non esse ab eo auferendum, donec veniat Messias: ergo non obstat, quod serius in Juda potestas regia inceperit.

Objic. 3. Sceptrum Judae jam fuit ablatum tempore captivitatis Babylonicae, quando Joachim vel Sedecias à Nabuchodonosore captus, Jerosolyma everfa est, & omnes judaei 70. annis sub tristissima servitute Babylonica gemuerunt: quae omnia contingere quingentis fere annis ante Herodem: ergo vi oraculi praedicti jam 800. circiter annis ante Herodem Messias venisset. R. N. a. quamvis Joachim seu Jechonias Rex fuerit captus, Rex tamen mansit, quem judaei etiam Regem venerabantur, quantum eorum praesens status concessit: vel saltem potestas regia, & Ducatus non videtur esse ablatum à Judaeis per captivitatem illam Babylonicam, tum quia in ipsa captivitate judaei adhuc habebant suos Duces & Judices, qui etiam exercebant potestatem in vitam, ut patet ex historia Susannae Dan. 13. Tum quia Joachim 37. anno captivitatis nomen & solium regium iterum obtinuit ab Evilmerodach rege Babylonis, ut supra jam dictum est. Tum quia interruptio septuaginta annorum non est notabilis, & tamquam parva pro nihilo reputanda respectu tot centenorum annorum, quibus tam ante quam post captivitatem rerum summa penes Judaeos mansit potestas.

Objic. 4. Saltem post captivitatem Babylonicam principatus non fuit amplius apud tribum Judam, sed apud sacerdotes, qui fuere de tribu Levi, non de Juda, quingentis fere annis usque



*§. I. Solvuntur aliæ objectiones à Judæis & criticis factæ. 29*

que ad Herodem perduravit : ergo vel Prophetia Jacobi non loquitur de Messia, vel si de eo loquitur, tunc jam venit quingentis fere annis ante Herodem.

Ad hanc difficultatem respondent alii 1. Sacerdotes istos, qui imperabant, maxime Machabæos fuisse per lineam maternam ex tribu Juda prognatos, regiæque Davidis familiæ insertos.

Verum contra hanc responsionem est 1. apud hebræos nulla habetur ratio generis materni, apud quos receptum est illud. *Matris familia non est familia.* 2. Esto deinde quod tribus Juda, & Levi licite contraxerint matrimonia, tamen quod Assamonæi, vel sacerdotes ante ipsos regentes similia connubia cum fæminis tribus Judæ inierint, aut ex simili matrimonio procreati sint, nullibi legitur. 3. Hac ratione oraculum Jacobi videretur æque tangere tribum Levi, ac Juda : Aft hoc nequit dici : quia fuit specialis benedictio Judæ, non vero Levi, aut alteri tribui data. 4. Sic etiam dici posset, B. Virginem solum secundum lineam maternam esse de tribu Juda, ac Familia David, & hoc satis esse, ut Christus dicatur esse de tribu Juda, & Domo David : quod nemo facile dixerit, aut concesserit.

Neque illa quorundam responsio roboratur per illud 1. Machab. c. 5. v. 63. *viri Juda magnificati sunt in conspectu omnis Israel.* Ibi Assamonæi dicuntur viri Juda, consequenter de tribu Juda. Per viros Juda intelliguntur illi, qui sequebantur Judam Machabæum. Quod amplius claret ex textu græco, qui ita sonat : *& vir Judas, & Fratres ejus glorificati sunt.*

Neque obest, quod S. Cyrillus cum aliis illam responsionem det. His enim oppono S. Ambrosium, qui Lib. 3. in Lucam docet aperte, regnum Davidis in Jechonia penitus desuisse, & à sacerdotibus occupatum fuisse.

Rdent alii. 2. Ex tribu Juda sub regimine Machabæorum fuisse conflatum magnum Concilium Sanedrin, penes quod proinde perstiterit potestas imperii. Verum contra est 1. Isti 70. viri, qui constituebant Sanedrin, non fuere Reges aut duces, sed potius



tius consilarii Regum & Ducum. 2. Et certe collegium istud supremam authoritatem non habuit tempore Machabæorum, sed his subjectum fuit. 3. Istud Concilium potius sacerdotum, quam aliorum fuit, eique præfuit summus sacerdos juxta illud Deutero. 17. v. 8. & 9. *ascende ad locum, quem elegerit dominus Deus tuus, veniesque ad sacerdotes Levitici generis: quamvis & alii de tribu Juda, & aliis tribubus in illo senatu federint.*

Rdent alii 3. Jus regnandi penes Judam semper mansisse; usumfructum & administrationem penes Machabæos, qui regnum possederunt tanquam depositum, consentiente tribu Juda.

Ast Contra est imo. Nulla apparet vel minima hujus depositi, & ususfructus umbra. Quippe Machabæi, ac Sacerdotes post solutam captivitatem delatum sibi Ducatum velut rem propriam, & non tantum ad tempus sibi creditam occuparunt: unde in regimine illo sacerdotum sine electione alia filii parentibus successerunt. Neque facile quisquam sibi persuaserit, tribum Juda tot per annos ejusmodi depositum sponte penes Assamonæos reliquisse. Adde, tali modo ad sensum scripturæ non defecisset sceptrum à Juda etiam per alienigenam Herodem, si Judæi in illum consensissent, prout teste *Josepho* postea in Ipsum, præstito eidem fidelitatis juramento, consenserunt.

Neque Dicas: penes tribum Judam semper remansisse spem recuperandi Principatus. Nam contra est 1. Non dicitur actu quis rem habere, cujus habendæ spem tantum habet. 2. Hodie etiamnum possent judæi dici possidere regnum, & sceptrum ob prætensam spem recuperandi regni & sceptri. 3. Non apparet, quomodo Judæ certa spes affulgere potuerit recuperandi sibi regnum, quod adeo in sacerdotibus firmatum vidit.

Rdent nonnulli 4. Sceptrum innuere aliquam specialem in tribu Juda dignitatem, quam habet, quod Christus ex ea nasciturus esset.

Contra est: hæc dignitas omnino improprie dicitur sceptrum: & hæc responsio videtur omnino gratis ac contrarium



tum data. 2. Admissa hac responsione, nihil ex Jacobi vaticinio probaretur contra Judæos, in quorum opinione adhuc perseverat hæc dignitas, quod Christus adhuc ex Juda sit nasciturus. 3. Juxta hanc explicationem, sceptrum non auferetur à Juda, quia hæc dignitas, nempe Christi Nativitas ex tribu Juda semper maneret, etiam post Nativitatem: non enim major est dignitas, quod Messias sit nasciturus, quam quod sit natus ex hac tribu. His itaque responsionibus missis.

R. 5. D. a. post captivitatem Babylonicam imperium fuit penes sacerdotes, tunc quodammodo incorporatos, & inritos tribui Judæ. C. a. secus N. a. quando soluta captivitate Babylonica tribus Juda cum respective paucis ex tribu Benjamin, Levi seu sacerdotali, & aliis tribubus in Palæstinam & Patriam rediit, tunc nulla distinctio inter has tribus aut regno, aut loco, aut nomine, ut antea fuit habita, sed omnes teste *Josepho l. II. Antiq. c. 5.* communi nomine vocati sunt Judæi, & terra Judæa, gensque & regnum judæorum. Unde per *Judam* in oraculo non intelligitur sola tribus Juda, sed & totum complexum ex contribulibus, & ex illis, qui huic tribui sunt quodammodo incorporati, ac eodem nomine vocantur.

Ex his habes, qua ratione illud oraculum & Benedictio Jacobi specialiter ad tribum Juda pertinuerit; nam primo illa tribus per suos contribules à Davide usque ad captivitatem Babylonicam potestatem regiam & sceptrum habuit: post hanc captivitatem vero iterum Ducatus ad hanc tribum spectat, quia eum gesserunt oriundi quidem ex alia tribu, tribui tamen Judæ quodammodo inserti, & ab eo nomen Judæorum trahentes.

## §. II.

*Probationes ultiores.*

Messiam in scriptura S. promissum jam venisse etiam probat prophetia Danielis 9. v. 24. ubi Gabriel Archangelus ita loquitur Prophetæ: *Septuaginta hebdomades abbreviatae sunt super populum tuum, & super urbem sanctam tuam, ut consumetur præ-*



*varicatio, & finem accipiat peccatum, & deleatur iniquitas, & adducatur iustitia sempiterna, & impleatur visio, & prophetia, & ungatur Sanctus sanctorum,*

Dicitur in hoc oraculo. 1. *Septuaginta hebdomades abbreviatæ sunt*, id est, breves, seu paucae à Deo decretæ sunt usque ad Christi adventum, cum Deus longe plures decernere potuisset, & in multo remotius tempus differre adventum Messiae, nisi hujus accelerationem Daniel, & antea Isaias, alique SS. PP. & Prophetæ, de congruo meruissent, ac suis suspiriis ac precibus impetrassent, ut S. Bonavent. Gabriel, Richardus Alensis, alique apud Tirinum allegati docent. Simili phrasi Matth. 24. v. 22. dies persecutionis Antichristi dicuntur *breviati*, id est, breves seu pauci a Deo definiti & decreti. Unde istæ hebdomades dicuntur breves respectu temporis, quo jam expectabatur Messias: quid sint hebdomades istæ Danielis, inferius dicitur.

Dicitur 2. *Ut consumetur pravaricatio*: quibus & sequentibus verbis ad vivum depingitur Messias, & ejus officium, ut patebit. Pergit in prophetia citata Archangelus Gabriel: *ab exitu sermonis, ut iterum ædificetur Jerusalem usque ad Christum Duce* hebdomades septem, id est: initium septuaginta hebdomadum istarum sumendum est *ab exitu sermonis*, seu Decreto regis, quo dabitur plena facultas dirutam Jerusalem re-ædificandi, ab hoc initio fluent 7. hebdomades seu 49. anni, extra quod angustum seu perbreve tempus instauratio templi, ac urbis & platearum, atque murorum est absolvenda: & hebdomades sexaginta duæ erant: & rursus (id est interim, dum currunt hæ sexaginta novem hebdomades) *ædificabitur platea, & muri in angustia temporum, & post hebdomades sexaginta duas occidetur Christus*, & non erit ejus populus, qui eum negaturus est. Id est, post 7. hebdomades seu 49. annos, intra quos ædificabitur Jerusalem, fluent adhuc sexaginta duæ hebdomades seu 69. post quos, seu 69. hebdomades occidetur Christus in ipsa hebdomade septuagesima, & civitatem, & sanctuarium dissipabit populus (Romanus) cum Duce, (Tito) venturo: & finis ejus vastitas, & post finem belli statuta desolatio. Confirmatur autem pactum multis hebdomada una (id est



(id est ultima) & in medio hebdomadis ultimæ deficiet hostia, & sacrificium) abrogata scilicet lege antiqua, & sacrificiis ejus per mortem Christi) & erit in templo abominatio desolationis, & usque ad consummationem, & finem perseverabit desolatio: id est, templum non amplius restaurabitur in usus Sacrificiorum Judaicorum. Semel quidem atque iterum Judæi sunt aggressi templi Jerosolymitani instaurationem, sed maximo suo damno. Nam cum anno à reparata salute 134. Hadriano Imperatore idcirco turbas quasdam excitarent, centum millibus eorum occisis, reliqui per omnem orbem dispersi sunt. Sub annum vero Christi 363. dum manum restaurationi hujus templi admove, cælestibus prodigiis fuerunt impediti, Flamma è fundamentis erumpente, ac fabrilia instrumenta absumente, & rubris crucibus apparentibus in operariorum vestibus. Anno vero Christi 643. restauratum à Saracenis aliquatenus, antiquam magnificentiam nec à longe recuperavit, eaque restauratio solum facta est in usus Saracenorum. Unde vel ob ipsam superstitionem Machometanam ibi vigentem desolatio in eo permanet.

Ad prævertendas aliquas cavillationes prævie nota, hic 20 non, ut in aliis quibusdam locis S. Scripturæ, numerum incertum annorum vel temporis poni pro certo. Nam. 1. universim non ponitur in SS. literis numerus incertus pro certo. 2. hic ipsa ratio indicat certum designari numerum, quia certi characteres certis annis adscribuntur, ut ædificatio civitatis intra annos 49. & occisio Christi in medio hebdomadæ 7mæ.

Ex hac prophetia ita infero. Ex una parte vi prophetiæ hujus Messias in lege promissus debuit venire sub finem illarum 70. hebdomadum: Ex altera parte illæ 70. hebdomades jam pridem sunt finitæ: ergo Messias in lege promissus jam pridem debuit venire. Ant. quoad 1. memb. videtur liquidum, nam ille, cujus adventus sub finem 70. hebdomadum prædicatur, non potest alius esse, quam Messias in lege promissus, utpote cui conveniunt hi characteres: Sanctus Sanctorum, Christus ungendus & occidendus, qui adducturus sit justitiam sempiternam, impleturus visionem, & prophetiam, quæ nempe de Messia est facta, & deleturus, ac expiaturus ini-



quitatem, finemque daturus peccato. Et quæso, cui conveniunt hæ notæ? Certe soli Salvatori in lege promisso, & tamdiu expectato. Certe non conveniunt Hircano Machabæorum ultimo legitime electo Pontifici, & ab Herode occiso, ut comminiscuntur Judæi: hic enim non fuit Sanctus sanctorum, nec reliquas in oraculo Danielis delineatas notas habuit.

Neque Dicas, Danielelem vel potius Angelum Gabrielem de duobus Christis locutum fuisse, proinde has notas omnes non debere uni Christo convenire. Nam hoc iterum commentum est, & ipse textus ostendit, sermonem tantum de uno Christo esse. Igitur prob. 2. memb. A. Vel illæ 70. hebdomades sunt dierum vel annorum? sed si hæ, si illæ sint, jam sunt finitæ: ergo 70. hebdomades jam sunt finitæ: ergo promissus in lege Messias, qui sub finem harum hebdomadum debuit vi prophetiæ Danielis venire, jam venit. M. videtur patere, quia in S. Scriptura non leguntur aliæ hebdomades quam illæ duæ: scilicet hebdomas dierum, quæ ex 7. diebus constat, & hebdomas annorum, quam 7. anni conficiunt. m. vero iterum patet: quamvis difficile sit ob præcæ Chronologiæ obscuritatem determinare initium, & finem harum hebdomadum, tamen palam est, effluxisse usque nunc longe majus tempus, quam 70. hebdomades dierum, quæ nec 6. integros annos constituunt, imo quam & 70. hebdomades annorum, quæ sunt 490. anni: ergo etiam palam est, illas 70. hebdomades jam esse finitas.

Notes autem, textum Danielis esse intelligendum de hebdomadibus annorum, non dierum: ratio est: quia 70. hebdomades nimis parvum tempus constituerent, & sub finem illarum seu intra tam breve tempus non contingerunt illa, quæ in prophetia Danielis prædicuntur, nimirum occisio Christi, dissipatio urbis Jerosolymitanæ, & perpetua desolatio &c. uti certum est: ergo intelligi debet de septimanis annorum juxta phrasin veteris testamenti, ut Levit. 25. v. 8. *Numerabis quoque tibi septem hebdomades annorum, id est, septies septem, quæ simul faciunt annos quadraginta novem.*

Dices: Archangelus Gabriel apud Danielelem intellexit hebdomades



domades jubilæorum parvorum, seu semper septies quadraginta novem annos. Contra est 1. sacra scriptura non agnoscit hebdomades jubilæorum, bene hebdomades annorum. 2. Tales septuaginta hebdomades jubilæorum facerent annos 24010. quod spatium esset nimis longum, contra vaticinium Aggaei, qui c. 2. v. 7. dixit: *adhuc modicum est, & veniet desideratus cunctis gentibus.* 3. Post illas hebdomades juxta vaticinium Danielis destruendum est templum & Urbs, non autem antea: cum tamen hæc jam pridem destructa sint, nec tamen numerus ille annorum, quem 70. hebdomades jubilæorum conficerent, effluxerit: ergo non potest vaticinium istud intelligi tali modo de septimanis Jubilæorum.

*Solvuntur aliquæ objectiones.*

Objic. 1. Daniel à Judæis non recensetur inter Prophetas: ergo ex hujus prophetia contra illos nihil probatur. R. 21  
trans. a. N. C. Mera est nominis æquivocatio: Judæi quippe solum eos Prophetas agnoscunt, qui procul ab aulæ tumultu vitam solitariam agebant. Verum parum refert, an Prophetæ nomen Danieli tribuant, vel denegent, modo fateantur, sicut revera fatentur, librum Danielis inter Hagiogriphos seu divinitus inspiratos habendum esse. Et revera Davidis psalmi a Judæis habentur authentici, & a Deo inspirati, quamvis Davidem inter Prophetas non numerent: ergo à pari. Re ipsa autem Daniel verus Propheta fuit, quem Christus Ipse Matth. 24. v. 15. Prophetam appellat, dicens: *cum ergo videritis abominationem desolationis, quæ dicta est à Daniele Propheta.*

Objic. 2. Non possumus dicere, unde sumendum sit initium hebdomadarum Danielis: ergo ex illis nihil possumus probare. A. constat ex variis sententiis etiam Catholicorum circa initium harum hebdomadum. R. N. C. initium harum hebdomadum sumi debet ab exitu sermonis, ut iterum ædificaretur *Jerusalem*, seu à tempore, a quo permissum est Judæis iterum ædificare civitatem. Circa quod tempus, quamvis sit discrepantia Authorum, tamen non obest efficaciæ probationis ex hac prophetia deductæ. Constat enim, initium



debere fumi à tempore durantis Imperii Persarum, à quo usque ad nostra tempora ad minimum quater fluxerunt quadringenti nonaginta anni. Unde Messias jam dudum debuit venire: hinc recte Lyranus dicit in cap. 9. Daniel. Non veniet judæis excusatio à diversitate computorum, cum tempus 70. hebdomadum, qualitercunque computetur, jam per mille annos transierit in præteritum, & amplius: Sola ergo obstinatio malitiosa tenet cor in perfida expectatione Messia.

Interim, ut eruditorum desideriis aliqua ex parte faciam satis, quædam de initio 70. hebdomadum adnectere oportet. Igitur prævie.

Observandum 1. Septuaginta illas hebdomades computari debere *ab exitu sermonis, ut iterum ædificaretur Jerusalem*, id est à promulgato eo Regis Decreto, quo Judæis potestatem fecit instaurandæ urbis. Ut igitur initium harum hebdomadum determinetur, quis ille Persarum Rex fuerit, & quo regni sui anno decretum illud in gratiam Judæorum dederit.

Observandum 2. Quatuor à Regibus Persarum data esse edicta in favorem judæorum: Primum à Cyro anno imperii sui primo lib. 1. Esdræ c. 6. v. 3. ibi: *Anno primo Cyri Regis: Cyrus Rex decrevit, ut Domus Dei ædificaretur, quæ est in Jerusalem*. Secundum à Dario Hytaspæ, quo prius Cyri decretum confirmatur lib. 1. Esdræ c. 6. Tertium ab Artaxerxe Longimano (qui creditur ab aliquibus fuisse ille magnus Assuerus maritus Reginae Estheris) anno regni sui 7mo. lib. 1. Esdræ c. 7. v. 7. Quartum ab eodem Artaxerxe Longimano anno imperii ipsius vigesimo l. 2. Esdræ c. 2. v. 1. & seqq. ubi solemnissime concedebatur restauratio ipsius civitatis Jerusalem, murorum, platearum &c. quæ etiam à Nehemia peracta est. His supp.

Cum plerisque dico 1. Hebdomades 70. non esse inchoandas à Decreto Cyri, & Darii Hytaspis: nam inchoandæ sunt à Decreto illo, quo fuit concessa potestas iterum ædificandi urbem: sed priora Decreta id non concesserunt, verum tantum concesserunt potestatem denuo extruendi templum. Ob



Ob eandem rationem existimant non ignobiles critici contra alios, neque computandas esse 70. hebdomades à Decreto Artaxerxis primo nempe anno 7. regni edito : quia & illud Esdræ tantum permittit reedificationem templi , de instauratione urbis nihil habet , Putant tamen alii adversarii , ut Didacus à S. Antonio , Enchirid. script. tom. 3. pag. 358. Cornelius à Lapide in Daniele , anno 7mo regni sui Esdræ non solum concessisse potestatem restaurandi templum , sed & civitatem , quod Rex hic *Esdræ omnem petitionem ejus dederit* : 1. Esdræ 7, v. 6. Verum exinde non constat , quod Esdras etiam petierit facultatem ædificandi Jerusalem. Inde mihi videtur longe verisimilius , exordium harum hebdomadum esse ducendum ab altero edicto ejusdem Regis facto anno 20. Regni sui , quo clare & ample fuit hæc potestas concessa : ita sentiunt Honoratus , Tournellius Tom. 1. cursus Theologici. In Prælectionibus de Incarnatione Verbi Divini q. 3. de existentia Incarnationis. De prophetia ista Danielis. Gallus Cartier Tom. 2. Tract. 3. c. 2. Folio mihi 44. Ludovicus Habert de Incarnatione c. 5. §. 1. pag. 87. Antonius Mayr. Tract. Theolog. de primo & secundo adventu Christi l. 1. c. 1. n. 8. pag. 7. Faciunt hic critici varias oblocutiones ex Chronologia & annorum Epochis : Verum placita Chronologorum inter se mire divisorum valde sunt incerta , ut in defensione scriptorum Agredanorum in utroque libro pluribus ostendi : unde propter ea aliquis non debet turbari. Nihilo tamen fecius , ut aliquammodo illa oblectio diluatur , ab anno Artaxerxis vigesimo pauciores annos fluxisse , quam 490. usque ad Christum , dicendum esse pluribus videtur , Artaxerxem quasi 13. annis regnasse cum Xerxe Patre , & hunc annum , quem hic statuimus , fuisse vigesimum , ex quo à Patre Xerxe contra Græcos profecturo in regni collegam fuerat assumptus ; septimum vero ex quo solus regnavit , ab hoc autem anno juxta computum peritorum annos solares numerantium finis hebdomadæ sexagesimæ nonæ incidit in Christi Baptismum , quando à Patre declaratus populi Dux clarissime mundo apparuit : exactis autem deinde tribus annis prædicationis cum aliquot mensibus , seu in medio hebdomadæ septuagesimæ fuit Christus occisus. Ne autem gratis conficta videatur assumptio Artaxerxis in regni consortem , sciendum



endum id Regibus Persarum ut aliis in more fuisse, maxime dum isti expeditionem gravem fusciperent, sic ipse Xerxes à Patre collega fuit renunciatus. Ita discurret R. P. Antonius Mayr.

Prophetiæ Danielis accedit illa Aggæi c. 2. v. 7. *Hæc dicit Dominus, adhuc modicum est, & ego commovebo cælum & terram, & mare, & aridam, & movebo omnes gentes, & veniet desideratus gentibus.* Et licet quingenti & 17. vel. 20. anni (quos Aggæus ante Christum prophetavit) respectu temporis elapsi ab origine mundi, & futuri usque ad interitum mundi possunt dici modicum tempus, non tamen modicum tempus conficiunt respectu ætatis nostræ bis mille ducenti & plures anni ab Aggæo ad nostra tempora elapsi: ergo juxta hanc prophetiam jam ante multum tempus venit Messias. Jam sic concluditur.

Ostenso itaque, Messiam jam venisse, sine difficultate infertur, eum fuisse Christum Dominum: quippe in nullum alium illa signa conveniunt, quæ de Messia prædicta sunt. Ipso enim adveniente sceptrum Juda defecit, & impletæ sunt 70. hebdomades Danielis. Accedunt & alii Characteres à Prophetis de adventu Messiae prænuntiati, qui nulli nisi Christo convenire queunt. Sic Christus debuit nasci ex virgine. Isai 7. v. 14. *Ecce virgo concipiet, & pariet filium, & vocabitur nomen ejus Emmanuel.* Hoc oraculum impletum est in Christo Matth. 1. v. 18. & seq. Nasci debuit in Bethlehem juxta illud Michææ. 5. v. 2. *Et tu Bethlehem Ephrata parvulus es in millibus Juda, ex te mihi egredietur, qui sit Dominator in Israel, & egresus ejus ab initio, à diebus æternitatis.* Et hoc impletum est teste Matthæo. Præterea Christus cæcos illuminavit, claudos erexit, pauperibus prædicavit, passus & mortuus est, habuitque gloriosum sepulchrum, quæ omnia à Prophetis sunt aperte prædicta de Messia.

Judæi vero, dum omnia vaticinia ista nimis materialiter exponunt, errant non modice: quædam enim necessario solum in sensu allegorico & figurato accipienda sunt: eg. habitatio lupi cum agno &c. & alia ejusmodi.


*Errant*



*Art. VI. An Christus fuerit verus Homo, & verus Deus. 39*

Errant Insuper enormiter, dum non distinguunt duplicem Christi adventum, primum in humilitate, & paupertate ad redimendum genus humanum, alterum in gloria ad iudicandum mundum: quem cum primum Messiae futurum credunt, sic Christum, qui humilis primo apparuit, respuunt.

Gentilibus, a quibus scripturarum autoritas non admittitur, veritas hæc de Christi adventu optime probatur mediate, quatenus ex signis credibilitatis ostenditur veritas Catholicae Ecclesiae, ex cuius doctrina inferitur dogma de Christi Dei & hominis adventu, & aliis ejus prærogativis & gestis nobis per Ecclesiam propositis &c.



*ARTICULUS VI.*

*An Christus fuerit verus Homo, & Verus Deus.*

**Q**uod spectat ad Judæos, iis probari non debet, Christum seu Messiam verum hominem fuisse, vel fore, quando adveniet, sicut jam advenisse dicta convincunt abunde; cum ipsis persuasissimum semper fuerit, Ipsum ex semine Abraham nasciturum, imo eum filium Davidis futurum. Ipsimet Christo de hac re interroganti responderunt Matth. 22. v. 42. ibi *quid vobis* (ita interrogat Christus) *videtur de Christo?* cujus filius est? dicunt ei David. Id etiam deducunt tanquam certissimum ex vaticinio Moyſis Deutero. 15. v. 18. *Prophetam de gente tua & de fratribus tuis, sicut me suscitabit tibi Dominus.* 22

Attamen probanda est vera humanitas contra Manichæos, & quosdam alios hæreticos, ad quos reducuntur Eutichiani & alii, qui duarum naturarum in Christo confusionem, vel humanitatis in Divinitatem conversionem finxerunt: hi enim negarunt, Christum Dominum verum fuisse hominem. Verum probatio hujus dogmatis est omnino facilis. Itaque.

*Affero 1.*



23

Affero 1. Christus Dominus est verus Homo. Ita fides Catholica.

Prob. breviter. Christus Dominus se ipsum sapissime vocat filium hominis, & vocatur à Judæis filius David: dicitur natus, circumcissus, comedens, ambulans, dormiens, passus & mortuus: ad Rom. 5. v. 15. dicitur. *Multo magis gratia Dei, & donum in gratia unius hominis JESU Christi in plures abundavit.* Profecto plurima de Christo homine sunt in scripturis passim obvia testimonia, quæ omnia velle in alienum sensum detorquere de phantastico tantum homine, est penitus irrationabile.


Affero 2. Christus est Deus verus. Ita fides orthodoxa contra Judæos, & multos hæreticos, singulariter antiquiores, Carpocratem, Cerinthum, Ebionem, quibus sæculo XVI. accessere Sociniani. Hæc veritas probatur ex utriusque testamenti pagina. Sic Psal. 109. quem Psalmum de Christo agere judæi non negant, ut colligitur ex illo Matth. 22. v. 43. dicit Pater divinus de Christo: *ex utero ante luciferum genui te*: quibus verbis indicatur æterna ejus generatio tanquam Dei de Deo. 2. Isaias c. 9. v. 6. ait: *parvulus enim natus est nobis, & filius datus est nobis, & factus est principatus super humerum ejus, & vocabitur nomen ejus admirabilis, consiliarius, Deus, fortis, Pater futuri sæculi*: Idem Isaias c. 35. v. 4. dicit. *Deus ipse veniet, & salvabit nos.* Et mox subdit signa in favorem hominum facienda, quæ & præstitit Jesus: *aperientur oculi cæcorum, & aures surdorum patebunt* &c. 4. Baruch. c. 3. v. 36. *Hic est Deus noster, & non astimabitur alius adversus eum*: Hic adinvenit omnem viam disciplinæ, & tradidit illam Jacob puero suo, & Israel dilecto suo. Post hæc in terris visus est, & cum hominibus conversatus est. Ubi sermo est de Deo vero, qui legem tradidit populo Israelitico, & dicitur postea apparuisse non quomodocunque in alio, scilicet in Angelis, prout non solum posthac sed jam prius sæpius apparuerat, sed apparuisse speciali modo in assumpta natura humana.

Dubium, quod aliqui movent de prophetia Baruch, jam sublatum



sublatum est Tomo I. de Prolegomenis. Itaque Deus Verbum juxta mox ante allatam prophetiam Baruch in terra videri voluit, sed non statim in corpore virili, verum ut magis se similem nobis exhiberet, voluit infans nasci, & quidem ex matre, ut Evangelistæ nos docent.

Jam roboratur hæc veritas ex novo Testamento. 1. Isaias c. 6. v. 1. de se ipso Deum vidente dicit: vidi Dominum sedentem &c. & S. Joan. Evang. c. 12. v. 41. scribit, quod Isaias viderit Christum. Sic enim ait: Hoc dixit Isaias, quando vidit gloriam ejus, & locutus est de Eo, tanquam Deo. 2. Clarissime Joannes C. 1. v. 14. pronuntiavit: *verbum caro factum est, de quo versu primo asseruit: Deus erat Verbum.* 3. Thomas Joan. 20. v. 28. dicit ad Christum: *Dominus meus, & Deus meus.* Nec tamen Christus eum ullo modo corrigit. 4. S. Paulus Rom. 9. v. 5. de Christo Domino habet: *qui est super omnia Deus Benedictus in sæcula.* Plura alia, quæ brevitatis ergo transilio, testimonia de Divinitate Christi passim in sacris literis occurrunt. Veritates hujus articuli varie sequentibus dissertationibus confirmabuntur.



## DISSERTATIO II.

*De unione Hypostatica, ejusque Subjecto & termino.*

### ARTICULUS I.

*Quid & qualis sit unio Hypostatica?*

**S**UPPONO I. ex Philosophia, duplicem esse modum, unum intrinsecum, alterum extrinsecum. De intrinseco realiter aut omnino ex natura rei formaliter identificato cum re modificata (quales modi sunt finitas & existentia rerum creaturarum, ac infinitas in Deo) hic nobis non est sermo, bene vero de *P. Kick Theol. Tom. IV.* **F** modis 23



modis extrinsecis, Potest autem modus extrinsecus definiri, quod sit actualis determinatio rei alicujus indifferentis, ac ex se indeterminatae, vel quod sit forma physica determinans in actu 2do. essentialiter subjectum ad aliquid, ad quod erat prius indeterminatum.

Suppono 2. Omnem unionem realem, ac physicam à nostris inter modos numerari, & quidem dici modum relativum, seu esse relationem extrinsecus advenientem; Ratio hujus est: quia unio in suo primario conceptu importat habitudinem unius ad aliud, videlicet extremi uniti ad alterum extremum, cui unitur; sed relatio nihil aliud est, quam habitudo unius ad aliud: ergo. Quod sit relatio extrinsecus adveniens, probant Scotistae; quia ista relatio non exurgit ex natura extremorum, & ambo extrema unibilia possunt existere sine unionem, nisi ab extrinseco adveniat causa & actio produciens unionem.

Suppono 3. Ex historia Ecclesiastica. Nestorium Patriarcham constantinopolitanum post annum 428., quo Episcopus creatus est, docuisse, quod in Christo duae dentur personae, Divina & Humana, & quod inter has non detur vera realis unio, sed tantum moralis & affectiva, qualis datur inter duos amicos ob consensum voluntatum, ob quem interdum tales amici dici solent una persona, quamvis non sint, sicut & duo conjuges ob unionem ejusmodi moralem & affectivam jam non sunt duo moraliter, sed una caro. Qui proinde negavit, Filium Dei esse vere Incarnatum, ac ex virgine natum. Unde & B. Virginem noluit appellari Deiparam, sed Christiparam, contra quem errorem in salutatione Angelica addita sunt haec verba: *Mater Dei*. Fuit hic Haeresiarcha damnatus, & ob blasphemias in Christum & Deiparam voces Dignitate Episcopali privatus in 3tia Synodo generali, seu I. Concilio Ephesino contra eum celebrato anno Christi 430. circiter, Papa Caelestino, Imperatore Theodosio Juniore, & Valentiniano III., praesidente Cyrillo Alexandrino Archiepiscopo. & aliis Papae Legatis.

24 Affero 1. Unio hypostatica, per quam natura humana in Christo uniebatur Verbo Divino, est physica ac modalis. entitas



tas, non tamen est entitative substantialis, ita communis Scot. cum Scot. in 3. d. 1. q. 1. n. 3. §. de primo dico, quod, ubi dicit: *Ista unio* (hypostatica) non dicit per se quid absolutum.

Prob. 1. pars. Illa entitas est physica ac modalis, quæ physice ac realiter determinat subjectum ad aliquid, ad quod ex se erat indeterminatum; atqui unio hypostatica determinat physice naturam humanam tanquam subjectum ad aliquid, ad quod erat ex se indeterminatum, scilicet ad esse unitum Verbo Divino: ergo. M. patet ex notandis: m. est de fide ex Concilio Ephesino mox citato, & ex communi consensu omnium Catholicorum.

Prob. 2. pars. Unio hæc est tantum relatio prædicamentalis extrinsecus adveniens; atqui relatio prædicamentalis entitative est tantum accidens: ergo. 2. Illud debet esse accidens entitative, quod magis dependet à subjecto, quam accidens absolutum; atqui omnis unio, ceu modus magis dependet à subjecto, quam accidens absolutum vg. . quam quantitas: ergo. M. videtur constare: quia videtur inconueniens, ut ens entitative substantiale magis dependeat à subjecto, quam accidens aliquod. m. est palam; quia quantitas potest divinitus esse extra omne subjectum; at modus, aut unio neque supernaturaliter extra suum subjectum existere potest: ut adversarii quoque concedunt.

Prob. 3. Aristoteles L. 2. de anima text 2. & l. 8. metaph. t. 15. enumerat omnes entitates substantiales, & tamen ibi solum meminit materiæ, formæ, & compositi, neque alibi entitatem aliquam modalem inter substantias recenset.

Prob. 4. Admisso, quod hæc unio sit entitative meram accidens, possunt omnia salvari, quæ circa hoc mysterium sunt salvanda: ergo frustra recurritur à RR. & aliis ad modum entitative substantialem.

Prædictis non obstantibus unio hypostatica potest & debet dici *substantialis*. Nam 1. ita dicitur à SS. PP. & Conciliis præsertim lateranensi sub Martino 1. can. 6. 2. Unio hyposta-



hypostatica, licet entitative sit accidens, tamen unit extrema modo substantiali in unum compositum ac complexum substantialis; ergo ratione modi uniendi dici debet vere substantiale: A. prob. unit naturam humanam tanquam ens suppositabile & personabile Personalitati verbi tanquam suppositati; sed hæc ratio uniendi est substantialis; quia ratio suppositi, ac subsistentiæ pertinet ad modum per se essendi substantiæ, estque ipsius complementum substantiale: ergo. Atque ideo unio hypostatica est vere substantialis non quidem intrinsece, & entitative, sed extrinsece ac denominative accipiendo denominationem ab extremis, quæ unit, & à modo, quo unit.

Ex hoc fit, nostram sententiam esse alienam ab hæresi Nestorii. Hic enim tantum unionem & relationem moralem, qualem habet amicus ad amicum, admisit inter naturam humanam Christi, & Verbum, nos vero admittimus veram physicam, quæ realiter unit humanitatem cum Personalitate Verbi in unum suppositum, ac complexum reale & substantiale. Reliqua, quæ conclusioni nostræ opponi possunt, jam sunt soluta in Physica, in quæstione de unione inter materiã & formam.

26 Affero 2. Unio hypostatica quoad entitatem non est maxima, seu nobilissima. 2. Est tamen maxima in ratione unionis. 3. Et Doni. Herinx & alii Scotistæ pariter.

Prob. 1. pars. Entitas substantiæ est nobilior entitate accidentis, & entitas accidentis absoluti est nobilior accidente respectivo; atqui unio hypostatica est accidens relativum: ergo entitas substantiæ, & accidentis absoluti in ratione entitatis est nobilior unione hypostatica: ergo unio hypostatica non est nobilissima in ratione entitatis.

Prob. 2. pars. Unio qua talis dignificatur ab extremis, quæ unit; atqui hæc sola unio habet dignitatem uniendi infinitam: ergo hæc sola in ratione unionis est maximæ dignitatis.

Prob. 3.



Prob. 3. pars. Quæ est Scoti 4. d. 49. q. 2. n. 10. §. quæ autem adducuntur istarum duarum responsionum: ubi dicit: perfectissimus illapsus est in naturam humanam, ut personaliter unitam Verbo, & aliorum communiter contra Durandum. 1. Sacra Scriptura hoc donum præ aliis extollit: ita Joan. 3. dicitur: Sic Deus dilexit mundum, ut filium suum unigenitum daret. Et Joan. 10. Pater, quod dedit mihi, majus est omnibus. Accedit D. August. qui lib. 13. de Trinit. c. 19. ait: in rebus per tempus ortis illa summa gratia est, quod homo in unitate personæ conjunctus est Deo: ergo. 2. Si majus donum foret, tunc vel foret beatitudo supernaturalis vel gratia sanctificans; atqui ista dona non sunt majora, quia animam tantum uniunt accidentaliter cum Deo in ordine ad operari, unio vero hypostatica unit eam substantialiter, ac intime cum Deo, ac illam elevat ad esse Personale Divinum; ita, ut vocetur Deus, & adoretur cultu Latriæ: ergo.

Affero 3. Unio hypostatica est supernaturalis quoad substantiam. Communis omnium. 27

Prob. Illud est intrinsece supernaturale, seu quoad substantiam, quod absolute excedit vires causæ naturalis naturaliter agentis, & non supernaturaliter elevatæ, ac adiutæ, & exigentiam entitatum naturalium; atqui tale ens est unio hypostatica: ergo unio hypostatica est intrinsece, & quoad substantiam supernaturalis. M. est conceptus & notio entis intrinsece supernaturalis. m. facile conceditur ab omnibus. Certe si omnes causas creatas naturales percurras, nulla habebit virtutem producendi unionem adeo mirabilem: & ipse Deus, dum eam producit, non agit ut causa & Author naturalis, sed ut supernaturalis; qui non agit juxta exigentiam causarum & entium naturalium creatarum, cum nullum ex entibus naturalibus, imo nec omnia simul sumpta naturaliter exigant unionem hanc inter extrema tam diversa; hinc ista unio est prorsus gratuita, & favor extraordinarius Dei ut Authoris supernaturalis.

Confirm. S. August. priori numero allegatus unionem hypostaticam vocat summam gratiam: ergo debet esse summopere seu in summo gradu supernaturalis; atqui summopere su-



pernaturalis non esset, nisi esset supernaturalis quoad substantiam: ergo est supernaturalis quoad substantiam.

28 *Objic. 1.* Contra conclus. 2. Beatitudo est summum bonum: ergo antecellit unioni hypostaticæ. *R. D. a.* Beatitudo objectiva, quæ est ipse Deus *C. a.* Beatitudo formalis, quæ est visio, & amor fruitivus Dei *N. a.*

*Objic. 2.* Finis est melior medio; atqui beatitudo formalis est finis, & unio hypostatica est medium ad obtinendam beatitudinem formalem; ergo beatitudo formalis est melior unioni hypostatica. *R. N. M.* universaliter subsumpt. Nam arbor est perfectior & æstimabilior suo fructu, & tamen est medium ad fructum: quare si vult arborem propter fructum, vult perfectius propter minus perfectum: ergo &c.

*Objic. 3.* Si alicui daretur optio eligendi vel solam beatitudinem formalem, vel solam unionem hypostaticam, tunc beatitudo esset magis eligenda, quam unio: ergo beatitudo est melior. *R. D. a.* esset magis eligenda, quia magis foret necessaria in talibus circumstantiis, vel magis utilis *C. a.* quia foret perfectior & melior *N. a.* tempore famis ob urgentem necessitatem magis eligendum frustillum panis, quam magna summa auri, licet hæc illo sit æstimabilior.

*Objic. 4.* Lapis est capax unionis hypostaticæ, non vero visionis beatificæ: ergo unio illa est minus nobilis, quam visio beatifica. *R. N. c.* Lapis est copax unionis hypostaticæ, & non est capax visionis sensitivæ, quæ fit per oculum corporeum, & tamen unio hypostatica in ratione doni est major illa visione sensitiva.

*Ojic. 5.* Juxta D. Paulum 1. Corinth. 3. in donis Dei nullum majus est charitate: ergo *R. D. a.* in donis Dei includentibus aliquem actum, aut operationem vitalem nullum est majus charitate *C. a.* in donis Dei omnibus, ac universaliter loquendo *N. a.*



ARTICULUS II.

*Quomodo facta sit unio hypostatica, an scilicet sine  
prævia dispositione, & an in unitatem na-  
turæ, vel suppositi?*

**A**SSERO 1. Unio hypostatica est immediate facta in natura humana sine præcedente dispositione. Communis cum Scoto. 3. D. n. 2. q. 2. §. quantum ad secundum articulum. n. 12. & seqq. 29

Prob. 1. Conveniebat naturam humanam prius per unionem substantialiter compleri in ratione personæ & suppositi, quam accidentaliter per gratiam, aut aliam formam accidentalem prævie disponentem: ergo ante unionem hypostaticam non præcessit aliqua dispositio.

Prob. 2. Unio hypostatica est potius radix, & fundamentum, ob quod humanitati Christi plenitudo omnis gratiæ fuit concessa; sed fundamentum est, & supponitur ante illud, cuius est fundamentum: ergo unio hypostatica fuit præsupposita ante omnem gratiam in humanitate Christi: ergo nulla gratia dispositiva præcessit unionem hypostaticam in humanitate Christi. Est etiam Deo & unioni hypostaticæ magis honorificum, quod ejus intuitu omnia reliqua dona supernaturalia conferantur animæ Christi: ergo.

Objic. 1. Rex ducturus sponsam pauperem, eam prius ornat: ergo etiam Verbum volens assumere naturam humanam ex se gratia destitutam, eam prius exornavit gratia. R. N. c. illa sponsa jam habet esse substantiale completum: unde bene posset antecedenter ornari: at natura humana Christi ante unionem hypostaticam non habuit esse substantiale completum: ergo non conveniebat eam tunc jam antecedenter prævie ornari, antequam esset completa substantialiter in ratione personæ.

Objic. 2. Ad visionem Beatificam prærequiritur dispositio supernaturalis prævia, nimirum lumen gloriæ: ergo etiam  
ad



ad unionem hypostaticam supernaturalis prærequiritur dispositio, N.C. & parit. Visio Beatifica est operatio vitalis supernaturalis, quæ non potest dari sine præsupposito comprincipio supernaturali, quale est lumen gloriæ ; unio vero hypostatica non est operatio vitalis ; adeoque non præsupponit ejusmodi principium supernaturale operativum.

30 Affero 2. Unio hypostatica facta est in unitate Personæ, ita, ut in Christo una sit persona. 2. & duæ distinctæ, inconfusæ naturæ. Ita fides Catholica.

Prob. 1. pars. 1 Ex Concilio Ephesino, seu III. generali contra Nestorium celebrato, ubi prima pars nostræ conclusionis est definita, quæ definitio confirmata est in conciliis Calcedonenfi, Lateranensi I. Hispalensi II. Toletano IV. ergo. Adduco verba unius concilii Calcedonenfis, anno 451. celebrati, quod in professione fidei ita habet: *Confitemur unum eundemque Christum Filium Dei, Dominum, unigenitum in duabus naturis inseparabiliter, inconfuse, indivise, immutabiliter agnoscendum &c.*

Prob. 2. Sacra scriptura & Symbola loquuntur de Christo Deo Homine, ut de una persona : ergo in Christo est tantum una persona. A. prob. Symbolum Apostolorum habet : *Filius Dei unicus, qui conceptus de Spiritu sancto, natus ex Maria Virgine.* Symbolum constantinopolitanum. *Unum Dominum JESUM Christum, natum ante omnia sæcula, qui incarnatus ex Maria Virgine, crucifixus &c.* Symbolum S. Athanasii : *qui licet Deus sit & homo, non duo tamen, sed unus est Christus, unus omnino non confusione substantiæ, sed unitate personæ.* Plane, si essent duæ Personæ, Concilia & Symbola non possent ita loqui, & alius esset ex Deo natus ante sæcula, & alius natus ex Maria Virgine in tempore.

Accedit S. Script. unum Christum modo Deum, modo hominem, nunc æqualem, nunc minorem Patri Divino appellans, quod non recte fieret, si essent duæ Personæ in Christo : ergo.

Prob. 3.



Prob. 3. eadem prima pars. Veræ sunt hæ propositio-  
nes : Deus est homo , homo est Deus , sed non nisi ratione  
identitatis , non quidem inter naturas , sed inter personas : ergo  
una est persona in Christo , quæ suppositat utramque naturam,  
Divinam & humanam.

Confirm. 1. Duæ substantiæ tantum accidentaliter unitæ,  
tantum denominantur accidentaliter non substantialiter ; atqui  
homo & Deus , seu substantia humana & divina in Christo , se  
mutuo denominant substantialiter , & Deus dicitur homo , ac  
homo Deus : ergo Natura humana & Divina in Christo non  
sunt tantum accidentaliter sed substantialiter in unitatem Perso-  
næ coadunatæ. M. patet : sic homo ratione vestis ipsi acci-  
dentaliter unitæ , & applicatæ non dicitur *vestis* , sed *vestitus* ,  
& *vestis* non dicitur homo , sed humana vel hominis.

Confirm. 2. Hæc propositio *album est dulce* , ideo vera  
est , quia uni supposito inest albedo & dulcedo : ergo etiam  
ideo vera est hæc propositio : *homo est Deus , & Deus est homo* ,  
quia natura Divina & humana in una Persona conveniunt.

Prob. 4. eadem 1. pars. In sententia Nestorii tota SS.  
Trinitas esset incarnata , cum tota SS. Trinitas ratione illa ac-  
cidentaliter , & morali , qua amicus amico conjungi solet , uniatur  
Naturæ humanæ Christi , ac eam amet , & diligat tanquam ami-  
cam. 2. In hac sententia hæretica omnes Sancti essent Verbo  
Divino uniti ; quia Verbum Divinum eos tanquam amicos ha-  
bet , & sic unionem amicitiae eidem conjungitur , quæ sequelæ  
sunt contra fidem. 3. Secundum fidem Christus est simplici-  
ter unus , secundum Nestorium esset simpliciter duo , utpote  
duplex realiter distinctum suppositum : ergo.

Prob. jam secunda pars Assert : contra Eutychianos hære-  
ticos , unam tantum naturam in Christo asserentes. 1. ex S. scrip-  
tura. Joan. I. v. 4. dicitur : *Verbum caro factum est , & habita-  
vit in nobis*. Quomodo autem est caro factum ? an conversio-  
ne divinitatis in carnem , vel carnis in Divinitatem ? at utrumque  
hoc insulsum esse , rationes sequentes docebunt : ergo assumptione  
huma-



humanitatis ut distinctæ, & inconfusæ in Deum. 2. Christus est verus Deus, & verus homo; atqui si duæ naturæ Divina, & humana essent in Christo confusæ, & in unam coalescerent, tunc Christus nec esset verus Deus, nec verus homo, sed aliquid tertium ex confusione utriusque naturæ exurgens: ergo istæ duæ naturæ post unionem possent coalescere in unam per commixtionem, ita, ut una cum altera misceatur; quia implicat duas essentialiter diversas naturas taliter inter se commisceri, ut omnis sana Philosophia docet: alias certe essent possibiles hirco-cervi, & vulpanseres. Neque duæ completæ naturæ, quales sunt Divina & humana, possunt per compositionem in unam transire, sicut natura leonina, & humana non possunt in unam aliquam tertiam componi: ergo. 3. Error Eutychianus fuit damnatus actione 5. in Concilio Calcedonensi contra Eutychen congregato, & in pluribus aliis, ac proinde nostra conclusio approbata est tanquam dogma fidei: quod etiam clare docet Symbolum S. Athanasii pro probatione primæ partis hujus conclusionis allegatum, ubi etiam verba Concilii Calcedonensis habentur: Patres, qui videntur huic conclusioni oppositi, negant solum dualitatem naturarum in Christo, quarum quælibet propria subsisteret personalitate.

32 *Objic. 1. contra 1. part. conclus. In hymno Ambrosiano Verbum dicitur suscepisse hominem; ergo Verbum assumpsit naturam humanam cum propria personalitate humana: ergo in Christo est personalitas humana, & Divina verbi: consequenter duplex persona. R. D. a. in hymno Ambrosiano Verbum dicitur assumpsisse hominem, accipiendo concretum pro abstracto, vel intelligendo per hominem, naturam humanam singularem, & individuum C. a. intelligendo naturam humanam subsistentem propria personalitate creata. N. a. & c.*

*Objic. 2. Leo Papa Epist. 10. ad Flavianum c. 4. ait: in Christo unum coruscat miraculis, aliud succumbit injuriis, atqui hic modus loquendi indicat aliam esse personam humanam in Christo succumbentem injuriis, & aliam Personam Divinam coruscantem miraculis: ergo. R. N. m. To aliud & unum in neutro indicat diversitatem naturarum: To alius vero & unus in masculino (quod hic non licet loqui) diversitatem Personarum.*



rum. Hinc in Divinis potest dici, alius Pater, alius Filius, & alius Spiritus Sanctus: non vero aliud Pater, aliud filius: quia To aliud sic multiplicatum indicaret pluralitatem naturarum in SS. Trinitate: alius vero in Masculino signat pluralitatem personarum. Igitur è converso hic To unum, & aliud in neutro indicat duas naturas in Christo, non vero duas personas.

Objic. 3. B. V. Maria genuit hominem: ergo etiam produxit personam humanam: ergo præter Personam Divinam in Christo datur quoque humana &c. R. D. c. personam humanam denominative C. c. entitative. N. c. personalitas Divina, quatenus personat & facit subsistere naturam humanam in Christo, potest etiam denominative & æquivalenter dici humana; quia æquivalet, ac vices supplet personalitatis humanæ, ac naturam humanam ultimo complet.

Objic. 4. contra 2. partem Conclus. Joan. 1. dicitur: *Verbum Caro factum est*: ergo Verbum versum est in carnem. R. N. c. ut recte advertit Gregorius L. 9. Epist. 61. *Verbum carnem dicimus factum, non immutando quod erat, sed suscipiendo, quod non erat*. Neque te moveat verbum *factum est*: siquidem Christus ad Galat. 3. v. 13. dicitur pro nobis *factus maledictum*, & tamen nemo audebit dicere, Christum in maledictum peccati conversum esse. Est ergo factus maledictum, quia pro nobis crucifixus similitudinem gessit hominis à Deo maledicti, talisque reputatus est ab hominibus. Ufurpavit autem Evangelista verbum *Factum est*, tum ut realem unionem inter personam Verbi, & naturam humanam exprimeret, tum ut doceret Verbum assumpsisse veram carnem, & non solum imaginariam carnis speciem, ut aliqui hæretici docuere. Quam ultimam rationem adducit D. Chrysostomus homil. 10. in Joannem.

Assero 3. Non potuit Verbum Divinum assumere naturam humanam suppositatam propria personalitate. Prob. 1. propria suppositalitas est negatio unionis ad alienum suppositum; sed hæc negatio indispensabiliter destruitur per unionem ad alienum suppositum, seu ad Verbum Divinum, sicut tenebræ vel negatio luminis per præsentiam luminis: adeoque Verbum Divinum non potuit assumere naturam humanam cum pro-

33







*Art. III. §. I. De subjecto actuali unionis hypostaticæ. 53*

c. 6. dicit: *Neque enim Deus Verbum quidquam eorum, quæ, cum nos initio fingeret, naturæ nostræ inseruit, prætermisit: sed omnia assumpsit, hoc est corpus, animam intelligentem, & ratione præditam, eorumque proprietates.* S. August. Enchiridio c. 34. *nihil humanæ naturæ in illa susceptione fas est dicere defuisse.* Accedunt alii SS. PP. plures: ergo Verbum assumpsit veram integram, totam naturam humanam.

Prob. 2. Christus est perfectus homo; sed non esset, nisi assumpsisset veram totam, ac integram naturam humanam, & sic illa in Christo daretur; nam ille non potest dici totus & integer homo, qui non habet totam & integram naturam humanam: ergo Verbum assumpsit veram, totam, & integram naturam humanam.

Confirm. Tanto operi & mysterio non conveniebat defectus alicujus, quod requiritur ad veritatem, & integritatem naturæ humanæ, ergo

Igitur Verbum Divinum assumpsit corpus non mutilum, sed integrum, per consequens etiam carnem & ossa, ac reliquas partes integrantes corpus humanum: quia hæc omnia spectant ad veritatem corporis humani, quod Verbum assumpsit.

Credibiliter etiam immediate sunt assumpti capilli, & ungues, tum quia juxta probabilem sententiam informantur ab anima, quia non sunt meræ partes excrementitiæ, sed integrantes & ornantes corpus, & ob hanc rationem, etiamsi non viverent, fuissent immediate assumpti à Verbo. Non tamen ita fuere, vel manent assumpta saliva, fudor, lachrymæ, postquam à reliquis humoribus partialibus immediate assumptis sunt segregati: quia sunt mera excrementa, nec erunt in corporibus gloriosis: item Chylus, nondum commixtus massæ sanguineæ, quia nec iste inter partes corporis venit, nec requiritur ad veritatem naturæ humanæ integræ & perfectæ, nec est in corpore glorioso.

Ex his deduces imo. Verbum Divinum assumpsisse verum corpus humanum, naturamque humanam per omnia nostræ



naturæ similem & consubstantiallem. Item de fide est contra Marcionem, & Lucanum quemdam, qui finxerunt, à Verbo assumptum esse corpus apparens tantum & phantasticum. Quem errorem secuti sunt Manichæi, Priscillianus & alii. Quod patet tum ex dictis, tum ex S. Scriptura. Joann. 1. dicitur: *Verbum Caro factum est*: & Luc. 24. *palpate & videte, quia spiritus carnem & ossa non habet, sicut me videtis habere*. Recte ergo dicit S. August. L. 83. *Quæstionum Quæst. 14. si phantasma fuit corpus, fefellit Christus, & si fallit, veritas non est: est autem veritas Christus, non igitur phantasma Corpus Christi*. Ad Rom. 1. *qui factus est ex semine David secundum carnem*. Accedunt alia testimonia scripturarum, quibus Christus simpliciter dicitur homo, conceptus, natus, locatus, passus, comedis, & bibisse: integra ejus genealogia textitur, quæ omnia indicant, verum Jesum fuisse hominem, ex hominibus oriundum, consequenter ejusdem naturæ & corporis cum reliquis hominibus.

Deduces 2do. A Verbo esse assumptum corpus terrenum ex Virgine, est contra Valentinum & Gnosticos, dicentes: à verbo esse assumptum corpus non terrenum, sed cæleste, nec natum ex virgine, sed per Illam transfusum. Qui error dicitur innovari ab Anabaptistis. Patet ex dictis, juxta quæ verbum assumpsit veram nostræ consubstantiallem carnem, & quidem ex Maria virgine, juxta illud: Lucæ 1. *quod enim ex te nascetur*. Præterea Christus vere fuit ex stirpe Adæ, Abraham, David, ut scriptura varie testatur, quod fieri non posset, nisi ratione corporis ex illis desumpti in utero Virginis. Neque obstat, quod ad Philip. 2. Christus dicatur *in similitudinem hominum factus*: nam hic textus non est intelligendus de similitudine meræ apparentiæ, sed de similitudine essentiali in natura, qualiter unus homo alteri similis est. 2. Neque obest, quod 1. Corinth. 15. Christus dicatur *homo cælestis*: nam nequaquam dicitur cælestis ob corpus aliquod cæleste, sed ob vitam cælestem, nulli subjectam peccato.

35 Afferro 2. Sanguis Christi fuit proxime & immediate unitus Verbo. Est Communissima.

Prob.



*Art. III. §. I. De subiecto actuali unionis hypostaticæ. 55*

Prob. Concilia passim de sanguine assumpto explicant illud ad Hebr. 2. v. 14. *quia ergo pueri communicaverunt carni & sanguini, & ipse (Christus) similiter participavit eisdem.* 2. Concil. Æcumenicum III. seu Ephesinum I. *Verbum Dei carnem esse factum, dicit Joannes; quia æque ac nos carnis & sanguinis particeps effectum est.* 3. S. Cyrillus epist. ad Nestorium, quæ habetur actione ima. Concilii Calcedonensis. *Verbum carnem fieri, nihil aliud est, nisi quia juxta nos participatus est carni & sanguini.* Denique Clemens VI. extravagant: *Unigenitus de penitentiis & remissionibus ait: guttam modicam sanguinis Christi propter unionem ad Verbum suffecisse ad redemptionem generis humani.* Jam laudati textus dicunt sanguinem esse assumptum, sanguinem uniri Verbo: qui modus loquendi in sensu obvio (in quo dicta scripturæ, Conciliorum & SS. PP. accipi debent, nisi aliquid obstat) significant unionem immediatam 2. Hi textus æqualiter loquuntur de carne ac de sanguine; atqui caro fuit immediate unita: ergo & sanguis.

Prob. 2. Sanguis, licet non animatus, est pars naturæ humanæ integræ, & ideo datur in corporibus gloriosis, & hanc ipsam ob rationem juxta Trident. Sess. 13. c. 3. *vi naturalis connexionis, & concomitantæ, qua partes Christi, qui ex mortuis resurrexit, inter se copulantur, ponitur sanguis etiam sub speciebus panis consecratis; atqui Verbum assumpsit immediate naturam humanam, & omnes partes: ergo etiam sic assumpsit sanguinem.*

Respondet Cajetanus, sanguinem *naturalem* ac vere decoctum, non vero *nutrimentalem* nondum perfecte decoctum esse immediate à Verbo assumptum.

Contra est 1. hæc distinctio sanguinis in nutrimentalem & naturalem est contra communem, ac voluntaria: ergo. 2. Rationes & auctoritates absque ulla distinctione probant de toto sanguine, vel massa sanguinea, quæ fluit in venis ac reliquis vasis, per quæ sanguis circulatur: ergo & nos absque ulla distinctione debemus dicere totum illum sanguinem esse immediate assumptum. 3. Omnis sanguis, qui pro nobis effusus est



est in pretium redemptionis, fuit immediate à Verbo assumptus, ut colligitur ex Clemente VI. sed inter sanguinem effusum non erat modica pars sanguinis illius nutrimentalis: ergo.

Contra est 4. Cajetanus procedit ex falso supposito, credens sanguinem perfecte decoctum vivere, nam ex una parte probabilius nos Scotistæ negamus, sanguinem quemcumque vivere; & deinde negatur, quod tantum partes viventes & ab anima informatae fuerint immediate unitæ verbo: nam omnes partes, seu vivas, seu non viventes assumpsit immediate, quæ ad integram vitæ humanæ constitutionem pertinent, qualis etiam est sanguis sive vivus, sive non vivus; ideo enim est etiam in corporibus gloriosis, quia hæc decet habere omnes partes, quæ ad integram constitutionem ac perfectionem naturæ humanæ requiruntur.

36

Affero 3. Verbo etiam immediate uniti fuerunt reliqui tres humores, pituita, bilis flava, & atra. Communis.

Prob. 1. Verbum assumpsit immediate id, quod communiter vocatur sanguis, seu fluit in venis, ut colligitur ex conclusione præcedente; atqui quod fluit in venis, & communiter vocatur sanguis, est complexum ex quatuor humoribus: ergo Verbum immediate assumpsit hoc complexum, consequenter & pituitam ac bilem flavam & atram.

Prob. 2. Etiam isti humores cum sanguine pro nostra salute sunt effusi; ergo etiam fuere uniti immediate Verbo, ut iterum ex præcedentibus deducitur. 3. Isti quoque humores spectant ad integritatem & convenientem statum corporis humanæ naturæ, & ideo etiam sunt in corporibus gloriosis; atqui Verbum immediate assumpsit integram & completam naturam humanam, consequenter etiam omnia, quæ ad ejus completum & convenientem statum pertinent: ergo.

Idem, quod de prædictis humoribus, asseritur de spiritibus animalibus & vitalibus, qui sunt purissimus sanguis, item de cambio, rore, & glute, in quæ prius sanguis transit, antequam

tequ  
funt  
tis  
app  
men  
loso  
& g  
fangu  
hi h

posse  
ergo  
bum  
etiam  
R. I.  
manu  
Non  
natur  
cata  
alias  
quem  
quam  
sangu  
sumpt  
est eff  
est ani  
Aligua  
mini a  
lum co  
feros  
anima  
etiam  
fuit sep  
ma Ch  
Synech  
ab Eco  
Scoto. 2  
P. Kic



tequam in carnem & ossa vertatur: quia isti humores quoque sunt sanguis, & ab aliis humoribus immediate à verbo assumptis non differunt, nisi in hoc, quod partibus alendis jam sunt apportati, ac appropriati, & quodammodo impacti, ut ex mente Galenicorum tradit Magnificus D. Morash in Nucleo philosoph. p. 2. c. 1. §. I. n. 24. 2. Isti humores, cambium, ros & gluten immediatius conferunt ad vitæ conservationem, quam sanguis & reliqui humores à Verbo assumpti: ergo à fortiori hi humores sunt immediate à Verbo assumpti.

Objic. 1. Si Verbum assumpsisset immediate sanguinem, posset denominari sanguis; sed non potest denominari sanguis: ergo non assumpsit immediate Sanguinem. M. prob. quia Verbum assumpsit humanitatem, potest denominari homo: ergo etiam, si assumpsisset sanguinem, posset denominari sanguis. R. 1. retorq. argument: Verbum non potest denominari pes, manus, quamvis & pedes, & manus assumpsit. R. 2. N. M. Non datur communicatio idiomatum, & prædicatorum inter naturam Divinam, & partes naturæ humanæ; sed illa prædicata ob unionem hypostaticam Verbo tantum tribuuntur, quæ alias tribui solent toti homini: quia ergo ex usu recepto (juxta quem significationes terminorum solum usurpari debent) nunquam de toto homine prædicatur sanguis vg. dicendo *Petrus est sanguis*, *Petrus est effusus*: ideo neque de Verbo, quamvis assumpsit sanguinem, potest dici, *Verbum est sanguis*, *Verbum est effusum pro nobis*: propterea neque potest dici: *Verbum est anima*, *Verbum est manus aut pes*: aut *Verbum est corpus*. Aliquæ tamen denominationes, solis partibus propriæ toti homini attribui solent. Sic dicitur, homo sepultus, licet solum corpus fuerit sepultum; dicitur damnatus, detrusus ad inferos, elevatus ad cælos, post mortem apparuisse, quamvis sola anima damnata sit, vel in inferno, aut appareat &c. Unde etiam filius Dei recte appellatur sepultus, quia corpus Christi fuit sepultum, denominatur descendisse ad inferos, quia anima Christi sic descendit. Non tamen licet similes tropos & Synechdoches ubique adhibere, sed tunc duntaxat, quando ab Ecclesia vel DD. communiter usurpantur, ut colligitur ex Scoto. 3. d. 22. q. un. §. ad primum principale & ad tertium. n. 21.

P. Kick Theol. Tom. IV. H Objic. 2.



Objic. 2. Sanguis est alia natura, quam corpus vivens: ergo Verbum non assumpsit sanguinem. R. D. a. est alia natura subordinata tantum corpori viventi, & cum hoc connectitur C. a. secus N. a. Sanguis vere subordinatur, & connectitur cum corpore vivente: quæ connexio consistit primo in stabili inexistencia intra corpus, in quo elaboratus est, & 2. in jure mutuo, quod corpus ad hunc sanguinem, & hic sanguis ad hoc corpus habet.

Objic. 3. Sanguis solum est pars in potentia respectu corporis viventis: ergo non fuit immediate assumptus à Verbo. R. N. a. Nam sanguis & reliqui humores sunt partes actu simul & potentia. *Actu sunt*, quatenus faciunt ad integram, & perfectam constitutionem naturæ humanæ, & simul serviunt tanquam instrumenta ad varias operationes hominis. *Sunt etiam potentia*, quatenus ulterius transmutari possunt in alias partes. Neque absurdum est, quod homo nutriatur ex suis partibus, si hæc sint transmutabiles ulterius, & possint proinde habere rationem partis, & alimenti simul.

Objic. 4. Sanguis non est pars animalis juxta Arist. 1. 2. de part. animalium: ergo non fuit immediate unitus Verbo. R. D. a. non est pars animalis vivens C. a. non est pars animalis sub quacumque consideratione N. a. Ipse Aristot. L. 3. de hist. animalium c. 2. sanguinem refert inter partes corporis animalis: ergo. L. 2. de part. animalium tantum vult, quod non sit pars viva; alias sibi contradiceret. Hanc distinctionem etiam approbat Scotus 4. D. 8. q. 1. §. hic tria videnda, ibi: *corpus Christi potest accipi stricte, prout includit partes animatas anima Christi, cujusmodi non est sanguis. Alio modo potest accipi, ut omnia illa includat, quæ pertinent ad totum corpus organicum, sive sint partes animatæ, sive sint alia non formaliter animata, ut humores, & spiritus: & hoc modo sanguis est aliquid corporis.*

Objic. 5. Sanguis Christi non est pars corporis Christi primaria: ergo non eadem ratione seu immediate est assumptus, sicut aliæ partes primariæ, & viventes. R. D. a. non est pars primaria fumendo corpus Christi præcise secundum artes animatas C. a. fumendo illud secundum eas partes, quæ spectant



*Art. III. §. I. De subjecto actuali unionis hypostaticæ. 59*

spectant ad totum & perfectum corpus organicum constituen-  
dum, subdist. non est pars primaria, seu una ex principalissimis  
C. a. non est pars primaria in hoc sensu, quatenus vere ad  
corpus organicum perfectum requiritur N. a. Ad perfectam cor-  
poris organici constitutionem etiam sanguis primario spectat:  
quia certe sine sanguine non est perfecte constitutum corpus hu-  
manum; & ideo propter perfectam constitutionem corporis  
humani organici datur sanguis cum reliquis humoribus quoque  
in corporibus gloriosis alimento non egentibus: & esto sanguis  
non sit inter partes omnino principalissimas, quales vg. sunt  
cor, cerebrum &c. tamen adhuc Verbum etiam reliquas  
partes respectu priorum minus principales, imo capillos quo-  
que & ungues assumpsit immediate; quid ni & sanguinem,  
licet non sit adeo nobilis pars corporis organici ac reliquæ.

Objic. 6. Sanguis non est pars integralis corporis orga-  
nici: ergo non spectat ad ejus integritatem. A. prob. quia  
partes integrales corpori uniuntur unione continuativa non  
vero sanguis. R. D. a. non est pars integralis, si sub ratione  
partis integralis veniant partes solum continuatæ cum toto cor-  
pore C. a. si veniant partes omnes spectantes ad perfectionem  
corporis humani N. a. sanguis, etiamsi non continuative unia-  
tur cum corpore reliquo, tamen cum eo habet sufficientem  
connexionem naturalem, & requiritur ad statum perfectum  
ejusdem.

Objic. 7. Sanguis & reliqui humores continuo variantur:  
ergo non convenienter assumuntur immediate à Verbo. R. N. c.  
etiam partes solidæ continuo variantur, dum aliquæ eorum par-  
ticulæ calore naturali absumentur, & aliæ per nutritionem vi-  
talem iterum adgenerantur, & tamen omnes partes solidæ  
sunt immediate à Verbo assumptæ: ergo à pari.

Objic. 8. Aer licet ad hominis vitam conservandam requi-  
ratur, non est assumptus à Verbo: ergo neque sanguis. R. N. c.  
aer non est pars hominis, nec ei unitur, sed accedit ad cor-  
pus, & iterum recedit, sicut hospes è diversorio.



Objic. 9. Si sanguis esset pars corporis, tunc vi verborum Consecratoriorum poneretur sub speciebus consecratis panis; sed sequela est falsa: ergo. R. N. M. vi verborum sub speciebus panis ponitur solum corpus spectatum secundum partes solidas; nam ibi est per modum cibi, cui solae partes solidae aptae sunt. Partes vero fluidae sunt vi verborum sub speciebus calicis, quae habent rationem potus.

Objic. 10. Verbum Divinum tantum assumpsit naturam humanam; sed haec est vivens: ergo Verbum non assumpsit aliam naturam quam viventem; consequenter non assumpsit sanguinem, qui non vivit. R. 1. retorq. argum, sed natura humana est corruptibilis, ergo Verbum non assumpsit aliam naturam, quam corruptibilem: ergo non assumpsit animam rationalem, quae est incorruptibilis. R. 2. D. m. sed natura humana est vivens secundum potiores & principales partes C. m. secundum omnes N. m.

Objic. 11. Sanguis non subsistit subsistentia naturae humanae; ergo Verbum non supplet ejus subsistentiam, & sic non assumpsit sanguinem; nam illorum, quae assumpsit, subsistentiam supplet. Prob. 1. memb. c. Verbum Divinum tantum supplet subsistentiam naturae humanae: ergo si sanguis non subsistit subsistentia naturae humanae, tunc hanc non supplet. R. N, a. Verbum Divinum supplet subsistentiam totius naturae humanae, & omnium ejus partium: ergo & sanguinis, qui est vera pars naturae humanae integrae.

## §. II.

*Ponuntur assertiones reliquae.*

38 **Assero 4.** Verbum etiam in triduo mortis fuit immediate unitum corpori & animae. 2. imo & sanguini, saltem illi, qui in resurrectione iterum erat assumendus intra corpus. Prima pars est indubitata inter DD. Prob. 1. omnes partes conclusionis. Juxta receptum Div. Damasceni, *quod Verbum semel assumpsit, nunquam dimisit; sed secundum dicta Verbum*



*Art. III. §. II. Ponuntur assertiones reliquæ.* 61

Verbum assumpsit, & univit sibi immediate animam & corpus ac sanguinem: ergo nunquam, consequenter neque in triduo mortis dimisit.

Prob. 2. Specialiter prima pars conclusionis. Ratione corporis sibi immediate ac vere uniti in triduo dicitur Filius Dei esse sepultus, & ratione animæ sic unitæ dicitur descendisse ad inferos: alias hæ denominationes Filio Dei non possent convenire: ergo corpus & anima fuerunt immediate unita Verbo Divino in illo triduo.

Confirm. unio hæc immediata præcessit in vita, & ejus cessatio in morte Christi non constat: ergo dicendum est, quod unio hæc etiam post mortem durarit.

Accedit Autoritas D. Damasceni, qui L. 3. de fide c. 27. ita de Christo loquitur: *quamquam mortuus est ut homo, & sancta ejus anima ab incontinuo separata corpore, non tamen divinitus ab utroque separata remansit, ab anima inquam & corpore,*

Prob. 3. pars 2. Conclusionis, quæ est longe communior, quam opposita. Corpus & anima in triduo mortis immediate manserunt unita Verbo: ergo & sanguis. Prob. c. ideo corpus & anima manserunt tunc immediate unita, quia in vita sic uniebantur, & in resurrectione iterum erant reassumenda ad constituendum corpus gloriosum Christi; atqui hæc ratio etiam pugnat pro sanguine, ut patet: ergo sanguis etiam in triduo illo mansit Verbo immediate unitus.

Confirm. ex Scoto, qui in 4. D. 20. q. 4. §. *hic duo sunt videnda*: ita discurret: *possibile fuit totum sanguinem fuisse separatum à corpore Christi in morte, & tamen, si tunc Eucharistia fuisset consecrata, fuisset vere eadem sicut nunc*: ergo sicut modo, ita tunc fuisset sanguis sub speciebus vini, sicut nunc nempe cum Divinitate: atqui Divinitas modo est sub speciebus vini solum concomitanter ob unionem sanguinis ad Verbum: ergo & tunc hæc unio adhuc dabatur.



39

Objic. 1. Sanguis effusus à Christo non fuit in resurrectione reassumptus ad perfectionem corporis: ergo non mansit in triduo mortis unitus Verbo: nam si mansisset unitus, tunc ob reassumptionem futuram in resurrectione Christi. A. prob. S. August. epist. 85. Consentium respondens ad quaestionem, an Corpus Christi gloriosum ossa & sanguinem habeat, dicit, ipsum habere carnem & ossa, ac de sanguine filet: ergo agnovit in corpore Christi glorioso non esse sanguinem.

R. 1. indirecte. Hoc argumentum est contra ipsos adversarios, qui supponunt, in corpore Christi glorioso esse sanguinem, & contra Trident. superius citatum, quod sess. 13. c. 3. indicat, in corpore glorioso Christi existere sanguinem, & ideo vi naturalis connexionis una cum corpore poni sub speciebus panis consecratis.

R. 2. Ad secundum D. August. ibi nihil respondit ad illam quaestionem de sanguine, quæ forte ei difficilior accidit: ut ex contextu colligitur: per hoc tamen non negavit positive; sanguinem in corpore Christi glorioso esse.

Objic. 2. Sanguis in circumcisione effusus non mansit unitus Verbo: ergo etiam sanguis in passione effusus. R. N. c. & parit. sanguis in circumcisione effusus non erat amplius assumendus ad integritatem corporis, sicut sanguis in passione effusus; at vero tantum mansit Verbo unitus ille sanguis, qui erat iterum ad integritatem corporis in resurrectione assumendus; alius vero, qui non erat sic assumendus, fuit dimissus penitus à Verbo. Igitur sanguis Christi effusus in circumcisione, sicut & particulæ sanguinis hic in terris relictæ, præputium, ac particulæ omnis materiæ, quæ aliquando in Christo fuerunt immediate unitæ Verbo, ac postea resolutæ sunt in lachrymas, sudorem &c. vel deperditæ sunt per actionem & reactionem caloris naturalis, item capilli, qui in vita à Christi capite & barba deciderunt, ista omnia sunt à Verbo dimissa, seu non manserunt Verbo unita. Ratio hujus est: quia alias aliqua essent Verbo unita, quæ nec in Cælo nec in Eucharistia forent. Proinde axioma illud:

quod



quod Verbum semel assumpsit, nunquam dimisit, intelligendum est de partibus necessariis vel determinatis ad integritatem, & veritatem Corporis Christi resurgentis; has enim Verbum nunquam, neque in triduo mortis dimisit. Ex quo sequitur, totum sanguinem Christi moraliter loquendo, non vero totum physice fuisse assumptum ad integritatem corporis in resurrectione.

Objic. 3. Synodus 6. act. 18. & varii PP. dicunt: *Verbum assumpsit carnem mediante anima*, animam mediante spiritu. Ergo anima & corpus tantum mediate sunt assumpta. R. N. c. illud dictum SS. Patrum sensum facit: Verbum assumpsit carnem non ibi subsistendo, sed simul cum anima, & quidem spirituali, seu rationali: vel anima fuit causa congruentialis, cur caro assumeretur, & anima spiritualis seu rationalis fuit causa, ob quam assumeretur caro animata: quia non congruebat carnem assumi sine anima, nec animam aliam, quam spirituales, imo talem assumi oportebat ob meritum, quod ab anima spirituali & rationali poni petit. Ita dictum hoc explicat S. Bonavent. 3. D. 2. art. 3. q. 1.

Quamvis autem longe probabiliorem nostram sententiam de unione immediata sanguinis in triduo mortis æstimem, tamen oppositam, quam S. Jacobus de Marchia prædicavit, nolo aut erroris accusare, aut censura aliqua perstringere; id enim inhibuit Pius II. Imo sententiam D. Jacobi de Marchia vere probabilem agnosco. Videantur Theses de hac re Neoburgi in nostro conventu defensæ anno 1740. fol. 45. & seqq.

Affero 5. Anima & corpus, ac omnes partes Christi sunt eodem instanti reali à Verbo assumptæ cum tota humanitate. Communis ac certa. Et constat ex Synodo 6. act. 11. ubi dicitur: *simul caro, simul Dei Verbi caro, simul caro animata rationalis, simul Dei Verbi caro animata rationalis*; ergo illo instanti reali, quo extitit caro animata, vel fœtus animatus in Virgineo utero, simul fuerunt assumpta corpus & anima, ac tota natura humana ex his constans. 40

Nihilo-



Nihilominus hic sermo est de corpore completo, & perfecte organizato. Nam utique materia prima, ex qua compositum est corpus Christi, fuit & extitit prius sine unione hypostatica, non vero totum corpus organicum ex materia & forma corporeitatis perfecte compositum, consequenter nec materia prima, ut pars actu cum forma corporeitatis perfecte constituens corpus organicum Christi extitit sine unione hypostatica. Præterea juxta communem Doctrinam conceptio ac formatio corporis Christi, & infusio animæ rationalis unico instanti reali miraculose completa est, ut habet communis Doctrina, & clarissime docet D. Damascenus L. 3. de fide c. 2. dicens: *Dei Filium per Spiritum S. sibi ipsi corpus condidisse, non ita ut paulatim, tacitisque incrementis figura corporis absolveretur, sed uno eodemque momento perficeretur.* Illo autem ipso momento, quo perficitur corpus humanum, infunditur anima: ergo eodem momento vel instanti reali fuit totum corpus perfectum, & infusa anima. Unde patet, conceptionem Christi fuisse miraculosam & supernaturalem quoad modum, tum quia fuit perfecta absque opera viri: tum quia unico instanti reali fuit completa, ac verisimiliter illo, quo B. V. Maria absolvit hæc verba. *Ecce ancilla Domini fiat mihi secundum Verbum tuum.*

Ex his sic concludes, eodem instanti reali, quo completum corpus Christi extitit. eo etiam extitit anima rationalis tali corpori unita, & similiter illo ipso instanti resultavit tota humanitas: ergo illo eodem instanti reali omnia ista unita fuerunt Verbo: quia quamprimum extitere, etiam fuere hypostatice unita Verbo Incarnato, ut ex Synodo 6. act. 11. constat.

Ex quo habes; quod natura humana illo ipso instanti, quo cæpit existere, fuerit quoque unita Verbo, & sic semper per Personalitatem Verbi, nunquam vero per propriam substituerit. Prout colligitur ex dictis, & ulterius est communis Patrum & Conciliorum sententia, ac consensus fidelium: & clare habetur in Concil. Ephesino c. 13. cui inserta est epistola S. Cyrilli ad Nestorium, in qua dicitur: *Neque enim primum natus est homo communis de S. Virgine, & tunc demum inhabitavit*



*habitavit in eo Verbum, sed in ipsa vulva, uteroque virginali se cum carne conjunxit, & sustinuit generationem carnalem, carnis sue nativitatem suam faciens. & S. August. L. contra ferm. Arian c. 8. ait: naturam humanam non sic assumptam esse, ut prius creata post assumeretur, sed ut ipsa assumptione crearetur. Deinde non erat ulla ratio, cur differretur ejusmodi assumptio in tempus subsequens productionem humanitatis. Adde: si Verbum in primo instanti productionis non assumpsisset naturam humanam, tunc B. V. Maria non esset Deipara, seu non genuisset Deum, aut personam Divinam; sequela est contra fidem: ergo. M. prob. alioquin enim genuisset meram personam humanam.*

Dices: quæ habet filium, qui fit postea Pontifex, vere dicitur Mater Pontificis, etiamsi talis filius non fuerit Pontifex in instanti conceptionis: ergo B. V. adhuc esset Mater Dei, etiamsi ejus Filius non fuisset Deus in instanti conceptionis, dummodo fuisset factus Deus propter naturam ejus primum postea à Verbo assumptam.

R. N. C. & parit. Mater illa foret adhuc Genitrix illius personæ, quæ est, & fit postea Pontifex. Ast B. V. Maria, si in primo instanti conceptionis Verbum non fuisset unitum naturæ à se conceptæ, non genuisset personam Divinam, seu talem, quæ postea Deus fieret; verum aliam, nimirum mere humanam, quæ à Verbo non esset assumenda.

Affero 6. Quamvis Verbum uno instanti reali simul assumpserit naturam humanam, & ejus partes, tamen in hac assumptione intervenit aliqua prioritas signorum naturæ. Bel-  
lutus, & ex hoc Matris disp. I. de Incarnat. n. 113. & seqq. ac alii Scotistæ communius. Et quidem, si ordinem executionis spectemus, corpus supponitur ante animam, anima & corpus ante totum essenziale humanitatis: ergo etiam prius supponitur corpus esse unitum Verbo, deinde anima, ac tandem tota humanitas. A. patet: quia ordo ab imperfectioribus incipit, & ascendit ad perfectiora: & aliunde vi naturalis præsuppositionis corpus animæ, & corpus ac anima tanquam partes constitutivæ præintelliguntur toti homini. C. prob.  
P. Kick Theol. Tom. IV. I in



In signis illis prioribus corpus & anima fuerunt capaces unionis saltem per modum simplicis terminationis, tendentiæ: ergo taliter fuerunt, vel intelliguntur esse unitæ pro illis signis, quia nulla causa differendi, vel pro alio signo statuendi istas uniones in anima & corpore subiectata erat.

Jam in ordine intentionis prius intendebatur unio humanitatis cum Verbo, deinde primum unio animæ, ac tandem corporis, & partium ejus: ratio hujus est: quia, quæ priora sunt in executione, sunt posteriora in intentione: & quia à Deo primario tanquam finis intendebatur unio hypostatica totius humanitatis cum Verbo, hinc propter istam demum intendebatur unio etiam cum partibus; nam totum semper primo est in intentione, & propter totum deinde intenduntur partes.

Istud quoque notes, velim, debere admitti, quod specialibus unionibus humanitatis, anima & corpus fuerint unita Verbo: tum, quia sunt specialia ac distincta subiecta: tum, quia humanitas Christi fuit unita immediate unione personalitatis in unitatem personæ: partes vero uniebantur unionibus simplicis terminationis. Tum quia anima & corpus in triduo mortis manserunt immediate unita Verbo; ubi tamen non mansit unita humanitas: quod non potuisset fieri, si non habuissent distinctam unionem ab illa, quam habuit tota humanitas: quia unio hypostatica totius humanitatis cum hac in triduo mortis fuit destructa. Imo ex hoc patet, animam & corpus habere etiam distinctas specialiter uniones hypostaticas: quia in triduo fuerunt inter se separata, & tamen manserunt realiter Verbo unitæ: ergo non propter unionem quamdam communem, sed propter speciales & distinctas. Ex his

42 Habes 1. Quod unio hypostatica totius humanitatis fuerit facta vel in tertia entitate, si hæc detur, aut possibilis sit, vel in anima & corpore, qua physice ac substantialiter unitis. Unde mirum non est, quod hæc unio hypostatica in triduo mortis non extiterit, quia vel tertia entitas, vel certe anima & corpus qua physice & substantialiter unita ibi non extitere.

Habes 2.



Habes 2. Verbum assumpsisse partes immediate per modum simplicis terminationis, dependentiæ. Nam partes in se immediate & præcise, ac pro priori ad humanitatem totam spectatæ non sunt suppositabiles, vel personabiles; cum suppositalitas vel personalitas præsupponat completam essentiam humanam: ergo talis unio partium in se spectatarum non potuit esse alia, quam simplicis terminationis, dependentiæ, quam rationem articulo sequenti clarius explicabo.

Habes 3. A Verbo primario esse personatam naturam humanam totam, partes vero ejus secundario ac mediate principiative personatas mediante toto: quia personalitas primario afficit totum, & secundario tantum partes, quatenus constituunt totum. Id, quod Scotus vult 3. D. 2. q. 2. §. *ideo quantum ad istum articulum V. ad propositum potest dici n. 5.* dicens: quod tota natura humana fuerit immediate primo assumpta à Verbo: loquitur enim ibi solum *de unione personationis in unitatem personæ*, & ostendit naturam totam esse immediate & primo personabilem, non vero partes: ubi tamen minime negat, partes esse pro priori signo ante naturam unitas unione simplicis terminationis, dependentiæ, de qua ibi Scoto nullus sermo; videatur Mastrius pro hac conclusione citatus.

Habes 4. Non esse admittendam illam sententiam quorundam Scotist. qui cum Poncio defendunt, solam humanitatem esse immediate unitam Verbo, & partes hominis, seu corpus & animam in morte Christi destructa humanitate, & ejus unione hypostatica ex anima & corpore esse exortas duas novas uniones ad Verbum. Nam præter dicta superiora contra hanc sententiam est 1. Quia Scotus in tertio. D. 16. q. 2. §. *sed contra ista* explicans illud dictum Damasceni: *quod Verbum semel assumpsit, nunquam dimisit*, ait: *partes principales semper fuisse unitas Verbo, licet dimiserit totum.* Et eodem 3. D. 2. q. 2. n. 4. §. *quantum ad primum* arguit contra Varronem asserentem, Verbum assumpsisse corpus mediante anima, & ipsum deducit ad hoc inconueniens, *quod tunc in morte Christi fuisset nova assumptio*; quia tunc fuit corpus Christi immediate unitum Verbo, & non per animam: ergo quia Scotus rejicit novam unionem



unionem & assumptionem corporis in morte tanquam inconvenientem, supponit Corpus Christi fuisse ab initio statim immediate per propriam unionem assumptum à Verbo. 2. In triduo mortis corpus & anima immediate fuere unita Verbo, ergo etiam antecedenter. Nam unio immediata illa in triduo ideo præcipue asseritur, quia antecedenter præcessit.

Inferes 5. Verbum assumpsisse naturam humanam cum propria naturæ humanæ existentia, idem dic de corpore & anima &c. ratio est, quia Verbum assumpsit essentiam humanitatis: ergo & existentiam, quæ ab essentia non distinguitur. Unde natura humana in Christo existit per propriam existentiam humanam, non vero suppositatur, vel subsistit per personalitatem propriam, sed alienam & divinam.

43

Quæres, an post resurrectionem quædam particulæ sanguinis Christi in Passione effusi in terris remanserint, nunc vero omnis omnino sanguis fuerit reassumptus intra corpus gloriosum Christi? Rdet. 1. Joannes à Turre-Cremata in Can. *invitat Dominus de consecrat.* dist. 2., non esse in terris similes particulas sanguinis relictas, dicitque, oppositam sententiam non posse absque nota erroris defendi. Huic videtur favere D. Thomas in 3. p. q. 54. art. 2. ubi ait, in corpore glorioso Christi resurgentis esse carnes, ossa & sanguinem integraliter absque diminutione. Verum hæc verba congruam patiuntur explicationem, scilicet illum sanguinem esse integre in corpore Christi glorioso, qui ad illud integrandum erat necessarius. Unde

R. 2. aliter: probabilius est, aliquas particulas sanguinis Christi effusi in Passione esse in terris relictas. Ita Doct. Seraph. 4. Sent. D. 2. dubio 2. Lugo, Viva, Mastrius, Herinx, Frassen, Panger & alii.

Prob. 1. Leo III. fertur ivisse Mantuam ad videndum sanguinem in Abbazia S. Benedicti in templo S. Andreæ aservatum, quem eo attulisse Longinum fama est, eumque ut verum sanguinem Christi approbasse. 2. Pius II. in Bulla ad Abbatem Monasterii S. Mariæ Diecæsis Xantonensis ait; *veritati fidei*



*fidei nullatenus repugnat affirmare, Redemptorem animarum de sanguine præfato ob ipsius Passionis memoriam aliquam partem in terris reliquisse.* 3. Permittente & approbante Ecclesia publico cultui exponuntur particulæ sanguinis Christi, ut Augustæ in nostra Ecclesia ad S. Sepulchrum. Teste Goneth apud Viva asservatur apud S. Maximianum, ubi S. Maria Magdalena pœnitentiam egit, in ampulla vitrea sacer sanguis, ab ipsa S. Magdalena sub cruce collectus, qui toto tempore, quo legitur passio Domini die Parasceves ebullire cernitur, ut plures testes oculati in regio Conventu S. Maximiani commorati retulerunt. Accedit ratio: quia verisimilius est, in corpore Christi patientis necdum glorioso fuisse aliquas particulas sanguineas non necessarias ad integrationem corporis gloriosi alimento non indigentis: ergo verisimilius est, illas particulas non necessarias, fuisse relictas in terris ad devotionem fidelium. Addit D. Bonaventura, nec Christum propterea, quia reliquit aliquam partem sanguinis, non esse integrum, quia homo ille adhuc integer est, qui vel totum suum sanguinem, vel maximam ejus partem retinet, & plane homo, qui per venæ sectionem aliquot uncias sanguinis emittit, adhuc integer est.

R. 3. Ejusmodi particulæ in terris relictæ non sunt amplius unitæ Verbo: tum ob rationem datam n. 39. in responsione ad objectionem secundam. tum quia istæ particulæ non amplius sunt partes corporis Christi integri: ergo cessat ratio unionis hypostaticæ, quæ tantum afficit partes corporis Christi.

Neque dicas, ejusmodi particulas esse iterum uniendas corpori Christi in die extremi judicii. Nam hoc gratis dicitur sine ulla probatione. 2. Etiam sine his particulis corpus Christi gloriosum est integrum & perfectissimum: ergo non est necessitas hujus re assumptionis.

Per hoc tamen non negaverim, quod istæ particulæ sanguinis Christi sint revera adorandæ cultu latriæ: Nam etiam Crux Christi est sic adoranda, quia olim tetigit Corpus Christi, ejusque Passionem repræsentat; ergo etiam istæ particulæ sanguinis Christi, quia & istæ repræsentant Passionem, in qua sunt effusæ, & simul aliquando fuere Verbo unitæ. Quin  
imo



imo & sanguis, qui miraculose fluxit ex aliqua imagine Christi, est cultu latriæ adorandus; ob repræsentationem veri sanguinis Christi, ut bene advertit R. P. Panger.

Petes: Quandonam guttæ sanguinis Christi in terris relictæ unionem ad Verbum amiserint? R. nil certi circa hoc punctum dici potest, quia nec Autoritas, nec ratio ostendit, quando cessarit unio ad Verbum. Dupashquier cum aliis censet, statim ac effusus est sanguis, portionem in terris relinquendam deperdidisse unionem hypostaticam; quia non erat amplius in resurrectione intra corpus gloriosum assumenda. Illustrissimus Herinx ex opposito judicat, totum sanguinem in Passione effusum, etiam illum, qui in terris relinquendus erat, toto triduo mortis mansisse unitum Verbo. Ratio ejus est: quia tunc separatio sanguinis denuo ad integritatem corporis assumendi ab illo, qui in terris relinquendus erat, nondum fuit facta, sed erat primum facienda in resurrectione: & illo triduo totus ille sanguis per modum unius fuit in pari veneratione fidelium: ergo & unio ad Verbum respectu totius illius sanguinis fuit conservata usque ad resurrectionem, ubi sanguis reassumendus à reliquo in terris relinquendo fuit separatus.

## ARTICULUS IV.

### *De subjecto possibili unionis hypostaticæ.*

44 **D**iscussis illis, quæ à Verbo actu sunt assumpta, restat declarare, quæ de absoluta potentia Dei potuerint assumi, etsi non sint assumpta in moderna providentia: ero autem brevis, quantum licet; quia hæ quæstiones parum sunt utiles, & serviunt solum ad lucem clariorem afferendam dictis de actu unitis Verbo.

Notandum est I. Sustentare aliquid in genere, nihil aliud esse, quam conservare rem in suo esse, & terminare ejus dependentiam; cum ergo dependentia ab alio sit varia,  
vel



vel tanquam à causa efficiente, vel tanquam à causa materiali, vel tanquam à supposito; ita quoque sustentatio alia est in genere causæ efficientis, alia in genere causæ materialis, alia hypostatica seu in ratione suppositi. Sustentatio positiva in genere causæ efficientis est productio positiva, seu est ratio, qua effectus dependet ab alio tanquam a sua causa efficiente, sicut & sustentatio activa causæ efficientis est ejus influxus, quo producit effectum. Sustentatio in genere causæ materialis est illa ratio, qua subjectum tanquam materialis causa influit in formæ productionem & conservationem. Sustentatio hypostatica est ratio terminans dependentiam, quam natura completa habet ad suppositum.

Notandum 2. In formis præsertim accidentalibus triplicem habitudinem, quam habent ad subjectum, spectari posse. Una est sustentationis, quando à subjecto tanquam causa materiali influente dependet, quoad fieri, esse, & conservari. Altera est informationis, quando dependet à subjecto, non ut sustentante, sed recipiente, sic forma aliqua non educta, sed creata recipitur in subjecto, & ei unitur, ut anima rationalis, vel accidens aliquod, quod Deus absque concursu causæ materialis creans, uniret alicui subjecto. 3tia. est habitudo posterioris ad prius, vi cujus quæcunque forma, esto à solo Deo creata, etiam extra subjectum, naturaliter exigit subjectum tanquam aliquid prius: sic etiam anima rationalis, quamvis non petat produci dependenter à corpore tanquam causa materiali influente, petit tamen produci præsupposito corpore, cui dein uniatur: idem judicium est de aliis formis, quamvis in aliquo casu supernaturaliter non habeant dependentiam à subjecto tanquam sustentante vel recipiente, habent tamen dependentiam ab illo tanquam priore præsupposito, sub hac autem ratione, quatenus accidens vel forma respicit subjectum tanquam aliquid prius, & præsuppositum, non perficit ejusmodi subjectum, sed tantum petit, ut ab eodem terminetur ipsius naturalis dependentia, & exigentia.

Not. 3. Verbum Divinum esse independens ab alio, omni independentia: sic est independens ab alio tanquam subjecto;



jecto ; item tanquam supposito , vel tanquam forma perficiente , vel tanquam à comparte ; quare per hanc suam omnimodam independentiam potest terminare dependentias omnes creaturarum. H.

45

Affero 1. Potuisset à Verbo assumi non solum natura Angelica. 2. verum & irrationalis. Communis.

Prob. 1. memb. S. Paulus ad Hebræ. 2. v. 16. ait : *Nusquam enim Angelos apprehendit , sed semen Abraham apprehendit :* quem textum SS. PP. & Interpretes passim intelligunt de unionem hypostatica , ut fatetur Cornelius , quamvis ipse aliter explicet : ergo videtur D. Paulus supponere , quod Verbum naturam Angelicam per unionem hypostaticam potuisset apprehendere , vel assumere ; alias non rite intulisset.

Prob. 2. Perfectio naturæ Angelicæ non reddit eam incapacem tanti favoris : & insuper ab Angelis personalitas propria realiter distinguitur , adeoque supplebilis est per alienam personalitatem Verbi : ergo.

Prob. 2. memb. Conclus. 1. corpus & sanguis sunt creaturæ rationis expertes , & tamen in triduo mortis fuerunt unitæ Verbo : ergo & natura alia irrationalis vg. asini , potest sic uniri.

Prob. 2. Quælibet creatura irrationalis est capax substantiæ , per quam terminetur : ergo etiam terminari potest per substantiam Divinam.

Prob. 3. Assumptio talis creaturæ irrationalis posset habere finem à Deo prudenter intendibilem , neque dedeceret Deum : ergo non implicat. Prob. 1. memb. A. posset Deus talem assumptionem ordinare ad ostendendam exinanitionem suam , & confundendam nostram superbiam. Prob. etiam 2. memb. A. si non est indecens , quod Deus dicatur infans , mortuus , crucifixus , flagellatus , & methaphorice *vermis* , & *non homo* , *opprobrium hominum* , & *abjectio plebis* , utique indecens non foret , si diceretur *Leo* , *lapis* &c. Unde Tertullianus L. de carne Christi.



si contra Marcionem apud Vivam ait: *si de lupo Deus prodire voluisset, & feræ, aut pecoris corpore indutus prædicare regnum cælorum, ei videretur indecens, qui res Divinas provideat sensu suo, non advertens, quod stulta mundi elegit Deus, ut confundat fortia.* Ex quo ruit argumentum Honorati Tournellii, qui ob indecentiam, quam putat intervenire, si Verbum assumeret naturam irrationalem, negat, ejusmodi assumptionem etiam de potentia absoluta esse possibilem. Nihilominus hujusmodi propositiones: quod *Deus esset leo, lapis, asinus*, si assumeret naturam leonis, lapidis &c. non sunt proferendæ coram rudibus, qui non rite intelligerent similes modos loquendi, & inde scandalizarentur.

Porro natura irrationalis, si assumeretur à Verbo, non personaretur, cum esset incapax personalitatis, hæc enim solis creaturis rationalibus convenit: suppositaret tamen Verbum ejusmodi naturam, & independentiam ab alio distincto supposito tribueret. Neque natura irrationalis assumpta fieret sancta sanctitate accidentali, seu amica Dei, neque posset beatifice videre Deum: hæc enim dona solis creaturis rationalibus competere possunt, suntque diversi ordinis, quam est unio hypostatica, nec cum hac necessario connectuntur.

Nihilominus talis natura ferina, vel alia, esset sancta sanctitate alia, minus proprie tali, qua res etiam inanimatæ ob contactum vel repræsentationem rei sacræ, aut ob benedictionem, uti imagines, dicuntur sanctæ, id est veneratione & cultu dignæ.

Assero 2. Posset una persona immediate assumere plures naturas humanas. Ita Communis cum Scoto 3. D. 1. q. 3.

46

Prob. Non est repugnantia ex parte naturarum, neque ex parte Personæ Divinæ assumentis: ergo. A. prob. quoad 1. memb. omnes naturæ creatæ quoad hoc sunt in potentia obediuntiali: ergo, deinde de facto in una persona Verbi se compatiuntur duæ naturæ, una infinita & Divina, altera finita & humana: ergo etiam essent compossibiles plures naturæ finitæ in eadem persona. Quod ulterius firmatur; quia per-



sona Verbi in triduo mortis mansit hypostatice unita duabus substantiis finitis realiter distinctis, & separatis, scilicet corpori & animæ: ergo.

Prob. etiam 2. memb. A. nam idem terminus, ac eadem personalitas potest plures uniones & relationes, ac dependentias terminare, præsertim quia personalitas Verbi saltem identice est infinita: ergo.

Objic. 1. Virtus generativa in Patre Divino habet unicum terminum, seu unicum Filium Divinum: ergo etiam virtus terminativa Verbi habet unam naturam creatam, quam terminare potest. R. N. c. virtus generativa in Patre Divino habet unicum terminum, scilicet Filium Divinum; quia hic est infinitus: at creaturæ plures terminabiles & assumptibiles à Verbo forent tantum finitæ, adeoque hæ non possunt adæquare, & suscipere in persona Divina infinita vim terminandi & assumendi plures & plures alias novas creaturas. Advertendum quoque pro aliis instantiis solvendis, quod personalitates Divinæ terminent quidem fecunditatem & communicabilitatem naturæ Divinæ ad intra, non vero fecunditatem, & potentiam terminandi ad extra. ]

Objic. 2. Si Verbum assumeret plures naturas humanas, non posset dici, an esset duplex vel unus homo, sed hoc debet posse dici: ergo. R. N. M. esset enim tantum unus homo; quia ad multiplicationem concretorum substantialium requiritur multiplicatio & naturæ & suppositi; atqui hic solum multiplicarentur naturæ, non vero suppositum; & ideo unus tantum est Christus ob unitatem suppositi, quamvis in eo multiplicentur naturæ. Porro non esset contradictio, si Verbum assumeret plures naturas specie distinctas; quia tunc hæ naturæ essent solum unum ratione suppositi, non vero ratione naturarum. Etsi nunc in Christo duæ naturæ primo diversæ & infinite distantes naturæ Divina & humana in unum suppositum uniuntur, cur non aliæ quoque specie distinctæ, & non ita distantes vg. natura Angelica & humana à Verbo assumptæ in unam personam Verbi combinari possunt?

Assero. 3. Potest verbum Divinum etiam immediate assumere partes essentielles, seu unitas, seu non unitas physice. Communis. Prob. 1.



Prob. 1. Verbum Divinum sic de facto assumpsit partes tam unitas, quam non unitas: non unitas inter se in triduo mortis, in quo unio physica non intercessit inter animam & Corpus Christi, licet utrumque, id est anima & corpus illo triduo fuerit adhuc physice unitum Verbo, ut certum est. Physice vero unitas partes easdem animam nempe & corpus Verbum assumpsit ante mortem in vita, ac post triduum mortis in resurrectione.

Prob. 2. Quamvis partes essentielles ut tales non possint immediate assumi in unitatem suppositi & personæ, cum partes qua tales non immediate & ratione sui, sed tantum mediate & ratione totius sint personalitatis capaces; possunt tamen assumi per modum simplicis terminationis, dependentiæ, quam habet una pars ad aliam, vi cuius una cum altera conjungi petit: ergo.

Affero 4. Possit Verbum etiam immediate assumere accidentia absoluta, 2. non vero relativa. Mastrius contra plures alios.

48

Prob. 1. pars. Licet enim accidens non sit capax personalitatis, potest tamen assumi per modum simplicis terminationis, dependentiæ, quam habet ad subiectum: omne enim accidens ex se petit connaturaliter produci in subiecto, & hoc respicit tanquam aliquid prius; proinde ab eo tanquam priori dependet; esto etiam, quod tale accidens non educatur, tamen in subiecto petit produci, ut dictum est: atque hæc dependentia potest terminari à Verbo. Altera vero dependentia, quæ est sustentationis, & importat concursum eductivum, non potest à Verbo terminante unionem, sed à causa efficiente supplente concursum causæ materialis & subiecti terminari: ergo.

Prob. 2. memb. accidentia respectiva necessario à suo subiecto & fundamento pendent: ergo eorum dependentia à subiecto non potest suppleri aut terminari per Verbum, sed debet terminari per proprium subiectum & fundamentum.

Objic. 1. Si Verbum habet albedinem immediate unitam, posset dici album; sequela est absurda: ergo. R. D. M. Verbum in tali casu diceretur solum habens vel terminans albedinem



nem dependentem, non vero diceretur album; quia album solum prædicatur de subiecto, quod informatur per albedinem; ast Verbum talis informationis non est capax.

Objic. 2. Verbum Divinum non potest supplere vel exercere causalitatem materiale; atqui si assumeret accidens, hoc deberet facere: ergo. R. N. M. si Verbum assumeret accidens, non exerceret munus subiecti ut sustentantis, vel recipientis accidens; sed tantum ut suppositi terminantis dependentiam & unionem accidentis, & habentis accidens.

Objic. 3. Saltem nostræ conclusiones non procedunt de partibus unitis, & de accidentibus, quæ nimirum inhaerent suis subiectis: ergo. A. prob. in talibus partibus & accidentibus jam terminata est dependentia per unionem ad compartem, vel subiectum: ergo non potest amplius terminari per Verbum: R. N. a. ad prob. D. a. aliqua dependentia est terminata c. a. omnis possibilis dependentia N. a. Esto accidens sit actu unitum suo subiecto, vel pars suæ comparti, tamen ejus dependentiam adhuc terminare potest Verbum Divinum. Nam talis pars non obstante unionem ad unam compartem posset supernaturaliter uniri pluribus aliis ejusmodi partibus, & unum accidens unitum huic subiecto supernaturaliter posset inhaerere & uniri pluribus aliis subiectis: ergo non obstante unionem ad unum subiectum vel partem, dependentia talis accidentis vel partis ulterius supernaturaliter terminabilis est in ordine ad alia subiecta, vel partes, quibus adhuc simultanee unibilis foret talis pars, & tale accidens.

~~~~~

## ARTICULUS V.

### *De termino actuali unionis hypostaticæ.*

49 **A**SSERO imo. Sola secunda Persona ex SS. Trinitate est incarnata. Est de fide. Prob. de sola 2da. Persona Scriptura, Symbola, Concilia, ac SS. PP. affirmant, quod sit incarnata: ergo hæc sola est incarnata.

Prob. a.



Prob. a. Joann. 1. dicitur: *Verbum caro factum est.* Joan. 3. sic Deus dilexit mundum, ut filium suum unigenitum daret. ad Gal. 4. misit Deus filium suum factum sub lege, ut eos, qui sub lege erant, redimeret. Idem dicunt Symbola Apostolorum. Constantinopolitanum, & S. Athanasii, ac Patres passim.

Affero 2. Verbum Divinum unitum est immediate humanitati secundum personalitatem propriam, & proprietatem relativam filiationis, non secundum essentiam communem omnibus tribus personis. Ita SS. PP. communiter cum Suarez, Vasquez, Gormaz, Antonio Mayr, ac ipso S. Thoma. 3. p. q. 3. art. 2. in Corp. ac cum Doctore subtili 3. D. 1. q. 5. §. in ista questione contra Durandum admittentem duplicem unionem hypostaticam, quarum una ad personalitatem, altera ad naturam Divinam terminetur, nec non contra Nominales, Vivam, & alios docentes, unionem hypostaticam immediate terminari ad totum Verbum, seu Deitatem & personalitatem simul. 50

Prob. 1. Concil. Tolet. 6. & 11. in professione fidei (quorum ultimum Innocent. Papa ad Petrum compostellanum vocat authenticum) dicit: *ad Incarnationem quoque hujus Filii Dei tota Trinitas operata esse credenda est.* Quia inseparabilia sunt opera Trinitatis: solus tamen filius formam servi accepit in singularitate personæ, non in unitate Divinæ naturæ, NB. in id, quod proprium est filii, non quod commune est Trinitati: ergo Verbum tantum secundum prædicatum illud, quod ipsi est singulare & peculiare, & quod non est commune SS. Trinitati, consequenter secundum solam personalitatem, non vero naturam Divinam communem, & unam in tribus personis immediate terminavit unionem hypostaticam.

Confirm. VI. Synodus generalis Constantinopoli habita a. 8. refert sententiam D. Dionysii: *Pater & Spiritus Sanctus in Incarnatione nihil habent commune, nisi benignissimam voluntatem,* qua nimirum effecerunt una cum filio Incarnationem; sed si natura Divina immediate terminaret unionem hypostaticam, tunc præter benignissimam voluntatem haberent aliquid cum filio commune, scilicet ipsam rationem terminandi immediate unionem hypostaticam per naturam Divinam communem, & unam in



in omnibus tribus personis Divinis : ergo. Eandem sententiam D. Dionysii etiam profert S. Damascenus L. 3. de fide.

Prob. 2. Ex sententia adversariorum sequitur, omnes tres Personas Divinas esse incarnatas; sequela non admittitur: ergo. M. prob. omnes tres Personæ Divinæ terminarent unionem hypostaticam in sententia adversariorum: ergo omnes tres Personæ essent incarnatæ. A. prob. omnibus tribus personis inesset ratio terminandi unionem hypostaticam, scilicet substantia absoluta, vel essentia Divina, quæ (uti & reliqua prædicata absoluta) necessario & æqualiter inexistunt omnibus tribus Personis Divinis, & quidem pro signo priori, antequam terminaret, vel terminare possit unionem hypostaticam: ergo etiam omnes tres Personæ Divinæ terminant unionem hypostaticam. A. est certum quoad omnia membra. Nam certum est imo. quod omnia prædicata absoluta æqualiter & absque omni discrimine communia sint, & insint omnibus tribus Personis Divinis, alioquin hæc non essent æquales in perfectione. 2do. certum est, quod hæc prædicata, quæ sunt adintra, prius supponantur inesse, & communicari omnibus tribus personis Divinis; antequam in Deo supponatur aliqua operatio, vel terminatio adextra, qualis terminatio adextra etiam est terminatio unionis hypostaticæ. Prob. igitur C. ultimi enthymematis, & confirm. tota hæc 2da. probatio 1. ratio terminandi unionem hypostaticam, scilicet essentia Divina vel substantia absoluta æqualiter inest omnibus tribus personis, & quidem pro priori, antequam terminet unionem hypostaticam: ergo non est ulla ratio, cur potius sit ratio terminandi in una persona, quam in altera: ergo vi essentiæ communis omnes tres Personæ Divinæ terminant unionem hypostaticam. 2. Quia voluntas Divina ac omnipotentia supponitur esse communicata adintra pro priori, antequam supponantur aliquæ creaturæ productæ adextra, vel determinatæ ad existentiam, ideo omnes tres personæ operantur adextra, & per communem voluntatem ac omnipotentiam producant creaturas: ergo etiam sic omnes tres personæ Divinæ terminant unionem hypostaticam per unam communem essentiam, vel substantiam absolutam. 3. Quia filiatio tanquam ratio terminandi est in filio, ideo recte dicitur, quod filius terminet per filiationem unionem hypostaticam: ergo



go quia essentia Divina est in omnibus tribus personis, recte quoque dicitur, quod per eam tanquam rationem terminandi omnes tres personæ Divinæ terminent unionem hypostaticam, & Incarnationem. 4. Quod convenit naturæ Divinæ ratione sui, convenit omnibus tribus personis communiter & æqualiter: ergo si essentiæ Divinæ convenit terminare immediate unionem hypostaticam, tunc hoc convenit communiter & æqualiter omnibus tribus personis: ergo non solus filius, sed tres personæ sunt incarnatæ.

Prob. 3. Quamvis in sententia Nominalium, & Vivæ Verbum esset ex duplici capite, nimirum ratione naturæ Divinæ & personalitatis unitum, & sic magis incarnatum, quam reliquæ personæ, quæ ratione personalitatis non essent immediate unitæ cum natura humana, tamen Pater & Spiritus Sanctus adhuc ratione naturæ Divinæ communis essent vere incarnati, quia adhuc vere ratione naturæ Divinæ communis immediate unirentur cum humanitate; atqui sequela non potest admitti; quia est contra fidem, & ut testatur S. Anselmus L. de Incarnatione Verbi c. 1. est damnatum in aliquo Concilio Rhemenfi, estque hæresis Theopaschitarum, & Patripasianorum, vel Petri Cnaphæi Episcopi Antiocheni, de qua hæresi Joan. Damascenus L. 3. orthodoxæ fidei: ergo.

Confirm. si Verbum per impossibile præter communem influxum omnipotentiae haberet etiam specialem influxum notionalem, & personalem in creaturas, item si præter scientiam communem tribus personis, haberet suam peculiarem personalem, tunc Verbum censeretur quidem specialiter influere in productionem creaturarum, & specialiter scire, quo tamen non obstante, Pater adhuc & Spiritus S. vere influerent, & scirent per influxum, & scientiam omnibus tribus personis communem: ergo à pari, quamvis Verbum præter communem essentiam etiam per personalitatem propriam terminaret immediate unionem hypostaticam, tamen etiam Pater & Spiritus S. per essentiam communem vere immediate terminarent illam unionem.

Objic. 1. Quamvis intellectus Divinus sit æqualiter in omnibus tribus personis, tamen per illum solus Pater Divinus  
SI  
non



non reliquæ Personæ generant filium ; ergo etiam quamvis essentia Divina sit in tribus personis , tamen in solo filio potest esse ratio terminandi unionem hypostaticam R.N. c. & parit. intellectus Divinus in solo Patre est , pro priori signo originis ante generationem filii : ergo solus Pater potest per intellectum generare filium ; non vero reliquæ personæ , quæ filium jam supponunt esse generatum. Et ob hanc causam Pater & Filius simul spirant Spiritum S. non vero Spiritus sanctus , quia voluntas tanquam principium spirationis pro priori signo communis ante spirationem Spiritus sancti inest Patri & Filio , non vero Spiritui sancto. Jam vero , ut ostensum est , essentia Divina supponitur inesse omnibus tribus personis , antequam hæc aliquid supponantur operari , & terminare adextra ; ergo si essentia Divina esset ratio terminandi aliquid adextra , vg. unionem hypostaticam , tunc eam terminarent simul omnes tres Personæ per communem essentiam.

Dices : saltem potest dici , quod essentia , ut modificata personalitate Verbi , sit ratio terminandi unionem hypostaticam ; sed essentia ut modificata personalitate Verbi est in solo Filio : ergo essentia in solo Filio est ratio terminandi unionem hypostaticam. R. 1. indirecte , si ita licet loqui , tunc possum quoque dicere : essentia vel omnipotentia ut modificata personalitate Patris est ratio producendi creaturas : ergo essentia in solo Patre vel solus Pater producit creaturas. R. 2. N. M. ratio negandi patet , tum ex retorsione , tum ex Scoto pro conclusione allegato. ubi n. 6. ostendit , quod nulla personalitas Divina possit esse conditio vel modificatio sufficiens ad hoc , ut essentia Divina , aut alia perfectio absoluta Divina sit ratio formalis proxima præstandi aliquid in una tali persona , ita , ut ejusmodi perfectio absoluta non sit etiam talis ratio immediata in reliquis personis , supposito , quod omnes præsupponantur illi rei , ad quam præstandam vel acquirendam essentia Divina est ratio illa formalis , ac immediata. Certe per personalitatem D. essentia Divina in una persona non magis quam altera restringitur , aut extenditur quoad virtutem suam operandi , aut terminandi adextra , sed eam æqualiter retinet , stante quacunque personalitate.

Objic. 2.



Objic. 2. Personalitas Verbi non est perfectio: ergo non potest ei uniri humanitas. R. D. a. non est perfectio gradualis c. a. non est entitativa perfectio, & quid reale N. a. & in hoc est disparitas inter personalitatem creatam & Divinam; illa enim est mera negatio & nihil positivum, consequenter non potest terminare positivam realem unionem: Ast personalitas Divina est entitas positiva entitative, non tamen formaliter aut infinite perfecta. Hos terminos suppono ex tract. de Deo Trino.

Objic. 3. Verbum Divinum subsistit per subsistentiam absolutam: ergo etiam terminat unionem hypostaticam per subsistentiam absolutam. R. D. a. per subsistentiam absolutam subsistit essentialiter & communicabiliter c. a. subsistit personaliter & incommunicabiliter N. a. per id autem terminatur natura humana Christi, per quod ultimo & incommunicabiliter constituitur in ratione personæ, consequenter per subsistentiam personalem Verbi.

Objic. 4. Si dicatur, quod totum complexum ex natura Divina, & personalitate filii uniatur immediate cum natura humana, & ejus unionem terminet, jam habetur, quod Verbum uniatur secundum esse proprium, & non secundum esse commune omnibus tribus Personis: ergo tali modo salvantur concilia & dicta PP. quæ in prima probatione sunt adducta. A. prob. totum hoc complexum indivisibiliter sumptum, seu totum Verbum ex essentia & personalitate Verbi constitutum non est in Patre, nec Spiritu Sancto, sed in solo filio: ergo hoc esse & complexum est proprium soli filio, & consequenter si dicatur, quod totum complexum ex natura Divina uniatur Verbo &c. hic enim modus loquendi est gratis excogitatus ab adversariis, & videtur esse contra genuinum, ac obvium sensum Concilii Toletani & SS. PP., qui per singularitatem personæ, ac esse proprium filii non intelligunt totum complexum filii, vel filium Divinum adæquate acceptum, sed tantum unum prædicatum personalitatis, & filiationis, & quidem ut distinctum ab essentia Divina, prout expendenti adductos textus patet. 2. Quando totus filius uniretur immediate cum natura humana, tunc etiam uniretur immediate se-



cundum id, quod est commune omnibus tribus Personis, nimirum secundum essentiam, sed hoc videtur, esse contra adductos textus, ac contra nostras rationes; nam textus absolute negant, quod secundum quid commune filius immediate uniatur cum natura humana, & rationes nostræ probant, quod in adversariorum sententia etiam Pater & Spiritus S. debeant incarnari, si essentia Divina quoque sit ratio terminandi unionem hypostaticam.

Objic. 5. In Concil. Lateranensi sub Martino I. Consult. 5. Can. 6. dicuntur in Christo duæ naturæ (scilicet Divina & humana) substantialiter unitæ: & in Concil. Rhemenfi dicitur *natura Divina incarnata in filio*, qua definitione fuit confixus error Gilberti Porretani dicentis, non esse incarnatam naturam Divinam: ergo etiam natura Divina terminat unionem hypostaticam. R. D. a. Natura Divina est incarnata, & unita cum natura humana mediate, mediante nimirum personalitate Verbi C. a. immediate N. a. id, quod declarat Concil. Rhemense, quod addit *in filio*, id est, secundum personalitatem filii. Gilbertus Porretanus omnino admisit distinctionem realem inter Naturam Divinam, & personalitatem Verbi, & ideo dixit non esse incarnatam Naturam Divinam, nequidem mediate, saltem ex ratione, qua nos dicimus, videlicet ob identitatem, quam habet Natura Divina cum personalitate Verbi immediate incarnata.


Dices. 1. Personalitas Patris etiam mediate unitur cum humanitate assumpta à Verbo, & tamen Pater non potest dici incarnatus, hoc enim dicere, esset hæresis Patripassianorum: ergo si natura Divina dicitur incarnata, debet esse immediate unita cum humanitate assumpta. R. D. a. Personalitas Patris mediate unitur, longe tamen aliter quam natura Divina in Verbo c. a. secus N. a. Personalitas Patris mediate quidem unitur humanitati assumptæ à Verbo, sed longe remotius, quam essentia Divina, quæ utpote realiter identificata personalitati Verbi unitur mediate substantialiter secundum eandem hypostasim, & personalitatem sibi realiter immediate identificatam; ast personalitas Patris & Spiritus S. uniuntur tantum unione latius dicta



dicta circum in sessionis ob identitatem realem, quam habent cum natura Divina mediate unita cum humanitate assumpta. Unde Natura Divina in filio potest dici incarnata, non vero Pater vel Spiritus Sanctus.

Dices. 2. Nullum exemplum habemus hujus mediatae unionis in creatis: ergo neque in Divinis debemus adstruere. R. N. c. nullum hujus unionis mediatae exemplum invenimus in aliis rebus creatis, quia nullum ibi est Mysterium SS. Trinitatis & Incarnationis: & ideo hæc ratio singularis est sine exemplo juxta Tolet. XI.

Dices. 3. Quamvis personalitas Verbi sit producta immediate, tamen non sequitur, quod natura Divina personalitati Verbi realiter identificata sit mediate producta, sed est simpliciter improducta: ergo quamvis personalitas Verbi sit immediate unita humanitati, tamen non sequitur, quod natura Divina ei identificata, sit mediate unita humanitati: R. N. C. & parit. ad hoc, ut aliquid sit mediate vel immediate productum, debet esse realiter distinctum à producente: natura vero divina non est realiter distincta à Patre producente Filium. Ast ex hoc, quod personalitas Verbi immediate, & essentia Divina sit mediate unita humanitati, non sequitur, essentiam Divinam debere realiter distingui à Patre, sicut & per hoc non distinguitur realiter à Patre, quod identificetur cum filio realiter distincto à Patre.



## ARTICULUS VI.

### *De termino possibili unionis hypostaticæ.*

**N**Ota ex tract. de Deo uno & trino: in Deo dari tres subsistentias relativas, & unam absolutam. Tres subsistentiæ relativæ sunt tres personalitates Divinæ, vel illæ relationes paternitatis seu generationis activæ, filiationis seu generationis passivæ, ac spirationis passivæ, per quas tres Personæ Divinæ



næ in esse personali constituuntur, & terminatur ultimato communicabilitas ac fecunditas Naturæ Divinæ adintra. Subsistentia vero absoluta est modus essentiae Divinæ, quo illa est substantia per se existens scilicet independenter à subjecto sustentante, & parte complente, nec non incommunicabilis redditur à complemento & termino extrinseco à se realiter distincto. *Dixi t̄ se realiter distincto.* Nam terminos intrinsecos realiter identificatos, scilicet tres personalitates Divinas, quæ ultimato essentiae Divinæ communicabilitatem adintra terminant, non excludit, imo exigit. Datur ejusmodi subsistentia absoluta in Deo & essentia Divina; tum, quia conceptus hujus subsistentiae absolutæ omnino convenit essentiae Divinæ: tum, quia eam adstruit S. Augustinus L. 7. de Trinit. c. 4. dicens: *omnis substantia ad se ipsam existit, quanto magis Deus?* H. S.

53

Affero 1. Essentia Divina, ut præscindit à personalitatibus, & subsistit subsistentia absoluta, potest terminare dependentiam naturæ creatæ, eamque assumere, ac reddere subsistentem. Scotus 3. D. 1. q. 2. §. *ad quæstionem igitur. n. 6.* ubi ait: *quod autem ipsa essentia per se existens posset terminus esse illius unionis, videtur &c.* Neque obstat, quod Doctor eodem 3. D. 5. q. 1. §. *contra n. 2.* dicat: Item, quod (essentia Divina) *non potuit assumere naturam humanam, probo.* Etenim Doct. q. illa prima distinctionis quintæ disputat in utramque partem, & resolutionem differt usque ad quæstionem sequentem, seu secundam in eodem l. 3. & dist. 5. ubi §. *ad primam quæstionem n. 2.* iterum in nostram conclusionem propendet, & se reflectit ad jam citatum locum pro nostra conclusione: ait enim: *Essentia D. non est ratio formalis terminandi istam unionem: potuit tamen ipsa esse formalis ratio terminandi, sicut dictum fuit q. 2. primæ disputationis scilicet eodem L. 3. & paulo post addit: Natura Divina non est ratio terminandi defacto, tamen posset forte esse ratio terminandi.*

Prob. 1. Verbum Divinum per suam subsistentiam relativam potest assumere, & immediate terminare dependentiam naturæ humanæ, hancque modo convenienti ejusmodi subsistentiæ



stentiaæ relativæ reddere incommunicabilem : ergo etiam essentia D. per suam subsistentiam absolutam potest assumere, vel immediate terminare dependentiam naturæ humanæ, & hanc modo convenienti subsistentiaæ absolutæ Divinæ reddere incommunicabilem, supposito realiter distincto à Deitate.

Confirm. Verbum Divinum potest terminare dependentiam & communicabilitatem creaturæ sub ea ratione, sub qua est independens ac incommunicabilis ob suam subsistentiam relativam : ergo etiam natura Divina potest sub ea ratione terminare dependentiam & communicabilitatem creaturæ, sub qua est independens & incommunicabilis ad subsistentiam absolutam, & sic reddere naturam humanam incommunicabilem alicui actuali supposito realiter distincto a natura Divina.

Prob. 2. Subsistentia absoluta, seu perfectio formaliter infinita essentiaæ Divinæ habet virtutem infinitam subsistendi in se, & terminandi dependentias alias realiter distinctarum naturarum : ergo nulla est ratio, cur per ejusmodi subsistentiam absolutam non possit immediate terminari dependentia & ratio naturæ humanæ, maxime quia ejusmodi assumptio naturæ humanæ facta immediate per subsistentiam absolutam haberet suum finem, & effectum formalem in natura humana sic assumpta, utpote quæ fieret immediate incommunicabilis supposito realiter distincto ab essentia D. ac mediate & ultimo compleretur per tres personalitates Divinas, sicut & ipsa essentia Divina per subsistentiam absolutam redditur incommunicabilis supposito realiter distincto, ac per tres personalitates Divinas ultimo terminatur.

Objic. 1. Scot. 3. D. 1. q. 1. §. de secundo dico n. 4. docet: ideo personam Divinam posse assumere naturam humanam, quia persona est incommunicabilis, & ideo essentiam Divinam non posse assumere, quia communicabilis est: ergo nostra conclusio est contra Scotum. R. 1. indirecte opponendo Scotum pro conclusione citatum, ubi nostram conclusionem non solum asserit, sed & probat, & argumenta adversantia solvit. R. 2. Scotus ibi tantum vult, quod D. Tho-



mas & Varro male concludant, ideo personalitatem Divinam posse formaliter ac per se suppositare & personare creaturam humanam, quia personalitas D. eminenter, vel virtualiter continet personalitatem creatam, cujus rationem loco in objectione citato dat 1. Quia sic concludentes dicunt D. personalitatem non esse perfectionem simpliciter, qualis tamen deberet esse, si in sua perfectione virtualiter contineret perfectiones aliarum personalitatum. 2. Contra eos arguit, quod neque essentia Divina, etsi eminenter in se contineat omnes naturas & perfectiones creatas, possit per se ipsam *formaliter* supplere vicem NB. *naturæ creatæ*. Nam si suppleret formaliter naturam humanam, tunc ipsa essentia D. esset formaliter natura humana, quod est impossibile: ergo dicit Scotus; neque personalitas D. ob continentiam personalitatis creatæ hanc formaliter supplere potest, sed ob independentiam formalem, ob quam etiam naturam creatam potest reddere formaliter independentem. In quibus omnibus nec verbum contra nos, ut amplius patebit legenti.

Objic. 2. Subsistentia absoluta non potest supplere personalitatem creatam: ergo per eam non potest assumi immediate natura creata. A. prob. personalitas creata reddit naturam humanam incommunicabiliter subsistentem, & est terminus ultimus, non sic subsistentia absoluta: item personalitas creata reddit hominem personam, non subsistentia absoluta &c.

R. N. a. ad prob. D. a. subsistentia absoluta non est terminus ultimus simpliciter, nec reddit naturam humanam incommunicabilem simpliciter C. a. secundum quid N. a. Deinde licet per absolutam subsistentiam non immediate personaretur natura, fieret tamen persona mediate, quatenus per unionem immediatam cum essentia Divina simul mediate uniretur tribus personalitatibus cum essentia D. identificatis, à quibus ultimum complementum, & ipsam unionem formalem Personæ ac ultimæ incommunicabilitatis reciperet. Ex quo sequitur, quod bene adhuc subsistentia absoluta possit supplere supposititalitatem Naturæ humanæ, tum, quia hanc redderet immediate incommunicabilem secundum quid, nimirum respectu suppositi



*Art. VI. De Termino possibili unionis hypostaticæ. 87*

suppositi realiter distincti ab essentia Divina : tum quia mediate redderet simpliciter incommunicabilem ; ac vere personaret.

Objic. 3. In casu nostræ conclusionis vel assumeretur natura humana ab essentia Divina in unitatem naturæ, vel suppositi. Non potest dici primum : quia alias natura Divina & humana in unam essentiam coalesceret, quod est hæreticum : nonsecundum, quia subsistentia absoluta non importat supposititalitatem, quæ dicit incommunicabilitatem simpliciter : ergo.

R. Cum Scoto in 3. D. I. q. 2. §. *sed contra secundum* n. 10. N. M. nam assumptio naturæ ad subsistentiam Dei absolutam non esset ad unitatem suppositi ; vel personæ, ut patet, & conceditur : neque ad unitatem naturæ ; quia hoc ex modo loquendi significaret identitatem naturæ humanæ & Divinæ, seu unam naturam, sed implicat ita ab essentia D. assumi humanam, ut utraque in unam naturam coeat : igitur ait Scotus, natura humana in tali casu potius assumeretur ad unionem cum natura Divina, quam ad unitatem naturæ vel suppositi.

Dices. PP. loquentes de hoc mysterio tantum duplicem unionem recensuerunt, unam in persona, quam admiserunt, alteram in unitate naturæ, per quam natura humana & Divina in unam essentiam coeunt, & hanc unionem negarunt : ergo non agnoverunt nostram unionem, quam nos hic adstruimus, ut possibilem, quæ est alia à dictis duabus unionibus.

R. trans. a. D. C. & tamen nostram non reprobaverunt C. c. fecus N. c. PP. tantum egerunt de eo, quod factum est, & de quo loquendi ansam præbuerunt hæretici : Jam vero tantum prima unio, de qua dictum est in moderna providentia, est peracta, & de altera tantum, non autem de nostra hæretici ansam præbuerunt loquendi : ergo mirum non est, quod de nostra, quam hic dicimus esse possibilem, siluerint. Cæteroquin quæstionem, quam tractamus hac conclusione, est mere speculativa ; quæstiones autem speculativas non multum curant Patres.

Dices. 2. in hypothese nostræ conclusionis : *hic homo esset hic Deus* ; sed hic homo est suppositum & persona : ergo natura



natura sic assumpta; assumeretur in unitatem personæ, & suppositi, quod tamen non potest admitti, quia subsistentia absoluta non est suppositivitas, vel personalitas; alias enim in Deo forent quatuor supposita vel personæ, tres relativæ, & una absoluta.

R. N. m. sicut enim in Deo persona non significatur per hunc terminum *Deus* concretive sumptum, ita neque per istum terminum *homo*, semper & universaliter significatur suppositum, vel persona; sed potest etiam significari natura singularis, in quo sensu D. August. & Ambrosius in suo hymno cantant: *tu ad liberandum suscepturus hominem, non horruisti* &c. id est, suscepturus naturam humanam singularem; nam suppositivitatem propriam humanæ naturæ Verbum non assumpsit. Igitur in casu nostræ conclusionis per terminum hic *homo* immediate significaretur natura humana singularis subsistens subsistentia absoluta & communicabili, quamvis mediate possit etiam per illum significari persona, quia natura humana sic per subsistentiam absolutam immediate assumpta mediate etiam uniretur Personis Divinis: atque etiam in tali hypothese quolibet ex tribus Personis esset incarnata, & esset homo; quia omnibus tribus personis immediate communicaretur natura humana. Denique ejusmodi unio non foret in omni rigore hypostatica, quia non est primario in hypostasi seu personalitate facta; foret tamen unioni hypostaticæ multum similis, & talis in sensu latiore.

55

Assero 2. Plures Personæ Divinæ nequeunt simul immediate assumere eandem naturam humanam. Scot 3. D. 1. q. 2. §. ad questionem, igitur n. 5. ac S. Scot. communiter contra extraneos.

Prob. 1. S. Anselmus L. *cur Deus homo* c. 9. ait: *Plures Personæ nequeunt unum eundemque hominem assumere in unitate personæ*: quare in una tantum persona hoc fieri necesse est, & L. de Incarnatione Verbi c. 4. *Filio incarnato non est necesse alias quoque personas incarnari, sed impossibile*: quæ autoritas ita clara est, ut etiam Larca adversarius dicat, eam non admittere ullam explicationem. Unde effugia adversariorum parum proficiunt.



*Art. VI. De termino possibili unionis hypostaticæ. 89*

proficiunt, maxime contra textum secundum, qui manifeste est pro nobis.

Prob. 2. Per unam personalitatem terminatur adæquate dependentia naturæ humanæ, ergo non potest ulterius terminari per alias personalitates: C. patet: quia alias talis dependentia non esset terminata adæquate; quia ulterius per aliam personalitatem terminari posset: & sic posset dari duplex actio totalis, uti consideranti liquet. A. prob. defacto utique per unam personalitatem Verbi adæquate est terminata dependentia naturæ humanæ in Christo: ergo per unam personalitatem terminatur adæquate dependentia naturæ humanæ.

Prob. 3. Natura humana habens personalitatem propriam non potest assumi à Verbo, vel alia Persona Divina: ergo neque potest assumi à Patre, vel Spiritu Sancto, quando jam est personata per personalitatem filii, quia per personalitatem Verbi æque vel magis completur, quam per propriam.

Confirm. Ideo natura humana affecta personalitate propria non potest assumi à Verbo, vel alia Persona Divina, quia est adæquate completa, & terminata substantialiter per propriam personalitatem, ergo etiam natura humana assumpta & personalizata à Verbo non potest assumi ab alia Persona Divina, quia jam est substantialiter completa, & terminata per personalitatem Verbi.

Prob. 4. Natura creata habet indigentiam & capacitatem ad suum complementum substantiale, & quidem determinate respicit suam propriam personalitatem, non vero indifferentem quamlibet, sicut materia quamlibet formam: ergo per unam propriam personalitatem adæquate satiatur capacitas naturæ, vel certe per unam alteram, quæ propriam personalitatem supplet.

Confirm. Si plures personalitates assumerent eandem naturam humanam, tunc vel cum eadem natura constituerent plures personas vel unam: non secundum: quia plures etiam



personalitates cum una natura Divina constituunt plures & tres personas ; & sola personalitate multiplicata multiplicatur concretum personale , ut in Philosophia dicitur. Non primum : quia natura creata ac finita ob limitationem suam videtur tantum esse capax unius personæ constituendæ , quod patet : quia alias natura humana personalizata propria personalitate maneret adhuc supernaturaliter personabilis personalitate Divina , quod tamen communiter negatur. Ad hæc ob solam infinitam fecunditatem naturæ Divinæ tres in Deo personalitates dantur : ergo cum talis infinita fecunditas in essentia creata non reperiatur , neque in ea datur capacitas plurium personalitatum : atque adeo per unam personalitatem tota ejus suppositalitas exhauritur : ergo.

56

• Objic. 1. Natura humana potest mediate assumi à tribus personis Divinis , si nempe ea assumeretur immediate ab essentia Divina per subsistentiam absolutam , & sic mediate uniretur cum omnibus tribus personalitatibus , ut dictum est conclusionem præcedente , & tenet Scotus citatus §. ad questionem igitur ¶. ad primum in oppositum n. 8. ergo etiam immediate sic assumi potest ; quia ex mediata assumptione videntur sequi eadem contradictoria , quæ ex immediata inferuntur. R. cum Scoto D. a. & hoc convenit naturæ humanæ assumptæ ratione sui N. a. ratione naturæ Divinæ infinitæ , cui primo & immediate unitur natura humana C. a. & N. c. ratio distinctionis patet ex ultima probatione.

Objic. 2. Supernaturaliter potest una materia simul informari pluribus formis ; ergo etiam una natura creata potest simul suppositari pluribus personalitatibus. R. N. C. & parit. materia ex se est indifferens ad hoc vel illud compositum constituendum , & nata est cum qualibet forma constituere compositum , adeoque habet inclinationem & potentiam ad quasvis formas , & ideo earum plures simul in se recipere potest , si adsit agens supernaturale , quod illas introducat , atque natura humana ex se tantum ordinatur ad unam determinatam personalitatem , per quam adæquate ejus communicabilitas sistitur.

Objic. 3.



*Art. VI. De termino possibili unionis hypostaticæ.* 91

Objic. 3. Natura creata est in potentia obedientiali in ordine ad tres Personas Divinas, ita, ut ab his tribus possit assumi: ergo etsi ab una persona fuerit assumpta, tamen adhuc est in potentia, ut ab alia assumatur: consequenter plures personæ Divinæ simul possunt assumere eandem naturam humanam.

R. D. a. natura creata est in potentia obedientiali ad tres personas divisim, ita ut ab una solum vel hac vel illa ex his tribus possit assumi C. a. ut ab his tribus conjunctim, & simul possit assumi. N. a. habet quidem natura humana simultatem potentiae obedientialis ad tres Personas Divinas, non vero potentiam simultatis: seu potest assumi à Patre ex hypothesi, quod non aliunde sit personalizata per Verbum, vel Spiritum sanctum, aut propriam personalitatem, taliter quoque seu sub simili hypothesi est assumptibilis à Filio, & Spiritu Sancto.

---

DISSERTATIO III.

*De causis Incarnationis.*

ARTICULUS I.

*De actione & causa physica Incarnationis.*

ASSERO 1. Actio Incarnativa, vel incarnatio active spectata, & sumpta pro actione productiva hujus mysterii est actio productiva unionis hypostaticæ. Communis Scotist. 57

Prob. Illa actio est incarnativa, per quam ponitur mysterium Incarnationis, sed per actionem productivam unionis hypostaticæ ponitur mysterium Incarnationis, seu Christus: ergo actio productiva unionis hypostaticæ est actio incarnativa.

Ex quo inferes, actionem incarnativam non esse creativam animæ rationalis, vel productivam humanitatis Christi.



Ita Scot. 3. D. 1. q. 1. cum suis & RR. ac Gonet, Mezger, & plures Thomist. contra alios Thomist. Ratio est 1. Illæ actiones sunt distinctæ, quæ habent diversos terminos totales: sed actiones creativa animæ rationalis Christi, & productiva humanitatis Christi, & actio incarnativa habent diversos terminos totales: ergo sunt etiam actiones distinctæ. M. est communiter recepta, & inductione probari potest. m. prob. terminus totalis actionis creativæ animæ est anima rationalis, terminus totalis actionis, qua producitur humanitas, est tota humanitas Christi, & terminus adæquatus actionis incarnativæ est totus Christus constitutus non solum ex humanitate, sed etiam Verbo Divino; atqui: ergo. 2. Illæ actiones realiter distinguuntur, quæ possunt realiter separari; sed actio productiva animæ rationalis & humanitatis Christi, & actio incarnativa possunt realiter separari: ergo realiter distinguuntur. m. prob. potuisset produci anima, & tota humanitas Christi, sicque dari actio creativa animæ, & productiva humanitatis Christi, quin daretur actio incarnativa, & quin ejusmodi anima & humanitas assumeretur à Verbo: ergo istæ actiones possunt invicem separari. 3. Actio productiva humanitatis & animæ Christi, & actio incarnativa sunt diversi ordinis, priores enim, quoad substantiam saltem, sunt ordinis naturalis, hæc vero seu incarnativa est ordinis supernaturalis in supremo gradu; sed actiones diversi ordinis petunt realiter distingui: ergo hæ actiones petunt realiter distingui.

Objic. 1. Juxta S. Leonem Papam epist. 11. ad Julianum: natura humana Christi ipsa assumptione, seu incarnatione fuit creata. & S. Fulgentius L. de incarnatione & gratia c. 3. ipsa acceptio carnis est conceptio virginis: ergo actio productiva humanitatis Christi est simul incarnativa. R. illi PP. tantum asserunt contra hæreticos, prius tempore non esse creatam vel productam humanitatem Christi, quam fuerit assumpta à Verbo: de hoc autem, an ejusmodi assumptio & productio humanitatis Christi sit una vel duplex actio, non disputant Patres.

Objic. 2. Si actio productiva humanitatis Christi fuit distincta ab actione incarnativa, tunc B. V. M. non fuit Mater Christi.



tti & Dei, quia physice non influxit in productionem Christi, sed tantum in productionem humanitatis Christi; sequela est hæretica: ergo. R. D. M. si fuit distincta, & simul prior tempore actione incarnativa C. M. si non fuit tempore prior actione incarnativa N. M. illo ipso instanti reali, quo B. V. Maria influxum suum generativum completum præstitit in humanitatem, & hæc physice ac complete concepta est in utero virgineo, fuit simul unita Verbo, ut verum fuerit tunc dicere: *hoc instanti virgo concepit Verbum Divinum vel Deum.* Ratio est, quia actiones & passiones denominant supposita & personas; atqui illo instanti reali conceptionis humanitas Christi jam substituit per suppositum Verbi, ergo illo instanti jam hoc suppositum Verbi fuit denominatum conceptum ex virgine.

Affero 2. Causa efficiens Incarnationis & unionis hypostaticæ est tota SS. Trinitas. Ita omnes Catholici. 58

Prob. 1. ex Concil. Lateranensi relato cap. *firmiter de summa Trinitate*: ubi *unigenitus* Dei Filius Ipfus Christus dicitur à tota Trinitate communiter incarnatus. Et Concil. Tolet XI. habet in professione fidei. *Incarnationem quoque hujus filii Dei tota Trinitas operata esse credenda est, quia inseparabilia sunt opera Trinitatis*: ergo.

Prob. 2. Omnia opera adextra à tota SS. Trinitate tota indivisim fiunt; sed incarnatio Verbi Divini est opus Dei adextra: ergo hoc indivisim à tota SS. Trinitate peragitur.

Ex dictis sequitur, quod Verbum Divinum non exerceat aliquem specialem influxum effectivum respectu Incarnationis, quem non exerceat simul tota SS. Trinitas, ratio est, nam, quicumque adstruatur influxus, debet is esse opus Dei adextra, quod est commune toti SS. Trinitati, ut ex tract. de Deo uno & trino palam est.

Dices. Verbum Divinum solum potest immediate uniri naturæ humanæ: ergo etiam solum Verbum Divinum potest specialiter influere physice in unionem hypostaticam. R. N. c.



& parit. nam prædicatum & potentia, per quam Deus operatur adextra, & efficit unionem hypostaticam, est perfectio Divina absoluta conveniens omnibus tribus personis Divinis æqualiter, adeoque per illam omnes tres Personæ æqualiter debent cooperari ad opera adextra. Ast ratio, secundum quam Verbum Divinum immediate terminat unionem hypostaticam, est prædicatum tantum relativum personalitatis, ac filiationis, proprium soli Filio Divino, proinde secundum illum tantum immediate unitur Filius Divinus, non reliquæ personæ.

59

Affero 3. Nec B. V. Maria, nec alia causa physice influxit etiam ut causa instrumentalis in unionem hypostaticam, & incarnationem. Ita communis Scot. cum quibus sentit etiam Mezger, existimans hanc conclusionem esse de mente D. Thomæ contra Vivam, Bernal, & alios RR.

Prob. 1. Scriptura incarnationis effectum tribuit soli Deo: ergo solus Deus est causa physica ejus. A. prob. Habacuc 3. dicitur *Domine opus tuum*, quod explicant PP. de Incarnatione. Matthæi 1. *quod in ea natum est, de Spiritu S. est.* Luc. 1. *fecit mihi magna, qui potens est. Fecit potentiam in brachio suo.* ergo.

Prob. 2. Evertendo præcipuum argumentum adversariorum. Si B. V. Maria physice influxisset in unionem hypostaticam, tunc ideo, quia alias non esset vera Mater Dei, sed hæc ratio nihil probat: ergo. M. est adversariorum, ut videre est apud Vivam. m. prob. 1. aliunde satis ostenditur, quomodo B. V. Maria sit Mater Dei dicenda cum Scoto 3. D. 4. n. 12. quod B. Virgo produxerit humanitatem in ipso reali instanti productionis unitam cum Verbo Divino, adeoque hominem Deum, seu humanitatem, cui ob unionem hypostaticam communicata sunt idiomata & prædicata Divina. 2. Dato etiam, quod B. V. physice tanquam causa instrumentalis influxerit in unionem hypostaticam, tamen exinde minime sequeretur, eam esse Matrem Dei, tum, quia nec tota SS. Trinitas, quamvis ut causa principalis efficiat unionem hypostaticam, propterea dicitur Pater, vel Mater Christi vel Dei; ergo multo minus B. V. sic dici posset, aut deberet Mater Dei propter influxum



fluxum tantum instrumentalem in unionem hypostaticam. Tum, quia (ut argumentatur clarissimus D. Mezger) solus influxus *instrumentalis* in unionem hypostaticam, esto sit activus, non sufficit ad dandam denominationem & dignitatem Maternitatis; nam ad hanc denominationem requiritur concursus causæ principalis, nec sufficit influxus ille, qui etiam à non vivente potuisset præstari; atqui influxus instrumentalis, quem B. V. supernaturaliter elevata præstitisset ad effectum unionis hypostaticæ, posset etiam præstari a non vivente; ut ipsi AA. fatentur; quia in B. V. Maria hunc influxum personalem esse defendunt ob potentiam obedientialem quodlibeticam, vi cuius etiam res inanimatæ possent ad similem influxum elevari: ergo. M. pariter constat; quia influxus matris qua talis, semper est alicujus viventis ut viventis: ergo hæc ratio nihil probat. Unde infert laudatus D. Mezger nostros adversarios per concursum hunc instrumentalem B. Virginis non salvare, sed potius deprimere, aut tollere dignitatem maternitatis. Ratio hujus est, quia illi per hunc concursum instrumentalem rem non explicant, ut satis liquet ex dictis, & simul indicant, aliter non posse salvari maternitatem, nisi per ejusmodi instrumentalem influxum in unionem hypostaticam: ergo tali modo omnino non posset salvari, aut explicari, quomodo B. V. Maria esset Mater Dei: quod utique deprimere, non vero exaltare est Maternitatem Dei.

Prob. 3. Nec B. V. nec ulla creatura potuit elevari ad influxum physicum & effectivum, qualem juxta AA. etiam causa instrumentalis habet, præstandum ad unionem hypostaticam: ergo neque actu sic influit B. V. aut alia creatura. A. prob. 1. ideo B. V. vel alia creatura sic elevari potuit; quia datur potentia obedientialis activa quodlibetica; sed hæc non datur juxta Scot. ergo. M. est adversariorum, minorem suppono ex philosophia nostra. Idem a. prob. 2. causa efficiens sive principalis, sive instrumentalis unionis hypostaticæ debet attingere extrema infinite distantia, eaque physice unire; sed videtur absolute repugnare alicui creaturæ puræ, quod attingat extrema infinite distantia, ea physice uniendo: ergo.

Objic. 1.



60 **Objic. 1.** B. V. Maria secundum PP. fuit instrumentum incarnationis, sed non fuisset, nisi habuisset influxum causæ instrumentalis in unionem hypostaticam: ergo. R. N. m. B. V. fuit causa instrumentalis, quatenus in conceptione cooperata est physice ad formandum corpus, & sic ad producendam totam humanitatem Christi, quæ primo instanti productionis suæ erat unita Verbo Divino.

**Objic. 2.** Si B. V. tantum influxisset physice in humanitatem puram, eam physice cauſando, tunc solum influxisset in hominem producendum, qui vi influxus hujus esset indifferens ad hominem purum, & ad hominem Deum: ergo vi talis influxus B. V. non esset proprie & determinate Mater Dei, sed potius esset indifferens ad Maternitatem Dei hominis, vel puri hominis. R. D. a. si influxisset in humanitatem puram, id est, non unitam physice cum persona Divina C. a. secus N. a.

**Objic. 3.** Mater puri hominis, ut talis dici queat, debet non solum ministrare materiam corporis, sed & physice influere in unionem, qua ejusmodi corpus unitur animæ: ergo etiam, ut B. V. dici queat Mater Dei, debet non solum præbere materiam formando corpori Christi, sed & concurrere ad unionem hypostaticam inter humanitatem & Verbum Divinum. R. N. a. nam Scotistæ cum suo Doctore tenent, quod nec Pater nec Mater concurrant physice ad unionem animæ rationalis cum corpore, & tamen physice efficiunt hominem, quia producunt corpus unitum animæ rationali. Videatur Mastrius in lib. de generat: & corrupt. disp. 8. n. 33. & seqq.

**Objic. 4.** B. V. Maria debet glorificari magis & magis, quantum potest; sed magis glorificaretur, si diceretur physice effective influxisse in unionem hypostaticam: ergo. R. admiss. M. N. m. nam 1. non sic magis glorificaretur, ut patet ex probatione secunda conclusionis, sed potius ejus gloria minueretur. 2. Non potest sic glorificari, quia talis concursus absolute implicat.

**Objic. 5.**



Objic. 5. In sententia nostræ conclusionis B. V. Maria non vi influxus physici, sed tantum improprie virtute contingentis unionis hypostaticæ cum Verbo esset Mater Dei, sed hoc videtur esse contra honorem B. V. Mariæ: ergo. R. 1. non est contra honorem Christi, quod contingenter, seu non necessario humanitas ejus sit unita Verbo Divino: ergo neque potest esse contra honorem B. V. Mariæ, quod tali modo contingenter sit Mater Dei. R. 2. N. M. nam in nostra sententia non contingenter, & accidentaliter, vel improprie, ut loquitur Viva, est Mater Dei; sed vere proprie, quia vere attingit physice naturam humanam realiter suppositatam personalitate Divina.

Objic. 6. In nutritione, & accretione partes Christi uniebantur de novo Verbo Divino, & hæc nova unio fuit producta per animam Christi: atqui, si anima Christi, quæ est creata, potuit hanc novam unionem ad Verbum producere, tunc & primitus hoc potuit B. V. Maria: ergo. R. N. 2. memb. M. anima Christi in tali nutritione & augmentatione non plus faciebat, quam cæteræ animæ hominum in simili negotio: novam autem unionem hypostaticam ad Verbum producit semper sola SS. Trinitas.

Quæres, quisnam sit terminus actionis Incarnativæ? R. 1. terminus totalis actionis incarnativæ est *Christus*, seu *homo Deus*. Ratio est: terminus adæquatus activus est illud compositum, vel totum, quod posita actione productiva resultat; atqui posita actione Incarnativa resultat Christus: ergo. 61

R. 2. Terminus formalis Incarnationis, prout ea sumitur pro actione unitiva, est unio hypostatica, Ratio est: terminus formalis est ratio specificans aliquod concretum, vel terminum totalem productum: sed forma specificans hoc concretum *humanitatem unitam* Verbo, quod primario per actionem ut unitivam intenditur, est unio hypostatica: ergo. 2. Ut actio incarnativa est communicatio personalitatis Divinæ, pro termino formali habet personalitatem Verbi: hæc enim sub hac consideratione in termino totali habet quasi rationem formæ specificantis. 3. Si vero Incarnatio sumitur pro humanatione



natione vel ipsa incarnatione, tunc terminus formalis est natura humana: hæc etenim in hoc concreto Deus humanatus vel incarnatus habet quasi rationem formæ denominantis.

\*O\*O\*O\*O\*O\*O\*O\*O\*O\*O\*O\*O\*O\*O\*O\*O\*O\*O\*O\*O\*O\*O\*O\*O\*O\*O\*O\*O\*O\*O\*O\*O\*

## ARTICULUS II.

### *De causa finali, seu de fine & motivo Incarnationis.*

- 62 **G**ravis hæc quæstio est, & versatur in eo, an Christus venisset, si Adam non peccasset: vel an motivum & finis Incarnationis Verbi Divini fuerit sola redemptio, & reparatio generis humani, in Adamo lapsi, ita, ut Christus neutiquam venisset, si homines non fuissent lapsi, nec reparatione indiguissent. Duplex est sententia, una Thomistarum dicentium: redemptionem generis humani in Adamo lapsi fuisse unicam rationem motivam & finalem adventus Christi; proinde juxta hos Christus absolute non venisset, si Adam non peccasset. Altera est Scotistarum cum plurimis RR. asserentium; quod duplex fuerit motivum & finis incarnationis Dominicæ. Et quidem primus finis, qui respicit ipsam substantiam hujus mysterii, & ipsa Excellentia incarnationis Verbi Divini. Alter vero est redemptio generis humani, qui respicit incarnationem quoad modum; nam ob reparationem hominum in Adamo lapsorum Christus venit speciali quodam modo, nempe in carne passibili, alias, si Adam non peccasset, venturus in carne extrinsece impassibili. Igitur Scotistæ & alii in hoc puncto scotistice sentientes ajunt; incarnationem quoad substantiam esse à Deo efficaciter decretam independentem à peccato Adami, & sine connexionem cum redemptione hominum in Adamo lapsorum, adeoque Christum vi talis decreti etiam Adamo non peccante fuisse venturum, quamvis alio modo, nimirum in carne impassibili: pro quo.

Advertendum, quamvis unum in Deo entitative sit Decretum, illudque sit idem à parte rei indivisibile & immultiplica.



tiplicabilis actus voluntatis Divinae, tamen hoc ipsum unicum decretum in plura non realiter, nec ex natura formaliter, sed per rationem distincta decreta dividi solere ratione objectorum distinctorum, in quae tendit. Verbo, Decreta Divina non sunt plura entitative, sunt tamen plura objective. Imo interdum idem objective Decretum in plura signa, tendentias vel formalitates (ut vocant RR.) secari potest & debet. Sic Decretum incarnationis ex mente Scoti ad minimum in tria signa dismembrari potest & debet. In primo signo decrevit Deus decreto intentivo, efficaci incarnationem, praescindendo ab impassibilitate vel passibilitate Christi, ob excellentiam solam hujus mysterii, consequenter independenter à peccato Adami, & redemptione generis humani. In secundo signo decrevit Deus existentiam reliquarum creaturarum, & Adami &c. cujus lapsum etiam permisit, & praevидit absolute. In tertio signo decrevit modum incarnationis, ut veniret Christus in Carne passibili, in ea redempturus genus humanum lapsum in Adamo.

Hæc pro prævia notitia signorum ad hoc decretum pertinentium, quamvis plura de his signis dicenda sint, præferimus, quod in primo signo hujus decreti non quidem fuerit determinate, absolute intenta & decreta formalis passibilitas humanitatis Christi, bene tamen radicalis: quia in eo fuit Christo assignata natura humana intrinsece, & in actu primo passibilis, & simul in illo instanti nihil fuit decretum, quod passibilitatem in actu secundo impediret. Similiter dicam, quod pro primo signo jam fuerit indeterminate, ac conditionate decreta vel passibilitas vel impassibilitas formalis. De quo n. 65. Object. 5.

Denique hic non indagatur, an Deus potuerit mittere Christum, si Adam non peccasset: de hac enim possibilitate nemo dubitat. Liberum enim fuit Deo, vel omnino non mittere Christum, vel ipsum mittere independenter à peccato, aut in reparationem hominis lapsi. Neque quæritur, an Christus Adamo non peccante venisset vi alicujus decreti primum ponendi, si Adam non esset lapsus: nam an Deus decretum



tale posuisset primum, tunc de Christo mittendo, est res incerta. Controvertitur ergo solum, an vi moderni decreti, per quod Incarnatio decreta est in moderna providentia, Christus venisset, si Adam non peccasset.

Tota autem difficultas in hoc recidit, an Christus fuerit efficaciter decretus pro signo priori ad peccatum, & sine connexionione cum peccato, propter solam excellentiam in mysterio Incarnationis relucens; si enim hoc est verum, tunc Christus venisset, etiam si Adam non peccasset: quia decretum efficax de Christo venturo, quod est infrustrabile, & in opus exire debet, prius peccato Adami absolute prævisio, & independentem ab illo, & illius reparatione fuisset factum, substituitque ejus motivum, scilicet excellentia hujus mysterii, etiam si nec Adam extitisset, nec peccasset, nec redemptione indiguisset. Hoc igitur ut rite probemus, controversia in tres §. secabitur; primus motivum & finem Incarnationis quoad substantiam; alter objectiones. Tertius motivum Incarnationis quoad modum proponet.

## §. I.

*Motivum & finis Incarnationis quoad substantiam spectatæ.*

63 Assero. Vi præsentis Decreti Christus & Incarnatio quoad substantiam est efficaciter decreta ante prævisum Adæ peccatum, & independentem ab eo, atque adeo Christus venisset, si Adam non peccasset. Scot. 3. D. 7. q. 7. n. 3. §. *sed hic sunt duo dubia.* Alexander Alensis, Albertus, Catharinus, Suarez, Gormaz, Esparza, Thyrsus, Gonzalez, Ulloa, Pallavicinus, Viva Antonius Mayr & alii plures; inter quos est S. Franciscus Salesius L. 2. de amore Divino c. 4. dicens: se hanc sententiam hausisse à S. Scriptura & doctrina antiquorum. est autem hæc conclusio contra Thomistas communiter, & multos alios &c.

Prob. 1. autoritate, ex qua hæc quæstio ferè unice probari debet: nam illa, quæ à libera voluntate Dei pendent, uti



ut si incarnatio Verbi Divini, nonnisi ex revelatione, quæ per auctoritatem nobis constat, innotescere possunt. Igitur Proverb. 8. v. 22. & seq. dicitur: *Dominus possedit me in initio viarum suarum, antequam quidquam faceret à principio: ab æterno ordinata sum, & ex antiquis antequam terra fieret, nondum erant abyssi, & ego concepta eram.* Septuaginta Interpretes loco *possedit me* &c. legunt: *Dominus creavit me, initium viarum suarum:* quæ verba ingens numerus PP. & nominatim Clemens Romanus, Bassilius, Athanasius, Nazianzenus, Cyrillus Alexandrinus, Chrysostomus, Hilarius, Ambrosius, Augustinus, imo & Concilium Hyspalense IX. c. 13. &c. intelligunt de sapientia Divina incarnata, & de Christo ut homine, quod etiam colligitur ex ipso modo loquendi 70. Interpretum; qui dicunt, *Dominus creavit me;* atqui sapientiæ Divinæ increatæ non potest convenire esse creatum, bene vero sapientiæ Divinæ creatæ & incarnatæ hoc convenit secundum humanitatem: ergo. Et Ecclesiastici 24. *Ego ex ore Altissimi prodivi primogenita ante omnem creaturam:* quod de Christo qua homine intelligit Concilium Sardicense in epistola ad omnes Episcopos. Et ad Colossenses 1. dicit D. Paulus de Christo, *Primogenitus omnis creaturæ, quoniam in ipso condita sunt universa, in cælis & in terra, visibilia, & invisibilia* &c. omnia per ipsum, & in ipso creata sunt, & ipse est ante omnes, & omnia in ipso constant, & ipse est caput corporis Ecclesiæ, qui est principium, *Primogenitus ex mortuis, ut sit in omnibus primatum tenens.* Qui textus aperte loquitur de Christo qua homine: nam juxta Concilium Sardicense in epistola allegata per to *Primogenitus* semper Christus indicatur qua homo, & per to *Unigenitus* significatur ipse qua Deus: & hunc textum de Christo qua homine accipit D. Chrysostomus apud Suarez: ipsaque verba textus id indicant, nam caput corporis Ecclesiæ est Christus secundum naturam visibilem humanam. Et *Primogenitus ex mortuis* est Christus utique qua homo, & non qua Deus.

Itaque ex hac auctoritate Sacræ Scripturæ ita argumentor. Hi textus non loquuntur quidem de ipsa productione actuali Christi, utpote quæ non fuit prior omnibus, sed posterior multis creaturis antea productis: ergo loquuntur de



intentione & decreto efficaci, quo Deus statuit incarnationem: ergo in decreto Divino Christus & incarnatio Verbi est efficaciter intenta ante omnem creaturam intentam, proinde est ante Adamum; atqui si incarnatio est prior à Deo intenta ante Adamum, tunc etiam ante permissionem & prævisionem absolutam ejus peccati: ergo incarnatio est prior intenta ante permissionem & prævisionem peccati Adami. Ultima C. patet: quia textus allati dicunt, Christum fuisse in mente Divina, antequam quidquam faceret in intentione, seu decreto suo, & sic esse Primogenitum in mente & decreto Divino ante omnem creaturam. m. subsumpta iterum patet, quia peccatum non potuit prævideri vel permitti absolute, antequam videretur absolute extitutum subjectum, & creatura, quæ peccare posset, scilicet Adamus: adeoque si decretum absolutum de Adamo aliquando condendo, & extituro non præcessit intentionem efficacem Dei de incarnatione Verbi, tunc neque potuit præcedere permissio vel prævisio absoluta peccati Adami: ergo à primo ad ultimum vi horum textuum Christus & Verbi incarnatio est decreta efficaciter independenter à peccato Adami absolute futuro: ergo vi hujus decreti Christus adhuc venisset in casu, quo absolute non extitisset peccatum Adæ.

Rdent. aliqui 1. Christus tantum fuit decretus, antequam mundus fuerit actu conditus, non autem antequam fuerit mundus decretus.

Contra est 1. Per hos textus specialis prærogativa adscribitur Christo & incarnationi præ aliis creaturis; atqui si Christus tantum fuisset decretus, antequam mundus fuisset actu conditus, non haberet specialem prærogativam præ aliis creaturis, cum omnes etiam vilissimæ creaturæ jam ante mundum conditum ab æterno fuerint in mente Divina decreta: ergo.

Rdent. alii 2. Christus est initium tantum viarum redemptionis creaturæ, non autem operum & creaturarum omnium. Contra est: contrarium colligitur ex textibus allatis, quibus Christus vocatur: *Primogenitus omnis creaturæ*, & dicitur fuisse inten-



intentus, antequam quidquam Deus faceret à principio, ante terram, fontes, colles, abyssos &c.

Rdet. 3. Lugo cum multis aliis : Christus est prior aliis creaturis prioritate excellentiæ, & dignitatis, non prioritate causalitatis & intentionis. sic enim Behemot Job. 40. dicitur : *ipse est principium viarum Dei*, id est, quoad nobilitatem creaturæ. Et de nobis Jacobi 1. voluntarie enim genuit nos *verbo veritatis*, ut *simus initium aliquod creaturæ ejus*, id est, primatum habeamus inter visibiles creaturas. Et exodi 4. *filius meus primogenitus Israel*, id est, excellentia & nobilitate exaltatus super alios populos.

Contra est 1. Quamvis alii textus non loquantur de ordine causalitatis, quando de principio, initio, vel primogenito mentionem faciunt, tamen textus à nobis adducti non possunt aliter intelligi, quam de prioritate causalitatis : quid enim aliud indicant illa verba : antequam quidquam NB. *faceret à principio*, ab æterno *ordinata sum*, antequam terra NB. *fieret*? Textus S. Pauli ad Colossenses clarissime loquitur de primatu in causalitate, de hoc enim ipsi præcipuus sermo est. Et addit tandem, ut Christus sit in omnibus primatum tenens; atqui non haberet in omnibus primatum, si eum non obtineret quoque in ordine causalitatis & intentionis : ergo. Ex quibus facile colliges, quid reponendum ad textus à Lugone nobis oppositos : nam verba illorum satis solvuntur per prioritatem dignitatis, non vero nostrorum textuum.

Prob. 2. autoritate PP. satis liquide dicentium, quod Christus in decreto Divino præcesserit Adamum, ejusque peccatum, & fuisset venturus, etiamsi Adam non peccasset. S. Irenæus L. 3. adversus hæres. c. 33. ait : *cum præexistere in decreto Divino salvans* (seu salvare potens) *oportebat, & quod salvaretur, fieri, ut non in vacuum sit salvans.* S. Cyrillus Alexandrinus l. 5. thesauri c. 8. in fine ait : *Creator noster Christum nostræ salutis fundamentum etiam ante initium mundi fundavit, ut si prævaricatione caderemus, in ipso rursus renovaremur* : Quantum igitur ad præscientiam & consilium, & propositum Pa-

tris



tris & omnis Deitatis Christus ante omnia sæcula fundatus est. Qui modus loquendi sonat peccatum necdum absolute prævisum ; alias enim non potuisset dicere conditionate, ut si *prævaricatione caderemus* ; sed *quia casuri sumus*. Significat tantum S. Pater Christum, dum fuit absolute decretus ante absolute prævisum peccatum, fuisse simul conditionate intentum, ut redemptorem in carne formaliter passibili nos renovaturum, *si prævaricatione caderemus*. Quod non obstat nostræ sententiæ, imo etiam faciliat, ut ex dicendis in objectione 5. patebit, nosque solum volumus, quod peccatum Adami *absolute prævisum* non præcesserit decretum intentivum incarnationis.

Prob. 3. Christus ejusque gloria est finis, propter quem reliquæ creaturæ sunt creatæ, & decretæ : ergo Christus in intentione & decreto est prior omnibus creaturis : nam finis in intentione seu decreto & proposito est prior aliis, quæ post talem finem intenduntur. A. prob. ex illo ad Hebr. 2. *propter quem* (Christum) *omnia*. Item Rupertus Abbas asserit : *religiose dicendum, quia propter istum filium hominis gloria & honore coronandum, Deus omnia creavit.* & idem L. de glorificatione SS. Trinitatis c. 20. & 21. habet, quod propter hominem Jesum Christum & Angeli & homines facti sint. Tandem S. Bernardus ferm. 3. *super salve Regina* ait de B. Virgine : *propter hanc omnis scriptura facta est : propter hanc totus mundus factus est* : ergo B. V. Maria tanquam finis mundi fuit in decreto Divino intenta ante totum mundum : ergo à fortiori Christus tanquam finis mundi & B. Virginis fuit intentus ante mundum.

64 Rdebis 1. cum Lugone, etiamsi Christus fuerit finis à Deo intentus & dilectus in creaturarum productione, & ex affectu Christi fuerint reliquæ creaturæ productæ, prout scriptura & PP. videntur indicare, tamen ad hoc non requiritur, ut decretum & intentio efficax incarnationis præcesserit decretum condendi mundum, sed sufficit præcessisse decretum condendi creaturas ex affectu & complacentia simplici erga Christum, non absolute aut efficaciter intentum : sicut & Deus reprobis quoque dat auxilia sufficientia ex affectu simplici



plici ad beatitudinem : & hoc sufficit , ut Deus dicatur etiam reprobis dare gratias sufficientes propter beatitudinem , & salutem , quamvis voluntatem effective efficacem non habeat salutis reproborum.

Contra est. Textus à nobis tam ex S. scriptura quam PP. allati indicant , Christum esse effective efficaciter decretum ante omnes creaturas , & non solum affective efficaciter , sicut salus reproborum : ergo. A. constat. nam termini *Dominus creavit me , ordinata sum , concepta eram , primogenitus* non significant simplicem complacentiam & affectum erga Christum , sed veram ejus productionem & ordinationem effective efficacem in mente Dei : ergo.

Rdebis 2. Christus ante reliquas creaturas fuit tantum conditionate & non absolute volitus.

Contra est. Hoc gratis dicitur ; nam textus allegati indicant absolutum & effective efficax decretum Dei.

Rdebis. Christus in mente & decreto Divino est creaturis prior intentus in ratione finis *qui* , vel *cujus gratia* , in ratione autem finis *cui* sunt priores homines lapsi , quorum bono intenditur Christus.

Contra est. Christus absolute & sub omni ratione est intentus in Decreto Divino ante creaturas , quæ primum post Christum sunt decreta : ergo non potuerunt prius intendi tanquam finis *qui*. Verum est , quod homines lapsi respectu Christi ut Redemptoris sint finis *cui* , & priores Christo , sed Gonet , qui ita respondit , debet primum probare , quod Christus in primo signo decreti intentivi fuerit ordinatus Redemptor hominis lapsi : atque adeo hæc responsio petit principium.

Prob. 4. S. Augustinus L. 1. de nuptiis ac concupis. c. 21. docet , in statu innocentiae , si perseverasset , seu si Adam non peccasset , futura fuisse tria bona matrimonii , scilicet propagationem sobolis , immunitatem à libidine , & sacramentum magnum in Christo & Ecclesia : ergo etiam tunc fuisset futurus

P. Kick. Theol. Tom. IV.

O

Christus ;



Christus; alioqui ibi non potuisset dari hoc sacramentum, seu mysterium significans conjunctionem Christi cum Ecclesia.

Prob. 5. Nostra sententia magis conciliat auctoritates quam opposita: ergo est præferenda oppositæ. A. prob. aliquæ auctoritates & textus dicunt aperte, Christum fuisse primum in intentione & decreto intentivo, adeoque ipsum esse venturum, etiamsi Adam non peccaret: quia erat independentem & pro priori ad peccatum Adæ decretus, & determinatus ad existentiam. Aliæ auctoritates volunt, Christum esse venturum, si Adam peccaret; atqui has auctoritates nos facile conciliamus, non vero adversarii: ergo nostra sententia magis conciliat auctoritates, quam opposita. m. prob. nos admittimus in eodem decreto duas formalitates & tendentias, quarum una, seu prior intendit & determinat incarnationem quoad substantiam ante omnem aliam creaturam decretam, consequenter etiam antequam decretus esset Adam, aut permetteretur, & prævideretur ejus peccatum. Altera vero tendentia seu formalitas decreti præsupponit decretum de existentia Adæ, uti & decretum permissivum lapsus Adami, & decernit Christi adventum quoad modum passibilitatis, ut veniat in carne passibili ad remedium & reparationem generis humani in Adamo lapsi. Unde juxta nos Christus quoad substantiam, & quasi præscindendo à carne passibili & impassibili fuit primario intentus propter se & propriam excellentiam, & propter ipsum, deinde Angeli & homines & creaturæ aliæ tanquam ejus famulitium. Et cum postea Adamus fuerit prævisus tanquam lapsurus, & cum illo etiam peccaturi ejus Posterii, fuit Christus alia formalitate vel tendentia decreti determinatus, ut veniret passibilis & moriturus pro populo. Per has ergo duas formalitates conciliantur facillime omnes auctoritates, & quidem primæ per primam formalitatem decreti, reliquæ, quæ supponunt peccatum Adæ, per secundam tendentiam. Cum vero adversarii primam tendentiam & formalitatem decreti à peccato Adami penitus independentem nolint agnoscere, sic nec auctoritates pro nostra conclusione adductas sufficienter solvere possunt: ergo illas auctoritates nos facile solvimus, non vero adversarii.

Confirm. 1.



Confirm. 1. Deus homines alios & Angelos prædestinavit ante lapsum Adami prævisum: ergo à fortiori sic prædestinavit, & decrevit tanquam caput & Regem Angelorum & hominum.

Confirm. 2. Non videtur satis credibile, quod Christus non sit bonum absolute tale, vel saltem non absolute, sed tantum occasione alterius, nempe occasione generis humani reparandi omnes intendatur, & taliter perfectissimum Dei opus adextra sit tantum bonum occasionatum: ergo Christus fuit absolute propter se, & propter excellentiam intentus & decretus.

Confirm. 3. Decretum intendens Christum propter se, & ejus gloriam est Christo honorificentius, ut patet, & simul magis commendat charitatem Dei, qua voluit visitare non solum infirmos & lapsos, sed etiam sanos in statu innocentiae: ergo tale decretum est adstruendum, maxime, quia Deus Christum adeo amat, & ejus gloriam & honorem quærit, ut habetur Joan. 8. v. 50.

Confirm. 4. Deus credibiliter delicias suas, quæ teste S. Scriptura sunt esse cum filiis hominum, non alligavit peccato: ergo etiam si nec Adam, nec alius peccasset; Christus adhuc venisset, & delicias suas cum hominibus innocentibus habuisset.

## §. II.

## Solvuntur Objectiones.

Objic. 1. Plurimæ autoritates possunt afferri, quæ asserunt, Christum non fuisse venturum, si Adam non peccasset: ergo nostra sententia est contra autoritatem. R. D. a. asserunt, Christum non fuisse venturum in carne passibili, & ut Redemptorem c. a. non fuisse venturum in carne intrinsece quidem passibili, sed extrinsece impassibili N. a. Hæc distinctio plane adhiberi debet ad plurimas autoritates, quæ nobis videntur adversæ; alias enim ejusmodi textus non possent concordari cum aliis, qui dicunt, Christum ante peccatum Adæ, & independentem



pendenter ab eo esse decretum &c. Deinde multi ex similibus textibus satis exprimunt, quod tantum intelligendi sint de adventu Christi in carne passibili; addunt enim Christum, si Adam non peccasset, non fuisse passurum, & moriturum. Quare textus tales integri, & non secundum aliqua verba truncata expendi debent. Adde, plerumque PP. & alios loqui de completo incarnationis mysterio, prout modo peractum est, & involvit vitam, passionem & mortem Christi, ac redemptionem generis humani, ut sic excitent fideles ad gratiarum actionem pro redemptione; Denique secundum usum scripturæ & Patrum non raro per carnem & sanguinem, quem Verbum in incarnatione assumpsit, intelligi solet res obnoxia corruptioni, & hinc dum dicunt, Verbum non fuisse venturum in carne humana, si Adam non peccasset, volunt, non fuisse venturum in carne passibili, ut notat Suarez.

Porro id quoque advertas; aliqui textus assignant quidem pro motivo incarnationis redemptionem generis humani lapsi; per hos tamen non negant alterum motivum, quod est ipsa excellentia hujus mysterii. Item, esto dicant aliqui PP. Adamo non lapso non fuisse necessariam incarnationem, per hoc tamen non negant, non fuisse futuram; multa enim a Deo libere ordinata sunt, quæ non sunt necessaria. Imo etiam lapso Adamo incarnatio non fuit necessaria, ut dictum est n. 63. & tamen à Deo libere & misericorditer est ordinata.

Objic. 2. Hæc propositio: *Princeps non veniret in urbem, si seditio non esset compescenda*, male explicaretur hoc modo: *Princeps non veniret cum exercitu, veniret tamen sine exercitu*: ergo etiam male exponitur ista propositio SS. PP. *si Adam non peccasset, Christus non venisset*: dicendo: *Christus non venisset in carne passibili, bene vero venisset in carne impassibili*.

R. D. a. male ita explicaretur, nisi hæc explicatio ex circumstantiis colligeretur C. a. secus N. a. & similiter D. C. Nostram explicationem colligimus ex circumstantiis saltem æquivalenter talibus, id est, ex textibus sacrae Scripturæ pro nostra conclusione allegatis, quibus nec PP. nec alii textus Sacrae Scripturæ



Scripturæ contradicunt, item ex textibus aliis SS. PP. & ex intento illorum; atqui similes explicationes & restrictiones debent sæpe admitti, ut dicta sacra Scripturæ inter se concilientur. Ita Christus quoque, dum Joan. 7. v. 8. dixit: *ego autem non ascendo ad diem festum istum*, restrinxit sua verba ad ascensum publicum: nam v. 10. refertur de ipso: *ascendit quasi in occulto*. Non tamen hujusmodi restrictio universaliter fieri potest, quando sufficiens ratio eam non exigit: unde non potest dici: *Christus non surrexit*, subintelligendo, *publice*: quia nullæ circumstantiæ, nullæ auctoritates, quæ istam propositionem sic restrictam adhiberent, id expetunt. Ex hac ultima ratione non potest dici: *Christus non venit*, subintelligendo in carne impassibili: quia hic modus loquendi non roboratur auctoritate, vel quodam usu communi, sicut alter, quem nos allegamus. Quod præter dicta dilucidat P. Viva dicens: homo in communi acceptione non sumitur pro homine impassibili, bene vero in communi sensu sumitur pro aliquo ente passibili, ac mortali, & quando PP. & Scriptura loquuntur de Christo, fere semper, & ordinarie loquuntur de eo ut homine mortali, ac doloribus obnoxio: propterea recte & conformiter communi modo loquendi dico: *Christus, Adamo non peccante, non venisset*, quia non venisset ut homo passibilis, licet ut impassibilis & immortalis adhuc venisset: non vero possum dicere: *Christus defuncto non venit*: propterea quod non venerit in carne impassibili, quamvis venerit ut passibilis.

Objic. 3. In nostra sententia Deus habuisset duos fines totales respectu incarnationis, scilicet excellentiam hujus mysterii, & redemptionem; sed videntur implicare duo fines totales respectu ejusdem rei: ergo.

R. D. M. habuisset duos fines totales respectu incarnationis secundum se, & quoad substantiam consideratæ N. M. duos fines totales, unum respectu incarnationis quoad substantiam, & alterum respectu incarnationis quoad modum C. M. verum taliter nulla implicantia ostendi potest.



Objic. 4. Vi decreti præsentis & defacto habiti debuit Christus venire, prout defacto venit; sed defacto venit ut Redemptor in carne passibili: ergo vi præsentis decreti aliter venire non potuit, sed debuit venire ut Redemptor, & in carne passibili, proinde Christus vi moderni decreti tantum venisset dependentem à peccato Adami.

R. D. M. vi moderni decreti adæquate spectati secundum omnia signa & formalitates C. M. vi moderni decreti secundum unam & primam formalitatem ac signum spectati, qua decerneretur incarnatio secundum substantiam N. M. dum dicimus, Christum vi præsentis decreti adhuc venturum fuisse, quamvis Adam non peccasset, non accipimus, decretum Divinum de adventu Christi adæquate secundum omnes suas formalitates, sed tantum volumus, quod per unam saltem formalitatem à peccato Adami independentem fuerit actu jam decreta incarnatio, & non fuisset primum decernenda per aliquod decretum ponendum tunc, si Adam non peccasset, prout aliqui RR. dicunt.

Objic. 5. Si Christus venisset vi præsentis decreti, Adamo non peccante, tunc vi præsentis decreti in tali hypothese venisset ut impassibilis; sed hoc non potest dici; ergo. M. est SS. PP. m. prob. si Christus non peccante Adamo venisset, tunc ideo, quia adventus Christi jam est decretus in prima formalitate decreti moderni: ergo etiam si venisset ut impassibilis, tunc hæc impassibilitas debuisset fuisse decreta in prima formalitate decreti; atqui si fuit ibi decreta impassibilitas, tunc non potuit in formalitate altera post peccatum Adæ prævisum decerni adventus Christi in carne passibili; secus enim hæ duæ tendentiæ decreti sibi contradicerent, & posterior priorem inverteret & mutaret: quod in decretis divinis implicat. R. D. M. venisset vi præsentis decreti ut radicaliter impassibilis C. M. ut formaliter impassibilis subdist. absolute & determinate N. M. conditionate & indeterminate C. M. vi decreti intentivi, vel primæ formalitatis decreti, qua Christus quoad substantiam venturus decernebatur, fuit simul decreta radicalis ejus passibilitas, dum fuit ipsi assignata caro ex se intrinsece passibilis, & determinate, ac absolute non fuit additum pro illo primo signo donum extrinse-



trinfecum impassibilitatis, vel impediens passibilitatem formalem, dolores & alias pœnalitates. Quare in illo signo erat Christus quasi indifferens ac indeterminatus ad passibilitatem vel impassibilitatem formalem; erat tamen jam conditionate decreta formalis passibilitas, si Christus pro signo posteriori esset decernendus venturus tanquam Redemptor creaturæ lapsæ; sic etiam pro eodem signo decreti conditionate erat decreta formalis impassibilitas humanitatis Christi, si pro posteriori signo ipse esset decernendus tanquam glorificator hominis in innocentia permansuri. Neque hoc Decretum conditionatum gratis asseritur: nam illud adstruit D. Cyrillus Alexandrinus allegatus in probationibus nostræ conclusionis: & aliunde constat ex tractatu de Deo uno, talia Decreta conditionata in Deo dari.

Objic. 6. Decretum intentivum Christi, vel prima formalitas hujus Decreti, qua Christus decretus est quoad substantiam, non potuit præscindere à formali passibilitate humanitatis Christi: ergo in primo signo hujus decreti Christus intendebatur ut passibilis, consequenter tantum ut venturus, si Adam peccaret. A. prob. passibilitas formalis est aliqua proprietas naturæ humanæ: ergo pro eodem signo, quo natura humana Christi est decreta, & intenta, simul est intenta ejusmodi passibilitas formalis: nam natura non potest intendi, nisi simul intendantur ejus proprietates. R. D. a. est proprietas consequens naturam humanam necessitate methaphysica, & divinitus inimpedibili N. a. necessitate physica, quæ per Deum, si vult supernaturaliter agere, impediri potest C. a. Esto proprietates methaphysice connexæ cum natura humana, simul cum eadem pro eodem signo decernantur, non tamen sic pro eodem signo decernuntur cum eadem etiam proprietates tantum physice connexæ, saltem in casu, quo Deus pro sua libertate & potestate suprema decernit aliquam creaturam simul statuendo, ut ea certa posita conditione suas proprietates connaturales habeat, non posita vero tali conditione eas non habeat.

Objic. 7. Nostrium systema arguit confusionem in scientia & decretis Divinis: atqui omnis confusio repugnat Deo:



Deo : ergo etiam nostrum systema repugnat Deo. A. prob. pro primo signo decreti nostri Deus nec sciret, nec decrevisset Christi adventum determinate in carne passibili, sed tantum indeterminate, vel in carne passibili vel impassibili; atqui tali modo daretur confusio in scientia & decreto Divino : ergo.

R. N. M. Non omnis cognitio vel volitio præcisiva, & indeterminata, simul est confusa, ac imperfecta. Nam confusio & obscuritas inde procedit, quod non cognoscantur omnia, quando & quomodo cognoscibilia sunt : ergo si pro signo primo, quo decernitur caro Christi indifferenter ad passibilitatem, vel impassibilitatem, ibi tantum cognoscitur ut taliter indeterminata, tunc non cognoscitur confuso modo, quia aliter non est cognoscibilis, cum pro illo signo nec fit determinata ad passibilitatem, neque ad impassibilitatem. Pariter non est confusio, vel imperfectio in voluntate Divina, si pro illo signo, quo datur indifferentia ad utrumque, habet disjunctivam volitionem, qua utrumque indeterminate vult, videlicet hoc, si hæc conditio ponatur, alterum, si alia conditio addatur. Nam in illis, in quibus Deus est liber, non est imperfectio, si ea omnino non intendat, vel si intendat hoc vel illo modo, vel ex hoc, aut alio motivo, & quidem (quis enim impediet in hoc Deum) potest primo absolute intendere substantiam alicujus rei ex motivo excellentiæ hujus mysterii, modum vero ejus in carne passibili pro illo signo primo tantum conditionate & indeterminate, si aliqua certa conditio ponatur; in eodem vero signo, in quo purificatur conditio illa, potest ejusmodi modum absolute intendere: hoc enim exigit libertas Dei, quæ aliquibus suis decretis, vel formalitatibus Decreti potest apponere certas condiciones, aliis vero nullam addere conditionem. Sic Dens in lege veteri petebat par turturum, vel duos pullos columbarum, indeterminate quidem, sed tamen non confuse aut imperfecte.

Hinc duplex potest esse præcisiva & indeterminata volitio : una, qua volo aliqua præcisive vel indeterminate, quæ à me non sunt distincte & clare cognita, ut si volo unum ex equis tuis, vel equum tuum id genere, quin prius cognoverim clare,



§. III. De motivo Incarnationis quoad modum spectatæ. 113

clare, quos & quales equos habeas. Altera est, qua peto, unum indeterminate ex tuis tribus equis, quos clare cognovi. Prima volitio repugnat Deo, qui ante omnem volitionem suam habet clarissimam cognitionem omnium rerum possibilium, quas proinde vel determinate, vel indeterminate vel sine, vel cum conditione aliqua decernere potest ad existentiam. Altera vero volitio indeterminata nec imperfecta est, nec repugnat Deo, sed arguit tantum libertatem & indifferentiam in Deo. Hanc doctrinam in materia Decretorum sæpius necessariam quilibet bene imprimat. Videatur quoque Gormaz de incarnatione n. 838.

§. III.

*Motivum Incarnationis quoad modum spectatæ.*

Assero 1. Christus venit in carne passibili ob redemptionem generis humani. Est communis omnium contra Abiadam docentem, quod Christi incarnatio non ad redemptionem, sed solum ad exemplum & doctrinam nobis profuerit.

66

Prob. Matth. 18. venit filius hominis querere, & salvum facere, quod perierat. Et passim SS. PP. sic D. August. L. 10. de peccatorum meritis c. 38. Non fuisset caro Christi in similitudinem carnis peccati, nisi caro fuisset ista peccati: accedit ratio Scoti, quam 3. D. 7. q. 3. §. sed hic duo dat sequentibus verbis: Non venisset Christus, ut Redemptor, neque forte ut passibilis, nisi homo cecidisset: quia non fuit aliqua necessitas, ut illa anima à principio gloriosa unita fuisset corpori passibili, nisi redemptio fuisset facienda.

Assero 2. Christus venit defacto in carne passibili, ut Redemptor reparativus non solum ob peccatum originale, sed & ob personalia, principalius tamen ob originale. Herinx, Henno, & alii.

67

Prob. 1. Joan. 1. dicitur: Sanguis JESU Christi emundat nos ab omni peccato. Ad Tit. 2. dedit semetipsum pro nobis, ut nos redimeret ab omni iniquitate. Et D. Ambros. in P. Kick Theol. Tom. IV.

P

Psal. 36.



*Pfal. 36. bonum aurum est sanguis Christi, profluens ad lavandum omne peccatum: & ratio est: Christus ut passibilis & Redemptor venit, ut nobis aperiret cælum: ergo etiam ut deleteret omnia peccata mortalia; quia omnia cælum clausurant: imo Christus defacto etiam venit propter venialia delenda; quia id indicant Scripturæ dicentes universaliter, quod sanguis Christi nos emundet ab omni peccato, proinde & à venialibus Adde, venialia, licet non privent jure cæli, tamen impediunt ab usu hujus juris, donec deleantur: quia nemo maculatus aliquo veniali potest introire in cælum. Venit autem principaliter in carne passibili ad delendum originale; quia illo captivum tenebatur totum genus humanum, & est velut radix, & fons reliquorum peccatorum personaliter à nobis commissorum, & committendorum.*

68 *Affero 3. Ob solum peccatum originale venisset Christus in carne passibili, etiamsi nullum personale à nobis fuisset committendum.*

*Prob. 1. Stante originali solo adhuc substitisset motivum istius adventus, scilicet redemptio generis humani à captivitate dæmonis per originale incursum. 2. Ecclesia canit: o necessarium Adæ peccatum, quod Christi morte deletum est: ergo peccatum Adæ est motivum principale hujus adventus Christi in carne passibili, & consequenter eo solo stante Christus venisset in carne passibili. Unde Herinx, & Henno cum aliis judicant, quod adventus Christi in carne passibili fuerit absolute decretus post absolutam prævisionem solius peccati originalis; & ante absolutam prævisionem actualium seu personalium peccatorum. Per hoc tamen adhuc explicatur, quomodo Christus etiam sit Redemptor & liberator à peccatis actualibus. Nam dum Deus prævisit solo peccato originali statim decrevit absolute liberare homines per passionem Christi à labe originali, simul conditionate statuit, eosdem per passionem Christi quoque redimere à peccatis actualibus, si aliqua essent commissuri: postquam vero pro signo posteriori absolute prævidit, esse peccata personalia ab hominibus committenda, pro illis etiam absolute ordinavit, & acceptavit passionem filii sui.*

*Affero 4.*



Affero 4. Christus in carne passibili non venisset vi præsentis Decreti propter sola peccata personalia, si Adam per originale non inquinasset genus humanum. Herinx Dupasquier, contra Vivam, Gormaz & alios.

69

Prob. 1. Si sola essent peccata personalia, & actualia, cessaret motivum principale passionis Dominicæ, scilicet peccatum originale, & infectio universalis totius naturæ humanæ: ergo si sola essent peccata actualia, tunc Christi passio non fuisset, nec Christus in carne passibili venisset. 2. Ecclesia in Cantico. *Exultet*, vocat peccatum Adæ necessarium ad Christi mortem, & passionem; atqui si etiam propter sola peccata actualia Christus fuisset passus & mortuus, peccatum Adæ seu originale non fuisset necessarium ad passionem Christi: ergo Christus non fuisset passus & mortuus propter sola peccata actualia. 3. inquinati peccato originali sunt magis venia digni, quam qui propria voluntate peccaverunt: deinde cessante originali peccata actualia forent graviora, utpote non ex infirmitate naturæ per peccatum originale fauciatae provenientia: ergo secluso originali ob sola peccata actualia non videtur credibile, Christum in carne passibili venisse.

Objic. 1. Peccatum actuale est gravius, quam originale: ergo si propter solum originale venisset Christus in carne passibili, tunc à fortiori propter actuale. R. D. a. est gravius intensive; quia magis voluntarium, utpote propria personali voluntate commissum c. a. est gravius extensive, seu etiam inquinans universaliter omnes homines N. a.

Objic. 2. Christus eo affectu quemlibet hominem in particulari redemit, ac si iste homo solus fuisset: ergo si unus vel alter tantum personaliter peccasset, pro isto mortuus fuisset. R. D. a. & hic affectus tamen subordinatus fuit voluntati Divinæ, quæ Christum vi præsentis decreti noluit mori pro solis personalibus peccatis C. a. secus N. a. per hos loquendi modos indicatur simplex affectus Christi, non vis moderni decreti. Dum dicitur, quod singuli tam perfecte redempti sumus, ac si soli fuissemus, nihil obest huic conclusioni: nam







Not. 3. Meritum à quibusdam Theologis ulterius dividi in *impetratorium*, & *compensativum*: *Impetratorium*, remunerandum, seu attractivum est, quod per modum causæ pure moralis, seu *quia est*, vel *quia fuit*, movet ad præmium: sicut victoria obtenta, quia jam est, vel quia fuit, movet principem ad dividenda præmia militibus victoribus: sicque opera supernaturalia in statu gratiæ facta movent Deum, *quia sunt*, ad dandum augmentum gratiæ sanctificantis, & gloriæ. *Meritum compensativum*, vel solutivum juxta suos Authores est illud, quod non movet per modum causæ pure moralis, quia est, sed per modum causæ finalis, ut sit, e. g. si quis anticipato operario solvit mercedem, tunc labor est *meritum compensativum*; nam ad anticipandam mercedem non movet labor, ut jam positus, vel quia est, sed ut promerendus, & ut sit, ut compenset vel solvat mercedem. H. N.

Sequentes Quæstiones proximis Paragraphis tractandæ veniunt. 1. An Christus incarnationem per opera eam præcedentia. 2. vel subsequenter fuerit meritis, vel mereri potuerit. 3. An Christus sibi meruerit scientiam infusam, gratiam sanctificantem visionem Beatificam, gloriam corporis. 4. An Christus, B. V. & PP. antiqui meruerint aliquas circumstantias incarnationis? 5. addetur systema signorum, quæ in decretis Divinis circa hoc mysterium observanda erunt. Sit igitur.

§. I.

*An Christus Incarnationem, & unionem hypostaticam quoad substantiam fuerit meritis, vel mereri potuerit per opera illam præcedentia?*

Affero 1. Nec Christus in concreto, 2. nec natura humana vel anima Christi in abstracto merita est ipsam incarnationem quoad substantiam per opera præcedentia eandem. Communis Theolog. ita, ut contrarium sine gravi nota sustineri nequeat juxta Præpositum ab Herinx allegatum.



Prob. 1. pars. Christus in concreto pro priori ad incarnationem non extitit: ergo tunc non potuit ponere opera meritoria incarnationis.

Prob. 2. memb. si anima vel humanitas Christi per opera præcedentia incarnationem, hanc meritis esset, tunc talia opera unionem hypostaticam præcessissent, vel pro instanti temporis, vel pro signo naturæ: neutrum potest dici: ergo anima vel humanitas Christi per opera præcedentia Incarnationem, hanc non est merita. m. prob. anima vel humanitas Christi nec momento vel instanti uno reali temporis extitit ante unionem hypostaticam & Incarnationem: ergo ante Incarnationem pro instanti reali temporis non potuit operari, & operando mereri.

Neque anima vel humanitas Christi, merita est Incarnationem pro signo priori naturæ, quo præsupponebatur unioni hypostaticæ & Incarnationi: 1. quia communis Theolog. tale meritum præcedens unionem hypostaticam negat. 2. Sacra scriptura refert Incarnationem unice in puram misericordiam & charitatem Dei, non vero in aliquod meritum creatum: ergo anima vel humanitas Christi ipsam Incarnationem quoad substantiam nullatenus est merita. A. prob. Luc. 1. v. 78. dicitur: *per viscera misericordiæ Dei, in quibus visitavit nos.* Ephes. 2. *Deus autem, qui dives est in misericordia, propter nimiam charitatem suam, qua dilexit nos, convificavit nos in Christo.*

Confirm. ex S. August. qui L. 82. in Joan. ait: *Neque illam susceptionem hominis ulla merita præcesserunt, sed ab illa ejus susceptione merita cuncta cæperunt.* Idem L. 2. de peccatorum meritis c. 7. dicit de Christo: *neque ipse, ut ipsa conjunctione unus filius Dei, & unus Filius hominis fieret, præcedentibus voluntatis suæ meritis fecit: plura testimonia hujus S. Doctoris adducit noster Frassen.*

Prob. 2. Principium meriti non cadit sub meritum, sed unio hypostatica est principium & fundamentum omnis meriti in Christo, & in nobis: ergo unio hypostatica non cadit sub meritum, seu illam nemo potest mereri. M. est axioma Theologicum à RR. contra Semipelagianos usurpatum.

Prob. 3.



*Art. III. §. I. An Christus Incarnationem fuerit meritus &c. 119*

Prob. 3. Quamvis forte absolute humanitas Christi priori signo ante unionem hypostaticam potuisset operari, & operando mereri, non tamen congruebat, ut prius operaretur, & operando accidentaliter perficeretur, quam mediante unionem hypostatica ultimum complementum substantiale, & esset persona, ac suppositum, ut jam dictum est prius: ergo priori signo naturæ ad unionem hypostaticam humanitas vel anima Christi non habuit actionem meritoriam.

Objic. 1. Psal. 44. dicitur: *dilexisti iustitiam, & odisti iniquitatem; propterea unxit te Deus oleo lætitiæ*, id est Divinitatis per unionem hypostaticam, ut intelligunt Nazianzenus, Augustinus, Beda, & alii; ergo propter amorem iustitiæ, & odium iniquitatis tanquam meritum natura humana Christi unita est Verbo Divino. R. 1. PP., qui per oleum lætitiæ intelligunt unionem hypostaticam, nolunt per *to propterea* significari causam meritoriam, ut sensus sit: *quia dilexisti iustitiam, ideo unxit, seu univit te Deus Verbo*: sed ita exponunt: ut iustitiam diligeres, unxit te Deus. R. 2. alii PP. ut S. Hieronymus, qui *to propterea* in sensu causali pro causa meritoria accipiunt, per oleum lætitiæ non intelligunt ipsam Incarnationem quoad substantiam, sed aliquas ejus circumstantias, vg. triumphum de hoste, gaudium de victoria, resurrectionem & ascensionem &c. quas circumstantias potuit Christus mereri per opera Incarnationem subsequenter.

Objic. 2. Apocal. 5. dicitur: *dignus est*: (seu meritus est) *agnus accipere Divinitatem*: ergo. R. D. a. id est manifestationem Divinitatis, quæ ante adhuc multum occulta erat c. a. ipsam acceptionem & unionem ad Divinitatem N. a. manifestationem Divinitatis suæ Christus meritus est per opera subsequenter Incarnationem.

Objic. 3. S. Basilius de humana Christi generatione ait: humanitas Christi digna fuit conjungi Verbo: ergo unionem hypostaticam præcesserunt merita, per quæ humanitas Christi ad talem unionem fuit dignificata. R. D. a. digna fuit dignitate meriti, vel dispositionis supernaturalis præcedentis N. a. dignitate capacitatis C. a.

Objic. 4.



Objic. 4. Gloriosius fuisset Christo mereri unionem hypostaticam; atqui quod gloriosius est, debet Christo tribui: ergo debet ei tribui, quod meritus sit unionem hypostaticam. R. D. M. hoc tamen non fuisset possibile sine aliquo inconveniente C. M. secus N. M. quod gloriosius est, debet quidem Christo tribui, si cæteroquin nullum inconveniens inde sequatur. Inconveniens tamen sequeretur ex tali merito 1. quia Deus non amplius ostendisset misericordiam suam in Incarnatione, in qua tamen voluit illam, unice ostendere. 2. Quia inverteretur aliquid ordo, si natura prius operaretur, antequam personaretur. 3. Christo tantum debet tribui, quod gloriosius est, si id possit fieri salva autoritate scripturæ & PP. atqui PP. & scriptura nos docent, unionem hypostaticam non cadere sub meritum: ergo.

73

Afferro. 2. Neque de absoluta potentia Dei Christus aut humanitas Christi potuisset de condigno mereri Incarnationem quoad substantiam per opera præcedentia pro signo naturæ unionem hypostaticam. Herinx disput. I. de Incarnat. n. 83. estque recepta alias apud Th. doctrina contra aliquos Scot.

Prob. opera præcedentia unionem hypostaticam, & consequenter non dignificata ab unionem hypostaticam, & dignitate Verbi non videntur esse æqualia dono Incarnationis; sed meritum condignum debet esse æquale præmio: ergo per talia opera non potuisset humanitas Christi etiam de absoluta potentia Dei mereri de condigno unionem hypostaticam & Incarnationem.

Neque Dicas: opera bona de se inæqualia præmio posse reddi æqualia per acceptationem & promissionem Dei. Nam hoc jam refutatum est in Tract. de merito.

74

Afferro 3. De potentia Dei absoluta potuisset humanitas Christi mereri de congruo Incarnationem pro priori signo naturæ, quam uniretur Verbo, saltem si meritum de congruo in sensu largiori sumatur. Ita videntur quoad rem plures Scottiæ contra Thomist. qui cum negent humanitatem in illo priori, quam



quam uniretur Verbo, habuisse existentiam, ita quoque negant, illam potuisse operari, adeoque mereri.

Prob. 1. Si de potentia Dei absoluta non potuisset natura humana pro priori signo naturæ ante Incarnationem mereri de congruo unionem hypostaticam, tunc implicantia inde oriretur, quia vel nulla omnino operatio humanitatis, vel certe nulla operatio meritoria potuisset pro priori naturæ Incarnationem tanquam mercedem suam præcedere, vel quia Incarnatio nullo modo posset cadere sub meritum: sed ex nullo capite oritur implicantia: ergo.

Prob. 1. memb. m. De absoluta Dei potentia natura aliqua potest agere pro priori signo ante personalitatem propriam vel alienam; tum; quia personalitas non est principium & virtus, sed tantum modus agendi, quem utique Deus supplere potest; tum; quia accidentia Eucharistica sine subiecto existentia habent competentes sibi actiones, quas in nostris sensibus producant; ergo etiam natura ut præscindens à personalitate, & pro priori ad personalitatem potest de absoluta Dei potentia habere aliquas operationes: nam non videtur magis requiri ad operationem naturæ humanæ suppositivitas, quam ad operationem accidentis subiectum. Tum, quia natura pro priori ad suppositivitatem habet existentiam, & potentiam operandi. Ex quibus omnibus sequitur, quamvis suppositivitas connaturaliter tanquam complementum ultimum substantiale exigat præcedere operationem naturæ, tamen de absoluta potentia Dei, quæ exigentiis rerum naturalium non ligatur, posse operationem naturæ esse priorem personalitate.

Prob. etiam 2. memb. m. quod etiam operatio ut meritoria Incarnationis possit præcedere pro signo tantum naturæ Incarnationem. Nam ad meritum non requiritur, ut illud existat pro priori aliquo instanti vel duratione temporis, sed possunt meritum & præmium dari simul in uno instanti temporis, dummodo meritum pro signo naturæ præsupponatur suo præmio: sic ipsi Thomistæ, & multi Scotistæ cum ipsis dicunt: Angelos in primo instanti reali suæ creationis accepisse gratiam.



tiam sanctificantem, hancque tamen pro priori signo naturæ de congruo meruisse: idem probabiliter asseritur de primo homine Adamo, & in eodam instanti reali, quo ponitur actus meritorius de condigno, datur augmentum gratiæ sanctificantis tanquam merces.

Prob. etiam 3. membr. quod neque sit implicantia ex eo capite, quo defenditur, quod Incarnatio nullo modo possit cadere sub meritum. Nam, quod Incarnatio in moderna providentia non possit cadere sub meritum, est ratio unica fundamentalis; quia Incarnatio in moderna providentia est principium omnis meriti; sed hæc ratio non amplius pugnat, si loquamur de absoluta potentia Dei. Etenim Deus agens ut absolutus Dominus posset humanitati pro primo signo naturæ, antequam uniretur hypostatice, concedere gratias actuales, & habituales ex sola sua infinita misericordia, & independentem ab unione hypostatica, & meritis Christi, & per hanc gratiam posset humanitas Christi meritorie operari, in quo casu haberet meritum, cujus principium non esset unio hypostatica, vel Incarnatio; quia principium hujus meriti esset sola misericordia Dei, & gratia misericorditer concessa independentem ab Incarnatione, & absque intuitu ad alia præcedentia merita Christi, quæ Deum movissent ad collationem ejusdem: ergo in tali casu quidem caderet sub meritum Incarnatio, sed non esset principium illius meriti, sub quod caderet.

Dixi in conclusione 1. Quod humanitas Christi pro priori signo naturæ ante Incarnationem potuerit hanc mereri de congruo, saltem si meritum congruum latius accipiatur. Nam natura humana præcedens unionem hypostaticam non potest Incarnationem mereri de condigno, ut in conclusione secunda est dictum: imo juxta P. Antonium Mayr neque humanitas pro tali signo per opera præcedentia potest mereri unionem hypostaticam merito de congruo in sensu strictiori vel strictissimo: in sensu enim strictissimo meritum de congruo debet habere aliquam proportionem ad præmium, & illud imperfecte exigere; atqui nullum opus præcedens Incarnationem, & consequenter non dignificatum per unionem hypostaticam



staticam & personam Divinam videtur habere proportionem ad præmium Incarnationis, neque videtur exigere illam tantquam præmium etiam exigentia tantum imperfecta. Verum hoc non obstante saltem in sensu latiori talia opera præcedentia Incarnationem, & in maximo fervore charitatis elicitæ, ac dignificata per gratiam habitualement, independentem ab unionem hypostaticam, & pro priori signo collata possent esse talia, ut Deus intuitu illorum accedente misericordia ac liberalitate toti humanitati uniret Verbum, & sic ejusmodi opera mererentur aliquantulum ac minus stricte de congruo Incarnationem, maxime, quia exigentia præmii, quam dicit meritum de congruo, fundatur potiori ex parte in liberalitate præmiantis, & minus principaliter in opere meritorio, & hujus præstantia, & sufficit, dum non omnino mere aliquid gratis, & ex mera liberalitate & misericordia concedatur, sed aliquis respectus saltem minus principaliter ad opus tale habeatur, & intuitu illius quoque conferat præmium, quod etiam in nostro casu fieret.

Objic. 1. Actiones sunt suppositorum, atqui pro priori ad unionem hypostaticam natura humana non est supposita: ergo pro illo priori nec agere, consequenter nec mereri potest. 75

R. 1. Apud Aristot. 1. metaphys. c. 1. unde illud axioma desumitur, textus græcus habet: *actiones sunt singulorum*; atqui natura humana pro priori signo ante assumptionem à Verbo erat singularis: ergo jam poterat tunc agere, saltem de potentia Dei absoluta. R. 2. hoc axioma tantum intelligendum esse de lege ordinaria, non de potentia Dei absoluta.

Dices: Joannes Theologus in Concil. florent. sess. 18. dicit, quod essentia Divina non generet, sed Pater; quia actiones sunt suppositorum: ergo illud axioma etiam intelligendum est de possibili, & potentia Dei absoluta. R. 1. illa disputatio Joannis Theologi, & Græcorum non est aliquis articulus fidei, nec decisio Concilii, cum in illo Concilio nihil auctoritate Divina definitum habeat, quam litteræ unionis & decretum Armenorum. Fuit igitur tantum assertio Doctoris cujusdam, & quidem Thomistæ ac Dominicani, qui conformiter



ter suis principiis loquebatur, quæ tamen assertio non est approbata à Concilio, sicut nec cæteræ disputationes DD. ibi habitæ. R. 2. D. a. in Divinis processibus c. a. in creatis N. a. in Divinis processibus habet locum hoc principium; quia suppositum Patris, non vero natura Divina realiter distinguitur à filio producto, & sic actio generativa filii est suppositi Patris, non naturæ Divinæ; quia inter producentem, & productum debet dari distinctio realis.

Objic. 2. Prius est esse quam operari; ergo prius est esse naturam humanam suppositatam, quam eam operari, & mereri. R. D. a. prius est esse quoad existentiam & potentiam operandi, quam operari C. a. quoad modum operandi, qualis est personalitas N. a.

Objic. 3. Nullum opus creatum, quod non dignificatur per unionem hypostaticam potest exigere etiam tantum imperfecte unionem hypostaticam: ergo neque potest illam de congruo mereri; quia etiam ad meritum de congruo requiritur, ut saltem imperfecte exigat præmium. A. prob. nullum opus creatum non dignificatum per unionem hypostaticam habet proportionem aliquam ad Incarnationem, & unionem hypostaticam: ergo hanc neque imperfecte potest exigere: quia hæc exigentia meriti de congruo fundatur in proportionem operis ad præmium.

R. D. a. nullum opus creatum solum & præscindendo etiam à liberalitate præmiantis C. a. secus N. a. exigentia meriti de congruo & proportio ipsius ad præmium non fundatur, nec consistit in sola præstantia operis, sed præcipue in liberalitate præmiantis: ergo licet opus tale secundum se nullam dicat proportionem, & nec imperfectam exigentiam Incarnationis, tamen prout dicit ordinem ad infinitam misericordiam Dei, & liberalitatem ejus, potest exigere imperfecte, ac minus stricte Incarnationem, vel saltem decens esset, ut Deus liberalissimus propter talia opera concederet unionem hypostaticam, præsertim si ea essent facta ex intentione obtinendi hanc unionem: quod sufficit ad meritum de congruo, maxime in sensu latiori sumptum.



*An Christus per opera subsequencia Incarnationem, fuerit eandem meritis, vel saltem mereri potuerit.*

ASSERO. Christus per opera Incarnationem subsequencia, & ab ea in ratione meriti dependentia non est meritis Incarnationem, imo nec potuit mereri. Est communis contra Haunoldum, & aliquos alios RR. Scotus ex professo nihil de hac re habet; videtur tamen colligi ex 2. D. 5. q. 1. ubi tenet; Angelos non potuisse Beatitudinem mereri per opera eam subsequencia.

76

Prob. i. Si Christus fuisset meritis Incarnationem per opera eam subsequencia, & ab ea dependentia, tunc ejus meritis fuisset compensativum, ac causans in ratione causæ finalis; atqui meritis Christi non fuit compensativum aut causans in ratione causæ finalis, nam tale meritis compensativum non datur: ergo Christus non est meritis per opera subsequencia &c. M. est adversariorum. m. prob. sacra Scriptura & Concilia non agnoverunt aliud meritis, quam remunerandum & impetratorium, non vero compensativum: ergo meritis compensativum non est proprie dictum meritis. A. prob. sacra Scriptura præmium vocat passim *retributionem* meritorum: ut Psal. 118. Concil. trident. causam meritoriam optime distinguit à causâ finali: nam Sess. 6. l. 7. pro causâ finali nostræ justificationis assignat gloriam Dei, & vitam æternam, pro causâ vero meritoria ejusdem justificationis passionem & merita Christi. Nec SS. PP. aliud meritis agnoscunt, quam impetratorium, & inde negant, primam gratiam posse cadere sub meritis. S. Thomas q. 29. de veritate (quæ est de gratia Christi) art. 6. ait: *meritis est causa præmii, non quidem per modum finalis causæ; sic enim magis præmium est causa meriti.* Et addit ibi: quod autem in humanis aliquis pro accepto beneficio Domino suo servit, magis habet rationem gratiarum actionis, quam meriti. Et P. Gormaz de meritis n. 29. dicit, qui propter acceptam



anticipato pecuniam laborat, ut debitum expungat, non dicitur mereri, sed solvere & compensare. Demum teste Antonio Mayr de Incarnatione: antiqui Theologi omnes ad meritum exigunt æqualiter, ut sit obsequium, & ut sit causa moralis causans quia est: ergo sicut juxta hos antiquos Theologos ratio obsequii est de essentia meriti, ita quoque ei essentialis est, ut non causet per modum causæ finalis, sed moralis explicatæ. Ergo à primo ad ultimum, cum sacra Scriptura, Concilia, PP. & Theologi sub ratione meriti intelligant tantum impetratorium, non vero compensativum, neque nos debemus aut possumus aliquid aliud intelligere: nam ejusmodi significationes non possunt pro libitu fingi, sed quoad illas debemus stare autoritate tam Scripturæ quam Patrum & Theolog. præsertim antiquorum: per autoritatem enim quæstiones de nomine, & significationes decidi solummodo possunt & debent: qualis quæstio est etiam præsens, qua fere unice quæritur, quid nomen meriti proprie importet, an dicat causam mere moralem causantem *quia est*, vel an significet etiam causam finalem, causantem *ut sit*; consequenter an sit impetratorium vel compensativum.

Neque Dicas, nostra merita solum non posse esse compensativa. Contra est 1. nec merita Christi possunt esse compensativa: ergo nulla responsio. A. prob. merita Christi fuere vera & proprie dicta merita: ergo habuerunt essentiam meriti, ad quam requiritur, ut sit impetratorium, non compensativum, ut patet ex dictis. A. etiam constat; quia dum Patres scholastici & Concilia loquantur de meritis Christi, loquuntur de vere & proprie dictis meritis.

Contra est 2. Sacra scriptura, Concilia, PP. &c. tantum tribuunt Christo meritum tale, quod est à sacra Scriptura & PP. agnitum; sed non est aliud agnitum, quam impetratorium: ergo hoc tantum & non aliud Christo tribuunt. Atque adeo per opera ejusmodi subsequencia Christus solvisset potius, vel gratus fuisset pro accepta Incarnatione, quam meritis fuisset, ut loquitur D. Thomas cum aliis.



Prob. 2. Principium meriti non potest cadere sub meritum; sed Incarnatio Verbi Divini est principium meritorum Christi; ergo non potest cadere sub meritum. M. est axioma inconcussū PP. & Theolog. contra Semipelagianos, ob quod contra hos constanter asserunt primam gratiam, eo quod sit principium meriti in homine, non posse cadere sub meritum. m. est certa: quia ab Incarnatione merita Christi dignificantur in ratione meriti, & valorem suum accipiunt.

Prob. 3. Meritum & præmium debent necessario esse distincta; atqui juxta Advers. non distinguerentur, sed identificarentur meritum & præmium: erga Advers. sententia non subsistit. M. est certa; nam qui habet præmium, debet esse ditior, quam qui habet solum meritum; sed si meritum & præmium non distinguuntur realiter, tunc qui habet meritum & præmium simul, non esset ditior, quam habens solum meritum; quia meritum est ipsum præmium. Prob. etiam m. primi sylogismi: juxta RR., inter quos sunt Adversarii nostræ conclusionis, & plures alios, merita Christi principaliter important Incarnationem Verbi, vel Verbum Incarnatum tanquam constitutivum formale dignificans actiones meritorias, & hoc ipsum Verbum Incarnatum, vel Incarnatio Verbi esset simul præmium, quia caderet sub meritum in adversariorum sententia: ergo juxta hos non distinguerentur realiter meritum & præmium. Hæc ratio etiam stringit in sententia illorum, qui dicunt, Verbum non constituere formaliter merita Christi. Nam in omni sententia præmiatus debet plus habere, quam solum habens meritum; sed etiam in hac sententia non haberet plus præmiatus, quam habens solum meritum: ergo. m. prob. præmiatus haberet etiam solum meritum, & principia ad illud concurrentia; atqui hæc jam habet quoque ille, qui solum habet meritum, ut patet; quia meritum istud sine se & suis principiis esse nequit: ergo. M. prob. Christus ut præmiatus haberet pro præmio unionem hypostaticam, quæ est aliquod principium necessarium & essentiale meriti Christi; atqui hanc ipsam unionem hypostaticam jam haberet Christus, ut ponens actionem meritoriam: & pro priori ad præmium: ergo Christus ut præmiatus haberet solum meritum, & principium



cipium concurrens ad meritum, proinde ut præmiatus non haberet plus quam ut ponens meritum.

Prob. 4. Merita Christi, de quibus hic loquimur, prævidentur à Deo vel ante, vel post Incarnationem efficaciter decretam? Non ante Incarnationem efficaciter decretam; quia Incarnatio, ut existens, & consequenter efficaciter decreta, est principium horum meritorum, utpote quæ ab Incarnatione essentialiter etiam juxta Adversarios dependent: ergo Incarnatio debet esse prius decreta, quam possint videri merita, quia prius debet esse principium, quam effectus principii.

Neque potest dici secundum. Si enim merita Christi primum videntur, & decernuntur post Incarnationem iam efficaciter decretam, & determinatam, tunc non influunt in Incarnationem, nec movent ad eam decernendam; quia jam ante illa, & absque respectu ad illa Incarnatio supponitur esse decreta.

Dices 1. Cum Suarez. Incarnatio ut intenta, seu in intentione & prævisione præcessit Incarnationem in executione, & consequenter Incarnatio ut intenta fuit principium, in executione vero ipsum præmium meritorium Christi.

Contra est 1. Unio hypostatica est principium meritorum Christi, prout est in executione: ergo. A. prob. unio enim hypostatica non dignificat ulla merita Christi, nisi quatenus executioni mandata: ergo est principium meritorum Christi, prout est in executione, neque movet Deum ad aliquod præmium dandum, nisi quatenus prævidetur ejus executio, ut certoposita in tempore, ac executive dignificans merita Christi.

Neque obstat, quod merita Christi ut prævisa consequenter etiam unio hypostatica ut prævisa Deum moverit ad decernendas nobis, & progenitoribus Christi gratias. Nam licet unio hypostatica & merita Christi mere prævisa moverint Deum ad dandas & decernendas gratias, tamen non moverunt aliter nisi prævisa, ut re ipsa ac executive à parte rei existura. Nam.

Contra



*§. II. An Christus per opera subsequētia fuerit meritis &c.* 129

Contra est 2. Tali modo etiam prima Gratia posset cadere sub meritum, & esse præmium, quatenus est in executione, & esse principium meriti, quatenus est in intentione & prævisione Dei; sequela negatur à PP. & omnibus Theologis: ergo & id unde sequitur. M. patet à pari.

Contra est 3. Tali modo omnia merita iusti posset compensari per se ipsa; posset esse enim merita, prout sunt à Deo intenta, & prævisa, & posset quoque esse præmium, prout sunt executioni mandata; sequela est absurda: ergo &c.

Dices 2. Saltem efficaciter & absolute decretam Incarnationem præcedit scientia conditionata operum & meritorum Christi, quæ fierent, si unio hypostatica adesset.

Contra est: Prævisio conditionata non sufficit, ut opera sic prævisa habeant rationem meriti, prout contra Semipelagianos certum est: alias enim ille peccator, qui conditionate prævisus est acturus pænitentiam, si diutius viveret, propter hanc solam conditionatam prævisionem mereretur remissionem peccatorum, nec posset damnari, si statim moriatur post peccatum grave ante absolute peractam pænitentiam &c. ergo.

Objic. 1. Juxta illos, qui dicunt, prædestinationem esse factam ante prævisa merita, gloria æterna intenta, & prævisa est principium meritorum respectu prædestinatorum, & executioni mandata est præmium meritorum: ergo à pari Incarnatio ut intenta, & prævisa potest esse principium meritorum Christi, & ut executioni mandata potest esse præmium eorundem meritorum. A. patet: quia in hac sententia Deus pro primo signo tanquam finem intendit gloriam æternam, & propter hanc assequendam ordinat in actu secundo gratias, ac merita, & tandem propter merita ista prævisa in executione confert gloriam æternam tanquam mercedem & præmium. 77

R. 1. Retorq. argument. ergo etiam gratia prima, prout prævisa, potest esse principium meriti, & ut executioni mandata potest esse præmium.



R. 2. N. C. & parit. gloria æterna est tantum causa finalis meritorum, & sui ipsius; ad causam autem finalem, dum causat, non requiritur ejus physica existentia, vel absoluta prævia prævisio physicae existentiae, nam finis non causat, *quia est*, sed *ut sit*. Ast unio hypostatica non dignificat ad merita Christi aliter, quam *quia est*, vel quia pro priori signo ad merita absolute prævidetur esse; ideo enim merita Christi tam eminentem habent valorem, quia procedunt à natura actu unita Verbo, & non primum unienda, vel indifferente ad unionem hypostaticam. 2. Non convenit meritis causare præmium per modum causae finalis, ut patet ex prima probatione. 3. Gloria æterna respectu prædestinatorum non est principium formale constitutivum meriti; per consequens adhuc satis distinguitur meritum à præmio; sed in Advers. sententia Incarnatio ac Verbum Divinum est principium formale constitutivum, & dignificativum meriti: quo pacto non amplius præmium distinguitur à merito.

Dices. Finis potest causare medium, & à medio recausari: ergo etiam Incarnatio in intentione potest causare merita Christi, & ab his recausari.

R. 1. Retorq. sicut prius, ergo etiam gratia prima prout in intentione potest causare merita, & ab his recausari.

R. 2. N. c. & parit. ut jam dixi, finis movet, *ut sit*, meritum *quia est*: vel aliter, meritum ex sua natura non movet, ut ponatur ipsum, vel aliquod medium ad ipsum, sed ut ponatur aliquid aliud, scilicet præmium ob existentiam meriti, & taliter, qui meretur, locupletior fiat, quod alias non fieret. Certe in Advers. sententia non plus acciperet ille, qui haberet simul meritum & præmium, quam ille, qui habet solum meritum: nam uterque haberet meritum, & principia ad illud requisita; sed hoc est contra naturam præmii, quia habens præmium debet esse ditior, quam ille, qui habet solum meritum.

Objic. 2. Si Rex anticipato dat arma militi in præmium victoriae per illa obtinendae, arma tanquam principium meriti, seu



§.II. *An Christus per opera subsequentiā Incarnationē mer.* 131

seu victoriæ cadunt sub meritum : ergo etiam Deus anticipato potuit humanitati Christi concedere unionem hypostaticam in præmium meritorum per illam unionem obtinendorum.

R. 1. Retorq. argument. ergo etiam Deus potuit anticipato gratiam primam concedere in præmium meritorum per illam obtinendorum.

R. 2. N. a. si illud intelligatur de absoluta, & non conditionata donatione armorum ; nam arma ejusmodi tunc non dantur ob victoriam tanquam meritum, sed tanquam finis, ut miles victoriam obtineat. Quare, si taliter Rex absolute donavit arma, miles eorum manet Dominus, etiamsi victoria non sequatur : ergo hæc concessio armorum non habet rationem præmii, quod absolute requirit, & supponit meritum, quale tamen in proposito casu non adesset, cum victoria non sequeretur. Si vero dicas, ejusmodi anticipatam largitionem armorum esse tantum imperfectam, & sub conditione, si miles iisdem vincat hostem, tunc potuit miles tali victoria & usu armorum mereri absolutum & perfectum Dominium, quod prius anticipato non acceperat : ast unio hypostatica non sic conditionate concessa fuit, sed debuit absolute unire humanitatem Christi ad dignificanda ejus merita, & ad hoc, ut merita humanitatis ab unione tanquam principio dignificato potuerint dependere : ergo absoluta unionis hypostaticæ concessio pro illo instanti, quo erat principium meriti, non potuit cadere sub meritum, quia hæc concessio absolute facta jam præcessit omnia merita Christi.

R. etiam 3. Est etiam disparitas alia ; quia valor & meritum hujus militis non derivatur ab armis, sed à virtute & arte tractandi arma ; ast valor meritorum Christi dependeret ab unione hypostatica tanquam à principio formali dignificativo.

Objic. 3. In contractibus sufficit, siue hic siue alter ponat prius suam actionem, siue emptor det prius pretium, siue venditor mercem : ergo etiam sufficit, siue præmiator det prius præmium, siue merens ponat prius meritum. R. 1. retorq.

R 2

argu-



argument. ergo etiam taliter posset Deus prius dare gratiam primam tanquam præmium, & postea primum sequi meritum ab eadem gratia tanquam principio. R. N. c. & parit. casus in antecedente positus ideo gratis admittitur, quia in eo una actio non est necessaria ad alteram via; sed merita sunt necessario via ad præmium, & ideo præmium saltem tanquam principium non potest præcedere merita.

Objic. 4. Saltem Christus de potentia absoluta potuisset dicto modo mereri suam Incarnationem: ergo. R. N. a. quia etiam de potentia absoluta debet præmium distingui à merito, vel saltem præmiatus qua talis plus habere, quam habens solum meritum. Et principium meriti non potest cadere sub merito, & meritum non potest movere ad præmium ut causa finalis, sed ut præcise moralis, quæ ad efficientem reducitur.

## §. III.

*An non Christus meritus fuerit, vel mereri  
potuerit continuationem & extensionem  
unionis hypostaticæ, & aliquas ejus  
quasi proprietates?*

78 ASSERO 1. Christus non est meritus 2. de potentia tamen absoluta potuisset mereri continuationem unionis hypostaticæ. Deducitur ex Scoto 3. D. 18. q. unica §. *hoc viso*. verba allegabuntur conclusionem sequenti. Estque Communis contra P. Viva & alios.

Prob. 1. memb. 1. Illa, quæ sunt connaturalia unioni hypostaticæ, non debuit Christus specialiter promereri: sed continuatio & perpetuitas unioni hypostaticæ est connaturalis, ergo Christus non debuit eam specialiter promereri. m. constat. nam unio hypostatica est connaturaliter incorruptibilis, & exigit perpetuo durare, neque habet ullam causam naturaliter sui destructivam, sicut anima rationalis. M. prob. illa, quæ tanquam proprietates, vel passionis connaturaliter sequuntur unionem



§. III. *An Christus meruerit continuationem unionis hypost.* 133

unionem hypostaticam, debent censerī eo modo esse collata, quo primitus est collata unio hypostatica, id est, gratis ac sine merito, nisi aliud constet ex autoritate, sicut in hoc puncto nihil constat.

Confirm. Gloriosius est Christo habere connaturaliter, & quasi ex debito & exigentia connaturali continuationem sui esse, & unionis hypostaticæ, quam tantum ex merito; sed id, quod gloriosius est, debet semper de Christo asseri, ut Communis habet Th. Th. cum Scoto, dummodo nihil obstet, sicut nihil hic obstat: ergo debet asseri de Christo, quod continuationem unionis hypostaticæ habeat connaturaliter, vel ex exigentia connaturali, & non ex merito.

Prob. jam. 2. memb. conclus. Deus de absoluta potentia potuisset unionem hypostaticam primo instanti concessam statim altero instanti destruere: ergo etiam potuisset de absoluta potentia tantum velle eam continuare, si Christus in primo instanti habitæ unionis hypostaticæ per certa opera præstita hanc continuationem meruisset.

Objic. 1. contra 1. partem. Christus juxta dicenda meritus est gloriam sui corporis, quamvis ea fuerit quodammodo connaturalis Christo: ergo etiam Christus meritus est continuationem suæ unionis hypostaticæ, quamvis ea fuerit connaturalis unioni hypostaticæ.

R. N. C. Deus enim ex speciali causa inferius indicanda impedivit supernaturaliter gloriam corporis: ergo bene Christus eam potuit mereri: sed non habemus ullam rationem vel autoritatem, quod sic supernaturaliter, & miraculose voluerit impedire continuationem unionis hypostaticæ: ergo ea connaturaliter secuta fuit, & sic Christus eam non debuit promereri.

Objic. 2. contra secundam partem conclusionis. Christus neque de absoluta potentia potuit mereri ipsam Incarnationem, & unionem hypostaticam primo instanti factam,



per opera eam subsequencia, ut §. priore vidimus: ergo neque continuationem hujus unionis. R. N. C. & parit nam si Christus meritis fuisset continuationem unionis hypostaticæ, tunc principium meriti non fuisset simul præmium: etenim principium meriti fuisset unio hypostatica, & præmium fuisset conservatio vel non destructio unionis hypostaticæ.

79

Ex his deduces 1. Quod Christus probabilius non sit meritis extensionem unionis hypostaticæ ad novas partes in humanitate sua acquisitas per augmentationem, & nutritionem. Ratio est: quia & hæc extensio est connaturalis unioni hypostaticæ, quæ exigit unire Verbo totam & integram naturam humanam cum omnibus suis partibus, consequenter etiam cum partibus per nutritionem & augmentationem acquisitis: sicut & unio physica animæ ad partes corporis de novo per nutritionem est connaturalis, & connaturaliter sequitur.

Deduces 2. Christum tamen meruisse replicationes unionis hypostaticæ in Eucharistia, & præsentias ejus sacramentales. Herinx. Disput. 1. de Incarnat. q. 8. n. 81. Ratio est: quia Christus meritis est potestatem instituendi sacramentum Eucharistiæ, in quo ejusmodi præsentie sacramentales, & replicationes unionis hypostaticæ involvuntur.

80

Affero 2. Christus non meruit sibi scientiam infusam, gratiam sanctificantem, aut gloriam animæ suæ, seu visionem beatificam & fruitionem, nec lumen gloriæ, aut alios habitus infusos. Scot. 3. D. 18. q. un. §. *hoc viso* dicens: *igitur Deus liberaliter sine merito aliquo præcedente conjunxit voluntatem istam per fruitionem ultimo fini, & ita non meruit sibi fruitionem.* Est Communis aliorum contra aliquos antiquos,

Prob. 1. Sacra Scriptura tribuit gratiam & gloriam essentialem non meritis Christi, sed potius dignitati filii Dei. quam Christus habebat vi unionis hypostaticæ: ergo Christus vi unionis hypostaticæ habuit connaturaliter, & non ex merito prædicta dona. A. prob. Joannis 1. dicitur de Christo: *vidimus gloriam ejus, gloriam quasi Unigeniti à Patre, plenum gratia*



gratiae & veritatis. In quæ verba S. Chrysost. vidimus gloriam, qualem decebat, & conveniens est habere Unigenitum, & naturalem filium: ergo in dignitate filii, & non ex merito habuit Christus gloriam essentialem animæ: idem est; de reliquis in conclusione dictis donis.

Prob. 2. Ratio dictat, quod in Christo propter dignitatem Verbi fuerit summa convenientia, ut statim humanitati absque merito & intuitu folius Verbi, cui unitur, conferantur maxima scientia & gratia, ac beatitudo animæ: ergo eam etiam sic contulisse censendus est Deus, utpote qui semper supponendus agere modo magis connaturali, & magis convenienti; nisi constet de contrario: de quo tamen hic non constat.

Prob. 3. De Christo debet asseri, quod est gloriosius, nisi aliunde jam contrarium constet; sed Christo gloriosius est esse connaturaliter, quam tantum ex merito, sapientissimum, sanctissimum, beatum &c. & aliunde non constat contrarium: ergo hoc de Christo debet asseri.

Objic. 1. Christus est meritis suam gloriam per passionem: ergo gloriam habuit ex merito. A. prob. Lucæ ult. dicitur: *nonne oportuit hæc pati Christum, & ita intrare in gloriam suam.* & D. Anselmus in Cap. 2. ad Hebr. dicit *JESUM propter passionem gloria & honore coronatum secundum animam & corpus.*

R. D. a. gloriam essentialem consistentem in visione & beatitudine N. a. gloriam accidentalem corporis & animæ consistentem in impassibilitate cum exclusione tristitiæ C. a. Ne ergo credas per gloriam animæ à D. Anselmo intelligi gloriam essentialem: debes scire, quod etiam in anima detur gloria accidentalis, consistens in exclusione tristitiæ, & passibilitatis, quæ gloria accidentalis animæ, uti & corporis ob redemptionem nostram peragendam fuit in Christo supernaturaliter impedita, adeoque talem gloriam potuit Christus postea mereri, non vero essentialem, quæ nunquam fuit impedita à Deo.

Objic. 2. Gloriosius est esse beatum simul connaturaliter & ex merito: ergo debet dici, quod Christus habuerit beatitudinem



itudinem simul ex duplici titulo, nimirum, ut connaturalem vi unionis, & simul ex merito. R. N. a. Nam Deo gloriosius est, quod sit solum beatus ex natura, quam quod sit etiam ex merito. Sic igitur etiam Christo erit gloriosius, quod ipsius humanitas quasi naturaliter, & vi unionis cum Deo, sit sancta, sapiens, beata, & omnes perfectiones solum possideat tanquam proprietates connaturales, quæ non cadunt sub meritum. Unde antecedens in objectione positum tantum verum erit de pura creatura, non vero de creatura, quæ simul per unionem hypostaticam est Deus, saltem si velimus universaliter loqui.

81

Assero 3. De potentia tamen absoluta potuisset Christus mereri omnia in priori conclusione specificata. Ita Communis. Ratio est. Quia de absoluta potentia potuisset Deus humanitati Christi non concedere ista dona in primo instanti, & simul nolle pro posteriore aliquo instanti largiri, nisi præcederent certi actus meritorii: ergo in tali casu non absolute impossibili potuisset Christus mereri hæc dona supernaturalia.

Confirm. Quamvis gloria accidentalis esset debita Christo vi unionis hypostaticæ, tamen, ut audivimus, & iterum dicetur, eam meritus est Christus per passionem suam, eo quod supernaturaliter Deus talem gloriam ab initio Incarnationis non concefferit humanitati Christi: ergo idem asseri potest de gloria essentiali, si eam Deus ab initio Incarnationis de potentia sua absoluta non statim concederet. Imo in primo instanti reali Incarnationis potuisset Deus nolle concedere hæc dona supernaturalia, nisi pro priori signo naturæ præcessissent aliqua merita: ergo etiam in tali casu Christus mereri potuisset. A. constat: nam unio hypostatica non dicit exigentiam metaphysicam, vel strictissimam horum donorum, ita, ut Deus debeat necessario vi illius, & non aliter, vel ex alio titulo conferre; cum Deus de absoluta sua potentia stante unione hypostatica posset illa dona omnino denegare humanitati Christi: ergo à fortiori posset ea ex titulo alio, nempe ob merita Christi conferre. Neque obest Scotus, qui tantum negat de potentia ordinaria, non vero extraordinaria Christum potuisse mere-



§. III. An Christus fuerit meritis continuationem unionis 137

ri gratiam sanctificantem, ac gloriam. Patet ex verbis, quæ cit. loco in conclusione secunda addit, ubi ait: *ad unionem istam (hypostaticam) concomitanter sequitur gratia fruitionis defacto. Ideo fuit summa gratia sine meritis præcedentibus.* Nota, quod Scotus dicat: *defacto*: adeoque de possibili agnoscit, Christum posse mereri fruitionem, & cætera dona supernaturalia.

Affero 4. Christus tantum meritis est gloriam corporis & animæ accidentalem. Communis ac certa contra Calvinum & alios hæreticos. 82

Prob. 1. Luc. 24. dicitur: *nonne oportuit hæc pati Christum, & ita intrare in gloriam suam.* Hebræ. 2. *vidimus Jesum propter passionem mortis gloria & honore coronatum.* Ad Phil. 2. *humiliavit semetipsum, factus obediens, propter quod & Deus exaltavit illum: ergo.*

Prob. 2. Quamvis gloria accidentalis debeatur Christo vi unionis hypostaticæ; tamen quia venit satisfactorius pro nostris delictis, conveniens fuit, ut aliqua portio, nempe inferior ejus humanitatis subjaceret pænalitibus, & gloria corporis suspenderetur: ergo potuit Christus postea mereri ablationem istius suspensionis, & taliter indirecte gloriam corporis, quatenus meruit remotione miraculi impediens gloriam corporis, & accidentalem animæ. vide P. Herinx n. 54. & Scot. 3. D. 18. q. un.

Objic. 1. Anima habuit beatitudinem essentialem propter unionem hypostaticam sine merito: ergo & corpus habuit suam beatitudinem sine merito vi solius unionis hypostaticæ.

R. N. c. & parit. beatitudo essentialis non fuit supernaturaliter ad tempus superinfusa, uti beatitudo corporis: consequenter Christus potuit bene mereri posteriorem non statim collatam, non vero priorem seu essentialem, quæ statim vi unionis hypostaticæ fuit concessa.

Objic. 2. Beatitudo Corporis debebatur jure Christo; ergo eam non potuit mereri. R. D. C. directe trans. C. indirecte  
P. Kick Theol. Tom. IV. S. merendo



merendo amotionem miraculi impredientis redundantiam gloriæ ob unionem hypostaticam. N. C.

Objic. 3. Gloriosius est gloriam corporis competere Christo vi unionis, quam ob meritum: ergo debet dici, quod vi solius unionis conveniat Christo. R. N. a. quamvis gloriosius sit deberi vi solius unionis hypostaticæ, ea quæ statim ab initio incarnationis infuere humanitati Christi, aliter tamen loquendum de illis, quæ ab initio ob bonum nostrum non congruebat inesse: hæc ergo deberi Christo non solum vi unionis, sed etiam ex merito saltem indirecto, quatenus meretur amotionem miraculi impredientis, est nobilius.

Objic. 4. Christus saltem ut passibilis, venit propter nos & nostram salutem: ergo tantum nobis meruit. R. D. a. principaliter C. a. minus principaliter N. a. & C. per hoc tamen non dicimus, quod Christus simpliciter pro se sit mortuus; id enim sonaret, Christum esse à se ipso redemptum.

## §. IV.

*An Christus, Beatissima Virgo, ac Patres antiqui meruerint aliquas circumstantias Incarnationis?*

83

ASSERO I. Christus meruit varias circumstantias suæ Incarnationis, quæ necessariam connexionem cum substantia Incarnationis non habent, seu sine quibus potuisset Incarnatio dari, five sint antecedentes, concomitantes, aut subsequentes actualem executionem Incarnationis. Hujusmodi circumstantiæ sunt Maternitas B. V. Mariæ, ejus præservatio ab originali, & debito peccati originalis, vaticinia Prophetarum, annuntiatio per Angelum, Genealogia Patriarcharum, à quibus Christus secundum carnem descendit, adoratio Magorum, acceleratio Incarnationis, resurrectio à mortuis, & aliæ ejusmodi. Ita deducitur ex Scoto. 4. D. 2. q. 1. circa finem, ubi admittit, B. V. meruisse accelerationem Incarnationis: ergo & Christo id concedendum est. Prob. 1.



Prob. 1. omne illud Christus meruit, quod potuit mereri sine aliquo inconvenienti; sed has circumstantias potuit mereri sine aliquo inconvenienti: ergo eas meruit. M. constat, quia Christus & merita ejus debent extolli, quantum possunt; sed magis extolluntur, si dicitur, Christum meruisse omne illud, quod potuit mereri sine aliquo inconvenienti. prob. ergo m. omnes illas circumstantias Incarnationis sine inconvenienti potuit Christus mereri, ante quarum existentiam potuerunt decerni, & praevideri merita Christi, saltem aliqua; sed merita Christi saltem aliqua potuerunt praevideri ante omnes circumstantias Incarnationis non habentes necessariam connexionem cum Incarnatione, five sint illae antecedentes, five concomitantes, vel consequentes, ergo omnes illas circumstantias potuit Christus mereri. M. patet consideranti, & sufficienter colligitur ex haecenus dictis. m. tum hoc, tum sequenti Paragrapho declarabitur. Et utique Christus decerni potuit prius, & independentem à circumstantiis cum ipso non necessario connexis: ergo etiam prius potuerunt decerni, & videri aliqui actus meritorii Christi, qui non habuerunt necessariam connexionem cum talibus circumstantiis, nec cum ipsa passibilitate, passione formali, & morte Christi: uti actus amoris &c. quos eliciisset, etiamsi venisset in carne impassibili, & independentem à praedictis circumstantiis: proinde ob hos actus meritorios pro priori praevisos potuerunt à Deo decerni praedictae circumstantiae.

Prob. 2. omnes speciales gratiae antiquis PP. & Progenitoribus concessae sunt ex meritis Christi; sed inter has gratias etiam sunt praedictae circumstantiae: certe sensus omnium est, quod mediantibus gratiis Divinis per Christum acceptis se illi Progenitores disposuerint, & dignos reddiderint, ut Christum inter suos descendentes numerarent, & ex unanimi sententia B. V. Maria ex meritis Christi fuit praeservata ob originali labe, & ad Maternitatem Dei evecta: ergo.

Objic. 1. Decretum Dei Incarnativum fuit efficax, sed decretum Dei efficax attingit suum objectum secundum omnes circumstantias: ergo Decretum Incarnativum attingit Incarnacionem



tionem secundum omnes circumstantias : ergo nec Incarnatio , aut Christus , nec ejus merita fuere decreta ante circumstantias : consequenter propter merita Christi prius decreta & praevisa non potuerunt primum postea decerni praedictae circumstantiae.

R. D. m. decretum Dei efficax adaequate secundum omnia signa sumptum C. m. inadaequate sumptum N. m. potuit Deus primo signo efficaciter decernere Christum , & postquam in secundo signo decrevit , & vidit ejus merita saltem aliqua , propter haec etiam decernere potuit tales vel tales circumstantias , in quibus veniret Christus.

Objic. 2. Christus mereri non potuit ea , quae tempore & duratione praecesserunt ipsum Christum cum omnibus suis meritis ; sed circumstantiae antecedentes Incarnationem tempore & duratione praecesserunt Christum cum suis meritis : ergo has non potuit mereri. R. 1. Tali modo Christus neque suis Progenitoribus potuisset mereri gratias , utpote quae Christum praecesserunt tempore. R. 2. N. M. sufficit Christum praecessisse progenitores , & has circumstantias in decreto.

Objic. 3. Maternitas Christi est principium saltem mediatum meritorum Christi : ergo hanc Christus non potuit mereri. C. patet , quia principium meriti etiam mediatum non cadit sub meritum. A. prob. Maternitas Christi est principium proximum elicitivum actuum meritorum Christi : ergo Maternitas Christi est principium saltem mediatum meritorum Christi , quia est principium principii proximi ac elicitivi meritorum Christi.

R. D. a. est principium saltem mediatum meritorum Christi per se tale , & necessario requisitum ad merita Christi N. a. per accidens tale , sine quo adhuc potuissent dari , & fuissent data merita Christi. C. a. & N. c. B. V. & progenitores Christi non fuerunt principium aliquod mediatum per se tale meritorum Christi : Etenim Christus & ejus merita , praefertim illa , de quibus hic agitur , à Deo sunt absolute determinata & intenta pro priori signo independentem à progenitoribus ,



toribus, vel hac Matre, quæ est B. V. Maria. Unde vi moderni decreti Christus adhuc venisset, & operationes eliciisset, etiamsi nec hæc Mater, nec hi Progenitores fuissent futuri. Nam Deus potuisset creare humanitatem Christi per se ipsum sine ullo concursu Matris vel aliorum Progenitorum, vel illam producere per aliam matrem, aut alios progenitores. Quare merita Christi, saltem illa, de quibus modo quærimus, sunt decreta ut prævisa, & independentia à matre & progenitoribus. Dixi, *saltem illa, de quibus quærimus*. Nam nolim negare, quod aliqua merita Christi fuerint essentialiter dependentia à Maternitate B. V. ut obedientia huic individuo humano ut Matri præstita, item gratiarum actio à Christo præstita Patri pro hac Matre in individuo concessa: hi & similes actus maternitatem Virginis Mariæ jam præsupponebant: unde per illos Christus non potuit mereri maternitatem. Verum dantur alii actus à maternitate penitus abstrahentes, ut amor Dei tanquam summi Boni, adoratio Dei, gratiarum actio pro unione hypostatica &c.

Objic. 4. In nostro systemate non potest dici, per quæ merita Christus fuerit meritis maternitatem & præservationem B. V. Mariæ ob originali? nam non est meritis per merita ponenda in carne impassibili; cum talia non posuerit Christus, qui tantum in carne passibili venit, & alias B. V. dicitur esse præservata ab originali per passionem & mortem Christi. Neque potest dici, quod Christus sit meritis per actus bonos positos in carne passibili, & per passionem suam &c.; nam juxta nostrum systema articulo præcedenti insinuatam B. V. fuit intenta pro priori signo ante lapsum Adami, & ante decretum de Christo venturo & operaturo, vel morituro in carne passibili: ergo in nostro systemate non potest dici, per quæ merita Christus fuerit meritis maternitatem & præservationem B. V. Mariæ ab originali culpa.

R. N. a. Deus acceptavit merita Christi absolute prævisa, à carne passibili independentia, consummanda tamen per passionem & mortem Christi, *si Christus esset venturus* ut Redemptor reparativus. Talia merita prorsus independentia à carne



passibili, sunt actus amoris Dei, ut infinite Boni &c. propter hæc ergo absolute decrevit B. V. gratias exemptionis à peccato originali, & Maternitatis &c. addita tamen conditione, ut ista merita consummentur per passionem & mortem Christi, *si esset passurus*, ut non sic consummentur, vel nulla alia consummatione indigeant, si Christus non esset passurus, nec in carne passibili venturus.

Ex quo habes, quod Decretum collativum harum gratiarum possit dividi in tria signa. In primo signo, & efficaci intentione fuit absolute decreta Maternitas B. V. cum suis privilegiis ante absolutum prævisum Adæ peccatum, & ante absolute decretam passionem & mortem Christi ob sola merita Christi independentia à passione & morte, quæ tamen essent consummanda per passionem, si Christus esset passurus & moriturus. In altero signo fuit prævisus lapsus Adami, in tertio signo vero fuit decretum, ut Christus passione ac morte sua consummet omnia sua merita oblata & acceptata pro quibuscunque etiam B. V. In hoc ergo tertio signo fuit B. V. Maria consummate præservata, & gratiis dotata per passionem Christi, & sic redempta, quamvis hac consummatione non indignisset, si Christus non venisset in carne passibili, vide etiam dicenda n. 135. ubi hæc Advers. replica iterum recoqui debet in alia materia.

85

Affero 2. B. V. Maria merita est maternitatem Dei. 2. non tamen de condigno, sed solum de congruo. Est Communis Th. Th.

Prob. 1. memb. ex autoritate Ecclesiæ, quæ in Regina cæli canit: *quem meruisti portare.* Et in oratione post salve Regina: *ut dignum filii tui habitaculum effici mereretur.* Ecclesiæ consonat D. August. l. de natura & gratia c. 36. dicens Beatissima Deipara: *quæ concipere ac parere meruit eum*, quem constat nullum habuisse peccatum: ergo B. V. merita est maternitatem.

Confirm. ratione. B. V. tot præstantes virtutum actus elicit ante Incarnationem Verbi Divini, ut supposito decreto  
Divino



Dívino de eo Incarnando nulla fœmina magis congrue potuisset pro Matre illius assumi : ergo B. V. Maria de congruo per hos actus virtutum est merita maternitatem Verbi Incarnati.

Prob. 2. memb. conclus. Totum meritum de condigno B. V. Mariæ satis compensatur per gratiam & gloriam tam excellentem, quæ ipsi fuit concessa ; sed hæc conceditur ultra condignum ; quia merita B. V. Mariæ condigna jam exhausta per gloriam & gratiam non possunt ulterius exigere de condigno novum & distinctum præmium, seu maternitatem Christi. A. videtur liquere : si enim gratia & gloria non sufficienter, & adæquate compensarent merita Mariæ, tunc non essent præmium condignum meritis B. V. Mariæ : quod est absurdum.

Confirm. Duo præmia de condigno non respondent eidem operi ; alias enim unum necessario non foret condignum & sufficiens, si præter se admitteret alterum : ergo præter gratiam & gloriam, quæ constituunt unum præmium condignum, meritis B. V. Mariæ non respondebit adhuc aliud, seu Maternitatis Christi.

Prob. 2. Nec ratione nec autoritate constat, quod Deus voluerit B. Virginem alia, quam ordinaria via remunerari ; sed via ordinaria satis compensantur merita de condigno per gloriam & gratiam : ergo etiam merita de condigno B. V. Mariæ satis compensantur per gratiam & gloriam, & proinde non merentur aliud adhuc præmium de condigno.

An autem de potentia absoluta Beata Virgo mereri potuerit de condigno maternitatem, est alia quæstio, quam vide breviter tactam apud R. P. Antonium Mayr tr. 9. n. 521. ubi ait : saltem probari non posse, dignitatem Maternitatis Dei esse tantam, ut nullum meritum B. V. præventæ ineffabilibus gratiis potuerit esse condignum respectu illius maternitatis, intellige, si Deus aliunde hoc meritum per gratiam & gloriam non jam compensasset de condigno, & ad æqualitatem.

Objic. contra 1. memb. conclus. 1. Merita B. V. jam satis sunt compensata per gratiam & gloriam : ergo non possunt aliquid ultra mereri de congruo.

R. N. C.



R. N. C. Præmium de congruo non importat æqualitatem cum merito, & fundatur præcipue in liberalitate præmiantis, & semper debet esse majus, quam meritum fuerit: potest ergo ex congruitate superaddi præmio de condigno.

Objic. 2. Si B. Virgo meruit maternitatem Christi, tunc etiam meruit Incarnationem; atqui Incarnationem non potuit ipsa vel ulla creatura mereri in moderna providentia, in qua Incarnatio est principium omnis meriti: ergo neque potuit mereri maternitatem Christi. M. prob. maternitas Christi necessario post se trahit incarnationem: ergo si maternitatem B. V. Maria meruit, tunc quoque meruit Incarnationem necessario cum maternitate Dei connexam.

R. D. M. Si meruit Maternitatem pro signo priori, quam decreta esset Incarnatio C. M. si primum pro signo posteriori. N. M. explicatio distinctionis petitur ex responsis datis ad objectiones contra primam conclusionem.

Objic. 3. Christus meruit maternitatem B. V. Mariæ: ergo Ipsa Beata Virgo non potuit illam mereri. R. retorq. argum. Christus meruit nobis salutem & gloriam: ergo illam non possumus amplius mereri. R. 2. D. a. ita tamen, ut simul Christus non excluderet cooperationem B. V. Mariæ per propria ejus merita C. a. secus N. a.

Affero 3. PP. antiqui de congruo meruerunt circumstantias aliquas Incarnationis, ut circumstantias stirpis, patriæ, temporis, seu accelerationis &c. Communis.

Prob. 1. PP. antiqui ex una parte ferventer orabant pro his circumstantiis, & ex altera parte congruum erat eos, tanquam amicos Dei exaudiri: ergo de congruo per suas orationes has circumstantias meruerunt. Prima pars patet ex illis clamoribus PP. antiquorum, ut Isaia 45. *Rorate celi desuper, & nubes pluant justum.* Et cap. 64. *utinam dirumperes celos & descenderes,* & Psal. 105. *visita nos in salutari tuo:* quibus suspiriis PP. antiqui non orabant pro substantia Incarnationis, utpote quam aliunde ex revelatione jam sciebant decretam,



cretam, & certe futuram esse, sed orabant pro acceleratione hujus mysterii.

Accedit, quod PP. etiam posuerint talia opera, quae meruerint de congruo praefatas circumstantias: sic obedientiae Abrahami & pietati Davidis promittitur, quod ex eorum semine & stirpe sit oriturus Messias Genes. 22. quia Abraham ex Dei jussu voluit immolare filium suum, promittitur: *beneficentur in semine tuo omnes Gentes terrae, quia obedisti voci meae.* & Psal. 131. Davidi: *juravit Dominus David -- de fructu ventris tui ponam super sedem tuam.* Ita quoque promittitur acceleratio quærentibus, & desiderantibus apud Malachiam. *Ecce statim veniet ad templum suum Dominator Dominus, quem vos quæritis, & Angelus testamenti, quem vos vultis &c.*

Objic. 1. SS. PP. orabant pro substantia Incarnationis, non pro circumstantiis: ergo meriti sunt Incarnationem quoad substantiam. 88

R. N. a. SS. Patres agnoscebant ex revelatione aliunde jam esse decretam Incarnationem, & dependenter ab hoc decreto credebant se accipere gratias suas, eamque agnoscebant esse principium omnis meriti, adeoque non cadere sub meritum. Igitur solum pro circumstantiis orabant: & dato, quod crediderint falso, se posse mereri substantiam Incarnationis, tamen eam non fuissent meriti: quia esto peccator gravis credat, se per actum contritionis de condigno mereri gratiam sanctificantem, tamen non sic de condigno eam meretur.

Objic. 2. PP. non potuerunt mereri substantiam Incarnationis: ergo neque ejus circumstantias. R. N. c. substantia Incarnationis fuit decreta ante prævisa merita Patrum, non vero circumstantiæ ejusdem.

Objic. 3. Quia nos non possumus mereri de congruo primam gratiam actualem actibus pure naturalibus, ita neque accelerationem primæ gratiæ per actus pure naturales mereri possumus: ergo quia Patres actibus suis meritoriis de congruo



non potuerunt mereri incarnationem, ideoque neque accelerationem ejus mereri potuerunt.

R. N. c. & parit. Quia actus pure naturales nullam habent proportionem ad obtinendum præmium supernaturale, sive in se, sive in suis circumstantiis spectatum. At actus meritorii PP. fuerunt supernaturales, & in eodem ordine, quamvis non in eodem gradu supernaturalitatis, in quo est unio hypostatica. Hinc licet unionem hypostaticam quoad substantiam non potuerint mereri, ne alias principium meriti caderet sub meritum; habuere tamen proportionem ad merendas circumstantias Incarnationis jam efficaciter decretæ.

Objic. 4. Circumstantia accelerationis non fuit adeo exoptanda Patribus; cum etiam ex prævisa tantum Incarnatione habuerint gratias, sicut nos habemus ex posita & exhibita: ergo ipsam substantiam, & non tantum accelerationem petierunt.

R. N. a. Acceleratio Incarnationis merito fuit exoptanda Patribus, tum quia merita Christi actu exhibita in lege gratiæ majores promeruerunt hominibus gratias, quam tantum merita prævisa ante Incarnationem executioni datam. Tum quia merita Christi exhibita aperuerunt januam cæli, non vero merita mere prævisa.

Objic. 5. Christus venit tempore opportunissimo: ergo PP. non meruerunt accelerationem adventus Christi: C. videtur liquere: si enim Christus in adventu suo tantum respexit ad opportunitatem temporis, tunc non respexit ad merita justorum. R. D. a. & tempus erat opportunissimum, quo præcesserunt illa merita justorum & PP. C. a. secus N. a. Christus venit tempore opportunissimo, accipiendo opportunitatem pro complexo conflato ex pluribus rebus convenientibus, inter quas non ultimum locum habent illa merita justorum.

Objic. 6. S. August. Tom. 4. q. 83. super novum Testamentum ait: *idcirco tunc venit, quando venire debuit, voluntatis suæ rationem secutus non meritorum: nam si merita perpendas, venire*



venire non debuit: ergo circumstantias temporis vel accelerationis non meruerunt Patres. R. S. Doctorem loqui de merito de condigno, non de merito de congruo: posterius solum concedimus Patribus antiquis; primum denegamus ex illis fundamentis, ex quibus negavimus, B. V. Mariam fuisse de condigno meritam Maternitatem Dei.

\*\*\*\*\*

## DISSERTATIO IV.

### *De intellectu & Scientia Christi qua hominis.*

Certum est, ac de fide contra Monothelitas, in Christo esse duplicem intellectum, unum Divinum, alterum humanum. prout dicetur, & probabitur dissertatione 5. agendo de duplici voluntate Christi. De intellectu Divino agitur in Tractatu de Deo uno. Hic restat tractanda scientia humana Christi, seu conveniens Christo qua homini. Jam præter scientiam Divinam in Christo triplex est scientia humana. Prima est *Beatifica*, quæ est ipsa visio beatifica, per quam humanitas & anima Christi in Verbo, seu in essentia Divina Deum clare videt, imo & omnes creaturas, quarum cognitio ejus statui beatifico congruit. Altera est *infusa*, quæ nec labore, nec industria, nec frequentatis actibus acquiritur, sed solum speciali Dei supernaturaliter concurrentis influxu, & infusione. Tertia est *acquisita*, quæ proprio labore intellectus creati acquiritur. His notatis.

## ARTICULUS I.

### *De Scientia Christi Beatifica.*

#### §. I.

#### *Statuuntur aliquæ Conclusiones.*

ASSERO. I. Anima Christi adhuc in terris, & in mortali corpore existens habuit intuitivam & beatificam Dei visionem. 89



nem. Hæ conclusio est communis, & licet non omnino sit certa de fide, tamen teste Suarez sine temeritate negari nequit.

Prob. 1. Joan. 3. Christus ait : *nemo ascendit in cælum, nisi qui descendit de cælo filius hominis, qui est in cælo.* Quibus Christus, qua mortalis homo, & adhuc in terris agens, asserit se esse in cælo; sed non erat in cælo præsentia locali, & corporea, ergo mentali & spiritali : aut esse in cælo ratione animæ & spiritus nil aliud est, quam Deum videre mente : ergo Christus ut homo degens adhuc in mortali corpore visione beatifica fruebatur.

Confirm, cit. capite Joan. 3. v. 11. Christus iterum dicit : *quod scimus, loquimur, & quod vidimus testamur* ubi aperte loquitur de se ut homine, & loquitur inter alia de mysterio SS. Trinitatis : ergo hoc mysterium vidit visione beatifica, & intuitive ; quia aliter hoc mysterium proprie videri nequit. In eundem sensum ait Dominus Joan. 8. v. 38. *ego, quod vidi apud Patrem meum, loquor.*

Huc quoque faciunt illa, quæ dicuntur Joan. 1. *Deum nemo vidit unquam : unigenitus Dei filius, qui est in sinu Patris, ipse enarravit : quasi diceret, unigenitus filius, qui vidit, enarravit : ergo sicut unigenitus Dei filius enarravit per humanitatem, ita etiam vidit per humanitatem.*

Accedit. quod Christus, qua homo in mortali corpore dixerit Joan. 12. *ubi ego sum, illic & minister meus erit* scilicet in gloria per visionem & fruitionem Dei : ergo Christus jam ut homo mortalis, fruebatur hac gloria & visione Dei ; quia ut mortalis homo dixit ; *ubi sum, & non ubi ero.* Allegatur quoque D. August. l. 4. de consensu Evangelistarum cap. ult. aperte autem nobis favet. q. 63. de octoginta tribus, ubi docet, nos primum post mortem facie ad faciem esse visuros Deum ; contra vero Christum jam sic vidisse ante mortem suam. Verba ejus videre potes apud Frassen tom. 3. tr. 1. Disput. 2. art. 2. sect. 3. q. 2. n. 4.

Prob. 2.



Prob. 2. ratione : Natura humana per unionem hypostaticam elevata est ad supremum esse : ergo pariter debuit elevari ad supremam operationem , qualis est beatifica visio & fruitio. Unde 2. visionem beatificam exigebat jam in hac vita unio hypostatica , præsertim , quia ejusmodi visio non obstabat operi redemptionis , & passionis Christi. 3. Christus qua homo erat filius naturalis , vel proprius Dei : sed non erat congruum tanto tempore mortalis vitæ filium Dei privari hæreditate , & filium dilectissimum non frui conspectu Patris sui supra omnia dilecti : ergo.

Objic. Christus habuit in monte Oliveti summam tristitiam : ergo tunc non habuit visionem beatificam , quæ excludit tristitiam , & generat summam lætitiā. R. N. C. lætitia quidem summa connaturaliter excludit tristitiam ; de potentia tamen absoluta , possunt simul stare tristitia maxima , & summa lætitia , si versentur circa diversa objecta , uti tunc fiebat ; ubi anima Christi delectabatur maximopere Deo beatifice viso , & possessio , & simul tristabatur ob imminentem passionem gravissimam , acerbam portioni inferiori hominis , peccata , ingratiitudinem , & damnationem plurimorum hominum , pro quibus passio & mors tam pretiosa esset offerenda &c.

Affero 2. Anima Christi statim à primo instanti infusionis in corpus , & conceptionis habuit visionem beatificam. 90  
Communis.

Prob. Ex una parte nihil impediēbat , quin humanitas Christi statim in primo instanti conceptionis videret Deum , cum tunc jam haberet perfectum usum rationis , & quoad hunc Christus qua homo jam in utero materno esset vir , juxta illud Jerem. 31. v. 22. *femina circumdabit virum.* Ex altera parte conveniebat humanitati Christi , statim videre beatifice Deum ; quia in hoc primo instanti jam habebat unionem hypostaticam , quæ exigit visionem beatificam. Unde Richardus l. 2. de Emmanuele c. 22. ait : *quod nos expectamus in consummatione , illi datum est in sua conceptione , scilicet gloria , visio , ac fruitio beatifica.*



91 Affero 3. Visio beatifica humanitatis Christi non est comprehensiva Divinitatis. Communis ac certa.

Prob. Divinitas est infinita, & anima Christi est finita tam entitative, quam quoad potentiam intellectivam, & habitum luminis gloriæ, quo adjuvatur ad videndum Deum; atqui ens infinitum non comprehenditur à finito: alias enim eo ipso ens non foret amplius infinitum, si ejus cognoscibilitas ab ente finito posset exauriri: ergo.

Objic. Anima Christi videt essentiam Divinam qua infinitam: ergo eam comprehendit. R. D. a. videt eam infinitam non tamen modo infinito, nec secundum omnem gradum (ut ita loquar) cognoscibilitatis ejus C. a. secus N. a. videt quidem anima Christi omnia prædicata Divina, consequenter & prædicatum infinitatis, non tamen videt modo infinite perfecto, sed limitato.

§. II.

*Examinatur præcipua difficultas hujus Articuli.*

92 Affero 4. Probabiliter anima Christi per visionem beatam actu videt omnia, quæ ipsum Verbum intelligit, proinde omnes creaturas præteritas, præsentis, & futuras, ac possibiles. Scotus hac in re est problematicus, ac in utramque partem disputat in 3. D. 14. q. 2. nobis autem favet §. tertio modo potest dici n. 16. dicens: *tertio modo potest dici, quod anima Christi actualiter videt in Verbo, quæ videt Verbum.* & n. 18. assignat modum salvandi, quod una vel pluribus visionibus videat omnia illa in Verbo, seu essentia Divina; Hæc enim in ejusmodi locutionibus de visione beatifica per Verbum intelligitur. Cum Scoto sunt aliqui Scotistæ problematici, ut Mastrius, Panger &c. alii vero determinate sententiam nostræ conclusioni oppositam eligunt, ut Herinx, Henno, quibus accedit Viva &c. alii determinate nostram sententiam amplectuntur, ut Vulpes, Aretinus & alii Scotistæ, cum quibus sentiunt Lugo, Oviedo, & alii plures.

Prob.



§. II. Examinatur præcipua difficultas hujus Articuli. 151

Prob. Conclus. 1. Quod perfectius est, debet Christo tribui, nisi ostendatur ejus implicantia; sed visio beatifica, qua Christus ut homo actu attingat omnia, quæ videt Verbum, est perfectior, quam alia, quæ non attingit, & simul implicantia talis visionis non potest ostendi: ergo Christo debet tribui talis visio beatifica, qua Christus attingat omnia, quæ videt Verbum. M. est quasi axioma theologicum in materia de Incarnatione communissime usitatum, & in Scoto fundatum, juxta quem in commendando Christo debemus potius excedere, quam deficere, si talis commendatio veræ rationi non repugnet. m. quoad 1. memb. patet; quoad secundum probabitur solutione omnium implicantiarum, quas AArii. objecerunt.

Prob. 2. autoritate. Joan. 3. dicitur: *non enim ad mensuram* (Christo) *dat Deus spiritum*, nempe gratiæ & scientiæ; atqui si Christus non intelligeret omnia possibilia, jam datus esset Christo spiritus ad mensuram: ergo. Ad Coloss. 2. dicuntur in Christo esse *omnes thesauri sapientiæ & scientiæ Dei*. & Joan. c. 16. de Christo dicitur: *scimus, quia scis omnia*. atque, ut ex contextu patet in allegatis locis, sermo est de Christo qua homine, non vero, qua Deo: &, quod qua Deus omnia intelligeret, nullum erat dubium vel disputatio. Et S. Chrysost. homil. 5. in caput. 2. epist. ad Colossenses & mox citatum textum ait de Christo: *Ipsè novit omnia*.

Confirm. juxta Concilium Senonense decreto fidei 13. Beati vident in Verbo omnia, quæ spectant ad eorum statum: ergo & caput Beatorum Christus Dominus videt in Verbo omnia, quæ ad ejus statum pertinent; atqui quia Christus Dominus est judex vivorum & mortuorum, spectat ad ipsum cognoscere omnes cogitationes, facta, & verba non solum præcedentia, sed & sequentia judicium; quia sequentia vel ad præmium, vel ad pœnam spectant: & quia ipse est Dominus absolutus omnium creaturarum, convenit eum cognoscere creaturas omnes tam actuales, quam possibiles &c.

Objic. 1. Si anima Christi videret omnes creaturas futuras, & possibiles, tunc hæc visio foret infinita, sed visio



sio creata non potest esse infinita: ergo anima Christi non potest videre omnes creaturas futuras, & possibiles M. prob. talis visio repræsentaret clare & distincte creaturas infinitas: ergo & ipsa esset infinitæ repræsentationis. A. patet. nam omnes creaturæ futuræ, inter quas sunt omnes cognitiones Beatorum, & damnatorum, quæ erunt per totam æternitatem & sine fine continuabuntur, & omnes creaturæ sine fine possibiles, sunt infinitæ. C. prob. à Scoto: *ubi pluralitas numeralis concludit perfectionem majorem, ibi infinita pluralitas arguit perfectionem infinitam*; sed cognoscere & repræsentare simul plura objecta, est major perfectio, quam cognoscere & repræsentare tantum unum objectum: ergo cognoscere & repræsentare infinita objecta est perfectio infinita.

R. 1. retorq. argum. Visio beatifica Christi distincte & clare repræsentat essentiam Divinam infinitam: ergo propterea talis visio foret infinita.

R. 2. N. M. ad ejus prob. D. a. talis visio repræsentaret creaturas infinitas actu & categorematice N. a. syncategorematice infinitas C. a. argumentum Scoti procedit ex supposito, quod in mente cognoscentis omnia possibilia, admittatur infinitum categorematicum objectivum; verum illos, qui ejusmodi infinitum non admittant, non urget prædictum argumentum. Nam si cognoscuntur tantum creaturæ possibiles ut infinitæ syncategorematice, tunc cognoscuntur finitæ in infinitum, quod potest fieri per actum aliquem creatum, qui propterea non debet actu infinitas perfectiones, tendentias, vel repræsentativitates, aut relationes ad hæc objecta habere, sicut nec ipsa actu infinita sunt, nec ut actu infinita repræsentari possunt.

R. 3. N. M. ad prob. trans. a. N. C. transmissio etiam, quod creaturæ omnes possibiles sint actu infinitæ, & ut tales videantur ab anima Christi, tamen hujusmodi visio non deberet esse actu infinita. Cujus ratio est 1. Quia visio beatifica, qua anima Christi videt infinitam essentiam Divinam, est tantum limitata & infinita: ergo etiam visio illa, qua in essentia Divina viderentur infinita objecta creata, esset tantum



tum finita & limitata. 2. Non valet: ad videndum aliquod objectum requiritur aliqua perfectio & virtus, & ad videndum objectum perfectius requiritur major perfectio: ergo ad videndum objectum infinitum seu Deum, requiritur perfectio infinita: ergo etiam non valet: *cognoscere plura objecta quam unum, est major perfectio: ergo cognoscere objecta infinita numero est perfectio infinita.* Ex hoc enim argumentandi modo sequitur solum quædam infinitas, vel potius summitas extrinseca & objectiva, quatenus non potest dari objective major actus, seu tendens in majus objectum. Verbo: talis visio esset tantum in supremo ordine & serie cognitionum, quatenus non posset dari cognitio tendens in majus objectum. Tali modo distingui potest illa minor axiomatis Scoti subsumpta. Sed repræsentare plura est major perfectio objectiva C. M. entitativa subdist. est major proportionem arithmetica, & ad æqualitatem, seu est tot gradibus major, quot sunt objecta, ad quæ se extendit ejusmodi cognitio. N. m. est major proportionem geometrica, incommensurabili, & non ad æqualitatem C. m. ad perfectionem entitativam visionis plura principia concurrunt præter objectum, quæ cum non omnia sint infinita, sed pleraque finita, hinc limitant perfectionem entitativam ejusmodi visionis, & reddunt eam finitam, ac permittunt ipsam solum esse in suprema classe cognitionum finitarum, quatenus nulla finita cognitio ad majus objectum potest extendi, quam illa.

Objic. 2. Non potest dici, an per unam visionem, vel plures anima Christi cognoscat tot creaturas, seu finitas in infinitum. Nam non per unam: una enim cognitio non sufficit ad cognoscenda tot disparata objecta. Non per plures, quia tot cognitiones non possunt esse simul in intellectu creato: ergo.

R. 1. Cum etiam juxta AArios. anima Christi plurimas creaturas tam actuales, quam possibiles videat in Verbo, quaero, an id fiat per unam, vel plures visiones? quidquid dixerint AArii, & ipsis respondere possumus.



R. 2. Scotus ait, id fieri vel per unam, vel per plures visiones: si enim semel conceditur, quod plura objecta creata possint simul visione hac supernaturali videri, cur non omnia? præsertim, quia unum est objectum motivum & formale respectu omnium, scilicet essentia Divina movens ad sui & omnium cognoscibilium visionem: igitur licet creaturæ possibiles & actuales inter se mutuo comparatæ sint objecta disparata, non tamen si conferantur cum essentia Divina, in qua omnes æqualiter in esse cognoscibili continentur, & ad libitum Dei vel omnes simul, vel nunc hæ, nunc illæ intellectui creato essentiam Divinam intuitive videnti ostendi possunt. Neque implicat alter modus videndi omnia possibilia per plures visiones, quia saltem per potentiam absolutam plures imo plurimæ cognitiones in diversa objecta terminatæ simul esse possunt in eodem intellectu. Mihi præplacet modus prior, explicans hoc negotium per unam visionem ob unum objectum motivum &c. &c.

Objic. 3. Soli Deo convenit visio essentiae, Divinæ & omnium objectorum creatorum, & creabilium: ergo non potest etiam competere animæ Christi creatæ. R. D. a. Soli Deo convenit à se, & modo infinite perfecto. C. a. secus N. a. etiam creaturæ convenire potest per virtutem à Deo communicatam, & modo adhuc finito, scilicet intensione & claritate finita, ac augibili in infinitum.

Dices: Talis visio foret infinita, quia se extenderet ad totum objectum, ad quod se extendit intellectus infinitus Dei: ergo.

R. N. a. ob rationes jam datas.

Objic. 4. *Pluribus intentus minor est ad singula sensus*: ergo intellectus creatus Christi non potest tot objectis seu finitis in infinitum intendere.

R. d. a. minor est ad singula sensus, sibi soli relictus, & naturaliter tantum agens C. a. supernaturaliter elevatus, & roboratus N. a. nullus adhuc fuit ausus dicere, quod ille Beatus.



tus, qui plurima objecta videt in Verbo, propterea magis distrahatur, fatigetur, aut minus attendat, quam alius Beatus pauciora objecta in Verbo videns: alioquin ipsi AArii. male facerent dicendo, quod anima Christi longe plura objecta creata, & creabilia videat, quam quilibet Beatus. Est igitur hoc axioma habeat locum in intellectu solis viribus naturalibus agente, non vero in illo, qui instructus copiosissimo lumine gloriæ, & assistente omnipotentia Divina, in essentia Divina beatifice videt creaturas. Sane visio beatifica non fatigat, sed recreat intellectum, & quidem eo magis, quo plura objecta ostendit. Ex quo sequitur, non argui infinitam virtutem in intellectu creato beatifice cognoscente infinita objecta: tum quia beatifice cognoscit infinitam essentiam Divinam, & tamen non est infinitæ virtutis, tum quia ad talem cognitionem non concurrat solus intellectus creatus, & finitus, sed & lumen gloriæ, & si hoc non sufficit, tunc etiam omnipotentia Divina, quæ est infinitæ virtutis, debet specialem concursum præstare: concurrat quoque infinitum objectum motivum essentia Divina: tum quia tunc solum infinita virtus, & intensio infinitæ virtutis, requiritur ad objecta infinita percipienda, quando quodlibet objectum seorsum peculiariter fatigaret potentiam: sic enim, quia portando duos lapides plus laboras quam portando unum, & portando tres magis, quam ferendo duos, ita, si portares infinitos, infinite intensam virtutem adhibere deberes. Ast ob concursum supernaturalem Dei tam in ratione objecti, quam in ratione causæ efficientis intellectus creatus non magis laborat beatifice cognoscendo unum quam plura objecta, sed potius magis recreatur.

Objic. 5. Talis visio esset perfectissima inter omnes visiones creatas, & perfectior non posset dari saltem extensive; quia non posset extendi ad plura objecta: ergo in hac sententia daretur creatura perfectissima.

R. 1. retorqu. argum. Visio essentia Divinæ esset visio intensive perfectissima, quia non posset dari visio respiciens essentiam, vel objectum intensive perfectius: ergo daretur creatura intensive perfectissima.

U 2

R. 2. D. a.



R. 2. D. a. talis visio esset perfectissima objective C. a. entitative N. a. quando in philosophia negatur possibilitas creaturæ perfectissimæ, tunc negatur creatura perfectissima entitative & in se talis, vg. maxima perfectio creata, qua major à Deo non potest produci, vel maximus numerus, quo major à parte rei existens non potest dari; non vero negatur maxima perfectio objectiva: quia revera dantur aliqui actus creaturæ tendentes in maximum seu tale objectum, quo majus nec dari, nec cogitari potest, quales sunt omnes cognitiones, & actus amoris, quibus tendimus in Deum. Proinde & visio creata, qua humanitas Christi tenderet in omnes creaturas posibles, posset objective & extensive esse maxima, quia in maximum extensive objectum tenderet.

Objic. 6. Si anima Christi videret in essentia Divina omnes creaturas actuales & posibles, tunc comprehenderet essentiam Divinam; quia videret omnia, quæ in ea sunt formaliter, scilicet omnia prædicata Divina, & quæ in ea sunt eminenter, nimirum omnes creaturas, sed anima Christi limitata nequit comprehendere infinitam essentiam Divinam ergo nequit in ea videre omnes creaturas.

R. N. M. Licet enim omnes creaturæ per essentiam Divinam repræsentabiles cognoscantur, tamen non exhauritur cognoscibilitas essentiae Divinæ, tum; quia natura Divina, ac omnipotentia, & aliæ perfectiones Divinæ in se & entitative spectatæ nullam habent connexionem cum creaturis; & daretur adhuc essentia Divina cum omnibus suis perfectionibus, etiamsi nulla creatura esset possibilis. Tum quia ad comprehensionem alicujus objecti nec sufficit, nec necessaria est cognitio eorum, quæ in objecto aliquo continentur eminenter, vel virtualiter, sed requiritur, & sufficit sola cognitio omnium contentorum formaliter, adeo, ut ejusmodi cognitio comprehensiva non solum attingat omnia talia contenta, sed & omnem gradum cognoscibilitatis comprehendat, & exhauriat, quod non facit visio beatifica creata Christi, quæ non adæquat gradum cognoscibilitatis essentiae & perfectionum Divinarum. Videatur Matrius disp. 6. de anima n. 340. i. sent. disp. 6. de visione beata. n. 251.

Objic. 7.



Objic. 7. Si anima Christi per unam visionem cognosceret omnes creaturas actuales & possibiles, tunc etiam se ipsam clare cognosceret, & esset reflexa supra se ipsam; sed hoc videtur esse impossibile: ergo.

R. D. M. Cognosceret se ipsam ut quod per reflexionem formalem. N. M. ut quo per reflexionem virtuales C. M. actus cognoscendi non debet esse per se ipsum cognitus ut quod, sed tantum ut quo; quia talis actus dat experimentum sui, & Beatus habens visionem beatificam utique experitur, & sentit se habere illam, & videre Deum, quamvis per actum distinctum se non reflectat supra suam visionem beatificam.

Objic. 8. Hæc propositio Arnaldi de Villa nova: *anima Christi scit omnia, quæcunque scit Deus*: fuit damnata ab inquisitione Tarraconensi, ut refertur in directorio inquisitorum 2. p. q. 11.; sed hæc propositio est ipsa nostra conclusio: ergo nostra conclusio est damnata ab illa inquisitione.

R. hæc censura inquisitorum nobis non obest, *tum* quia non est approbata ab aliquo Concilio vel summo Pontifice, imo facta est inconsulto Pontifice, ut ibidem notatur. *Tum*, quia propositio non est damnata nude sumpta, sed cum ratione, qua eam Arnaldus probabat; dicebat enim, animam Christi ea omnia cognoscere, quia alias non poterat consistere unio hypostatica, & quia cognitio non spectat ad naturam, sed ad suppositum, in quo videtur sapere errorem Monothelitarum admittentium unum tantum intellectum scilicet divinum in Christo.

Assero 5. Etiam probabile est, quod anima Christi in Verbo cognoscat quidem omnia, quæ cognoscit ipsum Verbum; 2. non tamen omnia actu. 3. Sed habitu, modo inferiorius explicando. Scotus 3. D. 14. q. 2. §. *sed si ista via tertia*. n. 20. ibi: *sed si ista via tertia non placet — potest dici, quod videt omnia habitualiter*. Sequuntur plerique Scotistæ, & Viva.



Prob. 1. Pars sicut superius, tum ex autoritate, tum ex excellentia Christi, cui omnia, quæ convenienter possunt, attribui debent; atqui omnigena scientia & visio in Verbo convenienter potest Christo attribui: ergo debet ei attribui. Tum, quia ad statum Christi pertinet omnia ista videre in Verbo: ergo.

Prob. 2. pars. Probabiliter nec per Dei potentiam absolutam anima Christi omnia ista potest actu simul in Verbo videre: ergo sic non videt. A. prob. 1. Quia omnia objecta intelligibilia simultanee videre, & intelligere probabiliter est prærogativa soli Divino intellectui conveniens. 2. Ipsa limitatio animæ Christi, seu creaturæ videtur exigere, ut ea se non extendat ad cognoscenda clare & distincte, ac simultanee objecta infinita syncategorematicæ, seu finita in infinitum ac sine fine, seu videtur limitari ad clare cognoscenda objecta tantum in numero aliquo determinato, & finita collectione. 3. Dato, quod omnia possibilia cognita non important infinitum actu in mente cognoscentis, important tamen infinitum syncategorematicum; sed etiam non desunt, qui ad cognoscenda clare & simultanee objecta plura & plura sine fine, seu syncategorematicæ infinita exigunt & potentiam cognoscitivam, & visionem vel cognitionem infinitam: & profecto modus cognoscendi clare & distincte, ac simul omnia possibilia, seu entia infinita syncategorematicæ est tam implexus ac mirus, ut nulli potentiæ, etiam infinitæ competere posse videatur: ergo probabiliter anima Christi neque per absolutam Dei potentiam potest omnia videre in Verbo, quæ videt ipsum Verbum. Adde, vix evitari posse infinitam repræsentativitatem in tali visione omnium omnino creaturarum possibilem: nam licet omnes creaturæ possibiles per illam visionem non cognoscerentur simul simultate objecti, seu per modum unius collectionis infinitæ, tamen cognoscuntur simul simultate cognitionis: consequenter deberent simul & semel repræsentativitates omnium creaturarum possibilem existere in tali visione, quæ repræsentativitates simul actu existentes sunt infinitæ actu, sicut & ipsa objecta possibilia, si simul actu existerent, essent actu infinita.

Neque



Neque dicas, unam finitam repræsentativitatem respectu omnium objectorum possibilium sufficere.

95

Contra est: Repræsentativitas objecti etiam terminativi & secundarii in cognitione est formalis similitudo ejusdem; sed non apparet, quomodo una formalis similitudo hujus objecti possibilis, hujus individui, vel hujus speciei possibilis possit etiam esse formalis & distincta similitudo alterius omnino dissimilis speciei, & diversi ordinis. 2. Neque potest dari species intelligibilis impressa repræsentans plura objecta, præsertim infinita, vel si daretur, esset actu infinita, ut inferius dicemus: ergo idem dicendum est de specie expressa, & visione beata, quæ proinde habere debet infinitas formaliter distinctas repræsentationes. 3. Dato, quod per unam repræsentativitatem visionis beatificæ possint omnes creaturæ possibiles repræsentari, tamen ipsa hæc cognitio adhuc deberet esse infinita: nam, quando pluralitas numeralis concludit perfectionem majorem, ibi infinita pluralitas arguit perfectionem infinitam; sed cognoscere, vel repræsentare simul similitate cognitionis plura objecta vg. duo, est major perfectio, quam cognoscere vel repræsentare tantum unum objectum: ergo cognoscere & repræsentare simul infinita objecta est perfectio actu infinita, & hæc ultima ratio est Scoti.

Prob. 3. pars Conclusionis. Ex una parte anima Christi videt omnia in Verbo, quæ videt ipsum Verbum: ex altera parte non videt ea actu: ergo nihil amplius restat, quam ut videat ea habitualiter. C. est legitima, A. habetur ex probatione primæ & secundæ partis Conclusionis.

Dixi in Conclusionem 1. non tamen omnia actu. Conclusio enim negat, omnia illa actu scivisse, non autem dicit, quod nullas creaturas actu viderit. Imo assero cum Mastro & aliis, quod anima Christi in actu secundo videat in Verbo quamplurimas creaturas tam actuales, præsentis, præteritas & futuras, quam possibiles, & quidem plures quam alii Beati simul sumpti vident. Tam magna enim & ampla visio creaturarum convenit Christo ut Capiti omnium Beatorum, & omnis creaturæ, & judici omnium, & quia non omnia



omnia simul videre | potest ob intellectus creati limitationem, neque de omnibus semper debet disponere; ideo non cognoscit omnia simul in actu secundo. R. P. Viva p. 6. D. 5. q. 3. n. 11. censet, Christum Dominum, qua hominem defacto videre clare & distincte omnia futura usque ad diem iudicii: nam hæc cognoscere spectat ad iudicem vivorum & mortuorum &c. cogitationes vero tam proprias, quam aliarum creaturarum futuras à die iudicii usque in æternum, & creaturas possibiles, cum sint infinitæ syncategorematicæ, tantum videre eum habitualiter, non vero actu.

Dixi secundo: *habitu inferius explicando*. Igitur *to habitu* vel *habitualmente* non significat habitum aliquem, sed præscientiam objecti beatifici, seu essentiæ Divinæ, quæ semper prompta est ad ostendenda clare quævis objecta certa, vel certissima in numero quamvis magno, determinato tamen ac finito. Unde propter objectum beatificum taliter præsens, ac promptum in actu primo anima Christi clare & distincte potest in Verbo videre pro arbitrio suo, & quandocunque vult quascunque creaturas in collectione tamen semper finita.

96 *Objic. 1.* Tali modo Christus aliquando aliqua objecta actu ignoraret, de quibus scilicet actu non cogitaret: ergo hic modus non congruit Christo.

R. N. a. Ille non habet alicujus rei ignorantiam, qui de tali re interrogatus statim potest dicere, quid de illa re sentiat, ac sentiendum sit, etiamsi prius actu de ea re non cogitavit: ita quoque anima Christi, quæ ita est habitualiter constituta, ut interrogata de qualibet re possit illam declarare, non potest dici ignorans.

*Objic. 2.* Vel anima Christi eodem actu visionis in æternum durante videt nunc hæc, nunc illa objecta, vel habet plures actus visionis beatæ invicem succedentes? non primum, quia visio vel cognitio creata non potest modo repræsentare aliquod objectum, quod prius non repræsentavit; identificatur enim repræsentativitas & formalis similitudo objecti, cui libet  
actui



actui cognitionis, five dein sit repræsentativitas objecti primarii five secundarii, ut jam dixi in Tractatu de Beatitudine. Neque potest dici secundum, quia juxta D. August. lib. 15. de Trinit. c. 16. dicit. de visione & cognitione omnium Beatorum: *fortassis non erunt volubiles nostræ cogitationes ab aliis in alias euntes, atque redeuntes, sed omnem scientiam nostram uno conspectu videbimus: ergo.*

R. C. M. & N. m. primum vix sustineri potest, ut censent Smising, Herinx ac alii, tum ob rationem in objectione allatam, tum quia sequeretur, eandem visionem jam habere sibi identificatam formalem similitudinem, ac repræsentativitatem cujusvis creaturæ possibilis & futuræ in infinitum; alias enim omnes illas, ne quidem successive repræsentare posset: neque hæc repræsentativitas est tantum aliqua relatio realiter distincta & superaddita, sed est intrinseca perfectio & formalitas illius visionis ac cognitionis, propter quam specialis concausa efficiens scilicet objectum requiritur influens in ipsam entitatem cognitionis, & ei communicans hanc perfectionem repræsentativitatis objecti. Unde sequeretur ulterius, quod talis visio esset infinita, quia repræsentativa entium in infinitum.

R. igitur ad m. posse dici secundum. Neque obest D. Augustinus; tum; quia loquitur solum dubitative, ut colligitur ex to *fortassis*, tum, quia tantum vult, Beatos, consequenter & animam Christi nunquam cessare à consideratione objecti primarii beatifici, seu essentiae Divinæ, hancque semper intueri, quamvis non necessario per actum eundem numero vel specie infima, sed tantum subalterna. Hoc saltem de visione beatifica Christi dictum fit, quia alias non posset convenienter explicari, quomodo possit aliquas creaturas de novo formaliter in Verbo videre per eandem visionem, qua videt Verbum. Deinde perinde est animæ Christi, five per hanc five per illam visionem videat Verbum, dummodo quoad objectum primarium, seu essentiam Divinam semper sit æqualis perfectionis, & eatenus invariabilis, quamvis varietur quoad objecta secundaria: saltem si sermo sit de visione beatifica



Christi. Ita etiam Scotus exponendus est 1. D. 1. q. 2. n. 6. Neque per hoc mutatur beatitudo Christi essentialiter, sed tantum accidentaliter: & utique aliquas accidentales mutationes subiit jam, dum gloria corporis fuit denegata, & tristitia fuit admissa tempore vitæ & passionis: neque dubito, quin modo sæpius anima Christi habeat gaudium accidentale in cælo, quod prius non habuit.

Objic. 3. Si una visione non possent actu videri omnia possibilia, tunc ideo, quia talis cognitio tendens in objectum infinitum, foret infinita; sed hæc ratio nulla est: ergo. m. prob. quamvis visio beatifica tendat in essentiam Divinam tanquam objectum infinitum, tamen ipsa non est infinita: ergo etiam ejusmodi visio beatifica tendens in objecta infinita non foret infinita.

R. N. m. ad prob. ejus N. C. & paritat. Visio beatifica essentiae Divinæ non est comprehensiva ipsius essentiae & infinitatis ejus, adeoque non est infinita: ast distincta & clara visio creaturarum omnium possibilium, esset comprehensiva earum, & cognosceret eas quoad infinitatem suam, quantum cognosci possunt, adeoque modo infinite perfecto.

Ex his deduces, quomodo explicandæ sint autoritates, quæ dicunt, quod Christus quia homo sciat omnia; dicimus enim, ipsum omnia scire habitu non actu. Neque ex hoc, quod anima Christi habitualiter videat omnia in Verbo, sequitur, visionem beatificam & in actu primo esse infinitam: quia tota infinitas se tenet ex parte primarii objecti beatifici, seu essentiae Divinæ, quæ potest & vult quævis objecta creata animæ Christi ostendere in quavis collectione finita; non vero ista infinitas est in intellectu creato, qui simul non potest cognoscere infinita, neque in actu visionis beatifico, qui tantum præter essentiam Divinam collectionem aliquam finitam creaturarum repræsentat, ac repræsentare potest.



ARTICULUS II.

De Scientia infusa animæ Christi.

**NOTA 1.** Intellectum creatum posse duplici modo cognoscere aliquid, vel habere posse duplicem scientiam. Una est in *Verbo*, altera in *proprio genere*. Scientia beatifica seu in *Verbo* immediate tendit in Verbum seu essentiam Divinam tanquam objectum principale & immediatum, & hoc mediante cognoscit primo creaturas, & alia. Scientia in *proprio genere* tendit immediate & directe in ipsas creaturas tanquam objectum primum & directum; & ideo dicitur in *proprio genere*, quia creaturas in se, & non in alio objecto considerat. Scientia beatifica seu in *Verbo* vocatur *matutina*, vel etiam *meridiana*; altera in *proprio genere* appellatur *vespertina*, quæ iterum est duplex. Prima est *intuitiva*, & quæ dependet ab objecto ut præsentem & existentem, ac sine specie intelligibili attingit ac videt objectum. Altera est *abstractiva*, quæ non dependet à præsentia objecti, sed à specie intelligibili vicaria objecti.

97

**Nota 2.** Scientiam in *proprio genere* ratione modi, quo acquiritur, denuo subdividi. Una est *infusa*, & à Deo supernaturaliter indita, altera est *acquisita*, quæ proprio labore & industria intellectus creati obtinetur. *Infusa* ulterius in binas species secatur, in *per se* & *per accidens* infusam. *Per se infusa* est illa, quæ viribus naturalibus intellectus creati non potest comparari, sed necessario & indispensabiliter exigit à Deo supernaturaliter agente indi, vel infundi. *Per accidens infusa* est, quæ quidem viribus naturalibus & proprio exercitio intellectus creati acquiri posset, à Deo tamen non expectata intellectus creati industria infunditur. Prior est supernaturalis quoad substantiam, altera est supernaturalis quoad modum, nec differt essentialiter à naturaliter acquisita: hinc recte Scotus scientiam per accidens infusam vocat per se acquisitam. Talis scientia per accidens infusa fuit illa, quam Adam & Salomon sibi supernaturaliter inditam habuere de rebus naturalibus, quam successu temporis proprio studio potuissent sibi comparare.



Nota 3. In principiis scotisticis scientiam infusam duo importare, nimirum species intelligibiles infusas, & habitum à Deo inditum. Species requiruntur ex parte objecti, ut huius vices vel absentiam, aut certe ejus concursum ad cognitionem alias requisitum suppleant. Habitus vero requiritur, quia juxta nos distinguitur à speciebus, & est perfectio se tenens ex parte intellectus, ejus influxum facilitans, & promovens in ordine ad cognitionem scientificam, faciensque, ut intellectus tali habitu instructus perfectius operetur: præterea habitus est ornamentum potentiae. Omnia patent in habitu luminis gloriae, ac claritatis, qui etiam dantur in anima Christi.

Nota 4. Quamvis in Christo à Scotistis admittantur species infusae, tamen non admitti species universales, quarum una plura objecta distincta, & disparata, seu non subordinata representare posset: debent ergo multiplicari species intelligibiles juxta multiplicationem objectorum diversorum, ac non subordinatorum. Ita Scotus 2. D. 3. q. 10. & D. 9. q. 2. §. contra ista. Ratio hujus est; quia una & eadem res creata non potest esse representatio naturalis rerum dissimilium: ergo una species non potest esse creaturarum omnium representativa. 2. Species intelligibilis quoad unitatem se necessario accommodat objecto: ergo cum non possit dari unum objectum creatum in esse cognoscibili continens perfecte plures quidditates rerum, ita neque dari potest aliqua species intelligibilis representans perfecte plures quidditates. 3. Ex hoc, quod essentia Divina possit perfecte representare quævis objecta, inferimus, eam esse infinitam: ergo si daretur quoque species aliqua impressa potens representare quævis objecta, etiam illa deberet esse infinita. 4. Species intelligibiles quidditatum universalium non possunt representare singularia sub principiis naturalibus: nam universale non dicit clare entitatem, vel cognoscibilitatem singularium qua talium, sed ab his præscindit: ergo esto aliqua species representet naturam humanam & universalem, tamen non determinate nec distincte representare potest omnia singularia, & individua humana sub principiis naturalibus individuantibus. Vide dicta in Tract. de Angelis.

Affero.



Affero. Præter scientiam beatam admittenda est in intellectu animæ Christi scientia infusa. Communis cum Scoto. 98  
3. D. 14. q. 3. & q. 4.

Prob. 1. Paulus ad Coloss. 2. dicit de Christo: *in quo sunt omnes thesauri sapientiæ & scientiæ Dei*, seu scientiæ supernaturalis, quæ significatur per *scientiam Dei*; sed inter thesauros scientiæ supernaturalis non est ignobilis portio scientia infusa: ergo etiam hanc Christus habuit.

Prob. 2. Scientia hæc est maxima perfectio, & ornamentum intellectus creati: ergo non est deneganda Christo, maxime, quia non habetur aliquod fundamentum sive ex auctoritate, sive ex ratione denegandi eam.

Igitur Christus habuit 1. scientiam per se infusam, & species per se infusas essentiae Divinæ, ac Dei unius & trini distincte & clare repræsentativas. Ratio est: quia talis species ex una parte non est impossibilis, ut dixi in Tract. de Beatitudine, & universaliter tenent Scotistæ contra Thomistas; ex altera parte decet, animam Christi habere hanc speciem, & ea mediante etiam abstractivè, & quasi in genere proprio cognoscere Sanctissimam Trinitatem: nam est ad maiorem perfectionem animæ Christi, non tantum uno modo per visionem beatificam, sed & omni alio possibili cognoscere essentiam Divinam, & SS. Trinitatem clare ac distincte, & scientifice; quippe & hæc cognitio, licet abstractiva sit, tamen scientifica & clara est: ergo.

Quod autem hæc species & scientia Dei unius & trini sit per se infusa, ratio est: quia solis naturalibus viribus intellectus creati non potest acquiri; cum nullus intellectus creatus solis naturæ viribus possit claram & distinctam cognitionem essentiae & quidditatis Divinæ, seu quoad *quid est*, & SS. Trinitatis acquirere.

Ex hoc habes, quod si unio hypostatica, visio Beatica, entitas physica gratiæ sanctificantis nullo modo natura-



liter possint cognosci ab intellectu creato, tunc etiam Christum eas tantum per scientiam & species per se infusas cognovisse. Secus dicendum, si hæ species & scientia naturaliter potuissent acquiri: ratio hujus patet ex dictis.

2. Anima Christi præter scientiam per se infusam habuit etiam per accidens infusam, naturalem quoad substantiam, & supernaturalem quoad modum, quatenus omnem scientiam naturalem abstractivam, quam successive per species naturaliter comparatas poterat acquirere, habuit simul supernaturaliter à primo instanti suæ conceptionis. Hæc vero scientia, cum sit naturalis quoad substantiam, habet pro objecto solas res naturales, quas Christus modo connaturali poterat cognoscere. Et quamvis Christus potuerit hanc scientiam ipse proprio labore successu temporis acquirere, tamen decentius fuit, ut tota simul infunderetur supernaturaliter, ne quoad hoc Christus inferior foret Adamo, de quo dicitur Eccli. 17. creatus fuit plenus Scientiæ & Sapientiæ.

3. Scientia infusa Christi est perfectior quoad claritatem, & certitudinem cognitionis, & multitudinem specierum infusarum, quam scientia infusa Angelorum. Ita Scotus pro conclusione cit. q. 4. cum communiore contra Thomistas. Ratio est, quia Christus est caput Angelorum, ergo decuit illum habere meliorem, & majorem, seu ad plura quoque objecta se extendentem scientiam infusam, quam habuerunt Angeli. 2. Ob unionem hypostaticam Christus accepit præstantiorem gratiam, quam Angeli: ergo & præstantiorem scientiam infusam.

Nec dicas: Species infusæ, & scientia infusa debet commensurari naturis; sed humana natura est imperfectior, quam Angelica: ergo scientia & species infusæ intellectui Christi sunt imperfectiores, quam illæ, quæ fuerunt infusæ Angelis.

R. trans. M. & D. m. Natura humana Christi in se considerata, & ut præscindit ab unionem hypostaticam, est imperfectior & vilior quam natura Angelica C. m. ut unita Verbo, & per eam quasi deificata N. m.

4. Cre-



4. Credibiliter Christus non habuit, nec accepit species rerum illarum, quas nunquam erat cognosciturus, vel cognovit. Ita Poncius approbantibus Maffrio, & Krisper. Ratio est: quia videntur superflue communicatæ esse species illæ, quæ nunquam erant deservituræ usui. Habuit tamen species infusas omnium essentiarum & specierum creaturarum aliquando actu existentium; quia hæ erant tantum in determinato & finito numero extituræ, & eas cognoscere convenit Domino omnis creaturæ. Iterum habuit species infusas omnium omnino cogitationum & volitionum, quas homines & Angeli essent habituri usque ad diem iudicii extremi: quia & has iudicem vivorum & mortuorum decet cognoscere. Non vero habuit species infusas omnium cogitationum volitionumque tum priorum, tum aliorum futurorum à die iudicii per totam æternitatem, quia hæ erunt infinitæ syncategorematicæ: rursus omnium individuorum, & specierum, seu essentiarum possibilem, nam & hæc individua & species erunt infinitæ syncategorematicæ, ita, ut nunquam ultimum ex individuis possibilibus, & essentiis possibilibus possit assignari: adeoque si habuisset Christus species simul actu infusas omnium istarum rerum, tunc debuisset actu habere infinitas numero species infusas, seu tot, ut ultima nunquam assignari posset, quod est esse infinitum actu, & categorematicæ.

Neque dicas; Ista entia, quæ per species infusas cognoscerentur, esse tantum infinita syncategorematicæ, & non actu: ergo neque species infusæ, per quas cognoscerentur.

R. N. C. illa entia nunquam simul omnia existerent actu, sed tantum semper aliqua in numero determinato, & finito, & tantum essent infinita in potentia, quatenus plura & plura sine fine produci possent: at illæ species infusæ fuissent omnes simul in instanti conceptionis, & sic actu sine numero infinitæ extitissent: ergo fuissent actu infinitæ, sicut & omnia entia possiblem, si simul per impossibile actu existerent, necessario infinita actu forent.

Sed dubitabis, an per scientiam hanc infusam Christus cognoverit aliqua ut præsentia, vel ut præterita, aut ut futura,



tura, sed tantum cognoverit, prout abstrahunt ab existentia pro determinata temporis differentia? Rdent. multi cum Maestro, quod à Christo saltem futura ut futura, per scientiam hanc abstractivam infusam, & per species intelligibiles non possint intelligi. Verum probabiliter potest etiam dici, quod Christus hac scientia potuerit cognoscere non quidem intuitive, sed abstractive præsentia ut præsentia, præterita ut præterita, & futura ut futura: Frassen & alii. Nam. 1. Scotus in 3. D. 14. q. 3. §. *loquendo tamen de cognitione intuitiva* tantum negat, quod intuitive perfecte ejusmodi res possint cognosci per scientiam infusam, vel per species infusas. Item quod possint cognosci intuitive imperfecte tanquam præterita per memoriam relictam ex cognitione intuitiva. Cujus ratio est, quod cognitio intuitiva essentialiter dependeat ab objecto ut præsentem, & non possit fieri mediante specie tali infusa intelligibili, quæ ex se non requirit objectum præsens, sed illud repræsenterat, sive præsens sit, sive non. Non autem absolute negat ibi Scotus, quod nullo modo, neque abstractive possint cognosci ejusmodi futura, vel præterita per species infusas. 2. Nos cognoscimus aliqua futura ut talia, & alia ut præterita, aliqua etiam ut actu existentia v.g. extremum judicii diem, præteritam Nativitatem Christi, existentiam actuale Dei & Angelorum, & habemus tantum horum omnium cognitionem abstractivam, mediantibus speciebus: ergo & Christus potuisset præsentium, præteritorum & futurorum habere cognitionem abstractivam per species, & quidem certam ac infallibilem, ac etiam claram; si enim aliæ circumstantiæ objectorum possint clare repræsenterari per species intelligibiles, cur non etiam præteritis, præsentiis, & futuris?

Neque dicas 1. ad cognitionem futurorum requiritur etiam cognitio Decreti Divini; sed hoc non potest cognosci per speciem & scientiam infusam.

R. Trans. M. N. m. Si enim species per se infusa clare repræsenterativa Dei trini & essentiæ Divinæ potuit infundi, & infusa est Christo, cur non & species aliqua, saltem *per se* infusa,



fusa, potest dari in Christo, quæ repræsentat ejusmodi decreta concernentia omnes res futuras, quarum notitia convenit statui Christi.

5. Christus in usu scientiæ infusæ non debuit se necessario convertere ad phantasmata, potuit tamen, si voluit. Communis cum Scoto. 3. D. 14. q. 3. *in fine* contra Durandum. Ratio primi est, *tum* quia dependentia necessaria intellectus humani à phantasia provenit juxta Scotistas ex peccato originali: ergo in Christo, qui non contraxit peccatum originale, talis dependentia necessaria non habuit locum. 2. Animæ aliorum Beatorum possunt intelligere absque conversione ad phantasmata: ergo & anima Christi, quæ ab instanti conceptionis jam fuit beata. 3. Christus scientiam infusam, & species infusas accepit independentem à phantasmatibus: ergo & illis potuit uti independentem à phantasmatibus: proinde hac scientia etiam uti potuit in Somno.

Quod autem se potuerit convertere ad phantasmata, *ratio est*: quia scientia infusa operationem sensitivam non impediebat. 2. Quia quoque conveniens erat, cognitioni intellectivæ adjungere operationem sensitivam circa objectum tam intellectui, quam potentiis sensitivis commune ob subordinationem, quam habent istæ potentiæ inter se.

6to. Christus in exercitio scientiæ infusæ non indiguit discursu, potuit tamen illo uti pro libitu. Prima pars est communis inter Scholasticos. Altera est Scoti. 3. D. 14. q. 3. §. ad argumenta. n. 8. cum suis, & aliquibus RR. contra Suarez & Vasquez.

Prob. 1. memb. Ideo nos indigemus discursu; quia cognitio principii non statim, vel non perfecte cognoscimus objectum conclusionis; atqui anima Christi per scientiam & species infusas eodem instanti & perfectione eadem cognovit principia & objectum conclusionis: ergo non indiguit discursu.


Prob. 2. membr. Discursus est processus ab una cognitione ad aliam, à priori dependentem; sed anima Christi per



scientiam infusam potuit habere talem processum : siquidem habita cognitione hominis ut rationalis per scientiam infusam , potuit inde deducere aliam cognitionem , quod homo sit risibilis : ergo.

Neque ad discursum essentialiter requiritur ; ut à notis procedamus ad ignota : etenim & de rebus notis facimus saepe discursus & syllogismos. Itaque potuit Christus per scientiam infusam omnia cognoscere vel simplici intuitu & apprehensione , aut iudicio immediato , vel etiam per Discursum , prout volebat. Cum scientia infusa subsit imperio voluntatis Christi , & propter perfectionem suam omnes hos modos comprehendat.

Ex quo colligis distinctionem inter habitum primorum principiorum , & scientiæ infusæ : prior enim propter suam limitationem includit tantum unum modum cognoscendi , per simplicem intuitum , vel iudicium immediatum , non vero alter , utpote longe perfectior. Objectiones , quia etiam impugnant scientiam experimentalem Christi , solventur proximo articulo. Quare sit.



### ARTICULUS III.

*An Christus præter Scientiam beatam, & infusam habuerit aliquam scientiam acquisitam, experimentalem ?*

§. I.

*Statuitur Conclusio.*

98 **N**OTA. Quæstionem esse , an anima Christi , licet perfecte omnia in Verbo viderit , & scientiam infusam habuerit perfectissimam , tamen præterea etiam aliquam Scientiam propria industria & viribus naturalibus obtinuerit. H. N. Affero. 1.



Affero 1. Præter Scientiam beatam, & infusam habuit Christus etiam scientiam aliquam acquisitam propriis viribus seu experimentalem. Ita Scotus 3. D. 14. q. 3. §. loquendo tamen n. 6.

Prob. 1. Lucæ 2. dicitur: *JESUS proficiebat sapientia, & ætate, & gratia apud Deum, & homines*: ergo cum Christus non potuerit proficere in Scientia beata, vel infusa, cujus utriusque plenitudinem sibi convenientem juxta mensuram positam à voluntate Divina jam acceperat in instanti conceptionis, debuit dari alia scientia scilicet acquisita experimentalis, qua cognovit objecta, prout se se ipsi offerebant existentia, & præsentia; & quam scientiam non totam simul habuit in instanti conceptionis, sed successive obtinuit, sicut non omnia objecta, quæ per totam vitam experimentaliter cognovit, jam tunc in instanti conceptionis erant existentia, & præsentia.

Prob. 2. ad Hebræ. 5. v. 8. dicitur de Christo: *didicit ex iis, quæ passus est, obedientiam*: ergo habuit scientiam experimentalem, secundum quam experimentaliter didicit patientiam & obedientiam, quatenus exercens actus patientiæ & obedientiæ, ab iis ipsis actibus lumpsit in se patiendi & obediendi experientiam.

Prob. 3. S. Ambrosius L. de Incarnationis dominicæ Sacramento ait: *sensus hominis (nempe Christi) profecit, sicut scriptum est, Jesus proficiebat ætate, sapientia, & gratia. Profectus est ætatis, profectus sapientiæ, sed humana est: ergo si proficiebat ætate hominis, proficiebat sapientia hominis; sapientia autem sensu (seu experientia) proficit, quia à sensu sapientia.*

Prob. 4. rationibus S. Bonaventuræ, cujus verba allegata videre potes apud nostrum Frassen. 1. Christus qua homo triplicem statum in hac vita expressit, scilicet statum Beati, hominis innocentis, ac hominis viatoris: ergo etiam habuit scientiam triplici statui convenientem, visionem beatificam tanquam Beatus, infusam ut Adam, tanquam innocens, & cognitionem pænalis experientiæ tanquam Viator.



2. Anima & scientia Christi perfecta fuit non solum respectu cognoscibilium objectorum, sed etiam respectu modorum cognoscendi, seu non cognovit solum omnes res convenienter cognoscibiles, verum etiam omnibus modis, quibus cognosci poterant; atqui triplex modus cognoscendi objecta creata & existentia possibilis est in anima Christi, nimirum possunt cognosci in Verbo per scientiam beatam, & abstractivam, in proprio genere per scientiam infusam, ac tandem possunt intuitive videri iterum in proprio genere; ergo hoc triplici modo anima Christi cognovit creaturas existentes, ac sibi debite præsentes.

99

Ex his deduces 1. Scientiam experimentalem in Christo non fuisse abstractivam. Ita Scotus cit., ac Scotistæ communiter contra Thomistas, ac D. Thomam. 3. p. q. 9. art. 4. & q. 12. ratio hujus est; anima Christi jam ab initio conceptionis habuit infusam scientiam abstractivam in ea plenitudine, quæ juxta capacitatem intellectus Christo conveniebat: ergo eam non potuit amplius acquirere; imò nec augere. Et licet alias virtute naturali intellectus soleat species intelligibiles abstrahere ab objectis, tamen hoc non amplius fit, quando intellectui jam insunt omnes species, quas naturali virtute comparare posset; atqui Christo jam insunt tales species, utpote à Deo infusæ: ergo.

2. Scientia ista abstractiva proprio exercitio à Christo comparata non distingueretur specie ab infusa per accidens, sed esset ejusdem rationis cum ea, ut jam dixi prius. Neque per acquisitam alio modo cognosceretur objectum, quam per infusam: ergo ejusmodi scientia naturaliter acquisita penitus esset superflua in Christo.

Deduces 2. Scientia experimentalis Christum intuitive in proprio genere, & in se ipsis cognovisse omnia individua mortalia & immortalia, quæ & quando erant ipsi unquam præsentia, & intra sphaeram activitatis suæ naturalis. Ita ex Scoto, Maftrius cum aliis Scotistis. Ratio est, quia hæc scientia experimentalis intuitiva est magna perfectio potentiae intellectivæ: ergo ea est tribuenda Christo. 2. Angeli & Bea-  
ti



ti non obstante visione beata, & infusa intuitive propriis viribus naturalibus cognoscunt objecta debite ipsis presentia: ergo etiam anima Christi. Hæc ergo scientia non semper est eadem, nec per eam anima Christi omnia objecta simul, sed successive alia & alia intuitive in se ipsis videbat experimentaliter; quia non omnia simul, sed tantum successive habuit presentia.

Deduces 3. Hanc scientiam experimentalem & naturalem intuitivam esse imperfectiorem cognitione intuitiva Angelica. Ratio est, quia hæc cognitio est mere naturalis, & meris viribus naturalibus obtinetur: ergo se accommodat solis viribus naturalibus intellectus humani Christi: Atqui vires naturales intellectus humani in Christo sunt imperfectiores, & debiliores virtute naturali intellectiva Angelica: ergo & talis cognitio intuitiva est imperfectior. Aliud est de visione beatifica, & scientia infusa, nam in his concurrunt aliqua principia supernaturalia, nimirum lumen gloriæ, & ad scientiam infusam, species à Deo infusæ, & probabiliter etiam habitus infusus, quæ principia naturalia sunt perfectiora in anima Christi, quam in Angelo, adeoque suppleant omnem defectum virtutis naturalis, & intellectum Christi ita elevant, ut plus & perfectius operetur, quam intellectus Angelicus.

Deduces 4. Ad scientiam experimentalem etiam reduci posse memoriam habitæ cognitionis intuitive naturalis in proprio genere, & objectorum per talem cognitionem experimentalem visorum, quam cognitionem rememorativam Scotus pro conclusione citatus vocat intuitivam, quia præsupponit cognitionem intuitivam objecti presentis aliquando habitam, & ab ea dependet. Ratio hujus est: quia remanet ex objecto intuitive cognito aliqua species intelligibilis, vi cuius anima Christi postea meminisse potest tam cognitionis intuitivæ præhabitæ, quam ipsius objecti intuitive cogniti.

Deduces 5. In Christo nullam fuisse ignorantiam privativam, id est, nullum defectum scientiæ ipsi debitæ, & convenientis. Ratio est, licet enim Christus ab initio non cognoverit



rit aliqua per scientiam experimentalem, cognovit tamen omnia per scientiam infusam aut beatam actu, aut saltem habitu, quod sufficit ad excludendam omnem ignorantiam, ut notatum est in responsione ad 1. objectionem. Accedit S. August. qui L. 2. de peccatorum meritis c. 29. dicit: *ignorantiam nullo modo crediderim fuisse in infante illo, in quo Verbum caro factum est, ut habitaret in nobis.* Similia etiam habent alii PP.

Dices 1. Matth. 26. ait Christus: *Pater, si possibile est, transeat à me calix iste*: ergo ignoravit, an sit possibile. R. N. C. sensus istius propositionis conditionatus est: si possibile esset, rogo, ut transeat, cum autem sciam, non esse possibile, fiat voluntas tua. Qui sensus nullam significat ignorantiam.

Dices 2. ad Hebræ. 2. Christus debuit per omnia fratribus assimilari: ergo etiam in ignorantia nobis similis factus est. R. To omnia in similibus textibus in sensu accommo accipi debere, maxime tunc, quando alias Christo tribuendum foret aliquid inconueniens.

Dices 3. Christus sapius interrogavit more ignorantium, velut de Lazaro, ubi posuistis eum? ergo ignoravit aliqua. R. 1. retorq. argum. in sacra scriptura etiam Deus sapius interrogavit more ignorantium: ut: Adam ubi es? ergo etiam Deus habuit ignorantiam. R. 2. Christus interrogavit non ex ignorantia, sed ex prudentia, ut inde ansam arriperet vel populum docendi, vel potentiam suam manifestandi.

Dices 4. Fuit in Christo admiratio; sed admiratio supponit ignorantiam, quia miramur res insolitas nondum visas: R. 1. cum D. August. epist. 151. duplex est genus admirationis, unum, quo miramur res insolitas, non cognitae antea: alterum, quo miramur res magnas raro fieri solitas, licet jam cognitae. Prima admiratio est argumentum ignorantiae, altera laudis. Posterior tantum teste S. August. in Christo data fuit. R. 2. admiratus est Christus aliqua, quae & quia prius non scivit experimentaliter, non vero, quia non scivit alia scientia. In hoc sensu JESUS etiam profecit sapientia



tia tantum experimentalis. Diem vero iudicii non ignoravit simpliciter, sed tantum non habuit scientiam ejus aliis communicabilem, seu ut loquitur D. August. ad manifestandum.

Dices. 5. Christus habuit defectum eloquentiæ, ergo & scientiæ. R. N. C. & parit. distinctionem duplicem dat S. Bonaventura, defectus eloquentiæ & virium, uti & cæteræ infantiles infirmitates, cum essent externæ, serviebant ad manifestandam veritatem naturæ humanæ assumptæ, defectus vero sapientiæ, cum esset internus ad nihil deservisset. 2. Defectus priores externi sunt materia exercendæ virtutis, patientiæ, & fortitudinis: defectus cognitionis ad nullam virtutem utilis esse potest, imo virtutis exercitium impedit.

Deduces 6. In Christo non fuisse errorem, vel ignorantiam prævæ dispositionis. Ratio est: quia alias non fuisset plenus omni sapientia, neque talis defectus decuisset statum supremi Doctoris, & Beati, qualis erat Christus. Si autem aliquod periculum errandi fuisset, tunc ejusmodi error facillime curari potuit per scientiam infusam & beatam. Neque obstat, quod sensus Christi v.g. oculi interdum objectum aliter apprehenderint, ac in se erat, v.g. oculi solem minorem, ac in se est, tamen hic error, si aliquis est, non ascendit in intellectum, qui independentem à sensibus habuit plenam cujusvis rei scientiam.

Deduces 7. In Christo non fuisse, nec esse cognitionem probabilem, vel opinionem, nec cognitionem obscuram, seu fidem. Ratio est: quia hæ cognitiones imperfectæ non dantur in Beatis: ergo neque in Christo. 2. Habent annexas imperfectiones dedecentes intellectum, cui concessa est summa sapientia, quam aliqua creatura juxta modernam providentiam habere potest: nam opinio vel cognitio probabilis nititur fundamento fallibili, & fides involvit obscuritatem, & invidentiam. Hæ igitur imperfectiones excluduntur primo remote & radicaliter per unionem hypostaticam, quæ exigit intellectum plenum omni sapientia, & ex omni parte perfectissimum,



simum, proxime autem has imperfectiones ab intellectu exulare facit visio beatifica, & denegatus concursus Divinus ad eas.

Deduces 8. Omnes sensus Christi probabiliter habuisse evidentiam metaphysicam; quia evidentia physica adhuc est fallibilis, & saltem de potentia Dei absoluta res aliter se habere potest, quam per ejusmodi cognitionem repræsentatur.

Deduces. 9. Christum non indignuisse ullo Magistro instruente. Ratio est: quia aliunde jam omnia scivit per scientiam suam beatam, & infusam, & experimentaliter etiam omnia, quæ se se ipsi offerebant, clare ac sine impedimento potuit cognoscere. Talis modus instruendis quoque non conveniebat Magistro omnium.

§. II.

Solvuntur Objectiones.

100 Objic. 1. In eodem intellectu non potest simul stare scientia & opinio, vel fides & scientia: ergo neque scientia beata, infusa, & acquisita.

R. N. C. Ideo opinio & fides non possunt stare cum scientia; quia fides ratione suæ obscuritatis, & opinio ratione suæ fallibilitatis opponuntur evidentiae, & certitudini scientiæ: consequenter scientiæ infusa & acquisita in Christo sunt evidentes, & infallibiles; hinc non repugnant evidentiae visionis beatificæ. Et sane hæ tres cognitiones scientificæ debent admitti in Beatis: ergo etiam in Christo possunt, & debent admitti. A. prob. 1. debent admitti in Beatis visio beata, & scientia infusa juxta D. August. qui quæstione 26. ad Orosium dicit: *cognitio creaturæ in semetipsa est vespere*, in Deo (seu Verbo) est mane. & L. 4. super Genesin ad literam laudatus Doctor dicit: *simul in cælesti patria est mane & vespere*. Secundo debet etiam admitti cum visione beata in Angelis & Beatis intuitiva experimentalis, qua ipsa acies naturalis intellectus objecta præsentia attingit: hanc enim virtutem naturalem Deus per statum beatitudinis non fustulit, sed tantum per dona supernaturalia perfecit.

Objic. 2.



Objic. 2. præsentē cognitione perfectā excluditur omnis cognitio imperfecta; sed scientia infusa, & acquisita respectu beatæ sunt imperfectæ: ergo præsentē beatifica excluduntur ab intellectu humano Christi.

R. D. M. præsentē cognitione perfectā excluditur cognitio absolute imperfecta, & quæ aliunde habet repugnantiam vel cum cognoscente, vel cum cognitione perfectiore. C. M. imperfecta tantum comparative, seu respectu perfectioris, & quæ ex se nec cognitioni perfectiori, nec ipsi habenti cognitionem perfectiorem opponuntur N. M.

Objic. 3. Lumen minus excluditur, vel obfuscat per majus, ut lumen stellarum per lumen meridianum solis: ergo etiam lumen majus scientiæ beatificæ excludit, & obfuscatur omnem vim scientiæ infusæ, & acquisitæ.

R. D. a. Si sit lumen ejusdem ordinis C. a. si sint lumina diversi ordinis N. a. quia lumen solis est ejusdem ordinis & speciei cum lumine stellarum, imo & cum lumine candelæ alicujus, ideo majus seu solare minora lumina obfuscatur. Ast scientia beata intuitiva in Verbo, ac abstractiva infusa, & intuitiva experimentalis in proprio genere sunt tres scientiæ diversi ordinis & generis, ac diverso modo & medio ducunt in cognitionem objecti: ergo una alteram non impedit.

Objic. 4. Anima Christi præter scientiam beatam non potest habere fidem etiam Divinam & infallibilem: ergo neque scientiam infusam, vel acquisitam.

R. N. C. & parit. Fides est essentialiter obscura, non vero scientiæ infusæ, & acquisitæ. quæ sunt essentialiter evidentes & claræ: hinc fides, non vero prædictæ scientiæ repugnant statui Beati, & Doctoris, ac Magistri hominum.

Objic. 5. juxta dicta in tract. de Deo uno, & claram Scoti sententiam Deus solum potest videre & cognoscere creaturas mediate seu mediante essentia, & in ea, non vero in se ipsis, seu in proprio genere: ergo & anima Christi tantum  
*P. Kick Theol. Tom. IV.*                      Z                      potest



potest creaturas cognoscere in essentia Divina, seu Verbo per visionem beatam, non autem in proprio genere per scientiam infusam, aut acquisitam. Prob. c. ideo Deus non potest immediate in se ipsis & in proprio genere cognoscere creaturas, quia esset imperfectio sic cognoscere: ergo etiam ideo non potest anima Christi.

R. 1. retorq. argum. Deus potest tantum videre creaturas per intellectum sibi realiter identificatum: ergo etiam anima Christi sic tantum videre potest per intellectum ipsi realiter identificatum.

R. 2. N. c. & parit. Cognoscere creaturas in se ipsis, seu in proprio genere dicit quidem perfectionem, sed mixtam imperfectione, adeoque animæ Christi ceu creaturæ, non vero Deo potest convenire, sicut & plures alias perfectiones mixtas in se habet anima Christi, ut lumen gloriæ, habitum charitatis, actus amoris & visionis, qui sunt accidentia realiter distincta ab anima Christi, quæ tamen non possunt competere Deo. Ratio rationis. Cognoscere res in proprio genere abstractive & intuitive est perfectio connaturalis debita cuilibet intellectui creato, consequenter etiam intellectui creato Christi. Nam cum alio modo naturaliter intellectus creatus objecta creata non possit cognoscere, ipsi simpliciter melius est taliter posse cognoscere creaturas, quam si nullatenus viribus naturalibus eas intelligere posset. Jam perfectiones naturales in anima Christi unio hypostatica vel beatitudo non tollit, sed tantum perficit, & dona supernaturalia superaddit.

Objic. 6. SS. PP. testantur, Christum tantum apparenter profecisse in sapientia: ergo. R. D. a. & hi loquuntur de scientia beata, ac infusa, cujus utriusque plenitudinem jam in conceptione accepit, nec in ea augmentum vel detrimentum accepit per totam vitam C. a. in scientia acquisita N. a. vel possunt isti textus omnino intelligi de scientia Divina, in qua non potuit proficere. Quam explicationem confirmat Rupertus L. 1. in Genesin. c. 21. ubi locum Isaia 11. tractans,







*luntas, sed tua fiat. Et Joan. 5. non quero voluntatem meam, sed ejus, qui misit me*, quæ loquendi figuræ significant, quod Christus habeat aliam quoque voluntatem, quam Pater Divinus: ergo ultra Divinam Christo & Patri communem habet humanam propriam. Accedit ratio à PP. contra Monothelitas usurpata. Verbum assumpsit naturam humanam integram & perfectam cum suis proprietatibus: ergo etiam assumpsit voluntatem & intellectum humanum. Adhæc in Christo fuit obedientia; sed obedientia non est actus voluntatis Divinæ: ergo humanæ. Denique meritum, quod essentialiter est obsequium, non potest itare nisi in voluntate creata: ergo præter voluntatem Divinam in Christo dabatur creata, seu humana, quam proinde frustra Monothelitæ denegant Christo. Historia Monothelitarum relata est Tomo I. Theologiæ hujus universæ, seu de prolegomenis pag. 313. & seq. hæc res igitur ibi relegenda est.

---

## ARTICULUS I.

*An voluntas humana Christi semper fuerit  
Divinæ conformis, & an semper  
fuerit impleta?*

102 Nota 1. Machorium Monothelitam ne teneretur dicere voluntatem humanam Christi fuisse contrariam Divinæ, tantum adstruxisse unam voluntatem scilicet Divinam in Christo, igitur contra hanc explicanda est concordia utriusque voluntatis, etsi distinctæ. Hinc.

Nota 2. Dupliciter posse voluntatem humanam conformari Divinæ, scilicet in volito materiali, si homo idem vult, quod Deus: ut si Deus & homo volunt mortem. Deinde etiam in volito formali, quando Deus & homo non solum idem volunt, sed etiam sub eadem ratione, & motivo: ut si Deus & homo velint mortem tanquam utilem reipublicæ.

Nota 3



Nota 3. Duas volitiones spectari posse in homine. Una est efficax & absoluta, qua homo attentis omnibus & consideratis rem aliquam vult absolute, altera est inefficax, & conditionata quædam complacentia, vel simplex affectus, & sic conditionate explicatur, *placet mihi hoc, vel vellem hoc, si esset possibile, si non esset impedimentum.* Verum has duas volitiones efficacem, & inefficacem, quarum una efficaciter volo aliquid, & altera inefficaciter id ipsum nolo, non esse contrarias nec oppositas, & simul posse stare in eadem voluntate, inferius dicetur.

Affero 1. Humana Christi voluntas efficax fuit in omnibus Divinae voluntati conformis tam quoad volitum materiale, quam quoad formale: est communis PP. & Theologorum Sententia.

103

Prob. 1. Ex Synodo 6. generali seu Constantinopolitana Tertia, ubi ait Art. 4. in Epist. Agathonis Papæ ad imperatorem: *cum duas autem naturas, duasque naturales voluntates, & duas naturales operationes constitemur in uno D. J. Christo, non contrarias eas, nec adversas eas ad alterum dicimus, sicut à via veritatis errantes Apostolicam traditionem accusant: absit hæc impietas à fidelium cordibus.*

Prob. 2. Ex S. Script. Joan. 8. v. 29. Christus dixit: *ego, quæ placita sunt ei, facio semper.* & Joan. 4. *meus est, ut faciam voluntatem ejus, qui misit me: ergo.*

Prob. 3. ratione. 1. Decuit Christum, ut voluntas ejus humana nil efficaciter vellet, nisi & illud vellet voluntas Divina. 2. Christus per scientiam beatam & infusam novit omnia, quæ vult Deus: ergo & illa omnia fecit, quia non venit suam humanam, sed voluntatem Divinam facere.

Objic. Christus noluit mortem, quam tamen voluit Pater: ergo Christus habuit voluntatem contrariam voluntati Divinae. a. quoad 1. memb. patet ex illa oratione Christi in monte Oliveti Matth. 26. *Pater mi, si possibile est, transeat à me calix iste.*

104



R. D. 1. memb. a. Christus noluit mortem voluntate efficaci N. a. voluntate inefficaci, cum qua adhuc stabat voluntas efficax illam subeundi, ut claret à sequentibus verbis; *verumtamen non sicut ego volo, sed sicut tu.* c. a. Christus quidem in horto inefficaciter refugiebat mortem tanquam naturæ contrariam & acerbam, simul tamen efficaciter eam appetebat tanquam à Patre Divino volitam & injunctam. Quæ nolitio inefficax ex alio motivo elicitæ non est in rigore contraria, aut opposita volitioni efficaci ejusdem mortis; unde possunt simul stare in eadem voluntate. Taliter enim mercator inefficaciter potest velle servare merces, si tempestas non urgeat earum jactationem, & simul tempestate id exigente, ex amore servandi vitam potest velle efficaciter ejectionem mercium. Imo ipse Deus effective inefficaci & conditionato affectu vult omnium salutem, quamvis efficaciter & absolute plures nolit ad salutem pervenire, modo in Tract. de Deo uno explicato. Deinde illam ipsam nolitionem inefficacem mortis habuit Christus ex ordinatione Divinæ voluntatis ob rationes indicandas n. 106. ergo illa nolitio nullo modo contraria, sed optime conformis fuit voluntati Divinæ.

Dices: Ex his verbis: *Pater si possibile est*: colligit Agatho Papa in Epist. pro conclusione allegata in Synodo 6. duplicem in Christo esse voluntatem, unam Divinam, alteram humanam: ergo voluntas fugiendæ mortem fuit efficax. Nam ut recte responsum est, ex voluntate inefficaci fugiendæ, & voluntate efficaci subeundi mortem non sequitur contrarietas, consequenter nec distinctio voluntatum.

R. N. C. Non ex nolitione efficaci mortis, quæ in Christo non fuit, neque per hæc verba significabatur, sed ex modo proferendi hæc verba Agatho colligit voluntatem duplicem in Christo. Nam Christus protulit ea 1. cum tristitia, & timore. 2. per modum orationis. 3. dicendo, *non mea, sed tua voluntas*, quæ omnia humanam à voluntate Divina distinctam, consequenter duplicem voluntatem indicant. Nam tristari, & timere, orare, ac se submittere voluntati alienæ non est voluntatis Divinæ, has imperfectiones nescientis, sed humanæ.

Afferro 2.



*An Voluntas humana Christi fuerit Divina conformis ?* 183

Assero 2. Humana Christi voluntas efficax semper fuit impleta. Herinx, Henno cum Communi aliorum.

105

Prob. Voluntas humana efficax Christi fuit semper conformis voluntati efficaci Divinae : ergo fuit semper impleta : nam efficax voluntas Divina necessario impletur , proinde & humana Christi , quæ efficaciter idem solum volebat , quod Divina. a. patet ex dictis : & utique Christus imprudenter egisset , si sciens , quæ sit voluntas efficax Dei , aliud & oppositum efficaciter intendisset.

Objic. Christus efficaciter voluit latere , & non potuit : ergo voluntas efficax Christi non fuit semper impleta. a. constat ex illo Marci 7. v. 24. ubi de Christo dicitur : *ingressus Domum , neminem voluit scire , & non potuit latere.*

R. D. a. voluit efficaciter undequaque N. a. voluit efficaciter aliqua non tamen omni ratione C. a Christi voluntas , qua latere voluit , fuit quidem efficax eatenus , quia ad latitandum adhibuit omnia media naturalia , & humana ; non fuit autem absolute efficax & omnimode , quia ultra media ordinaria humana , noluit adhibere supernaturalia & extraordinaria. Hæc ergo voluntas , quæ non fuit in Christo undequaque efficax , aliquando non est impleta. Nos vero loquimur de absolute undequaque efficaci. Hoc modo etiam explicandus venit Agatho Papa , dum distinctionem inter voluntatem Divinam , & humanam in Christo colligit ex eo , quia quidquid voluntas Divina voluit , impletum est , non vero quidquid humana : ubi etiam loquitur de voluntate humana aliqua ex parte , non vero omnimode efficaci.

Assero 3. Voluntas humana Christi inefficax non fuit semper impleta. Herinx , Gormaz , Henno , & alii. Ratio est : quia Christus qua homo ineffaciter voluit non mori , & tamen mortuus est : ergo ejus inefficax voluntas non fuit semper impleta. Nec hoc indignum Christo : quia etiam voluntas Divina effective inefficax salvandi omnes , non impletur in omnibus. Neque illa voluntas conditionata & inefficax

105



efficax fugiendi mortem fuit inutilis : nam varias ob causas , ita ordinante Deo , Christus illam voluntatem inefficacem habuit. 1. quidem , ut ostenderet in se veritatem susceptæ carnis , quæ naturaliter mortem horret. 2. ut præberet exemplum Martyribus mortem acceptandi , etsi naturæ terribilis appareat , & natura eam abesse velit. 3. ut eosdem Martyres doceret , martyrii meritum non tolli , licet mors timeatur. 4. ut instrueremur , quod licite & meritorie à Deo , cum debita tamen resignatione in voluntatem Divinam , possimus petere liberari à tribulationibus. 5. ut dum in nobis advertimus similes voluntates inefficaces , quibus malum præsens vel imminens fugimus , non statim credamus omne meritum esse perditum. Ob has causas Divina ita ordinante voluntate , anima Christi admisit ejusmodi nolitionem inefficacem.

\*Ex quo sequitur , non fuisse in Christo perfectius , patienter & fortiter mortem & passionem tolerare , quam petere , ut transeat calix ejus : nam Christus hanc orationem non peregit , nec hanc inefficacem voluntatem seu nolitionem mortis tam acerbæ admisit ut homo privatus in solatium suæ naturæ , sed ut Caput & Doctor in instructionem suorum membrorum infirmorum , & suorum affeclarum. Quid de Honorio Papa in materia Monothelismi sit censendum , citato loco in Prolegomenis fufius invenies.

## ARTICULUS II.

*An voluntas humana Christi fuerit ligata veris legibus, & præceptis?*

107 **N**ota 1. Legem dividi in naturalem & positivam. Lex naturalis est voluntas Dei necessario obligantis , intimata nobis per lumen rationis , cuivis homini inditum. Lex positiva est , quæ à Deo vel alio Superiore legitimo non necessario , sed libere fertur. Unde lex positiva alia est Divina



vina, quæ immediate à Deo libere fertur, & alia est humana, quæ ab homine potestatem ferendi leges habente conditur.

Nota 2. In præceptis & legibus duplicem esse vim obligandi, scilicet unam directivam, quæ est vis obligandi, & facit, ut actus præceptus sit necessarius ad rectitudinem, & honestatem virtutis, ita, ut transgressor præcepti ponat actum inhonestum, vel oppositum rectitudini & honestæ virtuti. Altera est vis coactiva, seu comminativa certæ pænæ, quæ statuitur in transgressorem legis. Vis directiva est necessaria ad præceptum & legem; quia per eam constituitur regula morum inducens obligationem, quod est de essentia præcepti & legis. Vis vero comminatoria tantum accessoria est legi, & ab ea abesse potest, maxime si ejus nulla sit necessitas, utpote si subditus, cui præceptum datur, sine comminatione paratus est observare legem.

Neque Pilatus habuit potestatem jurisdictionis in Christum, sed tantum ejus potestas fuit physica, & ex permissione Divina, qualem omnes impii habent in eos, quibus malefaciunt. Quare Pilati sententia fuit injusta.

Nota 4. Nec humanitatem Christi fuisse obligatam legibus positivis Divinis veteris vel novi Testamenti. Nam Christus venit potius, ut legibus veteris Testamenti tanquam umbris & figuris finem faceret luce veritatis suæ. Adimplevit quidem eas, ast sine obligatione orta ex veteri testamento, vel ejus præceptis: observavit ergo illas ex aliis motivis, videlicet, ut ostenderet eas esse bonas, ac à Deo latas, & ut præberet humilitatis exemplum, ac vitaret scandalum. Leges vero novi testamenti non congruebant statui Christi, hæ enim respiciunt fidem, & Sacramenta, quibus ipse non indigebat. Præterea leges tam veteris quam novi Testamenti tangunt homines, quia puros viatores, & peccatores, vel saltem habentes potentiam proximam moralem peccandi; Christus vero qua homo non fuit purus viator, sed simul comprehensor, ac fuit impeccabilis: ergo.



Unde licet legislator civilis indirecte, & quoad vim directivam propriis legibus obligetur, quando materia legis æque ad legislatorem, ac ad subditos spectat, non potuit tamen Christus suis legibus in testamento novo conditis stringi, quia non est ejusdem status ac conditionis cum subditis. H. N.

108

Affero 1. Humanitas Christi fuit ligata veris ac rigorosis præceptis, obligantibus vi directiva. Mezger, Henno & alii communis contra Vivam, & alios, putantes Christum ob impeccabilitatem suam fuisse veri præcepti incapacem.

Prob. 1. Joan. 15. dicit Christus: *si præcepta mea servaveritis, sicut & ego Patris mei præcepta servavi.* Jam in hoc textu Christus comparat præcepta sibi à Patre data cum præceptis, quæ dedit Apostolis; atqui præcepta, quæ Christus dedit Apostolis, fuerunt vera & rigorosa præcepta: ergo etiam præcepta data Christo à Patre fuerunt rigorosa & vera præcepta. Adde, verbum præcepti in proprio & obvio sensu, in quo Sacra Scriptura, nisi aliquid obstat, accipi debet, significare verum & stricte dictum præceptum.

Prob. 2. ratione. Si humanitas Christi fuit capax præcepti stricte talis, tunc illud habuit; sed fuit capax præcepti stricte talis: ergo habuit præceptum stricte tale. M. concedunt AArii, quia ideo solum negant, Christum habuisse præceptum strictum; quia est incapax. m. prob. natura rationalis, quæ non est sua suprema regula, & habet supra se virtutem, ac jurisdictionem superiorem, est capax præcepti obligatorii: neque ad hanc plus requiritur, quam potestas jurisdictionis in præcipiente, & subiectio naturæ liberæ & rationalis. Atqui humanitas Christi non erat sua suprema regula, & habebat supra se voluntatem Divinam, cui non minus in humanitatem Christi, quam alias creaturas convenit suprema jurisdictio: ergo.

Confirm. Voluntas humana Christi non erat ex intrinsicis suis indefectibilis, imo juxta dicenda habuit libertatem physicam ad omittendum actum præceptum: ergo potuit legibus stringi.

Affero. 2.



Affero 2. Christus fuit ligatus quoad vim directivam præceptis naturalibus stricte talibus. 2. uti & positivis illis, quæ ad ejus statum pertinent, inter quæ est præceptum moriendi. Communior inter Theologos.

109

Prob. 1. pars: Christus erat verus homo; sed in omnium hominum cordibus scripta est lex naturalis: ergo etiam in corde Christi. 2. Christus ut creatura rationalis obligabatur rationaliter vivere, quæ est obligatio legis naturalis: ergo obligabatur lege naturali.

Dices cum Haunoldo. Christus non tenebatur præceptis naturalibus, ut obligantibus, sed objecta præceptorum naturalium erant Christo impossibilia ratione suæ impeccabilitatis.

Contra est 1. Præcepta naturalia respectu Christi non erant mera consilia. 2. Cur sunt objecta ista impossibilia impeccabili humanitati, nisi quia præcepta sub peccato obligabant ad illa objecta omittenda? certe non ex alia ratione: ergo adhuc præcepta naturalia vere obligabant humanitatem Christi.

Prob. 2. pars. Quam supponit Scotus 3. D. 16. q. 2. circa finem dicens: *Christus quia homo accepit mandatum à Patre ponendi animam.* prob. igitur 1. Joan. 14. v. 31. Christus locutus de morte sua dixit: *sicut mandatum dedit mihi Pater, sic facio.* & Joan. 10. v. 18. ait: *nemo tollit eam (vitam seu animam) à me, sed ego pono eam à me ipso, & potestatem habeo ponendi eam, & iterum sumendi eam. Hoc mandatum accepi à Patre meo: ergo habuit Christus qua homo præceptum rigorosum, & verum moriendi. Nam mandatum in proprio & obvio sensu (in quo verba Sacræ Scripturæ accipiuntur, nisi aliquid inconueniens obstat) significat verum & proprie dictum præceptum.*

Prob. 2. D. Paulus ad Rom. 5. opponit obedientiam Christi inobedientiæ Adami: ergo sicut inobedientia Adami comedentis de fructu vetito præsupponit præceptum proprie tale, ita & obedientia Christi præsupponit proprie & dictum præceptum.



Prob. 3. D. August. T. 79. in Joan. ait : quod Christus fuerit obediens voluntati & præcepto Patris, & quod Pater fuerit præcipiens : & S. Damascenus L. 3. de fide c. 2. verba Sacrae Scripturae, quibus significatur, Christum accepisse à Patre mandatum, in sensu proprio accipit, Quare licet alibi verbum præcipit, vel mandatum in sensu improprio accipiat, ut Matthæi 8. præcepit, ut discumberent, non tamen hic ; ut colligitur ex probationibus nostris.

Objic. 1. Si ex textu Joan. 10. allegato in prima probatione aliquid probaretur, tunc Christus habuisset strictum mandatum resurgendi ; sed non habuit strictum mandatum resurgendi ; ergo. M. patet. quia verba illa ; *hoc mandatum accepi à Patre meo*, se reflectunt supra prima : ergo si Christus habuisset strictum mandatum per mortem ponendi animam, habuisset quoque tale præceptum per resurrectionem sumendi illam.

R. N. C. Præceptum se tantum reflectit supra humanitatem Christi pro statu, quo fuit capax præcepti, seu quo fuit viator, & mereri potuit, cum autem status viæ cessavit in morte, & ibi cessavit ratio præcepti. Igitur hoc mandatum se ultra mortem non extendit.

Objic. 2. Præceptum moriendi in Christo impeccabili fuisset superfluum : ergo hoc ipsi non fuit impositum. R. N. a. per hoc præceptum ostenditur maxime amor Dei præipientis redemptionem. 2. Vi illius magis opponitur mors Christi inobedientiæ Adæ. 3. Per illud quoque mors Christi fuit magis meritoria, & in majus exemplum humilitatis & obedientiæ. Accedit, humanitatem Christi non fuisse simpliciter & absolute impeccabilem.

Objic. 3. Præceptum Christo impeccabili impositum facit sensum hunc ridiculum : *si exercueris potentiam proximam peccandi, quam non habes, comittes actum inhonestum, & incurres reatum odii mei, aut displicentiæ meæ* ; sed hic sensus est indignus Deo præcipiente : ergo Deus non dedit Christo quod homini aliquod præceptum proprie tale.


R. I.



R. 1. Non est sensus ridiculus istius propositionis: *si Deus diceret mendacium, quod tamen dicere non potest: esset fallax: ergo neque iste sensus esset ridiculus: si humanitas Christi transgrederetur hanc meam voluntatem, quam tamen non potest transgredi, faceret actum inhonestum, incurreret reatum mei odii, vel meae aversionis.*

R. 2. N. M. nam juxta dicenda humanitas Christi habet potentiam proximam physicam peccandi, quamvis strictissime moraliter necessitetur ad non peccandum: adeoque secundum nos præceptum Christo impositum ita exponi debet: *si potentiam proximam physicam in actum deduxeris, incurres aliquam irreverentiam contra honestatem.*

Objic. 4. SS. Patres affirmant, Christum qua hominem non habuisse verum aliquod præceptum: ergo. R. N. a. SS. Patres Chrysostomus, Basilus, & alii negant solum, Christo qua Deo esse impositum præceptum, vel si loquuntur de Christo qua homine, tunc dicunt, non esse ei impositum præceptum comminatorium, vel coactivum, vel ex necessitate, quasi Christus aliunde non fuisset paratus ad moriendum, In hoc sensu aperte loquitur D. Anselmus: *Non illi Pater, ut moreretur, NB. cogendo præcepit, sed ille, quod Patri placitum, & hominibus profuturum intellexit, hoc sponte fecit.* Neque mors ex præcepto tolerata obstat libertati Christi: nam & nos libere exsequimur præcepta nobis imposita. Quod autem præceptum rigorosum cum libertate & impeccabilitate Christi cohæreat, dicitur inferius.



### ARTICULUS III.

#### *De Sanctitate Voluntatis humanæ Christi.*

**S**anctitas est ab omni scelere libera, perfecta ac omni ex parte incontaminata puritas. Ita D. Dionysius L. de DD. NN. 110

c. 12. pressius vero Sanctitas est illud, quod reddit hominem



minem formaliter immunem à peccato, & filium ac amicum Dei, Deo gratum, ac formaliter tribuit jus ad gloriam cælestem. H. N. Quæritur 1. an humanitas Christi fuerit formaliter sanctificata per gratiam habitualementem, an vero per gratiam unionis seu per unionem hypostaticam, vel per utramque. Pro hoc Dubio solvendo fit.

## §. I.

*An & qualem gratiam sanctificantem habuerit  
Christi humanitas?*

II O Affero 1. In Christo est gratia habitualis seu sanctificans; Communis ac certa cum Scoto allegando conclusionem sequenti.

Prob. 1. Joan. 1. dicitur: *Verbum caro factum est plenum gratiæ & veritatis*: quæ verba intelliguntur de quavis habituali supernaturali perfectione Christi, quæ ei non repugnat, qualis etiam est gratia sanctificans: ergo humanitas Christi fuit plena gratiæ habitualis sanctificantis.

Prob. 2. Isaïæ 11. dicitur: *requiescet super eum spiritus domini*. Per quod intelligitur gratia permanens, seu habitualis in Christo, ut explicat S. Cyrillus initio libri secundi in Isaïam. Idem Propheta in persona Christi c. 61. ait: *Spiritus Domini super me*, eoquod unxerit Dominus me.

Prob. 3. ex SS. PP. S. August. lib. 15. de Trinitate c. 26. ait. *Dominus JESUS non solum Spiritum S. dedit, ut Deus, sed etiam accepit ut homo, & propterea dictus est plenus gratia*. S. Bernardus homil. 4. super missus. *Simpliciter sanctum fuit, quicquid virgo concepit, & per Spiritus sanctificationem, & Verbi assumptionem*.

Prob. 4. ratione. Perfectio gratiæ sanctificantis congruit Christo. 2. Et erat necessaria voluntati Christi ad actus supernaturales amoris Dei: ad hos enim concurrunt habitus infusus charitatis, qui vel est ipsa gratia sanctificans, ut Scotistæ dicunt, vel à gratia sanctificante profuit tanquam proprietas, ut Thomistæ asserunt: ergo.

Affero 2.



*§. 1. Qualem gratiam Sanctificantem habuerit humanitas 191*

Affero 2. Gratia habitualis formaliter sanctificabat, & dignificabat animam Christi ad vitam æternam. Scotus 3. D. 10. q. un. §. ad argumenta dicens: *propter solam gratiam habitua-* III  
*lem Christus habet jus in hæreditate æterna, non autem per unio-*  
*nem personalem; qui si illa fuisset sine gratia habituali, posset*  
*Christus secundum naturam humanam non habere jus in hæreditate illa.*

Prob. 1. Nos fumus formaliter sancti per gratiam habitua-  
lem: ergo & anima Christi. Etenim non debet denegari  
gratiæ Christi, quod conceditur nostræ.

Prob. 2. Justificatio & sanctificatio Christi est exemplar  
sanctificationis & justificationis nostræ: ergo si nos formaliter  
sanctificamur per gratiam habitualem, etiam anima Christi  
per eam fuit justificata, vel certe nostra justificatio non fieret  
juxta exemplar justificationis Christi. A. prob. ex illo D. Pauli  
ad Rom. 8. *quos præcivit, & prædestinavit conformes fieri ima-*  
*ginis filii sui*, scilicet in justitia & gloria: ergo.

Prob. 3. juxta S. Bernardum pro conclusione prima lau-  
datum humanitas Christi à virgine concepta sancta fuit per  
spiritus, id est, gratiæ habitualis sanctificationem: ergo gra-  
tia eam formaliter sanctificavit.

Prob. 4. Humanitas Christi fuit formaliter sancta; sed  
non fuit per aliquid aliud sancta, quam per gratiam habitua-  
lem: ergo per hanc fuit formaliter sancta. M. est certa. m.  
patebit ex §. sequenti.

Objic. Gratia Sanctificans reddit hominem, quem sancti-  
ficat, formaliter filium adoptivum Dei: ergo per hanc gratiam  
Christus fieret filius adoptivus Dei. R. D. a. reddit hominem  
formaliter filium Dei adoptivum primario N. a. secundo sub-  
dist. si talis homo sit subjectum capax filiationis adoptivæ C. a.  
secus N. a. Primarius effectus gratiæ habitualis est reddere  
creaturam naturalem Deo gratam, filiatio vero adoptiva est  
effectus secundarius, qui potest abesse, si subjectum non est capax,  
uti & Christus qua homo non fuit capax; ut dicetur inferius.

Quæres 1.



112 Quæres I. Quam intensa & magna fuerit gratia habitualis Christi? R. I. gratia Christi non fuit categorématique & actu infinita. Scotus 3. D. 14. q. 4. §. *ad 1. quæstionem*. Ratio est: quia implicat infinitum categorématique creatum; sed talis gratia est quid creatum: ergo implicat eam esse categorématique infinitam. 2. Gratia Christi reddidit humanitatem Christi tantum gratiam in ordine ad effectum finitum, nimirum gloriam finitam: ergo non debuit fuisse infinita. 3. Scientia infusa & visio beatifica in Christo fuerunt tantum finitæ: ergo & gratia sanctificans,

R. secundo. Gratia habitualis Christi est summa, & omnium maxima, quam Deus unquam hominibus & Angelis communicavit, vel juxta ordinariam providentiam communicare potuerit. Ratio est, quia tantam gratiam exigit eminentia & dignitas Christi tanquam capitis supra omnem creaturam, & unio hypostatica.

R. 3. Gratia Christi habitualis non fuit tanta, ut de potentia Dei absoluta non potuisset magis & magis in infinitum intendi, seu non fuit negative summa. Ita licheus, Cavelus, Mastrius, Krisper, Panger, Basolinus, Bellitus, Scotistæ, & extra scholam Scotisticam fere omnes exceptis quibusdam antiquioribus. Est tamen contra plurimos SS. imo & ipse Doctor mox laudatus videtur nobis tenere contrarium, sed non tam ex ratione, quam ex devotione erga Christum, in quo commendando mavult excedere, quam deficere, meæ tamen assertioni favet 3. D. 2. q. 1. §. *ad argumenta principalia*: dicens: ad Augustinum conceditur, quod est summa gratia in ista unione; quia summa gratuita condescensio voluntatis Divinæ, quæ fuit principium assumptionis. Non autem est summa gratia habitualis ex vi unionis in ista unione, licet defacto ista comitetur istam unionem. Unde autoritas Augustini potest exponi defacto; quia loquitur de rebus post tempus ortis, quod inter illas summa gratia est in unione naturæ ad Verbum Divinum. Ergo tantum defacto ista gratia, non vero de possibili est summa, sed de possibili posset magis intendi. De facto vero est summa, quia in moderna providentia Deus statuit nulli creaturæ tantam conferre



*§. 1. Qualem gratiam Sanctificantem habuerit humanitas? 193*

ferre gratiam, quantam habet Christus. Ratio nostræ conclusionis est: quia juxta Philosophiam implicat creatura perfectissima, ultra quam perfectior non possit à Deo produci: ergo etiam implicat gratia, ultra quam major & perfectior à Deo produci nequit.

Hæc autem gratia sanctificans statim fuit in sua plenitudine infusa in instanti conceptionis Christi, & infusionis animæ in corpus. Ratio est: quia jam in primo instanti conceptionis anima fuit unita Verbo, quæ unio statim exigebat plenitudinem gratiæ: & liquet ex jam sæpius dictis de visione beatifica, ac scientia infusa, quam Christus etiam statim in primo instanti conceptionis ob dictam rationem accepit.

Quæres. 2. An in Christo etiam fuerint gratiæ gratis datæ, dona Spiritus sancti, gratiæ actuales, virtutes morales &c. 113

R. 1. In Christo fuerunt omnes gratiæ gratis datæ, & omnia dona supernaturalia, quæ ejus dignitati congruunt; hæc enim significantur per plenitudinem gratiæ, quæ Christo fuit collata juxta illud Joan. 1. *plenum gratiæ & veritatis*: & illa dona omnia cedunt ad extollendam humanitatem Christi, quæ commendari & extolli debet, quantum potest, juxta communem Theologorum sententiam. Fuerunt igitur etiam Dona Spiritus sancti in Christo juxta illud Isaïæ 11. *requiescet super eum spiritus Domini, spiritus sapientiæ & intellectus*. R. 2. Non tamen sunt in Christo fides & spes, posito, quod spes non maneat in Beatis: quia hæc virtutes non congruunt statui & dignitati Christi, cum nec Beatis reliquis conveniant.

R. 3. Neque in Christo sunt gratiæ actuales ex parte intellectus & voluntatis, distinctæ à visione beatifica, & amore fructivo: ut ex nostris tenent Faber, Vulpes, Mastrius, & alii Scotistæ contra Radam & aliquos RR. Quia non erat in Christo ulla difficultas bene operandi, cum non haberet rebellem concupiscentiam, nec cæcitatem ex originali proveniente, & visio beatifica, ac amor fructivus, uti delectatio, quæ consequitur visionem & amorem beatum, abunde



& eminenter suppleverunt necessitatem gratiæ actualis illuminantis , inspirantis &c.

R. 4. Fuerunt in Christo quoque omnes virtutes morales in instanti conceptionis infusæ , quia & hæ ad ornamentum Christi serviunt. Debent tamen excipi illæ , quæ aliquam imperfectionem statui & perfectioni Christi non convenientem involvunt. Ita à Christo excluditur continentia , quatenus hæ connotat motus proprios concupiscentiæ , quos refrænat ; quamvis in alio sensu detur in Christo , quatenus est abstinencia à delectationibus sensualibus illicitis. Neque in illo fuit pænitentia , quatenus hæ inclinât ad vindicanda peccata propria.

§. II.

*An & quomodo natura humana Christi sanctificetur per unionem hypostaticam , aut personalitatem Verbi , vel naturam Divinam ?*

II4 ASSERO 1. Quamvis unio hypostatica vocetur merito gratia unionis. 2. Tamen ratione sui non formaliter , aut proprie sanctificat humanitatem Christi. Ita Scotistæ communiter contra aliquos RR. quoad secundam partem.

Prob. 1. Pars. Unio hypostatica est donum Dei , ut Authoris supernaturalis specialissimum , & est radix omnium gratiarum Christo , Angelis , & hominibus collatarum : ergo merito vocatur gratia unionis , utpote à Deo gratis supernaturaliter agente concessa.

Prob. 2. Pars. Neque personalitas , neque ipsa natura Divina Verbi formaliter & proprie sanctificat humanitatem Christi : ergo à fortiori non sanctificat eam formaliter unio hypostatica , quippe quæ tantum sanctificaret , quatenus humanitatem Verbo , & naturæ Divinæ uniret.

Confirm.



*§. II. Quomodo natura humana Christi sanctificetur ? 195*

Confirm. Nos non sanctificamur formaliter, & ut quod per unionem, qua nobis unitur gratia sanctificans; sed solum per gratiam sanctificantem: ergo à pari non sanctificat formaliter, & ut quod humanitatem Christi unio hypostatica, sed ad summum ipsum Verbum, vel natura Divina unita, quamvis etiam hoc negabimus, quod Verbum vel Deitas formaliter sanctificet naturam humanam Christi.

Objic. 1. juxta PP. humanitas Christi fuit sanctificata per unionem hypostaticam: ergo. R. D. a. causaliter & radicaliter C. a. formaliter N. a.

Objic. 2. Unio hypostatica est perfectior gratia sanctificante: ergo à fortiori formaliter sanctificat. R. D. a. est perfectior sub ratione formæ actualiter sanctificantis N. a. sub alia ratione C. a. etiam Angelus qua substantia est perfectior unione hypostatica, qua accidente, vel modo substantiali, & tamen Angelus non formaliter sanctificat.

Objic. 3. Major cultus debetur unioni hypostaticæ, quam gratiæ sanctificanti; atqui cultus debetur tantum ratione sanctitatis: ergo unio hypostatica magis sanctificat, quam gratia habitualis.

R. 1. Cultus deberetur quoque unioni hypostaticæ, & naturæ irrationali per eam unitæ, quamvis talis creatura irrationalis v.g. natura leonis hypostatice unita non esset formaliter sancta, sanctitate tali, quæ reddit creaturam Deo gratam, & amicam, & jus ad æternam beatitudinem tribuit.

R. 2. D. m. ratione sanctitatis in latiori sensu acceptæ pro aliqua dignitate supernaturali C. m. in sensu illo, quo sanctitas reddit creaturam rationalem formaliter gratam, ac amicam Deo, & tribuit jus ad gloriam N. m.

Objic. 4. Per unionem hypostaticam natura humana deificatur: ergo & sanctificatur.



R. D. a. deificatur intrinsece, ac in se formaliter N. a. deificatur denominative propter communicationem idiomatum, quatenus concretive potest Deus de homine prædicari, dicendo, Deus est homo. C. a. & D. c. ergo & sanctificatur intrinsece seu formaliter per unionem N. c. tantum denominative per communicationem idiomatum, quatenus vi communicationis idiomatum sanctitas increata, scilicet Deus infinite sanctus, potest de natura assumpta in concreto prædicari. C. c.

115 Affero 3. Neque unio hypostatica ratione divinitalis, vel personalitatis Divinæ formaliter sanctificat naturam humanam Christi, seu, nec Deitas, nec personalitas Verbi formaliter, & proprie sanctificat animam Christi. Scot. 3. D. 10. q. un. §. ad argumenta dicens: *propter solam gratiam habitualement Christi (qua homo) habet jus in hereditate æterna.* Idem docet D. Thomas. 3. D. 13. q. 1. art. 1. ubi ait: *Deitas autem non est formaliter, sed effective perficiens eam* (loquitur de anima Christi) *unde oportet esse aliam formam creatam in ipso, qua formaliter perficiatur, & hæc est gratia.* Similia repetit in responsione ad tertium, quibus ostendit, Christi humanitatem sanctificari quidem effective per Divinitatem, quatenus hæc efficit gratiam habitualement, formaliter vero per solam gratiam habitualement. Ita etiam sentiunt Paludanus, Richardus, Morfilius & alii, ac Scotistæ communiter contra Thomistas ac RR.

Prob. 1. Nec Deitas, nec personalitas Verbi potest habere rationem formæ respectu naturæ humanæ assumptæ: ergo eam non potest formaliter & proprie sanctificare.

Prob. 2. ex eo, quod Deitas immensa, omnipotens, immortalis &c. uniatur naturæ humanæ, non reddit hanc formaliter immensam, omnipotentem, immortalem &c. ergo neque ex eo, quod Deitas substantialiter sancta uniatur naturæ humanæ, hanc reddit formaliter sanctam. Ant. est Adversariorum, Conf. videtur patere. Etenim sanctitas increata, & substantialis est attributum soli Deo proprium, sicut immensitas, omnipotentia &c. ergo sicut immensitatis natura humana Christi, tanquam causa limitata, est incapax, ita quoque euit incapax sanctitatis increatæ & substantialis.

Prob. 3.



*§. II. Quomodo natura humana Christi sanctificetur?* 197

Prob. 3. Si sanctitas increata & substantialis naturæ Divinæ formaliter competeret naturæ humanæ Christi, & hanc formaliter sanctificaret, tunc natura humana Christi formaliter esset Dea, vel natura Divina; sequela est absurda: ergo &c. M. prob. cui enim formaliter convenit proprietas soli Deo propria, qualis est sanctitas substantialis, debet etiam convenire formaliter essentia Dei.

Prob. 4. Personalitas Divina in se formaliter spectata non dicit perfectionem: ergo ea in se spectata non potest formaliter sanctificare.

Prob. 5. Si Divinitas vel personalitas formaliter sanctificaret animam Christi, tunc ideo, quia anima Christi dicitur à PP. Sancta propter unionem cum Divinitate, & cum Verbo; sed hæc ratio nulla est: ergo. m. prob. propter unionem hypostaticam etiam corpus Christi in Hymno ab Ecclesia dicitur sanctissimum, & sanguis ejus sacratissimus, quamvis nec corpus nec sanguis Christi tanquam creaturæ rationis & voluntatis expertes, sint capaces formalis, & proprie dictæ sanctitatis. Unde ejusmodi prædicata debent intelligi de sanctitate alia in sensu latiori, de qua in conclusione sequenti: ergo etiam anima Christi potest dici Sancta ob unionem cum Divinitate, quamvis non formaliter & proprie sanctificetur per illam unionem, vel per Divinitatem.

Objic. 1. Christus dicitur à PP. aliter Sanctus quam reliqui justi: ergo habuit aliam formam sanctificantem: ergo Divinitas ipsius humanitatem formaliter sanctificavit. 116

R. N. C. Anima Christi est aliter Sancta, quam animæ cæterorum justorum. 1. quia alii justi gratiam sanctificantem gratis acquirunt, anima vero Christi quasi connaturaliter, seu ob maximam congruentiam ob unionem cum Divinitate. 2. Quia Christus accepit gratiam statim in primo instanti conceptionis, & quidem in excellentissimo gradu, non vero alii justi.

Objic. 2. Christus à PP. dicitur Sanctus natura non gratia, sed hoc ideo, quia fuit formaliter sanctificatus per naturam  
B b 3 turam



turam Divinam : ergo fuit formaliter sanctificatus per naturam Divinam.

R. N. m. Christus dicitur Sanctus natura, non gratia 1. eodem enim instanti, quo naturam humanam accepit, seu conceptus est, accepit & sanctitatem habitualement; sicut nos dicimur natura filii iræ, non quia nos natura formaliter tales constituit; sed quia, dum naturam accipimus, & concipimur, peccatum originale contrahimus, per quod filii iræ reddimur. 2. Quia gratia sanctificans humanitati Christi confertur primo statim instanti connaturaliter ob unionem cum Divinitate, ut dictum est.

Objic. 3. Ut Sanctitas sanctificet formaliter, sufficit, si illa uniatur subjecto capaci Sanctitatis; sed sanctitas increata & substantialis in Christo unitur subjecto capaci Sanctitatis scilicet animæ rationali : ergo eam formaliter sanctificat.

117

Afferro 4. Potest tamen dici, quod aliqua ratione natura humana Christi vere sanctificetur per sanctitatem increatam substantialem, & personalem simul sumptam. Ita Communis Scotistarum cum P. Herinx p. 4. disput. 2. de Incarnatione n. 15.

Prob. Ob unionem hypostaticam natura humana deificatur, & in concreto debet dici Deus : ergo ex Divinitate unita dignitas quædam in naturam humanam Christi transfunditur, & aliqua quasi consecratio ad normam, qua corpus & sanguis Christi sanctificantur, & etiam sacra esset natura aliqua irrationalis, si à Verbo assumeretur. Adde, quod natura humana Christi unita Verbo connaturaliter exigat gratiam sanctificantem. In hoc ergo sensu loquuntur SS. Patres, qui contra priorem conclusionem allegantur.





## ARTICULUS IV.

## De impeccabilitate humanitatis Christi.

Certum est 1. Christum qua hominem nunquam peccasse, 118  
 ita docet fides contra Calvinum, qui blasphemè docuit,  
 Christum in cruce desperasse &c. veritas hæc clara est ex sa-  
 cra Scriptura. Joan. 8. Christus dixit: *quis ex vobis arguet*  
*me pe peccato?* 1. Petri 2. dicitur de Christo: *qui peccatum*  
*non fecit, nec est inventus dolus in ore ejus.* Ad Hebræ. 4.  
 Apostolus vocat Christum, *tentatum per omnia pro similitudine*  
*absque peccato.*

Certum est 2. Christum qua hominem nec potuisse pec-  
 care. Ita etiam affirmant SS. PP. Dionysius Alexandrinus, Cy-  
 rillus Alexandrinus, & cum aliis pluribus D. Augustinus, qui  
 posterior lib. 2. de peccatorum meritis & remissione c. 11. ait  
 de Christo: *in cujus non tantum Divinitate, sed nec in anima,*  
*nec in carne ullum potuit esse peccatum.* Ratio est 1. quia Chri-  
 stus habebat visionem beatificam, eratque Beatus, sed Beati  
 non possunt peccare. 2. Ipsa unio hypostatica & dignitas Chri-  
 sti exigit in ipsius humanitate donum impeccabilitatis.

Controversia nunc remanet, quanta hæc sit peccabilitas,  
 an sit metaphysica, physica, vel tantum moralis, vel an  
 metaphysice, aut tantum physice, vel moraliter fuerit impos-  
 sibile Christum peccare? & hoc est primum punctum hujus  
 controversiæ. Alterum ex primo exurgit, & consistit in hoc,  
 unde impeccabilitas voluntatis humanæ Christi oriatur?

## §. I.

*An voluntas humana Christi de potentia Dei abso-  
 luta potuerit peccare, peccato impeditivo,  
 vel destructivo unionis?*

ASSERO 1. Humanitas Christi pro signo priori naturæ  
 ante unionem hypostaticam potuisset peccare peccato impedi- 119  
 tivo



tivo unionis hypostaticæ, loquendo de potentia Dei absoluta. Mendoza, Thyrsus Gonzalez, Viva, & alii RR. contra Suarez, Vasquez, Lugonem & Haunoldum.

Prob. Ponamus, quod Deus pro priori signo ad omnem supposititalitatem, & unionem hypostaticam præcipiat humanitati actum vg. amoris, vel spei, & in hujus præmium decernat conferre unionem hypostaticam, & denegare eam in pœnam, si talis actus amoris vel spei omittatur. Jam in hoc casu non impossibili potuisset humanitas Christi peccare peccato impeditivo unionis hypostaticæ: ergo conclusio subsistit. A. prob. in tali casu pro priori signo ante unionem hypostaticam potuisset humanitas Christi omittere actum charitatis præceptum. quæ omisso vi decreti & præcepti Divini impediisset unionem hypostaticam, & eam exclusisset ab humanitate Christi: ergo in hoc casu potuisset humanitas Christi peccare peccato impeditivo unionis hypostaticæ. A. constat: nam in tali casu pro priori signo fuisset humanitas libera ad ponendum actum charitatis præceptum, vel omittendum, quæ libertas requiritur ad meritum: ergo potuisset etiam omittere, & omitendo impediisset unionem hypostaticam. Ita, ut pro signo sequenti loco unionis hypostaticæ habuisset privationem vel carentiam ejus, & loco personalitatis Divinæ supposititalitatem propriam.

Confirm. 1. juxta dicta prius pro priori signo ad unionem hypostaticam potuisset humanitas mereri illam de congruo, ponendo aliquos actus excellentes: ergo etiam de absoluta potentia pro illo signo potuisset demereri illam per omissionem actuum aliquorum tunc præceptorum.

Confirm. 2. Licet Angeli in primo instanti reali creationis acceperint gratiam sanctificantem, tamen eam per actus in illo signo positos meruerunt, ita quidem, ut illam impedire potuissent per actus peccaminosos: seu Angeli quamvis in primo reali instanti creationis acceperint gratiam sanctificantem, tamen in eodem instanti reali potuissent peccare, & loco gratiæ sanctificantis ob peccatum habere illius gratiæ privationem:



vationem : ergo à pari , quamvis in primo instanti reali conceptionis humanitas Christi habuerit unionem hypostaticam, tamen potuisset in eodem instanti reali peccare , & loco unionis hypostaticæ in eodem instanti reali habere carentiam unionis hypostaticæ.

Confirm. 3. In eodem signo , quo peccator gravis elicit actum contritionis , vel actum amoris tunc præceptum , & propterea accipit gratiam justificantem , posset illam ipsam gratiam impedire , & ejus loco habere privationem gratiæ , si tunc omitteret actum amoris præceptum : ergo à pari.

Objic. 1. Non potest agens creatum agere , quin sit prius ubicatum , & durans , seu quin existat in aliquo loco , & aliquo tempore : ergo à fortiori nequit agere , quin prius sit suppositatum , seu pro priori ad supposititalitatem ; atqui humanitas Christi juxta nostram conclusionem potuisset agere pro priori ad supposititalitatem , ut patet ex dictis : ergo nostra conclusio non subsistit.

R. 1. N. a. Nam ut agens creatum in se per resultantiam causet ipsam ubicationem , & durationem , si tamen hæc sit modus distinctus à re durante , non debet ipsum agens prius esse ubicatum , & durans : ergo non est universaliter verum , quod ubicatio & duratio debeant præcedere quamlibet actionem agentis creati. Adde : si omnis locus destrueretur , & conservaretur aliquis homo in meris spatiis imaginariis , talis utique adhuc posset cogitare , velle , amare Deum : ergo ubicatio non essentialiter præcedit omnem actionem agentis creati.

R. 2. trans. a. N. c. Si antecedens sit verum , tunc ideo , quia nulla creatura potest esse aut operari , si sit nullibi , vel nunquam , vel nisi sit in aliquo loco : ast non exigitur ad operationem creaturæ , ut hæc sit substantialiter completa. Sic anima rationalis & accidentia Eucharistica , ut actus suos exercent , debent quidem habere suas ubicationes , ac durationes , non vero requirunt complementum ultimum substantiale : anima enim rationalis etiam separata , quæ est essen-



tialiter incompleta, tanquam pars, ac accidentia Eucharistica, licet non sint in supposito vel subjecto sustentante, tamen sibi convenientes actiones exercent.

Objic. 2. juxta nostram conclusionem humanitas Christi potuisset tantum supernaturaliter, & per miraculum peccare peccato impeditivo unionis hypostaticæ, & taliter miraculum ordinaretur ad peccatum; sed absurdum est, quod miraculum ad peccatum ordinetur: ergo.

R. N. sequelam M. nam hoc miraculum non ordinaretur ad peccatum, sed ad hoc, ut humanitas Christi libere posset agere, & libere agendo mereri: neque Deus concedendo talem libertatem intendisset peccatum, sed potius meritum, quamvis peccatum permisisset, si illud humanitas Christi libere perpetrasset.

120

Affero 2. Neque de potentia Dei absoluta implicat, humanitatem à Verbo jam assumptam peccare peccato destructivo unionis hypostaticæ. P. Viva cum citatis pro 1. conclusione.

Prob. Homo justus potest peccare, & peccando gratiam justificantem amittere: ergo etiam non implicat de absoluta Dei potentia, quod humanitas Christi jam unita Verbo posset peccare, & peccando deperdere unionem, posito, quod Deus ordinasset, ut illa per peccatum perdat.

Neque obstat visio beatifica in Christo 1. de absoluta potentia Dei posset visio beatifica non concedi humanitati unitæ Verbo, ut dicetur §. sequenti. 2. Visio beatifica non necessitat metaphysice, imo neque physice ad continuationem amoris beatifici, & ad non peccandum, ut iterum dicetur §. sequenti: ergo non obstante visione beatifica posset humanitas Christi de potentia Dei absoluta peccare.





*An humanitas Christi de potentia absoluta potuisset peccare in sensu composito unionis hypostaticæ ?*

ASSERO 1. Humanitas Christi de potentia absoluta potuisset peccare in sensu composito unionis hypostaticæ, seu perseverante unione hypostatica cum peccato. Scot. 3. D. 2. quæst. uni & D. 12. q. un. *§. respondeo, hic sunt duæ difficultates.* In utroque loco rationem proximam & formalem impeccabilitatis non in unionem hypostaticam, sed in visionem & fruitionem beatam Christi reiicit, & tantum admittit, quod unio fuerit radix impeccabilitatis, quatenus fuit radix beatitudinis, quam exigit de congruo, non quidem exigentia metaphysice inimpedibili, sed tali, quæ divinitus adhuc posset frustrari. Hanc sententiam cum Scoto teste Gallo Cartier etiam tenuerunt Durandus 3. Dist. 12. q. 2. Gabriel D. 2. & 12. q. 1. 121

Prob. 1. Natura humana à Christo assumpta ex intrinsicis suis principiis fuit peccabilis: ergo mansit absolute peccabilis stante unione hypostatica. A. constat: natura enim humana Christi secundum intrinsicam suam non est alia, quam nostra, consequenter ea intrinsece est peccabilis sicut nostra. C. etiam patere videtur; quia unio hypostatica nil de suis intrinsicis immutavit in humanitate Christi, & reliquit in ea libertatem indifferentiæ, in qua peccabilitas consistit: nam etiam stante unione hypostatica Christus libere implevit præceptum moriendi, & eo ipso potuisset illud non implere, & non implendo peccare.

Prob. 2. Neque physica est oppositio inter unionem hypostaticam & peccatum: nam nulla oppositio physica potest esse inter ens mere physicum, & inter ens morale; sed unio hypostatica est modus vel relatio physica, & peccatum formaliter spectatum est ens morale. Neque unio hypostatica est physice effectiva actus vel formæ repugnantis peccato,



nam unio hypostatica non habet vim effectivam : neque unio hypostatica exigit absolute , & metaphysice , ut Deus impediat omne peccatum in natura à Verbo assumpta : etenim hæc exigentia tantum ideo adstruitur , quia peccatum maxime dedecet Verbum , quod naturam humanam assumpsit : verum hæc ratio in solutione objectionum refutabitur.

Prob. 3. Natura humana Christi vi unionis hypostaticæ solius , præscindendo à reliquis donis ei superadditis , in se formaliter non fit potentior , nec sapientior aut sanctior : ergo vi unionis præcise non fit impeccabilis : ergo si Deus solum unionem hypostaticam sine reliquis donis supernaturalibus illam in moderna providentia comitantibus , contulisset naturæ humanæ , tunc ea mansisset peccabilis : atqui Deus potuisset de potentia absoluta solum unionem ad Verbum concedere , absque reliquis donis , absque beatitudine , protectione peculiari &c. ergo de potentia Dei absoluta natura humana à Verbo assumpta potuisset peccare stante unione.

**122** Objic. 1. SS. PP. dicunt Christum esse impeccabilem ob unionem hypostaticam ; ergo.

R. D. a. Dicunt esse impeccabilem ob unionem hypostaticam nude sumptam N. a. ob unionem hypostaticam sumptam cum reliquis donis scilicet gratia , gloria , ac protectione Divina unionem hypostaticam comitantibus C. a. & N. c. Unio hypostatica exigit statum beatitudinis , consequenter & annexam huic statui impeccabilitatem : hæc tamen exigentia non est metaphysice infrustrabilis , ut amplius dicetur §. sequenti , & jam dictum est.

Dices : PP. attribuunt impeccabilitatem Christo tanquam prædicatum ipsi proprium : ergo tribuunt eam ob unionem hypostaticam , & non ob beatitudinem. C. prob. si impeccabilitas conveniret Christo solum ratione beatitudinis , tunc ea non esset propria Christo , sed foret communis etiam aliis creaturis beatis : ergo si PP. attribuunt impeccabilitatem Christo tanquam ipsi propriam , & specialiter debitam , eam attribuunt ob unionem hypostaticam , & non ob beatitudinem.

R. N. a.



R. N. a. & D. c. tribuunt eam ob unionem hypostaticam tanquam radicem exigitivam beatitudinis & impeccabilitatis C. ob unionem hypostaticam tanquam rationem formalem proximam impeccabilitatis N. C. speciali modo convenit impeccabilitas Christo vi unionis hypostaticæ, non quod unio hypostatica sit ratio formalis & proxima hujus impeccabilitatis, sed quia est ratio exigitiva beatitudinis, & impeccabilitatis, & hæc impeccabilitas quodammodo connaturalis est humanitati unitæ Verbo.

Instabis: S. Hilarius docet, quod tam impossibile sit Christum peccare, quam non esse Christum; sed de potentia etiam absoluta impossibile est Christum non esse, posita semel unione humanitatis cum Verbo: ergo pariter illa posita, de potentia absoluta impossibile est Christum peccare.

R. D. a. Quod tam sit impossibile, Christum connaturaliter peccare ad modum reliquorum hominum, qui habent connaturaliter potentiam peccandi, quam non esse Christum C. secus N. a. juxta S. Hilarium si Christus connaturaliter posset peccare sicut cæteri homines, sequeretur sane, quod non haberet unionem hypostaticam, exigentem connaturaliter rationem impeccabilitatis ac beatitudinis: attamen non sequeretur, quod non esset Christus, si de potentia Dei absoluta non conferretur ipsi status beatitudinis & impeccabilitatis.

Objic. 2. Christus defacto & via ordinaria peccare non potest ob varia absurda, quæ sequuntur, si Christus defacto peccaret; sed hæc ipsa absurda sequuntur, si Christus peccare posset de potentia Dei absoluta: ergo neque de potentia absoluta peccare potest.

R. N. m. subsumpt. si Christus posset de via ordinaria peccare, sequeretur, ipsius statum defacto esse inferiorem, quam omnium Beatorum, qui de potentia ordinaria nequeunt peccare. Sequeretur 2. Christum non fuisse semper defacto beatus; quia beatitudo impedivisset peccabilitatem. Sequeretur 3. unionem hypostaticam non exigere connaturaliter impeccabilitatem, quæ omnia non sequuntur, si Christus de potentia tantum absoluta posset peccare.



Objic. 3. Si humanitas Christi absolute potuisset peccare, tunc etiam potuisset & debuisset Verbum posse peccare; sed sequela est Sacrilega: ergo. M. prob. actiones sunt suppositorum, & Verbum Divinum est suppositum humanitatis in Christo: ergo si humanitas potuisset peccare, etiam Verbum Divinum potuisset, imo debuisset posse peccare.

R. 1. retorq. si potuisset humanitas Christi se humiliare, obedire, mereri, gratiarum actionem deponere, tunc etiam Verbum Divinum potuisset has actiones facere, quæ tamen in Deo nequeunt dari. Item potuisset Verbum rugire, hincire, actus brutales exercere, si Verbum assumpsisset naturam leonis, equi vel alterius bestię: item Verbum fuisset mortuum & crucifixum physice; quia sicut actiones, ita & passionες sunt suppositorum.

R. 2. N. M. ad prob. D. 1. memb. a. actiones sunt suppositorum elicitive N. a. denominative c. a. igitur in casu conclusionis Verbum denominaretur solum potens peccare per communicationem idiomatum, etenim actiones creaturarum, qualis foret peccatum, tantum sunt denominative suppositorum, & elicitive pro principio, quo habent naturam singularem, quam Aristoteles maxime per suppositum intellexit, & pro principio, quo habent potentias naturæ.

Neque obstat, quod suppositum in Divinis processionibus sit principium ut quod vere productivum. Nam hujus ratio est 1. quia in Divinis suppositum consistit in aliquo positivo: ergo veram actionem positivam exercere potest: ratio formalis vero suppositi in creaturis est tantum negatio, ut ex Philosophia scimus. 2. Quia in Divinis processionibus natura Divina non potest esse principium ut quod productivum personarum, eo quod natura Divina non distinguatur realiter à persona producta, à qua tamen principium productivum ut quod distingui debet: adeoque ratio principii ut quod respectu processionum Divinarum residet in suppositis Divinis Patre scilicet



*§. II. An humanitas Christi potuisset peccare in sensu comp. 207*

licet & filio, cum in natura Divina non habeat locum. Ast natura creata distinguitur realiter à suo effectu, vg. natura humana à suo actu peccaminoso: ergo ipsa bene potest esse principium ut quod elicitivum, vel productivum sui effectus, vel actus.

Nec obstat, quod humanitas Christi subsistat per personalitatem Verbi consistentem in positivo, quæ proinde potest habere rationem principii ut quod.

Nam contra est 1. Personalitas Verbi solum supplet personalitatem creatam: ergo sicut personalitas creata non ageret, nec eliceret aliquam actionem humanitatis tanquam principium ut quod; ita neque personalitas Divina elicit aliquam similem actionem, sed tantum terminat naturam humanam, & ejus dependentiam, & tribuit illos effectus, qui necessario ex tali terminatione sequuntur, ut communicationem idiomatum. 2. Natura humana assumpta à Verbo non perdit virtutem activam, quam habet ex natura sua, & pro priori ad suppositalitatem: sed habet ex natura sua, & pro priori signo ad personalitatem virtutem agendi tanquam principium ut quod, & eliciendi suas actiones sine concursu physico suppositi: ergo etiam habet & retinet hanc virtutem ut assumpta à Verbo.

Dices: Saltem est indecens & indignum Verbo, si illud denominetur peccare: ergo neque denominative potest tribui Verbo prædicatum peccatoris, quod tamen in nostra sententia posset fieri.

R. 1. retorq. argum. Non est indecens, neque indignum Verbo, quod est essentialiter vivens ac immortale, & impassibile, si dicatur crucifixum, mortuum. 2. Si assumpsisset naturam lupi, leonis vel asini, posset dici rapax, ferum, irrationale, stupidum &c. si assumpsisset naturam humanam ratione destitutam, posset denominari inlipiens, quæ denominationes etiam in genere moris non bene audiunt.

R. 2. N. a. Hæ denominationes, etiam si tribuantur denominative Verbo, non offendunt pias aures, si doctæ sunt,  
ut



ut dicit noster Henno ex nostro Felice. Nam nihil ponunt in Verbo, nec illud magis afficiunt, ac si non essent. Tota ergo indecentia est in ipsa natura creata, in qua physice reperiuntur, non vero in Verbo, quod libere & ex justa causa ob assumptam talem naturam sic denominetur. Plane nihil præjudicamus immortalitati Verbi, quod ipsum dicimus mortuum: ergo neque præjudicamus sanctitati Verbi, si in casu nostræ conclusionis dicamus posse peccare, vel peccasse. Neque reponas, mortem esse defectum tantum physicum, & peccatum esse defectum moralem.

Nam contra est: æque defectus physicus mortis opponitur perfectioni alicui Divinæ, quam aliquis defectus moralis. Et ut in retorsione patet, etiam denominationes, quæ in æstimatione morali & moris male supponunt, ut esse asinum, insipientem, ferum, rapacem, possent de absoluta potentia Dei convenire Verbo, si illud assumeret naturas in retorsione enumeratas.

Objic. 4. Humanitas Christi est instrumentum Verbi; sed actiones instrumentorum tribuuntur supposito, ejus sunt instrumenta: sic actio securis tribuitur supposito adhibenti & moventi securim: ergo actus humanitatis Christi, consequenter & peccata ejus specialiter tribui deberent Verbo. Accedit, peccatum, si ab humanitate Christi fieri posset, fore actionem theandricam; sed actiones theandricæ specialiter debent tribui Verbo: ergo peccatum quoque tale specialiter debet tribui Verbo.

R. D. M. Humanitas Christi est instrumentum Verbi in ordine ad quasdam operationes eximias & miraculosas C. M. in ordine ad operationes omnes N. M.

Ad Confirm. D. M. Peccatum foret actio theandrica, id est, tribueretur Deo & homini per communicationem idioma- tum C. M. foret theandrica in sensu magis rigido, quo intelliguntur solum actiones quædam eximiae, ad quarum patrati- onem Deus usus est humanitate Christi tanquam instrumento, qualis



qualis actio fuit vg. incessus super aquam N. M. actiones the-  
andricæ in rigore tales non erant in Christo bibere, & co-  
medere, exspuere &c. proinde neque peccatum, si aliquod per  
absolutam potentiam fuisset commissum ab humanitate per Ver-  
bum assumpta.

Objic. 5. Verbum Divinum teneretur impedire peccatum  
humanitatis assumptæ: ergo si humanitas peccaret, hoc pec-  
catum redundaret in ipsum Verbum. A. prob. Superior tene-  
tur impedire peccata subditorum; sed Verbum respectu hu-  
manitatis assumptæ habet superioritatem: ergo tenetur impe-  
dire peccatum humanitatis.

R. N. a. Verbum non obligatur magis impedire peccatum  
humanitatis assumptæ, quam Pater & Spiritus Sanctus: nam  
obligatio cadit solum in voluntatem, quæ omnibus tribus  
personis æqualiter & communiter inest: ergo talis obligatio  
vel æqualiter est in omnibus tribus Personis, vel in nulla, con-  
sequenter neque in Verbo. 2. Impedire peccatum, & pro-  
tegere humanitatem, ne peccet, est actio adextra, quæ  
convenit toti SS. Trinitati æqualiter; atqui reliquæ duæ per-  
sonæ SS. Trinitatis (absolute loquendo) non tenentur aliter  
impedire peccatum humanitatis assumptæ à Verbo, quam dan-  
do ei præcepta, & auxilia sufficientia &c. ac cæteroquin re-  
linquendo libertatem, ut in aliis hominibus: ergo neque Ver-  
bum Divinum tenetur aliter impedire absolute loquendo.

Ad prob. D. M. Superior humanus tenetur impedire pec-  
catum subditorum, cui id incumbit ex officio ac lege speci-  
ali C. M. Superior supremus, seu Deus, qui tantum habet  
legem generalem finendi causas secundas motus suos agere N. M.

Dices: Verbum unitur immediate humanitati, non reliquæ  
duæ personæ Divinæ: ergo Verbum speciali modo tenetur pro-  
tegere humanitatem assumptam, & eam custodire, ne peccet.

R. C. a. N. c. tum ob dicta: quia implicat in Verbo spe-  
cialis obligatio, quam non habeant reliquæ Personæ æqualiter;  
idem est de actione & protectione alicujus creaturæ. Tum,

*P. Kick Theol. Tom. IV.*

*D d*

*quia*



quia Verbum Divinum vi unionis hypostaticæ non præstat aliquid aliud, quam quod præstaret propria personalitas humana, terminando humanitatis dependentiam & communicabilitatem: ergo vi unionis Verbum non habet obligationem specialiter regendi & protegendi naturam humanam Christi.

Urgebis. Voluntas nostra tenetur in nobis impedire peccata reliquarum potentiarum inferiorum: ergo etiam Verbum Divinum tenetur impedire peccata subditæ & unitæ sibi humanitatis.

R. N. C. & parit. Voluntas cujuslibet hominis tenetur in ipso impedire peccata reliquarum potentiarum: quia reliquæ potentiae v.g. sensitivæ non habent libertatem, nisi dependenter à voluntate imperante vel permittente: nec moraliter, id est, honeste vel inhoneste agere possunt, nisi dependenter à voluntate, ac cum hoc fundantur in eadem natura rationali, quam consequitur obligatio vitandi peccatum. Verum in Christo præter naturam Divinam est humana, quæ proprio intellectu, voluntate, ac libertate gaudet, seque ipsam regere potest, ac obligationis vitandi peccata subiectum immediatum est. Neque SS. PP. nobis obstant, dum asserunt, Verbum regere humanitatem, sicut anima regit corpus: prout loquuntur S. Epiphanius, Anastasius Synaita & VI. Synodus generalis Act. 8. hi enim duntaxat volunt, quod quemadmodum anima propter conjunctionem sui cum corpore influit in illud vitam, motum, & directionem naturalem: ita Verbum ex congruo in humanitatem assumptam influat vitam & motum supernaturalem ratione abundantis gratiæ, scientiæ, ac beatitudinis, quibus illam illustrat, & affectus ejus moderatur.

Objic. 6. Per unionem hypostaticam natura humana Christi est substantialiter Sancta: ergo est impeccabilis. R. N. c. Propter sanctitatem substantialem naturæ hypostaticæ cum Verbo unitæ convenit magna reverentia, etiamsi talis natura irrationalis, vel peccatis obnoxia foret. Neque sanctitas substantialis affert jus formale ad beatitudinem, nec formaliter reddit hominem gratum Deo, sed radicaliter, ut dictum est.

Dices:



Dices : Sanctitas accidentalis non stat cum peccato : ergo à fortiori neque sanctitas substantialis.

R. 1. secundum Scotistas Sanctitas accidentalis seu gratia sanctificans in esse physico considerata etiam stare potest cum peccato mortali.

R. 2. N. c. Sanctitas enim accidentalis est forma illa, quæ ex ordinatione Divina reddit hominem formaliter gratum Deo, expellit peccatum, tribuit jus formale ad gloriam & visionem, non vero gratia substantialis. Unde in aliquo sensu Sanctitas accidentalis seu gratia sanctificans est major participatio naturæ Divinæ, quam Sanctitas substantialis seu unio hypostatica, quia illa non ista formaliter sanctificat, seu gratum reddit Deo, in alio autem sensu per unionem hypostaticam magis participatur natura Divina ob conjunctionem physicam cum eadem natura Divina, & communicationem idiomatum.

Objic. 7. Peccatum fit per recessum à Deo : ergo natura humana unita Deo non potest peccare : quia ut sic unita non potest recedere à Deo.

R. D. a. fit per recessum à Deo realem, & interruptionem realis unionis & præsentia ad Deum N. a. per recessum moralem & objectivum, seu conversionem voluntatis ad alia objecta, quam Deum, vel ad objecta à Deo prohibita C. a. & N. c.

§. III.

*Aliquæ Illationes.*

Ex his deduces 1. à fortiori posse de absoluta Dei potentia cum unione hypostatica consistere peccatum habituale, seu maculam relictam ex peccato commisso ab humanitate, antequam hæc esset unita Verbo, sive dein hoc peccatum esset commissum pro signo naturæ, sive pro instanti reali temporis ante unionem hypostaticam. Nam de potentia absoluta potuisset humanitas Christi, antequam assumeretur à Verbo, existere aliquo tempore, & habere propriam personalitatem,

123



& tunc potuisset etiam peccare, quod peccatum potuisset habitualiter perseverare, etiam dum totam humanitatem assumpsisset Verbum destruendo personalitatem humanam præexistentem. Nam in his omnibus non videtur esse ulla implicantia.

Deduces 2. Impeccabilitatem humanitatis Christi provenire formaliter, & immediate ex beatitudine, qua Beati de lege ordinaria sunt impeccabiles, ac ex gratiæ plenitudine, qua confirmatus est Christus, ne unquam peccaret. Radicaliter vero & mediate ex unione hypostatica, tanquam ex radice gloriæ & gratiæ.

Prob. 1. memb. Impeccabilitas debet ex aliquo principio formali oriri, sed non oritur ex unione hypostatica, neque ex alio assignabili principio, quod esset distinctum à gloria, & gratia: ergo. Hoc membrum docet Scotus 3. D. 12. q. un. §. respondeo: hic sunt duæ difficultates V. de secundo dico. n. 2. Christus in primo instanti unionis ejus cum Deo fuit beatus, & beatitudo abstulit sibi omnem peccabilitatem, vel possibilitatem peccandi, quæ potest auferri per beatitudinem, licet cum hac dispensative staret potestas merendi.

Prob. etiam 2. memb. Conclusionis, & simul confirmantur præcedentia 1. ex Scoto, qui 3. D. 2. q. 1. §. ad argumenta principalia V. ad rationem probantem Christum impeccabilem n. 12. Et sic ex hac unione (hypostatica Christus) est impeccabilis non formaliter sed virtualiter dispositive dispositione remota, licet necessario respectu Dei agentis, sicut necessarium est aliquem Beatum non peccare. Et paulo inferius. Non igitur ex vi illius unionis ponit Anselmus istam impeccabilitatem nisi de congruo; quia illam comitatur plenitudo gratiæ. Plura alia, quæ pro hac conclusione serviunt, ibi habet Doctor.

Prob. 2. Congruum est, ut naturæ physice unitæ cum supposito divino conferatur plenitudo gratiæ & gloriæ excludens omne peccatum, afferens maximam sanctitatem formalem: hoc enim exigit connaturaliter dignitas unionis hypostaticæ: ergo unio hypostatica fuit radix talis sanctitatis & impeccabilitatis in humanitate Christi.

Nihil.



Nihilominus ejusmodi congruentia & exigentia connaturalis non ita necessitat Deum, ut non posset denegare gratiæ illius plenitudinem, ac beatitudinem, quæ inducit impeccabilitatem. Cujus ratio est 1. quia absque contradictione prius potest esse sine posteriori realiter distincto; sed unio naturæ humanæ ad Verbum est prior, quam operatio beatifica & gratia, ut alibi dictum est: & beatitudo ac gratia simul realiter distinguuntur ab unione hypostatica: ergo unio hypostatica absque contradictione potest esse sine beatitudine & gratia inferente impeccabilitatem. M. constat: ita quia voluntas est prior suis actibus, potest esse sine suis actibus; quia aqua est prior frigore, de potentia Dei saltem absoluta, potest esse sine omni frigore.

Ratio secunda. Beatitudo & gratia sunt dona ex se separabilia ab unione hypostatica: & ejus effectus tantum secundarii: ergo unio hypostatica sine illis esse potest: consequenter illa non exigit metaphysice aut absolute. A. constat: si enim Verbum assumeret naturam irrationalem, daretur unio ad Verbum, & tamen talis natura, utpote incapax, non haberet beatitudinem, aut gratiam sanctificantem formaliter talem.

Ratio tertia. juxta S. August. *propter unionem hypostaticam facta est gratia quodammodo naturalis illi homini*: ecce tantum quodammodo: ergo non absolute est gratia naturalis humanitati Christi propter unionem hypostaticam.

Deduces 3. Impeccabilitatem Christi non esse metaphysicam, nec physicam, sed tantum stricte moralem, id est, humanitati assumptæ à Verbo esse peccatum tantum stricte moraliter impossibile, quæ illatio firmabitur articulo statim sequenti. Unde fit.



D d s

ARTI-



ARTICULUS V.

*De libertate humanitatis Christi, & ejus concordia  
cum impeccabilitate.*

§. I.

*An & quomodo Christus habuerit liberum ar-  
bitrium, seu libertatem proximam in-  
differentiae?*

124 **A**SSERO 1. Humana voluntas Christi fuit libera, non solum  
libertate à coactione, sed etiam à necessitate, seu liber-  
tate proxima indifferentiae in ordine ad actus praeceptos.  
Ita communior Theologorum contra Mastrium, & plures Sco-  
tistas, qui negant reipsa in Christo libertatem indifferentiae,  
& à necessitate in ordine ad actus praeceptos, quamvis forte  
aliqui ex ipsis velint videri aliter loqui. Ex Scotistis autem  
nostram sententiam tenent omnes pro conclusione sequenti allegandi.

Prob. 1. Isaïæ 7. dicitur de Christo qua homine: *Buty-  
rum & Mel comedet, ut sciat reprobare malum & eligere bonum;*  
atqui electio est actus libertatis proximæ indifferentiae: ergo  
Christus qua homo habuit libertatem proximam indifferentiae  
in eligendo bono ipsi praecepto, vel consulto præ malo vetito.

Prob. 2. SS. PP. & sacra Scriptura etiam in ordine ad actus  
praeceptos, maxime praeceptum mortis implendum, dicunt  
Christum fuisse liberum; atqui nomen libertatis simpliciter  
probatum à PP. & scriptura in obvio & ordinario sensu signi-  
ficat libertatem à necessitate, & proximam indifferentiae, fuffi-  
cientem de via ordinaria ad meritum: ergo juxta sacram Scrip-  
turam & SS. PP. Christus etiam in ordine ad actus praecep-  
tos &c. habuit libertatem à necessitate, seu libertatem indiffe-  
rentiae proximam &c. m. patet, & magis confirmabitur ex ipsa  
probatione majoris, qui testimonia, quæ pro ea probanda  
afferentur,



afferentur, clarissime in Christo adstruunt libertatem proximam indifferentiæ. Igitur prob. M. Isaïæ 53. de Christo dicitur: *oblatus est, quia ipse voluit*, id est, ut D. Hieronymus in cit. textum, *non necessitate, sed voluntate crucem sustinuit.* Et D. Augustinus Tract. 119. in Joannem docet, neminem ita libere dormire, aut vestem deponere, sicut Jesus mortuus est, & vitam deposuit, similia habent quoque SS. Gregorius, Cyprianus & alii, & Joann. 10. Christus ipse ait: *nemo tollit animam meam à me, sed ego pono eam à me ipso, & potestatem habeo ponendi eam, & potestatem habeo iterum sumendi eam: hoc mandatum accepi à Patre meo.* Profecto si hi textus non satis indicant libertatem proximam indifferentiæ Christi ad subeundam mortem, tunc nullus locus ex Sacra Scriptura mihi afferri poterit, qui sufficienter contra Calvinistas, Lutheranos, & Jansenistas ostendat libertatem proximam indifferentiæ in nobis in ordine ad implenda præcepta, & actus meritorios, quia vix ullus clarius loquetur pro libertate nostra, quam allati textus pro libertate proxima Christi in ordine ad mortem subeundam.

Prob. 3. In Synodo 6. Act. 4. definitur fuisse in Christo omnes proprietates naturæ humanæ, inter quas etiam est liberum arbitrium, seu libertas indifferentiæ proxima, quæ est maxima perfectio naturæ humanæ: ergo hanc etiam assumpsit Verbum.

Prob. 4. In moderna providentia ad merendum & demerendum requiritur libertas à necessitate, seu indifferentiæ proxima, ut certum est, & definivit Innocent. X. contra jansenium; atqui Christus meruit etiam per actus præceptos: ergo ad hos habuit libertatem proximam.

Hæ probationes magis firmabuntur n. 126. ubi responsiones, quas ad eas dare possent Scotistæ, expedientur.

Objic. 1. Omnes actus in Christo ponendi fuerunt antea jam à Deo præfiniti: ergo non est Christus amplius ad eos liber.



R. 1. retorq. argument. etiam omnes nostri actus boni erant à Deo præfiniti ab æterno : ergo nobis non sunt liberi.

R. 2. D. a. Decreto quodam condeterminante , si de actibus illis , quos in Christo liberos dicimus , sit sermo C. a. decreto prædeterminante N. a. præfinitio per Decretum condeterminans imponit solam necessitatem consequentem , quæ non lædit libertatem.

Objic. 2. Christus ipse jam , antequam eliceret actus suæ voluntatis , eos omnes infallibiliter futuros prævidit per scientiam beatam & infusam : ergo postea non est amplius liber ad eos.

R. D. a. Prævidit eos infallibiliter futuros dependenter à sua libera determinatione C. a. independenter ab ea. N. a.

Objic. 3. Christus fuit simul beatus ; sed beatitudo ipsum determinavit necessario ad amorem Dei , consequenter ad impletionem omnium præceptorum , & abstinentioniam ab omni peccato : ergo Christus non fuit liber in ordine ad actus præceptos.

R. D. m. Beatitudo ipsum determinavit necessitate morali stricte tali C. m. necessitate etiam physica auferente libertatem omnem , etiam physicam N. m. Verum pro majori hujus rei notitia.

Affero. 2. Humanitas Christi habuit libertatem physicam ad actus præceptos , & ad peccandum. 2. Et simul necessitatem moralem stricte dictam non peccandi contra talia præcepta. Id est , humanitas Christi habuit secluso miraculo ac naturaliter potentiam proximam peccandi , ita tamen , ut stricte moraliter fuerit impossibile peccare , seu ut posset quidem peccare naturaliter , nunquam tamen esset peccatura. Poncius , Prizeng , Herinx , Henno & alii SS. contra Mastrium.

Prob. 1. memb. Nihil potest ostendi , quod physice necessitasset humanitatem Christi ad actus præceptos : ergo habuit physicam libertatem ad actus præceptos , & non peccandum. A. prob. Non sic necessitavit physice unio hypostatica



tica ad non peccandum : quia juxta dicta unio hypostatica eatenus tantum infert impeccabilitatem , quatenus hanc exigit ; atqui unio hypostatica in humanitate Christi non exigit majorem impeccabilitatem , quam strictissime moralem : tum quia ratione impeccabilitatis strictæ moralis Christus jam est simpliciter impeccabilis , tum , quia per hanc solum salvari potest status viatoris , & ratio meriti in Christo , ut patebit : tum , quia juxta Scotum impeccabilitas non immediate nomine unionis hypostaticæ , sed ratione status beatitudinis , & confirmationis in plenitudine gratiæ convenit ; sed status beatitudinis , & hæc confirmatio in plenitudine gratiæ non important majorem impeccabilitatem , quam strictæ moralis , non vero physicam : ut mox dicetur. Itaque neque humanitas Christi , quæ beata , seu per beatitudinem fuit physice necessitata ad actum amoris beatificum , & ad abstinendum à peccato. A. prob. I. visio beatifica non sic physice necessitat ad amandum Deum , eumque non offendendum : hæc enim solum est conditio applicativa & repræsentativa objecti infiniti quidem ; finito tamen modo juxta capacitatem , & naturam voluntatis creatæ , quæ est intrinsece libera , & indifferens ad agendum , vel non agendum. Hanc indifferentiam etiam videtur retinere stante visione beatifica : etenim clara visio nihil immutat in voluntate. Deinde quamvis visio clara & cognitio objecti omni ex parte boni movere possit voluntatem ad amandum illud , tamen non potest physice necessitare ad amorem ; siquidem voluntas tanquam potentia libera est domina suorum actuum , & se ipsam libere determinat , non vero ab objecto , quantumcunque clare proposito physice necessitatur. Hæc est distinctio inter voluntatem & potentias necessarias v.g. intellectum ; quod potentiæ necessariæ debite præsentate objecto non possint non agere , & sic ab objectis determinantur ; voluntas vero clarissime etiam proposito objecto non necessitatur physice , sed maneat indifferens ad agendum , & non agendum , ut Scotus sapius docet contra Th. Thas.

Ad hæc nos Scotistæ asserimus , quod voluntas proposito clare objecto notabiliter meliore possit amplecti minus bonum : ergo quamvis visio repræsentet clarissime objectum



beatificum, seu Deum ut summum bonum, potest tamen voluntas pro sua libertate amplecti objectum prohibitum, tanquam bonum sibi delectabile.

Neque habitus charitatis necessitat physice animam aliquam beatam ad amorem beatificum, & non peccandum: quippe hic habitus datur in hominibus viatoribus. & datus fuit in Angelis viatoribus, quamvis hi fuerint, & illi sint peccabiles physice. Deinde habitus charitatis subest dominio voluntatis, quæ illam pro libitu ad operationem determinare, vel ejus actum suspendere potest: ergo nihil necessitat physice humanitatem Christi ad actus præceptos, & non peccandum.

Prob. 2. memb. conclusionis, & simul confirmatur primum. Ex una parte libertas indifferentiæ debet in Christo admitti, ut dictum est: ex altera parte major quam physica non potest admitti ob beatitudinem, quæ excludit necessario necessitate morali omne peccatum ab anima beata Christi: ergo Christus habuit quidem libertatem physicam ad actus præceptos ponendos vel non ponendos; habuit tamen simul necessitatem strictissimam moralem, vi cuius potuisset quidem naturaliter transgredi præcepta sibi imposita, non tamen esset unquam transgressurus. Necessitas vero ista strictissima moralis non peccandi provenit 1. ex visione beatifica, quam habet, & habebit semper anima Christi: clarissima enim hæc cognitio, qua se Deus libere, ut summum & omni ex parte bonum manifestat, & simul ex opposito ostendit omnia creata bona esse nihil respectu Dei, ita movet ad amorem Dei, ut animæ beatæ moraliter sit impossibile cessare ab amore Dei. Proinde anima beata nequit peccare, cum nullum peccatum cum amore excellenti, qualis est beatificus, compossibile sit. 2. Moralis impeccabilitas oritur ex plenitudine gratiæ, protectionis & aliorum donorum divinorum concessorum humanitati Christi, quæ in se sunt tanta, ac tam singularia, ut illis in se inspectis, & præscindendo à prævisione conditionata, quid eventurum esset, si talia dona concederentur, jam moraliter sit impossibile, animam tanta plenitudine donorum Divinorum instructam peccare.

Confirm.



Confirm. Vi prædictæ necessitatis moralis anima Christi est simpliciter impeccabilis ; etenim impossibilitas moralis strictissime talis , qualis oritur ex illa necessitate , simpliciter venit nomine impossibilitatis : ergo & impeccabilitas moralis strictissime talis venit simpliciter nomine impeccabilitatis : cum impeccabilitas nil aliud sit , quam impossibilitas peccati. A. prob. vi impotentia vel impossibilitatis moralis vitandi omnia venialia collective sumpta sine speciali privilegio , dicitur ejusmodi vitatio omnium venialium simpliciter impossibilis , quamvis physice non implicet vitare ea omnia etiam collective sumpta , iterum , quia homo sine gratia habet impotentiam moralem strictissime talem vincendi tentationem gravem , quamvis physice eam possit vincere , tamen dicitur simpliciter impossibilis ejusmodi vitatio sine gratia : ergo ex opposito ob eandem rationem impeccabilitas moralis Christi est simpliciter dicta impeccabilitas : quamvis ea non obstante anima Christi habuerit potentiam physicam , ac libertatem proximam physicam peccandi : ergo tali modo salvamus nos primo impeccabilitatem in Christo , & quidem simpliciter talem. Secundo salvamus quoque libertatem ; quia stante necessitate morali adhuc stat proxima indifferentia physica ad actum præceptum ponendum , vel omittendum.

Quod autem libertas physica sufficiat ad actum meritorium in Christo , inde probatur ; quia sufficit ad actum inhonestum ; ergo etiam ad honestum & meritorium , si cætera præter libertatem requisita ad meritum adsint , ut status viæ &c. A. prob. damnati & dæmones juxta dicta in Tractatu de Angelis tantum habent libertatem physicam ad abstinendum à peccatis , & tamen peccant per suas blasphemias , odium Dei , & alios actus malos , quamvis propterea non mereantur aliquam pœnam , eo quod non amplius sint in statu viæ , in quo solo datur meritum præmii vel pœnæ , ergo sufficit libertas physica ad inhoneste agendum.





§. II.

*Solvuntur objectiones contra præcedentem §. primum, & declaratur concordia libertatis humanæ Christi cum ejus impeccabilitate.*

125 Objic. 1. Christus habuit maximam libertatem : ergo non solum habuit libertatem physicam , sed etiam moralem, seu fuit immunis à necessitate morali.

R. D. a. quam potuit habere salva impeccabilitate C. a. secus N. a. Neque in hoc est aliqua imperfectio ; alias ille, qui in certis circumstantiis tanta & tam opportuna gratia, & protectione Dei adjuvaretur ad præceptum adimplendum, ut ei moraliter foret impossibile, tale præceptum non adimplere, foret minus perfectus in ordine ad impletionem præcepti, quam alius, qui careret simili gratia opportuna, & magis esset indifferens : quod tamen vix videtur asserendum.

Objic. 2. Ad libere implendum præceptum requiritur indifferentia in genere moris, seu moralis ; atqui Christus juxta nos non habet indifferentiam moralem, sed tantum physicam : ergo Christus non implevit libere præceptum.

R. N. suppositum, quod idem sit indifferentia, & libertas in genere moris & moralis, nam per libertatem in genere moris intelligitur illa, quæ sufficit ad actus honestos & inhonestos seu morales, sive dein sit libertas physica excludens necessitatem physicam, sive sit libertas moralis excludens necessitatem moralem explicata : utraque autem libertas sufficit ad actum moralem, vel in genere moris, nam ille, de quo in responsione ad objectionem primam, bene & meritorie agit, & dæmones per suas blasphemias peccant, licet hi, & ille tantum habeant libertatem physicam, non vero moralem.

Objic. 3. Inutile est præceptum de illa re, ad quam faciendam aliquis aliunde strictissime moraliter necessitatur, ita, ut.



ut moraliter non possit omittere : sic inutile foret præceptum, quo uni militi Rex prohiberet, ne ipse solus totum exercitum, vel omnes omnino homines occideret : ergo etiam inutile esset præceptum Christo datum de acceptanda morte, si aliunde Christus fuit moraliter necessitatus ad mortem subeundam.

R. 1. invert. argum. ergo etiam inutile foret præceptum datum dæmonibus, ne peccent, quia moraliter est ipsis impossibilis hujus præcepti impletio ; item & nobis inutiliter esset impositum præceptum evitandi omnia omnino peccata venialia, cum hujus impletio moraliter sit nobis impossibilis sine speciali privilegio, quod tamen nobis non datur, nec debetur, ut in Tractatu de gratia & merito dictum est.

R. 2. N. a. Ratio negandi patet partim ex instantiis, partim, quia hoc præceptum in Christo habuit specialem utilitatem, ut acceptatio mortis & adimpletio aliarum legum haberet specialem perfectionem obedientiæ, & subjectionis erga Deum.

Objic. 4. Unio hypostatica exigit impeccabilitatem aliquam metaphysicam vel physicam Christi : ergo. A. liquet ; quia quidquid est perfectius, debet de Christo asseri ; sed impeccabilitas metaphysica vel physica est perfectior, quam solum moralis : ergo impeccabilitas metaphysica vel physica debet asseri de Christo.

R. N. a. ad ejus prob. D. M. quidquid perfectius est, debet asseri de Christo, si absque inconvenientia potest asseri. C. M. fecus N. M. esset autem maximum inconveniens impeccabilitas metaphysica vel physica in Christo, quia stante illa Christus non habuisset illam libertatem in actibus præceptis, quam requirit S. autoritas in Christo, & quæ necessaria est ad meritum.

Objic. 5. Unio hypostatica necessitate physica exigit visionem beatificam ; sed visio beatifica est impossibilis cum peccato, & non impletione præcepti : ergo.



R. transf. M. & D. m. visio beatifica est moraliter incommpossibilis cum peccato, modo explicato C. m. physice vel metaphysice est incommpossibilis cum peccato N. m. & C.

Objic. 6. In Christo fuit major impeccabilitas quam in aliis hominibus, qui tantum sunt confirmati in gratia: sed juxta nostrum systema non esset major impeccabilitas in Christo, quam in aliis hominibus viatoribus, qui tantum sunt confirmati in gratia: quia & hi haberent physicam libertatem, non vero moralem ad peccandum: ergo nostrum systema non subsistit. M. videtur patere, tum quia dignitas Christi majorem impeccabilitatem exigit: tum, quia homines confirmati in gratia simpliciter sunt peccabiles, etiam si non sint peccaturi, atqui Christus simpliciter fuit impeccabilis.

R. C. M. & N. m. 1. Cæteri confirmati viatores in gratia non gaudent visione beatifica moraliter necessitante ad non peccandum, sicut Christus. 2. Esto aliqui confirmentur in gratia, non tamen propterea ipsis dantur constanter talia auxilia, quæ ex se, & præscindendo ab eventu conditionate præviso moraliter necessitant ad actum bonum: & plane plures sunt gratiæ efficaces, quæ ita relinquunt voluntatem indifferentem, ut iis stantibus nequitiam homini sit moraliter impossibile, sed omnino facile male agere, ut accidit, dum actum heroicum v.g. dilectionis inimicorum elicimus in iis circumstantiis, in quibus experimur nos magis inclinari in oppositum, nimirum in odium inimicorum, ubi consentimus gratiæ absque necessitate morali ad consensum. Igitur alii homines viatores possunt confirmari in gratia, si ipsis dentur auxilia non moraliter necessitantia ad bonum, dummodo ipsis dentur auxilia efficacia & certo conjungenda cum consensu, esto moraliter possent conjungi cum dissensu & peccato. Humanitas vero Christi vi unionis hypostaticæ exigebat non solum auxilia efficacia, sed & tantam plenitudinem gratiæ, & protectionis Divinæ, quæ in se inspecta, & præscindendo ab omni eventu etiam conditionate præviso moraliter determinavit ad bonum, & ad abstinendum ab omni peccato, & imperfectione morali. Vide dicta in Tractatu de gratia.

Hoc



Hoc etiam addo, si Deus prævidisset per scientiam conditionatam, visionem beatam, & reliqua dona humanitati Christi concessa, ut ut moraliter necessitantia, non exclusura esse omne peccatum, & omnem imperfectionem moralem, tunc eum fuisse insuper paratum adhuc majora & tanta dare, quæ exclusissent actu omne malum morale.

Objic. 7. Scientia Dei de futuris contingentibus tam conditionatis quam absolutis requirit objectum metaphysice infallibile, & non sufficit, si tantum sit moraliter infallibile, ut dixi in Tract. de gratia, & in Deo sciente, & decernente. cap. 1. n. 50. : ergo etiam dignitas Christi requirit impeccabilitatem metaphysicam vel physicam.

R. N. C. & parit. Omnes perfectiones in Deo debent esse sine ulla adjuncta imperfectione, & debent includere omnem perfectionem possibilem: ast non ita perfectiones humanitatis Christi. Ita scientia Dei est substantia, & identificatur realiter essentiae Divinae, non vero scientia humanitatis Christi. Iterum impeccabilitas vel sanctitas Deo identificatur, non humanitati Christi, & sic de pluribus.

Neque hic assero, per moralem hanc impeccabilitatem, vel prædeterminationem moralem ad non peccandum, Deum potuisse cognoscere, quod Christus *actu non sit peccaturus*. Nam ad hoc cognoscendum in Deo prærequiritur metaphysice infallibilis non futuritio peccati, quæ non habetur per solam præmotionem moralem, sed per decretum concomitans vel decreto æquivalentem omissionem, prout dictum est locis in objectione citatis. Aliud igitur est Christum per præmotionem moralem fieri impeccabilem, & aliud cognosci à Deo, quod Christus actu non sit peccaturus.

Objic. 8. Saltem Deus Christo & Beatis non offert concursum paratum ad peccandum, vel omnino eos ad omne bonum, & evitacionem omnis peccati prædeterminat per decretum antecedens, aut præmotionem physicam: ergo sunt physice impeccabiles. A. prob. talem denegationem concursus

vel



vel omnino similem prædeterminationem exigit status unionis hypostaticæ, & beatitudinis.

R. N. a. In Christo datur libertas indifferentiæ, quam tollit denegatio concursus parati, vel præmotio: per præmotionem & decretum prædeterminans imponitur voluntati necessitas antecedens: per denegationem vero concursus parati, & indifferentis aufertur potentia proxima ad agendum, vel non agendum, in qua tamen potentia proxima consistit libertas indifferentiæ. 2. Cum unio hypostatica & status beatitudinis non destruant, sed solum perficiant naturam, hinc nec illa, nec iste exigit, ut denegetur humanitati Christi concursus paratus alias ei connaturalis, & ad perfectionem liberi arbitrii necessarius, vel ut addatur præmotio physica decretum antecedens lædens libertatem connaturalem.

Objic. 9. Scotus 4. D. 49. q. 6. §. dico ergo n. II. ait: quod Beati non habeant potentiam illam propinquam ad peccandum. 2. Quod potentiam illam propinquam non habeant per aliquid extrinsecum, videlicet per voluntatem Dei prævenientem illam voluntatem, ut semper continuet actum fruendi, & ita nunquam possit potentiam suam non fruendi vel peccandi reducere in actum. 3. §. contra hoc statim sequenti numero, iterum asserit, quod ex determinatione voluntatis Divinæ proveniat impeccabilitas Beatorum: ergo juxta Scotum Christus fuit impeccabilis, quia prædeterminatus.

R. explicando Scotum sub distinctione. Beati non habent potentiam propinquam moralem, seu immunem à necessitate morali strictissime tali: iterum sunt prædeterminati naturaliter à voluntate Divina, quæ conservat eos in visione, & simul per alia dona moraliter necessitantia promovet perpetuo fruitionem & amorem beatificum cum peccato & imperfectione morali impossibilem C. a. non habent potentiam propinquam physicam, vi cujus adhuc possent peccare, licet nunquam sint peccaturi. N. a. Neque obstat Scotus cit. loco asserens exemplum de oculo, qui non est in potentia propinqua aspiciendi cælum, si interponatur obstaculum perpetuum. Nam sicut obstaculum istud physicum tollit potentiam proximam



proximam physicam, sic & obstacula moraliter necessitantia tollunt potentiam proximam moralem. Quod autem Doctor admittat solum necessitatem moralem conjunctam cum libertate physica, vi cuius quidem potuisset adhuc naturaliter voluntas Christi peccare, nunquam autem esset peccatura, patet ex ultimis verbis, quibus hanc controversiam de perpetuitate beatitudinis, & impeccabilitate Beatorum concludit; ubi ita loquitur respondens ad objectionem sibi propositam: aliter potest idici, quod *contingentia voluntatis in suo ordine concludit contingentiam simpliciter effectus* (seu libertatem indifferentiæ absque necessitate unde proveniente) *quia cujuscunque est contingentia, concludit contingentem effectum, & per consequens simpliciter contingens est, quod non peccet, tamen nunquam eveniet, quia causa superior (seu Deus) semper præservat.* Sed dices, *saltem in potestate voluntatis est, ut eveniat.* Posset dici, quod non ideo est minus Beata, quod in potestate ejus sit, quod eveniat, quod tamen nunquam eveniet, & ideo nunquam eveniet, quia voluntas Divina semper præservat.

Ex quibus sequitur 1. Scotum saltem non esse contrarium nostræ conclusioni, imo ei ut plurimum favere. 126

Sequitur 2. Nos optime concordare libertatem Christi cum impeccabilitate. nam. 1. Libertas physica stat cum impeccabilitate morali, ut ex dictis patet. & 2. Impeccabilitas moralis sufficit ad salvandas auctoritates, quæ Christum dicunt simpliciter impeccabilem, cum ille, qui strictissimam impotentiam moralem habet ad aliquam rem, dicitur simpliciter impotens. Nec 3. major aut minor impeccabilitas in Christo adstrui potest: non major, quia repugnaret libertati indifferentiæ in actibus præceptis, quam tamen PP. & scriptura Christo tribuunt: non minor, quia ea derogaret dignitati Christi. Ac 4. tandem libertas physica sufficit ad actum meritum; ut patet ex dictis ad finem, & in responsionibus ad primam & secundam objectionem.





## §. III.

*Referuntur & rejiciuntur sententiæ oppositæ  
de libertate Christi, & ejus concordia  
cum impeccabilitate.*

127 ASSERO I. Præfens negotium non satis explicatur dicendo, quod in Christo ad meritum in actibus præceptis ex dispensatione Divina suffecerit indifferentia remota. Ita fere omnes contra Mastrium, & illos, qui Mastrium sequuntur.

Prob. 1. Authoritates & rationes propositæ prius exigunt in Christo libertatem indifferentiæ proximam ad præceptum mortis, & alia præcepta implenda, & ad meritum ejus: ergo hæc requiritur.

Prob. 2. Verba Sacræ Scripturæ, & PP. (quæ in obvio sensu libertatem indifferentiæ proximam insinuant) quantum possibile est, explicari debent in sensu excludente miraculum, ut cum aliis Theologis ex D. Augustino docet Viva P. 1. cursus Theologici. q. 4. Art. 3. n. 16. atqui non sic explicat Mastrius, sed potius novum miraculum dispensationis adstruit: ergo.

Confirm. 1. Quamvis per unum miraculum & dispensationem divinitus factam status viæ seu meriti in Christo fuerit conjunctus cum statu beatitudinis, non tamen sine sufficienti fundamento, aut necessitate debet addi alterum miraculum, & altera dispensatio, vi cujus etiam libertas remota suffecisset ad merita Christi; sed non est fundamentum vel necessitas hujus alterius dispensationis; cum illius nullum vestigium in sacra Scriptura, aut aliquo S. Patre reperiatur, & aliunde tota difficultas possit explicari sine tali dispensatione: ergo non debet addi hoc secundum miraculum dispensationis.

Objic. 1. Scotus 3. D. 12. q. un. §. respondeo hic sunt duæ.  
n. 2. ait: *beatitudo abstulit Christo omnem peccabilitatem, quæ  
potest*



potest auferri per beatitudinem, licet cum hac dispensatione staret potestas merendi. Et eodem L. 3. D. 18. q. un. §. contra illud & ad secundum n. 9. ait: non includit contradictionem actum Beatificum Michaelis, vel alterius Beati posse acceptari tanquam aliquid dignum retributione: ergo juxta Scotum libertas remota indifferentiæ sufficit ad merendum in Christo ex dispensatione, & sufficeret in Beatis reliquis accedente ejusmodi dispensatione.

R. Ex his textibus solum habetur, quod Deus cum Christo dispensarit in uno requisito ad meritum, nempe in impossibilitate, quam alias de lege ordinaria habet meritum cum statu beatitudinis, vi cujus Christus, ut beatus fuisset incapax meriti, vel dispensavit cum Christo, ut esset simul Comprehensor, & simul Viator, & consequenter etiam gauderet privilegio merendi, quod Viatoribus, non vero Beatis convenit. Non autem fit ulla mentio de dispensatione in altero distincto requisito ad meritum de lege ordinaria, quod est libertas indifferentiæ saltem physica. Imo, quod Doctor loquatur tantum de dispensatione prima, liquet, si totus contextus d. 18. q. un. n. 9. legatur, quem totum adducere volo; ait igitur ibi: Christus meruit secundum portionem superiorem, & secundum omnem actum ejus: hoc tamen difficile est propter alios Beatos. Probo autem illud, quia omnis actus acceptatus à Deo, tanquam actus laudabilis &c. est meritorius: hujusmodi est actus omnis Christi secundum naturam humanam, etiam actus beatificus, quo fruitur Deo: NB. quia persona illa non secundum omnem conditionem fuit simpliciter in termino, ideo potuit Deus omnem actum creatum illius personæ accipere tanquam dignum aliquo bono, & hoc tenendo, quasi actus beatificus Christus fuerit meritorius, quod non includit contradictionem actum beatificum Michaelis &c. posse acceptari tanquam dignum retributione; tamen Deus defacto non sic acceptat actum illum, quia persona illa (Michaelis) est totaliter extra statum merendi, secundum totum subjectum, non sic Christus, sed secundum aliquid fuit in statu viatoris, & propter hoc omnis actus ejus creatus acceptus erat & meritorius illis, pro quibus offerebatur. Ita Scotus. Ex quibus patet, dispensationem totam, de qua Scotus, versari circa requisitum status viæ, vi cujus Christus est simul



Viator & Comprehenfor , & cum statu termini & beatitudinis conjunxit statum merendi : neque verbulo fit mentio de dispensatione aliqua in alia conditione ad meritum , requisita. Accedit , à Scoto in primo textu agnosci in Christo solum illam impeccabilitatem , quæ datur in Beatis ; atqui Beati habent impeccabilitatem tantum moralem strictissime talem stantem cum indifferentia physica proxima : ergo.

Objic. 2. Contra Janfenistas & Calvinistas tantum damnatum est , quod sufficiat ad meritum libertas à coactione , & non requiratur libertas à necessitate ; atqui etiam libertas indifferentiæ remota est adhuc libertas à necessitate , quia non imponit necessitatem aliquam intrinsecam ortam ex intrinseca natura voluntatis , neque per formam aliquam intrinsecam impressam vg. per præmotionem physicam , sed tantum extrinsecam per denegationem concursus ad peccatum , ut Mastrius argumentatur 3. Disp. 3. n. 397. ergo libertas ista remota , accedente dispensatione Divina , potest in Christo sufficere ad meritum.

R. N. m. Quod libertas remota à Mastrio explicata sit libertas à necessitate illa , quam indicant , & implicite vel explicite adstruunt Pontifices , dum damnarunt errores Janfenii & Calvinii. Certe illi Pontifices voluerunt à nostra libertate excludere omnem necessitatem antecedentem , sive veniat à principio intrinseco sive extrinseco : nam utrumque pariformiter lædit exercitium nostræ voluntatis. Qua de causa Mastrius cum aliis Scotistis non solum rejicit intrinsecam præmotionem physicam , sed & decretum extrinsecum prædeterminans , quia utrumque infert necessitatem antecedentem. 2. Pontifices prædicti per damnationem illorum errorum voluerunt adstruere unice , quod actus meritorius , vel demeritorius debeat esse libere , & non necessario factus ; sed etiam stante adhuc necessitate extrinseca necessario fieret , necessario enim non pecco : sive per qualitatem intrinsecam physice præmovear ad omittendum peccatum , sive deficiat solum aliquod necessarium & indispensabile requisitum ad peccandum , quale requisitum est concursus Dei.



3. Juxta Vivam in propositionem tertiam Jansenii n. 12. Jansenistæ, Calvinistæ, & Wicleffi Asscclæ non negant libertatem remotam in hominibus, & tamen sunt damnati tanquam hæretici. 4. Si Mastrius admittit libertatem à necessitate, & quidem talem, qualem intendebant Pontifices damnantes Jansenium & Calvinum &c. tunc admittit per se sufficientem ad meritum sine ulla dispensatione: ad quid igitur ista dispensatio?

R. 2. Transmisso toto sylogismo, & dato, quod libertas remota accedente dispensatione Divina potuisset sufficere ad meritum in Christo, tamen non sequitur, ut actu succederet; siquidem non constat de tali dispensatione, imo, ut nostræ probationes docent, videtur constare contrarium.

Affero 2. Neque salvatur libertas Christi per hoc, quod præceptum moriendi fuerit dispensabile ad nutum Christi, vel quod fuerit antecederet à Christo Domino impedibile, ne ei imponeretur. Est contra Lugonem & quosdam RRes. 128

Prob. 1. Hæc via multum minuit perfectionem obedientiæ in morte Christi; cum juxta hanc explicationem mors Christi principaliter relinquatur voluntati humanæ Christi, non vero voluntati Divinæ, & præcepto Patris cælestis: quod tamen videtur esse contra Apostolum ad Rom. 8. ubi mortem Christi principaliter tribuit voluntati Patris cælestis, dicens: *proprio filio suo non pepercit Deus: ergo.*

Prob. 2. Si fuisset Christo liberum petere dispensationem, aut acceptare præceptum moriendi, vel si hoc non fuisset impositum absolute, tunc Christus non dixisset: *si possibile est, transeat à me calix iste &c.*; sed dixisset, *quamvis possibile sit, ut hic calix transeat à me, tamen fiat voluntas tua.* Quis enim sciens certo dandam dispensationem, si petat, dicit, *si possibile est?* ergo.

Prob. 3. Hæc explicatio non quadrat præceptis naturalibus, quæ observando Christus est meritis, quamvis illa



nec forent à Christo impedibilia , nec à Deo dispensabilia.  
4. Taliter non foret immediate libera ipsa acceptatio mortis , sed solum acceptatio præcepti moriendi : quare etiam ejusmodi acceptatio ipsius mortis in multorum , etiam AAorum. sententia , non foret immediata , & in se formaliter meritoria : quod tamen non videtur esse admittendum : ergo hoc systema non subsistit.

Objic. 1. Joan. 10. Christus dixit , se habere potestatem moriendi , & ponendi animam : ergo Christus potuisset petere dispensationem , vel non acceptare præceptum mortis.

R. N. C. Verba Christi tantum significant , Christum stante præcepto , esse liberum ad mortem ipsam acceptandam , & implendum præceptum mortis , non vero ad petendam dispensationem hujus præcepti , aut impediendum illud , ne imponeretur.

Objic. 2. Matth. 26. Christus dixit , an putas , quia possum rogare Patrem , & exhibebit mihi modo plusquam 12. Legiones Angelorum , qui me defendant contra illos , qui me volunt occidere &c. quæ verba iterum indicant , Christum potuisse petere relaxationem præcepti moriendi : ergo.

R. Nego , quod ista verba significant potestatem obtinendi relaxationem vel dispensationem præcepti mortis , nam significant duntaxat efficaciam meritorum Christi ad facienda miracula , & impetrandas legiones , si esset necessaria , vel expediens evitatio mortis.

129

Affero 3. Nec potest dici , quod Christus in sensu composito præcepti , vel privative non potuerit non mori , bene in sensu diviso & præcise. Est contra Thomist.

Prob. 1. Tunc per sensum divisum non salvatur libertas Christi , quando iste sensus divisus non fuit in potestate Christi , seu quando Christus ut homo non potuit facere se divisum seu immunem à præcepto ; atqui iste sensus divisus non fuit in potestate Christi , cum hoc præceptum fuerit



rit impositum independenter à voluntate humana Christi, nec ad nutum ejus fuerit relaxabile; ut ipsi Thomistæ fatentur contra RRes. Num, & conclus. priore: ergo libertas Christi non salvatur per ejusmodi sensum divisum. Imo hæc sententia omnes patitur instantias, quibus impugnatur præmotio physica, & decretum prædeterminans.

Prob. 2. Christus debuit habere libertatem omittendi rem & mortem præceptam, seu stante præcepto: sed Christus in sententia ThTharum. hanc libertatem non habuisset: ergo. M. constat: quia Christus debuit habere libertatem adimplendi præceptum mortis, & obediendi Deo præcipienti mortem propter majorem perfectionem mortis ex virtute obedientiæ & subjectionis erga Deum præcipientem. m. prob. potentia omittendi rem, præscindendo, & dividendo eam à præcepto, non est potentia & libertas omittendi rem præceptam, cum res non reputetur præcepta, nisi conjuncta cum præcepto, vel substans præcepto; sed Christus in ThTharum. sententia solum habuisset potentiam omittendi mortem præscindendo à præcepto: ergo Christus in Thomist. sententia non habuisset libertatem omittendi mortem præceptam.

Affero 4. Nec salvatur libertas moriendi in Christo actu reflexo conditionato, quo fuisset acceptaturus mortem, quamvis non fuisset præcepta. Contra quosdam RRes.

130

Prob. Tali modo Christus subeundo & acceptando mortem non habuisset actum formalem obedientiæ, quo obediisset præcepto Patris; atqui sequela videtur esse contra Scripturam, quæ dicit, Christum factum esse obedientem usque ad mortem, & habuisse præceptum mortis: ergo. M. prob. Christus in hoc systemate fuisset meritis per acceptationem illam reflexam, quæ ponit mortem extra præceptum, & cui per accidens est, an mors sit præcepta, nec ne; quia vi talis actus illa acceptaretur, etiamsi non esset præcepta: ergo tali modo Christus acceptando mortem non habuisset actum formalem obedientiæ, quo obediisset præcepto Patris: actus enim formalis obedientiæ erga præceptum Patris



Patris hoc non indifferenter, aut accidentaliter, sed essentialiter respicit.

- 131 Affero 5. Non salvatur libertas Christi per hoc, quod præceptum mortis fuisset aliquo modo conditionatum, si nimirum judæi ipsum vellent occidere, quam conditionem Christus potuisset pro libitu impedire. Contra aliquos RRes.

Prob. Eo ipso, si mors fuit Christo præcepta, simul ei præceptum est, ne morti impedimentum voluntarie ponat; ut constat ex aliis præceptis rigorosis: alias salvo præcepto potuisset Christus carnem suam impassibilem reddere, aut ex Judæa fugere, quod tamen non admittitur: ergo.

- 132 Affero 6. Non salvatur libertas indifferentiæ in Christo per hunc vel illum actum in particulari & in individuo. Contra aliquos Recentiores.

Prob. 1. Indifferentia ad hunc vel illum actum in individuo non sufficit ad meritum, eo quod hic actus in individuo præ alio non habet æstimabilitatem majorem, vg. si hunc sive illum aureum det in eleemosinam, est ejusdem æstimabilitatis moralis: ergo. 2. Libertas in ordine ad actum præceptum consistit in hoc, quod voluntas possit ponere vel omittere actum ejusmodi præceptum; non vero, quod possit ponere hunc vel illum actum præceptum: ergo.

- 133 Affero 7. Hoc mysterium non explicatur per indifferentiam ad circumstantias mortis, quatenus Christus potuisset mori ex hoc vel illo motivo, hoc vel illo tempore, hac vel illa intensione. Est contra Vasquez & plures RRes.

Prob. 1. Salvari debet, quomodo Christus meruerit, consequenter etiam liber fuerit in acceptatione mortis quoad substantiam: ergo hæc explicatio non sufficit. A. prob. Scripturæ enim indicant, Christum obedientem fuisse, & libere factus est obediens usque ad mortem Phil. 2. ecce: usque ad mortem, non



non ad circumstantias mortis , & Joan. 10. *pono animam meam à me ipso* , non dicit , pono eam hoc tempore , in his circumstantiis ; ergo ipsa positio animæ , seu mors quoad substantiam fuit in libertate Christi : & Isaïæ 10. dicitur absolute : *oblatus est , quia ipse voluit* , & non dicitur : *oblatus est hoc tempore , hoc loco , quo ipse voluit* : ergo.

Prob. 2. Reus damnatus ad suspendium non est liber ad moriendum , si solum sit liber ad circumstantias , locum , tempus , & motiva mortis : ergo etiam Christus non fuisset liber ad mortem , si tantum ad circumstantias &c. mortis fuisset liber.

Prob. 3. Etiam circumstantiæ mortis fuerunt Christo præceptæ : ergo vel ad istas Christus non fuit liber , vel non est ratio , cur non fuerit etiam liber quoad substantiam mortis præceptam. A. prob. Luc. 22. dicitur : *filius hominis , secundum quod definitum est , vadit*. & Joan. 10. *sicut mandatum dedit mihi Pater , sic facio*. ubi *sicut* denotat modum & circumstantias : & Joan. 13. *sciens JESUS , quia venit hora ejus , ut transeat ex hoc mundo ad Patrem* , quod teste Maldonato intelligendum est de hora à Patre præstituta : ergo etiam circumstantiæ mortis fuerunt Christo præceptæ.

Confirm. Circumstantias passionis & mortis Christus non potuisset omittere saltem sine imperfectione morali positiva , quæ in Christo æque implicat , ac peccatum : ergo in Ariorum , sententiæ Christus non potuisset esse liber ad has circumstantias ; cum juxta ipsos ideo non fuerit liber quoad substantiam mortis , quia eam non potuisset omittere sine peccato. A. prob. omnes circumstantiæ vitæ , Passionis , & mortis Christi referunt speciale mysterium , consequenter censentur à Deo ad minimum esse consultæ Christo , vel intimatæ , præsertim , quia Christus dixit : *quæ placita sunt ei* ( scilicet Patri ) *facio semper* : ergo ommissio talium circumstantiarum fuisset saltem imperfectio moralis positiva contra consilium ac beneplacitum Divinum sufficienter intimatum , est practice observabile.



Objic. Quamvis sustineamus morbum necessarium, tamen libere agimus, quando eum ex motivo virtutis toleramus: ergo etiam Christus libere egit, esto necessario fuerit mortuus, si ex motivo virtutis mortem toleravit.

R. N. C. qui tolerat ex motivo virtutis, ponit omnino actum liberum patientiae, & acceptionis morbi quoad substantiam, ita, ut hanc acceptionem & patientem tolerationem omittere posset, quamvis ejus objectum, seu morbus sit necessarius. Ita quoque Martyres sunt omnino liberi ad actum, quo ipsam mortem quoad substantiam acceptant. Ast in AAorum. sententia Christus non esset liber ad actum, quo mortem quoad substantiam acceptaret, & vellet mori; sed tantum ad alium actum, quo acceptaret circumstantias mortis. Imo ex ipsorum principiis sequitur, Christum nec potuisse libere acceptare circumstantias mortis, quia & hæ Christo erant præceptæ.

134 Afferro 8. Non salvatur libertas Christi per præceptum minus rigorosum, quod esset instar consilii onerosi, per quod nec Christus obligaretur in conscientia sub reatu odii, neque ad penam, sed tantum sub conditione non conferendi aliquod bonum alias indebitum, quod tamen conferretur, si actio præcepta fieret. Talis conditio erat gratia & remissio peccatorum nobis non conferenda, nisi Christus præceptum mortis impleisset. Contra Vivam & aliquos RRes.

Prob. 1. Sacra scriptura indicat præceptum rigorosum mortis, ut superius probatum est 2. Præcepta naturalia in Christo fuerunt rigorose talia, & tamen ea observando Christus libere egit, & meritis est: ergo etiam præceptum mortis potuit esse rigorose tale, & illo stante Christus adhuc potuit mereri, & libere agere. 3. Saltem tali modo Christus habuisset libertatem ad imperfectionem moralem positivam, quam commisisset, si transgressus esset consilium onerosum, quod juxta AArios. transgredi potuisset.

Deduces 1.



Deduces 1. Christum defacto quoad opera supererogatoria, & non præcepta, semper egisse, quod fuit formaliter perfectius. Ita habet Communis fidelium, dixi: *formaliter perfectius*: nam certum est, quod Christus interdum potuerit materialiter perfectiorem, vg. intensiorem, vel etiam essentialiter meliorem actum elicere, cum perfectiores, & perfectiores actus materialiter & entitative tales in infinitum sint possibiles, & nullus actus ita perfectus sit, quin perfectior dari valeat; nihilominus formaliter semper fecit perfectissimum. Etenim illud est formaliter perfectissimum in genere moris, quod & quomodo Deus vult; atqui Christus, quia placita sui Patris cælestis semper fecit, illos semper actus & eo modo quoad intensiorem remissionem, & alias circumstantias, ac ipsam substantiam posuit, quos, & quo modo ejus Pater voluit: ergo Christus semper egit formaliter perfectissimum. M. constat, quia voluntas Divina est regula omnis honestatis & perfectionis moralis.

135

Deduces 2. Christum qua hominem non quidem physice, 2. bene tamen moraliter fuisse necessitatum ad formaliter perfectius, seu ad opera tantum consulta. Lugo & alii plures RRes. ac noster Poncius contra alios, quorum alii necessitatem physicam ad melius adstruunt, alii etiam moralem negant. Ratio primæ partis est: quia libertas saltem physica requiritur & sufficit, ut ejusmodi opera sint meritoria: ergo ad ea Christus non fuit physice necessitatus, sed fuit physice liber. Ratio secundæ est: dignitati & perfectioni Christi convenit, eam esse moraliter determinatam ad formaliter perfectius. 2. Christus fuit moraliter necessitatus ad evitandam omnem imperfectionem moralem; vi cujus fuisset reprehensibilis: ergo etiam fuit moraliter necessitatus ad faciendum semper perfectius, & illud, quod Deus hic & nunc voluit, & consuluit à Christo fieri; utpote cujus transgressio vel omissio fuisset positiva imperfectio moralis in Christo perfectissime cognoscente voluntatem & beneplacitum Divinum: quia imperfectio positiva est omissio vel actio libere facta contra consilium, vel beneplacitum Dei aut Superiorum, hic & nunc clare absque obligatione tamen propositum, & practice observabile.

Gg 2

DIS.



# DISSERTATIO VI.

## De satisfactione & meritis Christi.

136 **P**ostquam egimus de Voluntate humana Christi, ac libertate & sanctitate ejus, nunc agendum superest de actibus ejusdem voluntatis, scilicet de meritis & satisfactione Christi. Igitur.

Advertendum est. Tria in quolibet actu bono ad propositum spectari posse. 1. Meritum, quod dicit ordinem ad præmium. 2. Satisfactionem, quæ respicit injuriam compensandam. 3. Valorem talis actus, qui tamen cum merito & satisfactione coincidit. Etenim Valor satisfactorius nil aliud est, quam bonitas & æstimabilitas operis, vi cujus hoc est sufficiens ad compensandam vel ex toto, vel ex parte injuriam alteri illatam. Valor meritorius est iterum præstantia & æstimabilitas operis, quatenus hoc vi talis bonitatis potest movere alterum ad retributionem. Quod bene notari debet contra extraneos adstruentes infinitum valorem in meritis & satisfactionibus Christi. H. N.

\*\*\*\*\*

## ARTICULUS I.

*An Christus vere, & per quos actus, & pro quibus fuerit meritis?*

137 **A**SSERO 1. Christus vere & proprie meruit 2. . toto tempore vitæ suæ ab instanti conceptionis usque ad instans mortis, 3. per quoslibet actus liberos libertate physica, & Christo qua Viatori convenientes. Communis.

Prob. 1. pars. Trid. Sess. 6. c. 7. vocat Christum causam meritoriam nostræ justificationis: ergo hanc nobis vere & proprie est meritis. 2. Sacra scriptura indicat Christum vere esse meritum, & propter ipsius actiones meritorias nobis



bis & sibi obtinuisse præmium. *Isaïæ 53. si posuerit pro peccato animam suam, videbit semen longævum: & ad Philipp. humiliavit semetipsum Ec. propter quod & Deus exaltavit illum.*  
3. Omnes conditiones ad meritum requisitæ inveniuntur in Christo. Nam 1. habuit statum viæ & gratiæ. 2. Habuit actus honestos, liberos, & supernaturales. 3. Etiam habuit ex parte Dei acceptationem & promissionem de reddenda pro suis operibus mercede. Ita *Psal. 2. dicit Pater cælestis ad Christum: postula à me, & dabo tibi gentes, justificandas, ac salvandas, & Isaïæ 35. pro eo, quod laboravit anima ejus, justificabit ipse Justus servus meus multos. & paulo inferius: fortium dividet spolia, pro eo quod tradidit in mortem animam suam.*

Prob. 2. pars conclusionis. Christus à primo instanti conceptionis usque ad instans mortis exclusive habuit statum Viatoris, & potentias animæ expeditas ac independentes à phantasmate, & in operando infatigabiles: ergo toto tempore dicendus est bene egisse, & meruisse: hoc enim exigit perfectio & dignitas Christi.

Unde etiam in somno meruit; quia & tunc intellectus ejus & voluntas non impediabantur ab operibus suis, eo quod in his actibus non dependerit necessario à sensibus & potentiis externis, sicut nos, qui propterea somno ligatis sensibus non possumus uti ratione, nec libere agere. Non meruit tamen formaliter ipsa morte, & ipso instanti mortis, nec per vulnus laterale, nisi quatenus utrumque libere acceptavit, & sic ipsa mors, & apertio lateris post mortem fuere tantum merita objective talia, non formalia. Ratio est; quia tunc Christus non amplius erat Viator: meritis tamen est Christus formaliter per tolerantiam tormentorum causantium mortem, quam adhuc vivus sustinuit.

Prob 3. pars. Omnes actus liberi à primo instanti conceptionis usque ad instans mortis à Christo elicit, & alioquin convenientes Christo qua Viatori, habuerunt omnes conditiones ad meritum supra recensitas: ergo fuerunt omnes meritorii. Et constat ulterius: quia juxta dicta n. 135. omnes



actus Christi fuerunt formaliter perfectissimi & optimi in genere moris: ergo etiam fuerunt maximopere meritorii.

138 Dixi in conclusione, quod Christus fuerit meritus per actus ei qua Viatori convenientes: unde dubium oritur, an Christus etiam fuerit meritus per actus competentes Christo qua Beato, vg. per actum amoris beatifici, qui præsupponit visionem beatificam?

R. Scotus 3. D. 18. §. contra illud n. 9. & 10. videtur esse problematicus. Ratio sententiæ negativæ est: quia talis actus beatificus non competeat Christo qua Viatori: ergo videtur in illo deficere conditio una requisita ad meritum, scilicet status Viatoris.

Ratio sententiæ affirmantis est: quia ad meritum, si cætera requisita adsint, sufficit, quod operans sit in statu viæ, quamvis ejus actus non spectet ad statum viæ. Poterat præterea Christus, qua Viator, habere alium actum amoris meritorium, qui præsupponebat solam scientiam infusam, non vero visionem beatificam. Vide P. Herinx. Disp. 2. n. 48.

139 Affero 2. Christus valde probabiliter meruit omnem gratiam & gloriam Angelis, & nostris primis parentibus in statu innocentiae. Ita Scotistæ passim, ut Poncius, Mastrius, Herinx, Frassen, Henno, quibus consentiunt Suarez, Gormaz, Valentia, Tornerus, Cornelius à Lapide & alii contra alios, etiam nostrum Smising. Scotus hanc conclusionem ex professo non tractat, neque aperte ei favet, aut dissentit.

Prob. 1. S. Paulus ad Coloss. 1. v. 20. dicit: *pacificans per sanguinem crucis ejus, sive quæ in terris, sive quæ in cælis sunt*; atqui in cælis tantum fuerunt Angeli, quos etiam per crucem & merita Christi Deus pacificavit, seu præservavit ab inimicitia cum Deo per peccatum.

Prob. 2. S. Cyrillus Alexandrinus in illud Isaïæ 54. *latare sterilis*, vocat Christum agricolam omnis creaturæ ratione præditæ



præditæ, & addit: per ipsum enim omnis sanctificatio spiritualis tum in SS. Angelis, tum in nobis insita est. & S. Gregor. in cap. 2. L. primi Regum: nullus hominum neque Angelorum est sanctus, nisi per Christum. S. Bernardus serm. 22. in Cantica, qui cernit hominem lapsum, dedit stanti Angelo, ne laboretur, sic illum de captivitate eruens, sicut hunc à captivitate defendens, & hac ratione fuit æque utrique redemptio, solvens illum, & servans istum.

Et S. Thomas in c. 1. Joán. lect. 10. exponens Versum 16. de plenitudine ejus nos omnes accepimus, ait, quod de plenitudine Christi acceperint omnes justi, qui fuerunt, sunt, & erunt, & omnes etiam Angeli. & paulo inferius dicit: plenitudo gratiæ, quæ est in Christo, est causa omnium gratiarum in intellectualibus creaturis. Ex quibus textibus habetur, omnes omnino gratias Angelis, primis hominibus ante lapsum & in statu innocentiae, etiam post lapsum collatas Deum concessisse propter merita Christi.

Prob. 2. ratione: Debemus Christo tribuere, quod ei est gloriosius, & aliunde absque inconvenienti ei tribui potest; sed gloriosius est Christo omnes Angelos & primos parentes in statu innocentiae habuisse omnem gratiam dependenter à meritis Christi, & aliunde absque inconvenienti hoc potest tribui Christo, eo quod Ipse, & aliqua ejus merita fuerint decreta. & prævisa ante gratiam Angelis & primis parentibus determinatam & prævisam: ergo.

Adde, Christum esse caput Angelorum, & omnium hominum; sed Capitis est influere vitam in membra, maxime in principalia, qualia sunt Angeli, & primi parentes: ergo in hos influit vitam, nempe spirituales in gratia & gloria consistentem.

Objec. 1. Apostolus ad Hebræ. 2. ait: qui sanctificat, & sanctificantur ex uno omnes; id est, Christus, & qui per Christum sanctificantur, sunt omnes ejusdem naturæ humanæ ex eodem primo parente Adamo; ergo Angeli, qui non sunt



sunt naturæ humanæ, non sanctificantur per Christum, sed per gratiam à Deo misericorditer acceptam absque intuitu ad merita Christi.

R. S. Paulus ibi loquitur de sanctificatione per modum redemptionis, & reconciliationis, ac sanctificationis pro peccato, quæ gratia reconciliativa in Angelis non lapsis non habebat locum, sed in solis hominibus: quare homines soli tali gratia sanctificati, vel potius sanati sunt. Fuerunt tamen alio modo per Christi merita sanctificati tam Angeli quam primi homines per gratiam non sanativam, aut redemptivam, seu non præsupponentem peccatum.

Objic. 2. Christus tantum propter nos homines venit, & mortuus est: ergo non pro Angelis.

R. D. a. tantum venit propter nos homines in carne passibili C. a. venit tantum propter nos spectando substantiam Incarnationis & adventus ejus N. a. quoad substantiam etiam venisset, quamvis in carne impassibili, ut glorificaret, & sanctificaret Angelos cum hominibus per merita sua.

Dices cum Smising. Christus, si venisset in carne impassibili, non fuisset meritis aliquid: ergo.

R. N. a. Nam fuisset & tunc caput Angelorum, & hominum, ergo etiam tunc per sua merita derivasset in Angelos & homines gratiam. Et gloriosius fuisset Christo, si ab ipso Angeli & homines etiam in statu innocentiae præservatæ, dependere debuissent. Unde etiam in illo statu fuisset simul comprehensor & Viator, non tamen pænalitibus illis subiectus, quibus subijci debuit propter peccatum Adæ.

Objic. 3. Nulla Christi opera habent rationem meriti completi & perfecti, nisi sint illius morte consummata: ergo non meruit Christus Angelis gratiam, cum Angelorum gratia fuerit prius decreta, quam peccatum Adami prævisum, & mors Christi determinata. M. est certa ex sacra Scriptura. Sic



*An Christus vere, & per quos actus fuerit meritis? 241*

Sic Isaïæ 53. dicitur : *si posuerit pro peccato animam suam, videbit semen longævum.* Quod & D. Paulus ad Hebræ. 9. declarat insigni similitudine testamenti, quod non valet, nisi interveniente morte testatoris : quare & merita Christi nihil valuis-  
sent, nisi morte fuissent consummata. Hinc Christus in cruce jam jam moriturus dixit, *consummatum est.*

R. D. a. Nulla opera Christi habent rationem meriti com-  
pleti respectu gratiæ ut reconciliatricis pro peccato originali, &  
aliis ex hoc tanquam radice sequentibus C. a. nulla opera habent  
rationem meriti respectu gratiæ præcise sanctificantis, & non  
præsupponentis peccatum originale. Subd. & hoc est per ac-  
cidens C. a. est essentiale meritis Christi omnibus, etiam à car-  
ne passibili independentibus, & independentem à lapsu Adami  
& passione Christi prævisis N. a. sicut per accidens Christo fuit,  
quod venerit modo in carne passibili occasione peccati origina-  
lis prævisi, ita per accidens est ejus meritis saltem plurimis,  
quod ea nunc debuerint dependere à morte Christi, & ab hac  
consummatam virtutem habeant, quamvis efficaciam suam, etiam  
Adamo non peccante, & Christo non patiente adhuc habuif-  
sent ex dignitate infinita Verbi Divini. Videantur dicta superius.

Cæterum dum D. Augustinus Verbo Incarnato T. 23. in Jo-  
ann. tribuit vivificationem corporum, non denegat ei vivifica-  
tionem animarum, & Angelorum.

---

*ARTICULUS II.*

*An merita & satisfactiones Christi valorem aliquem  
traxerint ex dignitate Verbi Divini, & an Chri-  
stus de condigno & abundanter satisfecerit?*

**A**SSERO 1. Merita & satisfactiones Christi non solum per  
gratiam sanctificantem, sed etiam per personam Verbi dig- 141  
nificantur. Scot. 3. in D. 119. q. un. §. *quantum ad sufficien-*  
*P. Kick Theol. Tom. IV. H h tiam.*



tiam. n. 7. ibi : postquam dixit, quod actus meritorius Christi in se præcise spectatus, seu præscindendo à persona Divina Verbi, non possit acceptari in infinitum à Deo pro infinitis: addit: *ex circumstantia suppositi*, & de congruo, *ratione suppositi habuit quandam rationem extrinsecam*, quare Deus potuit illud meritum acceptare in infinitum, scilicet *extensive pro infinitis*, si autem illud meritum fuisset alterius personæ, tunc nec ratione operis, nec ratione operantis fuisset congruitas acceptationis illius pro infinitis. Neque obstat, quod Doctor asserat, personam Verbi de congruo concurrere ad valorem meritorum Christi, hoc enim ideo dicit, quia per meritum condignum intelligit illud, quod est complete condignum, consequenter non solum in actu primo propter æqualitatem vel excellentiam, aut valorem operis, sed etiam in actu secundo propter accedentem promissionem, qua Deus promittit mercedem pro tali opere, quæ promissio juxta dicta de merito complet meritum condignum in actu secundo.

Prob. I. ex propositione 19, Baii à Pio V. & Gregorio XIII. confixa, quæ sic habet: *opera justitiæ & temperantiæ, quæ Christus fecit, ex dignitate personæ operantis non traxerunt majorem valorem: ergo ex opposito traxerunt valorem ex persona Divina Verbi.*

Prob. II. Merita hominis justis etiam significantur, & valorem accipiunt majorem ex dignitate Filii Dei adoptivi: ergo à fortiori opera Christi significantur, & valorem majorem accipiunt ex dignitate Filii Dei naturalis. A. patet iterum ex propositione 15. Baii damnata: *ratio meriti non consistit in eo, quod qui bene operatur, habeat gratiam & inhabitantem Spiritum sanctum, sed in eo solum, quod obedit legi Divinæ.*

Prob. III. Dignitas personæ in communi æstimatione dignificat obsequium, seu meritum etiam in politicis; nam quoniam nobilior est persona, à quo procedit obsequium, eo etiam majus tale obsequium reputatur: ergo idem dicendum in proposito.

142 Afferro II. Christus non solum condigne, sed & abundanter satisfecit, & meritis est pro nobis. Ita Catholici omnes.

Prob. I.



*An Christus de condigno & abundanter satisfecerit ? 243*

Prob. I. Psal. 129. dicitur ; *quia apud Dominum misericordia , & copiosa apud eum redemptio.* Ad Rom. 5. *ubi abundavit delictum , superabundavit gratia.* 1. Corinth. 6. *empti estis pretio magno.* 1. Joan. 2. *Ipse est propitiatio pro peccatis nostris , non pro nostris autem tantum , sed etiam pro totius mundi.*

Prob. II. Ex S. Chrysoft. homil. 11. in caput. 5. ad Rom. multo siquidem plura , quam debeamus , Christus pro nobis solvit , tantoque plura , quanto guttulam exiguum pelagus excedit immensum. Nec desunt alii PP. qui idem dicunt : quibus accedit Concilium Triburiense. c. 10. docens ; ideo plus vini , quam aquæ adhiberi in calice consecrando , quia major est sanguinis Christi efficacia , quam populi fragilitas , quæ per aquam figuratur.

Ratio est : Ob dignitatem Personæ Verbi Divini dignificantis merita Christi , constituuntur ea in superiore quodam ordine , ita , ut nunquam possint exauriri , vel adæquari , etiamsi applicarentur pro infinitis hominibus , & pro peccatis eorum in infinitum : quæ ratio amplius dilucidabitur in sequentibus articulis.

Ex duabus conclusionibus præcedentibus deduces I. Satisfactiones & merita Christi ex se , & independenter ab acceptance ac promissione Divina fuisse condigna & superabundantia in actu primo , ita , ut possent mereri gratias & remissiones peccatorum , ac pœnarum in infinitum. Ratio est : quia hunc valorem non solum condignum , sed & superabundantem communicat meritum & satisfactionibus Christi dignitas Personæ Divinæ operantis , independenter ab acceptance & promissione Dei , imo ideo Deus hæc merita & satisfactiones ad tantum effectum acceptat , quia sunt ex se abundanter digna , ut ita acceptentur.

Deduces II. Satisfactiones tamen Christi & merita ejus condignitatem , seu potius efficaciam suam in actu secundo habere dependenter ab acceptance & promissione Divina. Ratio hujus est I. Quia licet operationes Christi essent tanti valoris,

H h 2

ut



ut possent movere Deum ad retribuenda creaturis rationalibus quævis bona, & remittenda illis omnia peccata, tamen illæ operationes Christi tanquam res creatæ non erant tales, ut possent Deum obligare ad danda illa præmia, & condonanda peccata: nam Deus nulla re creatæ obligari potest: ergo requirebatur ejus acceptatio & promissio ad hanc obligationem inducendam. 2. Deus potuisset operationes Christi exigere titulo altissimi Domini, quin retribuere pro illis ullam mercedem: ergo ut non exigeret solo titulo Domini, hujus debuit accedere promissio & acceptatio. 3. Esto labor tuus integræ die exercitus in vinea alterius sit dignus stipendio diurno, tamen hoc non potes à Domino vineæ exigere, nisi te conduxerit, & tibi promiserit pro labore hoc mercedem diurnam: ergo quamvis opera Christi ex se sint abundanter digna, ut pro iis dentur hominibus & Angelis gratia & gloria, ac remittantur peccata, tamen nisi Deus acceptet in hunc finem talia, & pro illis repromittat mercedem, non sunt complete condigna in actu secundo, seu Deus non obligatur ad remunerationem talium operum.

Objic. Si Christus pro nobis abundanter satisfecit, tunc nos non tenemur satisfacere; sed hoc est falsum: ergo &c.

R. N. M. nostra salus non solum dependet ab abundantia & valore meritorum Christi, sed etiam ab applicatione & communicatione illorum nobis facta per sacramenta, & nostram cooperationem.

Ex quo habes, vim satisfactionis Christi in actu secundo essentialiter, vel saltem principaliter stare in eo, quod Christus omnibus hominibus obtinuerit saltem media sufficientia ad salutem. Ratio est, quia Christus non voluit per sua merita & satisfactiones remitti quæcunque peccata sine cooperatione libera adultorum, neque originale voluit dimitti in parvulis sine ullo remedio illis applicato v. g. sine baptismo in lege nova.



ARTICULUS III.

An Christus satisfecerit ex rigore justitiæ?

ASSERO: Christus non satisfecit pro nobis ex rigore justitiæ. Communis Scotistarum contra Poncium. Scotus in 4. D. 46. q. 1. §. ad argumenta principalia ait: *Deus non est debitor, nisi bonitati suæ, creaturis autem est debitor ex liberalitate sua*; atqui si Christus qua homo ex rigore justitiæ satisfecisset pro nobis, tunc nobis esset debitor non ex liberalitate sua, sed ex rigoroso titulo justitiæ: ergo. Idem tenent Lugo, Vasquez, Gormaz, & alii plures ab his citati.

144

Prob. I. Si satisfactio Christi fuisset ex justitia rigorosa, tunc hac satisfactione præstita Deus Christo fecisset injuriam stricte dictam, si nolisset remittere peccata humani generis; sequela videtur esse falsa: ergo & id, unde sequitur. M. patet; nam satisfaciens ex rigore justitiæ acquirit jus adversus offensum, ut hic offensam & vindictam remittat; quod si offensus nolit remittere, infert injuriam stricte dictam satisfaciendi, quia lædit ejus jus, quod habet ad remissionem. m. prob. videtur implicare, quod creatura, quæ est essentialiter subjecta Deo, contra hunc aliquod jus strictum acquirat, ita, ut Deus contra hoc jus agens dici possit injurius creaturæ: nam si creatura haberet jus adversus Deum, tunc creatura aliquo modo superioritatem erga Deum haberet, & Deus esset aliqua ratione inferior, & subjectus, seu obligatus creaturæ: quod implicat. Hinc licet Deus acceptarit opera Christi in satisfactionem pro peccatis humani generis, & pro iis promiserit nobis remissionem peccatorum, tamen per hoc non est nobis debitor factus, sed sibi, nimirum suæ veracitati, & fidelitati, ne ipse labem infidelitatis incurrat, ut notat Scotus cit. cum D. Thoma & aliis PP. Videatur tractatus de jure & justitia: ubi satis ostensum est, quod Deus non possit obligari ex titulo stricte justitiæ.

Confirm. Nec Deus, qua Persona Divina, nec qua homo potest adversus Deum habere jus strictum justitiæ in ordi-



ne ad remittenda peccata. Non qua Persona Divina; alias haberet hoc jus contra se ipsam; jus enim hoc in Divinitate, vel in voluntate Divina fundatur, quæ etiam est in persona Filii, ac in omnibus tribus Personis æqualiter; atqui nec Divinitas nec persona Filii Divini, ratione Divinitatis potest adversus se ipsam habere jus; cum nemo contra se habeat jus.

Neque tale jus strictum adversus Deum habet Christus qua homo, quia taliter est essentialiter creatura, proinde essentialiter cum omnibus suis actionibus meritoriis Deo subjicitur, neque ulla ratione per illas contra Deum jus acquirere potest.

Objic. I. Meritum Christi a Verbo dignificatum est infiniti valoris; ergo licet actio alterius creaturæ non dignificata per Verbum non possit obligare ex rigore justitiæ Deum, tamen hæc potest.

R. 1. N. a. juxta dicenda. R. 2. licet meritum Christi sit dignificatum à Verbo, & transmissio, quod sit infiniti valoris, tamen est, & manet actio creata, quæ non potest obligare Deum; neque Verbum dignificans talia merita potest fundare jus adversus Deum: quia alias Deus haberet jus adversus se ipsum. Et implicat unam personam Divinam obligari alteri.

Objic. II. Peccatum est injustitia rigoroſe dicta contra Deum: ergo ut satisfactio pro peccato sit condigna & æqualis, debet & ipsa esse à justitia rigorosa.


R. 1. retorq. argument: ergo ut Christus satisfecerit condigne pro peccatis impænitentiæ & infidelitatis &c. debuit & ipse exercere actus formales virtutis pænitiæ, & fidei, quod tamen universaliter negatur.

R. 2. N. c. Actus satisfactorius non debet necessario spectare ad illam virtutem, cui opponitur peccatum vel offensa, ut patet ex retorsionibus, sed tantum requiritur, ut actus, qui in satisfactionem fit, æstimabilitate & bonitate sua adæquet offensam, & injuriam illatam per peccatum, quod fieri potuit per



per actus meritorios, & satisfactorios elicitos ex motivo aliarum virtutum, quibus non opponebantur peccata commissa.

Sunt plura, quæ pro & contra nostram conclusionem dici possunt, ea tamen multum habent quæstionis de nomine, cui non adeo est immorandum.



### ARTICULUS IV.

*An satisfactio & merita Christi sint valoris simpliciter & intrinsece infiniti?*

**A**SSERO & Rdeo. negative. Scotus in 3.D. 19. q. un. n. 9. & 10. cum omnibus suis excepto unico Vulpe contra Thomist. & RRes. plerosque. 145

Prob. I. Ille effectus est simpliciter finitus, ad quem præter principium infinitum concurrunt plura principia finita; sed ad valorem meritorum, & satisfactionem Christi præter infinitam Personam Verbi concurrunt plura principia finita: ergo merita & satisfactiones Christi sunt simpliciter finitæ. M. videtur esse certa: tum quia effectus sequitur debiliorem partem causæ, & bonum ex integra causa, malum ex quolibet defectu. Tum, quia principium finitum nullam habet proportionem ad effectum aliquem infinitum. Tum, quia Deus ceu principium infinitum cum causa creata concurrens finitum tantum effectum efficit. m. vero prob. Ad valorem meritorum & satisfactionum Christi præter infinitam personam Verbi concurrunt moralis actus, bonitas, ejus objectum, ac plures circumstantiæ, ut difficultas, intensio, duratio, quæ omnia sunt finita.

Rdebis. 1. Sola dignitas Verbi formaliter dignificat merita Christi, & illis valorem tribuit, non vero bonitas moralis ex objecto, fine, aliisque circumstantiis desumptum, quæ tantum



tantum se habent præsuppositive ad dignitatem & valorem meriti Christi, & ejus substratum materiale solum constituunt.

Contra est 1. Si sola dignitas Verbi formaliter constituit valorem meritorum & satisfactionum Christi, & ad hunc nullum aliud principium formale requiritur, tunc non est ratio, cur non quæque actiones mere naturales & involuntariæ Christi, ut pulsus arteriarum, & cordis fuerint infiniti valoris in ratione meriti & satisfactionis: & cur non etiam, si Verbum assumpsisset naturam leoninam, actiones leoninæ fuissent infinite meritoriae, & satisfactoriae: nam & actiones illæ naturales, & hæc bestiales habuissent principium formale, & adæquate constitutum dignitatis & valoris, & quidem infiniti meritorum Christi juxta AArios: ergo.

Contra est secundo. Valor operis satisfactorii, vel meritorii, est vel ipsa bonitas moralis operis, vel saltem est passio immediate consequens bonitatem moralem; atqui hæc bonitas moralis, & æstimabilitas ejus non desumitur unice à persona & supposito operante, sed etiam ab aliis principiis ad opus concurrentibus vg. ab objecto, difficultate, intensione diuturnitate &c. etiam hæc principia finita præter Personam infinitam concurrunt ad valorem operum & meritorum, ac satisfactionum Christi.

Contra est 3. Etiam juxta AArios multos gravitas offensæ in peccato non desumitur unice ex dignitate personæ offensæ, aut vilitate personæ offendentis: sed etiam ex cognitione, objecto, intensione, & aliis circumstantiis &c. ergo neque valor meritorum, & satisfactionum desumitur unice ex dignitate personæ infinitæ præstantis satisfactionem, sed etiam ex aliis principiis concurrentibus.

Contra est 4. Si valor meritorum proveniret à sola dignitate personæ operantis, tunc homo in majori gratia sanctificante constitutus plus mereretur, si tantum minimum opus supernaturale eliceret, quam alius minori gratia præditus, eliciens actum præstantissimum & summe heroicum amoris; atqui hoc est absurdum: ergo & illud, unde sequitur.

Contra



Contra est 5. Quamvis gratia sanctificans in homine iusto concurrat ad opus meritorium dignificandum in genere causæ formalis moralis, tamen ejus effectus, seu opus meritorium limitatur per alia principia simul concurrentia, ut per obiectum, finem, & circumstantias, intensionem actus, &c. & sic homo iustus habens gratiam sanctificantem ut 7mo. intensam minus mereretur per actum charitatis intensum ut duo, quam intensum ut tria vel quatuor: ergo à pari, quamvis Verbum Divinum in genere causæ formalis moralis dignificaret merita Christi, tamen hæc limitarentur per alia principia simul concurrentia.

Contra est 6. Persona Divina ad actus Christi dignificandos duntaxat concurrat in ratione suppositi, non vero in ratione naturæ: ergo natura humana Christi limitata sub ratione sibi propria per potentias suas, intellectum & voluntatem pariter concurrat ad dignificandas ejusmodi actiones, sed solum limitato modo, quia & ipsa natura humana Christi tantum limitata est.

Prob. II. Non datur unum infinitum majus altero; sed inter merita Christi unum est majus altero quoad valorem: ergo merita Christi non sunt infinita quoad valorem. m. prob. quia utique plus meritis est Christus per tolerantiam & acceptationem crudelissimæ mortis, quam per unicum suspirium? insuper plus meritis est Christus omnibus operibus meritoriis simul acceptis, quam una actione seorsim & solitarie considerata.

Prob. III. Quamvis suppositum Divinum, maxime juxta AArios sanctificet sanctitate increata humanitatem Christi, tamen sanctificat solum modo finito, eoquod humanitas Christi, tanquam creatura solum sit capax sanctitatis finitæ: ergo quamvis suppositum Verbi dignificet actus & opera humanitatis Christi, tamen ea dignificat tantum modo finito, quia actiones finitæ sunt capaces solius dignitatis finitæ.

Prob. IV. Suppositum Divinum in se physice entitative spectatum neque influit physice in actum meritorium humanitatis Christi, nec eum sub ratione meriti & valoris intrinsece



constituit, sed tantum influit in eum moraliter, quasi forma moralis: ergo hic influxus non debet esse necessario ad æqualitatem, & juxta dignitatem infinitam Verbi, maxime, cum actio meritoria creata talis infinitæ dignitatis non videatur esse capax. A. constat ex hoc, quia actiones præsertim humanitatis Christi sunt tantum denominative suppositi, & ab hoc tantum denominative significantur, quatenus ob communicationem idiomatum denominant suppositum Divinum, & fiunt actiones Theandricæ, & ob hoc evehuntur ad dignitatem & ordinem supremum in ratione meriti & valoris, non tamen fiunt formaliter & intrinsece infinitæ, nec pro constitutivo formali habent ipsam personalitatem Verbi.

Prob. V. Si homo per impossibile haberet gratiam sanctificantem infinitam, omnia opera ejus non essent valoris simpliciter infiniti; sed opera perfectiora plus, & minus perfecta minus mererentur: ergo idem dicendum de operibus meritoriis Christi, quamvis hæc significantur per personalitatem infinitam Verbi. C. patet, quia Verbum dignificat opera humanitatis Christi ad normam, qua nostra opera de condigno meritoria dignificat gratia sanctificans, scilicet commensurative ad majorem vel minorem perfectionem actus.

146 *Objic. I. Variæ autoritates dicunt, merita Christi esse infinita: ergo sunt infinita.*

R. d. a. dicunt esse infinita secundum quid negative C. a. infinita simpliciter & intrinsece N. a. non sunt simpliciter infinita ista merita, ut dictum est, sunt tamen eatenus infinita secundum quid, & negative, quatenus sunt in supremo quodam ordine, ita, ut per nulla præmia excogitabilia in infinitum eorum valor, imo etiam valor unius meriti Christi possit adæquari, & exhauriri, & ut sufficiant impetrandæ remissioni, & præstandæ satisfactioni pro peccatis in infinitum committendis, à quibus pariter vis satisfactoria eorum exhauriri nequit.

Dices: Eo ipso, quod nec unius meriti valor possit adæquari vel exhauriri per præmia in infinitum possibilia, debent merita Christi esse intrinsece infiniti valoris: ergo.

R. N. a.



R. N. a. Licet unum peccatum mortale non possit in malitia & offensa adæquari per infinita peccata venialia, tamen non est infinitæ malitiæ, ut multi ex nostris Aariis, & inter hos clarissimus D. Mayr docent, sed solum ex hoc sequitur, quod sit in superiore quodam ordine malitiæ & offensæ Dei respectu omnium peccatorum venialium: ergo licet unum meritum Christi non possit exhaustiri per infinita præmia possibile, tamen non est infiniti valoris intrinseci, sed solum est in superiore quodam ordine respectu omnium præmiorum. 2. Angelus ex eo non est simpliciter infinitæ perfectionis, quod excedat in perfectione infinitas possibile creaturas inferiores corporales, producibiles, sed tantum est in superiore ordine respectu talium creaturarum corporearum: ergo idem est dicendum in proposito.

Igitur meritum Christi duntaxat habet infinitatem negativam, & secundum quid: consistit autem hæc infinitas negativa in excellentia ordinis, quatenus merita Christi ob Personam Verbi ita sunt in supremo ordine satisfactionis & virtutis meritoria, ut major satisfactio dari, aut excogitari non possit; quia non potest esse major persona, quæ talem satisfactionem poneret: & ob ipsum hunc ordinem supremum non tot peccata committi, nec tot præmia concedi possunt, quæ adæquarent, & exhaustirent valorem operum Christi, & sic sufficit iste valor pro infinitis præmiis obtinendis, & infinitis peccatis delendis: quia omnia præmia & peccata excogitabilia sunt in ordine inferiore respectu meritorum Christi.

Per hoc tamen non adstruitur aliqua infinitas intrinseca in meritis Christi: nam licet sint in supremo ordine, tamen in hoc sunt intrinsece finita; tum ob principia finita ad ejus valorem concurrentia, tum quia ipsum Verbum infinitum tantum finito, quamvis supremo modo dignificat hæc merita, ceu actiones creatas, quæ sunt incapaces infinitæ dignitatis: tum quia in ipso hoc ordine supremo meritorum dantur aliqui gradus, & inæqualitas, cum unum meritum altero sit majus; quod in rebus infinitis implicat: nam unum infinitum altero majus esse non potest.



Instabis : Ex effectibus perfectioribus & perfectioribus in infinitum , ad quos se extendere potest omnipotentia Dei , arguimus infinitam virtutem productivam in Deo : ergo etiam ex injuriis infinitis gravioribus & gravioribus in infinitum , ad quas per modum condignæ satisfactionis se extendere potest valor operum Christi , arguere debemus infinitum valorem satisfactorium in talibus operibus Christi.

R. 1. invert. argument. Ex cognitionibus perfectioribus , & perfectioribus , quas intellectus Angelicus posset habere in infinitum circa objecta possibilem perfectiora & perfectiora , non licet statim inferre perfectionem infinitam in tali intellectu : ergo à pari ex hoc , quod sufficiat satisfactio Christi pro gravioribus & gravioribus peccatis in infinitum , non licet inferre infinitatem ejus intrinsecam.

R. 2. N. c. & parit. Quamvis omnipotentiae infinitas ex prædicto capite sequatur ; tamen inde solum inferitur , quod illa causa physica efficiens sit infinitae virtutis , quæ se potest ad effectus semper perfectiores in infinitum extendere , non vero etiam sequitur , quod causa moralis debeat habere infinitam virtutem : etenim causæ moralis virtus in ordine ad causandum effectum bonum desumitur ex bonitate , ac perfectione & aestimabilitate talis causæ : sed sæpe potest bonitas unius rei finitæ esse in tam excellenti ordine , ut per alias res inferioris ordinis in infinitum multiplicatas non possit adæquari vel exauriri. Exemplum habes de visione beatifica Angeli , vel animæ beatæ , quæ tantæ perfectionis est , ut per cognitiones alias inferioris ordinis in infinitum possibilem non possit adæquari , & tamen est solum finita. Iterum de actu aliquo supernaturali , qui ita præponderat in ratione meriti actibus mere naturalibus honestis , ut his etiam in infinitum multiplicatis non possit æquari : Idem constat ex opposito de unico peccato mortali , quod quia est in superiori ordine respectu venialium , ab his etiam infinitis quoad malitiam non adæquatur : igitur quia satisfactio Christi ob personam Divinam ad supremum ordinem inter res finitas elevatur , ideo ea etiam moralem valorem habet ad quævis peccata in infinitum dimittenda , ita , ut ab his non possit exauriri.

Objic. II.



*An satisfactio & merita Christi sint infiniti valoris? 253*

Obiic. II. Valor satisfactionis crescit ex persona operante, & satisfaciēte : quo enim maior est persona satisfaciens, eo maioris valoris est eius meritum ac satisfactio : ergo si persona satisfaciens sit infinita, satisfactio quoque erit infiniti valoris.

R. I. retorq. argument. Actus amoris crescit ex dignitate objecti amati : ergo si objectum amatum est infinitum, etiam amor est infinitus.

R. 2. D. a. Valor satisfactionis crescit arithmetice juxta dignitatem personæ operantis, & ad æqualitatem dignitatis talis personæ N. a. crescit non ad æqualitatem, & proportionem incommensurabili C. a. & N. c. dignitas quidem Personæ auget valorem meriti, sed non certa & arithmetica proportionem, nec ad æqualitatem, ita, ut meritum & satisfactio tantum in suo genere crescat, quanta est dignitas personæ. Exempli causa, crescit quidem amor ex objecto, & perfectior est, si perfectius objectum amatur, non vero crescit ad æqualitatem objecti, ut tantus sit, quantum est objectum, consequenter infinitus sit, si objectum est infinitum : nam non solum objectum concurrat, sed & alia principia ad perfectionem amoris, quæ ejus bonitatem limitare possunt. Idem in proposito dic ad argumentum, quia etiam valor meriti & satisfactionis non desumitur unice à dignitate personæ, sed etiam ab aliis principiis, & dato, quod totus valor desumeretur à dignitate infinita Verbi, tamen hæc tantum modo finito dignificaret actiones creatas humanitatis Christi : de quo statim plura.

Dices : Suppositum Christi infinite excedit supposita alia creata : ergo & meritum Christi infinite excedit merita aliorum suppositorum.

R. N. c. Nam merita Christi non crescunt ad æqualitatem & arithmetice juxta dignitatem Personæ. Vel D. c Meritum Christi excedit infinite infinitate extrinseca, & negativa C. c. infinite intrinsece N. c. eo ipso, quod merita Christi infinita negative, seu sint in supremo ordine, jam per nulla merita, etiam in infinitum ponibilia ab aliis suppositis inferioribus possunt exhaustiri vel adæquari.



Instabis. Suppositum Divinum est forma intrinsece constitutiva valoris meritorii, & satisfactorii: ergo sicut suppositum Divinum, tanquam forma intrinseca, est formaliter & intrinsece infinitum: ita quoque valor meritorius Christi erit formaliter intrinsece infinitus. A. indicatur ab Apostolo dicente ad Hebræ. 5. *dum esset filius Dei, exauditus est pro sua reverentia.*

R. D. a. Suppositum Divinum est forma vera physica, secundum entitatem & dignitatem suam physicam constituens valorem intrinsece N. a. est quasi forma moralis moraliter tantum constituens & dignificans valorem meriti. C. a. N. c.

Universaliter Persona, vel suppositum operans physice spectatum non constituit intrinsece, tanquam forma dignificans, valorem meritorum; sed est tantum quasi forma moralis propriæ suæ operationis, & moraliter, seu in æstimatione morali, & per denominationem extrinsecam eam dignificans: nam eo nobilior est honor, vel obsequium, quo nobilior est persona præstans talem obsequiosam actionem. Interea non tota forma constituens valorem obsequii & meriti est unica dignitas personæ: alias enim non esset attendendum, qualem vel quantam actionem, quam intensam, quam laboriosam persona in dignitate constituta exercet: & ejusdem valoris esset in Principe eleemosyna paucorum crucigerorum, ac elargitio plurimorum millium aureorum: nam utique actus à sola dignitate operantis personæ, quæ est eadem, dignificaretur, non vero à quantitate materiæ, aut ab aliis circumstantiis: quod tamen falsum esse videtur.

Deinde specialiter notandum est ex Amico T. 3. Disput. 35. Art. 6. quod non idem valor, & dignitas, quam habet persona Divina Verbi, communicetur operibus humanitatis Christi. Nam dignitas Verbi cum hoc identificatur, & est à se, & est essentialiter immultiplicabilis: valor vero communicatus operibus & meritis humanitatis Christi est tantum denominative à Verbo, & est valor Verbi solum moraliter, non physice: insuper iste valor est ab alio multiplicatus juxta multiplicationem operum humanitatis Christi. Quare valor Verbi



bi ipsius intrinsecus est magis æstimabilis, quam communicatus operibus humanitatis.

Paucis: Opera humanitatis Christi tantum denominative per denominationem extrinsecam à Verbo desumptam, & sic moraliter non physice dignificantur à Verbo Divino: actiones enim sunt suppositorum tantum denominative; proinde dignificantur à suppositis tantum denominative, non vero intrinsece, ac physice, quasi supposita secundum propriam & totam entitatem physicam essent partes constitutivæ actuum ut meritoriorum. Unde per actum meritorium Christi non intelligitur totum complexum ex actu & Christo, ac supposito Divino operante; quale complexum est physice infinitum in ratione entis, utpote in se excludens personam Divinam infinitam: sed intelligitur sola operatio humanitatis Christi moraliter dignificata per Personam Verbi, quæ inde dici solet Theandrica, ac Deificata.

Objic. III. Ideo merita & satisfactiones Christi non sunt juxta nos infiniti valoris, quia in hoc sunt inæquales: ut dictum est prius: sed hæc ratio nulla est: nam omnia merita æquale mererentur præmium: ergo sunt æqualia: ergo.

R. C. M. N. m. omnia mererentur æquale præmium, seu gratias & præmia in infinitum possibilia. C. m. mererentur æquali modo & jure N. m. majus meritum tribuit majus jus, & fortio-rem titulum, quod sufficit ad majorem vim merendi: nam possunt duo eandem rem ac idem præmium mereri, & tamen unus habet majus meritum, quam alter, qui nobiliorem actionem posuit pro assequendo hoc præmio.

Dices I. Si merita Christi essent inæqualia, tunc ideo, quia plus meritis esset omnibus actionibus meritoriis, quam una sola; sed hæc ratio nihil probat: nam una persona perfectione & dignitate est æqualis omnibus tribus Personis: ergo etiam una actio Christi quoad valorem meritorium potest esse æqualis omnibus actionibus Christi.

R. C. M.



R. C. M. & N. m. ad ejus prob. N. c. & paritatem : æqualitas personarum Divinarum desumitur adæquate ab una natura Divina , quæ æqualiter inest singulis tribus Personis : at vero valor meritorum Christi non desumitur unice à Personalitate Verbi ; sed etiam à fine , objecto , circumstantiis , quæ non sunt æqualiter in singulis meritis Christi.

Dices. 2. Complexum ex Deo & una creatura est æquale complexo ex Deo , & omnibus creaturis : ergo unum meritum Christi est æquale omnibus meritis Christi.

R. N. c. In illo exemplo de complexo ex Deo & creatura spectatur Deus in se physice & realiter , ac secundum omnes perfectiones suas , & prout continet omnes creaturas eminenter. Unde tale complexum est simpliciter infinitum , sive Deus cum una , sive cum multis creaturis sumatur imo ipse Deus solus sine ulla creatura est simpliciter infinitus. Ast in proposito sumitur persona Divina non in se physice , ac realiter , sed tantum quatenus moraliter secundum proportionem communicatur actionibus meritoriis Christi , earumque valorem ita constituit , ut admittat alia principia creata , quæ ipsa persona Divina non supplet. Pro quo magis intelligendo.

Dices 3. Persona Verbi infinita continet eminenter omnes perfectiones principiorum creatorum concurrentium ad actum meritorium Christi , easque sua perfectione quasi absorbet : ergo à sola personalitate Verbi valor meritorum Christi desumendus est.

R. D. a. Verbum eminenter continet omnes perfectiones principiorum concurrentium &c. & tamen ut taliter continens istas perfectiones non influit , nec constituit actus meritorios Christi C. a. secus N. a. Verbum Divinum in actiones meritorias Christi solum influit sub ratione Personæ , & quatenus continet dignitatem vel perfectionem suppositi ; cujus ratio est : quia Verbum humanitatem & perfectiones humanitatis tantum assumpsit in ratione Personæ terminantis illarum dependentiam : ergo tantum munus personalitatis humanæ & creatæ supplet modo quodam eminenti , non vero supplet naturam ipsam humanam



manam, nec influxum potentiarum activarum humanitatis, scilicet voluntatis, aut intellectus, neque aliorum comprincipiorum. Unde neque supplet libertatem, aut bonitatem moralem quam habent actus meritorii tam à voluntate humana, quam ab aliis comprincipiis creatis: alioquin etiam pulsus cordis, & alii actus mere naturales, libertate carentes essent in Christo meritorii, quia libertatem & moralitatem creatam, qua carent, supplet Verbum. Imo alias etiam natura leonis assumenda à Verbo esset capax meriti, & satisfactionis infinitæ; quia cognitionem intellectivam, ac libertatem voluntatis ad meritum requisitam suppleret Verbum, hæc omnia eminenter in se continens.

*ARTICULUS V.*

*An pura Creatura potuisset de condigno satisfacere pro peccato mortali, vel peccatis omnibus mundi?*

**N**OTA 1. Per puram creaturam hic intelligi hominem vel Angelum non unitum hypostatice Verbo Divino, vel alteri personæ Divinæ, ornatum tamen donis supernaturalibus gratiæ. Quare per creaturam puram non intelligitur illa, quæ solis naturalibus viribus provisa destituitur gratia sanctificante, ac omnibus aliis donis supernaturalibus. 147

Nota 2. Non esse quæstionem de satisfactione de congruo, sed de condigna, & æquivalenti offensæ Deo illatis.

Nota 3. Non posse creaturam aliquam puram tam perfecte, nec abundanter satisfacere, sicut satisfecit Christus: ratio est: quia merita & satisfactiones creaturæ puræ non dignificantur per suppositum Divinum, & hinc nunquam ad tantum valorem ascendere possunt, quantum obtinent actiones Christi à Verbo Divino dignificatæ. His præmissis.



Dico. De absoluta potentia pura creatura immunis à peccato originali, & instructa plenitudine gratiæ potuisset satisfacere pro peccato mortali alterius hominis, imo pro peccatis totius generis humani. Scot. in 3. D. 20. §. contra illud n. 9. ubi ita ait: *præterea unus purus homo potuisset satisfacere pro omnibus, si fuisset conceptus sine peccato, sicut potuisset fieri de possibili, & Deus dedisset sibi summam gratiam, quam potuisset recipere, sicut dedit Christo sine præcedentibus meritis ex liberalitate sua: talis enim potuisset mereri deletionem peccati, sicut & beatitudinem.* Scotistæ contra extraneos.

Hæc conclusio ab aliquibus non recte probatur: quia totus valor satisfactionis & meriti condigni provenit ex acceptance Divina, & Deus potuisset acceptare opera puri hominis, sicut acceptavit opera Christi. Nam contra hanc probationem est 1. Quia condignitatem & æqualitatem operis meritorii in actu primo non dat acceptatio vel promissio Divina, sed hæc illam condignitatem jam supponit, ut dictum est superius in Tract. de merito. 2. Si hæc probatio subsisteret, potuisset Deus acceptare opera pure naturalia hominis in puris naturalibus constituti: ut ex textu pro conclusione laudato apparet. 3. Iterum si vera foret ista probatio, potuisset pura creatura tam perfecte satisfacere, sicut Christus satisfecit, quia potuissent opera creaturæ puræ æqualiter acceptari, ac opera Christi: quod est contra Scotum. in 3. D. 19. q. un. §. *quantum ad sufficientiam* n. 7. ubi docet, quod opera cujuscunque creaturæ non unitæ Verbo non habeant, nec habere possint condignitatem, quæ in Christo desumitur à supposito Divino. 4. Acceptatio non reddit opus condignum, sed tantum declarat Deum tali satisfactione, seu condigna sit, seu non, contentum esse.

Probant. alii 2. Iterum non bene negantes, quod peccatum crescat in ratione offensæ ob personam seu Deum offensum. Etenim licet offensæ mere realis, quæ sit in bonis externis, & in pecunia non crescat ex dignitate personæ, tamen sic crescit offensæ personalis; patet in offensæ illa, qua afficitur persona Regis, quæ eo major est, quo altior est persona: hinc major est injuria inflictæ superiori, quam subdito, vel alteri, qui non  
est



est constitutus in aliqua dignitate. His igitur probationibus dimissis concludo aliter.

Prob. I. Non potest hujus implicantia ostendi, ut ex solutione objectionum constabit. 2. Reddens personæ offensæ tantum, quantum per offensam abstulit, præstat satisfactionem condignam, & æquivalentem offensæ; sed pura creatura donis supernaturalibus exornata de potentia absoluta potest tantum reddere Deo, quantum ipsi per peccatum, & offensam mortalem abstulit: ergo potest creatura pura de potentia absoluta præstare Deo pro peccato mortali satisfactionem condignam. m. prob. tota malitia, gravitas & offensa peccati mortalis consistit in privatione rectitudinis & honestatis debitæ, & in aversione à Deo tanquam ultimo fine, & supremo Bono; sed in actu charitatis sunt omnia bona his malis opposita: est enim rectitudo debita, est conversio ad Deum tanquam ultimum finem, & supremum Bonum: ergo creatura pura donis supernaturalibus exornata eliciens actum charitatis redderet omne illud, quod per peccatum mortale est ablatum: ergo per actum charitatis posset pro aliquo peccato mortali alterius satisfacere, si cæteroquin vellet Deus ejusmodi actum charitatis in satisfactionem acceptare.

Prob. II. Posset Deus aliquem hominem purum producere absque peccato originali, eumque constituere caput omnium hominum, ac opera ipsius tanquam merita & satisfactiones velle acceptare juxta dignitatem eorum intrinsecam, ac simul statuere, quod velit solum intuitu meritorum talis hominis aliis hominibus peccantibus primam gratiam & remissionem peccatorum conferre. 2. Posset Deus tali homini gratiam sanctificantem conferre tantam, quantam contulit Christo, vel adhuc duplo aut triplo majorem. 3. Posset Deus hunc hominem ita exornatum gratiis conservare per multa millia annorum: atqui his suppositis non videtur esse impossibile, talem purum hominem per actus charitatis sapissime repetitos, & multiplicatos satisfacere condigne pro peccatis totius generis humani: ergo.



Prob. III. Impugnando rationem præcipuam AAorum. Quamvis peccatum in ratione offensæ crescat ex dignitate infinita Dei offensi, tamen peccatum sub ratione offensæ non est simpliciter infinitum, nec ita incomparabiliter magnum, ut per nullam satisfactionem creaturæ puræ possit æquari: ergo pura creatura potest de condigno satisfacere pro peccato mortali: Consequentia est liquida. A. quoad 1. membrum jam abunde probatum est in Tract. de peccatis Tomo. 3. Quoad 2. membrum vero prob. 1. Quamvis peccatum in ratione offensæ sit in supremo ordine inter offensas, ita, ut nulla offensa alterius entis à Deo distincti, quatenus præcise est offensa talis entis creati, possit in gravitate esse æqualis peccato & offensæ Dei; tamen inde non sequitur, quod tale peccatum etiam sit in supremo ordine respectu omnium satisfactionum puræ creaturæ, ita, ut per eas quantumcunque excellentes, & multiplicatas non possit adæquari, & de condigno extingui: ergo.

Confirm. 1. Si non posset condigne satisfacere aliqua pura creatura, tunc ideo, quia ad condignam satisfactionem requiritur æqualitas inter personam offensam, & satisfaciendam, & consequenter requiritur, ut persona Divina satisfaciatur Deo offenso, & non pura creatura, vel persona creata; sed hæc ratio videtur esse falsa: ergo. M. est Achilles AAriorum. m. prob. 1. Quia ad compensationem condignam offensæ non exigitur æqualitas inter personam satisfaciendam & offensam, sed sufficit æqualitas inter offensam & satisfactionem, seu inter peccatum & opus pro eo præstitum. 2. Si ad satisfactionem æquivalentem & condignam requiritur semper æqualitas inter personam offensam, & satisfaciendam, tunc homo plebejus nunquam potest satisfacere Principi offenso: quia homo plebejus non est æqualis in dignitate personæ Principis; sed hoc videtur esse falsum: nam homo etiam infimæ conditionis videtur de condigno satisfacere Principi offenso, si pro ipsius vita conservanda manifesto mortis periculo se exponat, præsertim, si hoc sæpius faciat.

Nec dicas, Personam Principis offensi & subditi satisfaciendæ non differre essentialiter, bene vero personam Divinam



nam offensam , & creaturam puram satisficientem. Nam contra est : inter personam Principis , & personam infimi subditi moraliter spectatos est essentialis inæqualitas , & tamen obsequium ab infimo subdito præstitum potest esse æquale injuriæ illatæ principi , quoad vim satisfaciendi : ergo.

Confirm. 2. Gratia sanctificans intensissima homini tali collata ipsum & ejus opera plurimum dignificaret , maxime , quia gratia sanctificans est quædam participatio naturæ Divinæ , hominem , etsi vilem , elevans ad statum supernaturalem supremum , & esse quoddam Divinum juxta illud : *vos Dii estis , & filii excelsi omnes* : ergo homo instructus tanta gratia videtur posse ponere satisfactionem æqualem peccato. Nam obsequium & quidem excellens ac arduum præstitum à tali filio Dei , adoptivo , tam grato , & tam excellenti modo participante naturam Divinam per gratiam , videtur esse æquale injuriæ illatæ alicui personæ Divinæ , maxime , quia persona Divina infinitam gravitatem non transfundit in peccatum , sed hoc tantum finito modo aggravat.

Confirm. 3. Transmisso , sed minime concesso , quod peccatum grave aliquo modo sit superioris ordinis respectu satisfactionis puræ creaturæ , tamen etiam aliqua , quæ videntur in moralibus esse ordinis superioris , possunt adhuc coæquari per plura entia inferioris ordinis sufficienter repetita , & multiplicata aut intensa : ergo idem in proposito dicendum est. A. prob. licet furtum sit inferioris ordinis , quam peccatum contra Religionem , potest tamen furtum gravissimum vg. aliquot mille aureorum esse gravius in æstimatione morali , quam ommissio Sacri die festo , quæ est peccatum contra Religionem : item actus spei possunt ita intense & frequenter elici , ut in ratione meriti præponderet actui charitatis , quamvis spes sit in ordine inferiori , quam charitas : ergo.

Confirm. 4. Juxta AArios potest homo purus satisfacere de condigno pro peccato veniali , quamvis hoc sit offensa Dei infiniti : ergo etiam potest satisfacere de condigno pro peccato mortali , quamvis & hoc sit offensa Dei infiniti. Et sane



si in satisfactione condigna pro peccato veniali non debet esse æqualitas inter personam offensam, & offendentem, tunc neque hæc debet esse in satisfactione pro peccato mortali: vel enim ista æqualitas inter has personas universaliter requiritur, vel nunquam? certe argumentum AAorum. universaliter probat.

148

Objic. I. SS. PP. insinuant absolutam necessitatem meritorum & mortis Christi ad satisfactionem condignam pro peccato mortali: ergo.

R. I. SS. PP. dicunt, mortem & merita Christi fuisse necessaria 1. non solum ad condignam, sed etiam superabundantem, & tam excellentem satisfactionem, qualem Christus posuit, & nulla creatura pura etiam juxta nos præstare potuisset. 2. Vel loquuntur de mera convenientia, & non absoluta necessitate. 3. Vel loquuntur de necessitate supponente decretum Divinum, & de moderna providentia, in qua Deus noluit aliam satisfactionem acceptare, quam Christi. 4. Vel dicunt, quod creatura pura, peccato originali vel actuali inquinata, de qua hic non est quæstio, non potuerit pro omnibus condignam satisfactionem præstare.

Ex hoc liquet, quod Christus in nostra sententia non omnino sit gratis & frustra mortuus; quia ejus mors fuit necessaria necessitate consequente Decretum Divinum, & quia hæc redemptio fuit convenientior quam alia.

Objic. II. Offensa Dei infiniti non potest æquari, nisi per satisfactionem Personæ infinitæ, qualis persona non est creatura pura: ergo creatura pura non potest præstare satisfactionem æqualem offensæ Divinæ. A. prob. honor est in honorante, & *offensa in offendente*; sed ratio offensæ desumitur à persona offensa, & satisfactio à persona satisfaciente, consequenter nisi inter has personas fiat æqualitas, neque fieri potest inter ipsam offensam & satisfactionem.

R. N. a. ad ejus prob. dico equidem, rationem obsequii & satisfactionis & meriti partialiter desumi à persona exhibente tale obse-



obsequium ; quo major est persona præstans obsequium , eo majus hoc est : ast non desumit adæquate valorem suum à persona ; sed etiam ab aliis comprincipiis : ita vicissim est de offensa Dei. Quare licet inter personas ipsas non sit æqualitas , potest tamen fieri inter injuriam & satisfactionem , maxime , quia Deus offensus tantum moraliter & extrinsece concurrit ad offensam , & pura creatura in plenitudine gratiæ constituta moraliter , & suo modo intrinsece participat esse Naturam Divinam , per quam participationem multum elevatur ad æqualem satisfactionem , accedente simul ipsa operis satisfactorii præstantia.

Dices : Res inferioris ordinis nequeunt æquare illa , quæ sunt superioris ordinis ; atqui satisfactio puræ creaturæ est inferioris ordinis , & peccatum est superioris ordinis , quia est offensa Dei , & satisfactio est tantum opus creaturæ : ergo peccatum nequit æquari satisfactione puræ creaturæ.

R. trans. M. quæ non est universaliter vera , ut patet ex confirmat : tertia probat. tertiæ. N. m. nam si satisfactio talis puræ creaturæ tantis gratiis instructæ comparetur cum peccato mortali , non est inferioris ordinis , nec est taliter constituta , ut non possit valore suo æquare peccatum mortale , ut dictum est in ipsa probatione tertia. Proinde neque est paritas cum peccato mortali considerato in ordine ad venialia : nam in ordine ad venialia est in superiori quodam ordine simpliciter , ita ut nullo modo per venialia in infinitum multiplicata possit adæquare. Ast peccatum grave consideratum cum respectu ad satisfactionem puræ creaturæ adæquate compensari potest , ut nostræ probationes ostendunt.

Objic. 3. Peccatum mortale tanquam offensa supremi ordinis non potest ad æqualitatem compensari , nisi per satisfactionem supremi ordinis ; sed satisfactio supremi ordinis non est illa pura creatura , utpote quæ supra se habet nobiliorem ordinem satisfactionis creaturæ unitæ Verbo : ergo.

R. N. M.



R. N. M. nam licet peccatum sit in supremo ordine inter offensas, tamen non est in supremo ordine, si comparatur ad satisfactionem Christi: alias si satisfactio Christi esset in æquali ordine cum peccato, tunc talis satisfactio non esset superabundans respectu omnium peccatorum mortalium, & per peccata posset exhaustiri, quod falsum est. Cum ergo satisfactio Christi sit superabundans, debet posse dari aliqua inferior satisfactio, quæ sit æqualis peccato mortali, & talis est satisfactio puræ creaturæ.

Dices: Tam satisfactio Christi quam peccatum in ratione offensæ desumitur à Deo: ergo æqualiter sunt in supremo ordine: adeoque peccatum mortale tantum per satisfactionem Christi adæquate compensari potest. R. D. a. diverso tamen modo C. a. eodem modo N. a. Nam ut alia taceam, circumstantia personæ offensæ limitatur multum per cognitionem finitam, qua à peccante Deus cognoscitur modo finito. At talem limitationem non habet satisfactio Christi; etenim circumstantia personæ operantis, & satisfaciæ independentem à quavis cognitione refundit in suo genere valorem & dignitatem in actum; ut patet in homine iusto, qui ignorans se esse in statu gratiæ adhuc tam perfecte meretur de condigno præmium pro opere bono suo supernaturali, sicut alius, qui conscius est status gratiæ. Adde, satisfactionem Christi desumi à Verbo Divino tanquam persona operante, cui actiones satisfactoriæ tribuuntur, & a qua maxime tanquam forma morali dignificantur. Ast ratio offensæ desumitur à Deo tanquam objecto extrinseco, cui persona peccans non unitur, & cui non tribuuntur tanquam operanti actiones peccaminosæ &c. unde & à Deo offenso in tanto gradu non specificantur, in quanto sunt actiones satisfactoriæ Christi ob ipsam Divinam.

Objic. IV. In nostra sententia vilescit passio Christi, & gravitas offensæ, cum hæc aliter, quam per passionem Christi potuisset condigne compensari; ergo nostra sententia non est admittenda.

D. N. a. potius commendatur beneficium passionis Christi, & misericordia Dei, qui cum longe minori impendio nos liberare



*An pura creatura potuisset satisfacere pro peccato mort.? 265*

berare potuisset, tamen tantum pro nobis filium suum pati voluit. Gravitas offensæ adhuc satis ponderatur; quia est offensa summi Boni, pro qua Deus saltem nullam aliam acceptare voluit satisfactionem, quam passionem proprii filii.

Objic. V. Non potest aliquis de condigno satisfacere pro peccato proprio: ergo neque pro alieno.

R. trans. interea a. quod à Mastrio & aliis pluribus negatur, loquendo de potentia Dei absoluta. N. c. ideo homo non posset pro peccato proprio satisfacere de condigno, quia pro priori ad satisfactionem non potest habere gratiam sanctificantem dignificantem opera satisfactoria; hæc enim gratia est impossibilis cum peccato. Et illud prius jam, seu ante præstitam satisfactionem gratis ac de congruo deleteret, & sic superflua esset satisfactio, saltem pro culpa. Aliud est, si innocens, ac gratia sanctificante prius gratis accepta satisfaciat pro peccatis alienis: quia ibi non sequitur istud absurdum.

Dices: Nulla pura creatura potest mereri de condigno pro peccato gratiam: ergo.

R. D. a. de Providentia moderna C. a. de possibili & absolute N. a. in moderna providentia ex Divina dispositione meritum de condigno puræ creaturæ infumitur in promerenda pro se gratia & gloria: si vero in alia providentia Deus voluisset alicui creaturæ puræ gratis concedere maximam gratiam & gloriam, & deinde omnia opera, quæ operata fuisset, acceptare pro aliis, certa nulla est implicantia. Nam opera ex se sunt condigna tali præmio, ut ex dictis suppono: ergo potuisset Deus ea acceptare etiam pro aliis, & illis retribuere præmium condignum.

Objic. VI. Pro condigna satisfactione Deo præstanda non sufficit tantum rependere, quantum ablatum est, sed debet plus reddi: ita docet Divus Anselmus l. 1. *cur Deus homo* 11. ergo cum creatura pura possit tantum æquale addere, non potest de condigno satisfacere.







Affero I. In mysterio incarnationis ex unione hypostatica Naturæ divinæ & humanæ in eadem Persona oritur vera & propria Communicatio idiomatum seu prædicatorum inter Deum & hominem. Hæc conclusio est de fide.

Prob. I Ex S. scriptura, quæ illa, quæ in Christo conveniunt homini, tribuit Deo, & vicissim, quæ competunt Deo, asserit de homine. Ita 1. Corinth. 2. dicitur Dominus gloriæ, seu Deus, crucifixus. Et Joan. 8. v. 58. Christus dixit: *antequam Abraham fieret, ego sum* &c. ubi æternitas, quæ Deo convenit, homini tribuitur.

Prob. II. Ex symbolis, quæ dicunt, Filium Dei unicum de Spiritu S. conceptum, natum ex Maria Virgine, passum, crucifixum. 3. Ex Concilio Ephesino contra Nestorium definiente, Beatissimam Viginem esse Deiparam vel Matrem Dei, quia ille homo, cujus Mater est, verus est Deus. 4. Ex Concilio Francofortensi in Epist. syndica, sic dicente: *Personæ unitas facit, ut quod homo pertulit, Deus pertulisse credatur.* Origenes in Epist. ad Rom. *per indissolubilem unitatem Verbi, & carnis, omnia quæ carnis sunt, adscribuntur & Verbo, quomodo & quæ Verbi sunt, prædicantur in carne.* Accedit unanimis PP.

Prob. V. Et explicatur ratione. Quandocunque duæ formæ, vel proprietates, aut res vere & realiter in eodem supposito uniuntur, vere & realiter de se invicem prædicantur in concreto; ergo etiam, quia Natura Divina & humana, & utriusque Naturæ hujus proprietates vere ac realiter uniuntur in eodem supposito, ita etiam vere ac proprie de se mutuo in concreto prædicari possunt. A. constat, quia albedo & dulcedo in eodem subjecto, vel supposito lactis uniuntur & repertiuntur, ideo vere & proprie de se invicem in concreto prædicantur, dicendo *album est dulce, & vicissim dulce est album.* Item, si in eodem homine sit scientia Theologica, & peritia musica, vere dici potest: *Theologus est musicus, & vicissim, musicus est Theologus.* Faciunt autem istæ propositiones hunc verissimum, & proprium sensum: *suppositum habens albedinem, est suppositum habens dulcedinem; item suppositum habens scientiam*



*Theologicam, est suppositum habens peritiam musicæ, & vicissim. Deus est homo, & homo est Deus &c. Istæ propositiones habent verum & proprium sensum: suppositum habens Divinitatem, est suppositum habens Humanitatem, & vicissim. Suppositum vel Persona habens humanitatem, est suppositum habens Divinitatem. Igitur ejusmodi prædicationes sunt veræ, & proprie tales: quod ulterius confirmatur inde: quia tot Evangelicæ, & Apostolicæ, ac in Symbolis & PP. contentæ sententiæ non debent sine urgenti fundamento ad sensum improprium detorqueri.*

150

*Affero. II. Per communicationem Idiomatum prædicata Divina non insunt formaliter humanitati, nec prædicata humana Divinitati: est de fide. Ratio est: quia prædicata Divina nequeunt formaliter communicari Humanitati, ita, ut huic formaliter insint, & Natura humana formaliter & intrinsece fiat Divina, immortalis, immensa: hæc enim prædicata formaliter & intrinsece soli Naturæ Divinæ inesse possunt. Idem est de prædicatis humanis, quæ formaliter & intrinsece nequeunt esse in Divinitate; alias Deus formaliter & intrinsece esset mortalis &c. Ratio rationis est: quia in Incarnatione salva mansit utraque realiter distincta Natura Divina & humana, ac utriusque proprietas, & operatio inconfusa perstitit. Quare in abstracto nequit dici Humanitas est immensa. Quod ut clarius capiatur, sequentes regulæ circa communicationem Idiomatum sunt observandæ.*

151

*Regula 1. Tam Natura Divina, quam humana cum utriusque proprietatibus debent exprimi non in abstracto, sed concreto. Unde male dicitur: homo est Deitas, Deitas est homo: Humanitas est Deus: item Humanitas est Deitas, mortalitas est Immortalitas vel Humanitas est Immortalis. Recte tamen dicimus: homo est Deus: Deus est homo: mortalis est immortalis, Deus est crucifixus, Deus seu Verbum constat ex corpore & anima, Verbum natum est in tempore ex Virgine; item hic homo est æterni Patris filius, est principium Spiritus sancti. Ita Herinx cum aliis. Ratio hujus est: quia etiam non recte dicitur: albedo est dulcedo, bene vero dicimus: album est dulce: ergo à pari. Ratio rationis est: quia prædicationes ejusmodi in abstracto præscindunt*  
ab



§. I. Regulae generales de communicatione idiomatum. 269

ab unione in eadem persona, & ab unitate suppositi, ratione  
cujus tamen hæc communicatio Idiomatum, & hæc prædicatio  
verificatur: non vero sic præscindunt prædicationes in con-  
creto: ergo prædicationes tales in abstracto non sunt veræ,  
si fiant in concreto, sunt veræ.

Regula 2. Quamvis de Christo Domino ob dualitatem 152  
Naturarum dici possint prædicata contraria, non tamen contra-  
dictoria. Quare dici potest, quod hic homo, seu Christus  
sit passibilis, & impassibilis, mortalis & immortalis: etenim  
quatenus est habens humanitatem est mortalis, & quatenus est  
habens Deitatem est immortalis: non tamen potest contradicto-  
rie dici: quod hic, *vel Christus sit mortalis, & non sit mor-  
talis, sit Deus, & non sit Deus*, ita ut negatio cadat super  
copulam. Nam si negatio afficit copulam, tunc negat, quod  
suppositum illud, quod est Christus, habeat aliquam naturam  
passibilem &c. quod est falsum, si vero negatio solum afficit  
prædicatum, dicendo, hic homo Christus est impassibilis, seu  
non passibilis, tunc non fit propositio negativa, sed affirma-  
tiva de prædicato infinito, & facit sensum, quod hoc suppo-  
situm habens Naturam Divinam & humanam, non sit passibile  
secundum Naturam Divinam.

Regula 3. Prædicata Verbo Divino convenientia five ratione 153  
Deitatis, five ratione Personalitatis Verbi possunt vere & proprie,  
modo in prioribus duabus regulis specificato prædicari de homine,  
dicendo: eg. *homo est Deus, homo est æternus, homo est filius  
Dei, naturalis, homo est principium Spiritus sancti &c.* Non ta-  
men potest dici: *homo est Pater, vel Spiritus sanctus*: quia  
prædicatum Patris & Spiritus sancti non conveniunt Deo ra-  
tione Deitatis, vel ratione Personalitatis Verbi, sed ratione Per-  
sonalitarum à Verbo distinctarum, à quibus natura humana  
non est assumpta in unitatem suppositi.

Regula 4. Prædicata Divina non possunt de Christo ho- 154  
mine prædicari cum reduplicatione humanitatis, neque prædi-  
cata humana possunt de Deo prædicari cum reduplicatione Di-  
vinitatis, dicendo, Christus qua homo est immortalis, Chri-  
stus



stus qua Deus est passibilis, est crucifixus, est homo. Ratio est; quia hæ prædicationes dicerent, quod Christus secundum naturam humanam esset immortalis, esset Deus, & vicissim secundum Naturam Divinam esset homo passibilis, mortuus &c. qui sensus falsus est.

155

Regula 5. Communicatio idiomatum non habet locum in illis prædicatis, quæ excludunt personalitatem Divinam. Quare nequit dici: *Christus est purus homo, vel Deus est purus homo*: hæc enim prædicatio facit sensum manifeste falsum. Neque potest fieri communicatio idiomatum in illis prædicatis, quæ conveniunt Naturæ Divinæ, aut humanæ, ut præscindit à supposito & Persona. Sic quamvis possit dici: *Natura humana est assumpta à Verbo*; non tamen potest dici *Deus est assumptus vel sustentatus à Verbo*. Imo ut notat Doctor subtilis. 3. D. 7. q. 2. quod illa prædicata omnia, quæ naturæ humanæ cum Persona Divina unionem exprimunt, non possint mutuo de natura humana & Divina, vel potius de Deo & homine in Christo prædicari. Rationem dat Doctor; quia omnis communicatio idiomatum fit propter unionem hypostaticam tanquam causam & fundamentum necessario præsuppositum: hinc bonæ sunt istæ propositiones: *Verbum Divinum est Incarnatum: Deus factus est homo*: Paucis: omnia illa nequeunt mutuo dici in Christo de Natura Divina & humana, quæ non possunt de toto Christo prædicari. Hinc non potes dicere: *Deus est assumptus à Verbo*; *homo est Incarnatus*: quia non potes dicere: *Christus est assumptus à Verbo*: *Christus est Incarnatus*, cum non totum complexum, quod est Christus, sed tantum ejus unum constitutivum, quod est Verbum, fuerit Incarnatum, & alterum solum constitutivum, scilicet natura humana fuerit assumpta à Verbo.

156

Regula 6. Prædicata Divinitatis & humanitatis seu alterutrius naturæ essentialia non debent de Christo prædicari accidentaliter, sed substantive, debet ergo dici: *Deus est homo*, non vero *Deus est humanus* &c. si enim accidentaliter vg. prædicata Divinitatis de humanitate prædicarentur, significaretur duplex distinctum suppositum: ut in hac prædicatione, qua  
homo



§. II. *Examinantur in specie aliquæ propositiones.* 271

*homo dicitur vestitus*, ubi indicatur *homo est vestis*, tanquam duo entia, quorum quodlibet supposititalitate gaudet. Unde Concilium Ephesinum Can. 5. damnat vocem: Theophoros, id est, Deifer, quia significat hominem propria personalitate humana & creata subsistentem, qui ferat Deum. Similiter vitandæ sunt voces *Deificatus*, *Dominicus*, nisi in sano sensu explicentur; qualis sensus sanus est, si intelligatur per hominem Deificatum humanitas substantialiter unita Deitati in eadem persona; & per hominem Dominicum significetur Filius Domini, seu Patris æterni, qui speciali appropriatione solet dici Dominus.

Regula 7. Illorum idiomatum communicatio non est usurpanda sine ulteriore explanatione, quæ vel ex speciali aliqua hæresi, vel ex aliquo alio capite esset suspecta de sensu falso: hinc non facile usurpanda est ista propositio: Verbum est *creatura*, est *mutatum*, quamvis revera Christus sit *homo*, *consequenter creatura*, fuerit *mortuus*, *consequenter mutatus*: nam istæ propositiones videntur coincidere cum hæreticis, qui dixerunt, Verbum esse creaturam intrinsece & formaliter, & Deum esse formaliter mutatum. Igitur quando dubium est, an prædicatum aliquod in communi modo loquendi possit per communicationem idiomatum prædicari, tunc hujusmodi prædicatio debet fieri cum adjecta reduplicatione sensum clare explicante: vg. taliter dicendo: *Christus ut homo est creatura*, *Christus ut homo est mutatus*. Vel Verbum secundum naturam humanam sibi unitam est mutatum &c.

§. II.

*Examinantur in specie aliquæ Propositiones.*

QUÆRES I. An Christus sit & prædicetur homo univoce cum aliis hominibus? R. affirmative. Ratio est: quia prædicatum *homo* secundum eandem rationem primario significatam, nimirum secundum naturam humanam convenit Christo & aliis hominibus, quamvis connotatum supposititalitatis sit diversum.

Obfer.



Observant tamen varii Scotistæ, quod prædicatum *homo* de Deo, & Christo non dicatur univoce, striete loquendo. Nam licet in his propositionibus *Christus est homo: Verbum, vel Deus est homo*: eadem res, seu natura humana prædicetur, non tamen eodem modo. De Christo enim prædicatur humanitas essentialiter, de Verbo & Deo accidentaliter: Christo enim, qui complexum est *jex* Deo, & natura humana: Deo vero vel Verbo accidentale est, esse unitum humanitati, & eam sustentare.

159 Quæres II. An in triduo mortis vere dici potuerit: *Christus est homo*? R. loquendo Theologice & realiter, negative. Ratio est: quia homo realiter est compositum ex anima & corpore physice unitis; atqui in triduo illo anima & corpus Christi non erant physice unita: ergo Christus realiter non fuit homo. In sensu tamen logico juxta aliquos dici potuisset in illo triduo: *Christus est homo*, sicuti defacto dicimus: *Petrus est homo*: etiamsi Petrus sit mortuus. Verum hunc loquendi modum etiam in sensu logico impugnat Scotus 3. D. 22. n. 18.

160 Quæres III. An possit dici: *Verbum vel Christus est prædestinatus*, ut fieret homo?

R. 1. Certum est, quod Incarnatio fuerit vere & proprie prædestinata: nam prædestinari est à Deo præordinari; atqui Incarnatio Verbi Divini fuit à Deo ab æterno præordinata: ergo.

R. 2. Non potest dici: *Christus est prædestinatus ad Divinitatem, vel unionem hypostaticam, aut ad humanitatem*. Ratio est, quia nullus prædestinatur ad illud, quod essentialiter in se includit; sed Christus includit in se essentialiter Divinitatem, unionem hypostaticam, & humanitatem: ergo ad hæc non potest dici prædestinatus. M. patet: nam subjectum & terminus prædestinationis, seu id, quod prædestinatur, & illud ad quod ordinatur, debent realiter distingui. Accedit D. Augustinus Tract. 105. in Joan. dicens: *recte non dicitur prædestinatus secundum id, quod est Verbum Dei Deus apud Deum, ut quid enim prædestinaretur, cum jam esset?*

R. 3.



*J. II. Examinantur in specie aliqua propositiones.* 273

R. 3. Potest tamen in aliquo sensu dici : Verbum est prædestinatum ad unionem hypostaticam , & Incarnationem , & humanitatem : Suarez , Vasquez , Herinx , Henno & alii. Verbum præsupponitur unioni hypostaticæ , & humanitati , & ex ordinatione , seu prædestinatione Divina terminat unionem hypostaticam , ac sustentat naturam humanam. Dixi in *aliquo sensu* : quia prædestinatio stricte sumpta est collatio alicujus beneficii : Verbo autem Divino non fuit collatum beneficium per hoc , quod ex ordinatione Divina assumpserit naturam humanam.

R. 4. Potest dici Christus prædestinatus ad gloriam & gratiam : Scotus , Vasquez , Becanus , Rada , Henno & alii. Ratio est ; quia Christus secundum humanitatem ab æterno fuit præordinatus ad gratiam & gloriam.

Quæres 4. An sicut recte dicitur : *Deus factus est homo* , ita quoque recte dicatur : *homo factus est Deus* ? 161

Rdet Scotus in reportatis 3. D. 7. q. 3. & cum ipso passim Theologi negative. Nam hæc propositio *homo factus est Deus* significat in sensu proprio ante unionem cum Verbo præexistisse humanitatem ; quia prius est rem existere , quam per formam acquisitam e. g. per unionem hypostaticam fieri talem ; atqui falsum est , quod humanitas Christi pro aliquo tempore præexistiterit unioni hypostaticæ.

Rdeo. 2. cum eodem Scoto in scripto Oxoniensi , quod est præcipuum , & semper intelligitur , quando allegatur sine addito. 3. D. 7. q. 2. n. 7. Sannig & alii. Etiam hæc propositio in sensu aliquo sustineri potest , & vere dici. *Homo factus est Deus*. Ratio est : quia SS. Patres hanc propositionem usurpant , ut D. Augustinus Serm. 15. de Nativitate , & 1. de Trinit. c. 13. & S. Gregorius Nazianzenus Oratione 35. & alii PP. cum S. Damasceno , qui lib. 3. de fide c. 11. ita ait : *Verbum caro factum est , & homo Verbum , & Deus homo , & homo Deus*. Ratio est : humanitas fuit unita Verbo : consequenter homo fuit factus Deus , sicut Deus propter hanc unionem fuit factus homo. Neque per hunc loquendi modum necessario intelli-



gitur pro instanti temporis præcessisse humanitas Christi unionem cum Verbo. Etenim non requiritur talis prioritas temporis, sed sufficit prioritas naturæ, vi cuius natura humana haud dubie fuit præsupposita unioni hypostaticæ.

162 Quæres V. An hæ propositiones : *Christus incepit esse, Christus desinit esse* : sint veræ? R. cum Scoto 3. D. 11. q. 3. Vasquez, Herinx cum aliis contra alios affirmative. Ratio est : Christus importat complexum & compositum ex natura humana & Verbo unitis, quod compositum & complexum in tempore, quando peracta fuit Incarnatio, vere incepit, ac etiam in morte Christi, ubi humanitas Christi destructa est, desinit.

163 Quæres VI. An Christus vel Verbum possit dici creatura?

Rident multi, hanc propositionem non posse tolerari, ut D. Thomas. Richardus, Magister sententiarum, Scotus vero est problematicus.

R. 2. Probabilius vera est hæ propositio : *Christus est creatura* : ita D. Bonaventura, Varro, Hurtadus, Herinx, Mastrius, Poncius &c. Ratio hujus est. 1. Quia sic locuti sunt SS. PP. August. Ambrosius, Leo & alii. S. Hieronymus in illud ad Ephes. 2. *Ipsius enim sumus factura, ita dicit : nos libere proclamamus, non esse periculum, eum dicere creaturam, quem vermem, & hominem, crucifixum &c. profiteamur.* 2. Ratione humanitatis crucifixæ Christus simpliciter dicitur crucifixus : ergo etiam ratione ejusdem humanitatis creatæ, seu productæ potest dici creatura. Existimo, tamen non facile usurpandam esse hanc propositionem : Verbum est creatura, sine addita limitatione, secundum humanitatem assumptam : quia sine limitatione prolata propositio illa potest facere sensum Arianum.

164 Quæres VII. An Christus possit dici servus Dei? Ante responsionem nota, servum dici illum, qui non est sui juris saltem quoad actiones suas. Servitus vero est duplex : *Naturalis* una, secundum quam creatura quælibet vi suæ creationis subicitur in omnibus Deo, ita, ut Deus de illa possit disponere,



ponere, prout ipsi libuerit: *Legalis* est altera, seu *Politica*, secundum quam bello aut justo titulo venditi alterius dominio subduntur. Additur ab aliis tertia, scilicet servitus peccati, quam incurrunt peccatores. Jam certum est, Christum ut hominem non esse servum Servitute legali, vel peccati. Ratio est, quia utraque hæc servitus dedecet dignitatem Christi, & hic non fuit peccato maculatus, nec bello captus, aut iuste venditus. H. N.

R. 1. Christus ut homo fuit vere servus Dei servitute naturali. Ita Scotistæ communiter cum Thomistis contra Vasquez, Lugonem, & alios. Ratio 1. quia Scriptura appellat Christum servum. Zach. 3. *Ecce ego adducam servum meum.* Isaïæ 53. *justificabit ipse justus servus meus multos.* Ratio est secunda, quia etiam PP. Christum vocant servum, S. Cyrillus lib. 12. Thesau. c. 18. *servus factus est, quia vere homo.* S. Athanas. Serm. 3. contra Arianos: *nihil discriminis attulerit, sive servus, sive filius hominis appelletur.* S. August. Epist. 178. circa finem: *in qua enim infirmitate (humanitatis) non solum subditum, sed etiam servum evidentissime confitemur.* Idem dicunt SS. Nazianzenus, Chrysostomus, Hilarius, Fulgentius, Isidorus, Bernardus &c. Ratio tertia est: Deus essentialiter & inabdicabiliter est Dominus omnium creaturarum: ergo essentialiter & vicissim, & inabdicabiliter omnes creaturæ sunt servæ Dei: ergo & humanitas Christi: quia & hæc est essentialiter creatura.

Dices 1. Leo Papa Serm. 2. de Nativitate cum aliis negat in Christo conditionem servilem: ergo.


R. S. Leo loquitur de servitute videlicet pænali, quæ tanquam pæna contrahitur ex peccato: hanc non habuit Christus.

Dices 2. Concilium Francofortense & Adrianus Primus damnarunt Elipandum, qui asseruit, Christum ut hominem esse servum Dei: ergo.

R. D. a. damnarunt ideo præcise, quia asseruit Christum ut hominem esse servum Dei N. a. quia asseruit modo Nestoriano, Christum non solum secundum naturam humanam, sed



etiam secundum suppositum creatum, & humanum esse servum Dei, & consequenter cum Nestorianis duplex suppositum unum creatum, & alterum Divinum in Christo admisit C. a. Ad mentem hujus Concilii & Adriani loquitur quoque D. Damascenus l. 3. de fide c. 21. dicens : *qui servum eum dicunt*, unum Christum instar Nestorii in duos dividunt : nos vero dicimus Christum esse duntaxat servum Dei secundum naturam, quæ creatura est, non vero secundum suppositum, quod increatum est & Deus. Judicat tamen Herinx disp. 1. de Incarnatione secundum se n. 117. abstinendum esse à simplici prolatione servi quoad Christum, nisi addatur, aut saltem sic intelligatur particula reduplicativa secundum naturam humanam.



## ARTICULUS II.

### *De Dignitatibus, & officiis Christi.*

165 **Q**UÆRES I. An Christus ut homo sit filius Dei naturalis ? R. 1. Christus, ut Deus, est Filius Dei naturalis. Ita enim nos fides docet : est enim secunda Persona Sanctissimæ Trinitatis vere & naturaliter genita à Patre æterno. Unde Christus ut homo saltem per communicationem idiomatum potest dici Filius Dei naturalis : si enim potest dici : *hic homo est Deus, est Verbum* : cur non etiam per communicationem idiomatum dici posset, *hic homo est filius naturalis Dei* ? Igitur quæstio nostra procedit ulterius, an etiam aliqua ratione *Christus qua homo* in sensu formali possit dici, & sit filius naturalis Dei Patris ? ad quod

R. 2. Christus ut homo potest dici aliquo sensu filius naturalis Dei Patris : Herinx, Henno, Scotistæ plures, ac Thomistæ. Ratio est 1. quia ita asserit epistola Adriani approbans Concilium Francofortense, & Sacrosylabus ejusdem Concilii. 2. Christus ut homo dicit suppositum Divinum sustinens naturam humanam ; sed Christus ut suppositum Divinum, quod



6. II. *Examinantur in specie aliquæ propositiones.* 277

quod sustentat naturam humanam est unigenitus & naturalis Dei Filius: ergo Christus ut homo est filius Dei naturalis.

Nota, me in responsione secunda dixisse: *poteſt aliquo ſenſu dici filius naturalis Dei.* Christus enim ut homo dupliciter poteſt accipi: primo, ut to *qua homo* non importet in recto, & formaliter humanitatem, sed suppositum, quod sustentat humanitatem, adeo, ut sensus sit iam dictus: *Christus ut suppositum Divinum sustentans humanitatem, est filius Dei naturalis*: & in hoc sensu verissima est propositio. Secundo poteſt ita exponi, ut per to *qua homo* principaliter & formaliter importetur ipsa natura humana: vg. *Christus secundum naturam humanam in abstracto, & ut præscindentem à supposito Divino est filius Dei Patris naturalis*: in quo sensu propositio est falsa: quia humanitas Christi non est naturaliter, sed libere, neque in similitudinem naturæ Dei, neque medio principio vitæ conjuncto, producta à Deo Patre: ergo non est ejus naturalis filia: quia filius est ille, qui naturaliter, & non libere oritur à vivente, medio principio vitæ conjuncto, in similitudinem naturæ intellectualis.

Quæres II. An Christus ut homo possit dici filius Dei adoptivus. R. 1. certum est, quod Christus, ut Deus, nullo modo possit dici Filius Dei adoptivus. Ratio est: quia taliter consideratus est essentialiter Filius Dei naturalis, habens in se necessario & intrinsece divinam hæreditatem, qua per essentiam fruitur.

166

R. 2. De Christo ut homine negant communiter Thomistæ & Recentiores, affirmant Scotistæ plures, Scotus vero est problematicus, vel potius videtur in diversis locis diversimode loqui. Nihilominus quantum ego judico, non videtur esse admittenda ista propositio: *Christus qua homo est filius Dei adoptivus.* Ratio est 1. quia ex Scriptura non habetur iste modus loquendi, ut argumentatur Concilium Francofortense in Epistola ad Episcopos Hispaniæ. 2. Adoptio secundum Juristas & ad propositum est personæ extraneæ in filium, vel nepotem legitima assumptio, qua adoptatus solo affectu jungitur adoptanti,



& manet persona ab illo extranea, id est talis, quæ ex sua generatione naturali non habet gradum filii; sed Christus etiam qua homo non est extranea Deo Patri, sed etiam vera Persona Divina naturaliter genita à Patre æterno. 3. Hunc modum loquendi rejicit Concilium Francofortense. 4. Denominatio filii, vel filiae non cadit supra naturam abstrahentem à supposito, sed denominat suppositum; atqui suppositum, quæ subsistit humanitas Christi, est Divinum, & non est extraneum Deo: ergo. Mastrius l. 3. disp. 2. n. 121. & seq. censet, Christum ut hominem esse Filium proprium Dei seu totius SS. Trinitatis: Ratio hujus est 1. quia Christus secundum naturam humanam, seu qua homo in omni rigore nequit dici filius naturalis, neque adoptivus Dei: ergo debet dici proprius. Ratio autem, quod filius naturalis non possit dici in omni rigore, est: quia Christus qua homo seu secundum naturam humanam non est productus in similitudinem naturæ Divinæ, quod tamen ad rationem filii naturalis in rigore requiritur. Quod non sit adoptivus, patet; quia non est persona extranea Deo. Quod vero sit filius proprius Dei, ulterius probatur. 1. ex illo ad Rom. 8. *proprio filio suo non pepercit Deus.* Christum etiam filium proprium Dei appellat Concilium Francofortense. Prædicatum filiationis provenit juxta Mastrium à gratia sanctificante habituali, quæ tribuit formale jus ad gloriam. Ratio autem proprietatis, vel proprii filii provenit ab unionem hypostatica, quæ naturaliter conjungit Deo physice, & substantialiter, & facit, ut Christus etiam qua homo non sit persona extranea Deo. Dicitur autem secundum laudatum Mastrium esse filius naturalis Dei, & totius SS. Trinitatis, quia tam unio hypostatica, quam gratia sanctificans, quæ constituunt Christum ut hominem in ratione filii proprii Dei, à tota SS. Trinitate causantur. Hæc ille.

167

Quæres III. An Christus ut homo sit verus Filius Mariæ? R. affirmative 1. Christus dicit se sæpe filium hominis: ergo habuit parentem hominem, qualis fuit sola B. V. 2. Christus dicitur in Symbolis natus ex B. V. 3. Beata Virgo est Mater Christi: ergo & Christus est Filius B. V. Mariæ.

R. 2.



R. 2. Filiatio, qua Christus constituitur filius Virginis, est realis: adeoque dantur in Christo duæ filiationes, una æterna, qua tanquam Unigenitus Dei filius refertur ad Patrem, altera, qua ratione Humanitatis refertur ad B. V. Scotus in 3. D. 8. q. un. cum suis contra Thomistas. Ratio est: quia relatio Maternitatis ad Filium in B. V. est realis: ergo etiam relatio filiationis ad Matrem. 2. Vere realiter Christus est Filius Virginis, ergo etiam vere realiter refertur ad B. V. Mariam.

Quares IV. An Christus qua homo fuerit caput Ecclesiæ? R. 1. affirmative. De Christo enim dicitur ad Ephes. 1. *Ipsum dedit caput supra omnem Ecclesiam.* & cap. 5. *Christus est caput Ecclesiæ.* & D. Augustinus in Psal. 127. unus ergo Homo Christus caput. Ratio est: quia Christo etiam qua Homini conveniunt proprietates capitis: excellit enim omnes creaturas rationales, estque illis conformis, & arcto fœdere conjunctus tanquam frater. 3. In omnes creaturas rationales (si damnatos excipimus) influit ad instar capitis gratiam & gloriam, civitatem spirituales.

R. 2. Ecclesia, cujus Christus caput est, complectitur Viatores fidem habentes, animas in purgatorio, ac Beatos omnes, etiam Angelos: nam in hos omnes instar capitis Christus exercet influxum donorum supernaturalium.

Non tamen Christus est caput damnatorum: quia hi nec moraliter vel mystice cum Christo uniuntur, neque influxum supernaturalem ab eo recipiunt, utpote privati omnibus gratiis supernaturalibus.

Neque Viatores carentes fide, id est, infideles, hæretici &c. videntur esse membra Christi. Ita D. Thomas cum plurimis aliis, inter quos etiam sunt aliqui Scotistæ. Scotus tamen de hac re nil habet, est tamen contra alios. Ratio est 1. Quia caput cum membris, & hæc cum illo debent conjungi; atqui fide carens nullam habet conjunctionem cum Christo: nam non habet conjunctionem gratiæ sanctificantis, & charitatis, quæ præsupponunt fidem, neque habet conjunctionem mediante



mediante fide : ergo nullam. 2. Ille est membrum Christi, qui est membrum Ecclesiæ, sed Viator fide carens non est membrum Ecclesiæ : ergo neque est membrum Christi.

Nihilominus Viatores fide carentes possunt dici membra Corporis Christi mystici in potentia ; quatenus saltem per gratiam & virtutem vivificant Christi, ad fidem & gratiam perducunt : & in hoc distinguuntur a damnatis, quia neque amplius membra Christi fieri possunt.

R. 3. Gratia Christi tanquam capitis fere in his tribus consistit. 1. radicaliter in unione hypostatica. 2. In gratia sanctificante Christi tanquam causæ exemplaris gratiæ reliquorum membrorum. 3. In valore excellenti, ac superabundanti meritorum ejus, ratione quorum tanquam causæ meritoria omnem vitam spiritualem, scilicet gratiam & gloriam in sua membra derivat.

169 Quæres 5. An Christus fuerit, & sit etiamnum Sacerdos?  
R. 1. Christus fuit vere & proprie dictus Sacerdos.

Prob. ex S. Scriptura Psal. 109. de Christo dicitur : *tu es Sacerdos in æternum.* & ad Hebræos 4. *habentes Pontificem magnum, qui penetravit celos, JESUM Filium Dei.* Accedunt SS. PP. Epiphanius hæresi 55. D. August. in Psal. 132. & alii. Idem docet Tridentinum Sess. 22. c. 1. Ratio est : quia Sacerdos est persona publica, legitima autoritate deputata, ut sit Mediator inter Deum & homines pro eis orando, ac Sacrificium offerendo ; sed hæ conditiones competeant Christo : qui tanquam Persona publica autoritate Divina deputata duplex Sacrificium obtulit, alterum cruentum in ara crucis, alterum incruentum in Eucharistia.

Neque obest Sacrificio cruento, quod se ipsum Christus non occiderit : nam adhuc seipsum moraliter sacrificavit in cruce, quatenus potuisset impedire mortem, & tamen non impedivit.

Neque sequitur, quod etiam Martyres taliter sint Sacerdotes, & se ipsos sacrificent : nam non sunt deputati ; ut Personæ publicæ, ut seipsos offerant tanquam mediatores inter Deum & homines, sicut Christus a Deo erat deputatus.

R. 2.



R. 2. Sacerdotium Christi manet in æternum; tum, quia id iterum docet S. Scriptura juxta illud: *Tu es Sacerdos in æternum*: & juxta illud Apostoli, *eoquod maneat in æternum, sempiternum habet Sacerdotium*. Tum, quia ministerio Sacerdotum nomine suo agentium, pergit adhuc seipsum offerre. Tum, quia potestas ejus sacerdotalis manet in æternum, quamvis ea non sit amplius usus post diem judicii. Tum, quia durant in æternum effectus sacrificii a Christo oblatis, scilicet salus Beatorum.

Quæres 6. An & qualiter Christus fuerit Rex? R. 1. 170  
Eoipso, quia Christus fuit Sacerdos summus, fuit, & est quoque Rex spiritualis Ecclesiæ, quam instituit, ordinavitque, ac perpetuo gubernat vices suas in ordine ad regimen visibile committendo Vicariis, Primario quidem Summo Pontifici, ac hoc mediante aliis Pastoribus. Ita habet certa Theologorum sententia. Ratio desumitur tum ex ipsa ratione summi sacerdotii, & capitis, quod fuit, & est Christus in Ecclesia. Tum ex S. Scriptura, quæ de hoc regno spirituali ita prophetice prædixit: *Veniet dux, qui regat populum meum Israel*, id est, Ecclesiam; & Gabriel Angelus Lucæ 1., *Dabit illi Dominus sedem David Patris ejus, & regnabit in domo Jacob (in Ecclesia) in æternum*.

R. 2. Christus ut homo fuit quoque Rex temporalis seu in temporalibus respectu totius mundi, quoad actum primum, non vero quoad actum secundum & exercitium. Antoninus, Suarez, Henno cum aliis contra alios, qui potestatem temporalis Regis Christo denegant. Ratio est 1. Apocal. 1. Christus dicitur: *Princeps Regum terræ*; & Matthæi ult. dicit de seipso: *data est mihi omnis potestas in cælo & in terra*; si autem omnis: ergo & temporalis. 2. Hæc dignitas nec Christum dedecet, nec fini Incarnationis opponitur; imo gloriosa est Christo: ergo ei est tribuenda.

Secunda pars assertionis clara est ex Evangelio, ex quo scimus, Christum non imperasse hominibus tanquam Regem, sed obedivisse Regibus tanquam subditum, tributum solvendo; & in hoc sensu Joan. 18. dixit: *Regnum meum non est de hoc mundo*.



R. 3. Christus non fuit speciali titulo Rex Judæorum, seu non fuit aliter Rex Judææ, quam fuerit totius mundi. Ita communissima Theologorum: ratio est; quia non potest ostendi aliquis specialis titulus electionis, donationis, aut successionis. Et quamvis Christus secundum carnem descenderet a Davide, tamen regia dignitas jam dudum translata erat a familia Davidis in Machabæos, ut patet 1. Machabæorum 14. & consequenter jus successionis cessaverat in filiis Davidis.

171

Quæres. An Christus habuerit dominium rerum temporalium? R. Christus quoque habuit dominium directum universale respectu omnium temporalium, quantum ad jus & potestatem. 2. Non vero quoad actum & exercitium. Hæc assertio quoad 2dam partem est communis ac certa: & patet ex vita Christi, qua se pauperem potius, quam Dominum universalem exhibuit in casu rerum temporalium.

Prob. 1. pars. Debemus Christo tribuere, quod ipsi est gloriosius, si hoc fieri possit sine inconvenienti; atqui tale dominium universale, & excellentiæ potest Christo tribui sine inconvenienti: ergo debet ei tribui.

Dices 1. Vicario Christi, seu summo Pontifici non convenit tale dominium universale directum in omnia temporalia: ergo neque Christo.

R. N. C. Multa conveniunt Christo qua homini ratione unionis hypostaticæ, quæ non conveniunt summo Pontifici, ut patrare miraculum, instituere Sacramenta &c. ergo & hoc dominium universale & directum Christo convenire potest, quin conveniat summo Pontifici.

Dices 2. Tali modo daretur dominium duorum in solidum respectu ejusdem rei. vg. Petrus in suas res temporales haberet dominium, & Christus in easdem res haberet: ergo.

R. D. a. Daretur dominium ejusdem rationis in solidum respectu ejusdem rei n. a., diversæ rationis c. a. dominium Christi est







R. 1. Christus est Advocatus noster; ita enim dicitur 1. Joan. 2.: *Advocatum habemus apud Patrem Jesum Christum Justum.* Quoniam vero præcipuum officium est orare, ac intercedere pro alio; hinc.

R. 2. Christus qua homo in hac vita vere & proprie rogavit, est communis ac certa.

Prob. 1. ex S. Script. Joan. 17. dicitur: *Non rogo, ut tollas eos de mundo, sed ut serves eos a malo,* ubi orat pro discipulis: & infra: *non pro eis tantum rogo, sed & pro eis, qui credituri sunt per verbum eorum in me,* ubi orat pro illis, qui erant credituri Apostolis; & Luc. 23. oravit Christus in cruce pro suis interfectoribus: *Pater dimitte illis; non enim sciunt, quid faciunt.* Hic textus in sensu proprio & obvio (ubi S. Scriptura accipi debet, nisi aliquid obstet) significat Christum proprie & formaliter orasse: ergo sic dicendus est orasse qua homo: dixi, *qua homo*, quia ut Deus non potuit orare, cum oratio essentialiter dicat subjectionem, & est petitio indigentis auxilio, quod Deo non convenit, qui neque pro se, neque pro aliis alterius auxilio indiget.

R. 2. Christus qua homo etiam in cælis adhuc proprie orat pro nobis. Viva, Henno cum aliis contra alios existimantes, Christum in cælo solum improprie & interpretative pro nobis orare, representando scilicet suam passionem & sua merita

Prob. 1. Sacra Script. dicit, Christum in cælis orare pro nobis, ad Rom. 8.: *Qui est ad dextram Dei, qui etiam interpellat pro nobis;* & ad Hebræ. 7., *semper vivens ad interpellandum pro nobis;* & Joan. 14. Christus ipse dicit: ego (assumptus in cælum) rogabo Patrem, & alium Paraclitum dabit vobis. Hi textus cum in sensu proprio possint intelligi, debent in eo intelligi, maxime, quia per orationem formalem extollitur charitas Christi in cælo erga nos. 2. Non est indecens, Christum orare proprie in cælo, cum non fuerit indecens, Christum in terra proprie orasse. 3. Christus in cælo quoque est Pontifex, Mediator, ac Advocatus noster; atqui ad horum munus spectat orare: ergo.

Non



Non dicimus autem ad Christum *ora pro nobis*; quia id vult consuetudo Ecclesiæ; ne credatur Christus purus homo, sicut credebant Ariani.

Quæres 2. Quomodo Christus, ejusque humanitas sit adoranda? R. 1. Christus simpliciter, sive Christus - Homo est adorandus perfectissima latria soli Deo propria: est de fide. Ita definitum in Concilio Ephesino, & ratio est: quia Christus - Homo est verus Deus, qui est adorandus cultu latriæ. Deinde adoratio tendit in personam, quæ est Deus. 173

R. 2. Quando Christus adoratur latria, eadem coadoratur humanitas Verbo unita, licet tanquam objectum secundarium adorationis.

Prob. ex Concilio 7. Act. 6., ubi dicitur, cum adoratur Christus, non separari divinitatem ab humanitate, sed utramque adorari latria. Id docent PP. passim: quia cum Rege eadem adoratione adoratur purpura, ut argumentatur S. Augustinus, & cum anima corpus, ut dicit S. Cyrillus: ergo etiam cum Persona divina adhuc adoratur humanitas assumpta a Verbo divino. Adde, hanc coadorationem deberi humanitati Christi propter increatam excellentiam speciali modo ei communicatam per unionem hypostaticam.

R. 3. Humanitas Christi mentaliter præcisa a Verbo, & in se considerata potest coli cultu hyperdulix ob perfectiones creatas ipsi intrinsecas: ratio est, quia excellentia humanitatis taliter considerata præcindit ab unionem cum Verbo, ratione cujus ipsi debetur cum Verbo latria, & tantum involvit excellentias supernaturales creatas, vi quarum meretur cultum majorem, quam quævis alia creatura: consequenter hyperduliam.

R. 4. Adorantur etiam adoratione latriæ imagines & simulacra Christi; ita enim definitum est in septimo Concilio generali contra Iconoclastas, & Trident. sess. 25.; non autem adorantur istæ imagines præcise ratione sui, quasi illis inesse crederemus aliquam divinitatem; tali enim modo committeretur idololatria: sed adorantur simul cum prototypo per illas repræsen-



tato, adorando primario & absolute prototypon seu Christum, secundario & respective imaginem. Quare objectum talis latriæ partialiter, & quidem primario est Christus, & iterum partialiter & secundario ac respective est imago Christi, ita, ut imago simul vere adoretur, & non sit mera conditio.

R. 5. Omnia, quæcunque instrumenta passionis adorantur adoratione latriæ, quia sunt figura amoris erga nos exhibiti, & triumphi de peccato ac morte reportati. 2. Quælibet etiam crux adoratur eadem latria, non vero adoratur quælibet lancea, spina, vel clavus. Ratio est, quia cum crux post edictum Constantini non amplius habeat usum profanum, nec ad supplicia reorum amplius adhibeatur, hinc quælibet crux censetur esse imago Crucifixi, adeoque cultu latriæ digna: at lancea, spina, & reliqua instrumenta dolorifera Christi adhuc usum profanum habent. 3. Cultus latriæ debetur quoque omnibus, quæ Christum tetigerunt, quia ratione hujus contactus Christum nobis repræsentant haud aliter, ac crux & imagines.

Nihilominus non convenit adorare cultu latriæ. 1. B. V. Mariam, quamvis Christum utero virgineo gestarit, & toties tetigerit, ne videamur illam reputare Deum. Neque 2. terram, quam tetigit, neque asinum, in quo sedit Christus, aut alia hujusmodi, utpote ad humanos & profanos etiam usus deputata. Neque 3. manus satellitum, qui Christum percusserunt &c., quia faciunt unum cum sacrilegis illis hominibus.

174

Quæres 3. Quos defectus humanitatis assumpserit Verbum? Ante responsionem supponendum est, quod corpus Christi fuerit omnino integrum & perfectum, bene dispositum, optimi temperamenti, & perfectæ pulchritudinis, qualem in humano ac virili corpore esse oportebat. Id, quod testantur D. Augustinus, & alii PP., qui hoc deducunt ex illo Psalmi 44.: *Speciosus forma præ filiis hominum*, in quem versum ait S. Hieronymus ad Principiam Virginem scribens: *Universis pulchrior est Virgo de Virgine, qui non ex voluntate viri, sed ex Deo natus est.* Atqui talis perfecta pulchritudo virilis non fœminea, decebat Spiritum sanctum, qui corpus efformavit, & Verbum divinum, quod



quod illud assumpsit, ac sanctissimam & perfectissimam animam, quæ informavit, uti & finis redemptionis, quem promovebat, utpote amænam reddens conversationem cum hominibus.

Quare R. 1. Verbum non assumpsit corpus aliquod debile. 2. Neque subjectum morbis: prima pars jam est probata: alteram tenent D. Thomas, & S. Bonaventura cum aliis contra alios. Ratio hujus est: quia neque Scriptura neque PP., dum recensent pœnas corporis Christi, ullius morbi meminerunt. 3. Morbi exsurgunt vel ex imperfecta informatione corporis, vel ex inordinato victu, vel ex causa externa, ut ex intemperie aëris; prima duo absuerunt a Christo, ut ex dictis colligitur. 3tium seu causas externas morbi, uti potuit Christus, ita declinavit, quia corpus morbis infectum obfuisset ejus salutiferæ conversationi cum hominibus.

R. 2. Fuerunt tamen in corpore Christi defectus aliqui communes toti generi humano post lapsum primi Parentis, qui non involvunt aliquam specialem imperfectionem Christo non convenientem. Unde sitim, famem, fatigationem & alia passus est, ac omnino mortuus; hos enim defectus in Christo fuisse Scriptura testatur, & expediebat hos in Christo esse. 1. Ut ostenderet se verum esse hominem, per omnia nobis similem. 2. Ut præberet nobis exempla patientiæ & humilitatis, ac 3, ut opus redemptionis perageret.

R. 3. Fuerunt in appetitu Christi sensitivo passiones innoxiae, ut dolor, tristitia, gaudium, ira justa &c., ut ex Evangelio habemus.

R. 4. Nulla tamen passio appetitus sensitivi in Christo prævenit rationem, & rectum ac justum voluntatis imperium. Ratio est, quia hic defectus, quo nostræ passiones præveniunt rationem, dedecebat Christum.

R. 5. Neque fuit in Christo fomes peccati, sive in actu primo consideretur, sive in actu secundo. Herinx, Viva & alii: ratio est, quia fomes peccati in actu primo est appetitus sensitivus, non simpliciter, sed ut solutus directione rationis, & volun-



luntatis imperio, & ut proxime dispositus ad motum inordinatum contra rationem vg. iræ, desiderii, gaudii. In actu 2do est ipse motus per se inordinatus contra rectam rationem; sed nihil horum fuit in Christo, tum quia erat beatus, tum quia utrumque dedecebat Christum. Vide Herinx, Vivam, Henno & alios.

175 Quæres 4to. An Christus influxerit physice vel moraliter in miracula, quæ patravit.


R. Christus ut Deus physice, ut homo moraliter tantum influxit in effectus miraculosos ab ipso causatos: vel saltem non in omnes physice, qua homo influxit. Scotus, Vasquez, Lugo & alii contra Thomistas, Vivam, & alios quosdam.

Prob. 1. ex SS. PP., qui virtutem physicam patrandi miracula in Christo attribuunt Christo, qua Deo, ut D. Damascenus l. 3. de fide cap. 5. ait: *Neque enim vivificat Lazarum humana natura; & D. Augustinus tract. 8. in Joan. Miraculum autem, quod facturum erat (Christus in Cana Galilææ) secundum divinitatem facturum erat, non secundum infirmitatem, secundum quod Deus erat, non secundum id, quod infirmus natus erat. Similia habent alii PP. apud Henno, Herinx & alios laudati.*

Prob. 2. Si humanitas Christi physice patravit miracula, tunc id per potentiam obedientialem; nam per vires mere naturales non potuit opera supernaturalia, qualia sunt miracula, efficere; atqui humanitas Christi non habuit potentiam obedientialem ad omnia miracula, quæ operata est: ergo non patravit physice, vel per influxum physicum omnia illa miracula, quæ operata est. m. patet; tum quia a nostris rejicitur passim potentia obedientialis activa quodlibetica: tum, quia humanitas Christi non habuit potentiam inchoatam ad quævis opera miraculosa, maxime ad resurrectionem mortuorum.

Igitur Humanitas Christi miracula, saltem illa, ad quæ non habuit potentiam inchoatam, causavit solum moraliter, movendo per dignitatem ac merita sua, ut Deus per suam omnipotentiam quosvis effectus miraculosos efficeret, quos ipse Christus qua homo vellet effici.





# DISSERTATIO VIII.

*Appendix ad Tractatum de Incarnatione , de cultu  
& invocatione Sanctorum, & veneratione SS. reli-  
quiarum, & sacrarum imaginum, nec non  
de dotibus B. V. Mariæ.*

## ARTICULUS I.

*Synopsis historica, & prænотanda.*

**P**Lura jam tom. I. de Prolegomenis Theologiæ sparsim fuere dicta de hæreticis cultum Sanctorum, & sacrarum imaginum impugnantibus: ea in synopsis hic contraho, & alia addo. Itaque Manichæi tertio jam sæculo omnem Sanctorum cultum respuerunt, objicientes Orthodoxis teste S. Augustino, quod pro Diis gentium Martyres invenissent: ex quo deduces, jam horum hæreticorum ætate cultum Sanctorum in Ecclesia catholica fuisse celebrem. 176

Manichæorum errorem sectatus est sæculo IV. in oriente Eunomius, Arianus, & in occidente initio sæculi V., Vigilantius natus Gallus, & postea Barcinonensis Ecclesiæ in Hispania Presbyter, adversus quem calamum acuit S. Hieronymus.

Signum crucis, quod a Catholicis manuum motu exprimi solet, deriserunt iidem Manichæi ex S. Augustino L. 6. contra Faustum, & alii recentiores Manichæi apud Pithæum in historia Aquitanica. Amalorius sæculo IX. lib. de off. Eccles. c. 14. narrat quorundam errorem, mox tamen extinctum, qui veram crucem Christi honorandam censuerunt, ut reliquas ad ejus similitudinem formatas rejicerent. Alii paulopost Duce Taurinensi Episcopo tam veram quam cæteras cruces contemptui habebant.



bant, quos sequebantur sæculo XI. in occidente Henriciani seu Petrobusiani.

IV. Sæculo in oriente S. reliquias impugnarunt, jam dictus Eunomius, & initio Sæculi V. in occidente Vigilantius teste S. Hieronymo, qui Catholicos per contemptum cineranos & idolatras appellabant.

Sacris imaginibus bellum movere primo Judæi. 2. Mahometani, quorum secta erupit sæculo VII. 3. Ex Christianis Manichæi teste Thorasio Episcopo Constantinopolitano act. 4. Concilii VII. æcumenici. 5. Præ omnibus Leo Isauricus Imperator a Judæo deceptus, nimio furore in sacras imagines debachatus: Paternum scelus Constantinus Copronimus totis viribus persecutus, congregatis ex variis Provinciis Constantinopoli Episcopis 338. anno 754. imagines abrogari jussit: missisque Legatis ad Pipinum Regem Franciæ, eum in societatem hujus impietatis conatus est pertrahere. Ast nihil effecit: Etenim Pipinus in conventu Gentiliaci hac de causa habito per eosdem Legatos Imperatorem ab errore isto revocare studuit, sed conatu frustraneo ob præconceptum a Copronimo atrox in imagines odium, cujus & filium Leonem quartum hæredem reliquit. Porro Leoni Isaurico acerrime se opposuerunt in Oriente SS. Joannes Damascenus, & Germanus Archipræsul Constantinopolitanus, in Occidente Gregorius Papa II. in synodo Romana, Gregorius III. in Concilio 93. Episcoporum anno 732. ita referente Anastasio in ejus vita. Stephanus IV. quoque anno 769. damnavit conciliabulum Iconoclastorum a Constantino Copronimo coactum.

Denique sub Constantino pio Imperatore & Irene matre ejus adjuvante Nicææ Bythinæ Metropoli habitum est concilium generale VII., dictum Nicænum II. Adriano I. Papa per suos Legatos præsidente, in quo sacris imaginibus suus honor & cultus in Oriente est restitutus.

Errorrem Iconomachorum ubique proscriptum tandem sæculo XII. innovarunt Waldenses Petrobusiani, Henriciani, & Albigenes: & sæculo XVI. Lutherani & Calvinistæ instaurantes impietatem Manichæorum, Vigilantii & aliorum hujusmodi hæ-



hæreticorum circa cultum Sanctorum &c. ut sectam eorum recte vocaveris sentinam, in quam omnium hæresum fortes confluent, quamvis Lutherus in Evangelium Dom. 23. post Pentecosten omnem cultum Sanctorum vocet rem diabolicam, & Centuriatores cent. 1. L. 2. c. 4. vocent idololatriam, minus tamen insaniunt ceteri Lutherani multi, qui non omnem venerationem negant Sanctis propter nimis claros textus S. Scripturæ. Dicunt ipsis convenire cultum civilem, & eatenus coli posse, quatenus 1. Deus laudatur propter gratias & dona Sanctis concessa. 2. Quatenus laudantur Sancti propter fidele servitium Deo præstitum, & commemorantur eorum virtutes. 3. Quatenus proponuntur eorum gesta ad imitationem. Pernegant tamen, Sanctos posse coli religiose, scilicet cum omni devotione certas preces, vota &c. in eorum honorem faciendo, aut eos invocando suppliciter in necessitatibus internis & externis. Hæc est synopsis historica, nunc veniunt quædam notanda.

Prænотabis 1. Nomine *cultus*, seu *adorationis*, quæ hic pro eodem sumitur, intelligi recognitionem excellentiæ in altero, ejusque cum debita animi submissione contestationem, seu hæc fiat signis externis, seu internis tantum intellectus & voluntatis actibus: signa enim externa verosimiliter non sunt de essentia adorationis, licet sint perfecta ejus consummatio. Unde adoratio differt a laude & honoratione, quæ testificantur alterius excellentiam quidem, sed sine externa animi submissione, quam addit adoratio, 177

Prænот. 2. Excellentiam, quam in altero contestari possumus, esse triplicem, nempe *naturalem*, *supernaturalem*, *divinam*. Naturalis excellentia reperitur in Regibus, Principibus, Magistratibus, parentibus, doctis, nobilibus &c. Supernaturalis datur in Sanctis, consistens in donis supernaturalibus & spiritualibus, uti est gratia sanctificans, gratiæ actuales, variae virtutes &c. *Divina* est in solo Deo, unde & soli Deo debetur talis adoratio, quæ nulli alteri convenire potest, & appellatur *latræ cultus*. *Dulia* dicitur cultus, quo coluntur Sancti propter excellentiam donorum supernaturalium, quæ in iis sunt. Quia vero B. Virgo præ omnibus Sanctis eminet peculiari excellentia



supernaturali ob maternitatem Dei, ob quam gaudet singularissimis aliis donis supremis & gratiis, ei competit cultus hyperdulæ, qui est major cultus illo, qui aliis Sanctis convenit: Quid de humanitate Christi, quo cultu sit adoranda, sit censendum, jam superius dictum est.

Demum cultus, qui deferitur aliis propter excellentiam naturalem, & dona naturalia vg. ob nobilitatem, doctrinam, potestatem gubernativam, dicitur cultus *civilis*, vel *politicus*, cui opponitur cultus *religiosus*, qui tribuitur Deo ob excellentiam infinitam, & insuper Sanctis ob excellentiam supernaturalem & spirituales. Nam nos Catholici omnem cultum a civili & politico distinctum, vocamus religiosum & sanctum, quod eadem virtus religionis moveat ad Deum, & Sanctos colendos, licet diverso modo; nimirum Deum propter se, & ut infinitate excellentem, Sanctos propter Deum, ut ab eo excellentia supernaturali & donis supremis exornatos amicos & dilectos Dei, sicut eadem virtus charitatis nos movet ad Deum, Sanctosque propter Deum amandos.

Ex his deduces: crassam esse calumniam, quam Lutherani Catholicis impingunt, dum ajunt, nos esse idololatrias, dum Sanctos colimus; perpetuo enim protestamur, non divino & latriæ cultu nos afficere Sanctos, & Angelos, ac B. V. Mariam, sed multo inferiore, nec Sanctos facere omnipotentes & omni-scios, prout amplius ex dicendis patebit. Nec asserimus, dari præceptum positive & directe obligans ad colendos & invocandos Sanctos, sed solum, quod liceat eos colere.

## ARTICULUS II.

### *An liceat Sanctos religiose colere?*

178 **A**SSERO I. Licite & recte coluntur Sancti tanquam Amici Dei cultu religioso: idem est de Angelis bonis. Ita fides catholica contra jam dictos hæreticos articulo præcedente.

Prob.



Prob. 1. ex S. Script. Gen. 18. v. 2. : Abraham cucurrit in occursum eorum (Angelorum) de ostio tabernaculi sui, & adoravit in terram; Loth Genes. 19. : adoravit (Angelos) pronus in terram, & dixit, obsecro Domine! Josue 5. v. 13. 14. 15. Vidit virum stantem contra se, evaginatam tenentem gladium, perrexitque ad eum, & ait, noster es, an adversariorum? qui respondit, nequaquam, sed sum Princeps exercitus Domini, & nunc venio. Cecidit Josue pronus in terram, & adorans ait Ecce; Tobiae 12. v. 16. : Tobias senior & filius Raphaelem Angelum adoravit : ceciderunt super terram Ecce : quibus locis adoratio non supremum patriae cultum, sed alium multo inferiorem significat, religiosum tamen, non pure politicum : Sancti scilicet viri illi in Angelis venerati sunt eximiam eorum sanctitatem, supernaturales dotes, quibus Angeli Deo conjunguntur : sed eadem ratio est de Sanctis reliquis, praesertim in caelo cum Christo regnantibus : ergo.

Adde : Abdias, qui fuit potens aulicus, adoravit pronus Eliam Prophetam adhuc viventem 2. Reg. 18. : atqui non adoravit propter excellentiam Eliae naturalem, quia pauper erat, sed propter excellentiam supernaturalem, quia nempe erat Propheta Deo acceptus, atque adeo adoravit cultu religioso, non mere civili.

4. Reg. c. 2. v. 15. cum filii Prophetarum intellexissent, Spiritum Eliae in Elisaeum transiisse : Venientes in occursum ejus, adoraverunt eum proni in terram cultu nimirum religioso ob prophetiae supernaturaliter acceptum donum, quo eminebat : ergo licet homines in hac mortali vita tot miseris obnoxios religioso cultu prosequi : quanto magis licebit id deferre Sanctis misera mortalitate exutis, & visione Dei in gloria fruentibus.

Præterea ipse Deus honorat amicos suos, & glorificat glorificantes se, nempe propter virtutes & dona supernaturalia : sic enim dicitur 1. Reg. 2. : Quicumque glorificaverit me, glorificabo eum; Psalm. 138. : mihi autem nimis honorati sunt amici tui Deus; & Joan. 12. : si quis mihi ministraverit, honorificabit illum Pater meus. ergo propter hæc ipsa licet & nobis colere Sanctos cultu religioso.



Prob. ex Tradit. SS. Patrum. S. Gregorius Nazianzenus orat. in laudem Cypriani Martyris: *Cyprianus*, ait, *fere nobis effluxit, o grave damnum, idque vos passi estis, qui eum maxime suspicitis*, annuisque honoribus, festisque celebratis. S. Damascenus lib. 4. orthodox. fidei c. 16. docet, honorandos esse Sanctos, ut servos, amicos & filios Dei. Eusebius l. 7. hist. c. 19. refert, summa reverentia servatam esse S. Jacobi Jerosolymitani cathedram; cujus reverentiæ rationem reddit his verbis: *satis perspicue declarantes, qualiter tam antiquiores, quam nostri temporis Christiani viros sanctos ob ipsorum erga Deum amorem debito semper honore venerati sunt, & hædenus venerantur*; S. Ambrosius serm. 6. circa finem: *quisquis honorat Martyres, honorat Christum, & qui spernit Sanctos, spernit & Dominum*; S. Hieronymus epist. ad Riparium de erroribus Vigilantiæ: *Honoramus servos, ut honor servorum redundet ad Deum, qui ait: qui vos suscipit, me suscipit*; S. Augustinus l. 20. contra Faustum c. 21: *Populus Christianus memorias Martyrum religiosa solemnitate concelebrat - - colimus Martyres eo cultu dilectionis & societatis, qua & in hac vita coluntur sancti homines Dei. - - At illo cultu, qui græce λατρεία dicitur: latine uno verbo dici non potest, cum sit quædam proprie divinitati debita servitus, nec colimus, nec colendum docemus, nisi unum Deum*, Hæc verba Lutherani notent.

Prob. etiam ratione. Cultus religiosus Dulia est cultus facer, seu qui exhibetur creaturis propter excellentiam & dona supernaturalia: sed in Sanctis nonnulla sunt dona supernaturalia, ut gratia sanctificans, habitus virtutum, visio beatifica &c. ergo.

179 Affero 2. B. V. Maria digna est cultu Hyperdulia, Catholici contra hæreticos.

Prob. B. V. Maria habet excellentiam supernaturalem creatam omnino eximiam ac singularem sibi propriam & intrinsicam, longe majorem excellentia Angelorum & hominum, consistentem in gratia habituali & gloria excellentissima ipsi physice inhaerente, & in dignitate Maternitatis Dei, quæ ei moraliter inest: ergo B. V. Maria digna est quodam cultu singulari & eximio, qui nulli alteri puræ creaturæ convenit, recteque Hyper-



perdulia, vel quasi *superdulia* dicitur : etenim cultus adaptatur excellentiæ. Quare de illa S. Ambrosius l. 2. de virginibus asserit : *Quid nobilius Dei Matre ? quid splendidius ea, quam splendor elegit ?* Inde factum est, ut quovis sæculo fidelibus fuerit persuasum, plurimum eam suis precibus apud Deum valere. S. Augustinus L. de S. Virgine c. 6. docet, majorem non solum naturalis corporis Christi Matrem esse, sed etiam mystici, quod est Ecclesia. Mirum ergo non est, quod Christiani ad eam tanquam filii ad matrem semper confugerint, eamque eo titulo supplices invocaverint.

### Solvuntur Objectiones.

Objic. 1. Deuteronomii c. 6. v. 13. dicitur : *Dominum Deum adorabis, & illi soli servies* ; & 1. Timoth. c. 1. v. 17. : *soli Deo honor & gloria* : ergo nulli creaturæ licet cultum religiosum exhibere. 180

R. 1. Si ita stricte accipi deberent hæc verba, cur Præcones & alii Protestantes admittunt servos & ancillas ? cur exigunt honorem a filiis & subditis ? soli Deo debetur enim honor juxta ipsos, soli Deo est serviendum.

R. 2. c. a. N. c. Soli Deo debetur servitus summa & primaria seu supremo omnium rerum Domino & Creatori, ac Redemptori propter supremam suam excellentiam ; servitus vero inferior propter minorem excellentiam supernaturalem convenit etiam Sanctis tanquam amicis & Servis Dei propter Deum.

Objic. 2. Sanctis non potest etiam cultus Dulciæ deferri : ergo, a. constat varie ex S. Scriptura.

R. N. a. Exempla S. Scripturæ affero, & explico. 1. Machabæus noluit se inclinare coram Aman Esther. 13. Hic enim non fuit sanctus, & ideo indignus cultu religioso : dein videtur exegisse cultum divinum, ut colligunt interpretes ex additis verbis Scripturæ : *ne honorem Dei transferret ad hominem.* 2.



2. Petrus Act. 10. prohibuit Cornelium se adorare volentem : siquidem vel Cornelius aliquid divinum existimavit inesse Petro, & ideo recte a D. Petro est correctus : vel Petrus ex modestia & humilitate non admisit honorem alias sibi convenientem.

3. Paulus & Barnabas Act. 10. inhibuerunt Lycaonibus, ne se adorarent. Lycaones voluerunt Paulo & Barnabæ sacrificare tanquam Diis Jovi & Mercurio, adeoque merito, ne hoc facerent, sunt prohibiti : id quod observat S. Hieronymus lib. contra Vigilantium c. 3. dicens : *Paulus & Barnabas cum a Lycaonibus Jupiter & Mercurius putarentur, se homines esse dixerunt, quod sub gentilitatis errore honor eis Deo debitus deferretur.*

4. Angelus non admisit adorationem a S. Joanne dicens : *Vide, ne feceris, conservus enim tuus sum, Deum adora.* Et hoc ideo, quia S. Joannes vel putabat esse Deum, quem adorare volebat, vel si adorare voluit, priusquam cognovit esse Angelum, voluit adorare cultu Dulix, quem cultum tamen Angelus recusabat ex reverentia erga S. Joannem, qui fuit Apostolus, Evangelista, Prædicator verbi divini, dilectus Christi discipulus, custos B. Virginis : vel ex reverentia erga humanitatem Christi, ut enim advertit Bellarminus ex V. Beda, Anselmo, Gregorio, post Verbum Incarnatum, Angeli non amplius se adorari permiserunt, ut in veteri testamento. Tali modo facile dissolvuntur isti textus, qui male contra fideles ab adversariis solent adduci.

Obji. 3. Cultus religiosus est cultus soli Deo debitus, quia spectat ad primam tabulam Decalogi : ergo hic cultus non potest exhiberi aliis, nempe Sanctis.

R. N. a. ad rationem dico : cultus religiosus Sanctis exhiberi solitus nec ad primam, nec ad secundam Decalogi tabulam proprie spectat, quia *præceptus* non est ; in Decalogo autem reperiuntur mera præcepta ; reductive tamen ad utramque spectare potest, ad primam ultimato & mediate, ad secundam proxime & immediate ; quia Sanctos colimus tanquam amicos Dei, & sic ultimato propter Deum : fere sicut proximum diligimus ultimato propter Deum, quæ dilectio immediate spectat ad secundam tabulam, mediate ad primam.

Objie.



Objic. 4. Cultus Latriæ & Dulia in Scripturis sumuntur pro eodem, & si non sumantur pro eodem, cultus dulia erit major, quam cultus latriæ; Dulia enim significat *servitutem*, latria *cultum*: ergo.

R. D. a. secundum mentem & sensum Ecclesiæ N. a. juxta mentem & intellectum Ecclesiæ c. a. quidquid λατρεύειν & δαλύνειν in Scripturis significant, tamen ex usu & recepta Ecclesiæ consuetudine per latriam intelligitur cultus soli Deo debitus; per duliam vero cultus minor, licet sacer, creaturis tamen conveniens. Audiatur denuo S. Augustinus jam prius laudatus l. 20. contra Faustum c. 21. & l. 15. contra eundem c. 9.: *Latria verbum græcum est, & interpretatur servitus non quæcunque, sed illa, qua tantum modo Deo servitur.* Quam ob rem quidquid hæ voces ex primævâ Græcorum institutione significant, tamen ex voluntate & usu Ecclesiæ latria importat summam servitutem Deo soli debitam, Dulia servitutem minorem etiam creaturis competentem. Nec turbet aliquem D. Augustinus l. 2. quæst. super Exod. n. 94. duliam appellans Deo debitam; ibi enim S. Doctor videtur Duliam accipere secundum vim rationis, non vero secundum usum postea ab Ecclesia receptum; illo enim tempore dulia nomen non videtur adhuc innotuisse secundum modernam Ecclesiæ acceptionem.

Objic. 5. Coloss. 2. v. 18. & 19. ait Apostolus: *Nemo vos seducat, volens in humilitate & religione Angelorum, quæ non vidit, ambulans, frustra inflatus sensu carnis suæ, & non tenens caput, ex quo totum corpus - - crescit*: ergo religiosus cultus Angelis impensus reprobatur.

R. N. C. Apostolus ibi agit contra quosdam hæreticos, qui a Platonicis sumpto errore docebant, Angelos non dependere a Deo, & esse conditores hujus mundi, ideoque cultu latriæ adorandos, & honorem Christo debitum in illos transferendum, ut patet ex verbis sequentibus, *Et non tenens caput, id est Christum.* S. Chrysostomus in hunc locum dicit: *sunt quidam, qui dicunt, non posse per Christum adduci, sed per Angelos scilicet ad Deum.* S. quoque Epiphanius de hæresi Simonis ait, ipsum docere, *non posse salvari aliquem, nisi sacrificia Patri.*  
*P. Kick Theol. Tom. IV.* P p tri



*tri universorum* per eos principatus & potestates obtulerit. Horum igitur errorem hæreticorum S. Paulus rejecit, non Duliam Christianorum.


Objic, 6. Cultus religiosus, quem Catholici exhibent Sanctis, est idololatricus, quia Sanctos colunt sacrificiis, templis, altaribus, votis, paramentis &c., sed hi cultus sunt latrevtici: ergo erga Sanctos idololatrici.

R. N. M. Plerique ritus & actus externi, quibus adoratur alius, sunt secundum se indifferentes, ac pendent ab intentione, & subiectione interna colentium, ut sint cultus Latriæ, Dulæ, vel omnino politici excepto sacrificio, & iis, quæ ad Sacrificium pertinent. Igitur pensanda est mens fidelium, qui ejusmodi ritus peragunt, an Sanctis hos cultus deferant tanquam Diis, tanquam Dominis supremis infinitæ excellentiæ, an vero solum tanquam amicis & servis dilectis Dei & Christi. Prius nemini vere Catholicorum adhuc in mentem venit, & esset vera idololatria, posterius faciunt absque periculo omnis idololatriæ, quia minore subiectione colimus Sanctos, quam Deum, non ut Deos, sed ut creaturas Deo acceptas, in quibus ipse honorari cupit. Sacrificia proprie dicta, quia sunt contestatio supremi domini in omnes creaturas, soli Deo offerimus, eique soli templa & altaria erigimus, supra quibus celebratur Missa: quamvis hæc semper facimus in memorias Sanctorum: quando ergo offertur Missa de aliquo Sancto, non sacrificatur Sancto, sed soli Deo, de Sancto autem fit memoria aliqua aut preces accidentales, ut Deum colamus etiam in aliquo dilecto amico suo, hujusque accedente intercessione facilius impetremus, quæ petimus. Id quod jam pridem docuit S. August. l. 20. contra Faustum Manich. c. 21.: *Nulli Martyrum, sed ipsi Deo Martyrum, quamvis in memorias Martyrum, constituimus altaria: quis enim Antistitem in locis SS. Martyrum assistens altari, aliquando dixit: offerimus tibi Petre, aut Paule &c.* Ferme idem de votis & juramentis est respondendum; hæc enim principaliter Deo fiunt, possunt tamen fieri secundo in honorem Sanctorum, ut inde in eos aliquis honor derivetur, sicut & Hospitali cadit aliqua utilitas, cui per votum aliqua summa pecuniæ promittitur:



tur : juramenta fiunt quidem principaliter per Deum , secundario tamen etiam fieri possunt per creaturas , in quibus Dei virtus specialiter elucet , & respicitur : vg. per cælum , SS. Evangelia , cur non etiam per Sanctos , in quibus plura dona Dei enitescunt.

Denique per cultum SS. hominum non minuitur , sed potius augetur cultus Dei : sicut non minuitur , sed augetur honor Principis , quod ejus etiam ministri & amici honorentur , & sicut dilectio Dei non minuitur per hoc , quod proximi amentur propter Deum. Imo honor Sanctorum semper redundat in Deum , quem in suis Sanctis & amicis colimus.



### ARTICULUS III.

#### *De Invocatione Sanctorum.*

**L**icet magis eruditi & perspicaces Protestantes cultum , qui 181  
Sanctis præstatur , non videantur rejicere , tamen contra eorum invocationem velut idololatricam , & Christi mediationi , ac Redemptioni contrariam pugnant , secuti Vigilantium sæculi IV. hæreticum , & Petrobussianos sæculi XII. hæreticos. Sæculo autem XVI. Lutherus , ut liquet ex libris ab ipso ad Waldenses scriptis , & Calvinus L. I. instit. c. 14. & 12. adversus Sanctorum invocationem quatuor puncta docuerunt. 1. Ex divinis litteris non haberi , quod Sancti in altera vita pro vivis orent. 2. Si Sancti orent , eos orare pro tota electorum Ecclesia , non autem peculiariter , id est , pro his aut illis hominibus in particulari. 3. Inutiliter Sanctos in altis regnantes invocari , cum , ut inquit , viventium preces minime cognoscant. 4. Per ejusmodi invocationem non parum obscurari gloriam Christi , qui unicus est Mediator noster , & intercessor. Hos suos duces sectantur protestantes moderni.

Quibus opponit se Ecclesia Catholica in Trident. sess. 25.



de invocatione Sanctorum ita dogmatizans : „ Mandat sancta  
 „ Synodus omnibus Episcopis , & cæteris docendi munus sus-  
 „ tinentibus , ut juxta Catholica & Apostolica Ecclesiæ usum  
 „ primævis Christianæ Religionis temporibus receptum, Sancto-  
 „ rumque Patrum consensionem , & sacrorum Conciliorum de-  
 „ creta, in primis de Sanctorum intercessione, invocatione, Re-  
 „ liquiarum honore, & legitimo imaginum usu , fideles diligen-  
 „ ter instruant, docentes eos, Sanctos, una cum Christo re-  
 „ gnantes, orationes suas pro hominibus Deo offerre, bo-  
 „ num atque utile esse suppliciter eos invocare, & ob bene-  
 „ ficia impetranda a Deo per filium ejus Jesum Christum Domi-  
 „ num nostrum, qui solus noster Redemptor & Salvator est, ad eo-  
 „ rum orationes, opem auxiliumque confugere ; illos vero, qui  
 „ negant Sanctos, æterna felicitate in cælo fruantes, invocan-  
 „ dos esse ; aut qui asserunt, vel illos pro hominibus non ora-  
 „ re ; vel eorum, ut pro nobis etiam singulis orent, invoca-  
 „ tionem esse idololatriam, vel pugnare cum Verbo Dei, adver-  
 „ sarique honori unius Mediatoris Dei, & hominum Jesu Chri-  
 „ sti : vel stultum esse, in cælo regnantibus voce, vel men-  
 „ te supplicare, impie sentire. Sanctorum quoque Martyrum  
 „ & aliorum cum Christo viventium sancta corpora, quæ viva  
 „ membra fuerunt Christi, & templum Spiritus sancti, ab ipso  
 „ ad æternam vitam suscitanda, & glorificanda a fidelibus ve-  
 „ neranda esse : per quæ multa beneficia a Deo hominibus præ-  
 „ stantur : ita ut affirmantes, Sanctorum Reliquiis veneratio-  
 „ nem, atque honorem non deberi : vel eas, aliaque sacra mo-  
 „ numenta a fidelibus inutiliter honorari, atque eorum opis  
 „ impetrandæ causa Sanctorum memorias frustra frequentari ;  
 „ omnino damnandos esse, prout jam pridem eos damnavit, &  
 „ nunc etiam damnat Ecclesia. Imagines porro Christi, Dei-  
 „ paræ Virginis, & aliorum Sanctorum, in templis præsertim  
 „ habendas, & retinendas, eisque debitum honorem, & ve-  
 „ nerationem impertiendam, non quod credatur inesse aliqua in  
 „ iis divinitas vel virtus, propter quam sint colendæ ; vel quod  
 „ ab eis sit aliquid petendum, vel quod fiducia in imaginibus sit  
 „ figenda ; veluti olim fiebat a gentibus, quæ in idolis spem  
 „ suam collocabant ; sed quoniam honos, qui eis exhibetur,  
 „ refertur ad prototypa, quæ illa repræsentant : ita ut per ima-

„ gi-



„ gines, quas osculamur, & coram quibus caput aperimus, &  
 „ procumbimus, Christum adoremus, & Sanctos, quorum il-  
 „ la similitudinem gerunt, veneremur. Id quod Conciliorum,  
 „ praesertim vero secundae Nicenae Synodi decretis contra ima-  
 „ ginum oppugnatores est sancitum., Hac Catholica doctri-  
 „ na nixus adversus sectarios.

Affero: Bonum & utile est invocare Sanctos, ut pro no- 182  
 bis ad Deum intercedant.

Prob. 1. ex S. Scriptura Genes. 48. v. 16. Jacob Patriar-  
 cha benedicens filiis Joseph ait: *Angelus, qui eruit me de om-  
 nibus malis, benedicat pueris istis: ibi invocatur Angelus. Ibi-*  
 dem Jacob subdit: *Et invocetur nomen meum super eos: nomina*  
 quoque Patrum meorum Abraham & Isaac, ubi Jacob docet  
 posteros, ut nomen suum & Patrum suorum invocent, ex quo  
 etiam deduces, licite & pie a nobis alios Sanctos invocari. Huic  
 exemplo obsecutus Moyses Exod. 32. v. 13. orat dicens: *Re-*  
*cordare Domine Abraham, Isaac, & Jacob Sanctorum tuorum.*  
 Unde D. Augustinus q. 149. in Exodum Edit. Basileensis anno  
 1528. circa illa verba Dei ad Moysen: *Dimitte me, & iratus*  
*conteram eos, &c.* inquit: *ut eo modo admoneremur, cum merita*  
*(seu potius demerita) nostra nos gravassent, ne diligamur a Deo,*  
*relevari nos apud Deum illorum meritis posse, quos Deus diligit.*  
 Salomon oravit Deum 2. Paralip. 6. v. 42. cum David jam es-  
 set mortuus, per hunc tamen sic orat: *Domine Deus ne aver-*  
*teris faciem Christi tui, memento misericordiarum David servi tui.*  
 Daniel quoque c. 3. v. 35. allegat merita Patrum suorum ita orans:  
*Ne auferas misericordiam tuam a nobis propter Abraham dilectum*  
*tuum, & Isaac servum tuum, & Israel Sanctum tuum.*

Ex his ita infero: non fuit facta injuria Deo, quod fue-  
 rit invocatus in veteri testamento per merita Sanctorum: ergo  
 nec fit injuria, si sic invocetur in novo per merita & inter-  
 cessionem Sanctorum.

Accedit & illud 2. Machab. c. 15. v. 12., ubi Judas in  
 visu videt Oniam jam defunctum, qui fuerat summus Sacerdos,



orare pro populo *Judæorum*. Ab eodem etiam Onia hæc audit: Hic est fratrum amator & populi Israel: hic est, qui multum orat pro populo, & universa sancta civitate, Jeremias Propheta Dei. Si igitur PP. in limbo adhuc existentes orarunt pro suis, quid modo poterunt Sancti in cælo cum Christo regnantes.

Prob. 2. Licet orare & invocare Sanctos adhuc in terris degentes, ut patet ex illo Jobi ultimo, ubi Deus ipse mittit amicos Job ad servum suum Job, ut oret pro iis. Et Apostolus in utraque epistola ad Thessalonicenses ait: *Fratres orate pro nobis*, & alibi sæpius petit orationes fidelium; ergo & licet invocare Sanctos in cælo regnantes: sic enim nos docet S. Hieronymus Tom. 2. adversus Vigilantium c. 3.: *Si Apostoli & Martyres adhuc in corpore constituti possunt orare pro cæteris, quando pro se adhuc debent esse solliciti: quanto magis post coronas, victorias, & triumphos? unus homo Moyses sexcentis millibus armatorum impetrat a Deo veniam; & Stephanus imitator Domini sui, & primus Martyr in Christo pro persecutoribus veniam deprecatur; & postquam cum Christo esse cæperint, minus valebunt?*

Ex quo ruit hæreticorum improprium, & deducitur, non esse signum diffidentiae, nec injuriosum Christo principali Advocato & Mediatori, quod Sancti in cælo invocentur tanquam secundarii Advocati, & mediatores Christo subordinati: alioquin enim pariter foret signum diffidentiae, & injuria Christo illata, quod invocentur adhuc nobiscum degentes. Unde Calvinus splendidum committit mendacium l. 3. instit. c. 20. §. 21. dicens, Papistas velle moliri per intercessionem Sanctorum, ut abducamur a Christo, eaque oblectari, eoquod anxietate laborarent, ac si Christus hic deficeret, aut nimium severus foret. Profecto sicut nihil horum subest, dum confugiunt etiam Calvinistæ ad intercessionem Sanctorum, hic in carne adhuc viventium, ita neque subest, dum Catholici confugiunt ad intercessionem Sanctorum in cælis cum Christo regnantium: siquidem utrobique manet, quod ipse Calvinus cit. §. 19. agens de Beatis hic viventibus scribit: *Ita unus statuitur Mediator Christus, cujus intercessione propitius & exorabilis nobis reddatur Pater. Quamquam interim & suæ Sanctis intercessionem relinquuntur, - sed tales,*



les, quæ ab unica illa dependeant, tantum abest, ut delibent ex ea quidpiam,

Prob. 3. Ex traditione Patrum Ecclesiæ. In actis martyrii S. Ignatii, S. Petri in Antiochena Ecclesia post Evodium successoris, & S. Polycarpi, qui Joannis Apostoli discipulus fuit, legimus illos SS. Martyres a fidelibus hujus ætatis esse invocatos. Origenes, qui obiit anno 254. seu sæculo III. Homil. in Cantica inquit: *Omnes Sancti, qui de hac vita decesserunt, habentes adhuc charitatem erga eos, qui in hoc mundo sunt, si dicantur curam gerere salutis eorum, & juvare eos precibus suis, atque interventu suo apud Deum non erit inconveniens; scriptum namque est in libris Machabæorum, hic est Jeremias Propheta Dei, qui semper orat pro populo Dei: & Homil. 26. in c. 11. Numer.: quis dubitat, ait, quod Sancti quique Patrum, & orationibus nos juvent, & gestorum suorum confirment exemplis?* S. Cyprianus, qui obiit 258. epist. 57. ad Cornelium Papam, rogat, ut qui ex alterutro prior e vita discesserit, pro superstite, aliisque fratribus divinam imploret misericordiam: *Memores, inquit, nostri invicem simus, concordet atque unanimes pressuras & angustias mutua charitate relevemus, & si quis isthinc nostrum prior divinæ dignationis celeritate præcesserit, perseveret apud Deum nostra dilectio pro fratribus ac sororibus nostris, apud misericordiam Patris non cesset oratio.* Eusebius, qui natus est anno 340. L. 13. Præcept. Evangel. c. 11. hæc scribit: *quæ quidem in hominum Deo charissimorum obitu egregie conveniunt, quos veræ pietatis milites jure appellaveris. Nam & eorum sepulchra celebrare, & preces ibi, vota que nuncupare, & beatas illorum animas venerari consuevimus, idque a nobis merito fieri statuimus.*

S. Hieronymus jam est allegatus in prob. 2.: obiit autem anno 420., scripsit pro cultu & invocatione Sanctorum contra Vigilantium circa finem IV. Ecclesiæ sæculi.

S. Augustinus mortuus anno 430. ferm. 17. de verbis Apostoli ait: *Injuria est pro Martyre orare, cujus nos debemus precibus commendare.*

Ex IV. & sequentibus sæculis non est necesse plura recensere



fere testimonia, cum Protestantes ipsi fateri cogantur, usum invocationis Sanctorum jam IV. sæculo invaluisse.

Prob. 4. Ex Conciliis : in Ephesino celebrato anno 431. sub Cælestino I. Papa, S. Cyrillus, qui nomine Pontificis Romani præfedit, beatum Joannem invocavit in oratione, quam habuit hujus die festivo, In Calcedonenſi celebrato anno 451. sub Leone summo Pontifice Aet. II. de S. Flaviano dicitur : *S. Flavianus post mortem vivit, Martyr pro nobis orat* ; In Nicæno II. quod est generale VII. celebrato anno 787. sub Adriano I. Aet. 6. habetur : *ergo cum timore Dei omnia faciamus, expectantes etiam intercessionem intemeratæ Domine nostræ, & naturæ Dei Genitricis semper Virginis Mariæ, atque sanctorum Angelorum, & simul omnium Sanctorum.* Adde innumera beneficia, & miracula, quæ Deus per Sanctorum intercessionem contulit, ut constat ex authoribus fide dignissimis : Inter quos S. Augustinus l. 22. de Civitate c. 8. narrat plurima miracula, quæ coram numerosa multitudine ad cultum & invocationem S. Stephani Protomartyris sunt facta.

### Solvuntur objectiones.

183

Objic. 1. Non licet invocare, nisi in quem credimus, juxta illud ad Rom. 10. v. 14. : *quomodo ergo invocabunt, in quem non crediderunt* : atqui in quem credimus, Deus est ; *Credo in Deum* : ergo solum Deum licet invocare.

R. 1. ex hoc argumento sequitur nimium, probat enim non licere invocare Sanctos in hac vita existentes.

R. 2. D. M. in quem credimus fide ipsi conveniente c. M. fide non conveniente n. M. fides, qua creditur Deus esse bonorum omnium Dominus & supremus Largitor, soli Deo convenit ; fides vero, qua Sancti creduntur aliquid apud Deum posse, creaturis potest tribui juxta illud ad Philemon. v. 4. & 5. : *Gratias ago Deo meo - - audiens charitatem tuam & fidem, quam habes in Domino Jesu, & in omnes Sanctos.* Hæc vero fides necessaria est, non illa, ut Sanctos invocemus. Ad hæc Apo-



Apostolus ibi loquitur de invocatione Dei tanquam primi & supremi authoris bonorum: etenim ante verba illa, *quomodo invocabunt &c.*, immediate ponuntur ista: *omnis enim, qui invocaverit nomen Domini, salvus erit.* Neque vox ista invocare in Scripturis solum significat illam orationem, quæ immediate ad Deum dirigitur, ut male sibi persuadent Adversarii. Siquidem Jacob Genes. 48. v. 16. inquit: *Invocetur super eos nomen meum, nomina quoque Patrum meorum Abraham & Isaac.*

Obje. 2. Christus Matth. 6. v. 9. formam orandi præscripsit: *Sic ergo vos orabit: Pater noster, qui es in cælis &c.* Luc. 11. v. 2. ait: *cum oratis, dicite Pater &c.*, & v. 9.: *Petite, & dabitur vobis*: ergo Christus solus Deum Patrem orari voluit, non Angelos aut Sanctos.

R. 1. Hoc argumentum iterum nimium, & sic nihil probat: ut nihil dicatur de Sanctis in terra existentibus, probat solum Patrem, nec Christum, nec Spiritum sanctum esse orandum.

R. 2. Christus non prohibet, ne alios rogemus, sed ad summum indicat, Deum Solum ut supremum bonorum Largitorem esse orandum, & in hoc præcipue nostram spem esse collocandam; Sancti vero & Angeli sunt rogandi, ut amici Dei, ut intercedant pro nobis.

Obje. 3. Per invocationem Sanctorum plures mediatores junguntur Christo contra Apost. 1. Timoth. c. 2. v. 5. ibi: *unus est Mediator Dei & hominum*: ergo.

R. D. a. Junguntur plures Mediatores secundarii c. a. primarii, qui vice Christi funguntur N. a. Sancti non sunt Mediatores in sensu, in quo Christus est Mediator, nempe primarius, sed solum sunt secundarii, seu potius intercessores nomine & virtute Christi: Mediator primarius est is, qui nos dato pretio redemit, & reconciliavit Deo per merita sua a nullo alio mediatore vim habentia, & per illa sua merita Christus solus meritis est justificationem, salutem & omnia dona supernaturalia. Mediator secundarius est, qui orat pro nobis per



merita primarii Mediatoris, & in virtute gratiarum a primario Mediatore acceptarum. Ecce Moyſes adhuc vivens dicitur in Scriptura Mediator, nempe ſecundarius: nam Deut. c. 5. v. 5. ait: *Ego ſequeſter & medius fui inter Dominum, & vos in tempore illo*; & D. Paulus Galat. 3. v. 19. dicit, legem ordinatam eſſe per Angelos *in manu Mediatoris*, ſeu Moyſis.

Objic. 4. In Scripturis nullum exſtat mandatum, vel probatum exemplum invocationis Sanctorum alterius vitæ: ergo.

R. 1. N. 2. membrum, cujus falſitas patet ex probationibus. R. 2. retorq. Lutherani baptizant infantes ante uſum rationis, & plura alia faciunt, de quibus nullum exſtat in Scripturis mandatum, vel promiſſio particularis atque explicita. Multa recte fiunt, etiamſi in Scripturis non ſint mandata, ut ſervare virginitatem, omnia dare pauperibus. Inſuper etiamſi nullum exemplum exſtaret in Scripturis, ſufficerent exempla innumera piorum fidelium, & SS. Patrum. Deus etiam promiſit exaudire preces ſupplicantium ſine ulla exceptione dicens: *Petite, & accipietis*, Matth. 7.: *omnis, qui petit, accipit*.

Objic. 5. Omnis cultus Deo gratus debet eſſe juxta voluntatem Dei: ſed ſi in Scriptura S. nihil exſtat de invocatione Sanctorum, non eſt juxta voluntatem Dei: ergo.

R. 1. N. m. præter ſacram Scripturam datur etiam Verbum Dei non ſcriptum, quo manifeſtatur nobis voluntas Dei

R. 2. D. M. Debet eſſe juxta voluntatem Dei vel præcipientem, vel conſulentem, vel approbantem C. M. ſemper præcipientem N. M. S. Paulus Coloſſ. 2. v. 8. & 22. ſolum rejicit cultus ſuperſtitioſos, inanes & falſos ab hominibus contra voluntatem Dei & Chriſti excogitados. Invocationem vero Sanctorum debite factam a fidelibus Deus nullibi reprobat, ſed potius probat, ut ex probationibus noſtris liquet.

Objic. 6. Sancti nihil ſciunt de noſtris precibus in particulari: ergo. Ant. variis nihil probantibus textibus conantur evincere.

R. N. a.



R. N. a. Dum adducunt illum textum 3. Reg. 8.: *Tu nosti solus cor omnium filiorum hominum*; R. hunc sensum esse: Tu Deus solus nosti secreta cordium, ex natura tua, & intrinseca infinita perfectione, quo sensu Deus etiam dicitur solus bonus, immortalis, justus, faciens mirabilia, quæ tamen & creaturis possunt convenire, sed alio modo, scilicet non a se per essentiam & naturam, sed per participationem & communicationem ac modo limitato. Ad illum textum Eccl. 9.: *mortui nihil noverunt amplius*, respondetur, illum loqui de cognitione naturali, quam solam habent mortui etiam iusti ante adventum & descensum Christi ad inferos, utpote necdum beati; non vero illum textum intelligendum esse de cognitione supernaturali & intuitiva, quam habent Beati in celo. Itaque ordinarie & dempta revelatione spiritali tunc in limbo nihil sciebant de iis rebus, quæ gerebantur in terris, licet probabiliter etiam iis revelaverit Deus, dum per illos vivi rogabant Deum. Præter istud responsum potest ad eum textum Isa. 63.: *Abraham nescivit, & Israel ignoravit nos*, dici: Abraham & Israel non agnoscunt nos pro filiis propter peccata nostra.

Ad alias auctoritates. R. 1. Coloss. 2. v. 18. illo textu: *Nemo vos seducat volens in humilitate & religione Angelorum &c.* Paulus & Concilium Laodicenum damnant solum hæresin, & idolatriam Simonis Magi docentis quosdam Angelos, velut quosdam minores Deos esse adorandos tanquam fabricatores mundi.

R. 2. S. Chrysostr. Homil. 5. in Matth. equidem dicit: *Deus salutem nostram non tam aliis pro nobis rogantibus vult donare, quam nobis &c.* . . . nullius Patroni, nullius mediatoris precibus inflexus &c. Verum S. Chrysostr. ibi agit contra illos, qui in propria persona orare nolunt, sed præcise alienis precibus volunt juvari; subjungit enim: *Hæc dicimus, NB. non ut supplicandum esse Sanctis negemus, sed ne dormientes ipsi aliis tantummodo nostra curanda mandemus.* Præterea fatemur nos Catholici, absolute non esse necessariam invocationem Sanctorum, & posse nos immediate accedere ad Deum solum, & exaudiri, licet simus facilius & certius exaudiendi ordinarie, si Sancti nobiscum orent, quod ipsi Adversarii censere debent, invocantes eos, qui adhuc sunt in vivis. His breviter expeditis.



Objic. 7. Sancti in gloria jam receperunt omne præmium pro suis operibus, scilicet æternam gloriam: ergo ipsis nihil superest aliis impetrandum, vel elargiendum.

R. D. a. Receperunt omne præmium essentiale consistens in visione & amore beato, & inde exurgente gaudio C. a. accidentale, ad quod etiam pertinet invocari ab hominibus, & eorum preces a Deo exaudiri, imo & gloria corporis suo tempore assequenda N. a. & c.

Objic. 8. Sancti in cælo sibi ipsis nihil mereri possunt: ergo multo minus nobis.

R. N. C. Licet nunc nihil amplius Sancti mereri possint pro se, meriti tamen sunt in vita pro se, & sic aliquo modo etiam pro nobis, quatenus nempe per merita sua in vita collecta facti sunt Deo valde chari, & per consequens valde potentes in suis intercessionibus pro nobis.

Objic. 9. Catholici imitantur Ethnicos, dum aliquos Sanctos invocant pro viatoribus, alios pro febre vel alio morbo laborantibus, alios pro bobus, alios pro ovibus, quasi tanquam Dii gentilium præfiderent his creaturis: ergo.

R. N. a. Invocamus quidem Sanctos in certis necessitatibus religiose, non vero latrevtice, ut gentiles implorabant suos falsos Deos. Imploramus autem certos Sanctos in certis necessitatibus, quia vel floruerunt peculiariter aliqua virtute, vel plura in certo membro, aut certo cruciatuum genere pro Christo passi sunt, vel quia experientia docet, certos Sanctos in quibusdam necessitatibus a Deo auxilium impetrasse, quam alios, ut S. Sebastianum & S. Rochum in morbis contagiosis, S. Antonium in rebus deperditis recuperandis.

Objic. 10. Sæpe Sancti invocantur frustra: imo aliqui invocantur, qui nunquam in rerum natura exstiterunt, ut Georgius, Christophorus, Catharina, quorum Legendæ scatent fabulis: ergo.

R. Ad



R. ad 2. memb. N. a. certe protervia est A catholicorum dubitare, an sint in rerum natura, quos universalis Ecclesia colit ut Sanctos: si quorundam acta fuerint corrupta, vel apocrypha, inde non sequitur, ut ejusmodi homines non fuerint unquam, vel non sint Sancti, Ecclesia non definit veritatem historiae, sed sanctitatem hominum.

Id quoque obiter notare oportet, ex mea iusta defensione Revelationum Agredanarum pag. 641. & n. 445., quamvis ordinarie Sancti possint multa bona impetrare pro nobis orando tamen etiam per se nobis opem ferendo posse prodesse, & succurrere. Ita Lessius de jure, & just. l. 2. c. 37. & n. 29. & 31. & alii. Nam id constat primo ex officio Angelorum custodum, qui per se ipsos multa mortalibus beneficia præstant, ut Scriptura multis locis docet. Idem posse alios Sanctos post Christi mortem, Lessio certissimum est, tum quia sunt similes Angelis sapientia, charitate & potentia; tum quia Scriptura docet: *Sanctos post hanc vitam regere mortales* Apocal. 2. *qui vicerit, dabo illi potestatem super gentes, & reget eos in virga ferrea*: item *esse columnas in templo Dei*: Apocal. 3. id est sustinere Ecclesiam: *sedere cum Christo in throno*, id est, cum ipso regere orbem.



*De veneratione sanctarum Reliquiarum, & sacrarum  
imaginum.*

**J**Am dixi Articulo I. hujus dissertationis, Eunomium Arianum sæculo IV., & ad initium V. sæc. Vigilantium hæreticos damnasse cultum SS. Reliquiarum, quem sæculo XVI. secutus est



Lutherus, cui Calvinus adhæsit l. de reformandæ Ecclesiæ necessitate, & in admonitione de Reliquiis Helvetica confessio art. 8. ita habet: multo vero minus credimus Reliquias Divorum esse adorandas aut colendas. Anglicana posterior docet: *Doctrinam Romanensium in veneratione Reliquiarum esse rem futilem inaniter confictam.*

Nos autem Catholici, qui sumus in sensu opposito, ratione Reliquiarum sacrarum, non solum intelligimus corpora Sanctorum, vel eorum partes, sed etiam vestes, baculos, rosaria, & alia Sanctorum usu vel attactu sacrata, ut sunt instrumenta martyrii.

Qui sacris imaginibus bellum moverint, jam dictum est tom I. de Prolegomenis pag. 494. n. 327. & articulo I. hujus dissertationis, ubi videatur. Nunc fit.

### §. I.

#### *Deciditur primum Punctum hujus Controversiæ.*

184 **A**SSERO: Reliquiæ Sanctorum pie, licite, & utiliter coluntur. Ita Catholici contra sectarios novos & antiquos.

Prob. I. ex S. Scriptura, in qua Reliquiarum cultus laudatur & commendatur. 1. Judæi tabernaculum, Arcam, & quæ in illa erant, religioso cultu prosequabantur, nec propterea uspiam in Scriptura redarguuntur. 2. Deus ipse jubet nos honorare loca & res sanctas: sic ad Moysen dixit Exodi 3.: *Solve calceamentum de pedibus tuis, locus enim, in quo stas, terra sancta est*; Angelus ad Josue c. 5. dicebat: *Solve calceamentum de pedibus tuis, locus enim, in quo stas, sanctus est.* Psalm. 98. ait Spiritus sanctus: *adorate scabellum pedum ejus*: id est Arcam testamenti, quæ per scabellum hoc intelligitur 1. Paralip. 28. 3. Moyses ex Ægypto discedens ossa Josephi Patriarchæ honorifice secum transtulit: & cineres hujus Eccli. 49. v. 19. dicuntur prophetasse. 4. L. 4. Reg. 2. v. 8. Elifæus pallio Eliæ aquas Jordanis percussit, & sunt divisæ; sed uti pallio ad miraculum patrandum, est utique Eliæ pallio honorem & cultum exhibere. Eodem l. c. 13. v. 21. cum in Eli-

sæi



sai mortui sepulchrum projectum esset cadaver, revixit homo, & stetit erectus in pedes: ergo ipse Deus miraculo honoravit corpus defuncti Elisæi: ergo & illud, & omnia alia corpora Sanctorum etiam ab aliis hominibus religiose coli possunt, Act. 19. v. 21. multi sanantur per sudaria, & semicinctoria D. Pauli: atqui qui hujusmodi semicinctoria ægris applicabant, ea procul dubio religiose colebant, & honorabant. Matth. 9. v. 21. Mulier Hemoroissa speravit, se ex contactu fimbriæ Christi obtenturam sanitatem, quam reipsa obtinuit: ergo eam fimbriam tanquam rem sacram venerata est: ergo etiam vestis Christi, si præsens esset, religiose tanquam res sacra coli posset.

Prob. 2. Per constantem Ecclesiæ traditionem, cujus testes sunt antiqui PP. & Concilia. 1. Eusebius lib. 7. hist. c. 19. sic de cultu, quo Christiani cathedram Jacobi primi Jerosolymitani Episcopi prosequabantur, loquitur: *Jacobi cathedram ad nostra usque tempora conservatam fratres illius Ecclesiæ, jam inde a Majoribus magna prosequuntur reverentia.*

Id etiam ex Eusebio eodem l. 4. historiarum c. 15. meminisse juvat: anno Christi 163. Polycarpus Schmyrnæ martyrio affectus est: ibi Judæi Proconsuli suaserunt, ut illius ossa comburi juberet, ne forte, ut ajebant, relicto Crucifixo hunc deinceps Christiani colere inciperent, ita apud Eusebium cit. habet Ecclesia Schmyrnensis in sua de morte Polycarpi epist. Igitur jam tunc, nempe sæculo II. Judæis persuasum est & notum, Christianos religiose colere sanctorum Martyrum Reliquias: quod ex eadem relatione Schmyrnenfi apud Eusebium patet: ibi enim sic pergunt Schmyrnenfes: *Stulti, qui ignorarent, nos nec Christum unquam posse relinquere, nec alium quemquam colere, scilicet Latricæ cultu. Illum enim utpote Filium Dei adoramus: Martyres vero tanquam discipulos & imitatores Domini merito amore prosequimur ob excimiam benevolentiam, quam erga Regem & Magistrum suum declararunt.* Addit eadem Ecclesia, se tandem collegisse laudati S. Martyris ossa & cineres, opportuno tempore die festo publice colendos. 2. S. Basilius Magnus, qui obiit 378. Homil. in Psal. 115. ait: *Si quis (juxta veteris legis inhibitionem) tetigerit cadaver, immundus erit. Nunc e diverso Martyris ossa quis*



quis attigerit, ob gratiam corpori insidentem, fit quadotenus sanctificationis particeps. 3. S. Cyrillus Jerosolymitanus, qui obiit anno 386. Catechesi 18. Catechumenos praxin Ecclesiæ de honorandis Reliquiis docet. 4. S. Gregorius Nyssenus, qui obiit anno 393. oratione in Theodorum Martyrem hæc de illius Reliquiis commemorat: *Nam ipsas attingere Reliquias, quam optabile sit, norunt, quicunque sunt experti. Hi enim tanquam vivum ipsum corpus, & florens videntes osculantur, & ad oculos, ad os, ad aures, ad omnes sensus admovent. Dein Martyri, quasi integer esset & præsens, supplicant, ut pro ipsis intercedat.*

5. S. Chrysostomus, qui obiit anno 407. Homil. 40. in SS. Juventium & Maximum: *Sæpe eos invisamus, capsulam attingamus, magnaque fide Reliquias eorum contingamus, ut inde aliquam benedictionem assequamur.* Idem in oratione de S. Ignatio describit, quo cultu & honore illius Reliquias Roma Antiochiam translatas fideles fuerint profecuti. Plura adhuc pro commendando cultu SS. Reliquiarum refert Homil. 16. in epist. 2. ad Corinth. 6. S. Hieronymus, qui obiit anno 420., consuetudinem Ecclesiæ ex proposito defendit adversus Vigilantium, qui sub finem IV. sæculi eam impugnavit: sic contra illum hæreticum discurret ex recepto usu: *Male ergo facit Romanus Episcopus, qui super mortuorum hominum corpora, Petri & Pauli, secundum nos ossa veneranda, secundum te vilem pulvisculum offert Domino Sacrificium, & tumultos eorum Christi arbitratur altaria. Et non solum unius urbis, sed totius orbis errant Episcopi, qui Cauponem Vigilantium contemnentes, ingrediuntur Basilicas Martyrum.* Ex quo colligis morem totius Ecclesiæ jam sæculo IV.

7. S. Ambrosius obiit anno 397. epist. 53. refert, se Deo revelante reperisse Mediolani SS. Gervalii & Protasii corpora. 8. S. Augustinus, qui obiit anno 430. l. 9. confess. c. 7. narrat miracula, quæ in translatione corporum SS. Gervasii & Protasii Mediolani patrata sunt, quorum se oculatum testem dicit. Et pluries alias honorifice loquitur de veneratione SS. Reliquiarum, ut l. 9. de Civit. Dei c. 8. nec non l. 20. contra Faustum c. 21. & l. 22. de Civitate c. 8.



Concilia plura, ut Gangrense sub Sylvestro Papa, qui Ecclesiæ præfuit ab anno 314 usque ad annum 336. celebratum Præsidente Osio Cardinali, ejusdem Pontificis Legato Canone 20. & ultimo, anathema dicit illis, qui fidelium concursus ad Martyrum memorias vituperant. Concilium Ephesinum generale celebratum anno 431. suscepit, & probat epistolam Cælestini Papæ I., in qua Patribus sic gratulatur: *Vos Joannis Apostoli Reliquias præsentēs veneramini.* Iconoclastæ & Nicæna Synodus, Generalis VII conveniebant, Reliquiis Martyrum cultum esse deferendum. Sequentibus sæculis habita Concilia eundem morem probarunt, ut Bracarense III., ac denique Tridentinum sess. 25.

Prob. 3. ratione. Cum pium & utile sit, ut probatum est, honorare Sanctos, qui sunt amici & hæredes Dei, & in cælo cum Christo regnant, quique multum apud ipsum precibus suis valent: pium quoque & utile est honorare eorum corpora, quæ fuerunt templa Spiritus sancti, organa sanctarum animarum, & instrumenta virtutum, cum honor illis exhibitus referatur in ipsos Sanctos, quorum sunt pretiosæ exuviæ.

Objic. 1. Deus abscondit corpus Moyſis, ne illud venerentur Judæi. Deut. cap. ult. ergo Deus non vult nos venerari Reliquias.

R. N. c. Deus satis honoravit corpus Moyſis, quod Deus ipse sepeliverit, & sic docuerit corpora Sanctorum honorari posse, & ideo recte honorantur ab Ecclesia, cum nunc nullum amplius idololatriæ periculum subsit, nam corpus Moyſis, si scivissent ejus tumulum, facile adorassent tanquam idolum, exemplo Gentilium seducti, inter quos diu in Ægypto vivebant.

R. 2. D. a. abscondit &c. ne illud venerentur cultu Latræ c. a. cultu Dulæ relativæ N. a. Et licet Israelitæ Moysem facientem prodigia maxima vivum non adorarint ut Deum, quia ipse viva voce prædicabat edita miracula solius Dei virtute fieri: celiante tamen hujusmodi admiratione, Moyse mortuo, facile potuissent idololatriæ exponi: sicut exposit cultu latrevtico adorarunt æneum serpentem, cujus aspectu sanati fuerunt, & quem ob hanc causam l. 3. Reg. c. 18. ab Ezechia Rege confractum novimus.



Objic. 2. Eccli. 38. jubet Deus sepeliri corpora mortua: *Fili in mortuum produc lachrymas - - - & secundum judicium contege corpus illius*: ergo alius honor ipsis non convenit.

D. N. C. Ibi est sermo de sepultura statim post obitum, quam Catholici non negant Sanctis, eo quod corpora recens mortua tetrum exhalent fetorem, & horrore sint spectantibus: at postquam exesa, & ab omni fæditate purgata, & præterea pretiose ornata sunt, recte exponuntur hominum oculis, idque Sanctis gloriosum, & spectatoribus utile est, cum sic excitetur eorum memoria, & imitandi studium.

Objic. 3. Christus Luc. 11. v. 47. reprehendit Judæos, quod magnifica sepulchra Prophetis ædificarent, & Matth. 23. v. 29. dicit: *Væ vobis, qui ædificatis sepulchra Prophetarum, & ornatis monumenta Justorum*: ergo.

R. N. a. Christus non reprehendit Phariseos propter constructionem sepulchrorum Prophetarum, sed partim propter hypocrisin, quia isto cultu externo contenti internas animæ virtutes negligebant, partim & quidem principaliter propter eorum crudeles mores, quia non Prophetas, quorum sepulchra recte ornabant, sed potius Patres suos Prophetarum occisores imitabantur; infidias struendo vitæ Christi, & Sanctorum.

Objic. 4. Concilium Eliberitanum, seu Illiberitanum Sæculo III. habitum Can. 34. prohibet, ne cerei per diem in cæmeteriis accendantur, quia, ait, *Spiritus Sanctorum non sunt inquietandi*. ergo cultum sanctorum corporum prohibere videtur.

R. N. C. Canon ille non cæremonias cultus divini aut Sanctorum, sed necromantiæ impietatem, & divinationis præstigias vetat, quibus utebantur multi, qui ex schola Simonis Magi, discipulorumque ipsius Basilidis, Menandri, Saturnini prodierunt: unde etiam intra Hispaniam, in qua hoc Concilium est habitum, emerfit Priscilianistarum viperea propago incantationibus & divinationibus addicta. Hujusmodi sacrilegi nebulones conabantur curiose mortuos evocare per tenebriones dæmones, quorum in-

voca-



vocatione suadebant mortuos evocari, atque ab his quasi ab oraculis abditissima secreta, & futura posse addisci.

Objic. 5. Tribus primis Christianæ Religionis Sæculis non fuit in usu Reliquiarum cultus: ergo.

R. N. a. Cujus falsitas patet ex probationibus; fuit quidem occultatus hic cultus Ethnicis per Christianos primos, ne scilicet ex iis male intellectis arriperent occasionem fideles infimulandæ superstitionis. De reliquo longe distabat hæc Christianorum praxis a Gentilium usu: isti enim adorationem Latriæ hominibus mortuis deferebant, eorumque Spiritus mortuorum sepulchra circuire fingeant: Illi e diverso SS. Martyrum Reliquiis, quorum Spiritus jam in cælis regnarent, religiosum quidem cultum, sed Latria longe inferiorem exhibebant.

Objic. 6. Reliquiarum cultus expositus est periculo falsi cultus: nam pro Reliquiis Sanctorum (ut fieri potest) sæpe exponuntur ossa improborum hominum, latronum &c. ergo.

R. 1. N. a. Hoc enim falsum videtur de Reliquiis, quæ publice cum legitima approbatione exponuntur; semper enim Ecclesia diligenter cavit, ne Reliquiæ sine sufficiente examine & approbatione exponerentur fidelium venerationi, ut ex Concil. Trid. sess. 25. constat.

R. 2. Transf. a. N. c. & prius retorq. plurimæ fraudes contigerunt, & adhuc contingere possunt circa natales filiorum, ita, ut multi ex adulterino coitu nati supponantur a matribus, qui postea honorantur, & succedunt tanquam legitimi: ergo nullus prædicans Acatholicus honorari debet tanquam proles legitima, quia certum non est, an non sit spurius: Ita argumentatur excellens Controversista. Hinc etiam aliquoties quædam falsæ Reliquiæ fuerint supposititiæ, & absolute adhuc esse possint vel ex malitia, vel ignorantia hominum, inde tamen male infertur, omnes Reliquias debere esse suspectas, & sic veneratione privandas.







Confirm. Judæi ad pronuntiandum Dei nomen externa signa venerationis exhibebant: Paulus quoque monet Philipp. 2. v. 10. ut quisquis audito JESU Nomine genua flectat. Hoc autem ideo fecerunt Judæi ad pronunciationem Nominis Dei, & nunc faciunt Christiani ex jussu D. Pauli, dum audiunt Nomen JESU, quia Dei & JESU Nomina, sunt Dei & JESU imagines, non quidem permanentes, ut sunt figuræ tabulis depictæ, sed transeuntes: ergo pius & licitus est, ac ab idololatria alienus est religiosus imaginum cultus.

Prob. 2. Ex Ecclesiæ traditione & usu antiquissimo, quia Ecclesia in libertatem vindicata, & cessantibus persecutionibus cæpit esse communis, hoc est a Sæculo IV. usque ad præsens tempus, licet prius tam frequens non fuerit.

1. S. Basilius, qui obiit anno 378. Oratione S. in Barlaam Martyrem ait, gaudere se, quod pictores felicius penicillo suo, quam ipse oratione manum Martyris pro Christo exultam expresserint. Atque in epist. ad Julianum Apostatam scribit: *characteres* imaginum eorum (Apostolorum & Martyrum) honoro, adoro, & præcipue cum hoc traditum a SS. Apostolis, & non prohibitum sit.

2. Prioris frater Gregorius Nyssenus (obiit 393.) oratione de Filii & Spiritus S. Divinitate, dicit se moveri ad lachrymas, dum conspicit Isaac in pictura stantem sub gladio Patris. Oratione in S. Theodorum laudat pictorem, qui labores S. Martyris oculis exhibet, *solet enim, inquit, pictura tacens in pariete loqui, maximeque prodesse.*

3. Eusebius Cæsariensis l. 7. hist. c. 18. testatur se vidisse statuam Christi, quam mulier a profluvio sanguinis per ipsum liberata, ut Evangelium refert, in memoriam accepti beneficii erexit: addit Philostarchius historiam suam continuans usque ad initium Sæculi V., licet Arianus Eunomianus l. 7. hist. c. 3. *Herbam ad pedes hujus statuæ enatam adversus morbos omnes, præcipue adversus tabem efficacissimum fuisse remedium, statuam vero fuisse in templum translata, ubi ei competens observantia deferre-*



batur, & quam spectandi causa multi adventarent, amorem ipsius Archetypi declarantes. Eam postmodum regente Juliano Apostata, gentiliū furore per urbem circumligatis ad pedes funibus, tractam fuisse, Christianis summe dolentibus. Idem Eusebius l. 3. Constantini memorat, in templis a Constantino in Palæstina exstructis multam fuisse imaginum aurearum & argentearum copiam.

4. S. Chrysoſt. qui obiit anno 407. Homil. 45. ad populum, testatur, neminem esse, qui non ambivit S. Meletii imaginem. 5. Theodoretus, qui obiit anno 460. in historia religiosa refert, effigiem S. Simeonis Stilitæ ubique haberi ad præsidium. Et transmissis pluribus aliis testimoniis adduco S. Gregorium Magnum l. 9. inductione 2. epist. 52., qui mittens ad Secundinum imaginem Christi, quam ille petierat, ita scribit: *Scio, quod imaginem Salvatoris nostri non ideo petis, ut quasi Deum colas, sed ob recordationem Filii Dei, in ejus amore recalcas, cujus tu imaginem videre desideras. Es nos quidem, non quasi ante divinitatem ante illam prosternimur, sed illum adoramus, qui per imaginem aut natum, aut passum, sed & in throno sedentem recordamur.*

Confirm. hæc probatio ex ipsis decretis Conciliorum generalium VII., & VIII., Concilium Nicænum II. seu VII. generale expresse contra Iconomachos pro cultu imaginum anno 787. convocatum actione 7. in definitione fidei sic enunciat: sequentes divinitus inspiratum sanctorum Patrum nostrorum Magisterium, & Catholicæ traditionem Ecclesiæ (nam Spiritus sancti hanc esse novimus, qui nimirum in ipsa inhabitat) definimus in omni certitudine, & diligentia, sicut figuram pretiosæ, ac vivificæ crucis, ita venerabiles & sanctas imagines proponendas, tam quæ de coloribus & tessellis, quam quæ ex alia materia congruenter in sanctis Dei Ecclesiis, & sacris vasis & vestibus, & in parietibus ac tabulis, domibus & viis: tam videlicet imaginem Domini Dei, & Salvatoris nostri Jesu Christi, quam intemeratæ Dominae nostræ sanctæ Dei Genitricis, honorabiliumque Angelorum, & omnium Sanctorum, simul & aliorum Virorum. Quanto enim frequentius per imaginalem formationem videntur, tanto qui eas contemplantur, alacrius eriguntur, ad primitivorum earum memoriam, & desiderium, &  
his



his osculum & honorariam adorationem tribuendam, non tamen ad veram Latriam, quæ secundum fidem est, quæque solam naturam divinam decet, impertiendam - - - imaginis enim honor ad primitivum transit, & qui adorat imaginem, adorat in ea depicti subsistentiam.

Concilium Constantinopolitanum IV. Oecumenicum VIII. anno 869. habitum act. 10. Can. 3. cultum imaginum his verbis decernit: sacram Domini nostri effigiem eadem qua sancta Evangelia veneratione colendam statuimus; ut enim per syllabas in Evangelio scriptas salutem consequuntur omnes, ita per imagines arte coloribusque pictas, & expressas docti juxta ac indocti ex objecta re utilitatem capiunt; quæcunque enim in syllabis oratio, hæc in coloribus pictura docet & repræsentat. Ergo, quicumque Christi Salvatoris imaginem non adorat, is in secundo Christi adventu non videat ipsius faciem. Eadem ratione intemeratæ Genitricis illius effigiem, sanctorumque Angelorum, quemadmodum illos sacrarum litterarum paginae describunt, ac Sanctorum omnium veneramur & colimus. Qui aliter sentiunt, anathema sunt. Tridentinum jam superius est allegatum art. 1., ibi videatur.

Prob. 3. Ratione. Inprimis negative; quia nullibi prohibetur habere & venerari imagines: non enim est prohibitum jure naturali; nam iste cultus in se & intrinsece nullam malitiam continet: siquidem in imaginibus, ut loquitur Trident. cit. non credimus, *aliquam in illis divinitatem, aut virtutem inesse*, in illis spem nullam ponimus, sed propter prototypa, quæ repræsentant, eas honoramus: per eas ad nostrum in Christum amorem & grati animi sensum propter tot beneficia, quibus nos affecit, significandum excitamur: præclara Sanctorum facta in memoriam revocamus, & ad eorum imitationem animamur. Neque cultus SS. imaginum jure positivo, saltem in novo testamento, cum nulla talis prohibitio exstet, est vetitus. 2do suadet ratione positiva: honorantur imagines Regum, & Principum, Parentum &c. & Protestantes Prædicantes suos & suarum uxorum imagines pingi & sculpi curant, quas si honorari vident, seipfos honorari existimant, si vero ignominiose tractari advertunt,



tunt, se despici arbitrantur : ergo licite quis colit imagines saltem cultu politico : ergo cum imagines Christi & Sanctorum sint sacrae propter prototypa sancta, quorum sunt repræsentativæ, dignæ sunt cultu sacro seu religioso.

186

Objic. 1. Deut. 5. v. 8. Deus expressè prohibet, ne ul-  
lum fiat sculptile : *Non facies tibi sculptile, nec similitudinem om-  
nium, quæ in calo sunt desuper, & quæ in terra deorsum, & quæ  
versantur in aquis sub terra.* Idem habetur Exodi 20. v. 4. ergo &c.

R. N. c. Solum Judæis, qui valde proclives erant ad ido-  
latriam, datum est hoc præceptum, nec tamen simpliciter, sed  
tantum ne facerent sculptile, ut adorent illud, tanquam Deum :  
etenim Deut. 5. statim additur : *non adorabis ea, neque coles, &  
Exodi 20. : non facietis Deos argenteos, & sicut in primo præ-  
cepto Decalogi per verba, non habebis Deos alienos, prohibetur  
actus idololatriæ internus, ita per verba : non facies tibi sculpti-  
le, vetatur idololatria externa, ubi itaque periculum idololatriæ  
non est, fieri possunt imagines, & poni etiam in templis. Si  
Judæi non habuerint in templo imagines, & verum sit testimo-  
nium Josephi id affirmantis, credendum est, fuisse legem cære-  
monialem, quæ post Christi adventum abrogata est : vel dic,  
legem illam positivam ad tempus fuisse non perpetuam ; exstant  
enim apud Judæos quoque probata imaginum exempla Arcæ,  
Cherubinarum, serpentis ænei : ea igitur lege non magis modo  
obstricti sumus, quam lege a sanguine & suffocato, quæ ad tem-  
pus tantum ab Apostolis lata fuit, non perpetuo duratura.*

Dices : Per to non adorabis saltem prohiberi cultum reli-  
giosum : ergo.

R. D. a. Cultum religiosum Latriæ ultimato sistentem in  
immagine, quo modo colebant Ægypti, inter quos vivebant Ju-  
dæi ad eorum imitationem valde proclives c. a. aliud dicentem,  
& quidem pro semper N. a.

Objic. 2. Concilium Elibertanum Can. 36. ait : *Placuit pi-  
cturas in Ecclesia esse non debere, ne quod colitur, & adoratur, in  
parietibus depingatur :* ergo. Ad hanc objectionem varie respon-  
dent



dent nostri apud Cartier cit. Ego breviter dico, Concilium istud voluisse tantum consulere imaginibus, ne scilicet irreverentia illis fiat, vel a crusta decidente, vel a Gentilibus Christianos tunc persequentibus. Cæterum pro diversitate temporum primorum varia Ecclesiæ disciplina circa usum & cultum imaginum erat: verum jam prima ætate Ecclesiæ viguisse usum SS. imaginum, patet ex nostris probationibus.

Objic. 3. Concil. Francofortense damnavit Concilium generale VII., & cultum sacrarum imaginum in eo definitum: ergo.

R. N. C. Concilium Francofortense non est approbatum quoad ea, quæ statuit contra imagines sacras. Dein vel non damnavit Synodum VII., in qua definitus est cultus SS. imaginum, sed aliam sub Leone Isaurico, quam Græci subin VII. appellant, vel si damnavit legitimam Synodum, id fecit non errore juris sed facti, quia falso existimabant Patres Concilii Francofortensis in illa Synodo decretam fuisse imaginibus adorationem Latriæ, vel omnino fuit Concilium Francofortense corruptum a sectariis, ut docet Tannerus.

Objic. 4. Libri Carolini, seu opus sub Caroli Magni nomine in 4. libros distinctum, & contra definitionem Concilii II. Nicæni, seu VII. Oecumenici emanatum, quorum selecta capita ipse Carolus Magnus misit ad Adrianum primum Papam, condemnant cultum SS. imaginum: ergo.

R. D. a. Et hi libri, ac similes, cum contineant errorem ab Ecclesia damnatum, omnino sunt rejiciendi C. a. secus N. a.

Ipse quoque Adrianus I. cui, ut dicti libri loquuntur, Carolus omnia in iis contenta subjecerat, suo iudicio eosdem libros reprobavit. Adhæc credibilis illi libri conficti sunt, nec Caroli Magni jussu, sed ab ignoto quodam authore & deceptore exarati.

Ad alias objectiones retundendas nota 1. Catholicos non colere imagines tanquam idola, qualia sunt falsi numinis imagines, vel quæ cum Deus non sint, coluntur ut Deus, quod long.



ge abest a Catholicis. 2. Adolere thus, accendere lumen &c. coram imagine, non sunt signa per se ex usu determinata ad Latriam, sed sunt indifferentia ad Latriam & Duliam, & determinantur ex intentione illius, qui similia exhibet. 3. Duo Concilia Constantinopoli coacta, unum sub Leone Isaurico anno 726., alterum sub Constantino Copronymo anno 754. fuisse duo conciliabula merito refutata. 4. SS. PP. non improbare cultum sacrarum imaginum debite & juxta consuetudinem Ecclesiæ exhibitum, sed tantum illum, qui fiebat more Gentilium adorantium sua simulacra &c. &c.

## ARTICULUS V.

**Q**UAMVIS plura de dotibus & prærogativis B. V. Mariæ nunquam satis dilaudandæ jam per decursum Tomi III. & IV. dicta sint, tamen videntur remansisse aliqua adhuc dicenda, de duplici certe prima prærogativa B. Virginis: nempe de ejus Maternitate divina, & perpetua virginitate, quarum utraque ab hæreticis fuit allatrata. Incipio a prima, utpote quæ in B. Virgine fuit omnium gratiarum fons & origo, quia nempe fuit ab æterno prædestinata & electa in Matrem Filii divini, ideo tot, tantisque gratiis & privilegiis extraordinariis præ aliis omnibus puris hominibus fuit exornata. Itaque sit.

§. I.

### *An B. Virgo Maria sit Deipara?*

**187** ASSERO & Rdeo affirmative contra Nestorium, qui quia negavit Christum Deum, negavit quoque B. Virginem esse Deiparam.

Prob. I. ex S. Script. Lucæ 1. dicitur: *Quod nascetur ex te Sanctum, vocabitur Filius Dei*, inquit Angelus ad Mariam, & ibidem Elisabeth ad illam: *unde hoc mihi, ut veniat Mater Domini ad me?* ad Rom. 1. Paulus de Filio Dei sic ait: *qui factus est ei ex semine David secundum carnem*, ad Galat. 4.: *misit Deus Fi-*



*Filius suum factum* (Græcus textus habet) *genitum ex muliere.*  
Proinde Maria est Genitrix Christi, qui est Filius Dei, sed Filius Dei est Deus: ergo & Genitrix illius est Genitrix Dei.

Prob. 2. Ex Symbolis, & Conciliis. 1. Symbolum Apostolorum, Nicænum, & S. Athanasii, Filium Dei natum, & Incarnatum ex Maria Virgine enunciant: ergo. 2. In Concilio Ephesino B. Virgo Deipara, seu Theotocos dicitur, & error contrarius damnatur. 3. Idem definitur in Calcedonenſi Concilio, ubi Theodoretus, & Ibas adiguntur condemnare errorem contrarium. 4. Idipſum definit V. Concilium generale, quod anathemate percussit afferentes, B. Virginem non esse Deiparam, & Concilium Calcedonenſe hanc non agnoviſſe veritatem: sic loquitur Can. 6.: *Si quis abusive & non vere Dei Genitricem dicit sanctam, gloriosam semper Virginem Mariam, vel secundum relationem, quasi homine puro nato, sed non Deo Verbo Incarnato, & nato ex ipsa --- & calumniatur Calcedonenſem synodum, tanquam secundum istum impium intellectum, quem Theodoretus excommunicandus adinvenit, Dei Genitricem dicentem, vel qui hominis Genitricem vocat, anathema sit: ergo.*

Prob. 3. Ex Traditione PP. constanti; paucos tantum refero ex antiquioribus Sæculis. Ex Sæculo I. S. Ignatius ad Trallianos ita pronunciat: *Vere Maria genuit corpus, quod habitantem in se Deum habet: hoc vere genitum est Verbum de Virgine, indutum corpore, iisdem nobiscum affectibus obnoxio.* Si autem Verbum est genitum de Virgine, Virgo est vere Genitrix Verbi, seu Dei. Sæculo II. S. Irenæus l. 2. c. 32. aperte asseruit Christum, qui est Deus, natum esse ex Virgine.

Sæculo III. Tertullianus L. de carne Christi c. 19. veritati isti subscribit inter alia dicens: *Paulus Grammaticis istis (id est hæreticis contrariis) silentium imponit: misit, inquit, Deus Filium suum factum ex muliere.*

Sæculo IV. S. Basilus Homil. 25. de humana Christi generatione vocat B. Virginem Theotocon, id est, Deiparam. Idem facit S. Gregorius Nazianzenus oratione 35. pagina 564. Idipſum



psum clare adstruit epist. 1. ad Cledonium. Eodem saeculo idem docet S. Ephrem apud Photium Codice 228. pag. 407., S. Chrysostomus Homil. 11. in Joannem.

Saeculo V. S. Cyrillus Alexandrinus anathematismo primo decidit his verbis: *Si quis non confitetur Emmanuelem verum Deum esse, & ob id sanctam Virginem Deiparam; genuit enim illa Incarnatum Dei Verbum secundum carnem: anathema sit.* Similia ex posterioribus saeculis copiose suppeditantur testimonia, quae tamen brevitatis ergo taceo, cum ista ex primis adducta abunde sufficiant.

Prob. 4. Ratione theologica 1. Beatissima Virgo est vera Mater Christi; sed Christus est Deus: ergo est vera Mater Dei.

Confirm. B. Virgo est vera Mater Christi, sicut aliae Matres sunt suorum filiorum, imo plus, quia totam dedit sacramentissimam materiam pro formatione sanctissimae Humanitatis, quod aliae matres, cum quibus Vir concurrit, non faciunt; sed aliae matres sunt vere tales respectu suorum filiorum: ergo a fortiori B. Virgo talis est.

Haec ratio plurimum dilucidatur a S. Cyrillo, qui in epist. ad Monachos, quae legitur in Concilio Ephes., sic loquitur: „Et si mulieres istae non nisi terrenorum sint corporum matres, nihilominus cum totum animal pepererint, ex anima & corpore compositum, non solum ejus partem peperisse dicuntur. Nec aliquis dixerit, exempli causa, Elisabetham Matrem Joannis, carnis esse Genitricem, non autem animae; peperit enim animatum Baptistam; ac si tanquam unum aliquid ex duobus, hominem, anima videlicet ac corpore. Hujusmodi quippiam actum esse fatebimur & in Emmanuelis generatione; quippe natum est, ut dixi, ex Dei Patris substantia unigenitum ipsius Verbum; cum autem carnem suscepit, eamque propriam sibi fecit, ut Filius hominis esset, ac similis nostri fieret; tunc minime est absurdum dictu, imo necessario profitendum, illum ex muliere secundum carnem esse genitum: quemadmodum & hominis anima una cum proprio corpore „ gigni-



„ gignitur, & unum cum eo reputatur, tametsi natura intelli-  
gatur, & sit ab eo diversa secundum propriam rationem. „

Solvuntur Objectiones.

Objic. 1. B. V. Maria in Scriptura nullibi vocatur Ma-  
ter Dei : ergo non est. 188

R. D. a. nullibi vocatur mater Dei verbis explicitis C. a.  
verbis æquivalentibus N. a. vide probationem primam ex S. Scri-  
ptura.

Objic. 2. Joseph dicitur in S. Scriptura Pater Christi ; &  
tamen non est vere Pater Christi : ergo a fortiori non est B.  
Virgo vere Mater Christi.

R. N. C. & parit. Nam S. Joseph solum dicebatur Luc.  
3. : Pater Christi secundum existimationem hominum ; sic  
enim dicitur de Christo : *putabatur filius Joseph* : imo S. Scri-  
ptura expresse negat B. Josephum fuisse Christi Patrem, juxta illud  
Matth. 1. : *antequam convenirent, inventa est in utero habens de Spi-  
ritu sancto*. Ex opposito B. V. dicitur ipsum peperisse : sic enim so-  
nat textus : *quod enim ex te nascetur Sanctum, vocabitur Filius Dei*.

Objic. 3. B. V. Maria non genuit divinitatem Christi :  
ergo non est Deipara.

R. N. C. Licet nulla mater generet animam rationalem,  
utpote quæ a solo Deo creatur, quæ pars est humanitatis præ-  
cipua, tamen est Mater totius humanitatis, quia nempe gene-  
rat corpus animatum : ergo etiam, quia B. Virgo generavit Hu-  
manitatem Verbo hypostatice unitam, simul etiam genuit Ver-  
bum Incarnatum, quia Verbum, cum humanam naturam as-  
sumpsit, eam ut propriam suscepit, & propria Personalitate su-  
stentavit, & alias actiones & passiones, ac productiones acti-  
væ & passivæ sunt suppositi.

Objic. 4. Si B. V. vere genuisset, & vera esset Mater Filii di-  
vini, deberet ei esse consubstantialis ; sed hoc est contra fidem :  
ergo.



R. D. M. deberet ei esse consubstantialis, si vere genuisset, & esse per generationem dedisset Filio Dei secundum naturam divinam C. M. si tantum eum genuit secundum naturam humanam hypostatice unitam Verbo divino, eam personalizanti N. M. consubstantialis B. V. est ut Homo solum Filio divino, qua homini & Incarnato.

Objic. 5. Hebr. 7. Melchisedech assimilatur Filio Dei, in eo, quod sit sine Patre & Matre & genealogia, sed assimilatio nulla erit, si Christus habet Matrem: ergo non habet.

R. 1. D. M. assimilatur secundum Sacerdotium Christo, quod erat figurative in Melchisedech æternum, & ideo non refertur ipsius genealogia, ut veluti sine initio & sine appareat C. M. secundum nativitatem N. M. Responsio est ex textu D. Pauli, qui cum dixit, Melchisedech esse sine Patre & Matre subdit v. 3. : *assimilatus autem Filio Dei, manet Sacerdos in æternum.*

R. 2. D. M. Melchisedech est sine Patre & Matre apparen-  
ter, quia non refertur ipsius genealogia C. M. vere N. M.

Quæres hic incidenter, an Nestorius vindicari possit ab hæresi circa Dominicam Incarnationem.

R. Attentavit hanc vindicationem anno 1645, quispiam Anonymus, qui, ut plures existimant, creditur Albertinus Minister Calvinista: sunt & plures Novatores, qui eundem impiissimum hæreticum excusare volunt. Sed frustra agunt, & certe æthiopem lavant: quam rem solidissime & vere erudite pro more suo dilucidat in Theologia Patrum Tom. 5. Tract. de Incarnatione Antonius Boucat dissertatione tertia sect. 2. pag. mihi 385. Ex ea satis est desumere synopsin, quam addit ad calcem pag. 391., ubi ita recapitulat præcedenter late dicta: - - - Nestorius negavit unionem hypostaticam.

Primo: hoc claret ex ejus ad B. Cyrillum epistola, in qua Christum non Deum, sed solum Divinitatis templum appellat: hoc, ex libello accusationis: hoc ex anathematismis, quos opposuit



fuit B. Cyrilli capitulis, quæ fidem Dominicæ incarnationis explanabant.

Secundo: Hoc utique annuntiat Cælestini I. SS. Pontificis adversus eum lata sententia, nec non & altera Concilii Ephesini adversus eundem pronunciata.

Tertio: Idem testatur S. Leo epist. 134. nov. edit. Sic Theodoretus lib. 4. hæc. fab., sic Evagrius lib. 1. Hist. Eccl. cap. 1. & alii.

§. II.

*An B. V. Maria semper fuerit Virgo?*

Virginitas B. Dei Genitricis ante, in, & post partum spectata suos habuit Adversarios. Statim I. Ecclesiæ Sæculo Cerinthus, Ebion, & Carpocrates asseruerunt, B. Virginem ex S. Josepho Christum concepisse. Ita testantur S. Irenæus l. 1. c. 15. Tertullianus l. de præscriptionibus c. 48. & lib. de carne Christi c. 28. 189

Sæculo autem IV. Jovinianus docuit, Matrem Dei, licet in conceptione Virgo permanferit, in partu Virginitatem amisisse, Jovinianum præcesserunt Tertullianus libr. de carne Christi c. 23., & Origenes Homil. 4. in Lucam. Durandus licet in partu Genitricem Dei Virginem profiteatur, tamen ejus integritatem quodammodo conatur labefactare; nam cum corporum penetrationem non putet possibilem, vult a Matre Dei Christum esse genitum partium dilatatione absque fractura aut divisione, quam opinionem amplectuntur Calvinistæ ea ratione ducti, qua negant possibile esse, in Evcharistia existere Christum sine partium extensione locali.

Ipso sæculo IV. Helvidius adstruxit, S. Mariam post Christi Nativitatem ex S. Josepho filios suscepisse, ut testis est S. Hieronymus l. contra illum hæreticum, ubi facit eum authorem Antidicomarianitarum, seu Mariæ Adversariorum, quamquam Origenes Homil. 7. in Lucam, & S. Hilarius c. 1. in Matth. Helvidio antiquiores jam hujus hæresis meminerint Olim extinctum Helvidii errorem plures ex Novatoribus fuscitarunt, teste Canisio l. 2. de B. V. Maria,



VIII. Tandem Sæculo fuere, de potentia Dei diffidentes, ac ideo existimantes, corpus Christi nisi rupto Virginitatis claustro in lucem exire non potuisse; unde commentum sunt, illud ex latere Virginis prodiisse, quos refellit S. Joannes Damascenus l. 4. c. 15., Contra hos omnes stat invicta Catholica Veritas Concilii VI. Generalis Act. 11. his verbis propositis: *Mariæ Virginitas ante partum, in partu, & post partum intemerabilis*, quod amplius tribus distinctis assertionibus declarabitur, ut probabitur. Itaque.

190

Afferro I. B. Dei Genitrix fuit Virgo ante partum.

Prob. I. ex S. Scriptura, Lucæ I. v. 34. & 45.: *quomodo fiet istud, quoniam virum non agnosco - - Spiritus sanctus superveniet in te, & virtus altissimi obumbrabit tibi*: ergo non cognito viro, sed de Spiritu sancto B. Virgo Christum concepit: ulterius Matth. I. v. 20.: *quod in ea (B. Virgine) natum est, de Spiritu sancto est. Hoc autem (subdit Matthæus v. 22.) totum factum est, ut adimpleretur, quod dictum est a Domino per Prophetam (nimirum Isaiam c. 7. v. 14.) dicentem: Ecce Virgo in utero habebit, & pariet Filium, & vocabunt nomen ejus Emmanuel, quod est interpretatum nobiscum Deus.* Accedit illud Matth. I. v. 18.: *antequam convenirent (Maria & Joseph) inventa est in utero habens de Spiritu S.*

Prob. 2. Ex Symbolis - - Apostolico, in quo Christus dicitur natus ex *Maria Virgine*, & Constantinopolitano ac Nicæno, in quo dicitur: *& Incarnatus est de Spiritu sancto ex Maria Virgine*: adde Concilium generale VI. Act. 11. jam supra relat.

Prob. 3. ex constanti traditione PP., qui contra errorem scripserunt, ut S. Irenæus, Tertullianus, Origenes, SS. Ambrosius, Leo, Augustinus, Hieronymus, & alii. S. Gregorius Magnus l. 10. moralium c. 52. alias 36. inquit: Spiritu sancto adveniente, mox Verbum in utero, mox intra *uterum* Verbum caro, apud Gallum Cartier Tom. 2. Tract. 3. de Incarnatione n. 166. afferuntur plures rationes & congruentiæ hujus veritatis ex SS. PP., S. Ignatio Episcopo ad Ephesios, S. Justino Dialogo cum Triphone, Irenæo lib. 3. contra Valent. c. 26. & 27., Tertulliano libro de carne Christi c. 17., Lactantio l. 4. instit.

Asse-



Affero 2. Sanctissima Dei Genitrix fuit, & mansit Virgo 191  
in partu.

Prob. 1. ex S. Scriptura Isaïas c. 6. v. 14. (quem textum S. Matthæus in assertione prima laudatus de B. Virgine intelligit) ait: *Ecce Virgo concipiet, & NB. pariet filium: ergo Virgo concepit, & peperit.* Dein Lucæ 1. Maria dicens ad Angelum: *quomodo fiet istud, quoniam virum non cognosco?* aperte indicat firmum propositum Virginitatis semper custodiendæ: & Angelus ibi declarat, quomodo conceptura sit, & paritura salva Virginitate: Angelus dixit ei: *Spiritus sanctus superveniet in te, & virtus Altissimi obumbrabit tibi, ideoque & quod nascetur ex te Sanctum, vocabitur Filius Dei,* ubi ostendit, omnia hæc supernaturaliter a Deo, cui nihil est impossibile, complenda esse. S. Hieronymus in Commentario in citatum textum Isaïæ rem istam more suo præclare illustrat, ita pronuncians: *Dominus virtutum ipse est Rex gloriæ, Ipse descendet in uterum virginalem, & ingreditur, & egredietur orientalem portam, quæ semper est clausa, de qua Gabriel dicit: Spiritus S. veniet super te, & virtus Altissimi obumbrabit tibi: propterea quod ex te nascetur Sanctum, vocabitur Filius Dei - - -* Ecce semper clausam dicit, hoc est, Virginem.

Prob. 2. Hæc veritas ex Symbolis in assertione prima allegatis, & ex communi sensu Ecclesiæ, quæ semper pro hæreticis habuit, qui denegarunt B. Virgini perpetuam Virginitatem.

Prob. 3. Ex unanimi sensu SS. Patrum: paucos adduco: S. Epiphanius hæresi 78. ait: *Quis unquam, aut quo Sæculo ausus est proferre Mariæ nomen, & interrogatus non statim intulit Virginis vocem, ex ipsis enim nominibus etiam Virginitatis signa elucent.*

S. Joannes Damascenus l. 4. fidei 15. inquit: *Quemadmodum, qui conceptus est, Virginem concipientem servavit illæsam, sic & natus ipsius Virginitatem servavit illæsam. Solus transivit per eam, & clausam servavit. Manet igitur post partum & semper Virgo.*

S. Ambrosius l. de instit. Virginis c. 7. in illa verba Ezechielis 44.: *Porta hæc clausa erit &c.,* ait: quæ est hæc porta, *P. Kick Theol. Tom. IV.* T t ta,



ta, nisi Maria? ideo clausa, quia Virgo: Porta igitur Maria, per quam Christus intravit in hunc mundum, quando virginali fufus est partu, & genitalia virginitatis claustra non solvit. Mansit intemeratum claustrum pudoris, & inviolata integritatis duravere signacula, cum exiret ex Virgine, cujus altitudinem mundus sustinere non potest.

S. August. epist. 3. ad Volusianum alias, 137. sic ad rem nostram dicit: *Ipsa virtus divina* per inviolata Matris virginæ viscera membra infantis eduxit, quæ postea per clausa ostia membra juvenis introduxit, quæ verba etiam usurpat Concilium Tolletanum II.

S. Chrysost. Homil. 2. in symbolum inquit: *Credimus in Dominum nostrum Jesum Christum, natum de Spiritu sancto, & Maria Virgine: sed dicturi sunt nobis Gentiles, depravantes fidem vestram; quomodo potuit Virgo concipere, Virgo parere, Virgoque permanere?* contra naturam est hoc, dicturi sunt verbis, & vos econtra respondebitis eis: credulitas nostra, quod verbis explicare non potest, fide tenet.

192

Affero 3. Sanctissima Dei Genitrix etiam Virgo permansit post partum, seu fuit semper Virgo.

Probatur hæc veritas fere plerisque in præcedentibus duabus assertionibus allatis argumentis. Præterea Concil. Calcedonense in allocutione ad Imperatorem asseverat: *Virginitatem B. Mariæ a Christo servatam esse etiam post partum, utrumque ejus fuisse integritate obsignatum, ut nullius injuriæ pateret.* Accedit communis sensus Ecclesiæ contrariam doctrinam semper ut hæreticam rejicientis. S. Hieronymus ex professo contra Helvidium ostendit, Mariam perpetuo & constanter Virginem permansisse: inter alia sic loquitur: *Natum esse Deum de Virgine credimus, quia legimus, Mariam nupsisse post partum non credimus, quia non legimus: Videantur jam prius dicta hujus S. Doctoris in cap. 44. Ezechielis v. 2., ubi expresse etiam de B. Virgine asserit: quæ ante partum & post partum Virgo permansit.*

S. Ambrosius lib. de just. Virg. c. 6: *fieri non poterat,*



ut Joseph Vir Justus in hanc prorupisset amentiam, ut Matri Domini corporeo coitu misceretur.

S. Augustinus in Joannem Tract. 10.: Num Maria iterum peperit? absit: inde caput dignitas Virginum. Illa femina Mater esse potuit, mulier esse non potuit.

Etiam audiri meretur D. Thomas p. 3. q. 28. art. 1. 2. 3., ibi vide Zambaldi Tract. 6. fol. 298. „ Respondeo dicendum, quod absque omni dubio detestandus est error Helvidii, qui dicere praesumpsit, Matrem Christi post partum a Joseph esse carnaliter cognitam, & alios filios genuisse. Hoc enim primo derogat Christi perfectioni, qui secundum divinam naturam Unigenitus est Patris, tanquam perfectus per omnia Filius ejus: ita decuit, ut esset Unigenitus Matris, tanquam perfectissimum germen ejus. Secundo. Hic error facit injuriam Spiritui Sancto, cujus Sacrarium fuit uterus Virginis, in quo carnem Christi formavit; unde non decebat, quod de caetero violaretur per commixtionem virilem. Tertio derogat dignitati, & sanctitati Matris Dei, quae ingratissima videtur, si tanto filio contenta non esset, & si virginitatem, quae miraculose in ea conservata fuerat, sponte perdere vellet per carnis concubitum. Quarto. Etiam Ipsi Joseph esset ad maximam praesumptionem imputandum, si eam, quam revelante Angelo de Spiritu sancto Deum concepisse cognoverat, polluere attentaret. Et ideo simpliciter est asserendum, quod Mater Dei sicut Virgo concepit, & Virgo peperit, ita etiam & Virgo post partum in sempiternum permansit. Haec Doctor Angelicus vere Angelice.

### Occurritur Cavillationibus Adversariorum.

Objic. 1. ex Tertulliano & Origene supra citatis, qui aliud ex B. Virgine reſerato Virginis clauſtro prodiſſe inferunt ex illo Lucae 2. v. 22., *Postquam impleti sunt dies purgationis Mariae - - - tulerunt illum in Jerusalem, ut ſiſſerent eum Domino, ſicut ſcriptum eſt in lege Domini, quia omne maſculinum adaperiens vulvam, Sanctum Domino vocabitur.* 193



R. N. illationem istam. Authoritatem Tertulliani, & Origenis, ut in aliis multis, ita & hic, parum morari debemus. Lex illa; quam S. Lucas allegat, concepta est verbis, quæ communem spectant nascendi modum, in legibus enim ferendis Legislator ad id attendit, quod communi ac consueto naturæ ordine contingit, non ad id, quod est singulare & supra ordinarium naturæ ordinem, qualis est Nativitas ex Virgine. Proinde S. Lucas hoc unum intendit, quod lex ferebat, omne masculinum primogenitum offerri Deo debere, quocumque tandem modo, seu ordinario, seu extraordinario & singulari, vel potius tantum indicatur, quod B. Virgo, licet non obligata, se tantum voluntarie & libere accomodarit legi, quæ alias fœminas ordinario modo parientes tangebatur.

Objic. 2. Cum Helvidio Matth. i. v. 18. dicitur: *Cum esset desponsata Mater ejus Maria Joseph, antequam convenirent; inventa est in utero habens de Spiritu S. : ergo postea conveniunt: id denotat particula antequam.*

R. N. c. Verba illa: *antequam convenirent*, explicari debent vel de cohabitatione domicilii, vel thori. Si primum, sensus est: antequam Maria, jam desponsata Josepho, simul cum eo habitaret in iisdem ædibus, nuptias brevi cum ipso celebratura, hoc temporis intervallo *inventa est in utero habens &c.*, huic expositioni favere videtur anxietas Josephi, qui dubitabat, an propterea Mariam in uxorem acciperet Matth. i. v. 19. Si vero de cohabitatione thori laudata verba accipiantur, dicimus cum S. Hieronymo in cap. i. Matth. Scripturam, quod factum non sit, nimirum non convenisse Mariam cum Joseph, antequam pareret Filium) declarare, non vero quid postea contigerit, cum nec quæreretur, nec esset necessarium: quæ de causa falsa & insulsa est ista sequela: antequam Maria pareret Filium, non convenit cum Joseph: ergo postea convenit. Ad propositum nostrum S. Basilius Hom. 25. de humana Christi generatione egregie ait: *donec dispensabatur Christi generatio, necessaria erat Virginitas; quid vero postea sit factum, ad mysterii hujus doctrinam non anxie conjungendum est.*



*est.* Verumtamen, nec hoc eorum, qui Christum amant, sustinere possunt aures, quod Genitrix desierit aliquando esse Virgo.

Obiect 3. Eodem cap. 1. v. 25. Matth. Joseph dicitur, non cognovisse eam (Mariam) donec peperit Filium suum Primogenitum; ergo postea eam cognovit: hunc enim sensum facere videtur particula *donec*

R. N. c. Particula donec, quod antea factum non sit, duntaxat ostendit, nec ita tempus præcedens connotat, ut futurum etiam non respiciat, sic 1. Corinth. c. 15. v. 25. ex Psal. 109. ait Apostolus: oportet illum (Christum) regnare, donec ponat inimicos sub pedibus ejus. Unde utique non sequitur, destruendum fore Regnum Christi, cum sub pedibus ejus positi fuerint ejus inimici. Item Apoc. 2. v. 25. dicitur: Id, quod habetis, tenete, donec veniam, ex quo non sequitur, quod illud, quod habent, cum venerit, debeant dimittere. Eodem modo hic discurre.

Objic. 4. Christus dicitur Mariæ Primogenitus: ergo Maria habuit adhuc alios filios post Christum natos.

R. N. c. Per Primogenitum hic indicatur ille, ante quem nullus alius est genitus juxta phrasin S. Scripturæ. Sic sapientia æterna dicitur primogenita, licet sit unigenita. Et Exodi 13. omnia primogenita jubentur Deo donari, ubi etiam certo intelliguntur unigenita, seu illa, ante quæ nullum aliud est genitum, sive postea alia sint adhuc generata, sive non.

Objic. 5. B. Dei Genitrix in S. Scriptura sæpe mulier vocatur: atqui hoc nomine significatur mulier, quæ ex concubitu viri generavit filios: ergo.

R. N. m. nomine mulieris significatur solus sexus, non conditio vel qualitas sexus. Ita Eva statim a creatione sua,



& antequam a viro suo Adam cognosceretur , mulier est dicta.

Objic. 6. Matth. 13. v. 55. plures Christo fratres assignantur : ergo.

R. N. c. Juxta morem Scripturæ consanguinei etiam fratres vocantur. Genes. 13. Abraham nepoti suo Loth dicebat: *nos fratres sumus* , & alibi.

Hic tandem concluditur Pars I. hujus Tomi ad majorem Christi Domini , Beatissimæ Virginis & Sanctorum omnium Gloriam.






P A R S I I.  
TOMI IV. THEOLOGIÆ,  
SEU  
LIBRI III. SENTENTIARUM  
TRACTANS  
DE JURE ET JUSTITIA,  
AC  
JUDICIIS PUBLICIS.



PROLOQUIUM.

 *Quamvis Tractatus hujus notitia alias Juris-Consultis maxime sit propria, ea tamen & iis, qui Sacramentum Pœnitentiæ administrant, minime est superflua, sed summe utilis, ac præprimis necessaria; tot enim Sacerdotibus pro sacro tribunali sedentibus ab iis, qui suas conscientias exonerant, proponuntur casus & dubia, materiam Juris & Justitiæ, ac restitutionis spectantia, ut munus Judicis sacri nullus secure subire possit, qui perfectæ hujus Tractatus scientia non sit instructus. Hanc igitur ut obtineamus, illo, qui Sol est Justitiæ, Authore, ac Auspice, omnem, quam tractabimus hac parte secunda, materiam in tres Tractatus minores secabimus: Eorum primus Juris ac Justitiæ naturam, secundus Restitutionis onus, tertius contractuum indolem examinabit.*

TRA-





# TRACTATUS I.

*De Jure, & Justitia.*

## DISSERTATIO I.

*De Natura, & Speciebus Juris.*

**J**ustitia sine prævía notitia Juris perfecte intelligi nequit; solet enim justitia in ordine ad jus definiri, ut patet ex 1. *Justitia*, ff. *de Justitia, & Jure*, ubi Justitia describitur constans, & perpetua voluntas NB. *jus suum cuique tribuendi*. Hinc, ne ignotum iterum per ignotum definiatur, & explicetur, ante definitionem Justitiæ aliqua declaratio ipsius juris præmittitur. Sit ergo.

### ARTICULUS I.

*Quid, & quotuplex sit Jus?*

**N**ota: Nomen juris varie usurpari: 1. Accipitur pro justo, seu pro quovis debito. 2. Pro scientia juris, & dicitur Juris prudentia. 3. Pro lege aliqua: sic dividitur in Jus Canonicum & civile, id est, in legem Ecclesiasticam & civilem. 4. Pro loco judicii, in quo pro tribunali Judex sedere solet: ita dicitur aliquis in jus, seu ad locum judicii vocari. 5. Pro jurisdictione, quam habet Superior, vel Princeps in subditos, & est potestas judicandi, & gubernandi subditos. 6. Sumitur pro jure *proprietas*, quod est aliqua facultas, & potestas in aliquam rem ut suam, vel ut sibi debitam. Huic facultati, quæ dicitur *jus activum*, respondet in aliis debitum aliquod non impediendi alterum in usu sui juris activi: hoc autem debitum appellatur.

*P. Kick Theol. Tom. IV.*

Uu

194



pellatur *jus passivum*. Atque in hac ultima acceptatione *jus* potissimum in presenti Tractatu considerabimus; nam in hac sola postrema significatione illud a justitia commutativa respicitur. H. N. fit.

## §. I.

*Definitio Juris Proprietatis.*

195 ASSERO: *Jus Proprietatis activum est potestas legitima obligandi voluntarie alios ad actionem, vel omissionem actionis in bonum proprium. Ita quoad sensum satis Communis.*

Dicitur 1. *Potestas*: quod vocabulum in significatione propria accipi debet, prout dicit facultatem cum autoritate conjunctam; non vero in significatione impropria, seu pro mera licentia; siquidem & Fratres Minores gaudere possunt licentia utendi rebus sibi donatis, quamvis incapaces sint omnis juris proprietatis, ut ostendetur.

Dicitur 2. *Legitima*, id est, talis, quæ conformis est legibus; nam potestas illa, cui leges resistunt, potius vis, & injuria est dicenda, quam *jus*.

Dicitur 3. *obligandi alios*; nam *jus*, quod uni favet, gravat, & obligat alios, ut eum non turbent, aut impedian in usu sui juris, vel ut rem, vi juris activi debitam, tradant, non auferant, ablatam restituant, destructam reparent &c.: quodsi hoc non observent, illicite agunt, illique, cui favet *jus proprietatis*, injuriam inferunt, utpote quæ nil aliud est, quam juris alieni violatio.

Dicitur 4. *Voluntarie*, id est, ex beneplacito, & pro libitu illius, qui habet *jus*; hoc enim peculiare est juri proprietatis, quod illo quis libere, & pro libitu suo uti, aut non uti possit.

Dicitur 5. *ad actionem, vel omissionem actionis*; Jura enim proprietatis mediate quidem respiciunt res, in quas habetur *jus*: immediate tamen obligant ad ponendas actiones, & omissiones eas, quæ sunt juri activo conformes, & ad illas non ponendas, quæ juri



juri activo sunt contrariæ. Ratio hujus est: quia homo non potest agere juxta jus alterius, neque potest violare jus alterius, nisi per actiones, aut omissiones actionum: ergo primario & immediate jus proprietatis obligat ad actiones, vel ad omissiones aliquas.

Dicitur 6, *In bonum*: quod potest esse *positivum*, vel *negativum*; sicut enim *positive* alicui commodum est, usurpare suas vestes, ædes, pecunias &c., ita etiam *negative* ei bonum est, non occidi, non verberari, non spoliari suis bonis &c.

Dicitur 7. *proprium*: per hanc particulam distinguitur jus proprietatis a jure jurisdictionis; etenim jurisdictio principaliter ordinatur in bonum subditorum, non autem in bonum Principis, habentis jurisdictionem: sic a Principe, vel alio Superiore, habente potestatem jurisdictionis, non potest ferri lex aut præceptum, nisi ob bonum commune, aut subditorum. Quare Tyranni dicuntur, qui ferendo leges sua solum commoda spectant. Jus vero proprietatis obligat alios tantum in bonum proprium illius, qui habet tale jus, saltem per se, & principaliter.

Ex quibus colligis, hanc definitionem esse bonam, quia est satis clara, & simul convenit omni & soli juri proprietatis: parum autem refert, quod non omnes minutias logicas observet.

Objic. Sæpe aliquis habet jus proprietatis ad illicita, & peccaminosa: ergo jus proprietatis non est potestas legitima, seu legibus conformis; facultas enim peccandi non est legibus conformis, sed potius est contra leges. A. constat: sic vi juris proprietatis aliquis prodigus valide alienat, & dissipat sua bona, quamvis illicite, & peccaminose &c.

R. D. a. Sæpe aliquis habet jus proprietatis ad illicita, & peccaminosa ita, ut vi talis juris valide agat C. a. ut agat licite & honeste N. a. Nullum jus, neque ullæ leges approbant, aut permittunt peccatum aliquod ut licitum: permittunt tamen sæpe actum peccaminosum ut validum. Sic consecratio Sacerdotis, in peccato mortali constituti, est mala & illicita, ea tamen secundum jus divinum est valida: pariter alienatio, & dissipatio



prodiga bonorum propriorum illicita est, & tamen secundum leges valet. Hinc lex, cui jus proprietatis debet esse conforme, potest diversimode dare potestatem agendi: scilicet ut vel actum reddat simul validum, & licitum, vg. venditionem equi omni ex parte justam, vel ut reddat actum solum validum, non autem simul licitum, e. g. usum, & consumptionem prodigam bonorum propriorum. Ratio hujus est: quia valor, & licentia, seu honestas actionis sunt rationes realiter distinctae, & ab invicem separabiles, hinc potest lex & jus dare potestatem vel ad utrumque, nempe ad valorem & licentiam actus, vel ad solum valorem, non autem ad licentiam.

Dices: Si possibile est jus, & legitima facultas ad actus illicitos, tunc etiam est possibile jus ad actus injustos; sequela est falsa: ergo. m. constat: nam actus a jure procedens semper est justus. M. p. actus illiciti, ad quos faciendos aliquando habetur jus proprietatis, plerumque sunt injusti, seu contra justitiam, ut patet in Petro, qui rem aliquam jam prius venditam Paulo, sed necdum extraditam, iterum secundo vendit, ac simul tradit Antonio: ubi secunda venditio est illicita, & injusta, utpote contra jus primi emptoris, seu Pauli, & tamen est valida, ac procedit ex jure proprietatis, quod Petrus in rem suam retinet, donec illam alteri legitime tradat: ergo sequela est vera.

R. D. M. est etiam possibile jus ad actus injustos qua injustos n. M. ad actus injustos, qui sunt injusti c. M. Jus proprietatis, quod Petrus in proposito casu habet ad secundam venditionem, est tantum ad eam qua validam; atqui secunda venditio qua valida non est injusta formaliter, cum non sit contra jus aut leges, sed potius est conformis juri permittenti valorem talis actus: est autem injusta, quatenus est illicita, & quatenus est contra jus primi emptoris, seu Pauli, quod opponitur soli licentiae, non autem valori secundae venditionis.

Instabis: Hoc modo duo Jura essent contraria; nam Petrus habet jus ad secundam venditionem, & Paulus, tanquam primus emptor, habet jus contra eandem secundam venditionem: sequela iterum videtur absurda: ergo. R. N. Sequelam; nam Petrus habet tantum jus ad valorem secundae venditionis, & Pau-



Paulus habet jus adversus licentiam hujus secundæ venditionis, in quo nulla contrarietur.

Possent plura objici contra hanc descriptionem, quibus tamen non vacat immorari, ne propter ejusmodi minutias parum utile tempus præripiatur materiis longe utilioribus.

## §. II.

## Divisio Juris Proprietatis.

Jus proprietatis dividitur a quibusdam in *altum*, & *passum*. Jus proprietatis *altum*, seu *publicum* est illud, quod habet Princeps, vel Respublica in omnia bona subditorum, vi cujus, exigente necessitate publica, de illis disponere potest. Jus *passum*, & *privatum* est jus proprietatis, quod competit pluribus, seu privatis Personis, & suo modo subjectum est juri alto tanquam inferius, unde etiam *passum* dicitur. Verum missa hac divisione, quæ an bona sit, ex dicendis de justitia legali colligetur.

Affero I. Jus proprietatis dividitur in *jus in re*, & *jus ad rem*. *Jus in re*, seu *reale* est, quo ipsa res aliqua mihi est devincta, & obligata. Hoc jus reale datur tantum in ordine ad rem actu existentem, & parit *actionem realem*, seu talem, quæ exigere possum ipsam rem, ad quemcunque possessorem, etiam bonæ fidei, transeat. Proinde onus, & obligatio passiva, quæ respondet juri reali activo, moraliter inhæret ipsi rei, eamque inseparabiliter comitatur. Tale jus *reale* est, quod quis habet in mercem per emptionem, secuta traditione mercis. 197

*Jus ad rem*, seu *personale* est, quo res mihi necdum est absolute in se devincta, & obligata, nec est proprie mea, quamvis mihi debita. Hoc jus proinde potest etiam dari ad rem nondum existentem, vg. ad fructus primum nascituros. Insuper parit solam *actionem personalem*, seu in personam, ut hæc tibi procuret illam rem, ad quam habes jus. Item *Jus personale* est quasi via & medium ad acquirendum jus in re; nam si habes jus ad rem vg. tibi venditam, sed necdum traditam, tunc venditor vi tui juris personalis activi obligatur ad rem tradendam, qua tradita statim es plenus dominus ejusdem, & habes



jus in re. Ejusmodi jus personale est, quod competit alicui ad beneficium post electionem, vel praesentationem, item post collationem ante acceptationem, uti & illud, quod emptor ordinarie habet in rem emptam ante ejus traditionem; jus enim in re communiter acquirit primum facta traditione: de quo plura in Tractatu de contractibus.

Addunt aliqui tertiam speciem juris, scilicet *jus mixtum*: verum hoc nihil aliud est, quam jus in re, & ad rem simul concurrens, adeoque speciali explicatione non indiget.

Petes: An jus in re sit solum dominium? R. Quamvis omne dominium tam perfectum, quam imperfectum importet jus in re, non tamen solum dominium est tale jus reale, vel in re. Ita habet Communior apud Card. de Lugo, & Vivam p. 5. Theol. disp. 2. Art. 2. n. 12. Ratio est: quia, qui habet v.g. gemmam, pignori sibi datam, habet jus in re erga talem gemmam, cum habeat sibi obligatam, & eam actione reali possit persequi: & tamen non habet dominium talis gemmae, sed hoc dominium manet penes creditorem, qui pignori dedit: ergo non solum dominium est jus in re, sed hoc latius patet.

198

Affero 2. Jus ulterius dividi solet in *dominium perfectum*, & *imperfectum*. *Dominium perfectum* est jus perfecte disponendi de re aliqua quovis modo possibili, nisi quis lege, aut vi per accidens ab aliqua dispositione impediatur. Herincx, & quoad rem alii, secuti Bartolum. Proinde perfectus dominus potest omni possibili modo disponere de ipsa proprietate, substantia, ac emolumentis, seu fructibus rei: adeoque potest rem suam destruere, donare, vendere alteri &c., item potest fructus ex ea re percipere, perceptos consumere, donare, alienare quovis possibili modo, nisi interdum vi, aut lege aliqua ejusmodi dispositio per accidens impediatur in actu secundo. Neque per hoc, si quandoque in actu secundo libera domini usurpatio impeditur, etiam dominium & jus in actu primo tollitur, aut minuitur, sicut etiam in igne non tollitur vis combustiva in actu primo, quamvis interdum ea impediatur per accidens, ne exeat in actum secundum, & ne actu comburat v.g. stupam. Dixi: Dominus perfectus potest destruere, alienare rem &c.; an vero im-



immediate & formaliter, vel tantum præsuppositive ejusmodi destructio, & alienatio rei proveniat a Dominio perfecto formaliter, inferius decidetur.

*Dominium imperfectum* est jus imperfecte disponendi de re aliqua; qui enim habet dominium imperfectum, vel non potest disponere de substantia & proprietate, vel de fructibus rei. Quare dominium imperfectum iterum secatur in *dominium directum nudum*, & in *dominium utile*.

*Dominium directum nudum* est jus proprietatis in re, vel potius in substantia rei, non autem in fructibus ejusdem. Dicitur dominium nudum, quia est nudatum fructibus, quos res v.g. ager fert. Nihilominus hoc dominium non est absque omni spe utilitatis, saltem aliquando consequendæ; nam usus fructus, quem alius habet in ista re, cessare potest variis modis: cessante autem usufructu alterius obveniunt fructus Domino directo, ut habetur §. *ususfructus*. Instit. de usufructu. Præterea domino directo debetur honor, & obsequium personale ab eo, qui gaudet utilitate.

*Dominium utile* est jus in utilitatem rei, cujus proprietatem quoad substantiam & rem ipsam habet alius, scilicet dominus directus. Utriusque hujus domini exemplum cape in casu, quo Petrus habet jus ad proprietatem & substantiam agri, non autem ad fructus ex eo colligendos; hos enim (ut pono) percipiendi jus habet Paulus: isto in casu Petrus est dominus directus, Paulus vero habet dominium utile.

Porro, quia dominium directum prævalet utili; est enim jus quoddam radicale, ex quo originem trahunt reliqua jura, quæ sunt ad emolumenta, & utilitatem rei: hinc & dominium directum vocari solet *dominium simpliciter tale*, dominium utile vero *dominium secundum quid*. Ex quo facile concordantur leges, quarum aliquæ usufructuarios, qui habent dominium utile, negant, aliæ affirmant esse dominos; negant enim, eos esse dominos *simpliciter*, & admittunt esse dominos *secundum quid*.



199

Assero 3. Dominium utile iterum varie dividi solet, ut in *usumfructum*, *usum*, *habitationem*, *servitutem*, *emphytheusin*, & *feudum*.

*Ususfructus* L. *ususfructus* 1. ff. de *usufructu*. definitur *jus utendi, fruendi re aliena, salva ejus substantia*. Unde usufructuarius non solum habet jus ad utendum re, sed etiam ad fruendum, id est, ad percipiendos omnes fructus talis rei, quos & vendere, ac alienare, imo & rem in usumfructum concessam alteri elocare, commodare &c. non tamen alienare, aut destruere potest.

*Usus juris*, seu jus ad usum, est jus tantum utendi re aliena, salva ejus substantia. Qui habet ergo usum juris, de quo hic agimus, non potest rem in usum concessam destruere, nec alteri elocare, neque fructus alienare: sed tantum potest illos fructus colligere, qui ipsi & suæ familiæ sufficiunt ad quotidianam sustentationem, reliquos debet Domino directo, seu proprietario relinquere.

*Habitatio* est jus habitandi in ædibus alienis, salva earum substantia. Est multum affinis usui: differt tamen, quia usus versari potest circa plures res, habitatio circa solas aedes. 2. Qui habet habitationem, potest aedes non solum ipse cum familia sua inhabitare, sed & aliis elocare instar usufructuarii: quod non potest ille, cui solus concessus est usus ædium.

*Servitus* est jus reale in re aliena, salva ejus substantia: datur ergo tunc, quando vi tui juris, quod habes in re aliena, hæc tibi, vel tuis rebus servire cogitur. Plura de servitutibus §. mox sequenti.

*Emphyteusis*, *Erbrecht*, (sumendo eam pro jure, & non pro contractu) est jus fruendi re immobili, alicui a Domino directo, *von dem Grundherrn*, concessum perpetuo, aut ad longum tempus sub certo annuo Canone solvendo, in recognitionem domini directi, quod penes concedentem manet.

*Feudum*, *Lehen*, est jus fruendi re immobili, alicui, & descendentibus masculis benevole in perpetuum concessum pro fidelitate, & obsequio personali præstando domino directo. Datur



§. III. *Resolvuntur quædam dubia ex præcedentibus relicta.* 345

tur ergo sola res immobilis in feudum : datur etiam benevole, & gratis, non soluto pretio pro re feudali, aut laudemio pro investitura, quamvis hodie status Imperii, exceptis Electoribus investitis, de feudis Regalibus solvant certam summam inter Officiales Curia Imperialis dividendam, ut habet *Aurea Bulla* c. 39. §. 1. & 2.

Quid in Bavaria sit usitatum circa feuda Burfatica (*Beutel-lehen*) & circa emphyteuses, aliaque ejusmodi, non hic vacat omnia discutere, maxime cum hæc sit materia, præcipue ad forum externum spectans, ac ad Juris-Consultos civiles, suntque omnia decisa in Codice Maximiliano, & dilucidata in illius annotationibus. Si quis Confessarius in similibus casibus ad jus civile, vel patrium spectantibus pro consilio rogatur; non facile præpropere se ingerat, sed, ut suadet La-Croix, mittat eos ad Juris Civiles peritos Advocatos, Procuratores, & viros in praxi fori externi versatos, ni velit sæpius impingere, & sibi & aliis nocere.

§. III.

*Resolvuntur quædam dubia ex præcedentibus relicta.*

**D**ubitabis 1. An potestas acceptandi, retinendi, & abdicandi jus vel dominium sit ipsum formale jus, vel dominium? vel aliter: An acceptatio, retentio, & abdicatio, aut translatio juris & dominii sint actus formalis juris, vel formalis dominii? R. negative. Gormaz de J. & J. disp. 11. n. 567. Viva p. 5. Curs. Theolog. disp. 2. q. 4. n. 3. Illfong T. 4. disp. 2. n. 62. 200

Ratio hujus est 1. Illud non est dominium, vel jus formale, quod etiam cum carentia & absentia juris, & dominii formalis conjungi potest; atqui potestas acceptandi dominium sic conjungi potest cum carentia dominii formalis, seu actualis; nam non habens dominium actuale libri vg. habet potestatem acceptandi illud: Iterum pro illo instanti, quo transfertur, & non retinetur dominium, hoc destruitur, & ejus carentia adest, & tamen ibi simul existit potestas transferendi dominium;

*P. Kick. Theol. Tom. IV.*

X x

alias



alias enim illo instanti non posset poni ejusmodi translatio : sic quoque pro instanti, quo transfertur dominium præexistens, habetur simul potentia ad retinendum dominium ; transfertur enim libere, & potuisset illo instanti non transferri : & tamen simul tunc non datur dominium actuale : ergo potestas acceptandi, retinendi, & transferendi dominium non est ipsum dominium formale.

Ratio *secunda* est : Potestas acceptandi summum Pontificatum non est formaliter ipse Pontificatus : item potestas acceptandi privilegium non est ipsum privilegium : ergo etiam potestas acceptandi dominium formale non est ipsum dominium formale. Si vero potestas acceptandi non est ipsum dominium formale, tunc neque potestas abdicandi. Verum quidem est, quod non possit dari abdicatio domini, nisi præexistat dominium : ex hoc tamen minime sequitur, abdicationem, vel alienationem domini esse actum ejusdem formalis domini. Id, quod

Confirmatur, & exemplis stabilitur. Renunciatio privilegii præexistentis non est actus ipsius privilegii : ergo neque renunciatio, & abdicatio domini præexistentis est actus ipsius formalis domini. Vel aliter : Non potest dari renunciatio privilegii, nisi privilegium in privilegiato præsupponatur, & tamen ejusmodi renunciatio non est actus privilegii : ergo a pari, licet non possit dari alienatio, & abdicatio domini, nisi hoc in alienante præsupponatur, tamen non est actus ejusmodi domini formalis. Iterum renunciatio privilegii non est actus habentis, sed præhabentis privilegium formale : & combustio libri non est actus habentis, sed præhabentis librum : ergo etiam alienatio domini, quæ est ipsa destructio domini, non est actus habentis, sed præhabentis dominium. Adde : liber, dum destruitur, & comburitur, non est potentia influens in combustionem, sed est terminus per combustionem destruendus : idem est de privilegio in renunciatione : ergo & dominium, dum a Petro alienatur, & in eo destruitur, non est potestas, seu jus influens in alienationem, sed est terminus per alienationem destruendus. Ex his

201 Colliges, potestatem acceptandi, retinendi, & alienandi dominium formale, seu actuale, esse dominium quoddam fundamentum.



mentale, virtuale, vel reflexum. Vocant autem reflexum, quia est jus & dominium in ipsum dominium, cum sit potestas acceptandi, transferendi, ac destruendi dominium, & sic se reflectat quodammodo supra dominium formale, seu actuale. Dominium vero hoc virtuale videtur esse ipsa libertas nostra physica una cum absentia legis inhabilitantis ad actus acceptationis, retentionis, & alienationis domini formalis: quæ libertas tamen, ut sit proxime expedita ad transferendum dominium, debet connotare pro instanti priori existens dominium formale, quod perseveraret in alienante pro instanti alienationis, nisi poneretur alienatio, a qua destruitur. Pariter potestas proxime expedita ad retinendum dominium debet connotare pro instanti priori existens dominium, quod perseverat, si continuatur voluntas habendi illud, & non ponitur volitio abdicandi, seu alienandi pro posteriori instanti. Ita quoque libertas proxima ad acceptandum dominium, supponit illud esse oblatum a præhabente, vel potente offerre. Ex hoc

Habes 1. Formaliter & immediate actus alienativos, & destructivos rei, ac domini v.g. per donationem, venditionem, imo & destructionem rei &c. non esse immediate, & formaliter actus domini perfecti formalis, sed solum virtualis.

Habes 2. Aliqua tamen ratione dominium formale rei, quæ alienatur, præbere jus, ut possit alienari, quia ad justam alienationem, & destructionem ejusmodi rei debet saltem præsupponi, & connotari dominium præexistens in alienante.

Dices 1. Non dominus non potest alienare rem: ergo alienatio est actus domini. R. D. a. Non dominus, id est, qui neque pro instanti præcedenti habuit dominium, non potest alienare C. a. non dominus, id est, qui præcise pro instanti præfenti, quo alienat, non habet dominium, non potest alienare N. a. & c. nam ad validam alienationem sufficit, quod alienans saltem præsuppositive seu in instanti immediate præcedenti fuerit dominus.

Dices 2. Omnis dispositio possibilis est actus perfecti, & pleni domini; nam dominium perfectum est jus perfecte dispo-



nendi de re omni possibili modo: ergo etiam venditio, donatio &c. sunt actus domini. R. D. a. omnis dispositio non destructiva domini est actus domini C. a. etiam destructiva domini n. vel subd. a. ita ut destructio domini proveniat a dominio formali tanquam causa, & potestate in ipsam immediate influente n. a. ut proveniat immediate a libertate connotante dominium formale c. a. & n. c. Dominium est jus, & potestas perfecte disponendi de re modo possibili; atqui non est possibile, ut destructio domini proveniat a Dominio formali, tanquam a causa immediate influente, sed tantum tanquam a connotato.

202 Dubitabis 2. Quid sit notandum de servitute? R. *Servitus, Grund Dienstbarkeit*, est *jus reale in re aliena, salva ejus substantia*, vel ut definit Codex Maximilianeus p. 2. c. 7. §. 1. *Servitus ist eine gerechtsame, welcher man sich zu eignen Besten zu erfreuen hat auf fremden Gut*, id est: est jus, qua quis ad proprium suum commodum in alterius, vel alieno bono gaudet. Datur ergo servitus tunc, quando vi tui juris, quod habes in re aliena, hæc tibi, vel tuis rebus servire cogitur, ut jam supra insinuat. Et sic definita servitus continet sub se omnia prius explicata dominia utilitatis, vg. usumfructum, usum &c.; nam, dum habes usumfructum in re aliena, tunc hæc tibi, & tuis commodis servire debet.

Ex hac definitione colliges, servitutem tantum constitui in re aliena: unde, quando ex re propria, quæ quoad substantiam ac proprietatem tua est, percipis fructus, vel aliud commodum aut obsequium sentis, in ea non diceris habere servitutem.

Dividitur servitus in *affirmativam*, & *negativam*, *Affirmativa* est, vi cujus possum aliquid in re aliena, vg. in fundo alterius agere, quod alias non est concessum e. g. si possum iter instituere, currum agere, ducere aquam per agrum alterius &c. *Negativa* est, vi cujus alter in re sua, vg. in prædio suo, tenetur aliquem actum omittere, quem alias exercere posset. Talis servitus *negativa* est, qua quis quandoque a vicino suo prohibetur, ne domum suam altius tollat, ne luminibus obsit, aut ne novam fenestram, qua in ædes alterius inspicere possit, aperiat.

So-



Solet ulterius dividi in *personalem*, & *realem*. *Personalis* est, quando res aliena immediate servit alienæ personæ. Tales servitutes personales sunt etiam usufructus, usus, & habitatio: hæc enim jura omnia tantum sunt in utilitatem personæ usufructuarii, Usuarii &c. proinde & ossibus talis personæ inhærent, & ea extincta, ipsa quoque jura extinguuntur, nec ad hæredes ejus transeunt. *Realis*, vel *Prædialis* est, qua prædium unum, vel res una tenetur servire rei alteri, ad diversum dominum spectanti. Habetur tunc, quando vg. per prædium Pauli possunt agi currus, ut fructus in prædium Petri inferantur. Quare ad hanc servitutem duo prædia, ad distinctos dominos spectantia, requiruntur: unum, cui debetur servitus, & vocatur prædium *dominans*: alterum, quod servitutem debet, & vocatur *prædium serviens*. Est autem notabile discrimen inter servitutem realem, & personalem; realis enim transit ad hæredes, & ad quoscunque possessores, ad quos pervenit prædium, cui annexa est servitus: personalis autem cum persona, cui data est, extinguitur, nisi nominatim etiam ipsis hæredibus concessa sit.

*Servitus realis* denuo subdividitur in *urbanam*, *Hausdienstbarkeit*, & in *rusticam*, *Feld-Dienstbarkeit*. *Urbana* est, quando res aliena prædio urbano, *rustica*, quando prædio rustico servit. Ita P. Haunold, qui cum Communi putat, denominationem servitutis rusticæ, aut urbanæ esse desumendam a prædio dominante. Est autem *prædium urbanum*, quod habitationis, & hominis gratia constitutum est, sive dein intra, sive extra urbem existat. Talia sunt plerumque ædificia ad inhabitandum, ad exercenda commercia, custodienda arma &c., uti etiam horti ad recreationem hominis destinati: item stabula meritoria tam in villis, quam vicis pro recipiendis equis & hospitibus destinata. *Rusticum prædium* est, quod principaliter exstructum est, ut præbeat usum rusticum in conservandis fructibus, asservandis pecoribus &c. ut stabula, granaria, horti olitorii, horrea &c. sive in urbe, sive extra eam existant, dummodo sint separata a prædiis urbanis; si enim ejusmodi ædificia, rei rusticæ alias deputata, essent conjuncta habitationi hominum, ac aliis prædiis urbanis, tunc tanquam accessoria sequerentur naturam eorumdem







fres Minores de Observantia neque in particulari, neque in communi alicujus etiam minimæ rei dominium, aut proprietatem habemus; siquidem rerum omnium, quibus utimur, dominium manet vel penes dantes, vel penes summum Pontificem, ex cujus licentia tam Ordo noster in communi, quam nos Franciscani in particulari utimur rebus illis, quæcumque sint. Quare earum tantum usum, non autem jus proprietatis habemus. Ut igitur punctum hoc olim tempore Joannis XXII. magno studio disputatum pro dignitate sua tractemus, Articulum hunc in duos §§vos secabimus. Unde sit.

## §. I.

*Notanda & Conclusio.*

Nota 1. Duplicem esse usum, alium *Juris*, alium *facti*. 203

*Usus facti* est usurpatio actualis alicujus rei, vg. equi, domus, panis &c. Proinde, si actu equites, inhabites domum, comedas panem, tunc habes usum facti; quia taliter actu usurpas equum, domum, panem &c. *Usus juris* est ille ipse, quem supra Art. præc. §. 2. descripsi. Vel clarius: est jus, & potestas authoritativa utendi re aliena authoritate, & nomine proprio. Proinde ille, qui habet usum juris respectu alicujus rei alienæ, non potest ab usu, & usurpatione actuali ejusdem impediri absque injuria. Ratio hujus est: quia si impediretur ab usu facti, & actuali usu rei, tunc læderetur ejus jus, quod habet ad ejusmodi usum: atqui quando læditur jus alterius, tunc illi fit injuria: ergo.

Nota 2. Usum facti posse esse interdum illicitum, si nempe usurpes actu aliquam rem alienam, ubi neque jus, nec licentiam habes eadem utendi. Dixi: ubi *neque jus, neque licentiam* habes, per quod volo insinuare, quod ad licitum usum facti rei alienæ non requiratur determinate jus utendi illa re, aut usus juris, sed quod etiam sufficiat sola licentia a Domino rei concessa absque jure utendi. Inde

Nota 3. Ejusmodi licentiam esse tantum meram permissionem, & facultatem utendi re, non authoritate, & nomine proprio,



prio, sed aliena, scilicet Domini, liberaliter talem facultatem concedentis. Quare hæc licentia differt a jure 1., quia ille, qui habet jus utendi, vel usum juris, utitur re aliena autoritate propria, non autem ille, qui habet meram licentiam. Hinc 2. qui habet jus utendi re aliena, non potest, etiam a Domino directo talis rei, sine injuria impediri, ne illa pro libitu suo utatur: contra, qui habet meram licentiam, potest ad nutum domini impediri ab usu citra omnem injuriam; siquidem talis licentia, eoquod ex parte licentiatum non pariat ullum jus, est ad nutum domini eam concedentis revocabilis, ac impedibilis.

Nota 4. Res, quibus uti possumus, esse duplicis generis: aliæ enim sunt, quæ unico usu proprio, & primario non consumuntur, aut destruuntur, ut domus, liber, currus &c. sic utimur domo, eam inhabitando, quin per hanc inhabitationem domus statim destruatur. Atque in his rebus usum facti separari posse a Domino, & proprietate, certum est, & patet in Religiosis, quorum singulis variæ res, vg. libri, cella, vestes &c. ad quotidianum usum conceduntur, quin ullus eorum in particulari aliquod jus proprietatis, aut dominium in talibus rebus habeat, aut habere possit. Quare de similium rerum usu non procedit quæstio.

Aliud genus rerum est, quæ unico usu proprio, & primario consumuntur, ut cibus, potus &c.; nam usus primarius, & proprius, ad quem cibus & potus ordinantur, est utriusque absumptio. Huc etiam pertinet pecunia, quæ pariter unico usu primario, & proprio consumi censetur, non quidem physice quoad entitatem, sed moraliter quoad dominium, veluti fit, dum expenditur, aut pro aliis rebus permutatur; ad hunc quippe usum, scilicet ad expensionem & permutationem pro aliis rebus, pecunia est primario & proprie instituta juxta Aristotelem l. Polit. c. 7. & communem Juristarum.

Dixi: unico usu primario, & proprio; quia usum secundario, & improprio, seu tali, ad quem ex natura sua non ordinantur, non consumuntur, aut destruuntur, ut si vino utaris solum ad odorem, pecunia ad ostentationem &c. De hoc secundario usu modo non ago; suppono enim, posse aliquem habere



bere usum hunc secundarium similium rerum, quin habeat earum dominium: controversia duntaxat remanet de usu primario, per quem res consumitur.

Nota 5. Certum esse, quod quis usum juris *proprie dictum*, non possit habere in re aliqua unico usu consumptibili. Ratio est: quia usus juris *proprie dictus* secundum dicta superius est jus utendi re aliena salva ejus substantia; atqui re unico usu consumptibili aliquis uti non potest, saltem usu primario & proprio, salva manente ejus substantia; siquidem usus proprius & primarius talis rei est ejus consumptio, & destructio. ergo

Nota 6. Usum juris *improprium*, qui est jus utendi re aliena, etiam destructa, & non salva manente ejus substantia, non posse separari a dominio in rebus unico usu consumptibilibus. Ratio est: eo ipso, quod concedatur talis usus juris, conceditur simul jus destruendi, & consumendi substantiam ejus rei: atqui cui conceditur jus consumendi substantiam rei, conceditur ipsum dominium illius; solus enim Dominus vi juris sibi competentis potest nomine proprio, & authoritative destruere rem aliquam, ut colligitur ex dictis, & idipsum dicunt leges civiles, quas Juristæ adducunt.

Ex duobus ultimis notandis colliges, duplicem esse usum juris, unum *proprie talem*, qui tantum datur in re unico usu consumptibili: alterum *improprie talem*, qui etiam in rebus unico usu consumptibilibus, ut in pecunia, cibo & potu dari potest. Et hæc divisio usus est apud Juristas recepta, & nobis servit ad objectiones melius diluendas. H. N.

Affero: Dominium potest separari ab usu in iis rebus, quæ unico usu absumentur. Ita defacto Communis contra Joannem XXII. summum Pontificem, & quosdam alios apud Lugo citatos. 204

P. 1. Defacto in ordine nostro datur usus rerum unico usu consumptibilium, scilicet cibi & potus, & tamen non habemus seu in particulari, seu in communi dominium earum: ergo potest usus salium rerum esse absque dominio. c. patet; nam



ab actu ad potentiam optima est argumentatio. A. p. ex ipsa nostra Regula, in qua c. 6. Fratribus prohibetur, ne ullam rem sibi approprient: adeoque cujuscunque rei, etiam unico usu consumptibilis, dominium & proprietas illis interdicitur: ut patet per verba Regulæ: *Fratres nihil sibi approprient, nec domum, nec locum, nec aliquam rem &c.* NB. *nec aliquam rem*, consequenter nec cibum, aut potum.

Accedit Nicolaus III. c. *Exiit*, qui *seminat. de V. S. in 6.* Ibi laudatus Pontifex declarat 1., quod Fratres Minores nec singuli in speciali, nec eorum Ordo in communi habeat ullius rei dominium, vel proprietatem. 2. Quod Fratres Minores tantum habeant usum facti, non autem juris, in illas res, & quidem omnes, quæ ipsis offeruntur. Aliqua ejus verba, quæ huc faciunt, adduco: *Qui inquam usus* (concessus Fratribus Minoribus) *non juris, sed facti tantummodo nomen habens, quod facti est tantum, in utendo præbet utentibus, nihil juris: quin imo necessarium rerum tam ad vitæ sustentationem* (quales sunt cibus & potus) *moderatus usus concessus est Fratribus: quibus rebus Fratres licite uti possint, durante concedentis licentia.* 3. Exemplo Prædecessorum suorum præfatus Papa in se, & Ecclesiam Romanam assumit dominium omnium eorum, quorum usus est licitus Fratribus Minoribus, & quorum dominium donantes sibi non referunt.

Rdebis: Constitutiones adductorum Pontificum circa hoc punctum editas, esse revocatas a Joanne XXII. in sua extravag. *Ad Conditorem Canonum.* de V. S. In hac Extravagante Joannes Papa negavit, dominium posse separari ab usu rerum unico usu consumptibilium: & ob eam causam dominium earundem rerum, Fratribus Minoribus concessarum, a se & Romana Ecclesia abdicavit.

Contra est: Quamvis Joannes XXII. videatur derogasse declarationibus, & constitutionibus citatorum Pontificum, tamen & alii plures Pontifices Joanne XXII. posteriores reassumpserunt in se iterum dominium rerum unico usu consumptibilium Minoribus concessarum, ac confirmarunt de novo declarationes Regulæ nostræ editas a Nicolao III. & Clemente V.; imo expresse derogarunt Extravaganti *ad Conditorem*, & aliis extravagantibus materi-



teriam prædictæ Extravagantis tangentibus : ut videri potest in Constitutione Pauli IV., quæ incipit : *Ex Clementis Sedis* : data 1. Julii 1555., in qua idem Pontifex testatur, prædictis extravagan- tibus Joannis XXII., jam antea derogatum esse per Mar- tinum V., Eugenium IV., Nicolaum V. & Sixtum IV. Eam- dem derogationem resumit Gregorius XIII., uti & dominium re- rum nobis oblatarum reassumpsit similiter Alexander VI. Con- stit. *Uberes fructus*. data 10. Julii 1494. Ex quibus omnibus pa- tet, declarationes Nicolai III. & Clementis V., ac aliorum Præ- decessorum Pontificum esse in suo antiquo vigore : illa vero, quæ in contrarium edidit Joannes XXII. nullius jam esse robo- ris, consequenter non esse amplius attendenda. Verum de hac re plura in solutione objectionum.

Confirm. Nullus acquirit dominium alicujus rei, nisi illud acceptet ; atqui Fratres Minores nullius rei, etiam unico usu consumptibilis, dominium possunt acceptare : ergo etiam nullius rei dominium possunt acquirere : consequenter solum habent usum facti respectu rerum sibi oblatarum, quibus non nomine proprio, sed autoritate & nomine concedentis, si sibi refer- vavit dominium, vel saltem nomine summi Pontificis utuntur. M. est certi, & clari juris. m. patet ex Regula, quæ c. 6. præci- pit strictissime : *Fratres nihil sibi approprient, nec domum, nec locum, nec aliquam rem.*

P. 2. Non repugnat, ut aliquis habeat meram licentiam utendi re aliena, unico usu consumptibili, & quidem absque jure, & dominio proprio in talem rem, ac solum nomine, & ex commissione alterius : ergo non repugnat usus simplex facti res- pectu rei unico usu consumptibilis, absque dominio ejusdem. A. p. variis exemplis : Sic Religiosi solenniter professi in aliis Religio- nibus, quam nostra, in particulari habent licentiam absumendi cibum & potum, ad vitæ sustentationem necessarium, & tamen non habent ejusdem dominium ; nullus enim Religiosus, in qua- cunque Religione sit solenniter professus, in particulari est ca- pax domini alicujus rei vi voti Paupertatis. 2. Conviva utitur cibis apposis, manente dominio interea apud invitantem, qui & illos invitato posset subtrahere citra injuriam, & læsionem juris. Sic etiam servus comedit cibos heri sui, Filius familias



absumit cibos sui parentis , & tamen nec servus , nec filiusfamilias horum ciborum est Dominus.

P. 3. Si usus facti in rebus unico usu consumptibilibus non est separabilis a dominio , tunc ideo , quia aliquis non potest licite rem aliquam destruere , & consumere , quin habeat jus vel dominium talis rei : sequela non est admittenda : ergo neque id , unde sequitur. M. est AAriorum. m. p. potest famulus ex licentia , vel jussu heri sui licite comburere struem lignorum , aut domum , quin per talem combustionem fiat Dominus illius rei , quam comburit , & destruit. Item famulus ex commissione Domini sui expendens pecuniam ejus , & aliquid pro ea emens , non censetur propter talem consumptionem pecunie esse factus ejusdem Dominus : imo ipsa destructio , & consumptio rei , de voluntate , atque autoritate Domini a servo facta , videtur potius esse actus , atque exercitium domini ipsius Domini , quod ille per servum , ceu suum instrumentum , & suo nomine agentem exercet : ergo potest aliquis rem destruere , quin hujus sit Dominus , si nempe eam consumat , & destruat autoritate , & nomine alterius , prout & Fratres Minores absument ipsis concessas res autoritate alterius. Quare si non nemo cibum & potum Franciscanis donatum auferret , tunc hi non possent eum nomine proprio , sed tantum nomine donantis , vel summi Pontificis vindicare , aut repetere.

## §. II.

### Solvuntur Objectiones.

205 Objic. 1. Juxta varias leges civiles non potest a dominio separari usus , vel usufructus rerum unico usu consumptibilium : ergo nostra conclusio est contra leges civiles. R. d. a. & illæ leges loquuntur de usu juris c. a. de usu simplici facti , fundato in mera licentia n. a.

Dices : Usus juris non potest dari in rebus unico usu consumptibilibus : ergo dum leges dicunt , usum non distinguere a dominio in rebus unico usu consumptibilibus , non possunt loqui



qui de usu juris, sed de usu facti: consequenter juxta leges usus facti in rebus unico usu consumptibilibus non distinguitur, aut separatur a dominio. A. patet; nam usus juris est jus utendi re aliena, salva ejus substantia: atqui rebus unico usu consumptibilibus non potest quis uti salva earum substantia: ergo. R. d. a. usus juris proprie talis c. a. improprie talis n. a. Vide dicta n. 202. Not. 5. & 6.

Objic. 2. Qui ita potest disponere de re aliqua, ut etiam illam possit destruere, est Dominus ejusmodi rei: sed Frater Minor potest ita disponere de pane, cerevisia, vino, ut has res etiam possit destruere, & consumere: ergo Frater Minor est Dominus harum rerum. R. 1. Retorq. argum. ergo etiam servus, qui jussu Heri comburit lignum, expendit pecuniam ejusdem Heri sui, eo ipso est Dominus ligni, ac pecuniæ. R. 2. d. M. qui ita potest disponere nomine & autoritate propria, ac vi juris stricti sibi competentis c. M., qui tantum ita potest disponere autoritate & nomine alieno, ac ex permissione alterius n. M. Fratres Minores consumunt has res nomine donantium, aut summi Pontificis.

Neque in hoc absurditas est; nam 1. testibus etiam Adversariis, ac ipso Joanne XXII. in sua famosa Extravagante: *Quia quorundam*: possumus nos nomine summi Pontificis uti rebus unico usu non consumptibilibus, uti libris, vestibus, Ecclesiis &c. ergo & rebus unico usu consumptibilibus. 2. Potest famulus pecuniam Domini sui nomine ejusdem pauperibus expendere, & sic eam moraliter consumere: ergo etiam nos possumus nomine summi Pontificis, vel donantium consumere cibum & potum.

*Dices forte frivole*: Si nos nomine summi Pontificis comedimus, & bibimus, tunc summus Pontifex singulis diebus in nostra mensa reficitur; quod absurdum est: ergo. R. N. M. Non enim Fratres Minores hoc sensu reficiuntur nomine summi Pontificis, quasi in ejus utilitatem & alimentationem comederent, & biberent: sed solum hoc sensu, quod ex licentia summi Pontificis consumant cibum & potum. Nam, qui habet usum facti alicujus rei, potest illa quandoque uti tali modo, ut usus neutiquam cedat in utilitatem Domini, concedentis ejusmodi usum: uti fit in



famulo, ex jussu Heri sui destruentis domum ejusdem, vel donantis pauperi pecuniam.

Objic. 3. Si dominium rerum Fratribus Minoribus concessarum esset penes donantem, aut summum Pontificem, tunc hoc deberet esse utile donanti, aut Pontifici; sed non est utile: ergo. m. constat quia nec Pontifex, nec donans utuntur talibus rebus, sed soli Fratres: adeoque hi soli ex iisdem utilitatem percipiunt. M. p. ex L. *Omnium. ff. de usufructu*, & ex L. *Antiquitas. C. eodem*, ubi dicitur, quod ideo usufructus non possit perpetuo separari a dominio, ne dominium hujusmodi sit penitus inutile Domino: ergo supponunt leges, quod dominium saltem aliquando debeat esse utile domino suo, consequenter, si dominum prædictarum rerum esset penes summum Pontificem, aut donantem, deberet illud his esse utile. R. 1. N. m. nam hoc dominium posset absolute adhuc esse utile summo Pontifici, aut donanti, cum ante consumptionem possint rem Fratribus datam revocare, & illam in propriam utilitatem convertere, absque ulla injuria Franciscanis illata: sicut & Herus nullam facit injuriam famulo, dum ab eo revocat pecuniam, quam ei dedit hoc fine, ut suo, nempe Heri, nomine in pauperes distribueret. R. 2. cum nostro Herinx: transmittendo etiam, quod nobis obstant leges civiles, tamen illæ non sunt attendendæ in proposito casu, in quo Pontifex, qui supra jus civile est, aliud declaravit, & sanxit pro Fratribus Minoribus. Neque tale dominium apud summum Pontificem existens est nugatorium (ut vult Extravagans *ad Conditorem*) quamvis enim sit rerum minimarum, conducit tamen ad salvandum perfectissimum modum Evangelicæ paupertatis, &, ut ait Nicolaus III., alius illarum rerum Dominus non est commode assignabilis.

206

Objic. 4. Fratres Minores possunt res sibi concessas in judicio defendere, & ablatas ab aliis repetere: ergo signum est, quod sint illarum Domini. R. N. a. Fratres enim Minores nec per se, nec per alios suo nomine substitutos, & agentes, possunt juridice & authoritative res sibi ablatas in judicio defendere, aut repetere: potest tamen id illorum Syndicus Apostolicus, non quidem nomine Fratrum, sed nomine summi Pontificis, vel dantium, penes quem, vel quos tunc dominium residet. Sicut etiam nullus Frater minor nomine, & autoritate propria potest ali-



aliquam rem sibi concessam valide, aut licite vendere, permutare, aut alium actum domini circa eam exercere.

Dices: Saltem si aliquis homo privatus furriperet Franciscano cibum & potum, faceret ei injuriam; ergo Franciscanus habet dominium aut jus in cibum &c.; nam injuria est læsio juris alterius. R. 1. retorq. argum. in Religiosos particulares aliarum Religionum, & quæro: an fiat talibus injuria, si furripiatur eisdem cibus & potus? quidquid responderint AArii, serviet nobis; nam & Religiosi Professi cujuslibet Ordinis habent in particulari simplicem tantum usum facti, non autem dominium in res sibi concessas.

R. 2. *directe*. d. a. Si furriperet ei cibum vel potum sine vi aut fraude n. a. si per vim aut fraudem *subd.*, tunc faceret injuriam, quia læderet aliquod jus reale, vel dominium, quod Franciscanus haberet in cibo & potu n. a. quia læderet jus personale, quod Franciscanus generaliter, & naturaliter habet adversus omnes alios, ne ipsum per vim aut fraudem impediunt a consecutione cujusunque boni c. a. Igitur, si sine vi, vel fraude aliquis privatus Franciscano auferret rem aliquam, non inferret injuriam directe Fratri ipsi, violando aliodejus jus reale proprie dictum: inferret tamen injuriam summo Pontifici, aut donanti, penes quem nempe adhuc esset dominium rei illius ablatae. Quodsi vero per vim, vel fraudem aliquis Franciscanis furriperet quidpiam, ipsis Franciscanis inferretur injuria, non quasi hi haberent aliquod jus reale, aut dominium rei ablatae; hujus enim sunt incapaces: sed ideo, quia Fratres Minores, sicut alii homines, obtinent jus naturale, & generale adversus omnes, qui ipsos vi, vel fraude impediunt a consecutione cujusunque boni, etfi alias nullo jure debiti. Et huic juri naturali & generali non renunciavimus per nostram Professionem. Ex quo

Colliges, quod Franciscanus habeat quidem jus personale adversus fraudulenter, vel violenter ipsum impediunt ab usu cibi sibi licito; non autem habeat jus reale, vel dominium in ipsum cibum: sicut Religio, vel Monasterium aliquod habet jus personale adversus omnes, qui vi, vel dolo impediunt Can-

dida.



didatum ab ingressu Religionis, & tamen ejusmodi Monasterium nullum habet jus, vel dominium in ipsum Candidatum. Verum hic non controvertitur, an usus simplex facti sit separatus ab omni jure personali: sed solum, an separetur a jure reali, & dominio, quod bene observandum.

Instabis: Qui Franciscanis aufert aliquid, debet illud ipsis restituere: ergo signum est, quod Franciscani habeant dominium talis rei ablatæ. R. 1. Qui depositario aufert rem, debet illam ei restituere, etsi non sit Dominus proprietarius talis rei. R. 2. N. c. Quod Franciscanis debeat fieri talis restitutio, oritur ex voluntate Domini, Franciscanis concedentis usum ejusmodi rei, non autem hoc provenit ex jure, vel dominio Franciscanorum, quod apud hos non residet.

207

Objic. 5. Ex nostra sententia sequitur, donantes nobis cibaria, & se abdicantes illorum dominio, non dare eleemosynam; sequela est absurda: ergo. P. M. Illa donatio non est eleemosyna, per quam dominium non in pauperem, sed divitem transfertur; atqui taliter nobis donantes cibaria transferunt dominium eorum in summum Pontificem, qui non est pauper, sed dives: ergo. R. N. M. Siquidem talia cibaria non dantur Pontifici in usum Pontificis, sed in usum pauperum, ut nempe per ea pauperibus Franciscanis succurratur modo eis conveniente.

Dices: Saltem sequitur, eum, qui dat Franciscanis, minus mereri, quam si daret vg. Augustinianis: sequela est absurda: ergo. P. sequela: qui minus dat, minus meretur: sed dans eleemosynam Franciscanis minus dat, quam si eam daret Augustinianis; Franciscanis enim dat solum usum simplicem facti ad nutum revocabilem, Augustinianis non daret verum dominium eleemosynæ: ergo.

R. N. sequel. 1. magis meretur ille, qui dat pauperiori, & magis egenti; sed Franciscani sunt magis pauperes, quam Augustiniani, cum hi saltem in communi habeant dominium, cujus illi sunt incapaces. 2. Dominus dando solum usum facti, dummodo eum non amplius revocet, prout tamen potest, æque



que subleuat in actu secundo paupertatem & indigentiam alterius, ac si daret dominium. Certe panis ille, cujus usum facti tantum habeo, non minus satiat, quam ille, cujus dominium aliquis habet: ergo in ordine ad sublevationem paupertatis, in qua ratio eleemosynæ consistit, parum refert, an concedatur dominium, vel solus usus facti, dummodo Dominus concedens solum usum facti non utatur jure suo, & rem Fratribus concessam ante assumptionem ejus non revocet.

Urgebis: Saltem nostra paupertas non est major, quam aliorum Religiosorum, cum non minorem utilitatem recipiamus ex eleemosyna, quam alii Religiosi. R. N. illat. quia Franciscani habent tantum usum revocabilem, & ex nutu donantis, vel summi Pontificis pendentem, qui, si vellet, posset revocare: alii Religiosi vero saltem in Communi habent usum irrevocabilem, & verum quoddam jus: ergo non habent tantam paupertatem.

Objic. 6. Etiam Frater Minor habet usum irrevocabilem panis, saltem tunc, dum actu utitur, & trajicit per guttur; nam tunc non potest revocari amplius: ergo habet tunc saltem dominium. R. D. a, habet usum irrevocabilem pro illo instanti, quo res, vg. cibus, censetur moraliter consumptus, & inutilis factus ad omnem liberam dispositionem c. a. pro illo instanti, quo res adhuc moraliter existit, & utilis est ad liberam dispositionem n. a. Dum cibus actu in stomachum demittitur, non est amplius sub ullius dominio, quod etiam verum est, si aliquis proprium suum panem, cujus dominium habuit, comedit. Ratio est: quia dominium tantum potest dari circa res vere existentes, & quidem tales, de quibus adhuc potest dari libera dispositio: sed panis ejusmodi, dum actu comeditur, non censetur amplius existere, cum moraliter jam sit consumptus, nec potest de eo amplius libera fieri dispositio, ut per se claret; nam non est in potestate libera eundem panem extrahendi e stomacho &c. ergo. M. constat; nam dominium est jus reale: jus autem reale secundum dicta potest solum dari circa res actu existentes. Item dominium importat ex sua intrinseca ratione facultatem libere disponendi de re aliqua: hinc dominium non potest



test dari in brutis, quæ libertate carent, nec potest versari circa illas res, quæ liberæ dispositioni nostræ non subjacent.

208

Objic. 7. In conventionem, vel contractum precarii conceditur alicui petenti usus rei gratis; ac revocabiliter ad arbitrium ipsius concedentis, & tamen verum conceditur jus ad usum: ergo etiam si gratis, & revocabiliter concedatur usus facti Fratri Minori, tamen conceditur simul jus ad eundem usum. R. esse disparitatem inter precarium, & licentiam ad usum simplicem facti; nam in precario obligat se concedens rem, quod illam non statim in continenti velit revocare, nisi urgeat necessitas, consequenter quod velit aliquo saltem temporis spatio ad arbitrium judicis, vel etiam boni viri, ei, cui concessa est, relinquere, ne talis omni usu, & commodo destituatur. Aliud est in licentia pura ad usum; hæc enim in continenti absque injuria licentiati revocari potest.

Dices: Saltem pro illo instanti, quo Dominus concedit usum facti, non potest illum etiam revocare: ergo saltem pro illo instanti haberet Frater Minor jus irrevocabile, & dominium. R. d. a. pro illo instanti non potest revocare per se, & ex defectu juris, vel domini n. a. per accidens ob impossibilitatem simultaneam duorum actuum oppositorum c. a. Non ideo ejusmodi usus facti in proposito casu est irrevocabilis, quasi tribueret Fratri Minori aliquod jus, vi cuius revocari non posset, vel quasi Dominus non haberet jus revocandi, sed ideo, quia actualis revocatio per accidens impeditur ob impossibilitatem simultaneam duorum actuum oppositorum: nempe Dominus pro eodem instanti non potest dare, & simul negare, vel revocare licentiam, ac usum facti. Hoc autem non officit dominio; non enim obest dominio alicujus, quod ipse simul & semel non possit velle, ac nolle destructionem suarum rerum, quarum habet dominium; eoquod nolitio & volitio circa idem omnino objectum sint actus impossibiles: ergo neque obest dominio donantis aliquid Franciscanis, quod simul & semel non possit dare, & revocare licentiam, ac usum facti respectu talis rei, eoquod concessio & revocatio usus ejusdem facti pariter sint duo simul impossibiles actus.

Objic.



Objic. 8. Fratres Minores utuntur jure cibo & potu: ergo jure: ergo habent jus ad cibum & potum. R. d. c. ergo jure negative c. c. positive n. c. Jure *negative* Franciscani absumunt cibum & potum, ipsis concessum, quatenus non agunt contra jus alicujus alterius: non autem *positive* agunt taliter ex jure aliquo, quia non habent aliquod jus reale in ejusmodi cibum & potum.

Objic. 9. Franciscani, uti & alii homines, habent jus ad sustentationem: ergo fit ipsis injuria, si cibi auferantur: consequenter habent jus ad cibos. R. D. a. habent jus naturale, & generale c. a. habent jus reale, & stricte tale n. a. & d. c. ergo fit ipsis injuria, si cibi auferantur omnes, ita, ut neque alii subministrantur, aut adsint, per quos possint sustentari, sicque lædatur jus naturale c. c. si tantum appositi auferantur, & alii supersint, vel acquiri possint, per quos sustententur n. c. habemus equidem jus naturale ad sustentationem: non autem habemus jus ad sustentationem determinate obtinendam per hos numero cibos. Sufficit, si reficiamur, vel sustentemur etiam per alios qualescumque.

Objic. 10. Si usus facti in rebus usu consumptibilibus est separabilis a Dominio, tunc Dominus seorsim potest vendere usum, & seorsim dominium ejusmodi rerum: sequela non potest admitti: ergo. m. p. usus rerum usu consumptibilium, & earum dominium non habent distinctum valorem: ergo seorsim non possunt vendi. A. constat ex D. Thoma. q. 78. art. 1. imo Theologi ex hoc communiter desumunt malitiam usuræ, eoquod usus pecuniæ non habeat distinctum valorem ab ipsa pecunia, vel a dominio pecuniæ.

R. N. M. quod Dominus cibi vg. seorsim absque dominio possit vendere usum facti simplicem, quin simul vendat dominium ejusdem cibi. Ratio hujus est: quia nulla venditio potest fieri, nisi venditor se abdicet aliquo jure, & emptor jus novum acquirat; atqui in hoc casu nullo jure se abdicaret venditor, nec jus novum acquireret emptor, cum usus simplex facti nullum jus importet, ut claret ex dictis: ergo. M. est



certa apud omnes; quia venditio est contractus onerosus, quo uterque contrahens debet obligari: quod non fieret in nostro casu, nisi venditor dimittendo aliquod jus se obligaret emptori. Hinc, qui vellet vendere usum cibi, vel pecuniæ, deberet vendere usum juris: atqui usus juris in rebus unico usu consumptibilibus est ipsum dominium: ergo qui venderet usum cibi, venderet ipsum dominium. Item pecunia non plus valet, quam jus utendi pecunia: ergo qui transfert dominium pecuniæ in alium, eo ipso transfert etiam usum juris ejusdem in illum: consequenter non plus, neque aliud sine usura potest accipi pro pecunia & usu simul, quam pro sola pecunia, quæ tamen omnia non sunt contra nos. Ex his

209

Colliges 1. Usum simplicem facti, separatum a dominio & jure strictè tali, non esse æstimabilem pretio formaliter tali; pretium enim formaliter tale tantum solvi solet pro illa re, in quam conceditur jus & dominium: atqui in usum simplicem facti, separatum a dominio & jure, non conceditur jus vel dominium, ut ex terminis patet.

Colliges 2. Dominum, qui solum usum facti venderet retento dominio, injuste agere; quia venditio est contractus onerosus, in quo uterque contrahens debet obligari: sed in venditione solius usus facti non obligaretur uterque contrahens, id est, vendens, & emens; licet enim emptor obligaretur ad solvendum pretium, venditor tamen non obligaretur ad concedendum usum simplicem, sed hunc posset statim pro libitu revocare, cum nullum jus in illum concederet: & sic ulterius venditor reciperet pretium, & tamen nihil daret emptori, cum totam potestatem & jus disponendi de usu vendito, consequenter & totum usum sibi retineret: quæ utique non licent.

Dices: Saltem ille, cui concessus est usus simplex facti, posset vendere spem utendi tali re; potest enim talis sperare, quod Dominus hanc licentiam utendi non sit revocaturus, & quod taliter possit uti ejusmodi re in suum commodum: ergo. A p. etiam ejusmodi spes est pretio æstimabilis, sicut & illa spes, qua speratur ab altero emolumentum quoddam temporale: ergo.

R. cum



R. cum Haunoldo : hanc spem solum importare jus quoddam personale ad usum, non autem dominium, aut jus reale ipsius. Queritur autem hic solum, an usus simplex facti possit separari a dominio & jure reali, non vero, an possit separari a quovis jure personali; nam certum est, quod usum simplicem facti etiam in Franciscano comitetur jus personale, ut dictum est supra.

Objic. 11. Usus simplex facti est materia gratiarum actionis : ergo etiam est pretio æstimabilis. R. N. c. Jus eo ipso non est pretio æstimabilis, quia materia gratiarum actionis quæ talis, necessario debet esse gratuita, & nullo titulo oneroso, neque pro pretio data. Et hoc est de essentia gratiarum actionis. Ita Lugo. Hinc gratitudo ex se necessario non versatur circa translationem juris, sed circa beneficium qualecunque, quale etiam est licentia sine jure concessio : ut si invites convivam, eumque laute tractes, talis tenetur esse gratus absque jure in ipsum translato : neque cibi respectu convivæ, in quem nullum jus transfertur, censentur formaliter & proxime pretio esse æstimabiles. 210

Objic. 12. Si usus simplex facti non importaret verum usum juris, tunc ideo, quia esset ad libitum Domini revocabilis : sed hæc ratio nulla est : ergo m. p. potest dari jus jurisdictionis ad libitum concedentis revocabile : ergo & jus proprietatis potest esse ad nutum revocabile. R. d. M. & simul ideo, quia usus simplex facti non exercetur nomine proprio, sed tantum alieno, scilicet nomine Domini c. M. solum ideo n. M. Et hinc est disparitas etiam ad alia exempla, quæ solent afferri, in quibus potestas semper exercetur nomine proprio, non alieno, uti fit in jurisdictione etiam revocabili.

Cæterum nota : Religiosus aliquis accipiens rem aliquam, vel usurpans absque licentia sui Prælati, peccat ; quia votum paupertatis ex intentione voventium non solum obligat ad carentiam domini, vel juris alicujus civilis, sed etiam ad non habendum usum facti rerum temporalium, nisi ex voluntate Prælati ; secus enim Religiosus nunquam peccaret contra votum paupertatis accipiendo aliquid ab externis, quia nunquam po-



test accipere jus ab externis, utpote cujus est incapax. Ratio a priori est: quia Religiosi per votum paupertatis non solum abdicant a se omne jus, sed vovent etiam imitari statum pauperum, ita, ut careant etiam iis rebus, quibus indigent ad vitam humanam, imo & usum talium rerum non habeant, nisi ex beneplacito alterius, scilicet Superioris.

211

Quæres: Quid in hac materia senserit Joannes XXII. ? Ante responsionem sequentia ex nostro P. Henno percipe:

Joannes XXII. ab initio sui Pontificatus summe addictus nostro Ordini, utpote qui inter alia beneficia eidem collata, etiam S. Ludovicum Episcopum inter Sanctos retulit: postea tamen ratione Michaelis Cesenæ Ministri Generalis, & Guilielmi Ockami Scoti discipuli, & Nominalium Principis nonnihil in nostram Religionem, adeo sibi antea dilectam, exacerbatus, duas constitutiones edidit, quibus docet, Fratres Minores non habere usum rerum unico usu consumptibilium a dominio separatum. Quare in Extravagante *Quia quorundam*, de Verb. signif. negat terminis expressis, Franciscanos habere posse in re aliqua simplicem usum facti: & Extravag. *Ad conditorem*, dicit, usum facti a dominio separatum in rebus unico usu consumptibilibus repugnare juri, & obviare rationi. Insuper in iisdem extravaganibus abiecit a Sede Apostolica dominium rerum unico usu consumptibilium, Fratribus Minoribus donatarum. H. S.

Rdent aliqui 1. Joannem XXII. facile cum Nicolao III. & Clemente V. concordari posse, nec negare usum simplicem facti in rebus unico usu consumptibilibus. Verum ne inutili verborum litigio me implicem.

R. 2. Transmisso etiam hoc, quod laudatus Pontifex doceat, simplicem usum facti non posse separari a dominio in rebus unico usu consumptibilibus: ejus tamen autoritas non obest nostræ conclusioni. Nam 1. præfatam doctrinam, quod usus simplex facti non possit separari a dominio, non assert Joannes per modum alicujus constitutionis, decisionis, definitionis aut decreti, sed solum per modum alicujus rationis, ex qua ostend-



ostendit tantum, se prudenter & sapienter agere, abjiciendo ab Ecclesia, & Sede Apostolica dominium ejusmodi rerum: atque rationes in decretis Pontificiis additæ non habent vim juris, imo eæ possunt esse falsæ. 2. Hæ duo Extravagantes nostræ conclusioni contrariæ per plures Pontifices Joannem XXII. subsequentes sunt revocatæ, ac denuo confirmatæ declarationes nostræ Regulæ per Nicolaum III. & Clementem V. factæ, qui Pontifices Joannis XXII. Successores etiam in se denuo reassumpserunt dominium rerum usu consumptibilium, nobis oblatarum, uti videre est in Constitut. Pauli V. *Ex Clementis Sedis*. data 1. Julii 1555, in qua idem Pontifex testatur, Extravagantibus Joannis XXII. derogatum fuisse per Martinum V., Eugenium IV. Nicolaum V., & Sixtum IV. Eandem derogationem resumit Gregorius XIII. Tot tantique Pontifices, tam Antecessores, quam Successores, uni utique prævalebunt Joanni?

De cætero novum non est, quod unus Pontifex alterius Prædecessoris constitutiones revocet, aut moderetur. Id, quod liquet ex ipsius Joannis XXII. testimonio, qui extravagante *quia nonnunquam*. de V. S. ita loquitur: *Quia nonnunquam, quod conjectura profuturum credidit, subsequens experientia nocivum ostendit, non debet reprehensibile judicari, si Canonum Conditor Canones a se, vel suis Prædecessoribus editos, vel aliqua in eisdem contenta Canonibus, revocare, modificare, vel suspendere studeat, si ea obesse potius viderit, quam prodesse.* Item notandum est, quod nec nostra conclusio, nec sententia adversa possit definiri ut de fide, prout ipse Joannes XXII. in extravagante *Quia quorundam*. fatetur, & ostendit; est enim tantum punctum juris civilis potius, quam fidei. Dum autem Pontifex laudatus sibi contrarium sentientes declaravit esse hæreticos, & contra fidem agentes, id non fecit propter hoc punctum, sed propter alia in dictis Constitutionibus, præsertim in extravagante: *Cum inter nonnullos*. contenta, vg. quia sustinebant, Christum & Apostolos nihil habuisse proprium in communi, aut particulari, quod asseritum ipsorum definivit esse hæreticum. Ubi



Incidentaliter nota: Nicolaum III. docentem, quod Christus & Apostoli caruerint proprio, non esse oppositum Joanni XXII. Ratio hujus est, quia Nicolaus volebat, Apostolos & Christum tantum *aliquando* caruisse proprio, & sic paupertatis altissimæ exemplum reliquisse: contra Joannes XXII. vult, Christum, & Apostolos non semper caruisse proprio in communi, & particulari, sed aliquando proprium habuisse in Communi, uti defacto habent aliæ Religiones. Quæ duo, nempe Christum aliquando habuisse proprium, & aliquando non habuisse, non sunt opposita, aut contradictoria.

212 Petes: Penes quem tempore Joannis XXII. dominium rerum unico usu consumptibilem, nobis donatarum, fuerit? R. 1. Parum interesse, penes quemcunque fuerit, dummodo non fuerit penes Franciscanos, qui illud certo non habuerunt: cujus ratio est, quia dominium non potest esse penes illum, qui illud non acceptat: atqui Franciscani vi suæ Regulæ nec potuerunt, nec voluerunt dominium ejusmodi rerum acceptare: ergo. R. 2. Tales res, si dantes non reservarunt dominium, fuisse nullius Domini, vel fuisse habitas pro derelictis. Ratio est: quia nec dantes, nec Fratres, nec Pontifex, nec alius habuisset dominium talium rerum: ergo fuissent sub nullius dominio.

Petes iterum: An Franciscanus in extrema necessitate non fiat Dominus rerum tunc necessariorum? R. negative; nam solo habito usu facti rerum, etiam extremam necessitatem pelli potest: ergo neque tunc requiritur, ut usurpet dominium in ejusmodi res. Haberet tamen in tali casu jus personale contra omnes, qui vellent eum ab usu in tali necessitate impedire; nam tali juri pro hoc casu non censetur renunciasse Franciscanus per Professionem suam. Videatur P. Lugo.



DISSERTATIO II.

*De Subiecto, & Objecto Domini.*

ARTICULUS I.

*De subjecto, & objecto Domini in communi.*

§. I.

*De Natura capaci Dominii.*

**A**SSERO I. Sola entia intellectum & voluntatem habentia, sunt capacia domini. Est communis. Prob. Radix domini est intellectus, & voluntas: ergo entia carentia intellectu & voluntate, non possunt gaudere dominio. A. p. quia de essentia domini est, libere ac voluntarie posse disponere de re aliqua: atqui sine intellectu & voluntate aliquis non potest libere, ac voluntarie agere, aut disponere: ergo. Ex quo

Colliges 1. Subjectum proximum, ac immediatum dominiū esse voluntatem. Ratio est : quia illa potentia est proximum subjectum dominiū, per quam possunt exerceri actus dominiū : atqui actus dominiū exerceri possunt per voluntatem, & quidem solum ; hæc enim sola libere ac voluntarie agere, & disponere potest.

Colliges 2. Bruta, & cætera entia irrationalia carere omni dominio, & jure proprie dicto. Ratio est: quia carent voluntate, & potentia libere ac voluntarie disponendi.

Affero 2. Non requiritur tamen actualis usus rationis ad dominium, etsi hic requiratur ad exercitium actuale domini, vel ad dominium expeditum. Iterum Communis.

P. r. *Parv.* Parvuli, perpetuo amantes &c. finit Domini suorum bonorum, etsi usu rationis careant: ergo. *Confirm.* do-

*P. Kick Theol. Tom. IV.*

A 2 2



minium in actu primo in sola potentia volitiva, & libera radicatur, quæ etiam in pueris & amentibus vere existit, quamvis per accidens in iis sit ligata, & impedita, ne in actum secundum exeat: ergo.

P. etiam 2. pars. Actus dominii exigunt libertatem in actu secundo, quæ sine actuali usu rationis nequit exerceri: ergo. C. patet ex Philosophia. A. constat ex dictis; quia actus dominii sunt liberæ, & voluntariæ dispositiones.

Confirm. utraque pars ex illo D. Pauli ad Gal. 4. v. 1. : *Quanto tempore hæres parvulus est, nihil differt a servo; cum sit Dominus omnium.* Ubi Apostolus supponit 1. parvulum esse verum dominum, quamvis non habeat usum rationis. 2. Judicat, eum non habere usum dominii, eoquod careat usu rationis.

Objic. Ad dominium in actu primo obtinendum requiritur acceptatio voluntaria, & quidem actualis: atqui parvulus expers usus rationis non potest actu voluntarie acceptare aliquid: ergo. R. D. M. requiritur acceptatio universaliter n. M. in aliquibus, & plurimis casibus c. M. Certum est, quod aliquarum rerum dominium habeamus absque ulla acceptatione, vg. dominium famæ, honoris, membrorum, item & vitæ quoad usum: potuit & Respublica transferre dominium in aliquos absque eorum acceptatione, acceptante Republica pro ipsis: hinc R. 2. d. m. parvulus non potest acceptare per se ipsum c. m. per Rempubicam, aut per tutores, in quorum arbitrio voluntas parvuli auctoritate publica est collocata n. m.

215 Afferro 3. Deus est absolutissimus Dominus omnium rerum creatarum. P. 1. ex S. Scriptura, in qua dicitur Judith 9. *Dominus totius creature.* Sap. 12. *Omnium Dominus.* Ratio est: quia ille est Dominus alicujus rei, qui de ea potest disponere tanquam sua: atqui Deus absolutissime potest de omnibus rebus creatis disponere tanquam suis, eas pro libitu suo destruendo, aut in alium usum applicando: ergo. Et hoc dominium in omnes res creatas est Deo essenziale, & inabdicabile; nam iste essentialiter, & semper manet, & debet esse supremus Dominus.



minus, & Gubernator cujuscunque alterius rei, quæ non est Deus.

Objic. Qui habet dominium rei alicujus, potest etiam illius dominium abdicare: atqui Deus nullius rei creatæ dominium potest abdicare juxta dicenda: ergo Deus nullius rei creatæ dominium habet. M. constat; nam 1. dominium est jus, sed de essentia juris est, ut illud sit abdicabile, prout colligitur ex definitione juris supra data. Iterum 2. certum est, quod Dominus rei possit illam vendere, vel donare alteri, & sic ejus dominium abjicere. 3. Quia Dominus rei potest de illa disponere omni modo: atqui qui ejus dominium non potest abdicare, non potest de ea disponere omni modo: ergo.

R. D. M. qui habet dominium creatum, ac finitum c. M. qui habet dominium increatum, infinitum, & supremum n. M. Ex quo patet responsio ad primam & secundam probationem; nam illa definitio juris loquitur tantum de jure creato & finito, quod est abdicabile, & in alium transferri potest rem vendendo, vel alio modo alienando. Ad tertiam probationem R. iterum d. M. omni modo possibili c. M. impossibili n. M. atqui Deo est impossibile, abdicare a se rei alicujus creatæ dominium.

Affero 4. Etiam Christus quæ homo adhuc in terris vivens, propter unionem hypostaticam probabiliter, *saltem quoad jus & actum primum*, habuit dominium quoddam *universale*, & *excellentie* in omnes res creatas, vi cujus potuisset de omnibus rebus mundi pro libitu suo disponere, eas destruendo, aliis donando &c. Henno, Herincx, Antoninus Durandus, Suarez, & alii contra alios. 216

Prob. De Christo semper illud est asserendum, quod ei est magis honorificum, dummodo id fieri possit absque inconvenienti: atqui tale dominium in actu primo, & quoad jus Christo est magis honorificum, & de eo asseri potest absque omni inconvenienti: ergo.

Dixi: *saltem quoad jus, & actum primum*; in actu enim secundo non usus est hoc dominio, quoad in terris ambulavit, saltem ordinarie, dum ordinarie pauperem egit vitam.



Objic. Nicolaus III. c. *Exiit.* de V. S. in 6. docet, Christum aliquando caruisse proprietate omnis rei temporalis: ergo non fuit Dominus omnium rerum. R. Illud capitulum loqui de dominio privato, ac subordinato, quale etiam competit cæteris hominibus: & hoc utique ad tempus caruit Christus quia homo; non autem loqui de dominio universali, & excellentiæ. Quoad alia solvenda nota, unum dominium privatum excludit alterum privatum, quia sunt ejusdem rationis; non autem dominium Christi universale, & excellentiæ excludit aliquod hominis privati dominium, quia est diversæ rationis.

217

Affero 5. Omnis homo est capax domini. Communis. P. Omnis homo gaudet intellectu & voluntate, & consequenter in actu primo saltem potest disponere de rebus tanquam suis &c. ergo est capax domini. Ex quo

Colliges: etiam infideles & peccatores esse capaces domini. Ita definitum est in Concilio Constantiensi sess. 15. contra Wicleffum, & Joannem Huf. Veritas hæc desumitur ex sacra pagina; nam 1. Petri 2. & ad Rom. 13. jubemur obedire dominis non tantum bonis, sed etiam *discolis*, reddere tributum, obsequium, honorem Principibus gentilibus, & peccatoribus. Ratio est: per peccatum nemo amittit intellectum, aut voluntatem: ergo neque capacitatem ad dominium. Accedit, maxima ex AAriorum sententia sequi absurda; nam cum nemo sit certus, an sit in statu gratiæ, incerta forent omnium rerum dominia: proinde nulla foret securitas & fides, & via aperiretur continuis spoliationibus, & injuriis sub prætextu, quod spoliatus bono aliquo existat in statu disgratiæ, & sic non amplius sit Dominus ejusmodi boni, ac proinde illo licite spoliari potuerit.

Petes: An Angeli etiam habeant dominium? R. Eos esse domini capaces asserunt omnes: an autem defacto habeant aliquod dominium, vel strictum jus in hæc inferiora, & corporalia, affirmant aliqui, alij negant. Verum de hoc nihil constat, eoquod nihil de eo sit revelatum. Quare misso dominio Angelorum, cujus notitia nobis non adeo necessaria est, pergemus ulterius indagare dominium humanum, quem in finem sit

§. II.



*An dari possit dominium ejusdem rei penes duos in solidum?*

Sermo hic est 1. de dominio ejusdem rationis; etenim certum est, duobus in eadem re posse competere dominium diversae rationis: sic in eadem re potest Deus habere dominium supremum & absolutum: creatura vero vg. Petrus, dominium creatum & subordinatum: item respectu ejusdem agri potest uni competere dominium directum, alteri utile, uni jus proprietatis, alteri usus juris, vel usufructus. 2. de dominio in eandem rem, ac pro eodem tempore, & instanti; nam quod duo homines duarum distinctarum rerum possint esse Domini, omnibus clarum est. Pariter liquet, plures successive posse dominium usurpare in eandem rem: sic Petrus hoc anno est Dominus hujus agri, anno sequenti potest ejusdem Dominus fieri Paulus, si e. g. eum a Petro emat &c. 3. est quaestio de dominio pleno, & perfecto tam ex parte objecti, seu rei, quae cadit sub dominium, quam ex parte subjecti, seu illorum, qui sunt Domini talis rei. Verbo: inpraesentiarum controvertitur, an duo vel plures pro eodem instanti respectu ejusdem totius rei totaliter possint habere dominium, & quidem singuli in solidum, ita, ut cuilibet, etiam seorsim sumpto totum dominium in totam rem totaliter competat. 218

Dixi: cuilibet seorsim; nam certum est, quod plures indivisim possint habere dominium totale alicujus rei: sic omnes cives per modum unius Domini indivisum habent Dominium respectu alicujus sylvae & agri, sed nulli ex his seorsim accepto competit totale jus, vel dominium in ejusmodi agrum, Sylvam &c. Dixi 2. totum dominium, & quidem totaliter; nam si duo, vg. Petrus & Paulus, haberent dominium in solidum respectu alicujus rei, tunc Petrus e. g. seorsim acceptus haberet jus ita libere, ac plene disponendi de hoc agro, eum etiam vendendi, ac alienandi &c., ac si nullus alius foret Dominus ejusdem; si enim tam plenum jus non haberet, non esset Dominus per-



fectus, & plenus ejusmodi rei, & sic everteretur status quæstionis; nam hic unice quæritur, an duo possint esse *pleni*, ac *perfecti* Domini respectu ejusdem omnino rei.

- 219 Nota ulterius, duplicem hic quæstionem esse: *una est*: an detur dominium duorum in solidum *permanens*, id est, an Petrus & Paulus respectu ejusdem agri possit per aliquam continuatam temporis durationem, vg. per integrum, aut plures annos habere dominium in solidum? *altera est*, an hujusmodi dominium in solidum saltem sit possibile *in instanti* donationis, vel translationis domini. Per instans autem donationis intelligo illud, in quo verum est dicere: *Nunc donatarius acquirit dominium, quod immediate prius non habuit*. Jam indagatur, an in illo instanti, quo donatarius primo & immediate acquirit dominium, donans etiam sit Dominus ejusdem rei donatæ: adeoque quæstio est, an in instanti donationis dominium ejusdem rei donatæ sit penes donantem simul, & donatarium?

Ante resolutionem quæstionis obiter quoque adverte, per *donatarium* intelligi illum, cui aliquid donatur, sicut & per *fidei commissarium*, cujus fidei aliquid committitur, per *promissarium*, cui datur promissum. Similes termini sapius per decursum hujus tractatus redibunt, ac semper in prædicta significatione accipiendi sunt. H. N.

- 220 Afferro 1. Impossibile est circa eandem rem dominium duorum in solidum *permanens*. Communior contra Franciscum Schmier L. 3. Tract. 2. c. 2. sect. 3. §. 5. Cælestinum Mayr Tract. de J. & J. q. 5. art. 2. §. 2. & 3., Ernestum a Someting. l. 2. tr. 1. n. 36.

P. 1. Impossibile est, ut aliquis pro eodem tempore habeat, & simul non habeat potestatem disponendi perfecte de aliqua re: atqui si daretur dominium duorum in solidum, tunc aliquis pro eodem tempore haberet, & simul non haberet potestatem perfecte disponendi de aliqua re: ergo impossibile est dominium duorum in solidum circa eandem rem. M. patet ex lumine naturæ. m. facile probatur; fingamus enim Petrum & Pau-



Paulum esse Dominos in solidum respectu ejusdem equi. In hoc casu Petrus haberet potestatem plene, & perfecte disponendi de equo juxta suum beneplacitum, quod facile concedunt AArii, & status quaestionis supponit: & simul idem Petrus non haberet potestatem perfecte disponendi de tali equo, quod ostenditur; siquidem circa illud Petrus non habet jus plene disponendi, circa quod alius, scilicet Paulus, habet jus impediendi dispositionem Petri, atqui Paulus habet jus impediendi dispositionem Petri circa equum, eo ipso, quia Paulus æquale habet jus, ac Petrus: proinde, si Petrus vellet uti suo equo ad equitandum, posset Paulus resistere, & impedire equitationem, & quidem vi juris & domini, quod & ipse habet in equum. Profecto quantum juris Paulus habet in equum tantum, decedit de jure Petri in eundem equum: ergo dato, quod Petrus & Paulus haberent simul jus, & dominium in equum, nullius dominium esset perfectum & plenum, sed cujuslibet juri aliquid decederet, scilicet illud ipsum, quod accedit juri alterius. Hæc ratio probat quoque impossibilitatem domini instantanei in solidum circa eandem rem.

P. 2. ex L. 5. Si ut certo. §. si duobus 15. ff. Commodati, vel contra, ubi habetur: Si duobus vehiculum commodatum sit, vel locatum simul, Celsus filius scribit l. 6. digestorum, quæri posse, utrum unusquisque eorum in solidum, aut pro parte teneatur, Et ait: duorum quidem in solidum dominium, vel possessionem esse non posse. Quid clarius?

Objic. 1. Duo possunt eandem rem in solidum possidere: 221 ergo etiam duo possunt esse Domini in solidum ejusdem rei. R. 1. N. a. Ratio negandi clare colligitur ex lege mox citata, & verbis ejus ultimis. R. 2. D. a. possunt duo eandem rem possidere in solidum eodem genere possessionis, id est, ambo naturaliter, vel ambo civiliter N. a. diverso genere possessionis, scilicet unus naturaliter, & alter civiliter C. a. Quid sit possessio in Communi, & quid sit possessio civilis, & naturalis, dicetur inferius agendo de præscriptione. Interea consulatur Reifensstuel de possessione.

Objic. 2. L. Si debitor. 10. ff. de pignoribus Et hypothecis, habetur: Si debitor res suas duobus simul pignori obligaverit, ita, ut



ut utrique in solidum obligata essent ; singuli in solidum adversus extraneos Serviana utentur : ergo singuli haberent jus plenum in tali pignore. R. d. c. Singuli haberent jus plenum tum ex parte objecti, quam subjecti N. c. solum ex parte objecti, non autem ex parte subjecti, seu haberent singuli seorsim jus plenum in totum pignus, non autem totaliter C. c. Atque in hoc sensu citata lex intelligi debet, ne sit opposita priori, quam in secunda probatione adduxi. Hinc, si eadem omnino res sit tota Petro, & Paulo oppignorata, tunc quilibet ex his seorsim, vg. solus Petrus, potest eam adversus extraneos, ad quos forte ea devenit, defendere actione, quæ dicitur *Serviana*. Si autem sic agendo in judicio recuperat rem oppignoratam, tunc eam non solum sibi, sed & Paulo recuperat. Ex quo patet, quod Petrus habeat quidem jus in totam rem oppignoratam, sed non habeat id totaliter, quia non habet cum exclusione juris alterius, scilicet Pauli. Quare & actio Serviana singulis seorsim, vg. soli Petro, adversus extraneos competit solum in ordine ad totam rem, non autem ad eam totaliter sibi recuperandam. Terminos in hac distinctione, & responsione adhibitos ex notandis, & probatione conclusionis quivis facile intelliget.

Objic. 3. Finge casum : Francisco, & Antonio donatur equus, & conceditur cuilibet plenissima facultas disponendi de eodem equo in omnem usum possibilem, sola addita conditione, ut quoad equi usum inter hos duos donatarios valeat jus præventionis, vi cujus unus alterum possit prævenire, & consequenter etiam impedire in equi usu, Jam sic argumentor : in hoc casu uterque habet potestatem perfecte disponendi de equo : ergo uterque est perfectus ejus Dominus in solidum.

R. N. a. Habens perfectum, & plenum dominium rei aliqujus, potest de illa disponere pro libitu, illam alienando, servando, aut ad quoslibet usus applicando, idque pro quovis tempore, quin ab aliquo privato citra injuriam possit impediri. Ast hoc non amplius esset verum stante jure præventionis in altero vg. Antonio ; hic enim licite, & absque injuria vi juris præventionis posset Franciscum impedire ab usu equi ; si enim Antonius præveniret, & equum adhiberet ad equitandum, vel



vel eum omnino venderet, aut destrueret, tunc eo tempore Franciscus non posset equo uti ad similem usum. Ex quo omnino patet, quod neque penes Franciscum, neque penes Antonium sit plenum jus; in quantum enim vi juris præventionis unus alterum gravat, in tantum utriusque jus in equum diminuitur.

Dices: Jus præveniendi appellat solum super actum secundum, & super actuale exercitium dominii, quod per ejusmodi præventionis beneficium impeditur: ergo non obstante jure præventionis, in nostro casu Franciscus & Antonius haberent dominium in solidum in actu primo respectu ejusdem equi, C. patet ex dictis. R. N. a. Jus præveniendi non solum actum secundum dominii, verum & actum primum, ac ipsum jus dominii limitat, & restringit; nam dum Antonius habet jus præveniendi, & vi hujus juris potestatem nomine, & autoritate propria disponendi de equo, adimitur Francisco jus eodem tempore, quo prævenitur, disponendi de illo equo: adeoque non habet jus plenum disponendi, quia non potest, & quidem ex defectu juris, omni tempore disponere de equo.

Instabis: Etsi Pupillus sine consensu Tutoris non possit valide disponere de bonis suis, tamen est verus, & plenus Dominus suorum bonorum in actu primo: ergo, etsi Franciscus & Antonius quandoque per jus præventionis impediuntur, ne disponant de equo, tamen sunt veri & pleni Domini ejusdem. R. N. c. & parit. Lex prohibens, aut annullans dispositionem Pupilli, sine autoritate Tutoris factam, aut faciendam, nullum jus ponit in aliquo alio, vi cujus hic posset de rebus Pupilli nomine proprio disponere, adeoque jus & dominium Pupilli substantialiter, & intrinsece in actu primo omnino intactum, & illæsum relinquit, solumque actum ejus secundum, & actualem dispositionem prohibet, ac irritat. Longe aliter contingit in casu objectionis, ubi Franciscus ab Antonio præventus, ideo prohibetur uti equo, quia Antonius ipse habet jus, nomine & autoritate propria pro eo tempore equum applicandi ad usum quemvis sibi placitum.

Objic. 4. Possunt duo, vel plures Judices habere potestatem jurisdictionis respectu alicujus certæ Communitatis, vel cer-



torum subditorum: ergo etiam jus proprietatis potest duobus in solidum competere respectu ejusdem rei. R. d. a. possunt duo, vel plures habere in solidum potestatem jurisdictionis diversi ordinis, unus vg. supremam, alter inferiorem, & subordinatam c. a. ejusdem ordinis & rationis, *subd.* ita tamen, ut inter hos Judices detur jus praeventionis, & causam ab uno rite judicantem; alter de novo non possit judicare C. a. secus N. a. & c. Verum tali modo non habetur verum jus duorum in solidum, ut patet ex praecedentibus. Pro aliis objectionibus.

Nota: Juristas duplex distinguere dominium in solidum, unum vocant *privative* tale, vi cuius quis ita est Dominus rei alicujus, ut quoscumque alios ab usu ejusdem rei impedire possit. Alterum est *cumulative* competens duobus, vi cuius ambo habent jus plenum disponendi de re per beneficium praeventionis, si scilicet unus alterum in dispositione praeveniat. Primum dominium duorum in solidum negant esse possibile: alterum admittunt, quod & nos admittimus cum ipsis: hoc tamen Juristas negamus, quod ejusmodi dominium, cumulative duobus competens, sit ex parte utriusque Domini perfectum, & omnino plenum; est enim utrinque restrictum per ipsum jus praeventionis, ut abunde ex dictis patet.

Objic. 5. Possunt plures esse debitores ejusdem rei in solidum: ergo etiam possunt plures esse Domini ejusdem rei in solidum. R. d. a. possunt esse debitores in solidum, ut quivis tantum teneatur solvere in defectum alterius, vel aliquam partem debiti C. a. secus N. a. Et sic possunt etiam esse plures Domini ejusdem rei, ita, ut quivis tantum possit disponere de parte rei, vel quando alter non disponit &c., sed tali modo non datur dominium duorum in solidum plenum, & perfectum.

Objic. 6. Si tres Personae divinae assumpsissent tres naturas humanas, tunc quaelibet ex his naturis habuisset dominium respectu totius mundi, sicut defacto habet natura humana a. Verbo assumpta: ergo tunc penes has tres naturas fuisset dominium in solidum. R. In tali casu dominium excellentiae, & universale fuisset penes tres naturas assumptas indivisum, vel penes quamlibet ex iis inadaequate.

Afferro



Affero 2. Neque datur dominium duorum in solidum instantaneum circa eandem rem. Ita Communissima contra Cardinalem de Lugo, & R. P. Antonium Mayr. 222

P. 1. ex ratione jam allegata, quæ etiam hic procedit; si enim in instanti donationis tam donans, quam donatarius essent pleni & perfecti Domini respectu ejusdem equi, sequeretur manifesta contradictio, nempe donantem e. g. esse Dominum perfectum, & non esse Dominum perfectum: esset Dominus, ut dicunt AArii, & non esset Dominus perfectus, quia tantum de plenitudine domini decederet donanti, in quantum donatarius etiam esset Dominus, ut constat ex dictis.

P. 2. In instanti donationis completivo solus donatarius habet dominium rei donatæ, non autem donans: ergo tunc non datur dominium duorum in solidum. A. p. pro illo instanti donans dominium suum destruit; nam illi renunciat, ac transfert illud in donatarium; ergo pro illo instanti donans non potest habere dominium. c. patet; nam implicat, ut Petrus vg. simul dominium destruat, & simul illud actu habeat: sicut implicat mori, ac vitam perdere, & simul actu eam possidere, & vivere.

Confirm. Implicat, ut Religiosus in instanti completivo Professionis, quo per votum paupertatis renunciat omnibus bonis suis, adhuc habeat dominium illorum bonorum: ergo etiam implicat, ut aliquis pro instanti completivo donationis, quo in donatarium dominium rei donatæ transfert, illud simul habeat. A. constat; nam illud instans completivum Professionis, est primum instans status Religiosi, quocum non potest stare dominium. C. tenet a pari; nam sicut donatio, ita illa renunciatio bonorum per votum solemne paupertatis, est libera dispositio de bonis suis, procedens ex potestate disponendi.

Prob. 3. evertendo rationem AAriorum. Juxta AArios donans ideo esset Dominus in instanti donationis, quia libere tunc disponderet de re donata, & dominium in donatione actu exerceret: hæc ratio nulla est: ergo. m. p. tum, quia etiam Religiosus in Professione libere disponit de suis bonis, illorum domi-



nium abjiciendo, & tamen non est Dominus: *tum*, quia ille, qui comburit librum suum, etiam in instanti completivo combustionis exercet dominium in librum, & de eo libere disponit, eum destruendo, & tamen in illo instanti completivo combustionis, & destructionis non est Dominus libri. Ratio est: quia in instanti completivo destructionis liber desinit, & non amplius existit: sed rerum non existentium non potest esse dominium. Afferunt Authores passim & alia exempla, ex quibus absurditatem sententiæ contrariæ ostendere conantur, quæ brevitate gratia omittuntur.

223

Objic. 1. Donator in instanti donationis de re sua perfecte disponit, eam donando alteri: ergo in eodem instanti est Dominus rei C. patet; nam qui de re sua perfecte disponit, debet esse Dominus ejusdem. R. 1. Retorq. Argum. Dominus comburens librum suum, in instanti combustionis & destructionis illius de eodem libere disponit: ergo debet pro eodem instanti esse Dominus libri. R. 2. D. a. donator pro eo instanti perfecte disponit de re, quæ erat præsuppositive sua C. a. quæ etiam pro instanti donationis est sua N. a. Distinguo etiam rationem additam: qui de re sua perfecte disponit dispositione conservativa dominii, debet pro illo instanti dispositionis esse Dominus ejusdem Conc. qui disponit de ea dispositione destructiva dominii Neg.

Nota ex præcedentibus, acceptationem, translationem, ac retentionem dominii non esse actum ipsius dominii formalis, sed fundamentalis: seu potestas acceptandi, retinendi, & transferendi dominium est dominium radicale. Ratio est: illud non est dominium formale, quod etiam cum negatione, & carentia dominii formalis conjungi potest: atqui potestas acceptandi dominium datur in non habente dominium actuale, & ante hoc: iterum pro illo instanti, quo transfertur, & non retinetur dominium, hoc destruitur, & ejus carentia adest, & tamen simul ibi existit potestas transferendi, vel non retinendi; alias enim non valide transferretur. Et hoc dominium radicale respectu ejusdem rei in ordine ad diversam functionem, & actionem potest esse, quarum una alteram non impedit; sic enim unus potest



test habere facultatem donandi dominium, & alter acceptandi illud. Hoc tamen notandum est, quod dominium radicale ad hoc, ut sit expeditum ad acceptandam rem, præsupponat carentiam domini formalis: & potestas expedita transferendi præsupponat existentiam domini, sicut etiam potestas proxime expedita ad destruendum aliquid, præsupponit rem illam existere.

Objic. 2. Nemo dat, quod non habet: ergo Dominus in illo instanti, quo donat alteri librum, debet eum habere, & ejus esse Dominus. R. 1. Retorq. Argum. Nemo moritur, qui non vivit: nemo perdit pecuniam, quam non habet: ergo pro illo instanti, quo quis moritur, & privatur vita, habet vitam, & vivit, & pro illo instanti, quo quis perdit pecunias, & illis spoliatur, eas habet. R. 2. D. a. nemo dat. quod non habet, to *habet* accipiendo secundum *statum* pro tempore, vel instanti præsentis N. a. secundum distractionem, vel *ampliationem* pro instanti immediate præcedente C. a. Vel D. aliter: nemo dat, quod non habet extrinsece, ac præsuppositive pro instanti immediate præcedente C. a. quod non habet actu intrinsece, & pro tempore præsentis, quo dat N. a. to *habet* in prædicta propositione debet accipi cum ampliatione ad tempus immediate præteritum, uti fit in his propositionibus: *Iustus peccat: cæcus videt.* Videantur Summulæ de ampliatione & statu, uti & Physica de inceptione & desitione rerum tam intrinseca, quam extrinseca.

Dices: Ex hoc sequeretur, quod Petrus, donans librum suum alteri, injuste agat: sequela est absurda: ergo M. prob. donat rem alienam; nam liber ille in instanti donationis non amplius est Petri, sed donatarii: atqui qui donat rem alienam alteri, injuste agit: ergo. m. claret; fur enim, rem furtivam donans alteri, ideo injuste agit, quia rem alienam donat. R. N. M. ad prob. D. M. donat rem alienam, quam ipse per suam donationem primum facit alienam C. M. quæ antecederet jam erat aliena N. M. Ideo fur peccat donando rem alienam, quia immediate ante instans donationis nullum habuit dominium in rem alienam, adeoque eam donando non potest exercere aliquod dominium, illud destruendo: aliter se res habet in donan-



te rem, quæ erat immediate sua, & cujus dominium per donationem destruit.

Objic. 3. Quando donatarius non acceptat rem donatam, manet dominium penes donantem : ergo saltem tunc in instanti donationis non destruitur dominium. R. D. c. non destruitur in instanti donationis necdum completæ C. c. completæ N. c. Pro illo instanti donatio est completa, pro quo illi respondet acceptatio donatarii : & de tali completa donatione hic est sermo.

Objic. 4. Actus non destruit potentiam suam, a qua elicitur : ergo neque donatio, quæ est actus dominii, destruit potentiam suam, seu dominium, a quo exercetur. R. D. a. actus conservativus, & perfectivus C. a. actus destructivus *subd.* in physicis Tr. a. in moralibus N. a. Dein R. universim negando suppositum, quod translatio dominii sit actus formalis dominii actu existentis, sed est actus dominii radicalis.

Objic. 5. Causa existit pro illo instanti, pro quo ponit effectum : sed dominium est causa donationis : ergo debet existere pro instanti donationis. R. D. m. dominium virtuale, & radicale est causa donationis C. m. dominium actuale *subd.* immediate præhabitu. C. m. secus N. m.

Nota etiam, donare tantum posse illum, qui dominium rei donatæ adhuc habuisset pro illo instanti, quo donat. Unde solvis istud argumentum : Ex nostra sententia sequeretur, quod ille, qui dominium tantum ad tria instantia accepisset, posset illud transferre donando pro quarto instanti. R. enim neg. assumptum. Ratio est ; quia nequit donare, qui, si non donasset, non habuisset dominium talis rei pro illo instanti, quo donat.

Objic. 6. Si Petrus vg. in extrema necessitate constitutus, furriperet, & comederet panem Pauli, nullam huic injuriam irrogaret, quia in simili necessitate æque haberet jus, & dominium in panem Pauli, ac ipse Paulus : ergo tunc Petrus & Paulus sunt Domini in solidum ejusdem rei. R. Tr. a. N. c. Si verum est antecedens, tunc hujus panis, quem Petrus in extrema necessitate occupat, dominus est solus Petrus, utpote in quem



quem transfertur dominium ejusdem per ipsum jus naturæ, vi-  
cujus in extrema necessitate res etiam alienæ fiunt primo occu-  
pantis. De quo tamen plura alibi.

Objic. 7. Tota hæc difficultas posset expediri dicendo,  
quod donans, & donatarius habeant quidem dominium rei do-  
natæ simul pro eodem instanti reali, non autem pro eodem si-  
gno naturæ; posset enim idem instans reale temporis in duo si-  
gna naturæ dividi, in quorum primo donans haberet dominium  
rei donatæ, illudque actu exerceret; in secundo vero signo il-  
lud non amplius haberet ipse donans, sed donatarius: ergo.  
R. N. a. nam donans pro signo naturæ, vel pro instanti illo,  
quo actu donat, non potest amplius esse Dominus rei donatæ.  
Ratio hujus est: quia donans in illo instanti, vel signo, quo  
donat, amittit, & destruit dominium rei donatæ: ergo il-  
lud pro tunc non amplius habet; si enim adhuc haberet domi-  
nium, tunc illud non amitteret, aut destrueret, sed potius con-  
servaret. Itaque 2. antequam AAriis concedantur hæc duo si-  
gna naturæ in eodem instanti reali, probent illi prius, quod  
in eodem instanti reali donans, & donatarius simul habe-  
ant dominium ejusdem rei donatæ: item, quod donans in  
instanti reali donationis adhuc sit Dominus rei donatæ. 3. Ha-  
bere dominium, & non habere dominium, sunt talia contradicto-  
ria, quæ simul pro eodem instanti reali non possunt esse vera; alias  
enim pro eodem instanti reali posset aliquod subjectum habere ali-  
quam formam, & simul posset carere illa forma, vg. dominii: &  
sic privatio formæ, & forma simul pro eodem instanti reali in eo-  
dem subjecto darentur: quod est contra principia philosophica.

~~~~~

## ARTICULUS II.

*Qualium rerum dominium homo habeat?*

§. I.

*An Homo sit Dominus vitæ?*

**A**SSERO: Homo nec est Dominus vitæ suæ, nec alienæ. 224  
Communis, ac certa omnium Catholicorum. Prob. I. ex  
S. Scriptura, ubi humanæ vitæ dominium specialiter tri-  
bui-



buitur Deo, ut Sap. 16. *Tu es Domine, qui vitæ & mortis habes potestatem.* & Deuter. 23. dicit Dominus: *Ego occidam, & vivere faciam.* Accedit communis sensus omnium hominum recte sentientium, qui judicant, homini non competere dominium in vitam humanam.

Prob. 2. Si homo haberet dominium in vitam humanam, tunc illud accepisset a Deo, a quo omne jus debet provenire: sed non accepit a Deo: ergo. m. p. Non accepit a Deo tale jus per legem positivam Dei, cum nulla talis exstet: imo S. Scriptura, quæ est lex positiva Dei, satis indicat, vitæ nostræ dominium ad solum Deum spectare. Neque accepit per legem naturalem; si enim homo vi legis naturæ haberet dominium in suam, vel alienam vitam, tunc vi ejusdem legis haberet jus disponendi de vita sua, & aliena, ac se, & alios homines occidendi pro libitu: atqui vi legis naturalis debet potius aliquis abstinere ab occisione sui, & se, ac vitam suam conservare; instinctus enim naturæ vel maxime hominem inclinat, & impellit ad vitæ suæ conservationem: prout & lumen naturæ prohibet, ne quis usurpet jus pro libitu suo alterum in vita violandi: ergo.

Ex his habes, quod homo sit tantum custos, & usufructuarius vitæ suæ, ac ea tantum uti, & frui valeat salva ejus substantia.

225

Objic. 1. Eccli. 15. habetur, quod Deus ab initio constituerit hominem, & reliquerit eum in manu consilii sui, posueritque ante eum vitam & mortem: ergo homo est Dominus vitæ suæ. R. hunc textum loqui de libertate hominis in ordine ad vitam æternam obtinendam, vel deperdendam: non autem loqui de dominio vitæ temporalis.

Objic. 2. Respublica potest occidere malefactores: ergo Respublica habet dominium in vitam malefactorum. R. D. a. potest occidere malefactores ex licentia, & permissione Dei, qui est Dominus vitæ & mortis C. a. ex jure proprietatis, & dominii in vitam malefactorum N. a.

Objic. 3. Potest unus homo habere dominium in alterum hominem: ergo etiam in vitam alterius hominis. A. constat in

ca.



casu, quo homo in servitutem redigitur, & fit mancipium; tale enim mancipium a suo Domino etiam vendi potest. R. D. a. potest unus homo habere dominium utile in alterum hominem C. a. dominium directum in ipsam substantiam, ac vitam alterius N. a. Dominus in mancipium habet dominium utile quoad operas serviles, & utilitatem temporalem: non autem habet dominium directum quoad vitam ejus; alias ejusmodi Dominus talem servum posset pro libitu occidere.

Objic. 4. Etsi Noë in Arca non potuerit occidere animalia, tamen fuit eorum Dominus: ergo etsi homo non possit seipsum occidere, tamen est vitæ suæ Dominus. R. D. a. Noë fuit Dominus, etsi non potuerit occidere animalia ob defectum juris N. a. ob adjectam prohibitionem divinam, vi cujus non potuit in actu secundo licite uti suo jure & dominio C. a. Homo autem non potest seipsum occidere ex defectu juris, ac domini in vitam suam.

## §. II.

## An Homo possit seipsum occidere ?

Nota: dupliciter posse aliquem influere in homicidium, scilicet *directe*, & *indirecte*. *Directe* aliquis influit in homicidium juxta nostrum Bosco *de Baptismo* disp. 2. Herincx, & P. Ildephonsus Tausch in suo moribundo fol. 68., quando mors hominis tanquam finis immediatus, vel tanquam medium ad finem obtinendum intenditur ex natura actionis illius, quæ ponitur: contra quando mors neque ut finis, neque ut medium intenditur ex natura actionis: esto cæteroquin tali actioni infallibiliter sit annexa, tunc occisio hominis non est *directa*, & per se, sed potius *indirecta*, & per accidens in æstimatione morali.

226

Res hæc clarior fiet exemplis. Sic *directe* seipsum occidit, qui bibit venenum, vel suo pectori infigit gladium, hunc in finem, ut miseras hujus vitæ evadat. Item *directe* occidit alterum, qui in eo ejusmodi actionem exercet, vg. eum transfodiendo, ut ab ejus persecutione liberetur. Ratio est, quia in his casibus mors tam sua, quam aliena ut medium ad aliquem finem obtinendum intenditur, & quidem ex natura actionis; cum



transfossio hominis, & potatio veneni actiones sint ex natura sua primario, & unice causativæ mortis.

Ast vero miles ad evertendam turrin hostilem, quæ victoriæ capessendæ plurimum obstat, submittit copiosum pulverem nitratum, eumque accendit, certus, se tam impetu ignis, quam ruina turris corruentis occisum iri: miles, inquam, iste se tantum indirecte occidit, & in sensu morali non tam sibi infert, quam ex iusta causa solum permittit mortem suam. Ratio est: quia per immissionem, & accensionem pulveris pyrii directe, & unice, & quidem ex natura actionis huius, intendebatur eversio turris, cui per accidens interitus militis conjungebatur, qui neque ut finis, neque ut medium intendebatur: non quidem ut finis; cum finis huius actionis fuerit nocumentum hostibus inferendum, ac victoria promovenda: neque ut medium; nam eversio turris, non autem occisio militis erat medium ad nocendum hostibus &c. Idem est cum proportionem dicendum de occisione hominis alterius: sic miles, qui fugit hostem insequentem, nec aliter potest evadere, nisi equi ungulis proteratur, & occidatur infans, in via jacens, non censetur infantem hunc directe occidere; quia actio hæc nec ex natura sua, nec ex intentione fugientis primario & unice dirigitur ad causandam mortem infantis, sed ordinatur potius ad fugam, & salvandam vitam fugientis. H. N.

227

Affero: Secluso mandato, aut instinctu divino non licet in ullo casu sibi ipsi violenta manu inferre mortem. Est certa omnium Catholicorum sententia contra Circumcelliones hæreticos.

Prob. 1. ex S. Scriptura, quæ per præceptum: *Non occides*, prohibet omnem occisionem rectæ rationi contrariam: sed nulla occisio est magis contraria rectæ rationi, quam sui ipsius; cum lumen naturæ ipsum inculcet obligationem maximam servandi vitam propriam: ergo,

P. 2. Homo non est Dominus vitæ suæ, sed Deus: ergo eam sine iussu, aut instinctu divino non potest destruere.

Prob.



Prob. 3. autoritate D. Augustini, qui l. 1. de Civitate Dei c. 20 sic ait: *Restat, ut de homine intelligamus, quod dictum est: Non occides: non alterum: ergo nec te; neque enim, qui se occidit, aliud, quam hominem occidit.* Id etiam docet alibi, ut eodem l. 1. de Civit. Dei c. 17. cujus verba referuntur c. 9. caus. 23. q. 5.

Ex quibus rejecta manet hæresis illorum ex Donatistis, qui Circumcelliones, vel Circumeuntes vocabantur, ac circuibant omnia loca, docentes, hominem seipsum interficientem, aut ab alio, quem rogaverat, interfectum esse Martyrem.

Objic. 1. Multi se ipsos occiderunt, & tamen non peccarunt: ergo potest aliquis licite seipsum occidere. R. D. a. Multi seipsos occiderunt, vel ex instinctu speciali Spiritus sancti, vel ex ignorantia invincibili, & tamen non peccarunt C. a. secus N. a. Aliqui equidem seipsos occiderunt sine peccato, sed id vel Spiritu S. inspirante, vel ex ignorantia invincibili factum est. Sic de S. Apollonia legitur in Breviario, quod se in ignem injecerit, *majori Spiritus S. flamma intus accensa.* De Samsonem, qui eversione totius ædificii seipsum oppresserat, ait D. Augustinus l. 1. de Civit. c. 21: *Spiritus latenter hoc jusserat, qui per illum miracula faciebat:* Unde D. Paulus ad Hebr. 11. inter Sanctos commemorat Samsonem. Idem etiam dici potest de Eleazaro, qui l. 2. Machab. 6. occidendo Elephantem, cui Regem insidere credebatur, seipsum interemit. De Razia vero posset superesse dubium, de quo Scriptura 1. Machab. 14. dicit, quod seipsum petierit gladio, eligens potius nobiliter mori, quam subditum peccatorum fieri. Et revera D. Thomas 2. 2 q. 64. art. 5. ad 5. non videtur adeo laudabiliter loqui de facto hoc Razia: quare & dicit, mortem ipsius a Scriptura vocari *nobilem* ex mente Razia, in hoc puncto decepti, & errantis. Verum noster Nicolaus de Lyra, Victoria, & Bannez volunt, quod & hic ex Spiritu S. inspiratione egerit: vel saltem per ignorantiam invincibilem excusari potest.

Objic. 2. D. Hieronymus relatus Can. *Non est nostrum;* 23. q. 5. ait: *Non licet propria perire manu absque eo, ubi castitas periclitatur:* ergo saltem ad tuendam castitatem licet seipsum oc-



cidere. R. 1. Opponendo S. Hieronymo S. Augustinum, qui neque ob hanc, aut aliam causam admittit suicidium: Quare occisionem sui, propria manu a Virginibus aliquibus factam pro custodia pudicitiae, idem S. Doctor l. 1. de Civit. Dei c. 26. excusat per specialem instinctum Spiritus sancti. Rdent aliqui 2. S. Hieronymum omnino sensisse, quod liceat pro custodia Virginitatis seipsum occidere: propterea eum cum reverentia dimittunt.

R. 3. melius explicando Canonem sub distinctione: Non licet propria perire manu, absque eo, ubi castitas praecise periclitatur, & nullus adest instinctus Spiritus sancti, neque ignorantia invincibilis N. a. si adest Spiritus S. instinctus, vel ignorantia invincibilis C. a. S. Doctor hunc casum, ubi castitas periclitatur, noluit comprehendere sub generali Regula, & praecipto de non occidendo se, quia noluit peccati arguere eas feminas, quae se tutandi pudoris gratia occiderunt, quae poterant laudabiliter agere vel ob ignorantiam invincibilem, vel ob specialem inspirationem divinam. Rdent alii aliter: sed meo iudicio multum torquent auctoritatem Canonis in sensum, quem non videntur habere ex mente S. Hieronymi.

Objic. 3. *Debemus pro fratribus animas ponere*, Joan. 3.: ergo licet seipsum occidere pro salute proximi. R. D. a. debemus animas ponere &c. mortem nobis inferendo N. a. aliunde illatam patienter sustinendo C. a.

Objic. 4. Potest homo aliquando occidere alterum hominem, vg. Judex reum, & homo privatus injustum aggressorem vitae suae: ergo etiam potest aliquis seipsum occidere. R. N. c. & parit. Suicidium enim directe pugnat contra inclinationem naturae: non sic occisio alterius, praesertim rei, vel injusti invasoris vitae alienae. 2. Nec ex S. Scriptura, nec ex praxi tribunalium, nec ex communi sensu hominum habetur, quod Suicidium in aliquo casu sit a Deo, tanquam Domino vitae, permisum: aliud est de occisione alterius in certis circumstantiis.

Objic. 5. Licet aliquando sibi optare mortem ex justa causa: ergo etiam licet eam sibi inferre. R. D. a. licet optare sibi mortem.



mortem secuturam debito modo per causas naturales, aut alia ratione licita C. a. licet optare mortem secuturam modo debito, aut a seipso inferendam N. a. & c.

Colliges 1. quod neque reus ex jussu judicis possit in se sententiam mortis exequi, seipsum transfigendo gladio, vel venenum ebibendo. Ita Lugo, Herincx, Mezger, Antonius Mayr: & teste Herincx est communissima omnium DD. sententia contra nostrum Poncium, & Haunoldum. Ratio est: quia judex non potest juste imperare ejusmodi occisionem sui ipsius, a reo exequendam: ergo neque reus potest seipsum occidere ex jussu judicis. C. est clara; si enim reus posset seipsum occidere, tunc juxta AArios ideo, quia sic se occidendo justam judicis sententiam exequeretur. A. igitur prob. Judex non habet dominium in vitam, sed habet tantum jurisdictionem occidendi reos ex commissione divina eatenus, quatenus hoc necessarium est ad bonum commune: sed ad bonum commune non est necessarium, ut reus seipsum occidat, sed sufficit, si occidatur per alium: ergo.

P. 2. Non potest homo etiam ex jussu judicis se occidere, nisi Deus, ceu Dominus vitæ, id permiserit: atqui nec ex S. Scriptura, nec aliunde habetur. quod Deus permiserit, ut reus seipsum occidat: ergo.

P. 3. Suicidium directe pugnat contra naturam, ac contra praxin omnium tribunalium Christianorum, an omnium Gentium morigerarum: ergo non videtur a Deo concessum.

Confirm. Homo non est idoneus minister ad exequendam sententiam mortis in Patre suo ob repugnantiam naturæ: ergo minus est idoneus minister ad exequendam sententiam talem in seipso ob eandem, vel adhuc majorem rationem.

Ad objectiones in contrarium dico, posse quidem reum sæpe in se exequi aliquas sententias judicis, vg. sententiam exilii exeundo e patria, quia illas exequendo non lædit dominium Dei. Aliud est in præsentî casu.



230

Colliges 2. Neque Virginem ob tutandam castitatem, neque reum ad evitandum ultimum supplicium, neque innocentem ad evitanda gravissima tormenta, & mortem etiam maxime infamem ac crudelem, posse seipsum occidere. Ratio est, quia nullo in casu a Deo est permissum, seipsum interimere.

231

Colliges 3. Neque hominem reum iuste damnatum, ut fame pereat, posse respuere cibos clanculum oblatos, praesertim si hi constanter afferantur, ita, ut poenam mortis penitus, vel saltem per longum tempus evitare possit. Ita Lugo, & Herincx, citans pro se plures alios, & inter hos etiam D. Thomam, contra Lessium, Henricum, & Sotum. Ratio est 1., quia ejusmodi homo respuendo constanter cibos seipsum occideret, etenim aliquis seipsum non solum constanter cibos sibi manum violentam injicit, vg. transfigendo se gladio, sed etiam dum mediis communibus, & quotidianis non utitur ad conservandam vitam. Hinc ille, qui pertinaciter nollet aliquid comedere, ubi posset, apud omnes diceretur seipsum enecare, & peccare. 2. Si talis non peccaret non comedendo, tunc ideo, quia se conformaret justae sententiae judicis, quae vult ipsum non comedere, sed haec ratio nulla est: ergo M. est AAriorum m. p.; nam sententia judicis tali nec imperat, nec imperare potest, ut non comedat, si aliquid habeat ad comedendum, sed praecipit tantum, ne alii ei aliquid ad manducandum afferant: ergo.

Colliges 4. Non solum reum iuste capitis damnatum, verum & innocentem, qui a Tyranno ad supplicium trahitur, posse cervicem inflectere, patibulum ascendere, accommodare jugulum, ponere se super strue lignorum, in qua comburatur, vel posse aperire os, ut a carnifice venenum infundatur &c. Ratio est, quia in his omnibus se non occidit, sed solum permittit, ut ab alio occidatur. Ita Lugo, Herincx.

§. III.

*An liceat aliqua facere, vel omittere, ex quibus certo, vel probabiliter mors propria indirecte est secutura?*

232

Affero, & R. affirmative, si iusta, & gravis causa adfit. Reiffenstuel, Herincx, ac ipse Scotus 4. D. 14. q. 3. §. de secundo, cum



cum communialiorum. Prob. Per præceptum: *Non occides*, non est nobis mandatum, ut omni modo vitam nostram servemus, nec eam unquam periculo mortis exponamus, sed solum est præceptum, ut non ex directa intentione vitam nostram veluti exofam nobis auferamus, & ne sine justa, & sufficiente causa eam periculo exponamus; si enim sine sufficiente causa nos exponeremus periculo mortis, tunc in æstimatione morali censeremur nobis directe inferre mortem.

Rationem hanc exemplis communiter receptis declarant, & roborant DD. Sic 1. miles potest, imo tenetur pugnare, & stationem suam militarem in communi periculo non deferere, etsi certo prævideat se occidendum. 2. Reus mortis, etsi sciat se certo occidendum, potest manere in carcere, etiam aperto, & non fugere: imo potest zelo justitiæ, ut sua peccata ad aliorum exemplum vindicentur, se judici tradere, prout quidam ex homicida factus Monachus in Prato spiritali fecisse legitur; quia ob justam causam potest aliquis mortem procurare, legitimo modo sibi inferendam per alium. Herincx, Lessius, Navarrus. 3. Potes inservire peste infectis, etsi putes te inficiendum: imo si sis Parochus talium hominum, debes ipsis Sacramenta necessaria ministrare cum periculo vitæ tuæ. 4. Grassante incendio, si non suppetat alia ratio tam horrendæ mortis evadendæ, potes te e sublimi per fenestram demittere cum certo mortis discrimine; non enim in hoc casu intenditur ipsa occisio per præcipationem, sed tantum fuga tormenti illius, quod quis sustinere deberet, si esset vivus comburendus: mors autem defilientis, si sequatur, habet se per accidens, & concomitanter: imo & animalia instinctu naturæ se taliter salvare nituntur, ne viva comburantur. Non tamen potest aliquis ad evitandum vivicomburium se gladio confodere; quia hæc esset directa occisio sui ipsius: qualis semper est, dum mors intenditur tanquam finis, aut medium, saltem ex natura actionis, prout hic contingeret; mors enim esset medium necessarium ad evadendum vivicomburium. Aliud est in eo, qui se præcipitat; nam etsi ex præcipatione mors non sequatur (uti interdum fit) tamen adhuc evaditur incendium. Herincx p. 3. Tr. 2. D. 6. n. 11.



5. Potest, & debet aliquis confiteri fidem cum periculo vitæ, ubi confessionis hujus est necessitas: imo etsi non sit necessitas, dummodo martyrium cedat in defensionem fidei, & honorem Christi, potest aliquis se illi sustinendo offerre: indiscrete vero sine grandi utilitate sese offerre martyrio, peccatum est mortale.

6. Licitum est desiderio majoris perfectionis, & pro salute animæ ingredi monasterium, vel Religionem, quamvis cum probabili, aut quasi certo periculo brevioris vitæ. Nec obligatur Novitius egredi e Religione, vel Religiosus quærere, aut petere dispensationem a communi disciplina, & rigore Ordinis, v.g. a nocturnis matutinis, etiamsi exinde morbi, vel mortis periculum immineat. P. Mezger. Videatur etiam Reiffenstuel p. 1. T. 9. D. 3. n. 14. Ratio hujus est: quia hoc non est, mortem sibi positive asserere, quod directe nunquam licet: sed tantum est, non adhibere omnia media ad impediendam mortem, & eam permittere sequi ex cursu naturæ: quod ob bonum virtutis sæpenumero licet. ut patet in illo, qui inservit peste infectis: sic etiam D. Casimirus laudatur ab Ecclesia, quod maluerit servare propositum Virginitatis, quam pro salvanda vita juxta consilium Medicorum uxorem ducere.

7. Per mortificationes moderatas aliquis non peccat, etsi subeat periculum aliquod non notabile abbreviationis vitæ. Idem est de illo, qui voluntario cibi & potus excessu non notabiliter vitam abbreviat. Ratio hujus est, quia alias innumeræ actiones tam Sæcularium, quam Regularium forent peccati gravis damnandæ, quod tamen non adeo facile fieri debet. Aliud est, si quis per mortificationes suas (quæ certe in hoc casu essent indiscretæ) notabilem vitæ abbreviationem causaret, vel saltem periculo se ejusmodi abbreviationis exponeret. Idem a fortiori est, qui id faceret per excessum in cibo & potu, ut observant Lugo, Herincx, & alii.

8. Nec tenemur vitam nostram servare, nisi per media ordinaria, & communia. Quare non tenemur bibere vinum, nec ad locum alium etiam propinquum migrare ad quærendum salubriorem aërem: neque tenemur adhibere medicinas nimis pretio-



§. III. *An liceat aliqua facere &c. unde mors est secutura &c.* 233

tiosas, et si his non applicatis vita forte ad decennium esset abbrevianda: sic neque Carthusianus in morbis etiam periculosissimis tenetur comedere carnes: neque tenemur admittere abscissionem membri necessariam ad vitam conservandam, si hæc abscissio sine extraordinario dolore, aut horrore fieri nequit: aliud esset, si illa sine gravi difficultate peragi valeret.

Tandem omiſſis aliis, quæ apud Casistas inveniuntur, nota in præſenti materia, non poſſe ſemper haberi rationem aliquam a priori: hinc sæpe ſtandum eſt iudicio communi a natura inſito. Et ex hoc communi ſenſu apparet, Authorem naturæ non exigere in multis caſibus curam conſervandæ vitæ, & permittere, ut ea plurimis periculis ex juſta cauſa exponatur. Accedit: ſi vita non ſæpius ex juſta cauſa poſſet non ſervari, vel diſcrimini obijci, tunc eſſemus continuis ſcrupulis, & anxietatibus obnoxii, ne hic & nunc iterum noceremus vitæ noſtræ, eam aliquid abbreviando, vel non omni modo poſſibili ſervando. Inſuper, ſi nihil ſimile liceret, peſſime conſultum foret Reipublicæ humanæ, cum omittendæ eſſent plurimæ actiones bono communi utiles, aut omnino neceſſariæ, ne per eas læderetur ſanitas, ac vita in diſcrimen abbreviationis adduceretur. Quare non poteſt rationabiliter cogitari, Deum, ceu Dominum vitæ, in hac parte eſſe invitum, cum licentia ejusmodi actionum plus boni afferat, quam mali, conſiderando etiam vitas hominum: vg. licentia curandi ægros utique conducit ad plurimorum vitam conſervandam, eſto, cum aliquo periculo vitæ paucorum Medicorum, qui ſubinde, licet raro, inſiciuntur.

§. IV.

*An Homo ſit Dominus membrorum ſuorum?*

Aſſero 1. Homo non eſt Dominus, ſed cuſtos, & fructuarius ſuorum membrorum. Communis DD. P. *tum* ex communi ſenſu hominum: *tum*, quia homo non accepit a Deo dominium in membra; nam de vita & membris quoad dominium eſt par ratio. Ex quo



Deduces 1. Quod per se loquendo, & extra casum necessitatis illicita sit mutilatio sui, sive per se, sive per alium adhibenda. Ratio est: quia nemo licite disponit de re illa, cujus non est Dominus: atqui homo non est Dominus membrorum suorum: ergo non disponit de illis licite, eadem abscindendo a corpore. Idemque reductive est prohibitum per præceptum: *Non occides.*

Deduces 2. Non esse licitam castrationem hominis, seu ob suavitatem vocis, seu ob castitatem servandam id fiat: cujus ratio est partim jam data, partim patet ex Canonibus 22. & 23. Apostolorum, ubi se castrantes dicuntur sui homicidæ, scilicet partiales. Similiter Can. 1. Concilii Nicæni prohibetur, ne tales se castrantes ad Clerum admittantur.

Neque dicas: ejusmodi mutilationem posse fieri ex sanctissimo fine, scilicet ob carnis illecebras facilius vincendas. Contra est 1. Pernicies hominis spiritualis non tam a membris humanis oritur, quam a malitia, & negligentia voluntatis: ergo ad vincendas tentationes carnis potius amputanda est malitia, & negligentia voluntatis, quam membra humana. 2. Sanctiora suppetunt remedia, quibus castitatem servare possumus, dummodo velimus. 3. Neque castratio est remedium conveniens ad vincendas carnis tentationes, sed solum impedit generationem. Imo illi, qui castrantur, præsertim in virili ætate, magis agitantur libidine, ut Herincx noster ostendit ex S. Chrysostomo Hom. 63. in Matth. & Basilio l. de Virginitate circa finem, ubi id probat rationibus, & exemplis. Quod & ipsum satis aperte indicat Scriptura Eccli. 20. & 30., & hujus mentis etiam est D. Augustinus l. 6. contra Julianum c. 14. Quare passim improbatum factum Origenis, qui teste S. Hieronymo zelo Dei, sed non secundum scientiam ferro truncavit genitalia.

234

Objic. 1. Christus Matth. 18. ait: *Si manus tua, vel pedes scandalizat te, abscinde eum, & projice abs te:* ergo licet amputare manus & pedes ob tollendum scandalum. R. hunc textum loqui de abscissione quadam morali, seu de fuga occasionum peccati, non vero mutilatione corporali membrorum.

Objic.



Objic. 2. D. Marcus dicitur sibi pollicem præscidisse ex humilitate, ne deberet fieri Sacerdos: ergo ob virtutem licet sibi membrum amputare. R. Marcus hic (qui non est Evangelista, sed Anachoreta quidam) nisi ex inspiratione divina, vel ex ignorantia invincibili id fecerit, non potest a peccato excusari. Ex hujusmodi instinctu superno censetur egisse adolescens ille, qui linguam sibi mordicus præscidit, & præcisam expuit in faciem impudentem meretricis, ut se ab impuro ejus amplexu defenderet, cum aliter se tueri non posset: de quo D. Hieronymus in vita S. Pauli in principio ejusdem. Imo, ut recte judicat Lessius, in simili extrema necessitate, in qua alia se tuendi via non superest, etiam sic instinctu speciali aliquem posse linguam cruentare, aut parvulam ejus particulam resecare: uti & miles in extrema necessitate, ubi plumbum non amplius esset ad manum, posset sibi dentes excutere, iisque loco plumbeæ glandis uti: quod aliquando a Lusitanis factum esse, Historiæ Indicæ referunt. Ita Lessius.

Affero 2. Non obstante priore conclusione potest aliquis seu per alium, seu per se abscindere aliquod membrum suum, quando hujus abscissio necessaria est ad conservandam vitam totius hominis. Communis. Prob. Pars, & membrum est propter totum: ergo ob conservationem totius hominis potest membrum ejus abscindi, & destrui ab illo, qui habet authoritatem id faciendi. *subf.* atqui quilibet respectu suorum membrorum habet hanc authoritatem; cum quilibet sit eorum Custos, & Administrator: adeoque potest de illis disponere, prout expedit, & necessarium est ad salutem totius hominis. 235

Objic. 1. Homo non potest se ipsum occidere: ergo neque potest seipsum mutilare. R. N. c. & parit. Ideo potest membrum tolli in homine, quia ejus mutilatio potest esse necessaria ad salvandum aliquid præstantius in homine, quam est membrum, videlicet ad servandam vitam, quæ, non abscisso membro, perire deberet: at occisio sui non potest esse medium ad salvandum aliquid præstantius in homine, quam esset ipsa vita. 2. Membrum est propter vitam totius: ergo recta ratio dicat, ut aliquando possit tolli membrum ad salvandam vitam: id non



procedit de ipsa vita. 3. Inclination naturalis non ita pugnat contra mutilationem, sicut contra occisionem sui.

Objic. 2. Non sumus Domini membrorum: ergo de iis non possumus disponere. R. D. c. ad arbitrium nostrum C. c. ex concessione Domini, quam ratio dicit adeste tunc, dum ejusmodi dispositio, & mutilatio est necessaria ad avertendum gravissimum malum, & majus bonum, nempe vitam conservandam N. c.

Dixi in hac assertione: *pote*st abscindere, non autem *debet*, si id sine ingenti, & acerbissimo dolore fieri non posset; nam obligamur ad vitæ nostræ conservationem tantum adhibere media ordinaria, & non admodum difficilia, non autem extraordinaria, & nimium cruciativa, ubi locum habet illud Marii, qui, cum ei crus aperiretur, dixit: *Non est tanto dolore digna salus*. Id, quod jam §. præcedente est insinuat. Excipitur tamen casus, quando vita alicujus hominis esset bono communi necessaria; tunc enim ob bonum commune tenetur ejusmodi mutilationem, quamvis peracerbam, admittere.

236

Affero 3. Potest etiam aliquis seipsum mutilare, quando tyrannus id imperaret sub interminatione mortis certæ, vg. ita ferendo sententiam: nisi hic sibi ipsi amputet manum, capite plectatur. Herincx, Lessius, & alii passim contra Sotum. Et hæc assertio habet locum, etsi sententia sit injusta. P. iterum sicut prius; quia & hic destructio membri est necessaria ad salvandam vitam totius hominis.

Objic. 1. Necessitas ista provenit ab extrinseco, nempe a voluntate, & malitia tyranni, & non ab ipsis membris: ergo propterea membra non debent destrui. R. Etsi ista necessitas causaliter proveniat a malitia tyranni, & is propterea peccet, moraliter tamen est in ipso homine, & in membris ejus, quæ propter malitiam alterius fiunt esse moraliter noxia homini. Unde tali necessitate pressus non peccat, dum medio mutilationis utitur, & refecat membra illa, ob quæ servata vitam deberet perdere. In forma D. a. non provenit a membris causaliter, & physice C. a. moraliter N. a.

Objic.



Objic. 2. Ergo etiam, dum tyrannus, totam alias civitatem everfurus, petit a civibus occidi aliquem innocentem, possent hunc illi occidere; quia membrum, & civis posset se exponere pro toto, seu pro civitate, sicut membrum corporis ad imperium tyranni potest exponi pro toto corpore. R. N. illat. & parit. Respublica non habet tantam authoritatem in suos cives, sicut homo in membra, vitæ suæ non necessaria; nam civis quilibet est suppositum aliquod per se subsistens, & sui juris, non habens essentialem dependentiam a Republica: contra membra illa essentialiter, & necessario dependent a corpore reliquo, a quo etiam vitam participant.

Hæc nostra conclusio a fortiori haberet locum ad mandatum Judicis, qui alias iusta morte puniret reum, nisi hic sibi ipsi præscinderet manum: quamvis, ut notat Herincx ex Maldero, Judex id non possit reo, etiam mortem promerito, legitime præcipere, qui proinde non obligaretur præcipienti obedire, neque tam duro remedio, quale est abscissio membri proprii, vitam redimere, quamvis, ut assertio dicit, posset obedire, si libere vellet.

Nihilominus hucusque dicta merito limitant Lessius, & Herincx in casu, quo abscissio membri proprii imperaretur in contemptum Fidei, aut Religionis: vg. si ideo tyrannus infidelis præciperet, ut tibi ipsi amputares manum, quia absolvisti pœnitentem, baptizasti infantem, aut alium neo-conversum, quia celebraisti Sacrum; tunc enim præscindendo tibi manum ad imperium tyranni, videreris punire, & improbare factum tuum, veluti pœna dignum, quod redundaret in injuriam Religionis, & fidei.

## §. V.

*An homo sit Dominus famæ, honoris, libertatis, actionum suarum liberarum &c. ?*

Certum est 1. Quod homo sit Dominus suarum actionum liberarum; quia de iis ad libitum potest disponere, illas vel eliciendo, vel omitendo.

237



Certum est 2. Sub dominio hominis posse esse bona spiritualia externa, qualia sunt jurisdictio spiritualis, Episcopatus, Prælatūra, Jura beneficiorum; nam & de his, quamvis non ad omnem usum, disponere potest.

Certum est 3. Etiam bona spiritualia interna, ut gratiam sanctificantem, habitus, ac operationes liberas pertinentes ad ordinem supernaturalem, posse cadere sub dominium humanum. Ratio est: quia hæc bona sunt in potestate nostra, ut ea pro libitu possimus habere, vel deperdere, & ea etiam nostra industria aliquando dispositive, aliquando meritorie comparamus. Gratiæ tamen gratis datæ non subsunt hominis dominio; quia eas homo non comparat industria propria, nec de iis pro libitu disponere potest.

Certum est 4. Bona fortunæ esse objectum dominii humani: imo etiam homo unus potest esse sub dominio alterius, talis proinde Dominus suum servum, vel mancipium, in quod habet dominium, etiam vendere potest. Res hæc clara est de jure civili, & gentium: remanet solum quæstio, an homo etiam sit Dominus famæ, & honoris proprii? ad quod

238

Affero: Homo est Dominus famæ, & honoris proprii. Communis contra Cajetanum. Prob. 1. Fama, & honor acquiruntur ex actionibus nostris liberis. quarum habemus dominium: ergo etiam sumus Domini nostræ famæ, & nostri honoris.

Confirm. ad eundem Dominum spectat fructus, ad quem spectat dominium rei illius, quæ fructificat: sed dominium actionum nostrarum, quæ fructificant famam & honorem, spectat ad nos: ergo etiam dominium ipsius famæ, & honoris.

Prob. 2. Nisi homo esset Dominus suæ famæ, non posset ejus restitutionem condonare detractori: sed potest condonare: ergo est Dominus suæ famæ. M. patet; Dominus enim solus, non autem alius, qui non habet dominium, potest condonare restitutionem rei sibi ablatae, & ad se spectantis.

Prob. 3. In multis casibus possumus licite nos infamare ob honestum aliquem finem: sed hoc non liceret, si famæ nostræ  
Do-



Domini non essemus : ergo m. constat ; nam ex nullo, etiam honesto fine possumus nos ipsos occidere, quia vitæ Dominium non habemus. M. prob. 1. Possumus aliquid revelare ad nostram infamiam, si id requiratur ad petendum consilium : 2. ad nostri humiliationem, ac vitandum peccatum superbiæ : 3. si alicui detraximus, tenemur restituere famam etiam cum nostra infamia.

Objic. 1. Fama & vita pari passu ambulant : sed homo non est Dominus vitæ : ergo nec est Dominus famæ. R. D. M. fama & vita pari passu ambulant quoad aliqua Tr. M. quoad omnia N. M. Quamvis fama, & vita quandoque, præsertim apud nobiles, quoad æstimabilitatem sint pares : discrimen tamen inter utramque est, quod fama, non autem vita sit in dominio hominis, quia sunt rationes diversæ pro vita, quæ non pugnant pro fama. 239

Objic. 2. Homo se diffamans sine justa causa, peccat : ergo non habet dominium suæ famæ. R. 1. Retorq. Argum. Homo sine causa prodigens pecunias proprias, peccat : ergo talis homo non est Dominus pecuniarum propriarum. R. 2. N. c. Ratio negandi patet ex retorsione : quia homo etiam potest peccare, dum rem, cujus habet dominium, sine justa causa prodigit, aut dissipat.

Objic. 3. D. Augustinus L. de bono viduitatis. c. 22. dicit : *Conscientiam nostram esse necessariam nobis, famam proximis, ac proinde crudelem esse, qui famam negligit* : ergo se infamans peccat contra justitiam. Ante Rnem.

Nota, famam proximo posse tripliciter esse necessariam. 1. Quando ex nostra fama dependet fama alterius : sic ex fama Religiosorum in particulari dependet fama totius Religio : proinde ex infamia Religiosi nascitur infamia Ordinis. 2. Quando fama nostra est necessaria, ut præstemus proximo officium, ei stricto jure debitum : ita fama bona est necessaria Episcopis, Parochis &c., ut bene regant sibi commissos subditos. Atque in his duobus casibus ex multorum opinione contra justitiam peccat, qui se infamat, non quidem ideo, quia seipsum fama privat : sed quia ex concomitanti proximo nocet, vel ipsum infamando, vel se reddendo ineptum ad præstandum illi debitum

ex



ex iustitia officium. 3. Quando per infamationem nostram tantum sumus impedimento, ne illud impendere possimus proximo, ad quod solum ex charitate, non ex iustitia tenemur. In hoc ultimo casu solum contra charitatem peccat, qui se infamat, quemadmodum & ille tantum contra charitatem delinquit, qui pecuniam, qua pauperibus succurrere poterat, inutiliter dilapidat. H. N. in forma.

R. D. c. ergo, qui se infamat, peccat contra iustitiam, propterea præcise, quia se infamat N. c. quia simul concomitanter proximo nocet in bonis famæ, vel fortunæ T. c. Si autem homo non esset Dominus famæ suæ, deberet ideo contra iustitiam peccare, quia se infamaret, & se propria fama privaret.

Objic. 4. Etiam Respublica est domina famæ subditorum: ergo illa posset infamare subditum innocentem. R. N. c. Respublica non est magis domina famæ, quam bonorum aliorum, quæ spectant ad homines privatos, scilicet est domina dominio jurisdictionis. Quare sicut non potest civem spoliare aliquo bono, nisi exigat necessitas communis, ita nec privare aliquem fama, nisi id petat bonum commune: sed bonum commune non potest exigere ablationem famæ, quæ fieret innocenti, & quæ consequenter deberet fieri per mendacium, aut falsum crimen impositum: ergo.

Objic. 5. Ex eo, quod homo possit remittere restitutionem membri abscissi, non sequitur, quod homo sit Dominus suorum membrorum: ergo ex eo, quod homo possit condonare restitutionem famæ propriæ, non sequitur, quod sit Dominus famæ propriæ. R. N. supposit. Ant. quod homo possit remittere restitutionem membri abscissi. Imo membrum abscissum non potest amplius restitui, ut per se liquet, si autem ejusdem restitutionis foret possibilis, tunc ab homine condonari non posset: at contra, etsi restitutio famæ sit possibilis, tamen ab illo, cui detractio est facta, potest condonari.

Ex quo habes, illam restitutionem, quæ quandoque ratione membri abscissi fieri debet, non fieri pro membro ipso, sed pro damnis, quæ in bonis fortunæ concomitanter ex abscissione membri sequuntur, ut dum mutilatus ob defectum membri suo officio non amplius fungi potest.







3. Alia sunt bona *beneficialia* : & sunt redditus, seu proventus annui, quos Clerici ratione alicujus beneficii Ecclesiastici, in titulum collati, percipiunt : vg. quos habent ex Decanatu Cathedrali, Canonicatu, Episcopatu, Parochia &c. Ejusmodi bona sunt decimæ, vel annua stipendia in fixo consistentia. 4. aliqua sunt simpliciter *Ecclesiastica*, nempe bona mobilia, & immobilia deputata ad rem divinam peragendam, uti sunt paramenta Ecclesiæ, ac vasa sacra &c. Item, quæ ad fabricam, vel ornatum templi, aut alterius piæ causæ destinata sunt : itemque domus, agri, vineæ, jus decimandi, jurisdictiones, & similia, ex quibus redditus etiam pro beneficiatis colliguntur : quæ tamen non tam bona Clericorum, quam Ecclesiarum sunt : germanice dicitur : *Sie gehören dem Heiligen zu.*

241

Quæres 2. An Clerici Sæculares, seu non Religiosi habeant dominium bonorum suorum Patrimonialium, & quasi patrimonialium ? R. 1. Clerici Sæculares sunt veri Domini bonorum patrimonialium, & de illis possunt disponere ut Laici, etiam ad causas profanas. Herincx, Lessius, Holzman, ac alii. Prob. Per assumptionem Clericatus Clerici neque fiunt incapaces domini, neque se eodem abdicant, nec se obligant ad patrimonialia in pias causas expendenda : ergo. Constat idem aperte ex cap. *Quia nos. de testamentis*, & ex communi sensu, & praxi.

R. 2. Clerici habent etiam absolutum dominium bonorum quasi patrimonialium, adeoque ea quoque in causas profanas, sicut patrimonialia expendere possunt. Ita citati, ac communis DD. Prob. Hæc bona dantur Clericis per modum justî stipendii laborum : ergo absque intentione expressa, vel tacita restringendi dominium.

Confirm. 1. Clerici quoad stipendium laboris non sunt deterioris conditionis, quam Officiales Laici : ergo sicut dominium mercedis justæ, quæ solvitur Officialibus Laicis, nec solet, nec potest restringi, ita nec restringi debet dominium justæ mercedis, & stipendii, quod Clerico est solum.

Confirm. 2. Pauper fit Dominus absolutus eleemosynæ, quam gratis, & precario accipit : ergo a fortiori Clericus fiet Do-



Dominus absolutus iusti stipendii, & illud pro libitu in causas quoque profanas expendere poterit. Ex quo

Deduces 1. Clericum etiam fieri Dominum absolutum horum stipendiorum, etsi ea longe excedant operam: ut si alicui pro unico sacro celebrato dentur 10. aurei, ut resolvunt Lessius, & Schmalzgrueber. Ratio est 1., quia hæc stipendia libere a fidelibus, & sine restrictione domini dantur. 2. Si pauper absolute, & sine restrictione fit Dominus eleemosynæ, liberaliter, & gratis donatæ, etsi ea sit magna: quidni Clericus fiat Dominus absolutus, & illimitatus stipendii libere collati pro aliquo onere. 242

Deduces 2. Redditus quoque stolæ, qui dantur Parocho ob functiones quasdam Parochiales, vg. ob benedictionem nuptiarum, collationem Baptismi &c, esse sub absoluto dominio Parochi; nam sunt bona quasi patrimonialia, ut sentiunt Reiffenstuel L. 3. Decretal. Tit. 25. n. 7. Holzman, Engel, Navarrus, König, Molina. Ratio est; quia & isti Redditus stolæ dantur Clericis quoque curatis, uti Parochis, non intuitu beneficii, sed præcise intuitu industriæ, & laboris spiritualis præstiti, absque ullo expresso vel tacito onere, erogandi superflua in pauperes, vel causas pias; *Dignus est enim operarius mercede sua.* Verum 243

Dices: Ejusmodi bona Parochus per actus parochiales, & quia Parochus est, acquirit, non acquisiturus, si Parochus non esset: ergo illa acquirit intuitu beneficii parochialis, & non intuitu laboris: per consequens sunt bona beneficialia, & non quasi patrimonialia, vel industrialia. R. N. c. Beneficium Parochiale est tantum conditio, vel occasio, non autem causa motiva dandi Parocho redditus stolæ; hi enim a fidelibus, nullo habito respectu ad Beneficium Parochiale, sed intuitu solius ministerii, & laboris spiritualis exhibiti solvuntur. Quare si eadem ministeria ab aliis Clericis, qui beneficium Parochiale non habent, præstarentur, etiam his simile stipendium Christiani largirentur. Igitur beneficium Parochiale est mera conditio, & occasio ad hoc necessaria, ut ejusmodi Clericus possit legitime ponere illum actum, cujus præcise intuitu merces est reddenda.



244

Deduces 3. Distributiones quoque quotidianas transire in perfectum dominium Canonicorum, qui eas possunt pro libitu in causas etiam profanas expendere. Holzman, Mezger, Schmalzgrueber, Pichler, Engl, & communior contra Reiffenstuel Tit. jam cit. & nonnullos alios ab ipso allegatos. Prob. Hujusmodi distributiones non conferuntur intuitu Canonicatus, sed ratione laboris, ac assistentiae particularis in choro, ut sic foveatur studium frequentandi chorum. 2. Distributiones quotidianae nec nomine fructuum beneficalium veniunt: ergo non conferuntur intuitu beneficii, neque sunt bona beneficalia, sed industrialia, & quasi patrimonialia. A. prob.; nam possunt Canonici ex dispensatione, vel privilegio absentes, gaudere fructibus Canonicatus & Beneficii, quin accipere valeant distributiones, per textum cap. un. de Clericis non residentibus. in 6. ergo distributiones quotidianae nomine fructuum beneficalium non veniunt, ne naturam eorum sequuntur. Addit Schmalzgruber: licet in impetratione Beneficii secundi exprimendus sit valor fructuum beneficii prius jam obtenti, non tamen est exprimendus valor distributionum quotidianarum: ergo signum est, quod distributiones inter fructus, & bona beneficalia non numerentur.

Dices 1. Distributiones quotidianae acquiruntur intuitu beneficii, & fructibus beneficalibus subrogantur: ergo. A. prob. juxta Tridentinum sess. 21. c. 3. de Reform. in Ecclesiis, in quibus non sunt fundatae speciales distributiones quotidianae, ex sunt ex Præbendarum, & beneficaliorum proventibus detrahendae: ergo fructibus, & proventibus beneficalibus subrogantur. R. N. a. ad prob. N. c.; nam distributiones nullatenus subrogantur redditibus beneficalibus: imo dum ex fructibus beneficii extrahuntur, perdunt naturam reddituum beneficalium, & induunt naturam diversam distributionum.

Dices 2. Fructus beneficii interdum in solis distributionibus consistunt, prout colligitur ex cap. ult. de V. S.: ergo fructus beneficii (qui etiam fructus *grossi* dicuntur) non habent aliam naturam quam distributiones. R. D. c. non habent aliam naturam tunc, quando ipsi fructus beneficales, & grossi in distributionibus consistunt Tr. c. quando præter distributiones adsunt alii fructus grossi N. c. Interim ita distinxi, & trans-



transmissi primum membrum distinctionis, quia A. R. P. Kresslinger T. 7. D. 4. n. 22. Theol. Moral. P. Reiffenstuel in additione aliqua existimat satis probabiliter, quod saltem tunc inter bona mere beneficalia numerari debeant distributiones, quando præter eas nulli alii fructus grossi adsunt; tunc enim vices reddituum beneficalium suppleant, & consequenter eorum naturam imitantur.

Verum probabilius est, quod & in hoc casu distributiones inter bona quasi patrimonialia sint numeranda, prout videntur sentire omnes supra citati pro assertione, & expresse ita docent plures apud Lugo allegati, ut Glossa, Abbas, Geminianus, Innocentius, Fillucius, ac Bonacina, qui omnes inter bona quasi patrimonialia referunt distributiones, etsi in illis solis omnes fructus beneficii consistant: quibus nec Lugo dissentit, & ego lubens consentio; nam dato, quod nulli alii fructus grossi adsint, distributiones tamen primario dantur intuitu laboris, & assistentiæ hic & nunc exhibitæ, consequenter per modum justî stipendii. 2. Esto, quod Parochus nullos alios redditus habeat, quam illos, quos ex stola, & functionibus parochialibus percipit, talis probabilissime horum reddituum sit plenus, & absolutus Dominus: ergo idem est de Canonico, qui nullos fructus grossos præter distributiones quotidianas obtinet. Ex quo colligis, quod ex objectione 2da adducta possit absolute negari consequentia.

Quæres 3. An etiam tunc distributiones, & præsentia sint reputandæ inter bona quasi patrimonialia, quando nulla est proportio inter laborem, & distributionem, seu remunerationem, ut si Canonico pro assistentia ad unum anniversarium solvantur 100. Imperiales. & Episcopo pro una Missa cantata 1000. aurei? R. affirmative. Ita P. Mezger, & sequitur ex dictis; etenim ejusmodi remunerationes æquiparantur distributionibus: adeoque & earum naturam, ac legem sequuntur. 2. Fundatores ejusmodi remunerationum censentur respectum habuisse ad specialem laborem, quem majori munificentia voluere remunerari. 3. Parochus pro exequiis, vel benedictione nuptiarum alicujus Magnatis accipiens 50. vel 100. Imperiales, ob excessum stipendii non obligatur superfluum in pauperes, vel pias causas expendere: 245



re: ergo idem est de Canonico, vel Episcopo in proposito casu. A. constat ex dictis. Conf. tenet a pari.

- 246 Quæres 4. Quibus bonis annumerari debeant redditus Capellanæ, vel aliorum beneficiorum simplicium, sub onere singulis septimanis certas Missas legendi, vel certis temporibus chorum frequentandi?

Nota: duplicem esse Capellaniam: una est amovibilis ad nutum, quæ proinde non confertur in titulum. Fructus talium Capellaniarum sunt mere industriales, ac conferuntur præcise ratione laboris, non autem intuitu Beneficii: hinc & Capellani ejusmodi redditus possunt erogare secundum libitum etiam in causas profanas. Ita sentit communis DD. Alia autem Capellania est collativa, & inamovibilis, estque verum Beneficium cum certo onere Missarum singulis septimanis, vel mensibus &c. celebrandarum: de hac loquendo

R. Redditi Cappellaniarum collativarum sunt vera bona beneficialia: quare de iis eadem sunt servanda, quæ de fructibus beneficialibus dicuntur. Ita sentiunt Mezger, Holzmann & alii communiter contra Cajetanum, Haunoldum, Sotum, & Vasquez. P. Isti redditus acquiruntur intuitu veri Beneficii in titulum collati: ergo sunt veri fructus beneficiales, consequenter sequuntur naturam fructuum beneficialium. Neque onus celebrandi Missas, & labor annexus facit, quo minus ejusmodi redditus dentur, & acquirantur titulo beneficii; nam fructus quoque Parochiarum, & Canonicatum non dantur Clericis otiosis, sed Ecclesiæ & Altari inservientibus, & tamen propter hoc non extrahuntur a ratione bonorum beneficialium, seu titulo Beneficii acquisitorum: ergo etsi Capellanus obligetur ad certum numerum Missarum, non sequitur, quod fructus conferantur præcise intuitu laboris, & non ratione beneficii.

- 247 Quæres 5. Quis habeat dominium bonorum mere Ecclesiasticorum quarti generis? R. 1. Nullus Clericus, & nullus alius homo in particulari habet dominium bonorum immobilium Ecclesiæ, suppellectilis sacræ, & aliorum bonorum mere Ecclesiasti-



fiasticorum: imo nec S. Pontifex solitarie, & in particulari acceptus est Dominus eorumdem. Atque in hoc sensu Instit. de rerum divisione. res sacræ, & religiosæ dicuntur esse nullius, scilicet privati, aut etiam Prælati seorsim spectati. Itaque

R. 2. Harum rerum dominium est penes Ecclesias, etiam particulares, seu penes cœtus, & communitates fidelium, constantes ex capite & membris: Prælati vero: etiam S. Pontifex seorsim & solitarie accepti solum habent administrationem earum. Lessius, Herincx, Haunold, & alii contra Navarrum, existimantem tale dominium esse penes solum Christum. Prob. Bona Monasteriorum illorum, quæ sunt domini capacia, spectant ad cœtum Religiosorum, tanquam ad dominum: ergo idem est dicendum de bonis Ecclesiarum. Accedunt varii textus juris, in quibus dominium bonorum Ecclesiasticorum Ecclesiis attribuitur, ut cap. Quorundam. 1. de Testamentis, & Tridentinum sess. 25. de Regularibus. Ratio est: ejusmodi bona a fidelibus sunt oblata Ecclesiis, licet cum onere & obligatione, ut eadem in Ecclesiæ bonum expendantur. Ex quo

Colliges: Prælatos, ac ipsum S. Pontificem posse peccare, 248 & obligatos esse ad restitutionem, si bona Ecclesiæ absque rationabili causa alienent, aut destruant in detrimentum illius Ecclesiæ, ad quam spectant. Ratio hujus est 1., quia sunt tantum administratores horum bonorum: atqui administrator, damnum aliquod causans illi, cujus bona administrat, peccat, & tenetur ad restitutionem. 2. quia hoc cum onere a Fidelibus sunt Ecclesiis oblata, ut non aliter, quam in bonum Ecclesiæ applicentur: hinc nequidem tota Communitas fidelium eadem bona aliter, quam in bonum Ecclesiæ, & finem, ad quem a Fundatoribus sunt oblata, impendere posset absque rationabili causa.

Dices: Ejusmodi bona vocantur in Canonibus sæpe *Res Dei, Patrimonium Christi*: ergo Christus solus est eorum Dominus. R. 1. Retorq. Vocantur etiam bona Ecclesiæ, ut in cap. 1. de Testamentis, ac Can. Expedit. c. 12. q. 1. R. 2. vocantur bona Dei, quia ex intentione fidelium ea non licet aliter expendere, quam in cultum, & honorem Dei: vg. ut per ea Mini-

stri



stri Ecclesiæ alantur, qui officium divinum peragant, Sacramenta ministrent, prædicent verbum Dei &c.

## §. II.

*An Clerici sæculares sint Domini bonorum beneficium, præsertim superfluum?*

249

Nota 1. Circa bona Clericorum tres esse distinguendos status juxta diversa Ecclesiæ tempora. 1. Tempore nascentis Ecclesiæ Clerici omnes in commune vivebant, emisso quoque voto paupertatis: ubi dispensatio, & administratio bonorum, quæ a fidelibus offerebantur Ecclesiis, erat penes solos Episcopos, qui illa in necessitates Clericorum, eleemosynas pauperum, redemptionem captivorum, aliaque pia opera pro temporum ratione dispensabant, ut patet ex Can. 2. & seqq. c. 12. q. 1. & seq.

*Postea* vero tempore Simplicii Papæ, qui Ecclesiæ præfuit circa annum 471., redditus Ecclesiastici in quatuor partes dividi cœperunt, ex quibus una cessit Episcopo, altera inter Clericos est distributa pro eorum meritis, & officiis, tertia destinata est in eleemosynam pauperibus, quarta applicata est Ecclesiæ fabricæ, ut habetur Can. 26. 27. ac seqq. c. 12. q. 2. Hæc tamen divisio (ut refert Clarissimus P. Antonius Mayr) non fuit ita universalis, ut non pro locorum & temporum varietate aliter, ac aliter disponeretur, ut e. g. aliquando Episcopus tertiam partem, aliquando dimidiam Episcopus, & alteram dimidiam Clerus acciperet dispensandam.

*Denique* successu temporis, cum Clericorum multitudo, & Ecclesiarum numerus in dies cresceret, bona Ecclesiæ sunt distributa in certa beneficia, & præbendas, deputata singulis Beneficiatis congrua portione reddituum. Et hæc ultima divisio, & dispositio in hodiernam adhuc diem in Ecclesia viget.

Ex priori autem divisione, quæ tempore Simplicii Papæ facta est, hodie adhuc restant separati redditus Episcopi, & Clericorum, ac pro fabrica Ecclesiæ destinati: verum, quo devenit pars quarta, quæ olim pro pauperibus deputabatur, ignoratur;



ratur; nescimus enim, an ea confusa sit cum portione Episcopi, Clericorum, aut fabricæ, vel an applicata sit in erectionem Hospitalium, aliarumque piarum foundationum, vg. beneficiorum novorum, etiam pro pauperibus Clericis.

Nota 2. Bona beneficialia, de quibus supra jam dictum est, esse subdividenda in duas partes: una est, quæ ad honestam & congruam Clerici sustentationem requiritur: Altera est, quæ supra honestam & congruam sustentationem redundat, & superflua est. Seu bona beneficialia alia sunt *necessaria* ad honestam sustentationem, alia *superflua*. De posterioribus præcipue disputari solet.

Nota 3. ex nostro Herincx, & aliis: congruam sustentationem Beneficiati non consistere in indivisibili, neque una certa regula posse determinari. Hinc sicut in mercibus venalibus triplex pretium, quorum quodlibet est justum, a Theologis assignari solet: sic & honesta sustentatio Clerici in tres classes dividi potest, scilicet in summam, mediam, & intimam: vg. si sustentatio congrua infima essent 500. floreni, media forent 600., summa essent 700., prout P. Pichler exemplificat. Si ergo Beneficiatus summam quoque sustentationem eligit, adhuc juste agit, nec peccat; sicut ille non peccat, qui mercem suam summo pretio vendit. Per summam tamen sustentationem nolim intelligere pompas, & delicias profanas, aliaque ejusmodi, quæ statum Clericalem minime decent: sed intelligo vitam honorabilem intra limites Clericalis honestatis, & decentiæ se continentem. Porro in determinanda sustentatione congrua attendendum præprimis est judicium timoratae conscientiae, cui recte formando, teste Herincx, servire potest praxis non improbata aliorum ejusdem gradus & tituli, qui vulgo habentur pro timoratis.

Nota 4. Ad congruam sustentationem pertinent ea omnia, quibus indiget Clericus non solum ad propriam Personam, familiamque domesticam decenter alendam in victu, vestitu, habitatione, ac relaxatione convenienti: item ad medicinas &c., sed etiam quæ requiruntur ad hospitalitatem erga peregrinos, etiam consanguineos, ad moderata convivia, donationes moderatas, tam liberales, quam remuneratorias, ad dandas eleemosynas, &



omnia alia, quæ Clericus sine nota avaritiæ nequit omittere. Huc etiam pertinent ea, quæ citra avaritiam provide servantur in futuros casus ægritudinis, sterilitatis &c.

Nota 5. Quod etiam Beneficiatus, majora habens merita ratione doctrinæ, nobilitatis, officii, laboris &c., possit majorem sustentationem exigere. Hinc plus potest sibi impendere Decanus, quam simplex Canonicus, plus Episcopus, quam Decanus, plus filius Principis, quam tantum civis, ac cæteris paribus plus Doctor, quam ille, qui ea scientia & gradu caret. Colligitur ex ipso jure; nam Can. *de Redditibus* c. 12. q. 2. dicitur: *Ultima (pars reddituum) inter se Clericis pro singulorum meritis dividatur.* Idipsum videtur insinuare Apostolus 1. ad Timoth. 5.: *Qui bene præsunt Presbyteri, duplici honore digni habentur: maxime, qui laborant in verbo, & doctrina.* Hoc est, ut Tirinus interpretatur, ejusmodi Presbyteri digni sunt, ut abundanti subsidio commode sustententur. Recte nihilominus monet P. Pichler, cavendum esse, præsertim nobilibus, ne ex simili prætextu abutantur patrimonio Christi ad luxum, & fastum, sed modeste, ac frugaliter tantum vivant, ut jubet Tridentinum sess. 25. c. 1. *de Reform.* H. N.

250

Affero 1. Clerici sunt absoluti Domini reddituum beneficialium ad congruam sustentationem necessariorum. Communis contra aliquos antiquos Canonistas.

Prob. 1. Beneficiatus est operarius Ecclesiæ: ergo merito ab Ecclesia accipit suam sustentationem congruam; *Dignus est enim operarius mercede sua.* Idem colligitur ex Apostolo 1. ad Corinth. 9. v. 7. dicente: *Quis militat suis stipendiis unquam? & v. 13.: Qui Altari deserviunt, cum Altari participant.*

Prob. 2. ex Tridentino sess. 23. c. 1. *de Reform.*, ubi docet, Beneficiatos, qui non resident, *pro rata temporis absentiae fructus suos non facere, nec tuto conscientia illos sibi detinere posse:* ergo a contrario, qui resident, fructus faciunt suos, eosque sibi licite detinent: atqui fructus facere suos idem est, ac eorum dominium acquirere: ergo.

Prob. 3.



*§. II. An Clerici sint Domini bonorum Beneficialium?* 411

Prob. 3. Redditus ad sustentationem necessarij dantur Clericis tanquam stipendium propter functiones Ecclesiasticas; & laborem: atqui de ratione stipendii est, ut transeat in dominium, & quidem plenum ac absolutum operarii, ut colligitur ex dictis: ergo. Ex his.

Deduces 1. Ista bona, quæ ad congruam sustentationem spectant, posse a Clericis expendi etiam in causas profanas, uti redditus stolæ, & distributiones; sunt enim & horum, uti illorum pleni, ac absoluti Domini.

Deduces 2. Si Clerici parcius, quam tenerentur, vivendo aliqua ex his bonis comparent, & comparcant, ea fieri parsimonialia, & libere in usus quoque profanos applicari posse. Plura alia, quæ circa expensionem bonorum beneficialium, & aliorum Clericis licent, inferius resolventur.

Affero 2. Probabilius Clerici Sæculares defacto sunt etiam Domini bonorum beneficialium superfluum, Mastrius, Herincx, Holzman, Reiffenstuel in sua Theolog. morali, Cardinalis de Lugo, Mezger, Pichler, Schmalzgrueber, Covarruvias, Barbosa, & TT. ac Canonistæ moderni communiter contra plurimos antiquos, & aliquos etiam modernos, scilicet contra Sfondrati, Sannig, Van-Espen, Adm. R. P. Sigismundum Neudecker, ac nostrum Hennonem, qui uti alias, ita & hic summum rigorem profitetur, & censuras plures ex aliis Authoribus in nostram conclusionem recitat. 251

Prob. 1. Juxta Tridentinum sess. 23. c. 1. & sess. 24. c. 12. de Reform.: Clerici non faciunt fructus suos, nisi resideant, nisi Professionem Fidei intra præscriptum tempus emittant &c.: ergo per argumentum a contrario, ii, qui resident, & Professionem præscripto tempore emittunt, fructus beneficiales faciunt suos, & quidem omnes, cum nulla fiat exceptio, aut limitatio: atqui fructus suos facere, & eos lucrari, significat acquisitionem domini eorundem: ergo tales Clerici Beneficiati omnes, consequenter etiam superfluos fructus faciunt suos.

Confirm. Julius III. in Constit. Cum sicut, ait, fructus octo-  
F f f 2 ca-



caſione Eccleſiarum, Monaſteriorum, & Beneficiorum Eccleſiaſtico-  
rum pro tempore provenientes, licet, poſquam ad manus Beneficiato-  
rum pervenerunt, & cum aliis ipſorum Beneficiorum fructibus com-  
mixti ſunt, non ulterius in Eccleſiaſticis, ſed potius ipſorum Be-  
neficiatorum propriis, & ab eis acquiſitis bonis judicari, & propte-  
rea quodammodo pro Sæcularibus, & profanis haberi conſueverint,  
nihilominus, quamdiu Beneficiati illos non exegerint, vere Eccleſiaſti-  
cos eſſe, & cenſeri debere. Ubi indiftincte dicitur de omnibus  
fructibus beneficialibus, conſequenter etiam ſuperfluis, quod il-  
li, poſquam a Beneficiato ſunt percepti, ad ejus plenum domi-  
nium ſpectent.

Prob. 2. Neque ex Jure naturali; neque poſitivo conſtat,  
Clericos non eſſe Dominos partis ſuperflue reddituum benefi-  
cialium: ergo non poteſt ipsis denegari dominium partis ſuper-  
flue. A. conſtabit ex ſolutione objectionum, C. vero prob. Cle-  
rici ſunt in poſſeſſione partis ſuperflue, quæ ipsis utique una  
cum congrua dari debet: ergo pro Clericis ſtat præſumptio do-  
minii, eoquod poſſeſſor rei alicujus ſemper præſumatur Domi-  
nus ejusdem, niſi contrarium conſtet. Quare & in propoſito  
locum habet illud: *In dubio melior eſt conditio poſſidentis.*

Prob. 3. In diſiſione a Simplicio Papa facta, tota quarta  
pars Clericis assignata, tranſiit in horum dominium, etſi forte  
aliqua ſuperflua huic parti fuiſſent adjuncta: ergo etiam tota por-  
tio, quæ modo poſt erectionem Beneficiorum eſt assignata Be-  
neficiatis, etiam in horum dominium tranſit, etſi forte aliqua  
ſuperflua ſint huic parti commixta. A. colligitur ex Can. Qua-  
tuor autem c. 12. q. 2., ubi Gelafius Papa totam quartam par-  
tem ait eſſe Clericorum, & non ſolum partem congrue ſuſtentationis.

Prob. 4. Per erectionem Beneficiorum bona tam congrue  
ſuſtentationi neceſſaria, quam ſuperflua ſunt diſiſa a reliquis bo-  
nis Eccleſiaſticis, & per diſiſionem ſunt assignata, & data Be-  
neficiatis: atqui diſiſio ejusmodi eſt ſufficiens titulus acquirendi  
dominii: ergo dicendum eſt, quod Beneficiati per ejusmodi di-  
viſionem acquiſierint dominium partis non ſolum neceſſarie, ſed  
& ſuperflue. M. eſt certa, & conſtat ex notandis. m. patet ex  
jure, in quo diſiſio bonorum eſt ſufficiens titulus dandi, &  
ap-



*§. II. An Clerici sint Domini bonorum beneficialium? 413*

appropriandi dominium : unde & vicem emptionis obtinere dicitur in l. 1. *C. Communia utriusque iudicii.*

Prob. 5. Si Clerici non fierent Domini partis superfluae, tunc ideo, quia pauperes haberent strictum jus ad illam superfluam partem : sed hæc ratio non subsistit : ergo M. est AAriorum, m. ostendetur inferius.

Prob. 6. Si Clerici non haberent dominium bonorum superfluatorum, omnes donationes, & contractus de bonis superfluis, qui non essent ad pias causas facti, forent nulli, & deberent rescindi, ac illi, qui aliquid vi harum donationum, & contractuum recepissent, deberent ad restitutionem compelli : sed hoc est contra praxin Ecclesiæ, quæ nunquam invalidavit ejusmodi contractus, neque propter eos restitutionem injunxit : consequenter signum est, quod Clerici sint Domini partis superfluae, & quod valeant donationes ex bonis superfluis factæ : ergo. Plura, quæ pro hac conclusione faciunt, adducuntur inferius.

Objic. 1. Fere tota antiquitas TT. & CC. stat pro sententia contraria : ergo ea est tenenda. R. 1. Retorq. Argum. Fere omnes moderni TT. & CC. stant pro nostra sententia ; & inter hos non pauci eximii virtute, & doctrina viri, ut Cardinalis de Lugo, Lessius, Herincx, Mastrius &c. nequaquam laxitatem, sed veritatem sunt pro viribus secuti : Neque semper, quæ antiquiora, sunt etiam veriora ; cum multæ sententiæ apud antiquos celebres modo penitus exoleverint. R. 2. D. a. fere tota antiquitas stat pro sententia opposita, ita, ut pro nostra stent fere omnes moderni TT. & longe probabilior ratio, eidemque etiam faveat S. Thomas inferius citandus C. a. secus N. a. 252

Objic. 2. Bona beneficialia vocantur bona Deo dicata, & Patrimonium Christi : ergo Clerici non possunt eorum esse Domini. R. 1. Retorq. Argum. Bona beneficialia indistinctim, consequenter etiam quoad partem congruam, vocantur bona Deo dicata &c. : ergo Clerici neque partis superfluae, neque congruæ, & necessariæ sunt Domini. R. 2. N. c. Vocantur bona Dei, & Christi, quatenus Dei, Christique famulis, seu Clericis ad ho-



norem ejus sunt donata, & etiamnum ex præcepto Ecclesiæ superflua in honorem Dei, seu in causas pias expendi debent. Ex quo minime sequitur, Clericos non esse Dominos istorum bonorum; alias neque pauperes fierent Domini similium bonorum superfluatorum in eos erogatorum, cum nimirum sint bona Dei & Christi. Verum de hoc plura inferius.

Objic. 3. Bona Clericorum dicuntur res pauperum: ergo pauperes, non Clerici, sunt Domini superfluatorum. R. 1. Rectorq. Argum. sicut prius. R. 2. Sunt res pauperum, quatenus superflua ex redditibus Ecclesiæ speciali ratione, scilicet ex præcepto Ecclesiæ, sunt pauperibus, & piis causis erogandæ. Imo plerique similes textus loquuntur de bonis Clericorum ante divisionem a Simplicio factam: pro tunc autem bona Clericorum erant singulariter res pauperum, quatenus & ipsi Clerici erant pauperes, & in particulari nihil proprium habebant, sed in communi vivebant, necessaria sustentatione contenti.

Objic. 4. Can. *Quisquis*. 19. c. 12. q. 2. &c. *Fraternitatem*. 2. de *donationibus*. Clerici vocantur dispensatores tantum, & administratores ejusmodi bonorum: ergo non sunt Domini eorum. R. Canones, qui ita loquuntur, vel sunt intelligendi de tempore divisionem bonorum Ecclesiasticorum præcedente, ubi Clerici non habebant proprium, sed bona Ecclesiæ solum administrabant ut Procuratores, & Dispensatores: vel sunt explicandi de bonis simpliciter Ecclesiasticis, seu quarti generis, quorum administratores, non autem Domini sunt Clerici. Et in hoc sensu loquitur cap. *Fraternitas*. ut legenti patet: in eodemque sensu exponi debet cap. *Ratio nulla*. de *Præbend.* & *dignit.* *Ratio nulla* permittit, ut, quod pro communi utilitate datum esse cognoscitur, propriis cujusquam usibus applicetur. Possent etiam retorqueri in congruam sustentationem; quia & ista ex communibus bonis desumpta non foret propria Clerico. Adde, quod Clerici, etsi dominium habeant superfluatorum, tamen possint eorum administratores, & Procuratores dici: tum, quia hoc dominium, quamvis in actu primo plene existat apud Clericos, in actu secundo est vinculatum, cum iidem Clerici lege positiva impediuntur, ne superflua pro libitu in causas profanas expendant: tum,



§. II. An Clerici sint Domini bonorum beneficialium? 415

tum, quia aliquis etiam respectu propriorum bonorum potest esse dispensator, & administrator: & in hoc sensu prodigis declaratis dicitur administratio propriorum bonorum esse interdicta.

Ob. ic. 5. SS. PP. Clericos, qui superflua non expendunt in pauperes, vocant fures, raptores, pauperum interfectores: sed, qui rem propriam, cujus habet dominium, non expendit in pauperes, propterea non est fur, aut raptor: bene autem ille, qui rem, ad pauperes spectantem, illis denegat: ergo Clerici non sunt Domini bonorum superfluatorum, sed pauperes. M. constat ex pluribus textibus, quos Gratianus in suo Decreto allegat, uti & ex epistola 2. S. Bernardi ad Fulconem, ubi ita scribit: *Quidquid præter necessarium victum, ac simplicem vestitum de Altari retines, tuum non est, rapina est, Sacrilegium est.*

R. 1. Retorq. Argum. S. Hieronymus, prout refertur Can. *Hospitalem*. D. 42. etiam de Laicis, seu de sæcularibus, qui non sunt Clerici, ait: *Aliena rapere convincitur, qui ultra necessaria retinere probatur.* 2. S. Augustinus omnes Christianos, consequenter etiam Laicos, alloquens ait in expositione Psalmi 147. *Res alienæ possidentur, dum superflua possidentur.* Et S. Ambrosius Can. *Sicut*. D. 47. de Laicis quoque ait, ipsis non esse propria, quæ sunt superflua: ergo si ejusmodi textus SS. PP. in rigore sunt accipiendi, tunc neque Laici habent dominium superfluatorum, quod tamen falsum est.

R. 2. Plures Patres, uti Hieronymus, Augustinus, Basilus. ac Tertullianus, vixerunt ante Simplicium Papam, adeoque intelligendi sunt de tempore ante divisionem, ubi Clerici nondum erant Domini suorum bonorum. Item, quod spectat ad S. Hieronymum, relatum in Can. *Quoniam*. c. 16. q. 1., qui nobis objici solet, ex eo probaretur nimium; nam juxta hunc Canonem Clerici habentes bona patrimonialia non possent sustentationem accipere ex Redditibus beneficialibus: quod defacto ab omnibus negatur.

R. 3. S. Bernardus, & alii Patres, qui Simplicio Papa fuerunt posteriores, & post erectionem beneficiorum scripserunt, imo &



& illi, qui Simplicium Papam præcesserunt, non fuere locuti in sensu stricto, & theologico, sed concionatorio, & exaggerativo. Neque hæc explicatio torta videatur; si enim Aarii Patres illos, qui Laicis denegare videntur dominium superfluum, exponunt in sensu non stricto, sed exaggerativo: ita & nobis licebit exponere istos, qui de superfluis Clericorum tractant.

Rdent alii, apud Haunoldum, quod Patres sint intelligendi de casu extremæ, vel gravis necessitatis pauperum; cum enim in tali casu deberent Clerici etiam ex proprio patrimonio succurrere pauperibus, quomodo excusari poterunt, si, ut parcant proprio patrimonio, accipiant stipendia ab Ecclesia, quibus alioquin pauperibus subveniri potuisset. Item in casu extremæ necessitatis pauperum fiunt omnia communia in favorem pauperum, adeoque his, præ aliis sunt elargienda.

Rdent iterum alii: SS. PP. loqui de his, qui, quamvis aliunde vivere possent, beneficia ambiunt, & possident mala intentione, scilicet ditescendi, & consanguineos locupletandi, pompose, & delicate vivendi: in quem finem Beneficia Beneficiis accumulant, nunquam satiandi. Hinc beneficia, nescio quibus prætextibus impetrant, cum detrimento Ecclesiæ, & Fidelium scandalo, cum damno aliorum pauperum Clericorum. Videatur Haunoldus.

Objic. 6. Si Clerici essent Domini bonorum superfluum, possent de illis libere disponere; sed non possunt: ergo improbab. quia non possunt de illis testari, neque in alios usus profanos disponere secundum jus commune. R. 1. Etiam impuberes non possunt testari de bonis suis: item pupilli non possunt disponere de propriis bonis sine consensu tutoris: quod non obstante impuberes, & pupilli veri sunt Domini suorum bonorum. R. 2. N. M. Ex hoc, quod Clerici non possint disponere, & testari de bonis superfluis, solum sequitur, quod dominium eorum in actu secundo sit ligatum, & impeditum quoad aliquem usum.



§. III.

*An Clerici seculares bona beneficalia superflua ex justitia teneantur in pauperes, vel pias causas erogare?*

Nota 1. Communem esse DD. sententiam, quod Clerici 253  
bona beneficalia superflua teneantur in pias causas erogare. Verum, sicut in obligatione hac adstruenda unanimiter TT. & Canonistæ omnes conspirant, ita dissentiunt maxime in assignanda radice ejusdem. Variæ enim sunt opiniones circa hoc punctum: Aliqui existimant, hanc obligationem oriri ex lege naturali, & quidem ex titulo justitiæ: alii judicant eam pariter ex lege naturali provenire, sed ex aliis virtutibus: scilicet charitate, & Religione: reliqui tandem existimant, totam hanc obligationem habere ortum ex lege positiva Ecclesiæ.

Nota 2. Non esse inanem speculationem, sed quæstionem summe practicam, an hæc obligatio ex justitia, vel ex alia virtute proveniat; si enim ea oritur ex justitia, tunc illi Beneficiati, qui superflua non expendunt in causas pias, sed in alios usus profanos, tenentur ad restitutionem causis piis faciendam: ad quam tamen non adstringuntur, si prædicta obligatio superflua in causas pias impendendi, oriatur ex alia virtute, quam justitia. Ratio est: quia læsio justitiæ commutativæ, non autem aliarum virtutum obligationem restituendi causat.

Nota 3. Etiam plures esse Authores, qui quidem dicunt, Clericos esse Dominos superfluorum, eos tamen simul ex justitia obligatos pronunciant, ad eadem superflua in pios usus convertenda. Rem declarant exemplo: a prædivite Domino donantur Petro 100. aurei, impendendi in sumptus peregrinationis, hac tamen cum obligatione, ut illud, quod post moderatas expensas, factas in itinere, de pecunia hac donata superest, Petrus pauperibus det. Hoc in exemplo Petrus fit quidem omnium 100. aureorum Dominus: ex justitia tamen simul obligatur, ut illa, quæ ex peregrinatione manent superflua, pauperibus



ribus dispenfet. Hæc si in alium finem, quam in pauperes, impenderet, deberet ex suis bonis tantumdem pauperibus restituere. Id proportionaliter etiam dicunt de Beneficiatis, quos volunt quidem fieri Dominos portionis tam congruæ, quam superflua, hac tamen cum obligatione, ut pars superflua in pauperes, ac pias causas distribuatur. Et hæc sententia, quam graves & multi Doctores tenent, est tutior, ut liquet, & propterea est merito in praxi suadenda. Interea, quia non omnes semper volunt tutiora sequi, nec semper melius, ac tutius videtur, homines velle tantum ad tutiora, & rigidiora obligare: Hinc

254

Affero: Probabilius Clerici Beneficiati sæculares non tenentur ex iustitia, superflua expendere in pauperes, aut causas pias: proinde neque tenentur ad restitutionem, si ea in usus profanos erogarint. Lugo, Lessius, Herincx, Reiffenstuel, Holzman, Poncius, Schmalzgruber, Pichler, ac alii plane non pauci ex modernis. Favet nostræ sententiæ D. Thomas Quodlibeto 6. q. 7. art. 12., ubi dicit: *In secundis* (id est, in bonis beneficiis, de quibus ibi loquitur) *non committitur peccatum, nisi per abusum, sicut & in patrimonialibus dictum est; unde non tenetur quis ad restitutionem, sed solum ad pœnitentiam peragendam.*

Prob. 1. Ex una parte certum est, quod Dominus rei aliqujus possit de ea pro libitu disponere, nec teneatur determinate in certum usum applicare ex iustitia, nisi hæc obligatio, ex iustitia orta, satis constet: ex altera parte Clerici sunt domini bonorum superfluatorum, neque satis constat obligatio applicandi determinate ex lege iustitiæ illa superflua in causas pias: ergo Clerici ex iustitia non tenentur applicare superflua determinate in causas pias. Ant. quoad 1. membr. ex eo patet, quia quisque rei suæ est moderator, & arbiter, & consequenter de ea pro libitu disponere potest, nec eam determinate in unum usum applicare debet, nisi ejusmodi obligatio satis probetur. Adde, quod dominium ex se fit facultas disponendi de re in omnem usum possibilem pro libitu. Qui igitur habet dominium rei aliqujus, est in possessione juris libere disponendi in quosvis usus possibiles, nec potest ab hac possessione deturbari, aut ad unam determinatam dispositionem duntaxat alligari, & obligari, nisi suffi-



§. III. An Clerici ex justitia teneantur superflua erogare &c. 419

ficienter probetur, adesse talem obligationem: id, quod clarum est ex Regula juris: *In dubio nemo spoliandus est jure, quod possidet. In dubio melior est conditio possidentis.* Membrum vero 2. Antecedentis ejusdem partim jam constat ex §. præcedente, partim etiam hoc §. amplius declarabitur. Igitur

P. 2. Canones nusquam clare explicant hanc obligationem superflua beneficialia in pauperes impendendi: ergo ea non supponitur adesse. A. constabit ex solutione objectionum, & ex eo, quia nullum clarum textum juris AArii pro se allegare possunt. Conf. vero inde ostenditur. Res hæc est maximi momenti, quæ ad omnes Beneficiatos pertinet, & summo opere ad ædificationem publicam, & subsidium pauperum facit: ergo, si vel ex natura rei, vel ex Ecclesiæ præcepto tanta obligatio ex justitia adesset, ea debuisset clare per summos Pontifices, aut Concilia Oecumenica exprimi, nec tanta injustitia tolerari: præcipue, quia in rebus multo minoribus, & de se clarioribus Ecclesia, ac summi Pontifices mentem suam declararunt, ne quis prætextu ignorantiae se posset excusare, vg. eum teneri ad restitutionem, qui preces canonicas, aut aliquam partem earum prætermitteret, aut a sua residentia supra tres menses emaneret: & alia id genus, quæ in Concilio Lateranensi sub Leone X. Tridentino, & aliis constitutionibus Pontificum clare habentur decisa

Confirm. 1. Ecclesia clare proponit Clericis obligationem, quam in genere habent ad pie dispensanda superflua, ut colligetur ex dicendis: ergo, si adesset aliqua obligatio, superflua ex virtute justitiæ erogandi in causas pias, eam etiam clare proponeret.

Confirm. 2. Ecclesia non rescindit pacta, aut donationes in causas profanas, ex superfluis beneficialibus factas: atqui hoc facere deberet, si judicaret, ejusmodi superflua pauperibus stricto jure deberi: ergo Ecclesia judicat, ejusmodi bona superflua non deberi pauperibus ex stricto jure, aut ex justitia. M. constat; quia neque ex Canone, neque ex praxi tribunalium Ecclesiasticorum habetur, quod Ecclesia unquam resciderit ejusmodi donationes, aut quod unquam Clericum, qui superflua in consanguineos divites erogavit, compulerit ad restitu-



stitutionem faciendam pauperibus: imo neque legitur, quod ul-  
li tali Clerico lis unquam fuerit intentata propterea, quia su-  
perflua aliter, quam in pauperes, & pias causas dispensavit. in-  
vero prob., quia strictissima est obligatio Prælatorum Ecclesiæ,  
ut sint Patres, & defensores pauperum, eorumque causam agant,  
juri eorum assistant, idque, ubi requiritur, clare proponant, &  
quod eis ex justitia debetur, dari curent, imo etiam compellant:  
sicut facere solent, quando pauperibus aliquid in Testamento,  
& piis legatis relinquitur, ubi Episcopi executionem similium  
legatorum in favorem pauperum, & causarum piarum maxime  
urgere solent.

255

Rdebis: Ideo non rescindi ejusmodi donationes, quia non  
potest discerni, an eæ sint factæ ex superfluis, vel parsimoniali-  
bus, aut patrimonialibus. Adde, Ecclesiam, si certo scit, su-  
perflua beneficialia esse profane expensa, urgere illorum restitu-  
tionem; id enim colligitur ex Can. *de Redditibus. c. 12. q. 2.*,  
ubi Gaudentio præcipitur restitutio.

Contra est: Etsi forte in particulari non constet, saltem in  
genere certum omnino videtur esse, quod sæpius fiant ejusmo-  
di expensiones, & donationes in causas profanas: cur ergo Ec-  
clesia in genere per aliquem Canonem non exprimit obligatio-  
nem istam ex justitia restituendi, præsertim quia alias obligatio-  
nes minoris momenti clare proponit? Exemplum Gaudentii non  
est ad rem; ille enim non de portione sibi competente, sed de  
bonis communibus tres portiones per integrum triennium sibi  
inique appropriavit, unde merito ad restitutionem condemnatus.

Rdebis 2. Ideo tolerari, & non rescindi ejusmodi contractus,  
& donationes in causas profanas, ne per eorum rescissionem ma-  
jora causentur mala, & ne multiplicentur lites.

Contra est: Etsi forte ob cavenda mala majora possent il-  
læ donationes tolerari, publice tamen, & clare deberent repro-  
bati; siquidem, quamvis sæpe mala aliqua debeant tolerari, ea  
tamen clare improbantur, ut patet in hæresibus, quæ, etsi non-  
nunquam tolerantur, tamen damnantur, & reprobantur: ergo  
saltem aliquo Canone, aut constitutione deberet Ecclesia clare  
re-



reprobare tales donationes Clericorum, factas ex superfluis in causas profanas: atqui non sic reprobatur: ergo.

Prob. 3. Impugnando præcipuum fundamentum AAriorum. 256  
Si Clerici bona superflua tenerentur in pauperes expendere ex justitia, tunc ideo, quia Fideles bona sua Ecclesiis donavere hoc sub onere, ut superflua ex titulo justitiæ in pauperes expendantur: atqui hæc ratio nulla est: ergo. M. est AAriorum Achilles. m. prob. quamvis fideles optarint, ut bona sua, Ecclesiis donata, pie expendantur, non tamen est verisimile, quod hoc sub onere donarint, ut superflua ex lege justitiæ in pauperes distribuuntur; nam 1. non constat, quod sub conditione onerosa intenderint sua Ecclesiis relinquere. 2. Fideles Fundatores supponuntur fuisse modestiores, quam ut suis superioribus Episcopis, & Parochis, ac aliis Clericis vellent tantum onus imponere. 3. Neque verisimile est, quod Clerici fuissent consensuri in tantam obligationem, quæ tamen sine acceptatione & consensu Clericorum, & Superiorum Ecclesiæ non potuit oriri. 4. Laicis, vg. Cantoribus, Sacristis, & aliis, qui inserviunt Ecclesiæ, absolute permittunt dominium sui salarii, etsi illud superfluum sit congruæ sustentationi: ergo non est præsumendum, quod partem superfluum denegent Clericis, qui longe melioris conditionis sunt, quam Laici. 5. Fideles non poterant dubitare, quin Episcopi, & Prælati, qui bona Ecclesiæ administrabant, sua sponte essent ordinaturi, ut superflua pie expendere: imo id actu, & abunde videbant fieri, & observari a Clericis: ergo non est credibile, quod novam obligationem justitiæ illis voluerint imponere.

Confirm. 1. Saltem decimis (quæ tamen quandoque unice, quandoque maxima ex parte bona beneficialia constituunt) non potuerunt Fideles obligationem justitiæ annectere erga pauperes: ergo neque reliquis bonis beneficialibus. A. prob. Jus decimarum ad Clericos transiit non libera Fidelium voluntate, sed titulo rigoroso justitiæ; siquidem tenetur populus ex lege justitiæ eos, qui ipsi spiritualia, præsertim Sacramenta, ministrant, pro dignitate sustentare; id, quod lumen naturæ dictat, quare & Ethnicis suis Sacrificulis sustentationem præbuerunt. Jam vero ad



hanc sustentationem Ecclesia ab initio determinavit decimam fructuum partem, exemplo legis veteris, ubi, etsi Levitæ, & Sacerdotes, alique Sacrorum Ministri minores essent dignitate, & etiam pauciores numero, quam modo in nova lege, tamen decima pars fructuum, præter primitias & oblationes, a Deo ipsis constituta fuit, neque ulla obligatio justitiæ superflua in pauperes expendendi, fuit imposita: ergo decimæ a Fidelibus non solvuntur libere, sed sunt ex justitiâ debitæ Clericis post determinationem, & ordinationem Ecclesiæ factam, qua sustentatio Clericorum in decima parte fructuum fuit constituta: ergo a Fidelibus ratione decimarum Clericis non potest imponi obligatio, superflua in causas pias expendendi. *Ratio rationis*: Quando aliquis ex justitiâ debitum salarium, vel stipendium solvit, debet illud dare sine ullo onere justitiæ annexo: ergo, quia & Fideles decimas solvunt tanquam stipendium, ex justitiâ Ministris Ecclesiæ ac Clericis debitum, ideo eas sine annexo onere præstare debent.

Confirm. 2. Pauperes neque ante divisionem bonorum Ecclesiasticorum a Simplicio factam, habebant strictum jus ad superfluum: ergo neque post divisionem. C. claret; nam per divisionem non fuit novum jus pauperibus attributum, saltem tale, quod esset independens a voluntate Ecclesiæ, & quod ab ipsa pro libitu mutari, & tolli non posset. A. prob. si tunc ante divisionem Episcopi superfluum reservassent in deposito Ecclesiæ, & pauperibus non distribuissent, non fuissent obligati ad restitutionem, nec peccassent contra justitiam, sed ad summum contra charitatem erga pauperes, vel contra obedientiam erga Ecclesiam, quæ præcepit superflua, præsertim quartam partem, expendi in pauperes: ergo. *Ratio rationis*; Ecclesia omnium donatorum a Fidelibus fiebat domina, & quidem absolute sine onere justitiæ nam si pauperes absolute, & sine onere justitiæ superflua expendendi in alios pauperes, sunt Domini sibi donatarum eleemosynarum, cur non & Ecclesia? Certe Ecclesia non est deterius conditionis quoad hoc, quam mendici, & pauperes: ergo neque ante, neque post divisionem habuit ullam strictam obligationem ex justitiâ subveniendi pauperibus: imo neque quartam partem bonorum beneficialium ex lege justitiæ illis debebat, sed illam ex mera misericordia voluit



*§. III. An Clerici ex iustitia teneantur superflua erogare &c. 423*

in pauperes dispensari. Unde ante divisionem Episcopi, quartam partem in deposito Ecclesiæ relinquentes, & non dispensantes pauperibus, tantum contra præceptum Ecclesiæ, & aliquoties contra misericordiam, & charitatem peccassent.

Plura, quæ pro confirmando, & declarando hoc argumento faciunt, ex solutione objectionum colliguntur. Hinc

Objic. 1. Fideles offerebant sua bona Ecclesiis eo cum onere, ut superflua ex iustitia in pauperes erogarentur: ergo superflua ex iustitia debent in pauperes erogari. R. 1. indirecte: Si Fideles hoc sub onere obtulerunt sua bona, tunc ea neque a Beneficiatis in alias pias causas, vg. in fabriam Ecclesiæ &c. expendi possunt; nam res pauperibus ex iustitia debita, non potest in alios, quam pauperes dispensari: atqui juxta AArios Clericus satisfacit suæ obligationi, dummodo bona superflua in aliquam causam piam qualemcumque expendat: ergo signum est, quod fideles sua non obtulerint hoc sub onere, ut pauperibus erogentur.

257

R. 2. N. a. Laici equidem donabant sua bona Ecclesiis ea *spe*, eo *sine*, ac *desiderio*, non autem eo cum onere iustitiæ, ut aliquid inde obveniat pauperibus, præsertim quia aliunde videbant, quod ab Ecclesia, & Ecclesiasticis personis specialis cura habeatur pauperum. Ita explicandi sunt Canones aliqui ab AAriis allegandi. Porro Fideles sua reliquerunt Ecclesiæ ita, ut hæc posset ea pie expendere secundum suum beneplacitum: non autem expressam, vel implicitam conditionem adjunxerunt, ut aliqua pars necessario & indispensabiliter determinate huic causæ piæ, scilicet pauperibus obveniat, licet speraverint, pauperes aliquod inde emolumentum habituros: prout & defacto habent, cum superflua ex præcepto Ecclesiæ in pauperes, vel alias causas pias erogari debeant.

Objic. 2. Antiquitus ante divisionem habuerunt pauperes jus ad unam partem bonorum Ecclesiasticorum: ergo & defacto: consequenter debet illis saltem pars superflua assignari. R. N. a. Ratio negandi colligitur, *tum* ex dictis in probatione ultima, *tum* ex responsione indirecta ad objectionem primam, *tum*

258

etiam



etiam ex hoc; quia assignatio illa quartæ partis, quæ distribui debuit pauperibus, non ex titulo justitiæ, aut jure, quod pauperes ad illam partem habebant, sed ex præcepto, & voluntate Ecclesiæ proveniebat, ut colligitur ex Can. *Mos est.* 30. c. 12. q. 2. Et hinc ista distributio non semper est facta in quatuor partes, ut habetur Can. *Constitutum.* 40. c. 16. q. 1., ubi Episcopo tertia pars tribuitur: & cap. *Requisti.* de Testamentis, ubi tertia, vel quarta pars Episcopo assignatur: ergo ex voluntate Ecclesiæ pendet, cui causæ piæ, vel in quem usum pium velit erogare Redditus Ecclesiæ, & non determinate obligatur ex justitia, ut in easdem quatuor portiones dispenset: consequenter neque quarta portio pauperibus fuit olim ex justitia, & jure debita.

Dices: Saltem quarta pars pauperum modo penitus evanuit: ergo signum est, quod ea fuerit commixta cum portione Episcopi, & Clericorum, qui propterea in suis beneficiis Redditibus superflua habent, quæ restituere debent pauperibus ex justitia. R. Hoc argumentum multum peccare; nam 1. est mera divinatio, quod portio pauperum accreverit Clericis. Quid, si ex illa parte pauperum fuissent erecta beneficia nova, Hospitalia, Seminaria, Monasteria? hoc enim fieri potuisset etiam juste; quia Prælati Ecclesiæ videbant, aliunde, & sine ista quarta parte satis superque a Fidelibus subveniri pauperum necessitati. Vel cur non accrevit illa pars fabricæ Ecclesiæ? Vel cur non aliqua ex iis bonis devenerunt ad Principes sæculares in recognitionem obsequiorum Ecclesiæ præstitorum? Certe negari non potest, multas decimas, & bona Ecclesiastica iterum ad Sæculares pervenisse. 2. Neque ex eo, quia Clerici superflua habent, ea ex portione pauperum ipsis accrescente proveniunt; nam hæc superfluitas potest oriri ex foundationibus novis, quas post Simplicium Papam fideles fecerunt sine onere illo, ac in merum favorem Clericorum: item ex bona administratione beneficiorum, per quam bona immobilia eorum aucta sunt, consequenter & fructus inde provenientes. 3. Dato, quod accreverit illa pars Clericis, tamen non exinde resultat obligatio eam restituendi pauperibus; potuit enim Pontifex summus ex gravibus causis illam partem pauperum attribuisse Beneficiatis: nempe ut sic nobiles quoque, & docti magis alliciantur ad Clericam



ricatum suscipiendum, præcipue quia vidit, aliunde non deesse pauperibus subsidium; nam Pontifex ex rationabili causa per plenitudinem potestatis suæ potest Redditus ab una causa pia ad alteram transferre, ut nemo negat, & traditur in Clement, *Quia contingit*. de Religiosis domibus: ergo etiam potuit Pontifex partem pauperum ad Clericorum portionem tanquam ad causam piæ am transferre, præcipue quia per hospitalia, leprosochia, Seminaria, stipendia, & alias pias foundationes, posteris temporibus in bonum pauperum factas, videtur esse facta aliqua compensatio, & credibiliter in istas foundationes pro pauperibus multi redditus Ecclesiastici sunt impenfi, ut existimat P. Antonius Mayr. Ex quo patet, quid in forma responderi possit ad argumentum adductum; potest enim negari consequentia quoad omnia sua membra.

Objic. 3. Bona Ecclesiæ vocantur *Bona Dei, vota fidelium, pretia peccatorum, patrimonia Christi, patrimonia pauperum*: ergo sine iniustitia non possunt in causas profanas expendi. R. 1. Retorq. Argum. Hæc omnia dicuntur de bonis Ecclesiasticis in communi, & indistinctim, consequenter etiam de congrua sustentatione, & parsimonialibus: ergo etiam pars congrua, & parsimonialia non possunt sine iniustitia in causas profanas expendi. Pleraque hæc prædicta bonorum Ecclesiasticorum superius jam sunt explicata: duo tantum hic declaro: dicuntur *pretia peccatorum*, quatenus a Fidelibus in satisfactionem pro peccatis offeruntur, vel quatenus dantur Sacerdotibus, quia per sacrificia & orationes satisfaciunt Deo pro peccatis Fundatorum, & populi Christiani. Vocantur *patrimonia pauperum*, quatenus pauperes habent spem recipiendi ex illis sustentationem, ad quam dandam obligantur quidem Clerici, sed non ex iustitia.

R. 2. D. c. ergo non possunt sine iniustitia in causas profanas expendi, dum prima vice expenduntur ab Administratoribus Ecclesiæ C. c. dum secunda vice expenduntur ab ipsis Clericis N. c. Explico me: Prima vice expenduntur bona Ecclesiastica, dum ea Administratores Ecclesiæ ex communibus redditibus Ecclesiasticis separant, & expendunt in ornandas Ecclesias, in Clericos, Cantores, Aedituos, & alios, qui Ecclesiæ deserviunt, vel dum in eleemosynam dantur pauperibus. Et hæc prima ex-



pensio omnino debet esse pia, seu in piam causam, uti fit in adductis exemplis, ubi semper Dei causa dispensantur: nempe propter cultum divinum dantur Clericis, & aliis Laicis, qui Ecclesiae deserviunt, uti & ipsis Ecclesiis, ac pauperibus, quos Christus fratres suos vocare dignatus est. Certe si Administratores Ecclesiae hæc bona in alias, quam istas, vel similes causas impenderent, peccarent contra justitiam, & tenerentur ad restitutionem. Ratio est: quia bona hæc a fidelibus offeruntur Ecclesiis hac obligatione, ut ab ipsa Ecclesia, ejusque administratoribus primaria dispensatione pie, & non profane expendantur, seu ut dispensentur vel in Clericos divina officia persolventes, vel in aliam causam piam juxta ordinationem Ecclesiae, & sic primaria dispensatio nomine ipsius Ecclesiae facta in honorem Dei cedat.

Jam vero 2. expenduntur hæc bona a Clericis, ab Aedituis, & pauperibus, in quos scilicet per primam expensionem sunt dispensata. Verum hæc secunda expensio non debet esse in usum pium ex justitia: secus & Aeditui, & Cantores laici etiam suæ sustentationi superflua tenerentur ex justitia in causas pias erogare; nam & hæc bona Aedituorum ex eadem massa bonorum Ecclesiasticorum sunt desumpta, ex qua proveniunt bona beneficialia Clericorum: si ergo bona Clericorum superflua sunt bona Dei, & ideo pie expendenda ex justitia, quidni & bona superflua Aedituorum &c.

Hoc non obstante Clerici superflua obligantur in usus pios convertere, non quidem ex lege justitiæ, sed ex præcepto Ecclesiae, specialibus ex rationibus adstringente Clericos, non autem Aedituos, & Cantores laicos: de quo §. sequenti. Ex his.

260

Resolves, quid dicendum sit ad Bullam Innocentii XII. editam anno 1692. 22. Junii, quæ abrogat Nepotismum, ubi ait: nec ipsis Romanis Pontificibus licere, consanguineos ex redditibus Ecclesiae ditare, additque, curaturos suos Successores, ut ita donata vindicentur rursus Cameræ Apostolicæ, & Donatoriis auferantur: quibus indicat, ejusmodi donationes esse invalide factas, & restitutioni obnoxias. Ad hæc enim respondebis, Pontificem loqui de bonis illis, quæ Pontifici dantur non ut



§. III. An Clerici ex iustitia teneantur superflua erogare &c. 427

ut fructus beneficii, & pro Persona Pontificis, sed quæ hac obligatione, & intentione ex magnis Statibus & Provinciis, ac ex toto orbe Papæ, & Ecclesiæ dantur, ut inde alantur idonei Ministri in bonum commune, & alia necessaria ad utilitatem publicam procurentur. Et hæc bona non ad beneficialia, sed ad mere Ecclesiastica spectant, quæ utique sine iniustitia Pontifex non potest in suos Consanguineos profundere: sicut nec Administratores Ecclesiæ, vel Clerici possunt sine læsione iustitiæ sibi appropriare, aut suis Consanguineis donare bona mere Ecclesiastica, seu quarti generis, ut dictum est.

Notabis etiam, ex nostro Reverendissimo Francisco Gonzaga de origine Religionis Franciscanæ 3. part. Tit. Provincia S. Michaelis, de Conventu S. Francisci Civitatis, contra nostram assertionem referri sequentem historiam de Petro Diaz Episcopo Civitatis, qui mortuus, tertio ab obitu die meritis S. P. N. Francisci fuit revocatus ad vitam, dixitque, se fuisse damnandum ob flagitia, nisi intercessione S. Francisci sibi quinque dies vitæ indulti fuissent: addiditque, hos ideo sibi concessos, ut bona Ecclesiæ, quæ consanguineis iniuste erogaverat, repetat ab illis, & pauperibus dispenset: quæ ubi intra quinque dies recuperavit, rursus obiit.

Hæc historia, nobis objici solita, longe aliter refertur a Gonzaga: 1. enim laudatus nostræ Religionis Generalis dicit, Petrum Episcopum quarto die post mortem ad vitam esse revocatum, & 20. dies vixisse, 2. Non dixit resuscitatus, sibi hos dies concessos esse, ut bona, iniuste consanguineis donata recuperaret, sed ut ob peccata, quæ erant maxime carnalia, penitentiam ageret. 3. Gonzaga non ait, quod ipse Petrus bona Consanguineis dispensarit, sed refert, istos mortem ejus triduo occultasse, ut bona relicta interim inter se dividere possent: quæ tamen redivivus iterum recuperaverit (prout jure potuit) & pauperibus erogarit, penitentiamque magnam egerit. Quæ nihil contra nostram assertionem continent.



## §. IV.

*Adstruitur nostra sententia de radice hujus obligationis.*

261

Affero: Probabilius obligatio erogandi superflua in causas pias oritur ex sola lege Ecclesiastica. Lessius, Herincx, Holzman, & multi alii ex modernis contra Lugo, Molinam, & alios, qui putant, hanc obligationem oriri ex lege naturali Religionis, vel charitatis.

Prob. 1. Ex una parte adest gravis obligatio expendendi superflua beneficialia in causas pias, ex altera parte nulla alia radix hujus obligationis potest ostendi, quam lex Ecclesiastica: ergo. A. quoad 1. membrum patet ex communi omnium Theologorum, & Canonistarum sententia: quoad 2. prob. Hæc obligatio non oritur ex lege naturali charitatis, & misericordiæ; lex enim naturalis, obligans ad opera misericordiæ & charitatis erga pauperes, tunc tantum sub culpa gravi adstringit Clericos, quando pauperes sunt in gravi, vel extrema necessitate constituti, ut patet ex communi Theologorum doctrina: atqui Clerici semper obligantur ad pie expendenda superflua, etiam tunc, quando nulli pauperes sunt in extrema, vel gravi necessitate; ergo obligatio hæc, expendendi superflua in pauperes, vel causas pias, non ex lege naturali charitatis oritur. 2. Vi legis naturalis, qua tenemur ad opera misericordiæ, adstringuntur Clerici, ut non solum ex superfluis beneficiis, sed etiam patrimonialibus, & aliis suis bonis subveniant pauperibus: hæc autem obligatio, de qua loquimur, tantum se extendit ad superflua beneficialia, non ad alia. 3. Clericus satisfacit suæ obligationi, si superflua expendat in alias causas pias, quam opera charitatis & misericordiæ, ut si inde curet ornari Ecclesiam, erigi Altare &c., quæ opera ad Religionem, non ad charitatem spectant: ergo signum est, quod hæc obligatio non oriatur ex naturali lege charitatis.

Continuatur ulterius probatio ejusdem 2. membri primi  
An-



Antecedentis. Neque hæc obligatio oritur ex naturali obligatione Religionis, quæ dicat, res sacras, & Deo dicatas esse venerandas, & non profane tractandas; nam bona Ecclesiæ, postquam ad manus Beneficiatorum transferunt, non amplius sunt sacra, nec res Dei, sed sunt bona propria Clericorum: ergo Clericus, illa male expendens, non inhonorat rem sacram, aut adhuc Deo dicatam: sicut & Cantores, ac Aeditui, dum bona ab Ecclesiâ accepta male impendunt, inde non committunt Sacrilegium, nec peccant contra Religionem. A. constat ex Constit. Julii III. supra allegata, in qua bona beneficalia, postquam semel ad Beneficiatos pervenerunt, dicuntur *quodammodo pro Sæcularibus, & profanis haberi*. Hæc tantum dicta sunt de obligatione Religionis, quæ ex lege naturali ad hanc virtutem pertinente, ac ex natura horum bonorum oriretur: quid vi legis positivæ humanæ, & Ecclesiasticæ dicendum sit, statuetur inferius.

Ex his igitur concludo primam probationem taliter: ista obligatio non oritur ex lege naturali ad virtutem charitatis & misericordiæ, vel Religionis, aut ad aliam quamcunque virtutem pertinente: ergo debet solum oriri ex lege positiva humana.

Prob. 2. Ex antiquis Canonibus, quibus præcipitur, ut portio fructuum & oblationum, quæ Episcopo, Clericis, & fabricæ non esset necessaria, distribueretur pauperibus: quæ ordinatio Ecclesiæ a temporibus Apostolorum multis sæculis servata est, & a variis Pontificibus, & Conciliis confirmata. Cui constitutioni Ecclesiâ per erectionem Beneficiorum, & per hoc, quod singulis Clericis suæ partis administrationem & dominium permiserit, derogare noluit, sed potius voluit, ei per singulos, pro cujusvis facultate satisfieri. Hac de causa, sicut Episcopi, cum ipsi soli illa bona administrarent, tenebantur portionem reliquis superfluum pauperibus seponere: ita quoque Beneficiati, qui Episcopis in administratione bonorum illorum ex parte successerunt, tenentur ea, quæ sibi redundant, in usus pauperum, vel saltem in pias causas impendere. Paucis: antiqui Canones volebant omnia ista bona ante divisionem in pias causas impendi: ergo sic etiam volunt fieri post divisionem; nam per divisionem hæc obligatio non fuit sublata, sed fuit tantum



in alios translata, scilicet in particulares Clericos, qui modo talium bonorum & dominium, & administrationem habent.

Prob. 3. Efficacissime ex Tridentino sess. 25. c. 1. de *Reform.*, ubi Concilium ita loquitur: *Omnino eis (scilicet Episcopis) interdicit, ne ex redditibus Ecclesie consanguineos, familiaresque suos augere studeant, cum & Apostolorum Canones prohibeant, ne res Ecclesiasticas, quæ Dei sunt, consanguineis donent: sed si pauperes sint, eis ut pauperibus distribuant.* Et infra: *Quæ vero de Episcopis dicta sunt, eadem non solum in quibuscunque Ecclesiastica Beneficia tam secularia, quam regularia obtinentibus, pro gradu suæ conditionis observari, sed etiam ad S. Romanæ Ecclesie Cardinales pertinere decernit.* Ex quo textu

262

Habes 1. strictum præceptum pie expendendi bona Ecclesiastica, quod indicatur per verba: *omnino interdicit.*

Habes 2. quod per hunc textum prohibeatur erogatio bonorum *superfluatorum* in causas profanas, vg. in Consanguineos aliunde jam satis divites, & necessariis provisos; nam, quod non intelligatur hoc præceptum de bonis beneficialibus necessariis, apud omnes est in confesso; necessaria enim congruæ sustentationi possunt in quoscunque usus, etiam profanos impendi.

Neque dicas: Tridentinum loqui de bonis simpliciter Ecclesiasticis, seu quarti generis, non autem de beneficialibus.

Contra est 1. Illi etiam Doctores, qui Tridentino interfuerunt, intelligunt allegatum Concilii textum in nostro sensu, ut testatur Lugo D. 4. sect. 2. n. 12. *Contra est 2.* Concilium loquitur de illis bonis, quæ Episcopi alias in pauperes consanguineos dispensare possunt: sed in consanguineos, etsi pauperes, non possunt dispensare pure, & simpliciter Ecclesiastica, bene superflua beneficialia, quorum sunt Domini: ergo. M. patet ex illis verbis: *sed si pauperes sint; eis ut pauperibus distribuant.* *Contra est 3.* Concilium verbis ultimis hoc suum decretum extendit ad omnes etiam Episcopo inferiores, Clericos, quorum tamen plurimi non habent administrationem bonorum ad ipsas



§. IV. Adstruitur nostra sententia de radice hujus obligation. 431

ipfas Ecclesias pertinentium : ergo intelligi debet de bonis illorum beneficialibus, ne hæc in divites consanguineos profundant.

Prob. 4. Vel ipsa continua consuetudo, ac antiquissima fidelium persuasio sufficeret ad gravem hanc obligationem inducendam, etsi nulla lex scripta adesset : ergo,

Objic. 1. Tridentinum, & alii Canones supponunt obligationem, ex jure naturali descendentem, expendendi pie superflua beneficialia : ergo hæc obligatio non oritur ex solo jure Ecclesiastico. A. prob. Tridentinum ideo interdicit talia bona profane expendi, quia sunt *res Dei*, consequenter jure naturali pie tractari, & religiose expendi debent : ergo. 263

R. N. a. Quod enim bona beneficialia sint *res Dei*, antecedenter ad præceptum Ecclesiæ non affert gravem obligationem, sed tantum insinuat aliquam decentiam, & congruentiam. Ratio hujus est : quia antecedenter ad præceptum Ecclesiæ istæ res in tantum dicuntur bona Dei : 1. quia sunt oblata in honorem Dei hac obligatione, & onerosa conditione, ut prima expensione pie, scilicet in ipsos Ministros Ecclesiæ expendantur. 2. quia etiam sunt donata cum tali spe Fundatorum, quod ipsi Clerici hæc bona, præcipue superflua, sint iterum secunda expensione pie impensuri in honorem Dei, & non in causas profanas. Hæc spes Fundatorum, imo & ipsius Ecclesiæ, antecedenter ad præceptum humanum, nondum quidem gravem obligationem imposuit, ansam tamen dedit Ecclesiæ, ut stricto & gravi præcepto adstringeret Clericos, ne bonis superfluis aliter uterentur, quam in causas pias. Imo Tridentinum ideo hæc bona superflua vocat *res Dei*, quia ea ex præcepto Ecclesiæ (non ex præcepto naturali, vel divino) sunt singulariter destinata, ut bene, & pie expendantur tanquam res sacræ, & vota fidelium, de quo num. sequenti.

Dices : cur ergo Ecclesia non ordinavit, ut Laici quoque, vg. Aeditui, & Cantores, superflua intuitu Ecclesiæ accepta, in causas pias expendant ? R. In hoc præcepto Ecclesiam etiam respexisse ad statum Clericalem, quem maxime decet, ut fruga-



frugali sustentatione contentus, superflua, præcipue illa, quæ intuitu Ecclesiæ & beneficii accepit, in pias causas expendat, & sic satisfaciat pio Fundatorum desiderio, in tali autem statu eminente, & sacro non existunt Ministrilaici, vg. Æditui.

Objic. 2. Pontifex non potest dispensare, ut Clerici superflua in causas profanas expendant: sed posset, si hæc expensio jure solum Ecclesiastico esset prohibita; nam Pontifex potest in omni lege Ecclesiastica dispensare: ergo. R. N. M. Imo jam dispensarunt Pontifices: sic dispensavit Paulus V. in Constitut. *In eminenti*. edita 8. Aprilis 1606. in qua concessit Clericis Incolis urbis Romanæ, & in ejus districtu intra 10. milliaria, ut possent testari de omnibus beneficialibus, quancunque valoris existant, & quidem in causas profanas, & favorem Consanguineorum, & quarumvis Personarum affinium. Idem prius concessit Julius III.

Objic. 3. Contra leges Ecclesiasticas potest introduci consuetudo, quæ abrogat illas leges. C. fin. *de consuetudine*: sed contra hanc obligationem pie expendendi superflua, non potest introduci consuetudo: ergo hæc obligatio non oritur ex lege Ecclesiastica. R. N. m. Certe si debito tempore continuaretur, & a majori parte Clericorum frequentaretur transgressio talis obligationis, ea abrogaretur. Deinde, si ea obligatio per privilegium potest tolli, cur non per consuetudinem?

Dices: Si hoc est, tunc talis consuetudo jam est introducta, & obligatio ista est abrogata, quia passim ejusmodi bona in causas profanas expenduntur: ergo. R. N. a. hoc enim difficulter persuadebis, majorem partem Clericorum esse adeo salutis suæ incuriam, ut passim hanc legem transgrediatur. Et esto, quod multi contra eam peccent, ut tu supponis, tamen non major pars Clericorum continuat istas transgressiones.

264 Petes: contra quam virtutem ergo peccet Clericus superflua non expendens in usus pios?

Nota 1. Antequam fiat decisio hujus quæsitæ, videndum esse, ad quam virtutem ex præcepto Ecclesiæ pertineat expensio



§. IV. *Adstruitur nostra sententia de radice hujus obligation.* 433

sio superfluum in causas pias a Clericis facta ; nam contra eandem virtutem pugnat omissio actus alicujus, ad quam actus spectat: sic omissio largitionis eleemosynæ in illo casu, in quo est præcepta, pugnat contra virtutem misericordiæ, ad quam spectat datio eleemosynæ.

Nota 2. Quod lex humana etiam possit actum aliquem præceptum in certa virtute ponere, ad quam alias non spectasset vi juris naturalis aut divini, si videlicet Legislator condendo legem intendat imponere obligationem talis specificæ virtutis. Dixi: *Si intendat imponere obligationem*; siquidem, ut recte discurret La-Croix l. 1. n. 627. non sufficit, quod Superior ducatur motivo talis virtutis, idque etiam manifestet, sed debet etiam velle imponere obligationem illius virtutis, seu debet velle, & volendo facere, ut actus per suam legem præceptus sit materia necessaria talis virtutis. Sic e. g. in Vigilia S. Andreae Ecclesia præcipit jejunium ex motivo extrinseco Religionis, ut Sanctus hic per illud colatur: quia tamen non constat, quod Ecclesia etiam intendat imponere nobis obligationem Religionis: hinc ille, qui tali die non jejunat, non peccat contra Religionem, sed solum contra temperantiam, quæ est motivum intrinsecum jejunii.

Nota 3. Ex Oviedo apud La-Croix l. 5. n. 138. nullum præceptum Ecclesiasticum defacto esse impositum intuitu, & sub obligatione obedientiæ, ita ut aliquis transgrediens illud peccet contra virtutem obedientiæ; proinde omnia præcepta Ecclesiastica obligant ex alia virtute; hæc autem obligatio debet defumi vel ex motivo intrinseco, vel extrinseco. Est autem motivum *intrinsecum* honestas illa virtutis, ad quam ex se, & natura sua pertinet actus ille, qui præcipitur: sic motivum intrinsecum legis præcipientis jejunium, est honestas temperantiæ; ad hanc enim ex natura sua ordinatur jejunium. Motivum *extrinsecum* est, quod advenit a voluntate Legislatoris: ut si Legislator præciperet jejunium, ut inde colatur Sanctus aliquis; nam ad hoc motivum ex natura sua non ordinatur positive jejunium. Debet nihilominus illa res, quæ ex motivo extrinseco intenditur, habere aliquam aptitudinem, & proportionem, ut possit a Legislatore ad finem illum extrinsecum referri. Ut

*P. Kick Theol. Tom. IV.* lii pa



patet in jejunio, quod saltem ex intentione Legislatoris, & jejunantis ad cultum Sancti referri potest.

Nota 4. Quando nihil aliud constat ex verbis, vel circumstantiis Legis, vel quando dubium est, an aliquid fuerit obligatorie præceptum non solum ex fine intrinseco, sed etiam extrinseco, & consequenter duplex obligatio eidem materiæ, & actui imposita, tunc censendum est, quod lex solum obliget ex fine intrinseco. Ratio hujus est: quia hoc frequentius, & conaturalius fieri solet, ut lex solum obliget sub motivo intrinseco. Si vero lex non habeat aliud motivum intrinsecum, tunc recte colligimus, intendi a Legislatore, ut illa observetur ex motivo extrinseco. Si ergo aliquis talem legem transgrediatur, tunc peccabit contra illam virtutem, ad quam pertinet motivum extrinsecum. Hujus rei sequens exemplum adjungit La-Croix cit.: sic Ecclesia prohibet laborem servilem die festo: non est autem aliquod motivum intrinsecum, propter quod labor de se honestus ex natura sua, vel ex se prohiberi mereretur: ex quo proinde colligimus, quod is sit prohibitus ex motivo extrinseco diem festum colendi: quia autem iste cultus diei festi pertinet ad virtutem Religionis, hinc ille, qui laborat die festo, peccat contra virtutem Religionis. Hæc longius deduxi, quia eorum notitia est summe necessaria. His igitur not.

265

R. Probabilius ille Clericus, qui non pie expendit bona sua beneficialia superflua, peccat contra virtutem Religionis. Mezger, & Holzman. Prob. Præceptum obligans Clericos ad eroganda superflua in causas pias, procedit ex motivo Religionis: ergo, qui hoc præceptum violat, peccat contra virtutem Religionis. C. claret ex notandis. A. prob. nam Ecclesia ideo obligat ad ea pie expendenda, quia ea sunt vota fidelium, res Dei, patrimonium Christi: indeque Clericis non aliter distribuit ista superflua, quam ut *res Dei*, seu tanquam res sacras, & pie expendendas a Clericis, ut colligitur ex Tridentino supra citato. Hinc, quamvis *esse sacrum*, quod bonis superfluis beneficialibus ex intentione obligatoria fidelium, & proinde ex jure naturali competebat, fuerit sublatum per expensionem primam in Clericos: tamen aliud *esse sacrum* iisdem annexuit Ecclesia per præceptum suum, dum ex motivo Religionis præcipit, ut conformi



§. IV. *Adstruitur nostra sententia de radice hujus obligati. n. 435*

formiter piæ spei Fundatorum, & fidelium, ista bona tanquam res Dei a Clericis in pias causas etiam secunda expensione applicentur. Ex hoc

Inferes 1. Quod lex Ecclesiastica, prohibens expensionem superfluum beneficialium in causas profanas, non supponat obligationem Religionis jam antecedenter existentem ex lege naturali, vel divina, sed eam primum imponat, & causet. 266

Inferes 2. Legem Ecclesiasticam non obligare ex titulo, & motivo justitiæ ad pie expendenda superflua. Ratio est: quia obligationem justitiæ nullibi satis indicat Ecclesia in suis Canonibus: item, quia alias Clerici, si superflua in causas profanas expendissent, tenerentur ad restitutionem causis piis faciendam: atqui ad hanc non tenentur, ut ex superius dictis constat.

Inferes 3. Clericos non ex sola virtute obedientiæ obligari ad pie expendenda superflua. Ratio est: quia Ecclesia nunquam ex sola virtute obedientiæ solet fideles obligare ad aliquid præstandum, vel omittendum: ergo neque hic obligat ex sola virtute obedientiæ. A. prob. si Ecclesia obligaret ex solo motivo, & virtute obedientiæ, tunc obligaret solum ideo ad exhibitionem operis alicujus, quia illud præceptum est, & quia petit præcise subjectionem in hoc opere exequendo: sed nunquam ita obligat: ergo. M. est certa; quia obedientia non habet aliud motivum, vel honestatem, quam allatam. m. prob. Ecclesia nunquam præcipit aliquid, nisi illud cedat in bonum subditorum: bonum autem illud subditorum est honestas aliqua specialis alicujus virtutis specificæ, vg. Religionis, temperantiæ &c. non autem est honestas aliqua generalis obedientiæ. Patet etiam in omnibus præceptis Ecclesiæ, quæ specialem, & specificam honestatem, ab honestate obedientiæ distinctam, continent. Specialiter autem hoc præceptum erogandi superflua in causas pias non videtur præcise ideo factum, ut per hanc expensionem Clerici ostendant suam subjectionem erga Ecclesiam, sed ut satisfaciant pio Fundatorum desiderio, & juxta hoc bona illa tanquam *res Dei* pie applicent, ut patet ex dictis.



§. V.

*Resolutiones practicæ cum recapitulatione illorum,  
quæ hoc articulo hucusque sunt tractata.*

267 Resolvo 1. Clerici quicunque, male expendentes, alienantes &c. bona Ecclesiastica quarti modi, seu simpliciter talia, peccant, & tenentur ad restitutionem; nam Clerici non sunt Domini, sed solum administratores horum bonorum: ergo si male ea expendunt cum detrimento Ecclesiæ, peccant contra iustitiam, & tenentur ad restitutionem. Quod exinde confirmatur, quia fideles ista bona hac intentione & obligatione iustitiæ censentur contulisse Ecclesiæ, ut in bonum Ecclesiæ impendantur. Quare non substant liberæ dispositioni Clericorum, nequidem ipsius Pontificis, qui sine iusta causa ea non aliter, quam in bonum illius Ecclesiæ, ad quam pertinent, dispensare potest.

268 Resolvo 2. Clerici tenentur in causas pias expendere beneficialia superflua. Ratio est: quia grave est præceptum Ecclesiæ (non autem juris naturalis, vel divini) obligans ad hanc piam expensionem. Itaque, si gravem quantitatem de his bonis in usus profanos, vg. in Consanguineos, qui pauperes non sunt, vel in nimiam pompam, commensationes immoderatas, lusus immodicos &c. impenderit, absque dubio graviter peccat: id, quod certum est apud omnes. Ex his tamen

269 Dubitabis 1. Quænam quantitas bonorum superfluatorum sit gravis, & constituat peccatum mortale, si expendatur in usus profanos? R. 1. Ut circa hoc punctum peccetur graviter, requiritur major quantitas, quam ad furtum grave. Herincx, Reiffenstuel, Haunold, & alii communiter. Ratio est: quia Clerici sunt Domini superfluatorum, non sic fur rei furtivæ.

R. 2. Satis laxa videtur regula, quam ex Coninck refert P. Herincx, juxta quam quarta, vel quinta, aut tertia pars Reddituum superfluatorum esset mortalis, si in usus profanos expendere-



§. V. Resolutiones practicæ cum recapitulatione dictorum. 437

deretur. Hæc regula sic universaliter intellecta iuste displicet P. Haunoldo: nam sequitur ex ea, quod aliquando quidam Beneficiati unico anno aliquot millia aureorum ex superfluis possint in usus profanos convertere sine peccato mortali, uti e. g. Archidiaconus Toletanus, qui annuos redditus habet triginta millia aureorum, prout refert Haunoldus. Illsungen putat, interdum vigesimam partem bonorum superfluatorum non esse materiam levem, sed omnino gravem. Quare recte addit, certam hic, & universalem Regulam dari non posse, sed potius arbitrio prudentum relinqui debere, quæ materia gravis, vel levis sit: hoc autem iudicium ut rite formetur, esse respiciendum ad intentionem Fundatorum, qui videntur, maiorem quantitatem ex Redditibus, etiam certo superfluis (de his enim est sermo) indulgere illis Clericis, qui magis sunt de Ecclesia meriti ob nobilitatem, laborem, aliæque commoda Reipublicæ Christianæ, & Ecclesiæ præstita, ita quidem, ut interdum talibus insigniter meritis personis Fundatores præsumendi sint, velle concedere integros redditus ad liberam dispositionem. Ita Illsungen, cui & ego subscribo: quamvis forte respectu talium, tam præclara merita habentium, bona ista superflua dici nequeant, sed inter congruam, & debitam sustentationem computari debeant secundum dicta superius.

Dubitabis 2, Quænam sint causæ piæ, in quas dispensari debeant superflua? R. sunt ipsi pauperes, qui non habent necessaria ad sustentationem vitæ, inter quos etiam sunt Nobiles illi, & Illustres, qui non habent sufficientia media pro conservando suo statu: item Hospitalia, Monasteria, Tempia, & quæcunque demum ad cultum Dei, vel opera misericordiæ tam spiritualia, quam corporalia ordinantur: quidquid autem ad aliud aliud ordinatur, sortitur nomen causæ profanæ. Potest autem Beneficiatus, excepto casu necessitatis extremæ vel gravis suæ Ecclesiæ, bona superflua expendere in pauperes etiam extraneos, & in causas piæ extra suam Parochiam existentes. Ratio est: quia excepto casu necessitatis prædictæ nec Canones, nec jus naturale, aut divinum exprimunt, ut potius causis piis intra suam Parochiam, & Ecclesiam existentibus, quam extraneis succurratur. Accedit, quod Beneficiatus pauperibus in-

270



tra suam Parochiam existentibus obligetur tantum directe succurrere in spiritualibus, non autem in temporalibus: ergo non est ratio, cur magis debeat suis Parochianis erogare de bonis temporalibus, quam aliis extraneis, quamvis, cæteris paribus, omnino deceat, eum in suas concreditas oves etiam liberaliorem eleemosynam dispensare, quam in extraneos. Dixi: *excepto casu necessitatis extremæ, vel gravis*; quia natura dicitur, ut suis ovibus in tali necessitate constitutis præ aliis succurrat.

271

Resolvo 3. Beneficiatus superflua beneficialia expendens in causas profanas non tenetur ad restitutionem causis piis faciendam. Ratio hujus est: quia est Dominus horum bonorum: & licet peccet sic expendendo, non tamen peccat contra justitiam, adeoque nec ad restitutionem obligatur. Hinc neque ille, qui tales res superfluas etiam scienter a Clerico accepit, ad restitutionem tenetur. Ratio est: quia ejusmodi donatio, vel alienatio quæcumque similium bonorum fuit valida, eoquod Clericus habuerit dominium istarum rerum, & sic illud in alios transferre potuerit. Hæc tamen resolutio est intelligenda de superfluis ita expensis in causas profanas, ut ea neque formaliter, neque æquivalenter maneant in dominio Beneficiati. Quare

272

Resolvo 4. Si Beneficiatus ex superfluis beneficialibus emisisset prædium, vel aliquid aliud, tunc illud, quod emit, deberet in pias causas expendi. Lugo, Mayr, Busenbaum. Ratio est: quia res, quæ ex superfluis Beneficii bonis emitur, in illorum locum, & in eandem obligationem succedit: & hinc superflua illa saltem æquivalenter adhuc existant apud Beneficiatum: eapropter etiam pecunias illas, quas Clericus ex venditis fructibus superfluis colligit, tenetur in usus pios applicare.

273

Resolvo 5. Nisi adsint causæ piæ, vel pauperes in gravi, aut extrema necessitate constituti, Beneficiatus non tenetur statim superflua, quando ea accepit, in causas pias expendere. Herinex, Holzman, Antonius Mayr, & Commutis. Ratio est: quia Tridentinum superius allegatum non jubet, ut superflua statim erogentur, sed tantum, ut ea non dispensentur in Consanguineos &c. Hinc non est condemnanda praxis eorum, qui ea in-

ten-



tentione asservant bona superflua, ut majori summa collecta possint pias foundationes facere. Cavere tamen debent, ne morte praeventi dispositionem nullam faciant, & sic ea bona ad Propinguos, & alios profanos ab intestato deveniant.

Resolvo 6. Qui in usum profanum a Clerico accipit aliqua superflua, non tantum, ut dixi, excusatur a restitutione, sed & potest excusari a peccato, si Clericum non induxit ad talem expensionem, neque per eam Clericus redditur impotens ad superflua expendenda in usus pios. Ratio est: *tum*. quia praecipuum Ecclesiasticum tantum stringit personam Clerici, ne expendat, non tamen stringit alios, ne profana expensa acceptent. Hinc ait Lessius, & Herincx, quod obligatio ista non expendendi profane sit tantum *personalis*, seu soli personae Clerici affixa. *tum*, quia nullum praepudicium infert acceptans, eo quod Clericus supponatur, posse his male expensis alia bona ex patrimonialibus substituere, & in causas pias expendere. Imo Lugo, Mezger, Holzmann, Tamburinus, & Lessius existimant, quod acceptans talia profane expensa non peccet, etsi Clericus per talem expensionem reddatur impotens ad satisfaciendum suae obligationi, & expendenda superflua in causas pias. Verum haec opinio alio in loco magis discutietur. Dixi autem: *si Clericum non induxit*; nam ejusmodi inductio in expensionem malam, & peccaminosam semper foret peccatum.

274

Resolvo 7. Clericus potest libere, etiam in usus profanos, impendere 1. sua patrimonialia, 2. quasi patrimonialia, proinde & redditus Stolarum, ac 3. distributiones quotidianas, etsi ea multum excedant laborem, & dato etiam, quod praeter distributiones nulli alii fructus beneficiales adessent: 4. bona beneficia honestae sustentationi necessaria: 5. parsimonia, ac 6. fructus Capellaniae, vel Vicariae non collativae, ac ad nutum amovibilis. Ratio horum omnium est: quia aut non sunt bona beneficia, aut si sunt, non sunt tamen superflua: ergo ea non subsunt legi Ecclesiasticae, praecipienti, ut superflua beneficia in causas pias expendantur. Inde

275

Deduces: Si Clericus ex immediate enumeratis bonis aliquid



quid expenderit in causas pias, eum posse compensationem facere ex superfluis beneficialibus, atque hæc, scilicet superflua, in causam profanam applicare: Reiffenstuel, Lessius, Pichler. Et huic compensationi etiam tunc adhuc locus est, quando Beneficiatus habuit expresse animum non compensandi, ut docet Pichler ex Lugone contra alios. Ratio hujus est: quia præcepto expendendi superflua in causas pias jam est satisfactum per anticipatam expensionem aliorum bonorum. Neque obest, quod habuerit voluntatem per illam expensionem quasi patrimonialium non satisfaciendi præcepto illi, quo adstringitur superflua in causas pias erogare; ponamus enim aliquem, qui audit Sacrum die festo cum expressa voluntate non satisfaciendi præcepto Ecclesiæ, sed audiendi adhuc aliud Sacrum: talis homo, non obstante sua voluntate non satisfaciendi, satisfacit tamen per primum Sacrum, nec tenetur amplius ad aliud audiendum; quia per auditionem primi jam fecit rem præceptam, quod sufficit ad implendum Ecclesiæ præceptum: ergo idem est a pari in nostro casu dicendum.

276

Resolvo 8. Illi, qui habent beneficium in Commendam, tenentur superflua in usus pios impendere sicut Beneficiarii: Lugo, Busenbaum &c. Ratio est: quia talis, qui habet beneficium in commendam, substituitur Beneficiario in ejus munere, & sentit Commoda omnia Beneficiati: ergo debet & onera ejus præstare, inter quæ est, ut erogentur superflua in causas pias. Idem dicendum est de Vicariis perpetuis, qui etiam veri sunt Beneficiati. Commenda autem nihil est aliud, quam administratio, & cura beneficii vel Ecclesiæ alicui commissa. Hæc solet moderno tempore esse perpetua, confertur in titulum, ac æquiparatur beneficiis, uti etiam Commendatarius fructus Beneficii omnes percipit. Similis resolutio est de Pensionariis perpetuis, seu de Clericis perpetuam pensionem habentibus: Illung contra Lugo. Ratio est: quia hi sunt veri Beneficiati, & pensio perpetua est proprie dictum beneficium, ut ait Pichler Tit. *de Præbendis*. n. 8 ac Reiffenstuel *eod.* Tit. n. 86.; datur autem tunc talis pensio, quando autoritate Superioris detrahatur certa portio fructuum ex Beneficio pingui, & alicui Clerico propterea sacras functiones exercenti assignatur in titulum Beneficii perpetui,



tui, vñ. perpetuæ Vicariæ. Aliud dicendum de pensionibus temporalibus; nam hæ conveniunt cum Capellaniis [temporalibus. Item sub hac lege expendendi superflua in causas pias non veniunt pensiones laicales, quandoque Laicis ex certo beneficio solvendæ, ob servitia Ecclesiæ præstita, vel ob specialia merita in Ecclesiam collata.

§. VI.

*An Clerici Sæculares Beneficiati valeant testari, vel mortis causa disponere de suis bonis?*

Dubium hoc pertineret quidem ad materiam de Testamentis, & ultimis voluntatibus: nihilominus quia conclusiones priores interdum impugnari solent argumentis ex hac quæstione depromptis, ideo eam pro pleniori notitia de dominio Clericorum assequenda hic pertracto. Ut autem hoc rite fiat, antequam illa, quæ adhuc inter DD. sunt controversa, examinem, certas aliquas, ac ab omnibus admissas decisiones præmitto.

Certum igitur est 1. Clericos, seu beneficium habeant, seu non habeant, posse liberrime testari, & disponere mortis causa, etiam ad causas profanas, de bonis suis patrimonialibus, industrialibus, seu quasi patrimonialibus, item de parsimonialibus. Ita Lessius, Reiffenstuel. patet ex dictis §. I. hoc art. 277

Certum est 2. Quod Clerici, spectato jure communi scripto, nec valide, nec licite, etiam ad causas pias, possint testari, vel mortis causa disponere de bonis beneficalibus superfluis; hæc enim vi juris communis debent relinquere Ecclesiæ, in qua habuerunt Beneficium, quæ in talibus bonis succedit. Reiffenstuel, Holzman, ac Communis aliorum. Et clare habetur capp. 1. 8. & 9. de Testamentis. Idque statuit Ecclesia, ut Clerici non studerent accumulandis nimis opibus, ne hoc studio multum a cultu divino avocentur: item ut essent promptiores, ad superflua in vivis majori cum merito expendenda in causas pias, scientes, quod mortis causa de his bonis disponere nequeant.



Certum est 3. Illos Clericos Beneficiatos etiam de superfluis posse valide, ac licite testari ad causas tam pias, quam profanas, qui ita testandi privilegium & facultatem a summo Pontifice obtinuerunt. Ratio hujus est: quia lex prohibens, & irritans talia testamenta Clericorum, est tantum lex humana, & Ecclesiastica, in qua summus Pontifex ex rationabili causa potest dispensare, & illam per privilegium respectu aliquorum Clericorum relaxare: nam Pontifex est supra legem Ecclesiasticam. Ex quo similiter sequitur, quod summus Pontifex possit alicui Clerico concedere privilegium, ut de bonis superfluis beneficialibus etiam inter vivos possit licite disponere.

Certum est 4. Consuetudine quoque posse obtineri facultatem, licite & valide testandi de bonis superfluis ad causas pias. Ratio est: quia lex Ecclesiastica potest abrogari per consuetudinem rationabilem: atqui consuetudo testandi ad causas pias esset rationabilis: ergo per eam posset lex Ecclesiastica, irritans & prohibens ejusmodi Testamenta abrogari. Dubium igitur solum remanet, an consuetudo etiam possit introduci, vi cujus Clericis concedatur facultas valide, & licite testandi de superfluis beneficialibus ad causas profanas? pro cuius resolutione

278 **Affero 1.** Potest introduci consuetudo, vi cujus Clerici beneficiati ad causas profanas *valide* possunt testari, & mortis causa disponere de bonis beneficialibus superfluis. Covarruvias, Lessius, Zoësius, Mezger, Holzman, Reiffenstuel in Theol. morali, ac alii quam plurimi.

**Prob. 1.** Quod Clerici testari nequeant de prædictis bonis ad causas profanas, ex solo jure humano Ecclesiastico provenit: atqui jus humanum, etiam Ecclesiasticum, potest abrogari consuetudine legitime præscripta, ut habetur cap. fin. de consuetudine, & in Tractatu de legibus dictum est: ergo.

**Prob. 2.** Facultas ista testandi de præfatis bonis ad causas profanas a summo Pontifice potest dari per privilegium, & jam fuit data: ergo etiam potest acquiri per consuetudinem, saltem immemoriam; nam consuetudo immemoralis in Jure æquiparatur



tur privilegio, ut colligitur ex cap. *Super.* 26. de V. S. ergo facultas ista saltem per consuetudinem immemoriam introduci potest. M. prob. ex variis Bullis, ut illa Julii III. quæ incipit: *Cupientes, ut alma.* in qua Clericis Romanis, & urbi Romanæ vicinis conceditur facultas testandi *de omnibus & singulis fructibus, redditibus, & proventibus Ecclesiarum, & beneficiorum Ecclesiasticorum cum cura, & sine cura, licite tamen acquisitis, cujuscunque qualitatis, quantitatis, summe, valoris, & pretii, seu conditionis existant, etsi talia sint, quæ sub generali verborum expressione non comprehendantur, sed speciali nota digna sint.* Sub quibus verbis certe comprehenduntur etiam bona beneficalia superflua: tum, quia Bulla loquitur de omnibus omnino fructibus beneficalibus: deinde de bonis cujuscunque qualitatis, & conditionis, & de illis quoque, quæ speciali nota digna sunt, qualia sunt utique secundum Aarios bona superflua. Et de his bonis concedit Pontifex, ut Clerici possint disponere tam inter vivos, quam mortis causa, ac testari etiam ad causas quasvis profanas, & in favorem locorum piorum, & non piorum, hominum etiam *de jure incapacium, divitum, & potentium,* additque, quod sic disponere valeant *libere, & licite.*

Prob. 3. Clerici inter vivos valide possunt disponere de bonis superfluis in causas profanas, quamvis non licite: ergo non est ratio, cur consuetudo ejusmodi valide disponendi mortis causa de iisdem bonis non possit introduci contra legem Ecclesiasticam.

Prob. 4. Consuetudo ejusmodi esset rationabilis positive: ergo non est ratio, cur ea non possit introduci A. prob. nam consuetudo inde fit rationabilis, 1. quia potest servire ad publicam Reipublicæ pacem, & amputandas lites, quæ inter Ecclesiam, & hæredes defunctorum facile alias oriri possent, eoquod bona patrimonialia, & quasi patrimonialia, de quibus valide & licite testantur Clerici, non possint discerni a superfluis beneficalibus, de quibus testandi facultatem non haberent, nisi ejusmodi consuetudo esset valida. 2. Facultas hæc testandi refrænât luxum & pompam, ac nimiam prodigalitatem Clericorum; nam si sciunt, quod aliquid suis possint relinquere, non solent adeo



esse prodigi in vita. 3. Hæc facultas posset etiam viros doctos, ac aliis dotibus insignes allicere ad Clericatum assumendum cum magna utilitate Ecclesiæ.

279 *Objic. 1. Cap. Relatum. 12. de Testamentis.* approbatur solum consuetudo testandi de superfluis beneficialibus in causas pias: ergo a contrario reprobat consuetudo testandi ad causas profanas. R. N. c. Quamvis Pontifex unam consuetudinem approbet, non tamen aliam, de qua nihil dicit, statim reprobatur positive ut corruptelam, & irrationabilem, sed tantum ab ea abstrahit.

*Objic. 2.* Hæc consuetudo foveret peccatum; faceret enim, ut Clerici nimis intenti corradendis bonis, minus forent liberales in pauperes: ergo foret irrationabilis, & non posset valide introduci. R. 1. indirecte: Etiam tali modo lex, prohibens testari ad causas profanas, foveret peccatum; nam esset ansa, ut Clerici forent nimis prodigi, excederent in sumptibus, & pompa &c. ergo etiam talis lex prohibens foret irrationabilis. R. 2. N. a. Hæc consuetudo non foveret, nec causaret peccatum, quamvis ex ea per accidens malitia quorundam Clericorum posset sumere ansam peccandi, ac corradendi avare bona neglectis pauperibus: sicut homines pravi sæpe ex re optima ansas peccandi arripiunt, prout ex ipsa lege prohibente ejusmodi testamenta Clericorum ad causas profanas, possunt aliqui Clerici peccaminose prodigere, aut negligere bona beneficialia: ubi tamen propterea lex hæc, etiam ex mente AAriorum non foret irrationabilis.

Dices: Saltem hæc consuetudo esset contraria fini rationabili, quem habet lex Ecclesiastica, prohibens hæc testamenta: ergo hæc consuetudo non esset rationabilis. R. D. a. esset contraria *negative*, quatenus positive non procuraret finem hunc rationabilem C. a. esset contraria *positive*, quatenus malitiam contrariam huic fini positive intenderet, aut causaret N. a. Videantur dicta de consuetudine in Tractatu de Actibus humanis, ex quibus omnia, quæ hic objici possunt, solvi debent.

280 *Affero 2.* Potest etiam introduci consuetudo, vi cujus Clerici non solum valide, verum & licite testentur de bonis beneficialia-



ficialibus ad causas profanas. Mezger, Holzman, Haunold, ac plures alii contra nostrum Reiffenstuel superius cit. Probatur hæc conclusio iisdem rationibus, quibus fuit probata prior. Ex quo

Deduces 1. Posse quoque consuetudinem introduci, vi cuius Consanguinei & hæredes defuncti Clerici succedant in ejus bonis superfluis ab intestato: quia de hac consuetudine par est ratio, ac de priore.

Deduces 2. Quod etiam per consuetudinem possit obtineri licentia expendendi bona superflua in causas profanas per donationes, & alios contractus inter vivos. Ubi igitur similis consuetudo esset legitime introducta, Clerici, sic expendentes bona superflua in causas profanas, non amplius peccarent, quia lex prohibens tales expensiones esset sublata per consuetudinem legitime introductam.

Porro in utraque assertione dixi: *Potest introduci consuetudo* 281  
*&c.*, nolim enim asserere, eam jam actu introductam esse; nam de tali consuetudine actu jam vigente non videtur sufficienter constare: siquidem & in iis locis, ubi viget testandi consuetudo, Clerici, curam salutis suæ habentes, testantur ad causas pias, imo aliqui eorum, uti Episcopi, specialem petunt testandi licentiam ad causas profanas, quod non facerent, si jam per consuetudinem obtinuissent hanc facultatem testandi: alii autem, dum testantur ad causas profanas, disponunt de suis patrimonialibus, vel quasi patrimonialibus, ac illa quæ superflua sunt, curant erogari in Missas, funeralia, & alia pia legata. In nonnullis diæcesibus, ubi est consuetudo testandi, etiam Episcopi expressus consensus requiritur, utique non ob alium finem, quam ut securius Clerici testantes satisfaciant suæ conscientiae quoad dispositionem circa superflua. Quod si unus, vel alter (quod tamen non facile præsumi debet) aliter egerit, non statim consuetudo hæc valide, vel licite ad profana testandi censetur esse introducta; cum hæc solum a majori parte Communitatis introduci valeat, prout præclare discurrit Reiffenstuel cit. n. 57.



Adverto nihilominus, an consuetudo hæc introducta sit, nec ne, non petendum ex libris, sed ex particulari singularum Dicecessum usu, quem optime noverint illi, qui talibus Dicecessibus præsumt. Addo etiam, in aliquibus dicecessibus posse esse consuetudinem *valide*, non autem *licite* sic testandi. Hinc pessime argumentaretur aliquis Clericus: In mea dicecesi est consuetudo testandi de bonis beneficialibus superfluis ad causas profanas: ergo sine peccato possum de iis testari; potest enim consuetudo ista se solum ad valorem extendere, non autem ad licentiam, & evitacionem peccati; nam valor, & licentia actionis sunt duo separabilia: hinc circa illum potest introduci consuetudo, quin circa alteram.

Atque hoc patet ex constitutionibus Synodalibus Constantiensibus; quæ, quamquam supponant, & asserant, receptam esse alicubi consuetudinem testandi valide ad causas profanas de bonis beneficialibus, sic tamen testantes non absolvent a peccato. Verba Synodi, in quibus aliqui ex Aariis plus justo confidunt, subnecto, & sunt hæc: *Licet antiquissimæ consuetudini libere testandi nihil derogatum velimus: quia tamen pium, rationique valde consentaneum est, ut Clerici ex huiusmodi bonis honeste tantum vivant, & quod superest, in pios usus convertant, serio monemus omnes Clericos, ut circa huiusmodi bona, sive hæredes ex Testamento, sive ab intestato relinquunt, etiam Ecclesiarum, quibus adscripti sunt, pauperum, aliarumque piarum causarum rationem habeant, ne, dum forte suos Consanguineos ex bonis Ecclesiasticis temporaliter locupletare contendunt, ipsi salutis æternæ dispendium, atque jacturam patiantur.* Ubi posita etiam consuetudine libere testandi de superfluis, supponitur adhuc adesse periculum peccandi graviter. Qua de re non immerito Lessius l. 2. c. 19. dub. 4. n. 44. invehitur in illos Clericos ita salutis immemores, ut in articulo mortis velint sibi accersere periculum damnationis, aitque, viros bonos ab hoc valde abhorrere.

Sunt etiam notatu digna verba Clarissimi P. Antonii Mayr hujus tenoris: *Neque unquam audiui, esse communem persuasionem apud Clericos probos, posse eos licite de superfluis beneficialibus disponere non aliter, quam Sæculares, eaque consumere e. g. convivando,*



do, ludendo, vel divitibus Consanguineis donando. Merentur & legi, ac notari illa, quæ habet Pichlerus l. 3. Decret. T. 25. de peculio Clericorum. n. 12., ubi inter alia habet: Valde decet, ut Clerici non sibi, & suis usibus applicent illa etiam bona beneficalia, quæ ad congruam sustentationem absolute computari possunt: imo tam ampla sustentatio ipsis non debetur, quando occurrunt valde graves necessitates proximorum, & Ecclesiæ; est enim res scandalo plena, pauperes perire fame, & Clericos de patrimonio Christi laute vivere &c. Ita ille, licet in suis sententiis alias satis faveat Clericis Sæcularibus. Sed contra hæc, quæ ultimæ assertioni subjunxi.

Objic. 1. Si Clerici sic testando peccant, hoc ipso consuetudo præfata est invalida: ergo. A. prob. illa consuetudo est invalida, quæ fovet peccatum: atqui si Clerici, sic vi consuetudinis testando, peccant, tunc consuetudo necessario fovet peccatum; quia præbet ansam sic peccaminose, & illicite testandi: ergo. R. N. a. ad prob. N. m. consuetudo enim illa ex rationabili causa, ne alias multiplicentur lites, permittit Testamentum tale valere, postquam illud est factum, non autem approbat positive ut licitum, imo supponit, illud esse prohibitum. Neque novum est, quod lex, vel consuetudo aliquem actum illicitum, & peccaminosum permittat esse validum: sic, si quis contra juramentum faceret testamentum, peccaret quidem, & tamen dispositio in testamento facta valeret: Et qui contra sponsalia priora, quæ fecit cum Berta, duceret Cajam, peccaret, sed matrimonium valeret. Hinc etiam Clericus, qui de beneficalibus superfluis ad causas profanas disponderet vel inter vivos, vel vi præfatae consuetudinis etiam mortis causa, peccaret quidem, dispositio tamen semel facta valeret. Unde hic locum habet vulgare illud: *Multa prohibentur, quæ tamen facta tenent.* 282

Objic. 2. Saltem hæredes, qui aliquid ex simili Testamento, de quo loquimur, accipiunt, debent illud in causas pias expendere; nam hæredes quoad bona, quæ ex Testamento obtinent, repræsentant personam defuncti Testatoris, in cujus proin onera succedunt. Cum ergo defunctus ipse ex præcepto fuisset obligatus expendere superflua illa in Testamento relicta, sic &



*De Dominio Religiosorum.*

§. I.

*An Religiosi in communi sint capaces Domini?*

283 **N**ota 1. Religiosos varie posse considerari: 1. Possunt spectari in communi, quatenus constituunt aliquam certam Communitatem, integrum Conventum, ac familiam alicujus Monasterii, vel integrum Ordinem. 2. potest quilibet inspicere in particulari, & seorsim: possunt etiam considerari ut Professi, & nondum Professi.

Nota 2. Certum esse, quod Novitii necdum professi, etiam in particulari, gaudeant dominio; hi enim necdum renunciarunt dominio suarum rerum per Professionem. Quæstio est solum de Professis, qui sunt duplicis generis; alii enim tantum emiserunt **vota simplicia**, ut Scholastici S. J. post biennium

Nc



Novitiatus, qui proinde non sunt solemniter professi: alii sunt solemniter professi. Hinc

Nota 3. Ex Lessio, Herincx, & Holzman: Votum *solemne* esse illud, quod susceptioni status immutabilis conjunctum est: quale est illud, quod ex Ecclesiae ordinatione annexum est susceptioni Ordinis sacri, per quem immutabiliter aliquis dedicatur statui Ecclesiastico. Talia vota etiam sunt illa, quae emituntur in Professione Religionis ab Ecclesia approbatae, & per quae se quis immutabiliter, & irrevocabiliter consecrat statui Religioso. Dicuntur autem vota ista *solemnia* 1. denominatione aliqua desumpta ab ipso Ordine sacro, & Professione Religiosa, qui sunt actus quidam solemnes. 2. quia ex decreto Ecclesiae aliquam specialem qualitatem obtinent; possunt enim aegerrime relaxari, ac per ea fit contractus inter Religiosum, & Religionem ita firmus, ut ei neque Religiosus, neque Religio amplius possint renunciare. Accedit, quod ex constitutione Ecclesiae voto paupertatis, solemniter edito, sit annexa incapacitas dominii, & voto solenni castitatis impedimentum dirimens matrimonii. Contra, vota *simplicia* non annectuntur statui irrevocabili; nam, qui in aliqua Religione emittit vota simplicia sola, se quidem, quantum est ex sua parte, obligat irrevocabiliter Religioni, ita, ut talis vovens non possit amplius resilire, aut mutare voluntatem suam: non autem se mutuo tali voventi obligat Religio ad non relaxanda ejus vota. Quare penes Religionem manet potestas tollendi, & relaxandi vota simplicia: aliud est in votis solemnibus, quae tam ex parte voventis, quam ex parte Religionis sunt irrevocabilia. H. N.

Affero. Religiosi in communi, seu Communitates Religiosae possunt habere dominium rerum temporalium, mobilium & immobilium, exceptis Fratribus Minoribus de Observantia, & Capucinus. Ita defacto omnes contra Navarrum, qui dominium rerum omnium, quarum usum habent Clerici, & Religiosi, voluit esse penes Christum, & solam administrationem earum esse apud Communitates Religiosorum, cujus fundamentum jam superius solutum est. 284



Prob. 1. Tridentinum ſeſſ. 25. de Regularibus c. 3. concedit omnibus Monaſteriis, & domibus tam virorum, quam mulierum & mendicantium, exceptis domibus Fratrum S. Franciſci, Capucinorum, & eorum, qui Minorum de Obſervantia vocantur, etiam quibus aut ex Conſtitutionibus ſuis erat prohibitum, aut ex privilegio Apoſtolicò non erat conſeſſum, ut deinceps bona immobilia eis poſſidere liceat, utique tanquam vere ſua.

Prob. 2. Nicolaus III. cap. *Exiit.* de V. S. tradit, Franciſcanos neque in communi habere dominium rerum tam mobilium, quam immobilium, ſed dominium rerum iſſis conſeſſarum pertinere ad ſummum Pontificem: & hoc docet, tanquam aliquid Franciſcano Ordini peculiare, & ſpeciale: ergo eoipſo ſupponit, quod aliæ Religiones in communi ſint capaces domini; alias enim hæc incapacitas domini non eſſet Franciſcanæ familiæ ſpecialis, ſed foret omnibus Religionibus communis.

Prob. 3. Juxta Can. *Abbates.* c. 18. q. 2. & receptam apud omnes ſententiam: *Monachus, quidquid acquirit, monaſterio acquirit*: ergo Monaſterium, ſeu Religioſi habent dominium illarum rerum, quas acquirunt. C. videtur patere; ideo enim Monachus ſibi in particulari non acquirit aliquid, quia in particulari non eſt capax domini: ergo e contrario, ſi aliquid acquirit Monaſterio, hoc debet eſſe capax domini.

Prob. 4. Neque ex ordinatione Eccleſiæ, neque ex intentione Religioſorum voventium paupertatem, neque ex intentione Fundatorum, donantium bona aliqua Monaſteriis, prædictæ Religiones in communi ſunt incapaces domini: ergo non ſunt incapaces. A. pars 1. patet; quia talis ordinatio, quæ Religioſis in communi denegaret dominium, non poteſt oſtendi. 2. pars exinde clara eſt, quia tales Religioſi vi voti ſe tantum in particulari intendunt privare dominio. 3. pars iterum liquet; quia donantes ordinarie cenſentur, velle transferre dominium in donatarios, qui illius ſunt capaces, ſicut & dominium eleemoſynæ in pauperes domini capaces transferre ſolent: ergo, ſi aliunde Religioſi domini non ſunt incapaces, tunc neque ex intentione Fundatorum fiunt incapaces: imo vi intentionis hujus ad Religioſam Communitatem potius transfertur dominium.

Ne.



*§. II. An Religiosi in communi sint capaces Domini? 451*

Neque obest huic dominio, quod Ecclesia per suas ordinationes certis limitibus restringat dispositionem de bonis Monasterii, ita ut in detrimentum Monasterii etiam tota Communitas Religiosorum de talibus bonis disponere nequeat; nam hæc ordinatio non tollit dominium, sed reddit minus expeditum: prout & alias Dominus potest lege quandoque impediri in aliqua dispositione circa bona sua.

Ex quo colliges, vi Tridentini in probatione prima allegati, omnibus Religiosis (exceptis Franciscanis observantibus, & Capucinis) esse permissum possidere bona etiam immobilia in communi, etsi forte Constitutiones, & Regulæ ejusmodi Ordinum obstant. Quare etiam Clarissæ, primam Regulam S. Claræ observantes, vi cujus sunt incapaces domini etiam in communi, possent post Tridentinum bona mobilia, & immobilia in communi possidere, ut recte docet Herincx.

Adverte tamen, hoc dominium Religiosorum in communi non esse ita absolutum, & expeditum, ut Sæcularium; etenim nec totæ Communitates Religiosæ possunt pro libitu de talibus bonis, quorum habent dominium, disponere in usus quosvis etiam profanos; sed debent ea in commodum Monasterii applicare, hæc enim sub obligatione a Fundatoribus donantur Conventui.

*§. II.*

*An Religiosi in particulari habeant Dominium?*

Affero 1. Religiosi in particulari, Religionem ab Ecclesia approbatam solemniter professi, sunt incapaces domini, & juris cujuscunque realium res temporales, & externas. Communis & recta. 285

Prob. Ecclesia suis ordinationibus reddit Religiosos incapaces domini: ergo sunt incapaces. A. prob. 1. ex communi consensu omnium DD., qui hanc incapacitatem ex ordinatione Ecclesiæ descendantem agnoscunt. 2. ex Cap. cum ad monasterium 6. de statu Monachorum. ubi Innocentius III. sic ait: *Prohibemus districte in virtute obedientiæ, sub obtestatione divini judicii, ne quis Monachorum proprium aliquo modo possideat. Et*



infra: *Nec aestimet Abbas, quod super habenda proprietate possit cum aliquo Monacho dispensare; quia abdicatio proprietatis, sicut & custodia castitatis, adeo est annexa Regulae monachali, ut contra eam nec summus Pontifex possit licentiam indulgere.* Dixi in conclusione 1. Religionem ab Ecclesia approbatam *solemniter* professi. Dixi 2. sunt incapaces dominii, & juris realis cujuscunque in res temporales. Pro harum particularum declaratione sequentes ponuntur conclusiones. Quare

286

Affero 2. Aliqui Religiosi non solemniter professi, sed emittentes vota simplicia in Religione per Sedem Apostolicam approbata, sunt capaces dominii. Communis, ac certa; nam Scholastici S. J., qui post biennium Novitatus vota simplicia emisserunt, sunt veri Religiosi, prout decernit Gregorius XIII. in Bullis: *Quanto fructuosius.* Et: *ascendente Domino*: Sed iidem per vota simplicia non sunt incapaces dominii; siquidem retinent dominium proprietatis respectu suorum bonorum, ac paupertatem in solo usu servant, quatenus nulla re tanquam propria, & sine Superioris facultate uti possunt, ut habetur in laudatis Bullis: ergo aliqui Religiosi, non solemniter professi in aliqua Religione approbata ab Ecclesia, sunt capaces dominii.

Ratio hujus est 1. quia tale dominium est parvi momenti, cujus usus est impeditus, & in omnibus dependens ab alieno arbitrio, & nutu Superioris; siquidem dominium rerum tantum aestimari solet propter usum, & liberam dispositionem. 2. Curae saeculares, quae confundunt animum, magis ex usu libero rerum temporalium, quam ex earum proprietate proveniunt: ergo non obstante tali dominio, cujus usus est in omnibus ab arbitrio Superioris dependens, potest dari paupertas vere religiosa saltem quoad essentiam. Ex quo

Sequitur, talem Religiosum, si alicujus rei, etiamsi sua sit, usum usurpet absque Superioris consensu tacito, vel expresso, peccare mortaliter, si videlicet materia sit gravis. Ratio est: quia iste aequè privatus est dispositione libera, ac si res sua non esset. An autem talis dispositio, vg. donatio de rebus suis facta a Religioso, qui dominium, non autem usum habet, sit etiam



*§. II. An Religiosi in particulari habeant dominium? 453*

etiam invalida, disputant inter se DD. Societatis, qui videri possunt: ad nos, qui solemniter sumus professi, hæc res non spectat.

Certum pariter est inter Th. Th. quod Religiosi, professi Religionem nondum a Sede Apostolica approbatam, sint capaces domini: quia tales non habent votum solemne, cum solemnitas tantum ex ordinatione Ecclesiæ sit annexa votis, quæ emittuntur in Religione ab eadem approbatis.

Affero 3. Religiosus, etiam solemniter professus, in particulari potest habere dominium, vel quasi dominium rerum, & jurium spiritualium. Ratio est: quia Religiosi per votum paupertatis non renunciant bonis, aut juribus spiritualibus, nec honoribus, qui propter talia jura debentur, sed tantum bonis temporalibus, ut docet D. Thomas 2. 2. q. 186. art. 7. ad 4. Lessius, Holzman, & alii communiter: ergo. 287

Ex quo deduces, Religiosos Beneficiatos habere dominium suorum Beneficiorum, & posse agere nomine proprio ad eorum dominium acquirendum, vel recuperandum, si injuste sit ablatum: Item simplicem Religiosum posse agere super jure eligendi, manendi in tali monasterio, si ad illud Professionem emisit &c. Pariter Religiosus habet dominium, vel quasi dominium juris alimentorum.

Quæres: Unde proveniat incapacitas Domini in Religiosis solemniter professis? R. 1. Non provenit hæc incapacitas ex natura status Religiosi secundum se, & in genere. Communis. Ratio est: quia status Religiosus in Scholasticis S. J. subsistit cum dominio proprietatis, ut dictum est: quod non posset fieri, si status Religiosus ex essentia, & natura sua importaret incapacitatem domini. 288

R. 2. Neque hæc incapacitas oritur ex natura voti paupertatis. Iterum Communis. Ratio est: quia votum paupertatis emissum in Religione non approbata, vel votum simplex non inducit hanc incapacitatem: ergo hæc incapacitas domini non oritur ex natura voti paupertatis.



Neque dicas : saltem votum solemne reddere incapacem dominii ; nam contra est : Votum simplex in ratione voti minus est efficax quam solemne , & tamen non potest inducere hanc incapacitatem : ergo neque votum solemne , quatenus est votum , potest hanc incapacitatem inducere. A. est certum ; nam votum solemne in ratione , & essentia intrinseca , ac efficacia voti nil differt a voto simplici. Hinc votum solemne , & simplex in ratione voti coram Deo pariunt eandem omnino obligationem : differentia autem est extrinseca ex certis ordinationibus ab Ecclesia annexis voto solemnī , non autem voto simplici , ob quas ordinationes , voto qua tali penitus extrinsecas & accidentales potest quidem vovens fieri incapax dominii , sed tunc hæc incapacitas non oritur ex natura , & essentia voti , bene ex ordinatione Ecclesiæ hanc incapacitatem extrinsece annectente simili voto.

Ratio ulterior hujus 2. Responsionis est , quia nullus privata voluntate potest se reddere incapacem dominii , nisi accedat auctoritas juris , vel Superioris , inhabilitantis legitime ejusmodi Personam ad dominium , vel nisi aliquis actu transferat in alium dominium : ergo , quantumcunque aliquis voveat , vel proponat , quod nullam rem ut propriam velit habere , potest mutata voluntate statim habere proprium , nempe saltem valide.

*Confirm.* Votum paupertatis est mera promissio : atqui promissio non reddit aliquem incapacem dominii : ergo votum paupertatis non reddit incapacem dominii. m. constat ; sic ex eo , quod Paulus promiserit librum Joanni , non perdit statim dominium hujus libri , imo potest valide eundem alteri donare : & ex eo , quod Antonius promiserit matrimonium Catharinæ , non fit incapax ducendi aliam , vg. Joannam : ergo a pari , quod quis per votum promiserit Deo abdicationem omnis proprii , & dominii , non statim sequitur , quod fiat incapax dominii. Ex quo habes , quod hæc incapacitas etiam nequeat provenire ex intentione voventis , ut ostendunt probationes hujus responsionis secundæ.

R. igitur 3. Hæc incapacitas dominii oritur ex Constitutione Ecclesiæ. Communis. Prob. Non potest alia radix hujus incapaci-



capacitatis ostendi, quam lex Ecclesiastica, ut patet ex dictis: ergo.

Dices 1. Hæc incapacitas habet ortum ex solemnitate voti: ergo non ex sola lege Ecclesiastica. R. N. C. nam, ut ait Bonifacius VIII. Cap. un. *de Voto, & Voti Redempt.* in 6. ipsa *voti solemnitas ex sola constitutione Ecclesie est inventa.* 289

Dices 2. summus Pontifex juxta superius cit. cap. *cum ad monasterium*, non potest cum Religioso dispensare, ut habeat dominium: sed, si incapacitas dominii ex sola lege Ecclesiastica haberet ortum, tunc summus Pontifex posset dispensare; quia in omni constitutione Ecclesiastica dispensare potest: ergo. R. In allegato capitulo summum Pontificem loqui in sensu composito status Religiosi: & ita summus Pontifex dispensare non potest, ut quis manens Religiosus *solemniter* professus simul habeat dominium proprietatis: potest autem dispensare, dissolvendo vinculum, & tollendo naturam solemnitis Professionis, vel eandem mutando in aliam formam vitæ Religiosæ. Id, quod habetur ex praxi, ex qua constat, quod summus Pontifex dispensarit in votis solemnibus Religionis in ordine ad in eundem matrimonium: sic Alexander III. dispensavit cum Nicolao Justiniano Monacho, teste Volaterrano l. 4. Hist. Clemens II. cum Casimiro Monacho Cluniacensi, ut refert Baronius in Annalibus ad ann. Christi 1141. Adde, quod solemnitas voti castitatis in SS. Ordinibus sit dispensabilis, & sæpius a Romanis Pontificibus fuerit dispensata.

Dices 3. Res Deo sacra non potest amplius converti in usus profanos: sed Religiosus professus est res Deo sacra: ergo non potest amplius profanari per dissolutionem Professionis. R. D. M. non potest converti in usus profanos manente consecratione C. M. sublata consecratione N. M. Hanc consecrationem per sublationem voti solemnitis Pontifex aufert, & facit hominem, qui fuit Religiosus, profanum, & Sæcularem.

Dices 4. Pontifex non potest a Sacerdote consecrationem sacerdotalem auferre, & facere, ut desinat esse Sacerdos: ergo neque potest a Religioso auferre consecrationem factam per vota solemnia. R. N. c. & parit. Consecratio Sacerdotis consistit in indelebili caractere ex divina ordinatione impresso, qui minime sub-



subiacet potestati humanæ, & ecclesiasticæ, consecratio autem hominis religiosi, facta per vota solemnia, provenit partim a voto ipsius Religiosi, partim ab ordinatione Ecclesiæ: sed tam in voto, quam ordinatione sua Ecclesia dispensare potest, ut constat.

Pro coronide hujus §. nota, incapacitatem dominii posse etiam extra Professionem solemnem oriri ex sola lege civili, vel ecclesiastica: ita Coadjutores formati S. J., etsi non emittant votum solemne, tamen habent ejusmodi incapacitatem dominii ex statuto Sedis Apostolicæ.

## §. III.

*Resolutiones practicæ.*

290

Resolvo I. Tametsi Religiosus ad Episcopatum evehatur, non tamen fit capax dominii. Herincx, Mezger, Holzman, ac alii communiter. Ratio est: quia status religiosus, observantia paupertatis, ac abdicatio omnis dominii non repugnant dignitati episcopali, imo hanc ornant, & juvant: ergo non est censendum, quod per assumptionem dignitatis episcopalis status religiosus, & obligatio observandi paupertatem religiosam &c. tollatur; non enim tollitur ex natura rei: cum hi duo status, religiosus scilicet, & episcopalis mutuo non opponantur, imo sese mutuo juvent: neque tollitur per dispensationem summi Pontificis, quæ hic non Potest præsumi; cum non adsit causa, vel necessitas dispensandi, eo ipso, quod duo isti status simul consistere possint. Hac de causa Religiosi, facti Episcopi, tenentur portare habitum suæ Religionis in signum, quod adhuc sint Religiosi, votis solemnibus adstricti.

Dices I. Can. un. caus. 18. q. 1. Monachus factus Episcopus dicitur esse absolutus *jugo regulæ, & monasticæ professionis*, ergo. R. Hic Canon tantum vult, quod Regularis factus Episcopus non sit amplius obligatus accidentalibus Regulæ observantiis, quæ statui episcopali non bene conveniunt, uti sunt solitudo claustralis, ac silentium &c., per hoc tamen manet adstrictus ad eas observantias regulares, quæ dignitatem episcopalem non dedecent. Pro quo

Nota:



Nota: Equidem Religiosum factum Episcopum, quoad usum & administrationem suorum bonorum, item quoad obedientiam non amplius dependere a Superiore suo Regulari; quia tanquam Episcopus est in excellentiori gradu, quam est Superior Regularis; dependere nihilominus quoad utrumque a summo Pontifice, qui dispositionem Episcopi talis de bonis ipsi concessis potest limitare, & aliqua etiam sub præcepto obedientiæ impondere. Hinc in istis duobus votis fit aliqua accidentaliter mutatio, quatenus Religiosus iste loco Superioris Regularis modo tenetur obedire summo Pontifici, & ab hujus nutu dependere in administratione bonorum sibi ad sustentationem concessorum.

Dices 2. In cit. Can. dicitur etiam, quod Monachus factus Episcopus possit sibi jure vendicare paternam hæreditatem: ergo habet dominium hæreditatis. R. N. c. nam habet tantum potestatem vendicandi hæreditatem nomine suæ Ecclesiæ, cui sponsatus est, non autem nomine suo: consequenter non sibi, sed suæ Ecclesiæ acquirit dominium talis hæreditatis. Ex quo

Inferes 1. Ejusmodi Religiosos ad Episcopatum evectos, esse tantum administratores suorum reddituum beneficialium, quamvis in hos liberius gaudeant potestate administrationis, quam alii administratores in bona suæ curæ, & administrationi concredita, ut ait Holzman.

Inferes 2. Tales Regulares, qui sunt facti Episcopi, prodige disponentes de redditibus suis, vel eos in causas profanas expedientes, peccare contra votum paupertatis, & justitiam, & illos, qui ex tali dispositione prodiga aliquid accipiunt, teneri ad restitutionem, nisi hanc Ecclesia remittat. Herincx, ac plures alii apud eum allegati. Ratio hujus dabitur mox Num. sequenti.

Resolvo 2. Abbates, Præpositi, alique Regulares Superiores, aut Religiosi beneficiati, possidentes beneficia regularia, vel sæcularia, vi juris & consuetudinis non habent quidem dominium, bene autem potestatem administrandi fructus suorum beneficiorum tam ad congruam sustentationem, quam ad pias causas. Ita communiter sentiunt DD. cum Herincx, Mezger, Holzman &c. Ex quo



Sequitur 1. Abbatem, vel alium Beneficiatum regularem posse facere donationes, non solum remuneratorias, sed etiam liberales, quas spectatis facultatibus Monasterii Ecclesiae decens administratio, aut laudabilis consuetudo requirit.

Sequitur 2. Superiores regulares, vel alios Religiosos, qui administrationem habent fructuum Monasterii, vel Beneficiorum, expendendo inordinate aliquid de iisdem fructibus aut bonis cum detrimento Monasterii, non solum peccare contra votum paupertatis, sed etiam contra iustitiam, prout Num. præc. de Episcopis dictum est. Ratio hujus est: quia non sunt Domini, sed solum administratores ejusmodi bonorum, & sic non possunt pro libitu de eisdem disponere, sed debent illa solum expendere eo modo, quo ipsis consuetudo & jura permittunt, secus impingunt contra iustitiam, sicut & alii administratores contra iustitiam delinquant, dum in administratione bonorum sibi commissorum infideles existunt.

292 Resolvo 3. Alienationes, donationes, tam inter vivos, quam in testamento, vel ultima voluntate factæ a Religioso solemniter professo proprio nomine & autoritate, non solum sunt illicitæ, sed & invalidæ. Hinc, qui aliquid ex tali alienatione accipiunt, tenentur ad restitutionem. Ratio est: quia Religiosi solemniter professi in particulari sunt incapaces dominii, adeoque nomine proprio de nulla re temporali valide disponere, sed tantum hoc possunt nomine Monasterii, si hoc sit dominii capax, aut nomine summi Pontificis, vel alterius Domini, posito, quod Monasterium, vel Religio neque in communi possit dominium rei temporalis habere, uti nostra Religio.

293 Resolvo 4. Paupertas religiosa non solum obligat ad carentiam dominii, sed etiam ad non habendum usum simplicem facti activum rerum temporalium sine licentia Prælati. Ratio hujus est: quia votum paupertatis obligat secundum intentionem voventium: atqui, qui in Religione emittunt votum paupertatis solemne, non solum intendunt se privare omni dominio, & jure rerum temporalium, sed & omni usu simplici, independente a nutu Superiorum: ergo. m. patet ex unanimi sensu omnium Theologorum, & praxi omnium Religionum. Ex quo

Sequi-



§. III. *Resolutiones quædam practicæ de dominio Religiosor.* 459

Sequitur, eum Religiosum peccare mortaliter, qui aliquid notabilis momenti recipit, retinet, donat sine Superioris licentia: 2. qui abscondit, ne Superior sciat. 3. qui aliquid non vult relinquere dispositioni Superioris, aut murmurat tanquam injuria affectus, dum ei adimitur. Plura de hac re Expositores Regulæ.

Resolvo 5. Superiores Regularium non possunt alicui Religioso in particulari concedere bona immobilia, & stabilia, vg. fundos, redditus, &c. etiam ad usum, & administrationem tantum; id enim expresse statuit Tridentinum sess. 25. c. 2. *de Regularibus*. Accedunt & declarationes Cardinalium, qui præfunt dubiis circa decreta Concilii Tridentini oborientibus. Hinc talia bona debent administrari ab Officialibus Monasterii, eorumque fructus in bonum Monasterii impendi, non autem liberæ dispositioni alicujus Religiosi relinqui, ut vita communis magis conservetur inter Religiosos. Verum, ut ait Castro Palao apud Herincx, consuetudo quoad hoc punctum pluribus in locis rigorem Tridentini temperavit. 294

Est etiam praxis probata, qua Religiosis in particulari permittitur moderatus usus censuum vitalium: ita tamen, ut eorum administratio sit penes Superiorem, & totus hic usus, ac perceptio prædictorum censuum a voluntate, & nutu ejusdem Superioris dependeat. Ita Herincx, ac Lessius.



ARTICULUS V.

*De Dominio Conjugum, Filiorum familias, & Servorum.*

§. I.

*Variæ resolutiones de Dominio Conjugum.*

Varia sunt bona Conjugum: 1. sunt bona, quæ maritus aliunde, quam ab uxore habet, nec hujus intuitu, vel cooperatione acquirit. 2. est dos, vel bona dotalia, quæ Germani- 295

M m m 2.



manice vocantur *Heurath-Gut*, *Ehesieur*, *Brautschaz*. Consistit autem dos in bonis illis sive mobilibus, sive immobilibus, quæ ab uxore, vel ab alio nomine uxoris marito dantur, aut promittuntur ad ferenda matrimonii onera, scilicet ad alendam eorum fructibus uxorem, communes liberos, familiam &c.

Dividitur dos 1. in *promissam*, seu illam, quæ tantum est promissa: & in *constitutam*, quæ traditione prædictorum bonorum est perfecta.

Dividitur 2. in *professitiā*, quæ provenit a Patre, Avo, aut alio ex ascendentibus paternis, aut ab extraneo quidem, sed intuitu Patris: & in *adventitiā*, quæ nec a Patre, vel alio ex ascendentibus paternis, neque patris intuitu, sed ex bonis maternis, vel alicujus extranei, aut etiam ex bonis propriis uxoris datur, aut promittitur.

Dividitur 3. in *æstimatam*, & *inæstimatam*: *inæstimata* est, quando ejus valor certo pretio non taxatur: *æstimata* est, quando ita taxatur. Hæc autem taxatio, & æstimatio duplicem in finem fieri potest: 1. ut faciat venditionem veram, & consequenter, ut maritus fiat Dominus dotis, & soluto matrimonio non teneatur amplius restituere ipsam dotem, sed pretium ejus taxatum. 2. ut non faciat venditionem: & hoc tunc fit, quando solum æstimantur bona dotalia pro majore securitate, ut si forte ex culpa mariti soluto matrimonio dos in individuo reddi non posset, pretium saltem certum per æstimationem illam taxatum exigi valeret.

3. Est *contrados*, seu *donatio propter nuptias*, *Widerlag*. *Gegensteuer*, *Gegen-Vermachung*: consistit in iis bonis, quæ maritus, vel alius ejus nomine uxori promittit, vel dat in remunerationem, & securitatem dotis. Respondet igitur doti, & debet eam de jure communi æquare quantitate, lucro, & fructu juxta Novell. 97. c. 1. & 2., ac Novell. 119. c. 1. Alicubi tamen propter consuetudinem, vel pacta privata *contrados* omnino nulla constituitur, interdum dotem non æquat: sic sæpe videmus, opifices pro *contradote* nil aliud constituere, quam artem, & peritiam suam.

4. Sunt



4. Sunt bona *paraphernalia*, *ein zugebrachtes Gut*, & sunt ea omnia, quæ uxor præter dotem affert marito; nam non omnia, quæ uxor habet, semper in dotem dari solent marito. Hinc reliqua, quæ in dotem non computantur, paraphernalia vocantur, inter quæ etiam numerantur ea omnia, quæ uxor post contractum matrimonium, & constitutam dotem acquirit donatione, hæreditate &c. Si hæc bona ab uxore relinquuntur administrationi, & custodiæ viri, tunc ea simpliciter vocantur *parapherna*, vel *paraphernalia*: si autem eorum administrationem, & dispositionem mulier sibi plene reservat, tunc dici solent *receptitia*.

5. Est *arrha*, quam mutuo dant sponsi in contractu sponsalium, tanquam pignus futuri matrimonii.

6. Est *sponsalitia largitas*, vel donatio ante nuptias, suntque ea munera, quæ sponsi mutuo dant intuitu matrimonii contrahendi, & in contestationem stabilis affectus.

7. Est *donum matutinale* (prout vocat P. Pichler) vel verius est donum illud, quod latino caret nomine, & vulgo vocatur *Morgenatica*, vel *Morgengeba*, *die Morgengab*, estque id, quod maritus altero die nuptiarum dat uxori in remunerationem allatæ, & creditæ sibi virginitatis.

8. Veniunt *bona communia*, seu *ac quæstus*, *die Errungenschaft*, oder *was sie errungen, und gewonnen haben*, & sunt illa, quæ uterque Conjux communi labore, vel alio titulo communi lucrantur. H. N.

Resolvo I. Bona *primi generis* per se pleno jure, & dominio spectant ad maritum, & nullatenus ad uxorem, nisi forte titulo contradotis, vel alio speciali ei essent obligata: contra dominium *paraphernaliorum*, & *receptitiorum* spectat pleno jure ad uxorem, quæ de utrisque potest pro libitu disponere tam inter vivos, quam mortis causa. Est communis, & caret controversia, ac patet ex l. *Hac lege. C. de pactis conventis*. Neque tunc maritus acquirit horum bonorum dominium, quando ea ab uxore illi traduntur, & sic vere & proprie fiunt, ac dicuntur



*parapherna* juxta explicationem supra datam; nam in hoc casu maritus nudam habet custodiam, & administrationem, a voluntate & nutu uxoris dependentem, ac pro hujus libitu revocabilem, neque maritus fructus ex his bonis collectos facit suos, quamvis eos possit, concedente tamen uxore, in suam, uxoris, ac familiæ utilitatem impendere. Ita Reiffenstuel l. 4. Decret. T. 20. n. 61. Hæc tamen omnia intelligenda sunt, *quantum est de jure Casareo, & communi*; aliter enim loquendum esset, si aliter disponant statuta particularia certarum Provinciarum, quæ juxta dicta in tract. de LL. juri communi Casareo derogare possunt, vel si aliter conventum esset per pacta dotalia specialiter erecta; siquidem pacta dotalia, *die Heuraths Nothl*, ante omnia in præsentī materia spectari, observarique debent.

297

Resolvo 2. Dominium directum & utile dotis æstimatæ æstimatione tali, quæ facit venditionem, est apud maritum L. *quoties res. 5. C. de jure dotium*. censetur enim maritus illam emisse. Idem est de illa dote, quæ constituitur ex rebus numero, pondere, aut mensura consistentibus, vg. in numerata pecunia, frumento; talis enim dos imitatur naturam mutui: atqui in mutuo transfertur dominium in mutuatarium, qualis hic est maritus: ergo.

Dum autem dos non est æstimata æstimatione faciente venditionem, neque est constituta in rebus in mensura, pondere &c. consistentibus, tunc ejus dominium naturale, ac directum est penes uxorem, nisi forte illi, qui dederunt dotem, ejus dominium sibi reservarint. Reiffenstuel, & alii, ac colligitur ex L. *in rebus. C. de jure dotium*.

Dixi: *Dominium directum & naturale*; nam 1. dominium utile, & ususfructus dotis est apud maritum, ad quem proinde spectant fructus dotis, ut iis possit portare onera matrimonii. Hinc L. *dotis fructum. 7. ff. de jure dotium*. dicitur; *dotis fructum ad maritum pertinere, æquitas suggerit*. 2. pariter ad maritum spectat dominium quoddam civile dotis: per dominium autem civile intelligitur illud, quod alicui solum fictione juris tribuit facultatem & jus ad certos effectus alias dominio naturali proprios, quales sunt administratio, & venditio dotis. L. 1. *dotis. ff. de jure dotium*.

Nota



Nota etiam 1., quod dos in ratione dotis compleatur secuto matrimonio; est enim promissio conditionata, si scilicet sequatur matrimonium. Quare ejus dominium ante secutum matrimonium manet semper apud illum, qui dat, vel constituit dotem.

Nota 2. Multum referre, quisnam habeat dominium dotis; nam si dos perit casu fortuito sine culpa alicujus, tunc perit Domino: quia res casu periens semper suo Domino perit. De quo plura, agendo de Restitutione.

Petes: Quid sit præsumendum, si dubium est, an aestimatio dotis sit facta animo vendendi, vel sine hoc? Rdet P. Pichler: esse præsumendam venditionem. Ita etiam decedit Codex Maximilianæus, seu Jus Bavaricum novum part. 1. c. 6. §. 13. Ab hoc autem præscindendo, cum P. Haunoldo judico, præsumendum esse id, quod in tali loco frequentius, & communius fit; talis enim animus præsumitur in Personis particularibus, qualem communiter solent habere, qui ejusmodi contractum celebrant.

Resolvo 3. Dominium contradotis naturale, directum, & 298 utile regulariter habet maritus: dominium vero civile illius, at sine usufructu, ad uxorem spectat, sicut dominium civile dotis ad maritum. Ratio primæ partis est: quia nulla est ratio, cur dominium naturale, & utile contradotis non maneat apud maritum, præsertim quia finis contradotis vere unicus est securitas dotis, pro qua obligantur uxori quædam bona viri, quæ contradotem constituunt, qui finis utique plene obtinetur, effi dominium naturale & utile sit apud maritum. Altera pars colligitur ex Novell. 61.: *ut immobilia antenuptialis donationis*. in qua tribuitur uxori jus vendicandi contradotem: atqui jus vendicandi est vel effectus domini civilis, vel est ipsum dominium civile.

De cætero contrados imitatur dotem: hinc 1. sicut dos regulariter mortuo marito ad uxorem, ita & mortua uxore contrados ad maritum redit. 2. Si vi pacti præcedentis maritus lucratur dotem, mortua prius uxore, censetur etiam pactum initum fuisse, ut mortuo prius marito uxor superstes lucretur contradotem. 3. Sicut maritus propter adulterium uxoris post sententiam



tentiam Judicis lucratur dotem, ita uxor eodem modo lucratur contradotem, adulterium committente marito. Ita P. Antonius Mayr, allegans pro se P. Illfing.

299 Resolvo 4. Morgengebæ administratio & fructus durante matrimonio ad virum pertinent, dominium tamen illius directum ad uxorem spectat, ita, ut post mortem mariti eidem uxori una cum dote restitui debeat, vel, si ante maritum moritur, de illa disponere, aut suis hæredibus ab intestato relinquere valeat. Reiffenstuel L. 4. Decret, T. 20. n. 68.

300 Resolvo 5. Quid sit dicendum de bonis communibus, ac quæstibus, & aliis lucris tempore matrimonii obtentis, præcipue desumendum est ex pactis nuptialibus. De reliquo vi juris communis ac quæstus obtenti communi industria mariti & uxoris, inter utrosque ex æquo sunt dividendi. Claret hoc ex cap. 2. : de donationibus inter virum, & uxorem, ubi vir soluto matrimonio cogitur restituere dotem, & dividere bona, quæ communiter eis obvenierunt. De hac re videri meretur Adm. R. P. Krefslinger in Add. ad n. 19. Theol. moral., P. Reiffenstuel Tr. 7. D. 4. q. 3., de Arrhis vero & sponsalitia largitate in Tract. de Sponsalibus agi solet.

Quæ hoc §. i. recensui, solum de jure communi dicta sunt: plura peculiaria sunt in Jure Bavarico novo statuta. Qui igitur inter fines Baviaræ vivunt, illis se accommodare debent. Igitur illi, qui matrimonium contrahere meditantur, vel pacta dotalia erigere, maxime fæminæ, consulant, & adhibeant praxi Bavaricæ peritos, ne damnificentur. Cæterum plura practica, quæ ex dictis inferri possent, magis commode inferius explicabuntur. Quare sit.

§. II.

*De Dominio, & Peculio Filiorumfamilias.*

301 Nota 1. Filiumfamilias esse illum, qui adhuc sub patria potestate vivit, cujuscunque sit ætatis. Idem est de filiafamilias dicendum.

Nota



Nota 2. *Patriam potestatem*, vel *jus paternum* esse, quod habent parentes, vel Avi in suos liberos, & nepotes. Habet hæc potestas varios effectus civiles; nam 1. Pater necessitate adactus potest filium, sub jure paterno constitutum, vendere, vel oppignorare. 2. Habet & peculiare jus in bona sui Filiifamilias, ut mox videbimus.

Nota 3. Varie solvi potestatem paternam. 1. solvitur per mortem propriam civilem filii. 2. per mortem civilem, aut naturalem patris, sub cujus nomine non raro venit Avus, & omnes reliqui ascendentes per lineam rectam masculinam. 3. si pater incidat in hæresin, contrahat incestas nuptias, profiteatur religiosam vitam: idem est, si filius Professionem in Religione emittat. 4. Si filius eligatur in Episcopum: non item, si initietur Presbyteratu, vel reliquis inferioribus Ordinibus: item si eligatur in Cardinalem: item, si filius fiat Patritius, aut Præfectus Prætorii, vel Urbis metropolitanae, aut ad consularem dignitatem promoveatur. 5. per emancipationem filii coram judice factam. Videtur etiam defacto ex tacita consuetudine filius emancipari, si ineat matrimonium. Verum de hoc particularia locorum statuta, specialesque consuetudines sunt attendendæ.

Nota 4. Bona filiifamilias in jure vocari *peculium*, quasi parvam pecuniam, vel substantiam. Est autem ejusmodi peculium quadruplex, scilicet *castrense*, quasi *castrense*, *adventitium*, & *profecitium*.

*Peculium castrense* dicitur, quidquid filius acquirit in iusto bello intuitu officii militaris. Huc spectant mobilia, etiam a parentibus donata proficiscentibus ad militiam, non vero ab ea revertentibus, nisi ob egregie in ea gesta, vel amicitiam ibidem contractam donata fuerint: item huc referuntur dona Beliducum, prædæ hostiles, & lucra inde comparata, ac generaliter omnia, quæ filius familias non fuisset acquisiturus sine militia. Pariter ad peculium castrense spectant bona, quæ filius obtinuit in palatio Regis ob aulicum obsequium sua industria, aut parsimonia, aut Principis largitate. Ita Herincx.

*Peculium quasi castrense* est, quidquid filius acquirit ex officio publico, vg. Judicis, Advocati, Professoris, non autem  
P. Kick Theol. Tom. IV. N n n opifi-



opificis mechanici, aut Procuratoris; nam etiam infamis potest Procuratorem agere: item quidquid acquirit ex dono Regis, aut Reginae absque intuitu obsequii aulici: ac quidquid acquirit ex officio Clericali, vel post Clericatum, et si alias foret bonum adventitium; etenim bona, quæ respectu laicorum sunt adventitia, respectu Clericorum ob dignitatem status excellentioris sunt quasi castrensia. Excipe tamen bona profectitia; hæc enim a Clerico etiam post Clericatum obtenta, manent profectitia, & non fiunt quasi castrensia.

Peculium *profectitium* est, quod filiusfamilias acquirit ex rebus & substantia Patris; vel eidem proxime, ac principaliter intuitu patris donatur. Porro in dubio (ut tenet P. Herincx) non præsumitur, donationem esse factam intuitu Patris, aut peculium esse profectitium.

Peculium demum *adventitium* est, quod non est castrense, aut quasi castrense, neque profectitium, seu a Patre, aut intuitu Patris non acquiritur, sed aliunde, veluti ex hæreditate materna, prospera fortuna, inventione thesauri, proprio labore. H. N.

302. Resolvo 1. Filiusfamilias habet plenum dominium in peculio castrensi, & quasi castrensi, ita, ut tota proprietas, usufructus, & administratio sit penes eundem. Communis DD. Quoad castrense peculium habetur L. *Miles præcipua. §. actionem.* L. *ex nota.* & L. *Pater, qui dat. ff. de castrensi peculio.* De quasi castrensi desumitur ex L. *cum oportet. C. de bonis, quæ liberis.*

Ex hoc deduces 1. Filiumfamilias de prædictis bonis disponere posse non secus, ac Paterfamilias: consequenter posse donare, ac alios contractus de illis facere, imo etiam testari, si tamen sit pubes, id est, si expleverit 14. ætatis annum; nam ante hoc tempus testari nequit: de quo inferius. Videatur quoque Codex Maximilianeus p. 1. Cap. 5. §. 4.

Deduces 2. Si ex præfatis bonis filiusfamilias Pater aliquid usurparit, eum peccare, & ad restitutionem teneri; quia accipit alienum. Excipe tamen casum, quo Pater alit filium; tunc enim,



enim, quantum est necessarium ad alimentationem filii, potest ex ejus bonis castrensis, & quasi castrensis accipere. Lessius, Herincx; non enim pater tenetur alere filium, habentem bona propria castrensis, quasi castrensis, vel adventitia: sicut colligitur ex L. Si quis a liberis. ff. de agnoscendis, & alendis liberis.

Resolvo 2. Secundum jus commune filiofamilias habent dominium directum bonorum adventitiorum. L. Res, quæ. 1. & L. Quidquid. 2. C. de bonis maternis. ususfructus tamen Patrifamilias in hæc bona ad dies vitæ suæ competit, etiamsi patria potestas sit quomodocunque dissoluta. L. Quod scitis. 3. & L. Quæcunque. 4. C. de bonis, quæ liberis in potestate Patris &c. Excipe nihilominus hunc casum solum, quo pater filium emancipavit, ubi ad filium ususfructus quoad mediam partem peculii adventitii devolvitur, & alterum dimidium ejusdem ususfructus apud patrem remanet in compensationem emancipationis ex liberalitate factæ. Ita Interpretes juris in L. cum oportet. §. cum autem. 3. C. de bonis, quæ liberis. & alias passim.

Hæc de jure communi: de jure autem Bavarico, quid in his, & aliis similibus statutum sit, in eo videatur. Imo etiam vi juris communis sunt aliqua bona adventitia filiorumfamilias, quorum usumfructum nunquam habet pater. Hæc vocantur irregularia, & sunt sequentia: 1. quæ donantur filiofamilias ab Augusta, vel Principe, quæ propterea ab aliquibus omnino inter bona quasi castrensis numerantur. L. cum multa. C. de bonis, quæ liberis. 2. Bona, quæ filiofamilias hac expressa conditioe donantur, ut eorum ususfructus ad patrem non perveniat. Hanc tamen conditionem mater, vel avia non potest adjicere legitimæ, quæ debetur filio, vel nepoti. 3. Illa, quæ filius acquirit contradicente Patre. L. ult. C. eodem. non enim æquum est, ut pater ex eo commodum reportet, quod ipso contradicente a filio acquiritur. 4. Quæ acquirit succedendo una cum patre in bona defuncti fratris, vel sororis; tunc enim pater non habet usumfructum in portione filii cohæredis. Auth. Item hæreditas. C. de bonis, quæ liberis. 5. Si pater filio condonet usumfructum: quod pater facere potest L. cum oportet. §. si autem. C. de bonis, quæ liberis; dum enim Pater filio remittit usumfructum.



fructum adventitiorum, non donat eis de suis bonis, quod pater non potest facere, sed tantum non usurpat aliquid de bonis filii. Quare filius quoque non tenetur usufructum sic donatum conferre in suam legitimam, quando cum fratribus dividit, & computat hæreditatem paternam. 6. Si filio per modum boni adventitii relinquatur solus usufructus rei, tunc parens nihil habebit. Ratio est, quia non habet usufructum relictum; hic enim tanquam aliquid adventitium ad filium spectat: neque habet utilitatem usufructus; quia usufructus est ipsa utilitas, ac commoditas rei: hinc super usufructum non potest alius usufructus, vel utilitas statui, *neque servitutis est alia servitus*, ut Juristæ loquuntur. 7. Si Pater fiat hæreticus, tunc filius fit sui juris, c. 2. §. fin. de hæreticis. in 6., ac proinde redit ad eum usufructus, quem pater habebat in bonis adventitiis filii. Lessius.

Deduces 1. Filium familias, extra casus modo exceptos, non posse de bonis adventitiis disponere, neque fructus ex eis percipere; cum eorum usufructus, & administratio pertineat ad patrem.

Deduces 2. Patrem etiam peccare, & teneri ad restitutionem, si *notabiliter* dilapidat bona adventitia filii. Ratio est: quia tantum est usufructuarius horum bonorum, & consequenter iis solum uti, & frui potest salva illorum substantia. Dixi: *notabiliter*; nam modica dilapidatio, seu damnum modicum in hoc puncto non attenditur inter patrem & filium, ut advertit Holzman ex Sanchez, Babenstuber, & aliis passim.

304 Resolvo 3. Peculium profectitium filii familias pleno jure spectat ad patrem, qui, non autem filius, ejus dominium utile & directum, ac administrationem habet. §. 1. *¶. Sancitum.* Instit. *Per quas Personas cuique acquiritur.* Dicuntur autem hæc bona adhuc peculium filii, licet pleno jure ad patrem spectent, quia in confiscatione cæterorum bonorum paternorum sunt exempta, adeoque plus obligata filio, quam cætera bona patris.

305 Petes 1. Quid dicendum de lucro industriæ filiorum familias, negotiantium pecunia a patre accepta, etiam furtive? R. sub distinctione, vel negotiatur filius familias proprio nomine, &




& periculo, vel nomine & periculo patris? *si primum*, tunc est peculium adventitium, adeoque quoad proprietatem spectat ad filium, quoad usumfructum & administrationem est patris; nam taliter negotiando se habet filius sicut extraneus, qui pecunia furtive accepta lucrum aliquod facit, ubi tale lucrum censetur fructus industriæ, consequenter ad negotiantem, non ad dominum pecuniæ pertinere. *Si secundum*: tunc peculium est profectitium, & spectat ad patrem; quia nomine & periculo patris expendens, vel tractans pecuniam patris, & inde lucrum faciens, censetur agere Procuratorem patris, adeoque etiam huic, non sibi lucratur, Ita ex Molina resolvit Herincx p. 3. D. 4. q. 5. n. 95.

Petes 2. An filiofamilias in domo paterna laboranti, debeatur salarium, & possit illud occulte compensare, si negetur? R. negative. La-Croix l. 3. p. 1. n. 1034. Holzman, ac plures alii apud hos citati contra alios. Ratio est 1. Quia juxta jura quæcunque filius ex re, & substantia paterna acquirit, sunt profectitia, & ad patrem spectant. §. 1. Instit. *Per quas personas cuique acquiritur*. 2. Quia non est consuetudo, ut filius etiam extraordinarie, & plus aliis filiis laborans, salarium exigat. 3. Dato, quod filius possit pacisci cum patre de mercede ob operam extraordinariam, quæ notabiliter excedit alimenta, & vestes, ac alia, quæ in educationem & sustentationem filii a patre impenduntur: si tamen filius non paciscatur, neque mercedem exigat, censetur illam velle condonare, ut Herincx ex Lessio dicit. Insuper, si filius petiisset salarium, potuisset pater eum repellere, & accipere ejus loco alium, qui gratis, aut viliori pretio, aut melius serviisset: ergo, si expresse cum patre non contraxit de salario, illud non potest exigere, neque illud compensare, si negetur. 4. Opposita sententia non est moraliter certa, sed ad summum probabilis: ergo in praxi non potest tuto applicari in ordine ad compensationem occultam faciendam. Conf. aliunde constat; quia ad hoc, ut ex bonis alienis licite, & tuto fiat compensatio alicujus debiti, debet hoc non solum esse probabile, sed omnino certum, ut communiter docent Th. Th.: ergo ad hoc, ut filiusfamilias licite posset compensare salarium, deberet hoc ei a patre non solum probabiliter, sed certo deberi. Adeoque si filiusfamilias non contraxit cum Patre de



mercede, & salario ex pudore & reverentia, vel alia ex causa, non potest exigere mercedem, nec, si ea denegatur, occulta compensatione uti. Videatur La-Croix cit. loc.

Hic quoque agi solet de bonis fervorum: verum hæc quæstio in nostris regionibus, in quibus proprie dicti servi non dantur, non habet locum, vel utilitatem: quare eam omitto, & ad utiliora me confero. Verum iterum moneo, ut in Bavaria, ubi pecuniaria sunt statuta, dubitantes circa hæc bona mittantur ad Advocatos, & juris patrii peritos, nec facile a Confessariis fiat resolutio. Id forte etiam in aliis terris consultum erit; quia & ibi possunt vigere consuetudines, & ordinationes peculiares.



### DISSERTATIO III.

#### *De prima rerum divisione, & modis acquirendi dominium jure Gentium.*

307 **M**ODUS acquirendi dominium nihil aliud est, quam titulus quilibet, seu causa idonea ad dominium alicui conferendum. Tales autem modi, seu tituli, quibus dominium rerum corporalium acquiritur, tres numerantur, 1. enim obtinetur dominium *jure Gentium*: & hoc fit multipliciter, nimirum occupatione, Nativitate, alluvione &c. 2. Potest acquiri *jure civili*, atque *canonico* per præscriptionem, atque usucapionem, quæ ex justis causis tam per leges civiles, quam canonicas fuit introducta. 3. acquiritur talium rerum dominium *privata hominum voluntate*, dum per varias conventiones, pacta, & contractus dominium rerum suarum in alios transferunt. Tertius hic modus speciali Tractatu de contractibus discutietur: secundus vero dissertatione sequenti expendetur: in præsentiarum primus modus, acquirendi rerum corporalium dominium *jure Gentium*, ad examen vocabitur. Quod ut ordinate fiat, prius ali-



aliqua sunt præmittenda de prima rerum, ac dominiorum divisione. Quare sit

\*\*\*\*\*

## ARTICULUS I.

### *De prima rerum divisione, & dominiorum particularium origine.*

**N**OTA 1. Initio conditi orbis fuerunt omnia bona temporalia communia; Deus enim generi humano sic tribuit rerum externarum sublunarium dominium, ut non diviserit singulis hominibus suam partem. Proinde jure naturali *permittente* res istæ ita erant communes: ut quisque eas posset licite accipere, & occupare, destruere, aut in alium usum pro libitu applicare. Atque hæc bonorum Communitas ex communi DD. sententia apud Herincx mansura fuisset in Posteris Adæ, si in illis status innocentiae perseverasset; nam in illo ter felici statu, in quo floruiisset perfecta hominum concordia, & exulassent inordinationes naturæ lapsæ, ex communitate ista bonorum nulum fuisset secutum inconveniens: imo per se loquendo, & nisi natura nostra, per peccatum depravata, aliud exposceret, communis rerum omnium usus magis rationi congruit, quam bonorum, & dominiorum divisio. Unde Clemens Papa relatus Can. *Dilectissimis*. c. 12. q. 1. ita scribit: *Communis usus omnium, quæ sunt in hoc mundo, omnibus esse hominibus debuit: sed per iniquitatem (id est, occasione iniquitatis) alius hoc suum esse dicit, & alius illud, & sic inter mortales facta divisio est.* Hanc bonorum Communitatem adhuc videmus in religiosis Ordinibus, vitam perfectiorem sectantibus, quamvis ibi plerumque dominium restringatur ad Collegium, & Communitatem, quæ est instar personæ privatæ, & fictæ. Ex hoc

308

Nota 2. Non esse dubium, quin perfectior sit vita communis hominum, quorum nullus in particulari habeat rei alicuius particulare dominium. Verum, quia non omnes volunt ea, quæ



quæ sunt perfectiora, sectari; ideo debuit successu temporis fieri bonorum divisio, & uni hæc res externa, alteri alia assignari ut Domino cum exclusione aliorum.

Nota 3. Incertum esse, an divisio dominiorum fuerit facta fortitione, aut determinatione Adami, vel Noëmi, aut prima occupatione, vel alia ratione. Hinc de modo, quo facta est, ceu re prorsus incerta, nulla nobis erit quæstio: nihilominus duo alia puncta examinabimus, scilicet, an ista divisio iuste & licite, ac quo jure sit facta. Quare

309

Affero 1. Post peccatum hæc dominiorum divisio licite, & rationabiliter est facta. Communis omnium contra hæreticos, dictos *Apostolicos*, qui asseruerunt, Christianos non posse salvari, nisi ad exemplum Apostolorum sese expolient omni dominio particulari.

Prob. 1. Ex ipsa S. Scriptura constat, quod aliquid liceat in particulari ut proprium possidere: sic fuere SS. Patriarchæ, & Reges a sacro textu commendati, qui habuere dominia plurimorum bonorum: ergo. Hinc & contraria sententia est hæresis illorum Apostolicorum, quam refert D. Augustinus hæresi 40. & Epiphanius hæresi 61.

Prob. 2. Post peccatum, ubi homines ad discordias sunt proni, omnino congruit, ut cuilibet certa bona assignentur; alias enim, si bona forent communia, sæpissime plures convenirent ad eandem rem occupandam, qui se mutuo conarentur impedire, & sic continuæ foverentur lites. Dein, si possessiones mansissent communes, tunc earum cultura fuisset plerumque neglecta; nam homines ordinarie negligunt communia: curant autem sedulo illa, quæ ipsis sunt propria.

Objic. 1. Hæc bonorum divisio est contra jus naturæ; ergo ea est illicita. A. prob. *jus naturæ sunt omnia communia*, ut habetur Can. *Jus naturale*, d. 1. R. D. a. est contra jus naturæ præcipiens, aut prohibens N. a. contra jus naturæ permittens Tr. a. Jus naturæ permittit tantum, non autem præcepit sub obligatione bonorum Communitatem: atqui illa, quæ fiunt  
con-



contra legem, aut regulam permittentem, non sunt illicita, aut peccata, ut ex Tractatu de actibus humanis patet. D. etiam prob. A. jure naturæ sunt omnia communia, quatenus jus naturæ non fecit, nec præcepit divisionem bonorum, & dominiorum C. quatenus prohibuit fieri ejusmodi divisionem N. Plura, quæ lege naturæ sunt permiffa, jure Gentium, vel civili, aut Ecclesiastico prohibentur, aut præcipiuntur.

Objic. 2. Can. *Dilectissimis*. supra allegato, hæc divisio dicitur esse introducta *per iniquitatem*: ergo est iniqua. R. D. a. per iniquitatem, id est occasione iniquitatis, scilicet occasione litigiorum &c. C. a. secus N. a. Occasione iniquitatis, ut ea videlicet imposterum tollatur, & impediatur, plures fiunt leges, quæ propterea non sunt malæ, aut iniquæ, sed bonæ, & salutare. Unde illud: *Mali mores faciunt bonas leges*.

Objic. 3. Juxta S. Ambrosium, & alios SS. PP., nemo debet dicere *Hoc est meum, hoc est proprium*; eoquod omnia sint communia: ergo defacto adhuc sunt omnia communia. R. SS. PP. tantum velle, quod nemo ita sibi debeat tenaciter appropriare res temporales, ut non sit paratus, easdem cum proximo communicare in casu necessitatis; eoquod in necessitate extrema omnia, saltem quoad usum, sint communia.

Assero 2. Hæc divisio jure Gentium est introducta. Les- 310  
sus, & alii. Prob. Hæc divisio non est facta jure divino, vel naturæ; nam S. Scriptura non facit mentionem alicujus præcepti divini, quo debuisset terra cum possessionibus suis distribui: Imo Deus dedit omnibus hominibus terram, subjecit illis sine distinctione, & divisione volatilia cæli, pisces maris, ac animalia terræ.


Neque ex jure naturæ provenit hæc divisio; etenim jure naturæ juxta cit. Canonem in Object. 1. omnia sunt communia. Insuper de jure naturæ tantum sunt ea, quæ necessario conveniunt naturæ rationali: sed naturæ rationali non convenit necessario hæc divisio: ergo. M. constat ex dictis in Tract. de LL. m. prob. inde, quia potius Communitas bonorum est perfectior, & consequenter convenientior naturæ rationali: & quia  
P. Kick Theol. Tom. IV.                      O o o                      in-



incommoda illa, quæ supposito lapsu hominis ex communitate bonorum oriuntur, potui sent stante illa Communitate impediri per alias leges, & cautelas: ergo.

Neque potest ostendi aliquod jus positivum, unde primario ortum haberet ejusmodi divisio: quare ea attribuenda est juri Gentium, quod consistit in communi omnium, vel fere omnium Gentium consensu: prout & testatur Can. *Jus Gentium*. d. 1. dicens: *Jus Gentium est sedium occupatio*. & L. *Ex hoc jure*. ff. de *justitia* & jure dicitur: *Ex hoc jure* (scilicet Gentium) *dominia distincta*.

Ad objectiones aliquas solvendas nota, quod leges interdum per jus naturale intelligant jus Gentium: uti contingit §. *Feræ*. 12. Instit. de *rerum divisione*. ubi dicitur: *Quod enim ante nullius est, id naturali ratione occupanti conceditur*.



## ARTICULUS II.

### *De modis acquirendi dominium jure Gentium.*

#### §. I.

#### *Recensentur aliqui similes modi*

311 **P**rimus modus acquirendi dominium jure Gentium est *occupatio*, quæ est *apprehensio rei cum animo habendi eam ut suam*. Dividitur in *ventionem*, *inventionem*, & *occupationem in specie*, seu illam, qua occupantur, & in nostram potestatem rediguntur res hostiles. Verum de hac triplici specie plures occurrunt difficultates, quæ peculiaribus integris articulis inferius dilucidari merentur.

Secundus modus est *nativitas*, vi cujus acquirimus dominium *fœtuum*, qui ex nostris animalibus nascuntur. §. *Item ea*. Instit. de *rerum divisione*. Qui ergo habet dominium, vel saltem usumfructum equæ, ad illum etiam spectat hinnulus inde natus.

Nec



Nec refert, quod equus masculus, ex quo concepit equa nostra, sit alienus; *partus enim*, tanquam portio viscerum matris, *sequitur ventrem*, id est matrem, ex cujus ventre gignitur.

Modus tertius est *alluvio*, quæ vocatur *incrementum latens*, & datur tunc, quando a flumine alicui fundo nova gleba ita paulatim adjicitur, ut intelligi non possit, quantum quoque temporis momento adjiciatur, ut habetur §. *Præterea*. 20. instit. de rerum divisione. quod incrementum, a fluvio sic latenter adjectum, statim acquiritur domino fundi, prout eodem tit. & §. Instit. habetur. Ratio hujus esse potest 1. quia accessorium sequitur suum principale: atqui gleba nova, sic latenter adjecta, videtur esse accessoria fundo: ergo etiam ad eundem Dominum, ad quem spectat fundus, pertinere debet. 2. Prædia propinqua flumini ab hoc multa incommoda sentire debent: ergo & convenit, ut sentiant quoque commodum, quod iis accidit per glebam a flumine latenter adjectam. L. 10. ff. de R. J. Ex his

Inferes 1. Quia illud, quod per alluvionem accrescit, est accessorium meo fundo, hinc non esse opus nova apprehensione, neque propterea posse augeri Canonem, aut alia onera ab Emphyteuta præstanda; manet enim eadem *emphytheusis*, idem ususfructus, ac idem dominium. Ita P. Antonius Mayr.

Inferes 2. Quod si loco alicui, qui publici juris est, *vg. plateæ*, vel *viæ publicæ* aliquid per alluvionem adjiciatur, id non fieri juris publici, sed ejus, qui prope viam publicam prædium possidet. Ratio est: quia via publica, per flumen absumpta, per vicini agrum debet renovari: cum ergo talis onera fluvii, portare debeat, etiam commoda, inde per alluvionem evenientia, eum sentire oportet. Ita Christ. Chlingensperger L. 2. Instit. t. 1. q. 46.

Quæres 1. Ad quem spectet notabilis pars terræ, quæ a fundo alieno abrepta, agro tuo adjicitur? R. 1. Talis adjectio notabilis non est *alluvio*, cum *alluvio* sit *incrementum latens*, & paulatim, non simul magna, & notabili quantitate accedens: hinc neque jure *alluvionis* gaudet. R. 2. Ista pars notabilis manet prioris Domini, donec ea stabiliter jungatur, & quasi con-



solidetur cum agro meo : si autem sic coalescat cum nostro prædio, tunc fit nostra. §. 21. Instit. de rerum divisione. Idem est de arboribus, ac plantis terræ nostræ adjectis; quarum dominium acquirimus, postquam radices in terra nostra egerunt, ut patet eodem §. 21. & 23. Instit. tit. cit. Hic iterum in Bavaria consulatur Codex Maximilianus p. 2. c. 3.

313

Quæres 2. Quid dicendum de Insulis recenter natis in mari, vel flumine? Ad hoc quæsitum repono textum sat clarum juris §. 22. Instit. de rerum divisione. *Insula, quæ in mari nata est (quod raro accidit) occupantis fit; nullius enim esse creditur. At insula in flumine nata (quod frequenter accidit) siquidem mediam partem fluminis tenet, communis est eorum, qui ab utraque parte fluminis prope ripam prædia possident, pro modo scilicet latitudinis cujuscunque fundi, quæ prope ripam sit. Quod si alteri parti proximior sit, eorum est tantum, qui ab ea parte prope ripam prædia possident. Quodsi aliqua parte divisum sit flumen, deinde infra unitum, agrum alterius in formam insulæ redegerit, ejusdem permanet is ager, cujus & fuerat.*

De naturali Alvei mutatione fluminis sic disponit jus allegatum §. 23. *Quodsi naturali alveo in universum derelicto ad aliam partem fluere cæperit, prior quidem alveus eorum est, qui prope ripam ejus prædia possident, pro modo scilicet latitudinis cujusque agri; quæ prope ripam sit: novus autem alveus ejus juris esse incipit, cujus & ipsum flumen est, id est, publicus. Quodsi post aliquod tempus ad priorem alveum reversum fuerit flumen, rursus novus alveus eorum esse incipit, qui prope ripam ejus prædia possident. Et §. 24. subjungitur: Alia sane causa est, si cujus totus ager inundatus fuerit; neque enim inundatio fundi speciem commutat: & ob id, si recesserit aqua, palam est, eum fundum ejus manere, cujus & fuit.*

Hactenus jus commune Cæsareum, cui forte alicubi per particulares locorum consuetudines, vel statuta particularia defacto est derogatum: de quo vide codicem Maximilianum pro Bavaria, pro aliis terris alia statuta, & consuetudines ibi usitatas consule.

Modus



Modus quartus acquirendi dominium est *specificatio*, per quam intelligitur introductio novæ formæ, vel quasi formæ in alienam materiam, vel partim alienam, partim propriam. Ita Reiffenstuel. Debet autem ita immutari forma antiqua, ut in commercio humano habeatur pro diversa, & nova specie entis, alioque nomine substantivo appelletur, sive dein hæc mutatio fiat in genere physico, sive morali. Ita Clarissimus P. Antonius Mayr. 314

Ad hoc autem, ut specificans acquirat dominium materiæ alienæ, in quam introducit novam formam, requiruntur sequentia: 1. ut nova species producta non possit in antiquam materiam reduci. §. 25. Instit. *de rerum divisione*. 2. ut specificans introducat speciem nomine suo; si enim hoc fecerit nomine alterius, ad illum alterum spectabit. L. *Quidquid*. 27. §. 1. ff. *de acquirendo rerum dominio*. 3. ut bona fide faciat, vg. credendo invincibiliter, quod hæc materia sit sua. L. 12. §. 3. ff. *ad exhibendum*. Chlingensperger L. 2. Instit. t. 1. q. 39.

Dices: Mala fides non impedit acquisitionem domini in accessione, ut si quis alienam purpuram suo vestimento intexuerit §. 26. Instit. *de rerum divisione*. ergo neque impedit in specificatione? R. N. c. Hic enim 1. aliter disponunt jura. 2. In accessione jure accessorii acquiritur dominium; accessorium autem sequitur suum principale: hic autem in specificatione non habet locum jus accessorii. Ex his

Resolves sequentes casus. 1. Si lana aliena tingitur colore, non fit specificatio, nec acquiritur illius dominium: tinctura enim non magis mutat lanam, quam si in lutum ceciderit, ut dicitur L. 26. §. 3. ff. *de acquirendo rerum dominio*. Aliter dicendum est, si ex lana fiat pannus; quia pannus in æstimatione est alia nova res, diversa a lana. 315

Neque fit specificatio, si ex spicis alienis excutias frumentum: proinde nec dominium hujus frumenti acquiris.

Nec obstat, quod §. 25. Instit. *de rerum divisione* pro exemplo specificationis ponatur, si ex spicis fiat frumentum; Nam



R. 1. cum P. Ininger apud R. P. Antonium Mayr, per *frumentum* intelligi debere *farinam*. R. 2. ad eundem textum juris cum P. La-Croix: Hunc locum esse male impressum, & intelligi debere juxta L. 7. §. 7. ff. *de acquirendo rerum dominio*. ubi clare dicitur oppositum, additurque ratio, quia per excussionem non nova species introducitur in grana frumenti, sed tantum ea forma, quam antecederet jam habuerunt ut contenta in spicis, per excussionem detegitur, & foras profertur. Aliud est dicendum, si ex spicis, vel granis frumenti fiat farina; hæc enim habet novam speciem, a forma frumenti distinctam.

3. Si ex uvis alienis facias vinum, ex farina panem &c. dummodo ista fiant bona fide: acquiris dominium vini, & panis. Ratio est: quia introducens speciem, quæ semel facta non potest reduci in priorem materiam, acquirit dominium ejusmodi speciei novæ, & materiæ: tenetur tamen valorem materiæ, vg. uvarum, ac farinæ domino compensare pecunia, vel alio modo. Aliud statuendum est, si ex auro alieno fiat statua, ex asseribus alienis conficiatur navis. Ratio est: quia statua in aurum, & navis in asseres denuo redigi potest. Quare in hoc casu tota nova species statuæ, ac navis pertinet ad priorem Dominum, ad quem spectat aurum, & asseres. §. 25. *Instit. de R. divis.* Addit tamen P. Antonius Mayr, quod Dominus materiæ debeat illi, qui bona fide induxit novam speciem,olvere pretium operæ, & formæ novæ.

4. Qui ex uvis, quas scit esse alienas, facit vinum, non acquirit dominium hujus vini, etsi sit causa novæ speciei. Ratio est, quia mala fide processit. Quare hoc vinum pertinet ad dominum uvarum, qui & illud vindicare potest. Ita est decisum L. 12. §. 3. ff. *ad exhibendum*. & L. 23. §. 4. ff. *de rei vindicatione*.

5. Si pistor ex tuo frumento, quod bona fide a fure emit, faciat panem, non habes actionem realem contra ipsum, nec potes vindicare panes ex tuo frumento factos. Ratio est: quia per specificationem pistor dominium acquisivit panum, & tibi ademit dominium tui frumenti: habes tamen actionem personalem in factum. Idem est in casu, quo lanio oves alienas, quas bona



na fide a fure emit, macerat, & ex iis carnes facit. Reiffenstuel  
in Addit. ad n. 24. t. 7. d. 5. q. 3.

§. II.

*Continuatur præcedens materia.*

Quintus modus acquirendi dominium jure Gentium est 316  
*confusio*, quæ tunc accidit, quando plures materiæ liquidæ, vel  
liquefactæ, quæ ad distinctos Dominos spectant, ita miscentur,  
ut ab invicem industria humana, vel via ordinaria separari ne-  
queant. Fit autem confusio, sive istæ materiæ ita commixtæ  
sint ejusdem rationis, sive diversæ, ut si vinum cum vino mi-  
sceas, vel ex vino & melle mulsum facias, & sic novam spe-  
ciem introducas.

Si similis confusio duarum materiarum facta est cum con-  
sensu utriusque Domini, vel casu fortuito, tunc totum, quod  
ex confusione resultat, est utrique Domino commune, ita ta-  
men, ut qui plus de suo addidit, plus etiam juris habeat, ut  
de se clarum est. Ita statuitur §. 27. Instit. de R. divisione. Si  
confusio facta est voluntate tantum unius Domini, bona fide pro-  
cedentis, & quidem ita, ut nova species per ejusmodi confu-  
sionem producta fuerit, vg. si ex tuo melle, & vino alieno ef-  
ficias bona fide mulsum, tunc idem juris est, quod in aliis spe-  
cificationibus, de quibus N. præc. Si vero in simili casu speci-  
ficatio non fiat, ut si vinum tuum bona fide cum vino alieno  
confundas, tunc jus nihil decedit: putant tamen Holzman, ac  
R. P. Antonius Mayr, tunc totam massam manere communem  
utriusque Domino, dummodo utriusque portio sit æqualis; nam  
si unius portio sit notabiliter major, ipse solus Dominus effici-  
tur: ratio est: quia portio minor, tanquam quid accessorium,  
sequitur portionem notabiliter majorem ceu suum principale.  
Pro praxi tamen debet a confundente tantum refundi alteri,  
quantum de illius materia insumpsit.

Si mala fide fiat confusio, tunc Ininger, ac Holzman judi-  
cant, massam totam confusam cedere læso, ita quidem, ut nec  
materiam, nec pretium operæ teneatur refundere confusori. Ve-  
rum



rum hoc alibi examinabitur. Interea autem certum est, quod sic confundens mala fide non acquirat dominium materiæ alienæ.

Notandum insuper est, hæc omnia procedere, si confusio ita fiat, ut materiæ confusæ ab invicem per industriam humanam separari nequeant; si enim res diversi generis confusæ possunt arte humana separari, tunc quælibet, etiam confusione facta, sub priore dominio, & Domino permanet. Ita communiter Th. Th. & J. J.

317

Sextus modus est *commixtio*, vel *permixtio*, quæ fit, quando miscentur corpora solida duorum Dominorum, quæ etiam post mixtionem retinent propriam speciem, ut si frumentum cum frumento misceas, ubi singula grana suam propriam speciem, etiam facta mixtione retinent. Differt permixtio a confusione, quia facta confusione moraliter nulla pars assignari potest, quæ non habeat aliquid de utroque corpore confuso: sic omnis pars mulsi est partim vinum, partim mel. Dum vero solida miscentur, vg. meum frumentum cum tuo frumento, grana manent separata, & de singulis verum est dicere: hoc granum non fuit utriusque, licet ob similitudinem discernere nequeamus, cujus fuerit.

Permixtio duorum frumentorum, aut aliarum rerum solidarum (excepta tamen pecunia) non est modus acquirendi dominium. Chlingensperger L. 2. Instit. t. I. q. 51. Si ergo duo frumenta, ad diversos Dominos pertinentia, casu, vel etiam unus bona fide permisceantur, non fit aliquid commune, sed quilibet sui frumenti dominium retinet. Ratio est: singula corpora sic permixta in sua substantia & specie durant: ergo singula ad suos priores Dominos spectant. *Ratio rationis*: Grex non fit communis Petro, & Paulo, si oves Petri fuerint casu, vel bona fide permixtæ ovibus Pauli, quia scilicet singulæ oves, etiam facta commixtione, in suo specifico, & individuali esse perseverant: ergo idem in proposito. Quare quilibet ex duobus Dominis post factam commixtionem potest frumentum suum vindicare. Quia tamen eorum granorum, quæ cujusque fuerant, accurata separatio fieri nequit, iudicis officio incumbit, ut habeat tantam partem restitui alteri, quanta illius fuerat. Debet etiam



etiam officio judicis compensatio qualitatis fieri, si vg. frumentum alterius fuisset melius L. 5. in principio. ff. de rei vindicatione.

Dixi : Si casu, vel etiam NB. unius; si enim voluntate utriusque permisceantur, tunc fit massa communis ob consensum utriusque, qui contractus, vel pacti rationem habet. Dixi 2. excepta pecunia; peculiare enim quid statutum est de pecunia: nam qui alienam pecuniam ita cum sua permiscet, ut discerni nequeat, sive bona, sive mala fide id faciat, fit Dominus totius summæ, cum obligatione tamen personali refundendi alteri pretium æquivalens. L. Si alieni. ff. de solutionibus. Id autem singulariter circa pecuniam est ordinatum ob quotidianum ejus usum in commerciis humanis, & ne ejusdem dominium incertum maneat, simulque, quia nummi, statim dum expenduntur, ac præfato modo commiscantur, censentur esse moraliter consumpti: non sic grana frumenti aliis permixta.

Septimus modus est *accessio*, quæ tunc datur, quando aliquid ornatus causa alteri adjicitur, vel accedit, ubi accessorium sequitur suum principale, & illud, quod accedit, ad illum ipsum Dominum spectat, ad quem pertinet res illa, cui accedit. Quare si alienam purpuram intexas tuæ vesti, gemmam alienam inferas tuo annulo, purpura & gemma tua fiunt, quamvis tibi incumbat obligatio præstandi æstimationem purpuræ & gemmæ, §. Si tamen. Inst. de rerum divisione. 318

Nec obstat 1. quod purpura, vel res accedens sit pretiosior, quam illa, cui accedit: ut habetur eod. §. & Tit. Instit. Neque 2. obstat mala fides in illo, cujus industria fit accessio, ut tenent La-Croix, ac Chlingensperger, & probant ex §. 26. Instit. de rerum divisione. Horum omnium rationem dant Juristæ, quia accessorium sequitur suum principale.

A regula generali accessionis excipitur pictura, quæ non cedit tabulæ, sed potius tabula cedit picturæ. §. Si quis. 34. Inst. de rerum divisione. Et ratio ibi additur: quia ridiculum est, picturam Apellis cedere telæ vilissimæ. Hinc, si Petrus in tua tela, vel tabula pinxerit, pictura non ad te, sed ad Petrum.



perfinet. Idem de consuetudine extendunt P. Mayr, Layman, Holzman, ac alii ad Scripturam, quamvis jus commune sit contrarium. Proinde, etsi in aliena charta scribas, tamen Scriptura una cum charta tua erit. Ratio hujus est: quia modo charta est vilissimi pretii, nec litteræ scribuntur ad ornandas chartas. Huc etiam cum proportionem facere videtur ratio §. 34. Instit. cit. pro pictura adducta, ac mox supra relata.

Porro (ut optime notat La-Croix) quodcumque res aliena, quæ alicui tuæ rei etiam bona fide est adjecta, potest sine detrimento separari ab illo, cui accessit, tunc debet separari, & priori domino restitui: si autem separari non potest, debet restitui æstimatio, & fieri compensatio, ut jam dictum est.

319

Inter modos acquirendi dominii refertur etiam *ædificatio*, quæ datur, quando aliquod ædificium novum erigitur. De ista statutum est, quod *ædificium cedat solo*. §. 29. & 30. Instit. *de rerum divisione*, id est, ædificium ad illum spectat, ad quem pertinet dominium terræ, & soli, cui inædificatum est. Et hoc verum est, sive deinde Dominus fundi, sive alius, sive per propriam, sive alienam materiam ædificaverit: neque obest, quod ædificando bona, vel mala fide processerit. Hæc tamen intelligenda veniunt de ædificio immobili, & solo adhærente, non autem de illo, quod loco moveri potest. Addendum etiam, quod illi, qui ex materia propria in alieno fundo bona fide ædificat, debeat a Domino fundi solvi pretium materiæ, & laboris: an autem hoc etiam solvi debeat ei, qui mala fide, & scienter ex materia sua in fundo alterius erexit ædificium, Doctores non conveniunt: ego vero quid sentiam, indicabo in Tract. de Restitutione, in quæstione de deductione expensarum a malæ, & bonæ fidei possessore factarum.

Ædificationi valde affinis est *plantatio*, quæ datur tunc, quando arbores inferuntur pratis, vel hortis, vel semina committuntur agris. De his prædicta regula iterum procedit, quod *planta, arbor, semen solo cedant*. §. 31. & 32. Instit. *de rerum divisione*. Si igitur tuam, vel alienam plantam, tuum vel alienum semen inferas agro Petri, tunc planta & semen est Petri, ac fructifi-



Debet tamen planta radices fixisse in solo: si autem radices nondum fixit, tunc est adhuc sub dominio primi Domini. Neque etiam sufficit, si arbor tantum aliquas radices, vel ramos protendat in meum solum, sed debet truncus ejus in meo fundo crescere, ut desumitur ex L. 6. §. 2. ff. *Arborum furtim caesarum*. ubi etiam dicitur, non licere vicino ramos in suum fundum projectos cadere, posse tamen eum agere, ut tollatur, vel damnum compensetur.

Tandem inter modos acquirendi dominium etiam veniunt *fructuum perceptio*, & *traditio*: de priore in Tract. de Restitutione, de altera in Tract. de Contractibus sermo erit.

○○

*De Venatione.*

**V**enatio est occupatio, qua ferae, in naturali sua libertate constitutae, occupantur, vel apprehenduntur, cum animo eas habendi ut suas. Potest autem venatio ratione sui objecti in tres classes dividi: una est *venatio in specie*, qua occupantur animalia terrestria, altera est *aucupium*, qua volucres, & tertia *piscatio*, qua pisces apprehenduntur, aut capiuntur. Quaeritur ergo, an animalia &c. per venationem capta fiant capientis, vel occupantis? Pro quo

Nota 1. Aliqua animalia esse in sua libertate, & sub nullo existerent dominio: talia sunt, quæ in infinitum vagari pos-



sunt, ut cervi in sylvis, pisces in mari, aut fluminibus: imo & illa animalia adhuc naturali libertate gaudent, & nullius sunt, quæ quidem inclusa sunt, sed tantum in locis vastissimis, ita, ut ad libitum capi, vel apprehendi nequeant. Tales sunt feræ existentes in sylvis vastis incinctis, ac pisces injecti lacubus grandibus, *großen Seen. L. possideri. 3. & L. item feræ. 14. ff. de acquir. vel amitt. possessione.* Alia autem animalia sunt in dominio alicujus hominis, ac existunt privata sua libertate: qualia sunt pisces in piscinis inclusi, uti & feræ in vivariis, aves in caveis detentæ &c.

Nota 2. Triplex genus animalium hic spectari posse: alia sunt natura sua mansueta, ut oves, boves, canes &c. alia natura sua fera, ut lepores, leones, perdices, pisces: alia sunt mansuescunt, & sunt illa, quæ natura sua sunt fera, ita tamen industria hominum sunt cicurata, ut consuetudinem habeant eundi, & redeundi domum, ut cervi, & accipitres, postquam sunt cicurati &c. His prænotatis sequuntur breviter variae resolutiones: igitur

321 Resolvo 1. Animalia, quæ natura sua sunt mansueta, quocunque deveniant, vel aberrant, manent Domini prioris. §. 16. *Instit. de rerum divisione.* Quare si quis tuam ovem e lupi faucibus eripuerit, non sibi, sed tibi eam servat. L. 44. *de acquir. rerum dominio.* quamquam talis possit pretium laboris, in commodum tuum impensum, exigere.

322 Resolvo 2. Animalia fera, quamdiu retinent naturalem libertatem, sunt nullius, & de jure naturali permissivo sunt primo occupantis: si autem sunt captæ, tamdiu sunt capientis, donec iterum libertatem naturalem recuperent, quam si recuperaverunt, desinunt esse capientis, nec sunt amplius sub ejus dominio. §. 12. *Instit. de rerum divisione.* Et hoc peculiare est in feris; harum enim, non autem aliarum rerum, dominium statim perditur, perdita possessione. Ratio vero est: quia feræ vi capiuntur, sic & earum dominium debet per possessionem, ac vim continuatam retineri. Jam vero tunc fera libertatem suam est affecta, quando vel oculos nostros effugit, vel etiamsi intra nostrum conspectum existat, difficilis tamen est ejus persecutio, ut



ut si avis in saltum avolarit: ex opposito tamdiu fera non censetur libertatem suam recuperasse, quamdiu cum probabili spe recuperandi eandem Dominus insequitur. §. 14. *Instit. de rerum divisione.* & L. 5. ff. *de acquirendo rerum dominio.*

Resolvo 3. Animalia mansuefacta, vel cicurata eousque sunt nostra, quamdiu habent consuetudinem domum redeundi: hanc si amiserint, nostra esse desinunt, & per consequens libertatem naturalem recuperant, ac cujusvis primo occupantis fiunt. §. 15. *Instit. de rerum divisione.* & L. 5. ff. *de acquir. rer. dominio.* Quanto autem tempore opus sit, ut per absentiam censeantur amisisse consuetudinem revertendi, regula nulla generalis statui potest, cum in quibusdam sufficiat minus, in aliis requiratur plus, sic avis elapsa e cavea censetur statim libertatem recuperasse: non ita cervus cicur, etsi una, alterave vice emanet, neque accipiter, (*Falck*) etsi libere avolet.

323

Nota nihilominus, ad hoc, ut ejusmodi animalia libertatem suam censeantur consequi, requiri 1., ut ea emanent sponte sua, non autem per aliorum hominum insidias, aut illecebras abstrahantur a reditu. 2. Ut effugiant conspectum Domini, vel si adhuc in conspectu ejus existant, difficilis sit eorum persecutio. §. 14. *Instit. de rerum divisione.* Hæc, quæ hac in resolutione dicta sunt, observanda sunt præprimis circa apes, quæ natura sua feræ censentur, sed usu, & consuetudine sunt mansuefactæ: de quibus §. 14. *Instit. cit.* ita loquitur: *Examem apum, quod ex alveo tuo evolaverit, eousque intelligitur esse tuum, donec in conspectu tuo est, nec difficilis ejus persecutio est; alioquin occupantis fit.* Occupantur autem, dum alveo includuntur, non autem per hoc, quod arbori alicui infederint, ut habetur in *Instit. tit.* jam sæpius allegato. Addit autem *Herincx*, circa occupationem apum esse attendendam consuetudinem, quæ pro diversitate locorum solet esse alia, & alia; nam alicubi Dominus arboris, cui insident apes: alibi ille, qui signat arborem, acquirit dominium examinis apum &c.

Resolvo 4. Circa columbas fere idem notandum est, quod circa animalia fera, quæ sunt cicurata: si nimirum non ampli-

324



us habeant consuetudinem revertendi, tunc sunt liberae, & fiunt primo occupantis. Quare, si alienae columbae stabiliter columbarium Pauli incolant, fiunt Pauli: dummodo tamen absint fraus, & illecebrae ex industria positae, ut iisdem alienae columbae ad tuum columbarium alliciantur &c.

325

Resolvo 5. Etsi jure naturae permixta sit cuilibet venatio, ea tamen justis ex causis potest prohiberi subditis, & soli Principi reservari. Communis omnium DD. Ratio est: quia plura defacto sunt prohibita, quae tamen jure naturae sunt permixta: ergo idem est de venatione. Causae vero, cur venatio subditis prohiberi possit, a DD. afferuntur variae: ut 1. publica tranquillitas, ne ex continua armorum tractatione & usu, atque praetextu venationis latrocinia, & rebellionis exordia introducantur. 2. Publica utilitas, ne subditi amore venationis ab agricultura, aliisque bono communi necessariis laboribus abstrahantur. 3. Sustentatio, ac recreatio Principi debita. 4. Accedit praescriptio, ac antiqua consuetudo: de quibus passim *Casistae*.

326

Petes 1. An subditi contra prohibitionem Principis venantes peccent? R. affirmative, si lex prohibens est directiva, & non mere poenalis: an autem mere poenalis sit, ex consuetudine, usu & praxi cujuslibet provinciae est desumendum. Imo tales feripetae non solum obedientiam, sed etiam justitiam laedunt; quia agunt contra jus venandi, Principi juste acquisitum. Verum hoc peccatum plerumque tantum est veniale; quia per feripetas jus hoc venandi, & recreatio Principis plerumque non laeditur notabiliter, cum nunquam tot ferae capiantur, ut non supersint sufficientes pro recreatione, & venatione Principis.

327

Petes 2. An ille, qui venatur contra prohibitionem Principis, adhuc acquirat dominium ferarum illarum, quas capit, aut trajicit? R. affirmative, si sint ferae adhuc sua libertate naturali gaudentes, de quibus supra. Ratio est: quia tales ferae fiunt primo capientis. Nec refert, quod sylva, in qua capitur fera, sit sub alterius dominio; cum enim ferae non sint pars fundi, neque fructus ejusdem, ideo Dominus fundi non censetur hoc ipso possidere feras, in suo fundo vagantes, nec habet



bet propterea earum dominium. Hinc talis non obligatur ad aliquam restitutionem præcise pro fera capta, vel occisa, saltem ante iudicis sententiam.

Quæ dicta sunt de venatione, etiam intelligi debent de piscatione. Duo tantum nota de libertate piscium. 1. Pisces habent naturalem libertatem in mari, & fluminibus, ubi possunt in infinitum vagari: ut jam supra dictum est. 2. Habent eam etiam in lacubus majoribus, vg. lacu Podamico, e quibus aqua emitti non potest; nam in his saltem possunt satis vagari ad hoc, ut non facile capiantur. Contra libertatem non habent in piscinis, quia ibi se habent ut animalia terrestria in vivariis. Plura de hac re videre potes in Theol. Moral. P. Reiffenstuel Tr. 7. d. 5. q. 2.

Quæres: Quid dicendum de iis, qui in sylva aliena ligna cædunt? R. 1. Si sylva spectat ad aliquem privatum, furtum committunt, & ad restitutionem pro rata damni illati tenentur. Idem dicendum, si sylva spectat quidem ad Communitatem, sed sub onere certæ pensionis locata est alicui privato. Ratio est, quia tunc Communitas censetur, suum jus quasi vendidisse tali homini privato, cui proinde per cæsionem lignorum inferitur damnum, restitutione reparandum. 328

R. 2. Si quis cædit ligna in sylva communi, spectante ad suam Communitatem; cujus scilicet ipse est membrum, non tenetur ad restitutionem, etsi forte plus cædat, quam ipsi competit, dummodo non inferat enorme damnum sylvæ, neque impediatur, ne alii cives debitam sibi portionem accipere possint. Molina, Lugo, Sporer, Holzman, Babentuber, Mayr. Ratio est: quia Communitas non censetur cives suos ad restitutionem obligare ob ligna talia, cæsa in sylva communi.

R. 3. Si quis cædat ligna ex sylva alterius Communitatis, cujus ipse non est membrum, per se loquendo peccat, & tenetur ad restitutionem. La-Croix, Holzman; lædit enim jus alterius Communitatis, quam lignando in ipsius sylva damnificat. Dixi: *per se loquendo* &c. nisi consuetudo contraria, quæ hic attendi debet, aliquid aliud doceat

Idem



Idem, quod hic diximus de lignantibus in alienis sylvis, statuendum quoque est de pascentibus in alienis pascuis.

## ARTICULUS IV.

### *De Inventione Thesaurorum, ac Mineralium.*

329 **L.** 31. ff. de acquir. rer. dominio. describitur thesaurus, quod sit *vetus quædam depositio pecuniæ, cujus non exstat memoria, ut jam dominum non habeat.* Dic. 1. *Vetus*, id est, tanta vetustate, ut nulla exstat ejus memoria. Dic. 2. *Depositio pecuniæ*, ubi sub nomine pecuniæ intelligitur quævis res mobilis, vg. gemmæ, vasa, crateres, torques &c., uti habetur L. un. C. de *Thesauris*. Dic. 3. *ut jam dominum non habeat*; debet enim res deposita esse nullius, ut rationem, ac nomen thesauri obtineat. Ex his

Deduces 1. Thesaurum annumerari bonis derelictis, seu talibus, quæ expresso, aut præsumpto Domini actu talia facta sunt, ut jam sub nullius hominis dominio existant; siquidem eo ipso, quod Dominus voluntarie ita abscondat pecunias suas, ut ex moraliter nec ad ipsum, nec ad suos hæredes pervenire possint, eo ipso, inquam, præsumitur easdem derelinquere. Quare pecuniæ ita defossæ fiunt nullius. Ex quo

Deduces 2. Non esse thesaurum, si ex inscriptione, vel figura monetæ colligitur, eam esse cusam primum nostris temporibus, vg. ante 20. annos. Ratio est: quia tali pecuniæ defossæ, vel depositæ deficit vetustas ad thesaurum requisita.

Deduces 3. Neque esse thesaurum, si ex addita syngrapha, quæ perpetuo loquitur, rescitur, cujus pecunia sit, non obstante, quod ejusmodi pecunia jam ante 100. annos fuisset deposita. Ratio est, quia talis pecunia jam haberet Dominum.

Deduces 4. Etiam thesaurum non esse, etsi Dominus nesciat, pecuniam depositam esse suam, dummodo alii sciant, eam ad



ad ipsum pertinere. Ratio est: quia dominium per ignorantiam, aut diuturnitatem temporis non perit, si perseverat potestas bona sua recuperandi, quæ in tali domino ignorante manet, quia ab aliis scientiam habentibus potest moneri. Observandum tamen, si solum sciatur, quæ familia in illis ædibus, in quibus pecunia defossa invenitur, habitaverit, non propterea statim fieri, a qua persona ea fuerit deposita, vel quis ejus hæres sit; potest enim etiam ab alio in fuga, vel bello ibi esse deposita. Si autem vere constaret, quisnam esset Dominus, tunc non posset dici thesaurus; quia jura ad thesaurum exigunt, ut ejus Dominus ignoretur. Ex hoc

Deduces 5. Non statim pecuniam repertam, etsi ea defossa fuerit, posse haberi pro thesauro; tunc enim solum thesaurus erit, si ei definitio thesauri quoad omnia conveniat: secus vero deberet Dominus ejus inquiri, aut si hic reperiri non posset, deberet de ejusmodi pecunia agi, sicut & de aliis bonis incertis ab alio inventis, de quibus Art. seq. Ita recte advertit P. Kresslinger in Addit. ad Theol. Moral. P. Reiffenstuel Tr. 7. d. 5. n. 9. H. N.

Assero 1. Spectato jure naturæ & Gentium, thesaurus inventus transit in dominium inventoris, occupantis eum. Herincx, Mezger, & alii. Prob. Id, quod in nullius est dominio, jure naturæ & Gentium fit primo occupantis: sed thesaurus in nullius est dominio: ergo de jure naturæ & Gentium fit inventoris, primo eum occupantis. M. colligitur ex hactenus dictis. m. patet 1. ex definitione thesauri. 2. ex eo, quia hæc pecunia non spectat ad Dominum, qui eam abscondit, & deposuit, cum hic illam præsumatur dereliquisse. Neque pertinet ad dominum loci, in quo thesaurus est defossus; etenim thesaurus non est pars, neque fructus loci illius, vg. agri: ergo non est ratio, ut pertineat ad dominum illius agri.

Neque dicas: Talem thesaurum posse præscribi a Domino agri, in quo ille est defossus; nam hoc falsum est: etenim illud non potest præscribi, quod non possidetur: sed thesaurus iste a nemine possidetur: ergo etiam a nemine potest præscribi. m. claret; quia illud non possidetur, de quo nulla habetur cognitio, cum ad omnem possessionem requiratur animus, & in-



intentio possidendi : atqui intentio non fertur in rem penitus incognitam : ergo. Hæc de jure Gentium & naturali : verum de jure civili Cæsareo paulo aliter est dispositum. Quare.

331

Affero 2. De jure positivo communi Cæsareo 1. Thesaurus in proprio fundo repertus, integer est inventoris. 2. Si *fortuito est* inventus in alieno fundo, etiam Principis, tunc quoad unum dimidium pertinet ad inventorem, quoad alterum spectat ad Dominum fundi. Ita communis, & certa ex §. *thesauros*. 39. Instit. de rer. divis. & L. un. C. de thesauris.

Atque hæc leges ante sententiam judicis in conscientia obligant : cujus ratio est 1., quia ex nullo capite possunt esse pœnales. 2. §. 39. Instit. mox cit. dicitur : *Divus Hadrianus, naturalem æquitatem secutus, dimidium Domino soli concessit* : ergo non pœnam statuit, sed obligationem in conscientia inducere voluit, ita suadente æquitate. 3. Si istæ leges dicerentur pœnales, posset etiam dici ; quod leges præscriptionum sint mere pœnales, & ante sententiam judicis non obligent. 4. Istæ leges sunt definitivæ proprietatis rerum, & transferunt jus domini in Dominos fundi quoad mediam partem : ergo obligant in conscientia, ut hisce Dominis fundi media pars thesauri tradatur. C. patet ; nam & leges illæ, quæ emptori jus tribuunt in rem emptam, obligant in conscientia : ergo & istæ, quæ jus in thesaurum tribuunt, obligant in conscientia : Pro quibus

Nota ulterius, Dominum fundi statim fieri Dominum mediæ partis thesauri, dum hic in suo fundo ab alio fortuito invenitur, & occupatur, ut colligitur ex LL. cit. Proinde Dominus fundi ex legis dispositione per ipsum inventorem sufficienter apprehendit, & occupat.

Dixi in conclusione : *Si fortuito est inventus* ; si enim data opera aliquis in alieno fundo quærat thesaurum, totum jubetur cedere Domino per modum pœnæ L. un. C. de thesauris. Hæc tamen non obligat ante sententiam judicis more pœnarum. Nihilominus talis inventor ante omnem sententiam judicis debet dimidium Domino fundi cedere propter illa, quæ in conclusione sunt dicta a. Sup-



Suppono etiam, quod theſaurus ſit licito modo quaſitus; ſi enim arte magica, vel alio modo a legibus reprobato eſſet inventus in proprio fundo, tunc totus fiſco dari deberet, ut habetur L. un. C. de theſauris. Hæc tamen lex, utpote pœnalis, juxta DD. communiter non obligat ante ſententiam judicis condemnatoriam. Si autem magicis artibus &c. in alieno fundo quis inveniat theſaurum inſcio Domino fundi, tunc Lugo, & Leſſius exiſtimant, dimidiam partem tantum eſſe applicandam fiſco, alteram autem remanere Domino fundi. Ratio eſt: quia Dominus innocens non debet ob alterius delictum privari bono ſibi alias debito: atqui dimidia pars eſt Domino fundi alias debita vi legum citt.: ergo ea privari non debet ob delictum inventoris. Imo non defunt, qui in hoc caſu putant, totum theſaurum pertinere ad Dominum fundi, cum leges adjudicent eum Domino fundi, quando data opera ſine ejus conſenſu eſt quaſitus. Ratio eſt: quia leges volunt, totum theſaurum, ſaltem poſt ſententiam, tradi Domino fundi, quando ſine ipſius præſcitu & conſenſu eſt data opera in ſuo fundo quaſitus: quo favore legum ob delictum alterius talis homo non eſt privandus.

Petes I. Si fundus habeat duos Dominos, unum propriarium, vel emphyteuticum, aut uſufructuarium, quid tunc faciendum de illa media parte, quæ Domino fundi debetur? 332

R. I. Illa medietas non debetur uſufructuario, ſed Domino directo. Ita communiter DD. cum Mezger, Herincx, & aliis. Ratio eſt: quia theſaurus non eſt fructus fundi, ſed eſt tantum abſconditus in fundo. Colligitur etiam ex L. fructus. 8. §. ſi fundum. ff. de ſoluto matrimonio. ubi marito denegatur pars theſauri in fundo dotali, non obſtante, quod maritus fundi dotalis uſumfructum habeat. A fortiori nihil de theſauro ab aliis invento participant illi, quibus fundus ille tantum erat elocatus, commodatus, aut in pignus conceſſus.

R. 2. Dimidium theſauri inventi in fundo feudali, vel emphyteutico non debetur Domino directo, ſed Vaſallo, vel Feudatario, ac Emphyteutæ. Herincx, Krefſlinger, Chriſtophorus Chlingensperger, Haunold, Antonius Mayr, Stapf, ac plu-



res alii, inter quos Schuzius ait, ita in praxi servari. Ratio est: quia Feudatarii, & Emphyteutæ sunt in hoc potiores usufructuario; sunt enim ita Domini utiles rei in feudum, vel emphyteusin concessæ, ut ex ea recipiant omnia commoda, & emolumenta, Domino directo solum obtinente jura feudalia, & emphyteutica, inter quæ non est participatio, vel inventio thesauri.

333

Petes 2. Quid dicendum, si thesaurus casu fortuito ab alio inveniatur in loco sacro, vg. in Ecclesia? R. tunc etiam media ex parte pertinere ad Ecclesiam, & ex altera parte dimidia ad inventorem. Christoph. Chlingensperger, Kreslinger, ac P. Antonius Mayr. Ratio est: quia Ecclesia non debet esse deterioris conditionis, quam aliquis homo privatus: atqui thesaurus in fundo privati repertus, dimidia ex parte spectat ad hominem illum privatum: ergo etiam in loco ad Ecclesiam spectante repertus thesaurus ex dimidia parte ad illam Ecclesiam, vel Dominum Ecclesiæ spectabit. Leges, quæ contra hanc resolutionem citantur, apud P. Antonium Mayr, & Massæum Kreslinger in Theol. morali P. Reiffenstuel solutas vide.

334

Petes 3. Quid dicendum sit de thesauro, invento in loco publico? R. Talem thesaurum esse dividendum cum fisco, vel civitate, vel Republica, in qua existit iste locus publicus. Ita habetur §. 39. *Instit. de rer. divis.* Verum dubium est, quisnam sit locus publicus ille, de quo loquitur cit. textus juris, ac nostra assertio? Lugo, Lessius, Covarruvias, Palao, Haunoldus, Vasquez apud Clarissimum Antonium Mayr per locum publicum hic intelligunt eum, qui jure domini spectat ad fiscum, vel Communitatem, tanquam bonum ac patrimonium populi & Communitatis, ut domus publica, sylva, pascua communia &c. in quibus, ajunt, thesaurum inventum debere dimidiari, & unum illius dimidium Communitati tradi: Contra vero dicunt, alia esse bona publica, quæ publicis omnium usibus sunt destinata, ut plateæ, flumina, forum &c., quæ dicunt non comprehendere per mox allegatam dispositionem juris civilis: quare volunt thesaurum in tali loco publico, vg. in platea publica inventum, totum esse inventoris. Ratio est: Jus civile de tali thesauro nihil disponit, sed eum relinquit ordinationi juris Gentium & natu-



naturæ, juxta quod totus cedit inventori, primo illum occupanti. Verum Clarissimus D. Stapf apud laudatum P. Antonium Mayr T. 8. cursus sui Theologici n. 311. affirmat, etiam flumina, littora maris, ipsa maria, vias, ac plateas esse sub vero dominio proprietatis Regum, Principum, & Communitatum, adeoque de thesauro ita invento idem asserit esse observandum, quod observari debet circa thesaurum repertum in fundo alieno, de quo supra

Hæc, quæ hætenus de thesauris dixi, de jure communi Cæsareo intelligenda sunt: quid autem de consuetudine sit dicendum, non adeo constat. Chlingensperger equidem L. 2. Instit. t. 1. q. 34. ait: hodie Principes supremos jure Regalium thesauros, ubique in locis suorum subditorum inventos, vel ex toto, vel ex parte sibi attribuire. Huic opinioni subscribunt alii plures. Vide de hoc additionem I. Theol. moral. P. Reiffenstuel T. 7. d. 5. n. 13. Ast vero Clarissimus P. Antonius Mayr T. 8. n. 314. asserit, non constare de consuetudine, aut lege tali, quæ jus antiquum cæsareum de thesauris correxerit, aut abrogarit.

Verum hoc non habet amplius locum in Bavaria, in qua clare sequentia ordinat Codex Maximilianeus p. 2. c. 3. §. 4. *Gefundener Schätzen halber, welche so lange Zeit vergraben, eingemauert, oder sonst verborgen gewesen, daß man den Eigenthümer nicht mehr davon weiß, wird das General-Mandat von Anno 1752. hiermit folgendermaßen erneuert.* 1. Soll man den Schatz in drey Theile theilen, wovon dem Fisco zwey Drittel zugehen, der Ueberrest aber dem Erfinder, wenn er den Fund auf seinem Eigenthum thut, verbleibt. Falls aber 2. derselbe in fremden geschihet, so theilt der Erfinder sothanes Drittel mit dem Eigenthümer des Orts, außer da der Schatz nicht von ungesehr gefunden, sondern ohne des Eigenthümers Wissen und Willen mit Fleiß darauf nachgesucht, oder gegraben worden, welchenfalls das ganze Drittel dem Proprietario loci allein zugehört. Gebraucht man sich aber 3. etwan gar abergläubischer Dingen hierunter, so verfällt man dadurch nicht nur in malefizische Straf, sondern der Antheil, welchen man sonst dabey gehabt hätte, gehet verlohren, und kommt dem Fisco zu, jedoch ohne Präjuditz des Eigenthümers, wenn er bey der Sach unschuldig ist. Unter dem Eigenthum wird 4. disfalls vorzüglich das dominium utile



verstanden, mithin dem *Dominio directo* præferirt, wo hingegen *Usufructuarius*, *Commodatarius*, *Depositarius*, *Pignoratarius* und dergleichen von der *Participation* ausgeschlossen sind. Ergiebt sich nun 5. der Fall in Kirchen, geweythen Orten, oder auf *Gemeinds-Gründen*, *Oeden* und *Herrnlosen Gütern*, so kommt erstensfalls des *Eigenthümers* *Antheil* der Kirch oder *causæ piæ*, andernfalls der *Gemeinde*, und drittensfalls dem *Fischo* zu. Sollte sich endlich 6. jemand unterstehen, den gefundenen *Schatz* zu verhehlen, und nicht also gleich anzuzeigen, so wird er nicht nur mit *malefizisch-willkührlicher* Straf belegt, sondern er verewirckt anbey seinen ihm sonst gebührenden *Antheil*, und fällt solcher vielmehr demjenigen zu, der dieses am ersten angiebt. *Hæc igitur in Bavaria, & ubi jus Boicum in usu est, observari debent, sicut & alia in illo capite* *§§vis reliquis statuta circa alios modos acquirendi rerum dominium.*

- 335 Quæres ulterius: Ad quem spectent *Mineralia*, & ac *venæ metalli* recenter inventæ? R. De jure naturæ & Gentium spectant ad dominum fundi, in quo sunt inventæ. Herincx, Mezger, Hölzman. Ratio est: quia *mineralia* & *metalla* adhærent terræ, atque ex illa virtute Solis, vel alterius agentis producuntur haud aliter ac *herbæ*, *creta*, *lapides* &c.: ergo eodem modo ad *Dominum fundi* pertinent, sicut ad eum spectant *herbæ*, *lapidinæ* &c. Imo *mineralia* sunt pars fundi: ergo ad eum *Dominum* de jure naturæ spectant, ad quem pertinet totus fundus.


Dixi: de jure naturæ; nisi videlicet *leges speciales*, aut *consuetudines particulares* aliquid aliud decernant, quæ proinde quoad hoc punctum sunt attendendæ.

- 336 Quæres ultimo: Quando aliquis sciat in agro latere thesaurum, an possit illum emere, quin de thesauro latente *Dominum* moneat, aut pretium propterea augeat? R. Affirmative. Ita communis. Ratio est: quia talis ager adhuc justo pretio emitur, etsi illud propter latentem thesaurum non augeatur; nam pretium desumitur ex communi æstimatione hominum: atqui in communi æstimatione hominum ager ille, in quo latet thesaurus adhuc communiter incognitus, non plus valet, quam si thesaurus non lateret; nam ignoti nulla cupiditas, & nulla æstimatione.



matio : proinde propter thesaurum ejusmodi incognitum nulla major aestimatio communis tali agro accedere potest. Infuper thesaurus non est pars, aut fructus fundi, adeoque propterea fundus non debet pluris aestimari, aut solvi. Adde, quod thesaurus iste, quamdiu latet, non spectet ad ullum hominem, neque ad Dominum fundi illius, in quo latet: ergo Dominus fundi propter thesaurum, tanquam rem non suam, non potest majus pretium prætere. Præterea non potest ostendi ulla ratio, ob quam talis, qui scit latere thesaurum in alieno fundo, teneatur de hoc monere Dominum fundi.

Idem dic de illo, qui scit mineralia latere in alterius fundo; nam & hic filere potest, ac communi pretio emere agrum illum: ut patet ex ratione prima, quam adduxi pro resolutione immediate data de thesauro.



ARTICULUS V.

*Ad quem spectent bona inventa: item bona vacantia,  
derelecta.*

P. I.

*Præmittuntur aliqua quæsitæ.*

**Q**UÆRES 1. Quæ sint bona derelicta? R. Bona derelicta sunt illa, quæ Dominus non vult habere in sua potestate, adeoque eorum dominium abjicit, quin illud transferrat in alium. Quare illa, quæ sunt derelicta, sub nullius dominio existunt; non enim existunt sub dominio illius, qui prius fuit eorum Dominus; hic siquidem dominium talium rerum a se abjicit: neque pertinent ad alium Dominum; quia abjiciens dominium, illud in alium non transtulit: unde fiunt primo occupantis. L. 1. & 2. ff. *pro derelicto*. 337

337.

Potest



Potest autem Dominus expresse vel tacite rem suam derelinquere. *Expresse* id facit, quando rem suam abjicit cum deliberato animo eam non amplius habendi ut suam: prout fit, si Princeps, vel Rex pecunias in populum spargat. *Tacite* autem id præstat, si rem suam, vg. deperditam, facile posset recuperare, id tamen negligit, vel dissimulat, vel alia ratione ostendit, quod bonum suum velit pro derelicto habere. In dubio autem, an res aliqua fuerit a Domino derelicta, conjecturis & prudentum arbitrio est utendum: si tamen ex conjecturis, ac circumstantiis certo non potest colligi, quod bonum aliquod fuerit vere derelictum, tunc pro tali non est habendum, neque fit primo occupantis, sed priori Domino restituendum est: ratio est; quia nemo facile res suas jactare, & derelinquere præsumitur: hinc præsumptio stat pro Domino priore, quod ipse voluerit rem suam retinere. Ex his.

Deduces 1. Bona, quæ ingruente tempestate projiciuntur in mare, vel quæ tempore incendii jactantur in plateas, non esse habenda pro derelictis. Ratio est: quia Dominus illa tantum coacte projicit, & vult ad se reverti: hinc etiam priori Domino sunt restituenda, §, ult. *Instit. de rerum divif. & L. falsus. ff. de furtis*. Imo excommunicatio Papæ reservata fertur in Bulla Cænæ in eos, qui bona Christianorum naufragantium surripiunt. Nihilominus Mezger ex Lugone existimat, istam excommunicationis sententiam non afficere eos, qui ideo sibi vendicant bona naufragantium, quia verisimiliter credunt, Dominum navis, aut alium ipsius nomine, nunquam esse rediturum ad illa bona quærenda; tunc enim similia bona merito habentur pro derelictis.

Deduces 2. Inter bona derelicta recte computari thesauros, ut ex dictis liquet.

338

Quares 2. Quæ sint bona vacantia, & incerta? R. 1. Bona *vacantia* sunt illa, quæ remanent post Domini mortem, nullo hærede relicto. Et hæc, si defunctus sit laicus, jure communi fisco Principis, vel Reipublicæ deferuntur. *L. Vacantia. C. de bonis vacantibus*. Si defunctus sit Peregrinus, bona mobilia ab eo relicta per Episcopum loci in causas pias expendi debent. *Auth. Omnes Peregrini. C. Communia de Successionibus*.

R. 2.



Resp. 2. Bona incerta sunt, quæ Dominum quidem habent, aut habere præsumuntur, sed is ignoratur. Hæc autem bona sunt duplicis generis: aliqua sunt incerta ex delicto, vg. fraude, usura, vel negligentia in inquirendo Domino: aliqua sunt incerta sine delicto: talia sunt, quæ quis bona fide, vg. in platea invenit, nec in notitiam Domini, ad quem illa spectant, omni morali diligentia adhibita, venire potest.

R. 3. Non sunt bona incerta, quorum Dominus tantum non scitur determinate, scitur tamen inter paucos, vg. inter duos vel tres unum necessario esse Dominum talis rei. Quare in tali casu res esset illis tribus restituenda, ut eam vel inter se dividant, vel rem forte, aut conventionem inter se transigant: aliud est dicendum, si sciretur tantum, aliquem ex multis, vg. ex integra populosa civitate, esse Dominum boni alicujus, non autem posset determinari, quis iste esset: in quo casu bonum illud maneret adhuc incertum. Ratio utriusque desumitur ex æstimatione morali, & communi hominum judicio.

R. 4. Qui habet aliqua bona incerta, debet moralem diligentiam adhibere in inquirendo vero Domino. Ratio hujus est: quia hoc ipso, quod aliquis bonum incertum accipiat, vel penes se retineat, se implicite obligat ad moralem diligentiam in investigando Domino adhibendam: sicut & ille, qui rem alienam in depositum accipit, se simul implicite obligat ad eam custodiendam.

Hæc autem moralis diligentia (ut advertunt communiter Theologi cum La-Croix L. 3. p. 2. n. 87.) debet esse major, vel minor secundum majus vel minus pretium rei incertæ. Et hinc, si res sit magni pretii, tenetur inventor curare, ut aliquoties promulgetur in cathedra, affigatur scheda, id publice notificans &c.; imo subinde etiam, ut imprimatur in novellis publicis. Sporer putat, etiam in aliis locis vicinis promulgari, & inquireri debere, si probabilis spes sit, Dominum, vel hæredes ibi commorari: si autem res parvi pretii est, sufficit, si scheda affigatur Ecclesiæ, aut aliqua promulgatio fiat in foro, ubi hominum frequentia convenire solet. Si deinde Dominus compareat, & probet, rem esse suam, debet ei reddi, nec in-



ventori ex iustitia debetur aliquod honorarium: si tamen lex aliqua particularis, vel promissio aliquid dandi adesset, vel si labor in indagando esset positus, deberet satisfactio præstari pro æquitate.

*§. II.*

*An is, qui habet bona incerta ex delicto, possit illa sibi retinere?*

339

ASSERO, & R. negative. E. g. furatus es alicui 100. florenos, nescis tamen, quisnam ille sit, cui abstulisti. Vel: invenisti 100. florenos bona quidem fide, culpabiliter tamen neglexisti inquirere in Dominum pecuniæ deperditæ, ex qua negligentia res in eum statum est devoluta, ut moraliter sit impossibile devenire in notitiam Domini. In utroque, & aliis similibus casibus non potes retinere pecuniam, sed teneris eam regulariter in causas pias erogare. Quod

P. 1. ex cap. *Cum tu. 5. de Usuris.* ubi Alexander III. expresse ait, usuras Dominis vel hæredibus, vel si hi deficient, pauperibus restituendas esse. Atque hoc capitulum loquitur quidem unice de usuris, ob paritatem tamen rationis, & ob jus naturale, in quo se fundat, etiam ad alia bona incerta ex delicto extenditur; de iis enim est par omnino ratio, ut colligetur ex probatione ultima.

Prob. 2. Can. *Nemo, qui rapit. c. 14. q. 5* ait S. Hieronymus: *Nemo: qui rapit, si habeat, unde reddat, moriens salvatur: si eos, quorum fuit, invenire non possit, Ecclesie, vel pauperibus tribuat.*

Neque dicas: Canonem hunc per vocem *Palea* notari, & hinc non habere vim legis. Contra est enim; quamvis non habeat vim legis, habet tamen auctoritatem S. Hieronymi, declarantis legem naturalem.

Prob. 3. Naturali rationi repugnat, ut aliquis ex delicto, vg. furto, usura &c. reportet commodum: sed reportaret, si bona incerta ex delicto posset sibi reservare, & non teneretur in causam piam erogare: ergo. m. claret; quia ex delicto, vg. ex furto.



furto, talis homo lucraretur bonum alienum, cujus Dominus ignoratur. M. etiam videtur patere ex naturali rationis lumine.

Confirm. Si aliquis bona ista incerta ex delicto lucraretur, tunc multi hac spe, quod simili modo aliquid lucrari possint, allicerentur ad alios injuste lædendos, ad non inquirendum in Dominum &c., ut ergo hæc injustitiæ evitentur, natura noluit a malæ fidei possessoribus acquiri dominium bonorum incertorum, sed voluit hæc, Domino non comparente, piis causis restitui. Quare & ista obligatio est multum optabilis cuivis prudenti homini, ut sic se magis servet indemnem ab injusta læsione.

Objic. 1. Si bona incerta ex delicto vi juris naturæ deberentur causis piis, tunc summus Pontifex talia debita non posset magna ex parte remittere: sed potest remittere: ergo. M. constat; quia summus Pontifex non potest aliquid contra jus naturale disponere. m. prob. nam summus Pontifex (ut testatur Haunoldus, ac alii) vi Bullæ Cruciatæ, vel alterius privilegii admittit compositionem, ut quis retenta majore parte debiti reddat valde exiguum, vg. pro 14. vel 15. scutis det duos Julios. R. N. M. Hoc jus naturæ non obligat, nisi cum subordinatione ad legitimum Magistratum, cui a Deo concessa est administratio causarum piarum. Quare si summus Pontifex judicat, bono publico magis expedire, ut aliqua remissio fiat, tunc ea valide & licite fit. Rationes autem talis remissionis, & compositionis possunt esse 1. fragilitas hominum, qui si totum debitum deberent restituere, omnino nihil redderent cum salutis suæ periculo, & detrimento boni publici. 2. Subsidium facilius obtinendum ad bellum contra infideles &c.

Objic. 2. Contra obligationem dandi causis piis debita incerta ex delicto potest currere præscriptio: atqui contra legem, & obligationem naturalem non potest currere præscriptio: ergo. R. N. M. Si enim possibilis sit aliqua præscriptio in casu, ubi bona detinentur incerta, tunc ea non potest dari contra istam obligationem, ex jure naturali descendente, sed tantum contra bona incerta, quæ vi hujus obligationis debentur: quæ si semel sint præscripta, cessant esse bona aliena, adeoque cessant



esse materia & objectum illius legis naturalis, obligantis ad bona NB. *aliena*, quæ sunt incerta, restituenda.

Objic. 3. quærendo, cur in causas pias debeant erogari talia bona, & non in causas profanas? R. Ideo: quia expresse Alexander III. & Canones allegati sic statuunt. 2. Nolo mordicus defendere, quod semper hæc bona debeant determinate in causas pias erogari; conclusio enim solum vult, quod ista bona non possint retineri a malæ fidei possessore, & ratio naturalis non videtur plus exigere: hinc, si alicubi ex consuetudine sint danda fisco Reipublicæ, eam nullatenus condemno. Atque hac de causa in resolutione casus positi immediate post conclusionem dixi, *regulariter* debent in causas pias expendi.

Objic. 4. Molina cum communi sententia DD. tenet, quod malæ fidei possessor, si sit vere pauper, possit bona incerta retinere, & sibi applicare: ergo ista bona possunt retineri a malæ fidei possessore. R. D. a. potest retinere, quando inopia est adeo evidens, & urgens, ut ipsum alias a restitutione excuset, ut vult Sporer, præsertim quando accedit autoritas, & permissio Confessarii, vel Superioris, prout ultra urgentem necessitatem & inopiam requirit Paulus Zetl C a. secus N. a. Conclusio nostra loquitur in casu, ubi commode a possessore iniquo potest fieri restitutio, & ubi aliquis aliunde non excusatur a restitutione. 2. Quia per accidens est, quod possessor iniquus sit in gravi necessitate, ex eo non panditur via iniquis fraudibus, præsertim cum accedere debeat facultas Confessarii, ne iniquitas mentiatur sibi, & amor proprius decipiat detentorem.

### §. III.

*An Bona incerta sine delicto inventor possit sibi reservare?*

341 **Q**uia hic quæstio est de bonis inventis, Nota 1. invenire, & inveniendū rem acquirere, non esse idem, ac rem tantum videre. Datur ergo tunc inventio, quando res moraliter apprehenditur, & occupatur: hinc non ille, qui prior, rem videt, sed qui prior eam occupat, illam inveniendū acqui-



quirit. Neque obstat textus L. 1. §. 21. ff. de acquir. vel amitt. possessione, quæ dicit, nos etiam oculis, & affectu possessionem apprehendere; nam lex ista intelligitur de casu, quo vel naturalis possessio jam antecedenter est habita, vel certe alius titulus emptionis, aut traditionis accedit: non autem ibi agitur de occupatione sine titulo.

Nota 2. Quæri potissimum, an inventor, etsi sit ipse dives, possit rem inventam, postquam diligenter in Dominum inquisivit, sibi retinere tunc, quando Dominus non amplius comparet, vel an teneatur, eandem rem in pauperes erogare?

Affero: In praxi tuta, & probabilior est sententia, quæ dicit, quod res inventæ retineantur ab inventore, quando post diligentem inquisitionem non comparet Dominus. Conclusio hæc, sub his terminis proposita, est communis Modernorum, inter quos etiam est Matrius, Herincx, Mezger, Holzman contra multos antiquos, qui putant, hæc bona esse eroganda in pauperes, vel causas pias. 342

Prob. 1. Non potest assignari obligatio, ex jure naturali, vel positivo, aut consuetudinario descendens, vi cujus inventor teneretur in causas pias erogare res inventas: ergo hæc obligatio non datur. A. prob. nam lumen & ratio naturalis, ac consuetudo potius suadent contrarium, leges vero positive loquuntur de bonis incertis ex delicto: ergo.

Prob. 2. Si inventor ejusmodi bona aliena, quæ sunt incerta absque delicto, non posset retinere, sed deberet ea pie erogare, tunc hoc proveniret ex præsumpta voluntate Domini, ad quem ejusmodi bona spectant: atqui id ex præsumpta Domini voluntate nullatenus provenit: ergo. M. est præcipuum adversæ sententiæ fundamentum. m. prob. Id est de præsumpta voluntate Domini, quod Domino est optabilius, & utilius; id certo enim præsumitur Dominus prudenter velle, quod ipsi magis optabile est, ac plus utilitatis confert: atqui optabilius est, ut res inventa maneat apud inventorem, quam ut in pauperes, vel pias causas erogetur; nam 1. apud unum inventorem, qui in



Dominum inquirere tenetur, est major spes rem deperditam iterum recuperandi, quam apud multos pauperes, qui res sibi donatas statim absumere solent. 2. Quando inventor habet spem aliquando lucrandi rem, si Dominus inquisitus non comparet, tunc diligentius ac lubentius illam in custodiam suam accipit, & in se, vel in æquivalenti asservat, faciliusque in Dominum ejusdem indagat: contra, si nullam omnino spem haberet rem inventam retinendi, aut lucrandi, etsi Dominus non compareat, tunc sapissime rem inventam in loco minus securo relinqueret, nec eam tolleretur, quia tollendo tantum onus inquirendi Dominum, & rem illam custodiendi in se fusciperet, absque spe rem inventam lucrandi etiam tunc, ubi Dominus non comparet; nam Domino non comparante inventor juxta AArios deberet rem inventam restituere pauperibus.

Adde, quod nostra sententia sit etiam optabilis toti Communitati humanæ, quæ proinde videtur in retentionem rerum inventarum, quarum Dominus non comparet, consentire; siquidem hac ratione (ut loquitur Reiffenstuel) mutuo compensari solent fortuita rerum amissarum damna; nam qui hodie rem suam perdidit, cras casualiter inveniendæ rem alienam, cujus Dominus post debitam inquisitionem non comparet, rursus refarcire potest jacturam rei suæ antea amissæ.

Confirm. 1. Dato etiam, quod Dominus sæpe habeat desiderium, ut res a se deperdita per inventorem in causas pias erogetur, tamen non constat, quod ejusmodi Dominus etiam habeat voluntatem obligandi inventorem ad talem piam expensionem; sæpe enim aliquis habet desiderium, quin per illud vel se, vel alium obligare velit: ergo ex desiderio illo Domini præsumpto non potest ista obligatio probari.

Confirm. 2. ex dicendis ad objectionem primam, ubi adducta ratio magis dilucidabitur. Quare

343

Objic. 1. Bona inventa debent impendi juxta voluntatem Domini, ad quem spectant; atqui voluntas, præsumpta saltem Domini est, ut ea impendantur in causas pias: ergo. M. videtur



tur certa ; quia quilibet Dominus potest disponere de re sua, quæ proinde juxta ipsius voluntatem debet impendi. m. prob. quilibet Dominus præsumitur velle, ut res sua omni modo meliore in suam utilitatem cedat : adeoque, si talis res non potest amplius in utilitatem temporalem Domini cedere, eoquod ei nequeat amplius restitui, uti fit in bonis inventis, ubi Dominus ignoratur, tunc saltem præsumitur Dominus velle, ut sibi proficiat spiritualiter per erogationem in pauperes, & causas pias : ergo,

R, N. m. Nam 1. Domini, etiam Catholici, non volunt, ut a se perdata dentur pauperibus, sed potius optant, ut ea servantur ab inventoribus, & sibi iterum restituantur. 2. Ista expensio, ab inventore facta in pauperes, plerumque est parum, vel omnino non meritoria Domino : ergo illam non videtur sub obligatione intendere, & velle. A. prob. nam ille ipse inventor, qui expendit in pauperes, non tenetur habere bonam intentionem, dum facit istam expensionem ; satisfacit enim suæ obligationi etiam juxta AArios ex quacunque intentione, etiam mala, erogat pauperibus : dato etiam, quod faciat bonam intentionem, non tamen tenetur eleemosynam hanc pro Domino rei inventæ applicare : neque tenetur pauperes monere, ut aliquidorent pro Domino : atqui tali modo hæc expensio parum, aut omnino non esset meritoria Domino rei illius, quæ in pauperes erogatur. 3. Neque propter desiderium, & voluntatem Domini, ad quem spectat res deperdita, ejusmodi datio eleemosynæ videtur esse utilis eidem. Ratio est : quia ejusmodi Dominus rarissime habet actuale bonum desiderium, rem deperditam in pauperes dispensandi, cum potius habeat voluntatem recuperandi rem suam, quam pauperibus distribuendi : voluntas autem mere præsumpta non sufficit ad meritum. 4. Communiter Dominus rei deperditæ non multum curat utilitatem spiritualem talis rei, neque multum desiderat, rem deperditam in causas pias applicare, sed potius omne ejus desiderium eo collimat, ut rem illam recuperet : si autem non possit recuperare, parum est sollicitus, quomodocunque ab inventore impendatur,

Objic. 2. Saltem tunc, quando nulla omnino amplius spes est, rem suam deperditam recuperandi, præsumitur Dominus vel



velle, ut ea ab inventore in pios usus convertatur in solatium animæ suæ: ita judicant Sporer, ac ex eo Paulus Zetl: ergo. R. N. a. Nam 1. quid Dominus fieri velit circa rem a se deperditam, desumi debet ex illis, quæ plerumque contingunt; præsumptiones enim se accommodant rebus plerumque contingentibus, non autem casibus particularibus: atqui plerumque est spes, rem deperditam recuperandi: quando autem spes est, rem deperditam recuperandi, tunc censetur Dominus velle, ut ea ab inventore asservetur: ergo præsumitur Dominus hanc voluntatem universaliter habere, etiam non obstante casu particulari raro contingente, in quo ejusmodi Dominus omnem spem, rem amissam recuperandi, deposuit. 2. Huc faciunt pleraque adducta in probatione Assertionis, & responsione ad objectionem primam.

Objic. 3. In nostra sententia Dominus rem amissam non facilius recuperat, quam in sententia contraria: ergo nostra probatio non subsistit. A. prob. Posset inventor rem illam gratis alteri donare, ita, ut exinde non fiat ditior: in quo casu Domino postmodum comparenti non teneretur aliquid restituere: quare tunc Dominus rem suam omnino non amplius recuperaret: ergo. R. 1. Hanc non esse unicam nostram rationem. R. 2. N. a. I. enim non potest in nostra sententia inventor rem inventam donare alteri, vel destruere, nisi prius sufficienter in Dominum inquisierit: imo neque hoc statim potest facta sufficienti inquisitione, etsi Dominus non compareat, nisi sit ita animo constitutus, quod si Dominus compareat intra debitum tempus, quod ei velit loco rei suæ destructæ, vel absumptæ præstare æquivalentem compensationem. Debet ergo juxta nos tamdiu ab inventore reservari res reperta, quamdiu est spes probabilis, quod Dominus sit compariturus, & repetiturus rem suam. 2. Ordinarie nemo solet donare alteri absque omni causa, & ita, ut nihil alias donasset: atqui si inventor rem inventam donat in illis circumstantiis, in quibus alias de rebus suis donasset, tunc fit ditior; quia donando rem inventam parcit rebus suis, & eas conservat, quibus alias, si eas donasset, carere debuisset: & sic æquivalenter talis res donata apud inventorem remanet, quæ proinde Domino comparenti in æquivalenti restitui debet.

Objic.



Objic. 4. Consuetudinem, & praxin timoratorum, qui res inventas in causas pias erogant, non comparente Domino. R. 1. opponendo non paucos alios optimæ notæ Christianos, qui contrarium practicant. 2. Si autem aliqui res inventas dent pauperibus, ad summum faciunt opus consilii, non putant tamen se ad hoc obligari: si autem aliqui se obligatos existiment, id oritur aut ex nimia anxietate, aut ex conscientia erronea.

Objic. 5. Bona vacantia Peregrinorum ob solam præsumptam voluntatem illorum debent applicari in causas pias: ergo a pari idem est de bonis inventis. R. N. a. Hæc enim obligatio applicandi bona causis piis non oritur ex præsumpta Peregrinorum voluntate, sed ex speciali ordinatione juris. Auth. *Omnes peregrini. C. Communia de successionibus.* qualis ordinatio non habetur circa bona inventa.

Objic. 6. Debita incerta sine delicto debent applicari causis piis: ergo & bona incerta. R. N. a. Nam, si e. g. emisti, & solvisti mercatori unam ulnam panni, & per inculpabilem errorem accepisti duas, vel tres, in hoc casu dico, si sufficienti diligentia adhibita in notitiam mercatoris illius nequis venire, pretium reliquarum duarum ulnarum, quod adhuc debes, non teneris in pauperes expendere, sed potes tibi reservare.

Objic. 7. contra nos Authoritates aliquas Juris, ac Scoti 4. d. 15. q. 2 §. de quarto. n. 32. ubi ait Doctor: *Cui non potest reddi temporaliter, reddatur spiritualiter: redditio spiritualis fit maxime reddendo pauperibus pro eo.* R. ad has Authoritates generaliter, eas loqui de bonis incertis ex delicto, vel de illis rebus inventis, quarum Dominus est cognitus, aut non sufficienter inquisitus, quas sibi retinere nequit inventor. Ad Scotum autem specialiter dico, eum agere de illo, qui injuste alterum damnificavit, ut patet ex toto fere contextu illius quæstionis, & articuli, ac ex verbis, quibus inchoat illum §vum, & 4. articulum, quæ ita habent: *de quarto scilicet dico, quod damnificato &c. debeat fieri restitutio, vel ejus propinquis, aut certe pauperibus, si nec ipsi damnificato, aut ejus propinquis fieri potest.* Ex quibus patet, quod loquatur de bonis incertis ex



delicto, quæ & nos in pias causas expendi debere dicimus a malæ fidei possessore. Accedit, quod Scotus tantum suam sententiam, quam cit. loco tenet, sustineat ut probabilem, & tutiorem: per hoc autem non negat, nostram quoque esse probabilem, vel omnino probabiliorem, & in praxi tutam. Imo & nobiliores Scotistæ, ut Cavelus in Scholio ad præfatum Scoti textum, Mastrius, Herincx, Reiffenstuel, Holzman, non obstante autoritate Scoti eam dicunt esse probabilem, & in praxi tutam. Neque ita me Scoti sententiæ esse alligatum scio, aut volo, ut magis probabilem ipsi oppositam sententiam non audeam amplecti.

Objic. 8. In Hispania Patres de Mercede, & Trinitarii habent a Rege, & Pontifice privilegium exigendi pro redemptione captivorum bona inventa, etiam sub excommunicatione: ergo est obligatio ea restituendi. R. D. c. ergo est obligatio ea restituendi. ubi dantur tales speciales leges positivæ C. c. ubi non dantur, sicut eæ apud nos non vigent N. c. Nos loquimur de nostris terris, ubi similes leges non sunt latæ.

Objic. 9. Bona incerta ex delicto debent erogari in causas pias: ergo & bona incerta sine delicto. R. N. c. & parit. obligatio restituendi causis piis bona incerta ex delicto, servit ad absterrendum ab injuriis, & possessor injustus est etiam indignus, ut ipsi per favorem bona incerta relinquuntur: aliud est de bonæ fidei possessore, & inventore, qui penes se habet bona incerta sine delicto, utpote qui nullam injuriam commisit.

An autem talia bona inventa possint præscribi, nec ne, inferius, postquam sufficiens notitia de conditionibus ad præscriptionem necessariis est data, dilucidabitur. Interea ex Jure Bavarico certum videtur, quod talia bona inventa, sufficiente inquisitione facta, non solum in inventoris manibus remaneant, sed & intra debitum tempus præscribi valeant, ita, ut eorum dominium acquiratur. Codex Maximilianeus P. 2. c. 3. §. 5. ibi: *Wo immitels (id est, durante inquisitione) das gefundene Gut in des Erfinders Handen verbleibt, und nach erlassener Verjährung gar nicht mehr von ihm geforderet werden mag.*





## DISSERTATIO IV.

### *De modo acquirendi per Præscriptionem, vel Usucapionem.*

**P**ostquam enumerati sunt plures modi acquirendi dominium *jure Gentium*, jam explicanda venit præscriptio, tanquam celeberrimus modus obtinendi, & transferendi dominium *jure civili*. Sit ergo.

### ARTICULUS I.

#### *Quid sit, & quid juris tribuat Præscriptio?*

**A**SSERO I. Præscriptio (Germanice *ein Verjährung*, vel *fe-* 344  
cundum Jus Bavaricum Cod. Maximil. p. 2. c. 4. §. 1. *Er-*  
*hizung*, *Nuz*, und *Gewehr*) præscriptio, inquam, recte de-  
scribitur, quod sit *acquisitio dominii, vel juris alieni extinctio, or-*  
*ta ex possessione continuata debito tempore & modo*. Ita quoad rem  
fere omnes ex L. 3. ff. *de Usurpationibus, & Usucapionibus*. Ex-  
plicatur hæc descriptio in exemplo: Petrus agrum alienum 10.  
annis continuis bona fide possedit, existimans, eum esse suum:  
vi hujus continuæ possessionis, ac concurrentibus reliquis ad  
præscriptionem requisitis, idem Petrus elapso decennio acquirit  
dominium illius agri, extincto jure, quod prius alteri compete-  
bat.

Præscriptio primo dividitur ratione effectus in *positivam*, &  
*privativam*. *Positiva* est, qua uni acquiritur aliquod jus, & al-  
teri aufertur: ut, si Joannes per præscriptionem acquirat agrum,  
domum, jurisdictionem &c. prius spectantem ad Paulum. *Pri-*  
*vativa* est, qua quidem uni aufertur jus, alteri tamen nullum  
positivum, & proprie dictum jus acquiritur, ut si aliquis be-  
neficio præscriptionis obtineat immunitatem, & liberationem ab  
aliqua obligatione, ad quam antecederet erat adstrictus.



Circa hanc divisionem notandi sunt termini in Scholis usati; nam quando per præscriptionem *privativam* acquiritur immunitas aliqua ab obligatione præexistente, tunc solemus dicere: *Præscripsi huic obligationi, huic servituti &c.* Quando vero est præscriptio *positiva*, & per eam obtinetur aliquod jus vel dominium, tunc dicimus: *Præscripsi hunc agrum, hoc jus.* Ita Reiffenstuel L. 2. Decret. t. 26. ex P. Engel.

Ratione temporis præscriptio præcipue dividitur in *ordinariam*, & *extraordinariam*. *Ordinaria* (quæ & *brevis*, ac *longi temporis* dicitur) est, quæ ordinario tempore completur, videlicet triennio in rebus mobilibus, & decennio in immobilibus. *Extraordinaria*, seu *longissimi temporis* est, quæ completur tempore extraordinario, seu longissimo, id est, 30. vel 40. annis. Huc etiam pertinet præscriptio 60., 80., ac 100. annorum, quorum ultima etiam *centenaria* vocatur. Singulariter quoque extraordinaria est illa præscriptio, quam *immemorialem* dicimus, quæ requirit possessionem tam diuturnam, ut ejus initium excedat memoriam hominum defacto existentium, *daß es schon über Manns-Gedenken seye.*

345

Affero 2. Legitima præscriptio etiam pro foro conscientiae valet, & coram Deo liberat ab onere restituendi. Communis omnium Th. Th. & C. C. Prob. 1. Ex ipso communissimo omnium Th. Th. & C. C. consensu, nec non ex certa praxi omnium Confessariorum, & Tribunalium etiam Ecclesiasticorum.

Prob. 2. Legislato humanus potuit velle, & actu voluit, ut præscriptio etiam in foro interno vim habeat: ergo hæc etiam in foro conscientiae vim obtinet. A. quoad 1. membr. constat; quia Respublica, & legislator humanus ob dominium altum potest ex justa causa transferre dominia subditorum. A. quoad 2. membr.. quod etiam actu ita voluerit, probatur ex ipsis verbis Legum, quæ clare indicant, per præscriptionem dominium rerum præscriptarum acquiri: ut L. 3. ff. de *Usurpat. & Usucap.* *Usucapio*, seu præscriptio dicitur *adjectio*, seu acquisitio domini. & §. 1. Instit. de *Usucapionibus*. dicitur, quod per præscriptionem dominia rerum acquirantur: atqui si dominium



nium alicujus rei acquiro, tunc in conscientia sum securus, nec amplius coram Deo obligor ad eam alteri restituendam: ergo.

Prob. 3. L. 4. C. de Præscript. 30. vel 40. annorum. dicitur Præscribens *saluberrimæ legis plenissima munitione securus*; atqui Præscribens non esset plenissima munitione securus, si non esset simul in foro conscientiæ securus: ergo etiam est simul in foro conscientiæ securus. m. Constat; quia plenissima securitas non est, quæ non reddit securum in omni foro, præsertim conscientiæ.

Prob. 4. Si leges præscriptionis valerent solum pro foro externo, non obtineretur finis præscriptionis; atqui hic debet obtineri. ergo. M. prob. finis præscriptionis est certitudo dominiorum, ne scilicet dominia maneant incerta: item sedatio litium, securitas Dominorum &c. atqui hi fines non obtinentur; nam dominia in foro conscientiæ non transferrentur per præscriptionem in Dominum aliquem certum, & sic in foro conscientiæ eadem incertitudo facta præscriptione remaneret, quæ ante illam fuit: & ex hac ipsa ratione non sedarentur conscientiæ, sed potius illaquearentur per præscriptionem, nec securitas obtineretur.

Prob. 5. Jus Canonicum, quod præcipue attendit ad forum conscientiæ, cap. fin. de Præscript. tantum rejicit præscriptionem mala fide factam, & relinquit efficaciam præscriptioni bona fide factæ: ergo supponit, hanc etiam in foro conscientiæ valere.

Objic. 1. Regula 48. Juris in 6. dicit: *Locupletari non debet aliquis cum alterius injuria, vel jactura*: atqui ita locupletaretur aliquis per præscriptionem: ergo. R. N. m. Quando dominium transfertur a legitima potestate ex justa causa, nemini fit injuria: & si aliquis patitur inde jacturam, eam tamen non injuste patitur.

Objic. 2. Novella 9. ipse Imperator præscriptionem vocat *impium præsidium*, & *improbam temporis allegationem*, ac *tutum peccandi locum*: ergo ea in foro conscientiæ non procedit. R. Imperatorem loqui de illa præscriptione, quæ cum mala fide



aut inchoata, aut continuata est, & olim in foro civili tolerabatur, nunc autem a jure Canonico est reprobata, ut patebit ex Art. seq. hæc autem verba præscriptioni moderno tempore usitatæ non conveniunt. Rdent alii etiam aliter ad allegatam Novellam.

Objic. 3. L. 13. §. 1. ff. de *Jurejurando*. præscribenti fundum tantum conceditur actio utilis: atqui habens solam actionem utilem, tantum acquirit dominium utile, & non directum; ergo per præscriptionem in foro conscientiae non transfertur dominium directum. R. N. m. nam actio utilis phrasi juridica significat eam, quæ est efficax, & quæ adversarium vincit, sive agatur de dominio utili, sive directo. L. 10. in Princ. ff. *Si servitus vindicetur*.

Objic. 4. Respublica non habet dominium proprietatis in bona subditorum: ergo non potest illud in alios transferre. R. D. a. non habet dominium proprietatis formaliter tale Tr. a. non habet saltem eminenter tale N. a. Licet forte Respublica non habeat formale dominium in bona subditorum, habet tamen jurisdictionem, ac jus altum, quod eminenter tribuit potestatem disponendi de bonis subditorum, prout ad bonum horum subditorum expedit.

Objic. 5. Leges præscriptionis fundantur in præsumptione negligentiae admittæ a Domino in retinenda, vel recuperanda possessione suæ rei: ergo, ubi hæc negligentia non adest, non transfertur dominium per præscriptionem. R. 1. D. a. fundantur in hac præsumptione primario N. a. secundo C. a. sunt alia motiva magis primaria, quibus innititur præscriptio, de quibus statim Num. seq. R. 2. Leges non fundantur in præsumptione facti particularis, scilicet negligentiae in particulari admittæ a tali Domino: sed fundantur in periculo universali, ne scilicet Domini universaliter fiant negligentes, nisi eorum diligentia per præscriptionem acueretur: atqui leges, quæ fundantur in periculo, aut præsumptione universali, non cessant, etsi tale periculum, vel res præsumpta in particulari casu non subsistit, ut constat ex dictis Tom. III. de Legibus in præsumptione fundatis.

Ad



Ad alias objectiones solvendas nota 1. Leges positive & absolute assistere præscribenti, & ei adjudicare sine limitatione dominium, & plenissimam securitatem: hoc autem non faciunt statim in aliis casibus, qui objici solent. Hinc 2. non ita positive assistit jus illi, qui alterum in contractu tantum lædit infra dimidium, sed solum ei assistit negative, in quantum læso denegat actionem in judicio ad amputandas lites, relicta interea obligatione in foro conscientiae. 3. Sententia Judicis semper sub hac tacita conditione fertur, si subsistunt allegata & probata: in præscriptione absolute transfertur dominium. 4. Lex Tridentini sess. 25. de Regularibus. solum dicit, Regularem non esse audiendum amplius, qui post quinquennium primum prætendit, professionem suam fuisse invalidam: non autem dicit, contra eum præscribi, aut eum vere Religiosum fieri. Ast leges de præscriptione non tantum dicunt, priorem Dominum non esse audiendum, sed etiam transferri dominium.

Quæres: Quinam sint fines præscriptionis? R. Sunt sequentes: 1. est introducta præscriptio, ne diu incerta sint dominia. L. 1. ff. de Usucapionibus. ibi: *Bono publico introducta est usucapio ne scilicet quarundam rerum diu, & fere semper dominia incerta essent.* 2. Ne lites protraherentur. L. ult. ff. Pro suo. 3. Ne possessores in continuo metu viverent rem possessam amittendi. L. cum notissimi. C. de Præscript. 30. vel 40. annorum. 4. Ne homines in suis juribus, & rebus conservandis negligentes essent. L. Ut perfectius. C. de annali exceptione.

Observandum quoque, quod Præscriptio & Usucapio in re fere Synonyma sint, licet aliqui velint, in rigore inter utramque ostendere aliquas differentias, de quibus videri potest Reiffenstuel in Theol. mor. T. 8. d. 6.

De cætero ad præscriptionem quinque conditiones requiruntur: 1. bona fides: 2. Justus titulus: 3. res talis, quæ potest præscribi, seu præscribi non prohibita: 4. possessio legitima: ac tandem 5. tempus debitum, quo possessio continuatur. Has conditiones indicant antiqui isti versiculi:

*Non usucapies, nisi sint tibi talia quinque;  
Bona fides, justus titulus, res non vitiosa,  
Ut res tradatur, tempus quoque continuetur.*

ubi

347



ubi per *tradatur*, intelligitur *possessio*; siquidem solum ad possessionem recte inchoandam requiritur traditio, vel apprehensio rei, quæ præscribitur. Itaque hæc quinque requisita per sequentes Articulos examinabimus. Sit igitur

## ARTICULUS II.

### *De bona Fide.*

#### §. I.

*An ad Præscriptionem requiratur Fides theologica bona?*

348 **F***ides theologice bona* in genere nihil aliud est, quam dictamen conscientiae, quo quis absolute, & sine dubitatione judicat, se posse licite ita agere, vel non agere. Hinc fides bona in specie, seu illa, quæ ad præscriptionem *positivam* requiritur, est dictamen conscientiae, quo quis invincibiliter judicat, se posse licite rem habere tanquam suam; quamvis interea a parte rei illa res non sit sua, sed alterius. Similiter bona fides requisita ad præscriptionem *privativam* est dictamen absolutum, & indubium conscientiae, quo quis judicat, se licite aliquid non agere, aut omittere, vel licite a se certum onus abjicere.

Hanc autem explicationem fidei theologice bonæ veram esse, inde colligitur, quia communi loquendi modo per bonam fidem nihil aliud intelligere solemus, quam bonum & verum conscientiae dictamen; nam dum dicimus: *bona fide id feci*, *bona fide id omisi*, idem est, ac si dicamus: *bona conscientia id feci*, aut omisi. Accedit, quod capitulum finale *de Præscriptionibus*. necessitatem bonæ fidei ad præscriptionem deducat ex illis verbis Apostoli ad Rom. 14. *Omne autem, quod non est ex fide, peccatum est.* quæ verba D. Pauli Th. Th. omnes intelligant de dictamine conscientiae necessario ad licite agendum. Unde in sensu theologico laudatus textus hunc sensum facit: *Omne, quod non sit secundum verum, & bonum dictamen conscientiae, peccatum, & illicitum est.* de quo plura dicta sunt Tom. III. Ex his

Col-



Colliges 1. Fide mala tunc aliquem agere, quando non agit ex prædicto dictamine conscientiæ, sed ex alio, quod est vel præctice dubium, vel actionem omnino proponit ut illicitam.

Colliges 2. In præscriptione positiva semper debere adesse aliquam ignorantiam invincibilem, qua inculpabiliter ignoratur, quod res, quæ præscribitur, sit aliena; hanc enim ignorantiam invincibilem præsupponit bona fides, & dictamen ultimum conscientiæ: siquidem, si scirem rem esse alienam, non possem absolute, & indubitate judicare. quod eam liceat possidere ut meam.

Cum autem ad præscriptionem non solum requiratur fides theologicæ, sed & civiliter, seu juridice bona: hinc merito quæritur, quid sit *fides civiliter bona*? Et R. quod illa sit, quæ etiam habet conditiones a legibus civilibus requisitas. Et sæpe potest aliquis esse in fide theologicæ bona, quin sit in fide juridice bona: sic, etsi quis bona fide theologica credat, & iudicet, se rem hanc licite possidere ut suam, potest tamen juridice esse in mala fide, si scilicet lis ipsi ab alio moveatur, & contestetur super re illa possessa; etenim per litis contestationem inducitur mala fides juridica, propter præsumptionem juris in contrarium, ut habetur L. 25. *sed etsi*. §. 7. ff. de hæreditatis petitione. ibi: *post litem contestatam omnes incipiunt malæ fidei possessores esse, quin imo post controversiam motam*. Brevissime posset definiri fides theologicæ, & juridice bona tali modo: fides theologica est, quæ a vitio conscientiæ, seu peccato gravi contra iustitiam immunis est: juridica vero est, quæ caret vitio juris, seu quæ non habet impedimentum, aut vitium, vi juris civilis obstantis præscriptioni. H. P.

349

Affero: Bona fides theologicæ talis ad omnem præscriptionem inchoandam, & continuandam est necessaria. Ita omnes defacto. Prob. Cap. fin. de Præscript. ita habet: *Quoniam omne, quod non est ex fide, peccatum est, synodali iudicio definimus, ut nullum valeat absque bona fide præscriptio tam Canonica, quam civilis: cum generaliter sit omni constitutioni, atque consuetudini derogandum, quæ absque mortali peccato non potest observari. Unde oportet, ut, qui præscribit, in nulla temporis parte rei habeat conscientiam alienæ.*

P. Kick Theol. Tom. IV.

T t t

No.

350



Notentur ultima verba, quæ in omni parte temporis, quo currit præscriptio, seu tam ab initio, quam in continuatione ejusdem exigunt bonam fidem, & exclusionem malæ fidei. Accedit Reg. 2. J. in 6. ita habens: *Possessor malæ fidei ullo tempore non præscribit.* Idem dicit cap. *Vigilanti.* 5. de *Præscript.* ubi asseritur: *Nulla antiqua dierum possessio aliquem malæ fidei possessorem juvare.*

Quare patet, per Canones correctum esse jus civile, utpote quod admisit præscriptionem longissimi temporis etiam cum mala fide inchoatam, atque approbavit præscriptionem ordinariam, bona quidem fide inceptam, cui tamen in continuatione supervenit mala fides.

351

Objic. 1. Jus Canonicum irritavit præscriptionem mala fide factam solum pro territorio temporali Papæ proprio, non pro universo Imperio: ergo præscriptio mala fide facta valet adhuc in foro civili extra Territorium temporale Papæ. A. constat ex dictis Tom. III. in Tract. de LL.; nam Papa non potest leges civiles condere extra Territorium suum temporale: ergo. R. N. a. Papa, ut patet ex textu cap. finalis de *Præscript.*, irritat præscriptionem malæ fidei absolute, & pro foro etiam civili, hæcque Pontificia constitutio totum orbem Christianum obligat. Ad prob. n. iterum A. nam quando agitur de peccato, & de periculo animarum, ut contingit in præsentia materia, tunc jurisdictio Papæ etiam in rebus civilibus se ad totum mundum Christianum extendit, ut constat ex cap. 13. de *judiciis*, & dictum est in Tract. de LL.

Objic. 2. Etiam jus Canonicum approbat præscriptionem, cui in continuatione mala fides supervenit: ergo. A. prob. Can. *placuit.* 15. §. *potest.* c. 16. q. 3. ita dicitur: *Bona vero fides* (quæ scilicet ad præscriptionem requiritur) *non ad tractum medii temporis, sed ad initium possessionis refertur; sufficit enim in initio cujuscunque bona fide possidere cœpisse, etiam si medio tempore scientiam rei alienæ habuerit:* ergo. R. N. a. Ille Canon est textus folius Gratiani Monachi, qui juxta leges civiles locutus est, & ideo non est curandus.

Objic.



Objic. 3. Etiam secundum jus Canonicum subditi per actus formaliter peccaminosos, consequenter mala fide factos, possunt præscribere contra legem Superioris, & eam abrogare: ergo etiam juxta jus Canonicum ad præscriptionem non requiritur bona fides. R. N. supposit. Antecedentis, quod hæc sit vera præscriptio, dum subditi continuando actus peccaminosos abrogant legem Superioris; est enim mera consuetudo, quæ, licet aliquid imitetur præscriptionem, eoquod sicut ad præscriptionem, ita & ad consuetudinem requiratur aliquis tractus temporis; in pluribus tamen ab illa differt, & quidem etiam in hoc, quod ad præscriptionem requiratur bona fides, non autem ad consuetudinem, ut dictum est in Tract. de LL.

Adde, quod in præscriptione uni, scilicet præscribenti, acquiratur lucrum, & alteri, contra quem præscribitur, inferatur damnum: unde si quis præscribere cum mala fide, & peccato posset, commodum directe ex suo peccato referret, & injustitia formalis, quam adversus alterum committeret, lucro illo inde reportato foveretur. Verum hoc esset, authoritatem peccatis, & injustitiis præstare, & eas propositis præmiis, & lucris nutrire, ac augere, quod nulla ratione, neque ob boni publici causam cohonestari potest. Aliud est in consuetudine, quæ contra legem introducitur; per eam enim nulli damnum inferatur: non legislatori, cujus lex abrogatur per consuetudinem; nam lex illa, quæ aboletur, non cessat in utilitatem legislatoris, sed Communitatis, cum sit de natura legum, ut respiciant utilitatem communem Reipublicæ, non privatam legislatoris. Minus inde damnificatur Communitas, imo ea potius commodum, & utilitatem sentit, dum ea lex abrogatur, quæ incipit esse inutilis, ac omnino noxia subditorum salutem: qualis certe est, quam major pars Communitatis per longum tempus violat; ad quid enim ejusmodi lex, sic continuo non observata deserviat, nisi ad hoc, ut sit lapis offensionis & ruinæ? Quare merito legislator consentit in ejus abrogationem, & consuetudinem contrariam, seu magis utilem bono communi approbat. De his plura in Tract. de LL.

Objic. 4. Cap. Placuit. 1. de Præscript. Episcopus jurisdictionem in locum, a se ad unitatem fidei conversum præscri-



bit triennio, quamvis sciat, illum alterius Episcopi jurisdictioni subiectum esse: ergo præscriptio procedit cum mala fide; nam certe in mala fide est, qui scit, rem, quam possidet, non esse suam, sed alterius. R. N. c. & suppositum, quod talis Episcopus mala fide laboret; nam ea possessio, & præscriptio, quam jus ipsum cit cap. approbat, & concedit, utique ex rationabili causa, injusta; & malæ fidei esse nequit.

Objic. 5. Cap. *Quoniam frequenter*. seu finali §. in aliis. *Ut lite non contestata*. deciditur, quod Actor, existente reo contumace, missus in possessionem rei petitæ, tandem eam præscribat, etsi sciat, eam esse alienam: ergo sciens, rem, quam possidet, esse alienam, potest eam præscribere. Sed talis est in mala fide, ut constat: ergo. R. 1. legi, & relegi illum solum allegati capituli, nec verbum potui reperire de præscriptione complenda ab actore, qui per judicis decretum est in possessionem missus. R. 2. In illo sivo agitur de aliquo reo contumace, qui dum ab actore in jus vocatur, non vult comparere coram iudice, etsi citetur. Decidit ergo Cap. allegatum cit. sivo, si actor talis actione reali petat a reo aliquam rem tanquam suam, tunc talem actorem, existente reo contumace, debere mitti in possessionem rei petitæ, ut sic *tædio affectus reus veniat responsurus*. Hæc habet capitulum. Jam facile concedo, quod talis actor in possessionem missus, si reus perseveret in contumacia, possit præscriptionem incipere, quia bona fide, utpote autoritate judicis & legum, possessionem adit, & continuat, & quia credit, rem esse suam, & hanc ut suam bona fide apud iudicem vult vindicare. Quare potest negari Anteced.; quia talis non præsumitur scire, rem esse alienam, alias non litigaret bona fide, nec tuta conscientia posset eam judicialiter petere tanquam suam.

Alia plura possent hic objici, quæ tamen inferius explanabuntur, dum agetur de præscriptionibus servitutum, debitorum, actionum: item de ignorantia juris, an ea obsit bonæ fidei, saltem iuridice tali.



## §. II.

An, & quale dubium obfit bonæ fidei, & Præscriptioni?

NOTA 1. Dubium aliud esse *speculativum*, aliud *practicum*: 352  
*Speculativum* ad propositum est, quando animus fluctuat de ipso rei dominio, seu quando Cajus vg. dubitat, num res, quam possidet, sit sua, an aliena: vel quando suspensus manet, an sit solutus, & liber ab aliqua obligatione. Dubium *practicum* est, quando quis fluctuat non solum de rei dominio, vel immunitate ab obligatione, sed insuper etiam de licentia actionis: ut si Petrus suspensus hæret, an hic & nunc licite occupet, retineat, & possideat rem tanquam suam: item an licite, & citra læsionem juris alieni ponat, vel omittat actionem hanc, aut illam.

Nota 2. Sæpe posse dari dubium *speculativum*, quin detur simul *practicum*, stante enim dubio *speculativo* potest per principia reflexa elidi omne dubium *practicum*, & formari dictamen ultimum omnino certum. Sic in exemplo: Petrus bona fide emit a Paulo agrum, huncque ut suum jam tribus integris annis possedit fide optima: modo exoritur dubium, an ager hic antedecenter fuerit Pauli, consequenter an ejus dominium a Paulo fuerit valide translatus in Petrum. Dubium hoc *speculativum* deponere nititur Petrus, sed non potest; quia veritatem certam, omni etiam morali diligentia adhibita, assequi nequit: proinde manet dubium *speculativum* invincibile. Nihilominus potest formari dictamen, ac judicium *practicum* moraliter certum, & sic elidi dubium *practicum*, vg. *In dubio est melior conditio possidentis: atqui ego sum in possessione agri, & non ille alter, qui mecum de dominio agri certat: ergo mea conditio est melior, quam illius alterius, qui mecum de dominio agri certat: ergo ego possum salva conscientia pergere, & possidere agrum tanquam meum, etsi forte ille a parte rei non sit meus.*

Nota 3. Dubium *speculativum* dividi in *negativum*, & *positivum*. Verum hoc utrumque dubium satis est expositum in Tomo III. in Tract. de conscientia. ubi videatur.



Nota 4. Rationes illas, ex quibus dubium negativum exurgit, non debere esse omnino frivolas, & inanes. Hinc, quamvis illæ non sufficiant ad iudicium probabile, debent tamen sufficere ad prudens, ac rationabile dubium; hæsitatio enim illa animi, quæ originem trahit ex vana apprehensione, & inani prorsus ratione, non potest fidem bonam labefactare, sed debet haud aliter, ac alius scrupulus contemni. H. N.

353 **Affero 1.** Dubium practicum supra explicatum obest bonæ fidei tam in inchoatione, quam continuatione præscriptionis, nisi illud deponatur. Est communis DD. P. Ille non habet fidem bonam in inchoanda, & continuanda præscriptione, qui se exponit periculo peccandi contra iustitiam: atqui, qui in inchoatione, vel continuatione præscriptionis laborat dubio practico, ille se exponit periculo peccandi contra iustitiam: ergo talis non habet fidem bonam, adeoque dubium practicum destruit ac impedit fidem bonam. M. Constat ex suo præc. m. patet ex confessione omnium Theologorum, qui eum dicunt fide mala agere, qui se exponit periculo peccandi.

Confirm. Universaliter dictamen ultimum conscientiae, regulans actionem honestam, debet esse immune a dubio practico: atqui bona fides, requisita ad præscriptionem tam inchoandam, quam continuandam, est dictamen ultimum, regulans possessionem rei alienæ tanquam actionem honestam, & iustam: ergo & bona fides, requisita tam ad inchoandam, quam continuandam præscriptionem, debet esse immunis a dubio practico. Ulterior dilucidatio hujus primæ Assertionis ex sequentibus desumi poterit. Quare

354 **Affero 2.** Probabilius dubium speculativum, exortum in initio, vel continuatione possessionis & præscriptionis, non obest, saltem universaliter & regulariter, bonæ fidei. Et hæc conclusio intelligenda est de dubio tam positivo, quam negativo. Quoad dubium superveniens primum præscriptioni jam bona fideceptæ, facile conveniunt DD. nobiscum: quoad illud autem, quod statim initio præscriptionis exoritur, dissentiant fere omnes: nostras tamen partes strenue tuentur etiam quoad hoc punctum Vasquez, Engl, Schmier, Pichler, Holzman.

Prob.



Prob. Cum dubio speculativo tam in continuatione, quam principio possessionis potest sæpe stare iudicium practicum certum de honestate suæ actionis. ergo etiam cum tali dubio potest stare bona fides theologice intellecta, utpote quæ in illo iudicio practice certo consistit; consequenter ejusmodi dubium speculativum, saltem universaliter & regulariter, non obest bonæ fidei.

Ant. prob. 1. ostendendo, quomodo dictamen moraliter certum de honestate actionis possit, & debeat fieri in continuatione præscriptionis, non obstante dubio speculativo. Itaque si quis bona fide cœpit possidere aliquam rem ut suam, & tantum postmodum superveniat aliquod dubium, an res sit aliena, & an licite continuari possit possessio illius, tunc ante omnia debet adhiberi moralis diligentia ad dubium hoc vincendum, indagando in veritatem rei hujus; si enim hæc diligentia omitteretur, tunc maneret dubium vincibile: atqui dubium vincibile in re morali causat conscientiam practice malam, seu dubium practicum de inhonestate actionis, cum quo nunquam licet operari; siquidem operans cum tali dubio se exponeret periculo proximo formaliter peccandi, & consequenter actu peccaret; quia implicite ita esset dispositus, ut etiamsi res hæc sit peccaminosa, tamen eam facere velit; sic enim quasi secum statuit talis dubitans: *Sive hæc res aliena sit, sive non, & sive peccem eam possidendo, sive non peccem, tamen eam possidere pergam.* Adeoque præprimis debet adhiberi ista diligentia moralis ad dubium vincendum, & veritatem inquirendam. Si autem debita diligentia impensa dubium nihilominus manet invincibile, & dubitetur etiamnum, an res ad alium, vel ad possidentem spectet, tunc possessor potest iudicium moraliter certum formare ex principio reflexo, seu ex regula possessoria: *In dubio melior est conditio possidentis: sed ego sum possidens: ergo mea conditio est melior:* consequenter possum præ altero rem hanc possidere ut meam, ut jam in Notandis est dictum.

Prob. 2. idem Antecedens, ostendendo, quod speculative dubitans statim initio præscriptionis possit etiam formare dictamen moraliter certum de licentia actionis, & possessionis inchoandæ; nam posito, quod tale dubium sit invincibile, habet etiam



am incipiens aliqua principia reflexa, ex quibus dictamen certum formare potest de honestate suæ actionis: ergo. A. p. exemplo: Petrus emit equum ab Andrea, & jam statim, dum emit, exoritur dubium seu negativum, seu positivum, an hic equus sit Andreae, & non forte ad alium spectet: consequenter dubitatur, an Petrus possit hunc equum ab Andrea accipere, & incipere ejus possessionem. Jam in hoc, & aliis similibus exemplis habet Petrus pro se principia reflexa, ex quibus potest formare dictamen moraliter certum: ergo. A. prob. Petrus habet principia reflexa, ex quibus potest certo se resolvere, quod Andreas iuste possideat hunc equum, & consequenter quod ipse possit eundem ab Andrea accipere, & sic ejus possessionem iuste incipere: ergo. A. p. i. enim habet Petrus regulam possessionis, & sic ratiocinari potest: *In dubio melior est conditio possidentis: ergo non obstante meo dubio credere debeo, possessorem priorem equi fuisse Dominum: atqui ab eo, quem credere debeo esse Dominum equi, licite equum emo, acceptumque iuste possideo: ergo.*

2. Potest adhibere hoc principium reflexum: *Nemo præsumendus est malus, & malæ fidei possessor, aut vendens rem non suam, nisi clare probetur.* argum. c. fin. de Præsumpt. L. 51. ff. pro Socio. L. 30. C. de Evictionibus. atqui eo ipso, quod invincibiliter dubitem, clare mihi non constat, neque probatur, quod vendens mihi equum sit malus, aut malæ fidei possessor, aut mihi vendat rem non suam: ergo licite ab eo emo equum, & eum possidere incipio.

Pariter, si dubium de inchoanda licite possessione oritur ex eo, quia fluctuas, an contractus fuerit validus, & per consequens, an res vi contractus ejusmodi tradita sit tua, nec ne, tunc te etiam juvare potes ex hoc principio reflexo moraliter certo: *In dubio præsumendum est potius contractum valere, quam non valere:* ergo ex tali contractu licite accipio rem, & illam iuste possidere incipio. Hæc dictamina reflexa, quæ ex Pichlero adduxi, plane ostendunt, quomodo etiam in exordio præscriptionis, non obstante dubio speculativo, possit saltem plerumque, & ordinarie formari dictamen moraliter certum de honestate actionis, & possessionis inchoandæ.

Confirm.



Confirm. Juxta AArios dubium superveniens possessioni, bona fide jam cæptæ, non impedit bonam fidem, aut præscriptionem: ergo neque dubium initio præscriptionis exortum. C. p. ideo dubium superveniens non impedit bonam fidem, quia non obstante illo per principia reflexa potest fieri judicium moraliter certum de honestate actionis: ergo etiam hac ipsa de causa dubium, initio præscriptionis & possessionis exortum, non impedit bonam fidem, quia etiam non obstante illo per principia reflexa potest fieri judicium moraliter certum. Ex quo patet, argumentum continuo in AArios retorqueri posse.

Dixi in conclusione notanter, quod dubium speculativum, initio præscriptionis exortum, non obfit bonæ fidei saltem *regulariter*, & *universaliter*; potest enim casus dari, quo hoc dubium cum bona fide minime posset subsistere, si nempe dubitaretur non solum de proprietate, sed etiam possessione, vg. si in casu adducto dubitaretur a Petro, num venditor Andreas haberet proprietatem, & possessionem equi; si enim possessio equi non esset certa, tunc ex ea non posset certum dictamen deduci, ut de se patet.

Objic. 1. Qui speculative dubitat de rebus fidei, est hæreticus formalis: ergo etiam speculative dubius, an res, quam possidet, sit aliena, etiam formaliter laborat mala fide. R. N. c. & parit. Fides divina debet esse firmissima, adeoque omne, etiam speculativum dubium excludere: ad præscriptionem vero sufficit fides humana minoris firmitatis, quæ proinde non debet omne dubium excludere. Item, qui dubitat de articulo fidei, eo ipso censetur negare vel infallibilitatem Dei revelantis, vel auctoritatem Ecclesiæ proponentis eundem articulum, & sic necessario peccat formaliter peccato hæreseos, utpote quod opponitur infallibilitati Dei, & auctoritati Ecclesiæ.

Objic. 2. Qui vult præscribere, debet indubitate judicare, rem, quam occupat, esse suam, vel eam a se non injuste detineri; atqui dubitans speculative non potest ita indubitate judicare, eo ipso, quod sit dubius, an non possideat alienum: ergo. R. D. M. debet indubitate judicare ex principiis reflexis, & dicam.



Etamine practico c. M. ex principiis directis, & dictamine speculativo n. M. Praescribens, etsi speculative dubitet, potest tamen se practice resolvere ex principio reflexo regulæ possessoriae, vel alio supra indicato, quod hic & nunc liceat, hanc rem ut propriam, & suam possidere.

Objic. 3. Speculative dubitans, si continuat, vel incipit possessionem, exponit se periculo peccandi, & occupandi rem alienam: atqui periculo peccandi non licet se exponere: ergo. R. D. M. exponit se periculo peccandi materialiter c. M. formaliter subd. si ex principiis reflexis non formet dictamen ultimum practice certum c. M. si formet, uti debet formare juxta nostram sententiam n. M. Periculo peccandi materialiter se saepius exponere licet: imo in praescriptione quacumque, quamvis omne dubium etiam speculativum absit, materiale peccatum intervenire debet, quia debet possideri res aliena tanquam sua, quod materiale peccatum est propter ignorantiam invincibilem, quæ si non adesset, omnino peccaretur formaliter.

Objic. 4. Judex in dubio non potest uni determinate adjudicare causam sine injuria alterius: ergo neque homo privatus potest adjudicare sibi rem, de cujus dominio dubitat. R. D. a. non potest adjudicare uni, nisi huic faveat possessio, vel principium reflexum præ altero C. a. secus N. a.

Objic. 5. Conjux, dubitans de valore matrimonii a se contracti, non potest petere debitum: sed hujus ratio alia non est, nisi quia dubitans est in mala fide: ergo dubitans est in mala fide. R. 1. N. M. nam, ut alibi dicitur, ille, qui bona fide contraxit matrimonium, nihil suspicatus de impedimento latente, non privatur jure petendi debitum, etsi post matrimonium jam initum superveniat dubium de ejus valore, dummodo illud dubium sit invincibile, & adhibita diligentia morali deponi nequeat. Nam talis homo se dupliciter resolvere potest: 1. quia est in possessione sui juris, quod habet ex celebrato matrimonio, qua possessione certa ob dubium superveniens non debet spoliari. 2. quia in dubio de valore actus semper præsumi debet, quod talis actus fuerit validus: consequenter & in hoc casu



casu præsumi debet, actum contractus matrimonialis fuisse valide celebratum, non obstante dubio superveniente. Neque obstant huic responsioni cap. *Dominus. 2. de secundis nuptiis. & cap. Inquisitionis tuæ. 44. de sent. excommunic.* nam cap. *Dominus*, loquitur de eo, qui mala fide cum dubio de morte prioris conjugis contraxit matrimonium, sicque non habet possessionem bonæ fidei. in cap. autem *Inquisitionis*. declarat Papa, talem conjugem dubium non posse petere debitum, quia necdum instituerat sufficiens examen de valore matrimonii, adeoque laborabat dubio vincibili.

R. 2. D. M. Conjux dubitans non potest petere debitum, si hoc ei sit prohibitum speciali constitutione c. M. secus n. M. Ast talis constitutio specialis non habetur de præscriptione, ne illa cum dubio speculativo incipiatur, aut continuetur, ubi suppetunt principia reflexa, ex quibus potest formari dictamen conscientie moraliter certum, excludens peccatum formale. Ex his

Deduces 1. Conclusionem nostram etiam procedere in casu, quo dubitans speculative magis & probabilius judicat, rem quam possidet, esse alienam; nam & in hoc casu potest licite talem rem retinere, & præscriptionem inchoare, vel continuare. Ratio est: talis homo habet pro se certam possessionem; atqui possessio certa prævalet omnibus aliis rationibus certo non convincentibus, seu tantum probabilibus, ut recte ait Illfing cum pluribus aliis.

Deduces 2. Speculative dubitantem, an res sit sua, debere prius indagare in veritatem: si autem morali diligentia adhibita non possit vincere dubium, debere formare dictamen practice certum ex regula possessoria, vel alio principio reflexo; hoc enim si fecerit, habebit fidem theologice bonam. Verum occasione hujus ponitur casus non impossibilis.

Cajus possedit aliquo tempore agrum optima fide: occurrit autem postea dubium speculativum, an non ager hic fors sit alienus, & non suus, pro quo dubio deponendo licet omnem moralem diligentiam adhibeat, veritatem tamen invenire



non potest. Infuper ignarus regulæ, & privilegii possessorii, putat erronee, sibi non esse licitum, vel certe practice dubitat, an sibi sit licitum, agrum ulterius possidere: Nihilominus possessionem agri continuat, & sic continuando ob dubium practicum, vel conscientiam erroneam peccat graviter contra justitiam. Quæritur jam, an istud dubium practicum, vel hæc conscientia erronea non impediatur bonam fidem? vel an Cajus, non obstante hoc dubio practico, & conscientia erronea *valide* præscribat? Dixi: *valide*; nam quod illicite agat, & peccet, per se clarum est. Hanc controversiam ut dirimam.

357

Assero 3. Talis conscientia erronea, vel dubium hoc practicum probabilius bonæ fidei obest, & præscriptionem impedit. Lugo, Herincx, Illfing, Antonius Mayr, Mezger, Holzman.

Prob. 1. ex L. *Si fur. 32. §. 1. ff. de Usurpat. & Usucap. ibi: Si quis id, quod possidet, non putat sibi per leges licere usurpare, dicendum est, etsi erret, non procedere tamen ejus Usucapionem, vel quia non bona fide videatur possidere, vel quia in jure erranti non procedat Usucapio.*

Prob. 2. Juxta dicta hoc, & præc. suo requiritur ad præscriptionem talis bona fides, quæ excludit periculum peccandi mortaliter contra justitiam: atqui fides conjuncta cum dubio illo practico, vel cum conscientia erronea, de qua est sermo, non excludit, sed involvit periculum peccandi mortaliter contra justitiam: ergo fides conjuncta cum tali dubio practico non est illa, quæ requiritur ad præscriptionem.

Confirm. ex Cap. fin. de *Præscript.* supra allegato, quod a bona fide periculum peccandi mortaliter contra justitiam penitus abesse vult. Neque jura volunt favere, & præscriptionis privilegium concedere ei, qui possidet illud, quod putat, sibi non licere per Leges possidere.

358

Objic. 1. Cap. fin. de *Præscript.* ille non prohibetur præscribere, qui rei alienæ non habet conscientiam; atqui practice dubius non habet rei alienæ conscientiam, vel scientiam, eo ipso,



ipso, quod tantum dubitet, an res sit aliena: ergo practice dubius non prohibetur præscribere. R. 1. Retorq. argum. Etiam vincibiliter dubius, qui moralem diligentiam non adhibet in inquirenda veritate, non habet conscientiam, & scientiam certam rei alienæ: ergo & talis non prohibetur præscribere. Conf. negabunt omnes AArii.

R. 2. D. M. qui non habet rei alienæ conscientiam certam, vel practice dubiam c. M. solum ille, qui non habet conscientiam certam n. M. Quod autem in cit. Cap. nomine conscientia rei alienæ etiam veniat conscientia practice dubia, inde constat, quia ibi summus Pontifex proscribit omnem conscientiam, quæ est conjuncta cum peccato mortali contra justitiam: sed talis conscientia practice dubia est conjuncta cum periculo peccandi mortaliter contra justitiam; ergo. 2. Dubia notitia in jure etiam interdum pro scientia, vel conscientia sumitur: sic juxta L. Sed et si. 25. ff. de petit. hæredit. §. 7. dicitur, possessorem post motam controversiam cæpisse scire, quod res non sit sua; atqui, quando alicui movetur controversia de re aliqua possessa, non statim scit, eam non esse suam, sed ad summum dubitare incipit: ergo hic dubium sumitur pro scientia, vel conscientia. Idem dic de nostro casu, & de Cap. fin. cit. Quamvis itaque, ut recte advertit Holzman, conscientia dubia secundum se, & directe spectata, non sit proprie dicta conscientia, ea tamen in prædicto Cap. nomine conscientia intelligitur ex intentione legislatoris, juxta quam etiam in materia odiosa, & correctione juris termini sunt accipiendi, cum non debeat intentio verbis, sed verba intentioni deservire. c. 41. de Appellat.

Dices: Juxta S. Augustinum Can. 5. c. 34. q. 2. tamdiu manet aliquis bonæ fidei possessor, quamdiu ignorat, rem possessam esse alienam: atqui practice dubitans ignorat, rem possessam esse alienam: ergo. R. D. M. ignorantia tali, quæ non est conjuncta cum peccato mortali c. M. quæ est conjuncta cum peccato mortali n. M.

Objic. 2. Ex nostra sententia sequeretur, quod etiam aliquis in possessione rei alicujus peccans contra aliam virtutem, quam



quam justitiam, laboraret mala fide, & non præscriberet, sequela videtur nimis dura: ergo. M. p. nam si capitulum fin- de *Præscript.*, quod est nostra probatio, in rigore attendimus, tunc ex illo colligitur, quod omne peccatum mortale contra quamcunque virtutem obfit bonæ fidei, ad præscriptionem requisitæ. R. N. M. Capitulum laudatum, & alia jura, quæ huc faciunt, per se voluerunt obviare peccatis contra justitiam; Constitutiones enim & Leges, quæ bonam fidem in præscribente exigunt, intenderunt tantum impedire, ne homines contra jus, & justitiam mala fide desiderent usurpare, & possidere bona aliena, ob spem ea sic usucapiendi, & sibi appropriandi. Hæc erat intentio primaria illarum ordinationum, de quibus est sermo: ad quam intentionem se per accidens habent peccata contra reliquas virtutes, a justitia distinctas, quæ proinde neque cit. capitulum, neque aliæ Leges voluerunt excludere a præscribente, & ejus fide; non enim Leges intendunt, nec debent omnia excludere, quæ per accidens tantum se habent ad earum intentionem.

Objic. 3. Talis, qui cum dubio practico possidet rem alienam, non peccat contra justitiam: ergo habet adhuc bonam fidem. R. N. a. nam dubitans practice peccat contra eam virtutem, contra quam putat, vel saltem dubitat se peccare. Ratio est: quia aliquis contra eam virtutem delinquit, contra quam peccandi periculo se quis exponit: atqui talis dubitans se exponit periculo peccandi contra justitiam; quia se exponit periculo possidendi, & retinendi rem alienam contra jus, & voluntatem veri Domini: ergo.

Objic. 4. Talis practice dubius lædit tantum justitiam in affectu, non autem effective: ergo adhuc habet bonam fidem requisitam a jure Canonico, utpote quod irritat tantum præscriptionem cum peccato effective tali contra justitiam. R. N. c. nam jus Canonicum irritat præscriptionem omnem, quæ fit cum peccato mortali, sive illud in affectu, sive in effectu consistat. R. 2. N. a. nam talis agit formaliter effective contra justitiam; quia actu, & in effectu cum mala conscientia detinet rem alienam contra jus alterius, qui est Dominus talis rei; non enim



enim ad injuriam effective talem plus requiritur, quam ut mala conscientia, qualis est practice dubia, agam contra jus alterius. Et bene observandum est, quod conscientia practice dubia, quamdiu non deponitur, in hoc puncto idem operetur, ac conscientia certa rei alienæ. Unde sic dubitans, ex hypothesi, quod non possit, aut nolit deponere suum dubium, aut suum errorem in conscientia, tenetur ad restituendam rem alienam sicut alius, qui ex certa scientia rem alienam detinet: quod signum est, quod talis effective lædat justitiam; nam nemo tenetur ad restitutionem ex injusta acceptione, vel damnificatione, nisi effective læserit justitiam.

Ex his deduces 1. ad præscriptionem seu incipiendam, seu 359 continuandam requiri semper fidem *positive* bonam, & non sufficere *negative* bonam; requiritur enim semper judicium positivum, quo indubitate judicatur, rem posse hic & nunc licite possideri &c., & hoc judicium practicum dicitur fides *positive* bona. Non autem sufficit dubium practicum, vel mera ignorantia, qua ignoratur, rem esse alienam, quæ ignorantia, sicut & dubium speculativum, vocari potest fides *negative* bona; nam si dubito, vel ignoro præcise, rem esse alienam, tunc neque habeo fidem positive bonam; quia positive non judico, quod res sit mea; neque habeo fidem positive malam; quia positive non affirmo, rem esse alienam: sed habeo fidem quasi mediam, & negative talem, quæ tamen ad possessionem bonam non sufficit, uti claret ex dictis.

Deduces 2. requiri, ut aliquis sine peccato mortali contra justitiam incipiat, vel continuet possessionem; secus enim esset in mala fide: non autem requiritur, ut nullum peccatum veniale interveniat, ut sentiunt Lugo, Molina, & Antonius Mayr. Ratio est: quia Cap. fin. de Præscript. loquitur solum de peccato mortali. 2. quia esset valde durum, si is præscribere non posset, qui tantum venialem negligentiam admisit in inquirenda veritate &c. 3. quia alias conscientia multis scrupulis implicarentur.

Deduces 3. Si aliquis rem alienam in partes divisibilem possidet secundum unam partem bona fide, secundum alteram mala



mala fide, tunc potest illam præscribere quoad partem bona fide possessam, non autem quoad alteram. Ratio utriusque hujus membri colligitur ex dictis: quia nempe quoad unam partem habet bonam fidem, quæ requiritur ad præscriptionem, non autem quoad alteram. Ita Illfung, & alii apud eundem citt.

Deduces 4. Bonam fidem etiam tunc dari non posse, quando Petrus quidem invincibiliter ignorat, rem esse Antonii, cujus revera est: putat tamen, eam esse Francisci, & non obstante hac sua credulitate, pergit eam malitiose possidere, & detinere tanquam suam. Proinde hæc ignorantia non sufficit, ut possit rem illam præscribere contra Antonium. Ratio est: quia talis homo rem istam mala fide possidet, & possidendo contra justitiam ex conscientia sua erronea peccat: atqui jura tali possessori, qui peccat contra justitiam, nolunt beneficium præscriptionis indulgere.

Quæ de bona fide theologicæ tali adhuc notanda sunt, præfertim in præscriptione privativa, tractabuntur Art. VII.

## §. III.

*De fide juridice bona, prout ea ad præscriptionem requiritur.*

360

NOTA 1. Præscriptionem, ut valeat etiam pro foro conscientie, debere habere conditiones a jure civili requisitas; nam præscriptio ortum suum debet juri civili, a quo proinde & forma, & conditiones honestæ ei poni possunt. Ex quo patet, ad præscriptionem requiri non solum bonam fidem theologicæ talem, quæ excludit omne peccatum mortale contra justitiam, verum & *civiliter*, seu *juridice* talem, seu quæ immunis est ab omni vitio contra leges civiles. Quare

Nota 2. Hic quæri: an aliqua ignorantia obsit fidei *juridice* bonæ? Dixi: aliqua ignorantia; certe enim communis, ac quæcunque ignorantia non repugnat bonæ fidei, & præscriptioni, cum juxta dicta præscriptio positiva necessario supponat aliquam ignorantiam, in qua fundet fidem theologicæ bonam. An autem saltem aliqua, & quænam illa, obsit Usucapioni, modo controvertitur. Pro quo

Nota



Nota 3. Aliam esse ignorantiam *juris*, aliam *facti*: Ignorantia *juris* est, quando ignoratur, quid lege vel jure statutum sit, ut, si ignoras legem, vi cujus pupillus sine consensu Tutoris res suas non potest alienare. Ignorantia *facti* est, quando quidem scis legem, ignoras tamen aliquid, quod in facto consistit: ut, si bene cognoscis, de jure contractum cum pupillo sine consensu Tutoris initum non valere, nescis tamen, quod hic, quocum nunc contrahis, sit pupillus.

Certum modo 1. est, quod ignorantia invincibilis *facti*, saltem *alieni*, non obsit fidei seu theologicæ, seu juridicæ bonæ: & habetur L. 4. ff. de *juris*, & *facti ignorantia*. ibi: *Juris ignorantia in Usucapione negatur prodesse: facti vero ignorantiam prodesse constat*. Accedit, quod in qualibet præscriptione debeat intervenire aliquis error, & ignorantia *facti*, dum aliquis occupat, vel detinet rem ut suam, quæ tamen sua non est: hinc utique putat ex ignorantia & errore, quod valide ad se pervenerit dominium talis rei. Dixi, quod ignorantia *facti alieni* non obsit bonæ fidei: ignorantia autem *facti proprii*, an, & quomodo obsit, vel profit præscriptioni, aperietur inferius.

Certum est 2. Ignorantiam *juris dubii*, de quo Authores inter se adhuc disputant in utramque partem, non obstare præscriptioni. Ita habet Communissima. Nam jus dubium proprie non est jus: cum de ratione *juris* sit, ut sit *manifestum*. Can. 2. d. 4. Remanet ergo quæstio de ignorantia *juris clari*. H. N.

Assero 1. Ignorantia, vel error invincibilis *juris clari* & 361  
certi tollit, saltem regulariter, bonam fidem juridicam, requisitam ad præscriptionem ordinariam, ita, ut hæc nec in foro externo, nec interno valeat. Reiffenstuel, Holzman, cum communi aliorum.

Prob. Fides juridice mala, & præscriptionis ordinariæ impeditiva est, quam leges habent pro mala, & cum qua negant posse præscribi: atqui talis est, quæ conjungitur cum errore, vel ignorantia *juris clari*, & certi: ergo fides, quæ conjungitur cum errore, vel ignorantia *juris clari*, est juridice mala, & præscriptionis ordinariæ impeditiva, saltem regulariter. M.

P. Kick. Theol. Tom. IV.

X x x

est



est certa. m. p. variis legibus. L. 31. principio. ff. de *Usucapionibus*. Nunquam in *Usucapionibus* juris error possessori prodest. & L. 4. ff. de *J. & f. ignorantia*. Juris ignorantia in *Usucapionibus* negatur prodesse, facti vero ignorantiam prodesse constat. atque L. 2. §. 15. ff. *Pro emptore*. exemplum hujus rei affertur his verbis: Quod si scias, pupillum esse, putes tamen, pupillis licere, res suas sine auctoritate Tutoris administrare, non capies usu, quia juris error nulli prodest. Et tandem L. 7. C. de *Agricolis, & Censitis, & Colonis*. *Malæ fidei* possessorem nullus ambigit, qui aliquid contra legum interdicta mercatur. Adeoque ille, qui laborat ignorantia, vel errore circa jus clarum, non præscribit præscriptione ordinaria ob defectum bonæ fidei civilis.

362

Objic. 1. Ignorantia invincibilis juris non est culpabilis: ergo non inducit malam fidem. R. D. a. non est culpabilis theologice C. a. non est culpabilis juridice N. a. Est culpabilis juridice ignorantia juris clari, quia ea laborans ex constitutione, & fictione juris in mala fide constituitur, sicque inhabilis ad præscribendum redditur.

Objic. 2. Leges, quæ annullant præscriptionem cum ignorantia juris manifesti, fundantur in præsumptione malæ fidei, juxta Cap. 82. de *Reg. J.* in 6. Qui contra jura mercatur, præsumitur bonam fidem non habere; atqui, quando ignorantia est invincibilis, cessat præsumptio malæ fidei, saltem pro foro conscientiæ: ergo hæc ignorantia invincibilis saltem pro foro conscientiæ non oberit præscriptioni. R. N. M. Jura enim fingunt, in tali ignorante adesse malam fidem, non præsumunt. Quare to præsumitur in allegato Cap. debet sumi pro fingitur, ut concordet cum aliis legibus.

Ad hanc itaque objectionem rite solvendam. & alia plura, quæ in materia leges concernente occurrunt, intelligenda, sequentia sunt observanda: scilicet 1. quid sit præsumptio. 2. quid fictio. 3. quomodo differant.

Præsumptio igitur juxta Reiffenstuel L. 2. Decret. tit. 23. n. 3. est rationabilis conjectura rei dubiæ, collecta ex argumentis



tis & indiciis, quæ per rerum circumstantias frequenter eveniunt. *Fictio* autem juris est certæ falsitatis pro veritate assumptio ex certa causa, & ad inducendum aliquem juris effectum: sic Canonici legitime absentes, fictione juris sunt præsentés in choro in ordine ad certum effectum, seu fructus percipiendos: quare fructus æque participant, ac si re ipsa personaliter divino officio adstiterint.

Differunt autem in pluribus *præsumptio*, & *fictio* juris. 1. *Præsumptio* juris assumitur ad investigandam veritatem: *fictio* juris autem, etiam cognita falsitate, fingit aliquid adesse, quod a parte rei non est: sicut fingit præsentiam Canoniorum legitime absentium, quæ tamen non est. 2. *Præsumptio*, licet sit juris & de jure, tamen non aliter habet locum in conscientia, quam si veritas subsit: hinc *præsumptio* debet cedere veritati: non autem *fictio* juris; quamvis enim illud, quod fingitur, non subsit, tamen habet in conscientia locum. Ratio hujus est: quia in illis causis, in quibus non constat de veritate, lex quidem subinde aliquid præsumit, & pro veritate habet; interim tamen non intendit aliquid statuere contra naturalem veritatem. Quare si veritas aliunde clarius, quam per *præsumptionem* apparet, tunc *præsumptio* cedit veritati. Accedit, quod *præsumptiones* assumantur in indagandam veritatem: quando ergo clare de hac constat alia via, ad quid istæ *præsumptiones* profunt? Ast vero in *fictione* lex præcognoscit falsitatem: & nihilominus aliquid iusta de causa statuit, & determinat. Quare *fictio* juris est quædam Legis dispositio, fundata super naturali æquitate, quæ proinde in conscientia obligat, non obstante falsitate. Sic in invincibiliter ignorante fingitur mala fides, seu fingitur, studiose non observare Legem claram, ac sibi cognitam, etsi a parte rei optima fide, & conscientia procedat. Et hæc *fictio* contingit ex summe rationabili causa, & ad certum effectum juris, scilicet ad impediendam *præscriptionem*.

Objic. 3. Mulier, quæ emit domum emptione invalida, consequenter cum ignorantia juris, se defendit per *præscriptionem* contra repetentem domum. Cap. *Pervenit ad nos. 4. de empt. & venditione*: ergo cum ignorantia juris potest stare *præscriptio*,

X x x 2

fal-



saltem de jure Canonico, & in foro conscientiae. R. D. a. defendit se per praescriptionem extraordinariam, tricenariam, vel quadragenariam C. a. ordinariam, de quali hic est sermo N. a. Illa mulier, quae se defendit per praescriptionem, domum jam 30. annis bona fide, & iusto titulo possederat, ut textus laudati capituli habet.

Objic. 4. Si usufructuarius, putans erronee, partum ancillae suum esse, eundem vendat, agit contra clarum jus: & tamen emptor, qui ab illo usufructuario emit partum ancillae, potest hunc praescribere. §. 5. *Instit. de Usucap.* ergo error juris non impedit praescriptionem. R. D. c. error juris existens in alio, quam praescribente C. c. existens in ipso praescribente N. c. Error juris tantum obest praescribenti, quando eodem laborat ipse praescribens. Hinc in praefato casu usufructuarius nequit praescribere, utpote errans contra jus clarum: bene autem potest praescribere emptor, in quo talis error non est. Similis responsio datur a Glossa ad cap. *Cura pastoralis. De jure Patronatus.* juxta quod Religiosi possunt praescribere Ecclesias, ipsis a Laicis invalide contra jus concessas: ubi Glossa ita ait: *Potest dici, quod illi, qui Ecclesias receperunt de manu Laicorum, non possunt praescribere; quia contra jura recipiunt: sed eorum successores praescribere possunt, qui nempe Ecclesias istas non receperunt a Laicis, sed illas jam ante receptas bona fide possident, nihil scientes de invalida ista concessione, & receptione.*

363

Dixi in conclusione 1. *saltem regulariter*; volunt enim aliqui excipere Personas illas, in quibus toleratur ignorantia juris manifesti, quales sunt Minorenes, milites, sceminae, ac rustici in iis materiis, in quibus eos judex commiseratione dignos aestimaverit. Putant ergo, his personis, praescribere volentibus, non obesse ignorantiam juris. Verum probabilius est, quod neque his personis profit ignorantia juris, quando per praescriptionem acquirunt; nam ut ait L. *Error. ff. de juris & facti ignorant.* *Juris ignorantia nec sceminis in compendiis* (hoc est, in acquirendo, & lucro captando) prodest. & L. *Juris. ff. eodem, Juris ignorantia non prodest acquirere volentibus, suum vero petentibus non nocet.* Hujus sententiae sunt Reiffenstuel, & Pichler.

Dixi



Dixi 2. *Præſcriptione ordinaria*; nam talis invincibilis ignorantia juris clari non obest præſcriptioni extraordinariæ. Hauld, König, Schmalzgrueber, Pichler, Holzman, & alii ſatis communiter. Ratio hujus eſt: quia ex una parte jus civile non requirit bonam fidem ad præſcriptionem extraordinariam: ex altera parte jus Canonicum tantum correxit leges civiles quoad fidem theologice malam, quæ conjungitur cum peccato mortali coram Deo: non autem correxit eas quoad fidem juridice malam. Hinc talis præſcriptio erit adhuc ſubſiſtens, etſi præſcribens laboret fide juridice mala, & fingatur habere culpam juridicam, quæ eſt negligentia aliqua in addiſcendis legibus civilibus, & poteſt eſſe ſine peccato theologico. Lex 7. C. de *Agricolis*, & *Cenſitis* &c. ſuperius citata, loquitur de præſcriptione ordinaria: proinde vult, quod nunquam liceat præſcribere præſcriptione ordinaria, ſi præſcribens laboret ignorantia juris clari.

§. IV.

*Aliqua quæſita de bona fide.*

QUÆRES 1. An, & quomodo mala fides Authoris no-  
ceat, vel bona profit ſucceſſori? ante Rnem. 364

Nota 1. Per *Authorem* intelligi eum, qui prior poſſedit rem alienam: nomine autem *ſucceſſoris* illum, qui rem ab alio accepit, & poſſeſſionem ejus continuat.

Nota 2. *Succeſſorem* eſſe duplicem: unus eſt *universalis*, qui rem aliquam titulo univerſali poſſidet, & in univerſum jus prioris ſucceſſoris ſuccedit. Talis eſt, qui ſuccedit titulo hæreditatis, etſi præter ipſum ſint alii cohæredes. Alius eſt ſucceſſor *ſingularis*, qui ex titulo particulari vg. emptionis, donationis, legati &c. rem ab alio conſequitur. Igitur tales ſucceſſores particulares ſunt Legatarius, Donatarius, Emptor, item, qui alteri ſuccedit in officio, aut dignitate H. N.

R. 1. Bona fides Authoris prodeſt ſucceſſori tam ſingulari, quam univerſali, ita, ut acceſſione temporis uti, ac conſequen-

X x x 3

ter



ter tempus, quo Author rem bona fide possedit, computare possit cum tempore, quo ipse possidet, & sic complere tempus præscriptionis: ut si Petrus 5. annis bona fide possedit agrum alienum, potest hunc Paulus hæres, aliis 5. annis possidendo, & sic complendo decennium, præscribere. Ratio est, quia Author tradit rem successori cum omni jure, quod ipse habuit: atqui est pars juris, quod Author cepit præscriptionem: ergo.

R. 2. Mala fides Authoris non obest successori singulari: quare successor singularis ab illo tempore, quo rem alienam bona fide possidere cepit, potest præscriptionem incipere, eamque complere tempore ordinario in rebus mobilibus. Pichler, Holzman, König, & alii communiter. L. *an vitium Authoris. ff. de diversis temporalibus præscriptionibus, & de accessionibus possessionum.* Ratio est: quia successor particularis non repræsentat Personam antecessoris, nec fictione juris eadem cum ipso est Persona. Quare licet antecessor, & Author successori singulari communicet omne jus, quod habuit circa rem, non tamen ei communicat vitia personalia, inter quæ est mala fides. Hoc tamen notet talis bonæ fidei successor, quod non possit computare illud tempus, quo Author rem talem mala fide possedit; debet enim præscriptionem a se, & propria possessione incipere.

Ab hac assertionem *de jure communi* excipitur successor in re immobili, cui mala fides Authoris in tantum nocet, ut contra Dominum ignorantem non possit præscribere tempore ordinario, bene tamen extraordinario. scilicet tricennio, seu 30. annis. Novell. 119. cap. 7. & Authent. *Malæ fidei possessore alienante. C. de præscript. longi temporis.* quæ Authentica desumpta est ex cit. Novella, & sic habet: *malæ fidei possessore alienante cessat longi temporis præscriptio, si verus Dominus ignoret suum jus, & alienationem factam. Spectatur ergo triginta annorum defensio &c.*

Verum hæc dispositio Novellæ, & Authenticæ modo allegatæ in Bavaria locum non habet; nam juxta statuta Bavarica Cod. Maximil. p. 2. c. 4. §. 10. successori mala fides antecessoris, *und zwar ohne Unterschied* inter successorem universalem, & particularem *nicht mehr schadet, dafern er Successor nur seines Orts*  
jeder-



*jederzeit in bona fide sich befunden hat.* An autem in Bavaria hoc etiam procedat, quando agitur de hypotheca extinguenda, nolo decidere. Videantur Pichler L. 2. Decret. tit. 37. ad finem. Clariss. D. Rath de Usucapionibus, & praescriptionibus. c. 2. thesi 53. Videantur & alii rerum Bavaricarum periti.

R. 3. Mala fides Authoris de jure communi nocet successori universali immediato, ita, ut talis successor, licet sit ipse in optima fide, a se tamen praescriptionem ordinariam inchoare non valeat: minus talis potest computare tempus, quo Author mala fide rem illam possedit. Communis, loquendo de jure communi, cui contrarium est jus Bavaricum. P. ex §. 12. Instit. de Usucap. & longi temporis praescript. & L. 11. ff. de diversis temporalibus praescriptionibus, Ratio est: haeres & successor universalis repraesentat personam antecessoris, & cum hoc fictione juris est persona unica: ergo si antecessor habuit malam fidem, tunc & successor universalis censetur talem malam fidem habere fictione juris; fingunt enim jura, possessionem haeredis initium capere ab illo puncto, & cum illa fide, qua defunctus cepit possidere; namque possessio defuncti censetur eadem cum possessione haeredis. L. 11. C. de acquirend. vel amittend. possess.

Dixi in hac Rne. 1. quod talis successor non possit praescribere praescriptione ordinaria, seu longi temporis; non enim defunt, qui satis probabiliter cum König, Pichler, Holzman, & aliis apud Clarissimum D. Antonium Hermanum Chlingensperger in differentiis inter jus commune, & Bavaricum citatis docent, quod ejusmodi successor universalis, non obstante mala fide Authoris, possit praescribere praescriptione extraordinaria, seu longissimi temporis, id est, 30., vel 40. annorum. Rationem dant: quia praescriptio longissimi temporis juxta jus civile potest inchoari cum vera mala fide: ergo ea etiam a fortiori poterit inchoari cum ficta mala fide: atqui talis haeres habet tantum fictam malam fidem: ergo.

Neque dicas: in hoc puncto correctum esse jus civile per Canonicum. Nam contra est: Jus civile solum correctum est per Canones quoad malam fidem vere, & theologice talem, quae cum



cum peccato gravi conjuncta est; tota enim ratio, cur Ecclesia Leges civiles in hoc puncto emendarit, erat, quia illæ sine animæ dispendio, & gravi peccato observari non poterant. Ubi vero est ficta mala fides, nullum est peccatum theologicum in possidendo, vel retinendo: ergo quoad hanc malam fidem non est correctum jus civile. Hæc tamen limitatio responsionis hujus meæ tertiæ est pariter contra insignes Juristas apud laudatum D. Chlingensperger t. 9. art. 7. videndos, uti & contra nostrum Reiffenstuel L. 2. Decret. t. 26. de præscript. n. 137. ubi assignat pro se hanc sortem rationem: Hæres succedit in jus defuncti, imo omne jus suum causatur a defuncto: ergo sicut defunctus talem rem potuit nullo tempore, etiam longissimo, præscribere, ita nec hæres ejus. Accedit, quod hæres etiam de jure Canonico repræsentet personam defuncti, quæ repræsentatio, simulque mala fides non extinguitur spatio triginta annorum.

Dixi 2. Mala fides Authoris nocet successori universali immediato; hæredi enim mediato, seu hæredi hæredis (saltem si non sit hæres *suus*) non videtur mala fides primi Authoris obesse. Ita probabiliter Haunold, Molina, Lessius, Schmalzgrueber, Pichler, Holzman contra non paucos alios. Ratio est: quia hæres hæredis non est defuncti primi hæres: ergo non nocet tali hæredi remoto, & mediato primi defuncti, & Authoris mala fides. 2. Duplex fictio in eadem causa in jure non datur, & ficta fides mala successoris immediati non causat fictam fidem malam in mediato successore, sicut umbra non causat umbram. Ita Pichler: putat tamen Reiffenstuel, Holzman, cum Lessio, ac aliis, quod hæredi *suo* etiam mediato obsit fides mala primi Authoris. Verum, quantum ego judico, tota hæc limitatio de hærede, & successore mediato est plena dubiis, neque aliquid certi asseri potest: hinc & eam ut dubiam tantum volo propositam. Qui plura de hoc puncto desiderat, consulat Authores cit., & inter alios Haunold tom. I. de Just. t. 5. c. 2. n. 244., ac P. Illfing. t. 4. d. 2. q. 5. n. 307. Quid sit de jure Bavarico, jam est dictum.

Possit etiam nostra assertio limitari 3., si successor universalis rem ab antecessore mala fide possessam, adhuc possideat alio



alio titulo, quam hæreditatis, vg. titulo empti, vel donati &c. puta, si defunctus ante mortem suo futuro hæredi vendidit, aut donavit rem alienam, quam hæres bona fide accepit, atque possedit; tunc enim eam præscribere potest, præscriptionem a se inchoando. L. 5. §. 1. ff. de diversis temporal. præscript. Covarruvias, Pirrhing, Reiffenstuel, Holzman, & alii.

Quæres 2. An mala fides Tutoris obsit Pupillo, supposito, quod pupillus sit in bona fide? R. negative. Engl, Pichler, & alii. Ratio est 1., quia juxta Engl negativa hæc sententia est communius recepta inter DD. 2. Videtur hæc sententia colligi ex L. 198. ff. de R. J. 3. Tutor est administrator, & defensor pupilli: ergo non videtur posse facere causam pupilli deteriorem. Idem judicat Engl, esse dicendum de Procuratore, quod scilicet fides ejus non noceat Domino. Verum de hoc quaesito videantur Juristæ. 365


Quæres 3. An mala fides Prælati obsit Ecclesiæ? R. cum Schmalzgrueber sub distinctione: Vel res, de cujus præscriptione agitur, communiter possidetur a Prælato, & Capitulo, vel non? si primum: tunc non præscribitur, si Prælatus sit in mala fide. Ratio est: quia lex præscriptionis est odiosa, & ideo restringi debet, ita, ut propter malam fidem unius partis destruat etiam bona fides partis alterius. Si secundum: tunc illa pars rei, quæ bona fide a Capitulo possidetur, præscribetur, non autem altera, quam Prælatus mala fide detinet. Sequitur ex dictis. 366

Quæres 4. An mala fides antecessoris in dignitate, officio, vel beneficio noceat suo successori? R. cum Reiffenstuel, Engl, Holzman, & aliis negative, dummodo præscriptionem a se incipiat, & non computet tempus, quo mala fide suus antecessor rem illam possedit. Ratio est: quia talis non repræsentat personam sui antecessoris, nec dignitatem jure sui antecessoris, sicut hæres aliquis possidet, sed habet specialem titulum collationis sibi proprium: ergo non est ratio, cur tali debeat nocere mala fides antecessoris. 367

Quæres 5. An mala fides antecessorum Provinciæ, Civitatis, aut alterius Communitatis noxia sit successoribus, ita, ut 368  
P. Kick Theol. Tom. IV. Yyy hi



Denique bona fides a præscribente regulariter nec allegari, nec probari debet; nam bona fides in dubio semper præsumitur adesse, cum a jure quilibet præsumatur bonus, nisi probetur malus. Dixi: *regulariter* probari non debet; sunt enim aliqui casus apud Pichler, & alios videndi, in quibus bona fides etiam probari debet ab illo, qui prætendit præscriptionem.



*De possessione requisita ad Præscriptionem.*

§. I.

Explicantur natura, & proprietates possessionis.

369 **N**OTA I. Nomen possessionis a variis varie derivari. Alii illud desumunt a *positione pedum*, aliqui a *positione sedium*, vel a *posse sedere* id deducunt. Et quidem ultimæ acceptioni favet germanicum vocabulum *Besitzung*. Verum quidquid sit de derivatione hac, certum est, notitiam possessionis summe esse necessariam Theologo, quia sine ea multæ quæstiones, materiam restitutionis & iustitiæ tangentes resolvi nequeunt: est autem &



& summe difficilis notitia hæc ob leges, & jurisconsultos de ista materia diversimode loquentes.

Nota 2. Aliquam possessionem esse *impropriam*, quæ datur tunc, quando aliquis rem detinet affectu, & nomine qualicumque: seu quando quis rem possidet non nomine proprio, nec cum animo aut affectu eam habendi ut suam: sic Depositarius possidet rem apud se depositam, Commodatarius rem commodatam, usufructuarius rem concessam in usumfructum, Procurator, & Administrator rem suæ administrationi creditam &c. Ratio est: quia hi omnes (posito, quod velint esse fideles) debent rem sibi commissam possidere nomine alieno, & sine affectu eam sibi appropriandi, vel habendi tanquam suam. Idem dic de aliis similibus, rem alienam alieno nomine detinentibus, ut de Inquilino &c. &c. De hac possessione impropria non quaeritur, sed de proprie dicta, quæ est *detentio rei cum animo, seu affectu eam habendi ut suam.* per L. 1. §. 3. & 20. L. 3. §. 3. & L. 44. §. ult. ff. de acquirenda, vel amittenda possessione. Consentit jus Bavaricum Cod. Maximil. p. 2. c. 5. Verum, ut natura proprie dictæ possessionis magis discernatur.

Nota 3. Possessionem adhuc tripliciter posse accipi: 1. pro effectu, seu jure, quod oritur ex possessione proprie tali, & vocari potest *possessio juris*, constituitque aliquam speciem juris realis. Definitor autem, quod sit jus reale rem sibi detinendi, commodisque inde provenientibus fruendi. 2. accipitur pro objecto possessionis, seu pro rebus possessis, præsertim immobilibus. In hoc sensu dicitur: *Isle homo habet multas possessiones*, id est, habet multa bona immobilia: imo solet possessio etiam interdum sumi pro ipsa proprietate, vel dominio. L. 78. ff. de V. S. 3. sumitur formaliter, ac pressè ad propositum pro ipsa detentione, & insistentia rei. Et hæc dici potest *possessio facti*; quia idem importat ac factum, actus, & exercitium possessionis, & detentionis rei alicujus. Atque in hac ultima acceptione pertractando possessionem.

Affero 1. Possessio facti in genere recte definitur, quod sit *detentio rei, corporis, animi & juris adminiculo concurrente.* Ita 370



Communis: quæ definitio hunc sensum facit: possessio est detentio rei tanquam suæ, & non prohibita possideri.

Dicitur in hac definitione 1. *detentio*, vel *insistentia*, quæ actum aliquem, & factum, non autem jus dicit. Hinc communiter rejicitur definitio Bartoli, qua describit possessionem esse *jus insistenti*, vel *detinendi*.

Dicitur 2. *Rei*, seu corporalis, seu incorporalis; nam utriusque sicut dominium, sic & possessio datur. Est quidem verum, quod detentio rerum corporalium vocetur *vera possessio*, & insistentia rerum incorporearum, vg. jurium, de rigore juris dicatur *quasi possessio*, *ein Nebenbesitzung*: nihilominus hoc discrimen in praxi non adeo observatur, & etiam incorporea, uti jus decimandi, venandi, servitutes, ac alia jura dicuntur possideri absque addito *quasi*. Adde, quod utraque possessio scilicet rerum corporearum, & incorporearum eisdem habeat effectus. Hoc solum adverte, quod possessio rerum incorporearum non tam in detentione, quam ipso usu & exercitio talium jurium, & rerum consistat.

Dicitur 3. *Corporis, animi & juris adminiculo*. Quare ad veram possessionem requiritur 1., ut quis rem possidendam modo quodam corporali apprehendat, id est, manibus, oculis, pedibus, aut alio modo a jure constituto. 2. Non sufficit sola apprehensio corporalis, sed insuper debet adesse intentio, ac voluntas ejusmodi rem detinendi, ac apprehendendi ut suam, suo nomine, ac cum affectu eam sibi habendi, ac de ea haud aliter disponendi, ac si esset sua, quod indicatur per *animi adminiculum*; si enim sola apprehensio, vel insistentia corporalis (quam Juristæ *possessionem asininam* vocant) sufficeret ad juridicam possessionem, tunc quicumque rem aliquam alterius apprehenderet, aut per eam pedibus incederet, statim ejus possessionem vere talem acquireret. 3. Præter duas dictas condiciones requiritur quoque *juris adminiculum*: per quod intelligitur, quod jus positive non debeat resistere possidenti; non raro enim jus inhibet detentionem alicujus rei, reddens illam inefficacem ad consequendos effectus juridicos possessionis. Sic inhabilitantur

Lai-



Laici ad possessionem rei sacrae, homo privatus ad possidendas vias publicas, & alia bona communia.

Non tamen per has particulas: *Corporis, animi, & juris adminiculo* requiritur 1. ad continuandam possessionem corporalis apprehensio, vel praesentia, sed haec solum est necessaria ad inceptionem possessionis; alioquin, si aliquis ab agro legitime apprehenso, & possessio ad tempus discederet, & ei praesens non esset, possessionem ejus perderet, quod est inconveniens. Quare possessio corporaliter cepta potest postmodum continuari sola animi detentione.

Nec requiritur 2. ad inchoandam etiam possessionem, ut omnes partes rei possessae corporaliter apprehendantur: sed sufficit, si pars ejus apprehendatur: vg. sufficit, si ille, qui vult possessionem domus capere, eandem intret.

Nec requiritur semper 3., ut possessor in propria persona possessionem accipiat, aut continuat; poterit enim hanc acquirere, aut conservare per Procuratorem, Colonum, servum, filium &c. per legem generaliter. ff. de acquirenda possessione. ibi: *Quisquis nostro nomine nobis volentibus sit in possessione, veluti procurator, amicus, hospes, nos possidere videmur.*

Nec requiritur 4., ut possessor praeter intentionem rem detinendi ut suam habeat credulitatem, qua judicet, rem, quam detinet, esse suam. Ratio est, quia etiam fur rem furtivam, quam scit, non esse suam, potest possidere *juridice*, seu tali possessione, quae parit aliquos effectus juridicos.

Igitur per *animi adminiculum* intelligitur talis intentio, qua possessor vult ita disponere de re, ac si ea esset sua, & quoad externam apparentiam saltem ita intendit se gerere, ac si esset Dominus talis rei: prout & fures, ac alii in mala fide constituti possessorum solent facere, quamvis probe sciant, se non esse Dominos rerum furtivarum, & inique possessorum.

Nec vi illius particulae: *juris adminiculo*, requiritur 5., ut semper adsit justus possidendi titulus, aut quod possessio debe-



at a jure approbati positive: sed sufficit, quod ei jus non resistat modo superius explicato.

371

Affero 2. Possessio dividitur varie: 1. quidem in *naturalem*, *civilem*, & *mixtam*. Sicut autem omnes Juristæ & Theologi in hanc divisionem consentiunt, ita sunt summe diversi in explicando, quid sit possessio civilis, & naturalis. Tres afferam diversas similes explicationes, meo judicio vel necessarias, vel utiles, ut Authores de hac re loquentes possint intelligi. Igitur juxta alios possessio *mere naturalis* est, quando quis rem possideri non prohibitam, detinet quidem corporis & animi adminiculo, alius tamen ejusdem rei possessionem civilem retinet. Ita quoad rem Mezger, Schmalzgrueber, & alii plures. Possessio *mere civilis* est, quando quis rem antecederet naturaliter, & corpore possidam, nunc solo animo possidere pergit. *Civilis*, & *naturalis simul* est in re, quæ corpore & animo simul detinetur, nullo alio civilem ejus possessionem habente. Exemplo rem declaro: Sempronius negotiorum causa egreditur terminos fundi sui, quem naturaliter, & civiliter possidebat, & neminem interea custodem relinquit, adeoque naturaliter seu corporaliter fundum nec per se: nec per alium detinet: bene autem eum adhuc possidet civiliter, quia censetur animum habere illum retinendi. Interea Paulus fundum illum Sempronii malitiose occupat, & censetur eum possidere tantum naturaliter, quamdiu Sempronius intentionem recuperandi agrum prædictum non deponit, & quamdiu media opportuna, & efficacia adhibet ad expellendum Paulum a possessione naturali cæpta. Quodsi autem Sempronius despondeat animum fundum suum recuperandi, nec adhibeat media ad expellendum Paulum, aut iis adhibitis nihil possit proficere contra eundem, tunc Paulus mox incipit esse possessor non solum naturalis, sed & civilis, & per consequens Sempronius perdit etiam possessionem civilem. Ex quo

372

Colliges 1., quod eadem res a duobus possit simul possideri, ab uno naturaliter, ab alio civiliter: non autem potest eadem res a duobus possideri sub eadem ratione, vg. ab utroque civiliter. Ratio hujus colligitur ex dictis.



Colliges 2. Possessionem mixtam esse perfectissimam, civilem esse perfectiorem naturali: proinde naturalem esse omnium imperfectissimam.

Pichler, ac Holzman aliter explicant prædictam divisionem, & ajunt, possessionem *civilem* esse, quando aliquis possidet rem cum opinione dominii, seu quando possessor credit, ac judicat, se esse Dominum rei possessæ. Possessionem *mere naturalem* esse dicunt, quando aliquis rem quidem possidet, & detinet ut suam, sed sine opinione dominii: prout fur detinet rem furtivam, ac de ea disponit eo modo, quasi esset sua, non autem judicat interne, eam esse suam, eoquod sciat, illam ad alium spectare.

P. Antonius Mayr dicit, possessionem *mere naturalem* tunc dari, quando quis naturali, seu reali detentione per se ipsum corporis, animi ac juris adminiculo possidet, sive deinde juste, sive injuste, sive bona, sive mala fide. *Mere civilis* possessio datur, quando quis rem non realiter, sed moraliter, seu in æstimatione civili, & juridica possidet: ut, si rem possidet per alium, vel si etiam per neminem possidet, tamen prius cæptam possessionem animo, & juris adminiculo retinet. Sic juxta cit. Authorem quilibet civis possidet hortos, vel agros suos extra civitatem existentes. *Mixta* possessio est, quando quis naturali detentione, & simul in morali æstimatione hominum rem detinet: & sic civis possidet domum, quam inhabitat. Ita laudatus Doctor.

Ultra civilem, naturalem & mixtam possessionem alicubi etiam datur *civilissima*, quæ nimirum acquiritur sine ulla vel vera, vel ficta apprehensione, imo etiam absque animo possidendi: quia ex mera civilitate, & benignitate alicujus statuti, vel legis sine aliis adminiculis corporis & animi, alias de jure communi requisitis, confertur. Sic in aliquibus regionibus fideicommissa, & Majoratus, vel bona hæreditatis post mortem defuncti statim transeunt ad hæredem, etiam ignarum, & ab hoc censentur possideri, quamvis ea jam alteri essent tradita.

Dividitur possessio 2. in *justam*. & *injustam*. *Justa* est, quæ ex legitimo, & justo titulo acquiritur: *injusta* est, quæ tali titulo destituitur.



3. Dividitur in possessionem *bonæ & malæ fidei*: Possessio *bonæ fidei* est, quando possidens judicat, se possidere rem legitime, ac suam possessionem non esse difformem legibus. Possessio *malæ fidei* est, quando detinens rem scit, eam esse alienam, vel saltem putat, se eam illicite, ac contra leges possidere.

Neque hæc divisio est confundenda cum priore; potest enim aliquis rem aliquam bona fide theologicè tali possidere, quin eam juxta possideat: ut si quis erroneè putet, rem esse suam, vel eam esse acquisitam justo titulo, cum tamen talis titulus non intervenierit. Item malæ fidei possessio potest esse justa: ut si quis erroneè existimet, rem a se possessam esse alienam, & sic eam a se illicite detineri, cum tamen ea justo titulo sit acquisita.

Denique nota, possessionem *vacuam* juxta Pichlerum tunc dari, quando res a nemine detinetur vel corpore, vel animo tantum, vel utroque modo, nec aliquis in ejus possessione est. Hinc possessio *non vacua* est, quando aliquis talis rei possessionem habet, sive corpore, sive animo, sive utroque modo, aut etiam tantum civilissime possideat. Ex dictis.

Colliges, multum inter se differre dominium, & possessionem rei, & hanc sine illo, uti & illud sine hac posse existere. Sic fur potest juridicè in ordine ad certos effectus juris possidere rem furtivam, & tamen non est ejus Dominus: imo aliquis potest bona fide rem aliquam, cujus non est Dominus, tam naturaliter, quam civiliter detinere, & possidere. Quare etiam acquisitio possessionis distinguitur ab acquisitione domini; sunt enim jura diversa & separabilia, quæ diversos effectus & actiones juris pariunt, atque quando agitur de dominio & proprietate rei, tunc dicitur aliquis agere *in petitorio*: si aliquis litigat de possessione, tunc dicitur agere *in possessorio*. Ex quibus.

Colliges ulterius, acquisita possessione rei, idcirco non statim acquiri dominium ejus, neque amissa possessione, necessario simul perdi dominium: sicut & acquisito dominio, non eo ipso possessio acquiritur, quod amplius ex dicendis patebit.

Asser-



373  
 Affero 3. Possessionis sunt varia commoda, ac privilegia:  
 1. Bonæ fidei possessor rei alienæ potest eam præscribere.  
 2. In dubio, quisnam sit Dominus, melior est conditio possessoris.  
 3. Possessor in judicio petitorio pro Domino habetur, & probationis onere sublevatur, quod onus incumbit ei, qui possessori litem movet, qui etiam causa cadit, nisi aut dominium suum, aut possessoris injustam possessionem manifeste probet. §. *Commodum. Instit. de Interdictis. cap. sæpe de Restit. spoliatorum. L. fin. cap. de rei Vindicat.*  
 4. Possessio parit præsumptionem bonæ fidei, quamdiu non probatur mala fides.  
 5. Tribuit jus administrandi rem possessam, dum pendet lis.  
 6. Obligat judicem ad manutenendum possessorem in possessione, dum durat lis mota.  
 7. Facit potestatem, ut possessor invasus possit vim vi repellere, & possessione dejectus in continenti repetere possessionem, etiam armis.  
 8. Privilegium, quod in præjudicium possessoris est impetratum, est nullum, & subreptitium, nisi in eo expresse derogetur possessioni.  
 9. Dat actionem realem, quæ *Publiciana* vocatur, vi cujus potest quis vindicare rem possessam sibi ablatam adversus quemcunque possessorem, excepto vero Domino, & eo, qui cum titulo possidet.  
 10. Possessio immemorialis supplet omnes præsumptos defectus vitiositatis, & nullitatis, nec patitur inquisitionem de titulo. Mezger, Haunoldus, ac alii, præsertim JCTi, & Canonistæ.

374  
 Quæres 1. Quomodo possessio rerum corporearum acquiratur? R. 1. Acquiritur vel apprehensione vera, vel ficta, vel constitutione legis.

R. 2. Apprehensio vera fit, rem vel manibus apprehendendo, vel pedibus eidem insistendo: si sit mobilis, tunc eam apprehendimus manibus: si sit immobilis, tunc eidem solemus pedibus insistere, ut possessionem *veram* capiamus.

R. 3. Quatuor casibus potissimum necessaria est apprehensio vera: 1. requiritur ad capiendam possessionem illorum bonorum, quæ Domino carent, & fiunt primo occupantis, veluti feræ, thesauri, res derelictæ &c. 2. Si depositarius vi, vel clam (quamvis illicite) vult capere possessionem rei apud se deposti-



tæ, debet illam contrectare, ac loco movere cum animo eam habendi ut suam. 3. Requiritur vera corporalis apprehensio bonorum hæreditariorum, & a defuncto relictorum; hæc enim Domino carent, a quo tradantur. Ut ergo aliquis incipiat ea possidere, debet illa vere apprehendere. 4. Si alius possidens nolit tibi possessionem rei reddere, tunc etiam debes illam apprehendere. Intellige hæc sub conditione, nisi apprehensionem veram Magistratus suppleat; hujus enim autoritate aliquis possessionem adipisci potest sine vera apprehensione, etiam in iis casibus, in quibus alias vera realis apprehensio necessaria foret.

R. 4. Apprehensio *ficta* est, quando nec manibus, nec pedibus res aliqua apprehenditur, intervenit tamen alius actus, qui ex dispositione juris veræ, & reali apprehensioni æquivalet, & illius vim obtinet. Varie fieri potest: ut 1. traditione clavium ad eum locum, quo res in contractum deductæ servantur, vg. oleum, vinum, frumentum. 2. per visum L. *quod meo*. 18. §. *Si venditorem* 2. ff. *de acquir. vel amitt. possessione*. ibi: *Si vicinum mihi fundum mercato venditor in mea turre demonstrat, vacuamque se possessionem tradere dicat, non minus possidere cæpi, quam si pedes finibus intulisset*. 3. Per traditionem *Scripturæ*, seu *Instrumenti*, quo pristini possessoris jus continetur; censetur enim talis Scriptura rem ipsam, seu mobilis, seu immobilis illa sit, continere, ita, ut cum Scriptura talis res tradita videatur L. *Emptionem*. C. *de donat*. 4. Per appositionem custodiæ ab illo, ad quem res transfertur. 5. Si ab illo, ad quem res transfertur, obsignetur per se, vel alium. 6. per *clausulam constituti*, hoc est, cum antiquus possessor facto contractu constituit se possessorem nomine illius, cui rem alienat. 7. per appositionem *brevis manus*, si scilicet aliquis rem suam, tibi prius commodatam, locatam, aut apud te depositam, postea tibi vendit, tunc enim rem talem, quam improprie, & nomine alterius possedisti, incipis proprie, & nomine proprio possidere. 8. Si is, qui rem tibi alienat, servat sibi usumfructum, tunc censetur illam statim possidere. L. *Quisquis*. C. *de Donat*.

R. 5. Legis dispositione acquirit aliquis possessionem, quando vi alicujus statuti sine vera, aut ficta apprehensione, imo sine animi adminiculo, aliquis possessor constituitur, seu quando datur possessio civilissima, de qua supra.

Quæ-



Quæres 2. Quomodo acquiratur possessio rerum incorporali- 375  
 ralium, vg. jurium, & servitutum?

R. Possessio jurium, quæ non inhærent rebus corporali-  
 bus, uti vg. jus eligendi, acquiritur per unum, vel plures ac-  
 tus non meræ facultatis; exercitos cum animo acquirendi pos-  
 sessionem, & cum opinione, qua credis, te uti jure tuo, scien-  
 te, & patiente illo, cujus est permittere, vel prohibere istos  
 actus. Ita Pichler L. 2. Decret. t. 12. n. 7. Quare tres con-  
 ditiones ad comparandam talem possessionem sunt necessariae. 1.  
 ut ille, qui exercet aliquem actum alicujus juris, vg. eligendi,  
 venandi &c. intendat, & credat, se uti jure suo. 2. ut exer-  
 ceat tales actus sciente, & permittente possessore antiquo, sive  
 illo, cujus interest talibus actibus resistere. 3. Ut non possit  
 præsumi, quod ejusmodi actus, & usus juris fuerit concessus  
 ex gratia & liberalitate primi possessoris, consequenter quod hic  
 usus non sit actus meræ facultatis. Hinc juxta Molinam aliquan-  
 do ad comparandam possessionem alicujus juris unus actus suffi-  
 cit, aliquando plures requiruntur: unus sufficit, si sit talis na-  
 turæ, ut prudentum judicio non soleat concedi ex gratia: qua-  
 lis est actus electionis Canonice: plures autem actus requirun-  
 tur ad obtinendam possessionem servitutis itineris per alienum fun-  
 dum, quia ejusmodi iter sæpe concedi solet ex gratia.

Observat etiam P. Pichler, quod possessio jurium, quæ  
 inhærent rebus corporalibus, qualia sunt *servitutes*, acquiri va-  
 leat non solum per usum, & actus modo prædicto exercitos:  
 verum etiam sine ullo usu per solam introductionem in fundum,  
 in quem te alter inducit cum animo dandi tibi possessionem ser-  
 vitutis, & tu ingrederis cum intentione hanc possessionem ca-  
 piendi. Hac de causa in Rne ad quæsitum dixi: *Possessio jurium,*  
*quæ rebus corporalibus non inhærent.* Rursus servitutis negativæ  
 possessio comparatur per prohibitionem solam, vg. prohibes, ne  
 alter altius tollat suum ædificium: si hic acquiescit prohibitio-  
 ni tuæ, obtinuisti possessionem servitutis negativæ *altius non tol-*  
*lendi.* Plura de hac re inferius.

Quæres 3. Quomodo possessio iterum amittatur? Est au- 376  
 tem



tem hlc quæstio de amissione totali omnis possessionis, etiam civilis.

R. 1. Possessio rerum corporearum immobilium amittitur sequentibus modis. 1. Si quis relinquit rem animo, & corpore simul. 2. Si solo animo exterius manifestato. 3. Si aliquis rem nescit esse suam, eamque inter bona sua non amplius reputat: quare & oblivione longa perit possessio, cum tunc desit animus possidendi. 4. Si possessor novit, rem esse ab alio occupatam, negligit tamen eam recuperare. 5. Si aliquis longo tempore (quale juxta Schmalzgruber est decennium) a re sua abest, neque ei per se, neque per alium suo nomine insistit, neque protestatur, quod ita absens nolit derelinquere possessionem. 6. Si redux statim quidem repetit rem suam ab occupante: verum ab hoc repulsus, non audet ei resistere: vel timens repulsam, nequidem audet petere possessionem. Ita P. Pichler citatus. Ratio est: quia in his omnibus casibus censetur non amplius adesse animus possidendi, sine quo nulla possessio datur.

R. 2. Possessio rerum incorporearum, vg. jurium, deperditur vel per expressam, vel tacitam voluntatem deferendi possessionem, vel per negligentiam in utendo jure, aut longam absentiam, aut tolerantiam repulsæ: ut iterum loquitur P. Pichler.

R. 3. Possessio rerum corporearum mobilium deperditur 1. per animum non amplius possidendi. 2. per amissionem rei, vg. gemmæ, annuli &c. ita, ut quis non amplius sciat, ubi sit, nec eam amplius in rebus suis habeat: non autem censentur res illæ amissæ, quæ adhuc sunt in ipsius Domini custodia, vg. in ædibus ejus, etsi ignoretur, ubi sint. 3. Per fraudem Depositarii; ut si iste rem depositam loco moveat, & contrectet furandi causa, & ex intentione eam habendi ut suam. 4. Per furtum & rapinam; ut si tibi aliquis, qui sub potestate tua non est, furetur aliquid, tunc rei furto subductæ deperdis possessionem. 5. Per traditionem, etsi rem tuam tradas illi, qui possessionis non est capax, dummodo habeas animum abdicandi a te possessionem. 6. Si fugiat animal non domesticum, quod reverendi consuetudinem non habet, tunc perdis illius possessionem. Ita iterum P. Pichler, & alii, quæ amplius deducta apud Ca-

no-



§. II. De possessionis necessitate ad præscriptionem. 549

nonistas videri possunt. Paucula hæc Theologo & necessaria sunt, & sufficiunt, ut præscriptionis materiam, & alia in hoc tractatu occurrentia possit intelligere.

§. II.

An, & quomodo possessio sit necessaria ad præscriptionem?

ASSERO 1. Ad omnem præscriptionem est necessaria aliqua possessio. Communis contra P. Schmier, qui necessitatem, imo & possibilitatem possessionis in præscriptione privativa negat. P. Clarissimi textus ex utroque jure simpliciter requirunt possessionem ad præscriptionem: ergo possessio simpliciter requiritur ad omnem præscriptionem. A. p. L. 25. ff. de Usurpat. & Usucap. dicitur: *Sine possessione Usucapio contingere non potest.* ac cap. 3. de R. J. in 6. *Sine possessione præscriptio non procedit.* Hinc quasi commune axioma, & regula apud Doctores est: *tantum præscribitur, quantum possidetur.* 377

Objic. 1. Saltem in præscriptione negativa, qua acquiritur immunitas ab aliqua obligatione, non est necessaria possessio: ergo ad omnem præscriptionem non est necessaria possessio. A. p. non potest explicari, in quo consistat possessio requisita ad præscriptionem negativam: ergo. R. n. utrumque Antec. Hæc enim possessio negativa consistit in exercitio negativo, seu in non præstatione obligationis, per quam præscribens negative incipit possidere immunitatem ab obligatione: sicut & possessio juris positiva consistit in exercitio positivo juris.

Objic. 2. Impropria possessio non sufficit, nec requiritur ad præscriptionem: sed possessio negativa est impropria possessio: ergo ea non sufficit, nec requiritur ad præscriptionem. M. constat; ideo enim Depositarius, qui rem depositam possidet improprie, non potest eam præscribere. R. D. M. impropria possessio, id est, talis, quæ fit nomine alieno, non sufficit ad præscriptionem. c. M. quæ fit nomine proprio, & tantum est impropria, quia non est positiva *subd.* non sufficit ad præscriptionem positivam. c. M. ad præscriptionem negativam, vel privativam n. M. Qua-



lis præscriptio, talis possessio, dummodo ea fiat nomine proprio præscribentis. Accedit, quod etiam *quasi possessio*, seu possessio rerum incorporearum, licet aliquo modo sit impropria possessio, tamen sufficiat ad præscriptionem: ergo a pari idem dicendum est de possessione negativa.

Objic. 3. Leges ad præscriptionem negativam, seu privativam non videntur aliquid aliud, quam certum fluxum temporis requirere, quo evoluta, absque possessione obligationes, quæ negative dicuntur præscribi, evanescunt: ergo in his præscriptionibus non est necessaria possessio. A. potest deduci ex L. 3. & 4. C. de Præscript. 30. vel 40. annorum. & ex aliis. R. N. a. Quamvis in his, vel similibus legibus nihil dicatur de possessione, tamen hoc satis insinuant alia jura, quæ absque restrictione ad omnem præscriptionem requirunt possessionem.

378

Affero 2. Civilis possessio sine naturali sufficit ad præscriptionem. 2. naturalis sine civili non sufficit. Ita Schmalzgrueber, Pichler, ac alii. Prob. 1. pars. Si civilis sine naturali possessione non sufficeret, nemo fere unquam præscriberet: sequela est falsa: ergo & id, unde sequitur. M. p. ad præscriptionem requiritur possessio continuata per totum tempus præscriptionis: atqui nemo facile continuat per totum tempus possessionem naturalem, nec tanto tempore corporaliter insistit rei alicui, & quasi incubat: ergo nemo facile præscriberet, si requireretur ad præscriptionem possessio naturalis.

Prob. 2. pars. Si per possessionem civilem intelligitur illa, qua detinetur res cum opinione dominii, tunc per se clarum est, quod requiratur talis possessio civilis: ratio hujus est; quia ad præscriptionem requiritur, ut res aliena possideatur bona fide: atqui non possideretur bona fide sine opinione dominii; ergo. Accedit communis sensus Doctorum docentium, quod possessio mere naturalis non sufficiat ad præscriptionem; quomocunque ea accipiat, quidquid in contrarium dicat unus Ferdinandus Vasquez. Deinde sæpe potest res aliqua ab uno possideri naturaliter, ab altero civiliter: ergo, si sufficeret etiam possessio naturalis ad præscriptionem; possent duo eandem rem simul præscri-



*§. II. De possessionis necessitate ad præscriptionem.* 551

scribere, scilicet ille, qui possidet civiliter, & etiam iste, qui possidet naturaliter: atqui duo simul non possunt eandem rem præscribere, sicut non possunt simul ejusdem rei dominium habere: ergo. Ex his.

Habes: quod eadem res a duobus nequeat præscribi in solidum: quia ea non potest a duobus in solidum possideri.

Objic. 1. Si ad præscriptionem requiritur, & sufficit possessio civilis, tunc leges præscriptionis possent semper eludi; ille enim, contra quem prætenderetur præscriptio, posset semper dicere, se toto tempore, quo alter possedit rem naturaliter, retinuisse animo possessionem civilem: adeoque sibi non nocere præscriptionem alterius, utpote destitutam debita possessione: sequela est absurda: ergo. R. N. M. nam deperdita possessione naturali facillime perditur civilis, ut, si desperatur de recuperanda possessione naturali. 2. Si Dominus ignorat, rem ab altero possessam esse suam, adeoque ejus possessionem recuperare non cogitat. 3. Si vult recuperare, & ab altero repellitur. 4. Etiam per longam absentiam a re sua potest civilis possessio deperdi, ut superius dictum est. Quare non tam frequenter, ut obiectio supponit, posset prætendi possessio civilis ab eo, qui semel amisit possessionem naturalem; adeoque nec semper, aut ordinarie eludi posset præscriptio.

Objic. 2. Possessio naturalis est evidens, & corporea: ergo est favorabilior quam civilis, utpote quæ est occulta, & proinde exposita variis dolis. R. N. c. Nam 1. possessio naturalis sæpe est violenta, aut iniqua, ut in furto, vel illo, qui per vim possessionem tenet. 2. Si possessio naturalis semper requireretur, nemo fere unquam posset præscribere, ut dictum est supra: ergo naturalis non est favorabilior, quam civilis.





## ARTICULUS IV.

## De Titulo.

## §. I.

## Varia de natura, &amp; divisione tituli.

379 **NOTA** 1. Titulum iustum, seu a jure approbatum, necessario requiri ad præscriptionem: ratio est, quia bona fides ad præscriptionem est requisita: sed bona fides fundatur in titulo: ergo. Est autem titulus ad propositum nil aliud, quam illa causa, ex qua rem aliquam possidemus: & alius quidem est *translativus dominii*, seu est causa ex se habilis ad transferendum dominium, ut venditio, donatio &c.; alius vero non est *translativus dominii*, ut depositio, commodatio, vel locatio alicujus rei. Atque hic secundus titulus non sufficit ad præscriptionem; ad hanc enim exigitur, ut aliquis bona fide possideat rem ut suam, & nomine proprio: atqui si depositarius &c. rem alienam apud se depositam &c. vellet possidere ut suam, non procederet bona fide: ergo. Quare, qui vult præscribere, debet habere titulum *translativum dominii*.

Nota 2. Titulum *translativum dominii* alium esse *verum*, seu talem, qui verè aptus est ad transferendum dominium, & qui actu etiam illud transfert. e. g. emis rem aliquam vere, & valide ab illo, qui vere habuit dominium talis rei: & sic vere, ac re ipsa ejusmodi dominium in te transfertur. Hæc emptio est titulus verus. Est autem certum, quod titulus verus nunquam requiratur ad præscriptionem; etenim præscriptio est introducta in hunc finem, ut per eam transferatur dominium, antea nondum acquisitum: atqui si adest titulus verus, tunc non potest per præscriptionem primum transferri dominium; cum hoc jam antecederet sit translatum per ipsum titulum verum: & sic esset superflua præscriptio. Est igitur & alius, seu *non verus* titulus, qui re ipsa non transfert, nec est causa transferendi dominium. Pro quo

No-



Nota 3. Titulum *non verum* subdividi in *coloratum*, *existimatum*, & *præsumptum*. *Coloratus*, seu *apparens* titulus est, quando quidem præcessit causa translativa dominii, non tamen vere, sed solum apparenter. vg. fuit quidem factus contractus emptio- nis, sed hic fuit invalidus ex occulto vitio, puta, quia venditor vel non fuit Dominus rei venditæ, aut potestate eam vendendi, & alienandi caruit, aut aliunde ejusmodi emptio fuit invalide celebrata.

Titulus *existimatus*, vel *putativus* est, quando nec vera, nec apparens causa, vel titulus ad transferendum dominium aptus præcessit, invincibili tamen errore putatur præcessisse. In exemplo: invincibiliter credis, te rem aliquam emisisse, cum tamen eam non emeris. Vel: dicit Procurator tuus, se emisisse talem rem tuo nomine, quamvis revera non emerit; & res sit aliena, ac minime emptæ.

Titulus *præsumptus* est, quando ex diuturnitate temporis, vel aliis circumstantiis jura præsumunt aliquem titulum, & causam dominii translativam præcessisse, licet nulla similis causa, nec vera, nec colorata præcesserit.

Alii quidem aliter loquuntur, & dividunt, ac explicant hos titulos; Sic nonnulli titulum, quem nos dicimus *coloratum*, vocant *verum* titulum; intelligunt enim per *verum* titulum non solum eum, qui est translativus dominii, sed etiam eum, qui est aptus ad præscriptionem: atqui ille titulus, quem nos *coloratum* dicimus, licet non sit translativus dominii, est tamen aptus ad præscribendum. Item aliqui titulum, quem nos dicimus *non verum*, vocant promiscue *coloratum*, vel *præsumptum*, vel *apparentem*, vel *existimatum*. Verum nostra explicatio est magis recepta inter Theologos, ac communior inter accuratiores Juristas teste Pichlero.

Nota 4. Certum esse, quod ad omnem præscriptionem sufficiat titulus coloratus particularis. Ratio est, quia non potest melior titulus esse, quam coloratus: ergo hic debet sufficere. Dixi: *Titulus coloratus particularis*: qualis autem distinctio sit inter titulum generalem, & particularem, ex dicendis patebit. H. N.



380

Resolvo 1. Titulus existimatus ad præscriptionem ordinariam sufficit, si fundetur in ignorantia facti alieni. Ratio est: ignorantia facti alieni toleratur in jure; juxta L. fin. ff. *Pro suo*. Accedit lex: *Quod vulgo*. II. ff. *pro emptore*. Quare titulus sufficiens ad præscriptionem ordinariam est, si putes, te rem aliquam possidere tanquam emptam, eo quod servus, Procurator, vel Tutor tuus dixerit, & tibi persuaserit, se rem talem nomine tuo emisse.

Dixi in hac resolutione: *ad præscriptionem ordinariam*, seu illam, quæ tempore ordinario, videlicet triennio, decennio, aut etiam inter absentes viginti annis completur; de præscriptione enim extraordinaria, ad quam etiam sufficit titulus præsumptus, dicta non procedunt.

381

Resolvo 2. Si titulus putativus fundatur in ignorantia facti proprii, tunc non sufficit, quando justa causa ignorandi, & putandi non habetur, seu quando error, vel erronea opinio non est justa. Antequam ista resolutio probetur, ea declaranda est exemplis. Quare dico, quod error circa proprium factum possit dupliciter contingere: sic 1. potest Petrus aliquam rem alienam possidere tanquam suam ex eo capite, quia est in firma persuasione, hanc rem sibi esse a Jacobo donatam, quamvis nec Jacobus eidem donaverit, neque tradiderit. 2. potest fieri, ut Sempronius erronee sibi & Cajo persuadeat, se eidem Cajo promississe hunc librum, potestque ex hac ignorantia & errore bona fide liber a Sempronio tanquam debitus tradi, & a Cajo accipi. Jam

Petrus in primo casu non habet talem titulum putativum, qui sufficiat ad præscriptionem ordinariam, bene Cajo in casu secundo. Ratio est: quia solus error & ignorantia circa factum proprium non toleratur in jure, nec est justa, ac sufficiens ad titulum præscriptionis ordinariæ, nisi accedat ad eam traditio ab altero facta: atqui in primo casu habetur solus error circa factum proprium absque traditione, in secundo autem præter errorem habetur traditio: ergo. In majore duo sunt probanda, quorum primum est, quod error & ignorantia circa factum proprium non toleretur universaliter a jure, neque possit fundare titulum



tulum putatitium sufficientem ad præscriptionem: secundum est, quod talis error sit justus accedente traditione.

Primum igitur constat ex L. Celsus. 27. ff. de Usurpationibus, & Usucapionibus. ubi Celsus scribit: Errare eos, qui existimant, cujus rei quisque bona fide adeptus sit possessionem, pro suo eum usucapere posse, & nihil referre, an emerit, nec ne, an ei donatum sit, nec ne, si modo emptum, vel donatum sibi existimaverit, quia neque pro legato, neque pro donato, neque pro dote Usucapio valet, si nulla donatio, nulla dos, nullam legatum sit. Accedunt aliæ leges: ut lex 1. in principio. ff. Pro donato. & L. 6. ff. pro derelicto. quam inferius propriis verbis allegatam vide. Item L. 2. ff. pro legato.

Secundum, quod in majore illa probandum est, iterum patet ex L. 48. ff. de Usurpat. & Usucap. quæ lex etiam sic citari solet: L. penult. ff. pro soluto. quæ statim n. seq. formalibus verbis adducetur. Item ex L. 3. ff. Pro suo. ibi: Hominem, quem ex stipulatione mihi debere falso existimabas, tradidisti mihi: si sci- vissem, mihi nihil debere, usu eum non capiam, quia, si nescio, verius est, ut usucapiam; quia NB. ipsa traditio ex causa, quam veram esse existimo, sufficit ad efficiendum, ut id, quod mihi traditum est, pro meo possideam. Idem confirmatur ex L. 4. §. 2. ff. Pro suo. Quod legatum non sit, ab hærede tamen perperam traditum sit, placet a Legatario usucapi, quia pro suo possidet.

Quamvis hæc resolutio cæteroquin universaliter procedat, patitur tamen aliquam limitationem circa unum titulum emptionis. Quare

Resolvo 3. Ut tempore ordinario ex titulo emptionis præscribas rem aliquam, non sufficit, quod rem talem tibi aliquis tradat, putans, se eam tibi vendidisse, & tu illam ex simili erronea persuasionem accipias. Ita certa est sententia apud Ictos: & clare habetur in L. 48. ff. de Usurp. & Usucap. vel rectius L. 3. aut penult. ff. pro soluto. ibi: Si existimans debere tibi, tradam, ita demum usucapio sequitur, si & tu putes, debitum esse. Aliud, si putem, me ex causa venditi teneri, & ideo tradam; hoc enim, nisi actio (id est, contractus venditionis) præcedat, pro emptore usucapio locum non habet. Diversitatis causa est, quod in



*cæteris causis solutionis (id est, traditionis) tempus inspicitur: in emptione autem & contractu tempus inspicitur, & quod solvitur, nec potest pro emptore usucapere, qui non emit, nec pro soluto, sicut in cæteris contractibus.*

Ex his habes 1., quod ad præscriptionem ordinariam ex titulo emptionis faciendam non sufficiat error cum traditione.

Habes 2. Quod talis error una cum traditione omnino sit sufficiens ad præscriptiones alias, ex aliis titulis faciendas.

383

Resolvo 4. Dantur aliquæ præscriptiones, in quibus nec titulus coloratus, nec existimatus requiritur, sed sufficit præsumptus. Hæc resolutio etiam sic proponitur: In aliquibus præscriptionibus omnino non requiritur titulus specialis. Communis. Sic regulariter ad præscriptionem extraordinariam 30. vel 40. annorum, quando datur possessio longissimi temporis, non requiritur titulus specialis, sed ex ipso decursu tanti temporis ordinarie præsumitur bonum initium, & titulus, in quo bona fides, & bonum initium fundantur. cap. *ad aures. de Præscript.* & cap. 1. *de Præscript.* in 6. quæ capitula, cum non possint intelligi de præscriptionibus ordinariis, debent accipi de extraordinariis, seu temporis longissimi. Accedunt alia jura, ab aliis passim allegata. Dixi: *regulariter ad præscriptionem extraordinariam &c.*; nam & hic sunt iterum limitationes faciendæ. Igitur.

Excipe 1. casum, quo jus commune fortiter resistit præscribenti; hoc enim in casu etiam præscriptio longissimi temporis non currit, nisi assignetur titulus. cap. 1. *de Præscript.* in 6. Verum occasione hujus.

Petes 1. Qualis resistentia juris communis obsit præscriptioni, titulo speciali non munitæ? R. 1. Non obest resistentia juris quæcumque; nam præscribere volenti servitutem in alieno fundo etiam videtur resistere jus, vi cujus omnia prædia libera esse præsumuntur: & tamen ad præscriptionem servitutum titulus, saltem semper, non est necessarius, ut postea dicetur. R. 2. Neque tamen requiritur tanta resistentia, ut jus præscribere  
vo.



volentem omnino inhabilet ad possessionem, prout resistit Laico respectu juris decimandi. Sufficit ergo 3., si jus resistit prescriptionem prætendenti positive prohibendo, ne talem rem possideat, atque si simul assistit petitori, seu illi, contra quem præscribitur: sic fit, si Clericus, vel Parochus extraneus in aliena parochia vult præscribere decimas, ubi tali prescriptionem meditati resistit jus commune, non quidem inhabilitando eum omnino ad possessionem istarum decimarum, sed positive prohibendo talem usurpationem, & possessionem: assistit pariter idem jus commune petitori, seu Parocho, in cujus parochia decimæ existunt, & ad quem de jure communi spectant. Ast iterum

Petes 2. An præscriptio extraordinaria sine titulo speciali saltem tunc currat, quando jus commune quidem resistit prescriptionem prætendenti, non autem assistit Petitori, contra quem præscribitur? Schmalzgrueber Rdet affirmative, pro se allegans Glossam in cap. 1. de *Præscript.* in 6. *¶. titulum.* Layman, Pyrrhing &c. Rationem dat: Si jus commune non assistit Petitori, tunc neque resistit præscribenti, & Possessori in ordine ad hunc Petitozem, quamvis forte resistat in ordine ad alium Petitozem, quare in pari casu erit potior conditio bonæ fidei possessoris. Addit casum, qui rem declarat: Petrus & Paulus Clerici, ac Parochi litigant inter se de decimis, non in ipsorum, sed aliena parochia existentibus. Has igitur Petrus petit a Paulo: Paulus vero opponit, se eas præscripsisse, possidendo easdem 40. annis: In hoc casu Paulus non tenetur allegare titulum specialem, sed ipsa possessio tanti temporis erit illi pro titulo. Ita resolvit Schmalzgrueber.

A resolutione 4. excipitur 2. casus, quo aliunde præsumptio est malæ fidei contra Possessorem; nam in tali casu quoque non procederet præscriptio extraordinaria sine titulo speciali. Ita clare iterum habetur ex cap. *Episcopum.* 1. de *Præscriptionibus* in 6. Ratio est: quia præsumptio malæ fidei eliminaret præsumptionem justî tituli.

Ab ipsis hisce exceptionibus denuo excipias, nisi sit possessio immemorialis; siquidem in prescriptione immemoriali nul-



lus omnino titulus necessario allegatur, etiamsi jus commune resistat cum prohibitione possessionis, vel aliqua præsumptio in contrarium stet. cap. *Episcopum* cit.

384 Resolvo 5. Ad præscriptionem ordinariam requiritur titulus specialis coloratus, vel existimatus, & non sufficit titulus præsumptus. Communis ex L. *diutina*. 4. C. de *Præscriptione longi temporis*. Ratio est: quia in præscriptione ordinaria non præsumitur titulus; sed debet probari, & allegari. Debet tamen ab hac resolutione fieri aliqua exceptio circa præscriptionem servitutum; de qua agemus Art. 7.

385 Resolvo 6. Præscriptio extraordinaria, imo etiam immemorialis corrui, & nullarum est virium, si detegatur titulus vitiosus, ac de jure insufficiens ad præscriptionem: vg. si innotescat, quod possessio initium habuerit ex titulo locationis, vel depositi. Pichler L. 1. Decret. tit. 26. n. 47. cum pluribus aliis a se citatis. Ratio hujus est: Si constat de titulo vitioso, tunc præsumitur possessio cum illo, & non cum alio inita: atqui, quando constat, possessionem esse initam cum titulo vitioso, & non sufficiente ad præscriptionem, tunc non præscribitur, etiam tempore immemoriali, vel extraordinario: ergo. M. p. nam non præsumitur aliquis ex alio titulo possidere, quam de quo constat. m. per se clara est. 2. Sine bona fide theologica non procedit ulla præscriptio, ut certum est ex cap. fin. de *Præscriptionibus*. atqui bona fides non datur, quando adest titulus vitiosus, & de eo constat; siquidem bona fides innititur titulo justo, & ab hoc defumitur. 3. *Præsumptio cedit veritati*: ergo quando vere constat, titulum fuisse vitiosum, tunc non potest præfumi titulus justus, & sufficiens, consequenter tunc neque currit præscriptio.

Quæ contra hanc resolutionem objici possunt, soluta vide apud P. Pichler cit.



## §. II.

*Enumerantur varii tituli præscriptionis.*

Resolvo 1. Titulus præscriptionis unus est *generalis*, alter *specialis*. *Generalis* est, qui cum aliis titulis specialibus semper concurrit, & in iis includitur: *Specialis* est, qui non ita in aliis titulis includitur. Sunt autem duo tituli generales, nimirum titulus *pro suo*, & *pro soluto*: atque hi cum aliis concurrere solent; quicumque enim pro emptore, vel donato rem aliquam possidet, eam etiam pro suo, vel soluto possidet: vel quicumque rem possidet ut emptam, aut donatam, possidet eam etiam ut suam, & sibi solutam, ac traditam; imo tituli generales ortum suum habent ordinarie ex titulis *specialibus*, qui sunt præcipue sequentes, *pro emptore*, *pro hærede*, *pro derelicto*, *pro legato*, *pro donato*, *pro dote*. De his titulis, uti & duobus generalibus agitur in ff. Lib. 41. tit. 4. & seqq., & in C. L. 7. tit. 26. & seqq.

386

Resolvo 2. Ex titulo *pro emptore* usucapit, qui revera emit rem alienam emptione invalida, eo quod istam rem emat ab illo, qui non est Dominus talis rei, creditur tamen bona fide habere ejus dominium, quod etiam procedit, si quis emat aliquam rem a Domino, qui rem venditam alienare non potest, bona fide tamen, & per meram ignorantiam facti alieni creditur posse alienare. Vide dicta N. 360. & N. 380. Debet tamen emptio esse a parte rei facta; nam si tantum crederetur esse facta, non esset titulus sufficiens per dicta num. 380. vel certe debet servus, vel Procurator tuus dixisse, se nomine tuo emissee; quia error facti alieni toleratur iterum per dicta num.

387

Resolvo 3. de titulo *pro hærede* sunt ista notanda. 1. Titulus iste non procedit, quando hæres inter bona hæreditaria possidet quidem optima fide alienam rem, eamque detinet ut suam, quam tamen defunctus, cujus est hæres, detinuit mala fide. Si ergo hæc mala fides etiam post tempus præscriptionis completum detegitur, corrumpitur tota hæc præscriptio. Ratio est: quia hæres succedit in vitia personæ defunctæ, consequenter & ipse hæres censetur esse possessor malæ fidei: atqui possessor malæ fidei

388



fidei non potest præscribere: ergo. Et hoc de jure communi: quid autem sit de jure Bavarico, ex dictis num. 364. constat.

2. Neque hic titulus *pro hærede* locum habet, quando antecessor defunctus rem bona fide possedit ex alio titulo *vg. emptionis*; tunc enim ex eodem titulo, & non ex titulo hæreditatis successor, seu hæres continuare potest, & complere præscriptionem: adeoque in tali casu titulus *pro hærede* foret superfluus & inutilis.

3. Habet ergo locum tunc, quando dubium est, an defunctus ex alio titulo, & quidem bona fide possederit rem illam alienam; in hoc enim dubio, si de mala fide antecessoris & testatoris non constat, potest hæres ex titulo *pro hærede* illam rem præscribere. Ita Arnoldus Rath tract. de Usucapionibus c. 3. Assert. 23. & seqq., cui consentit P. Engel L. 2. tit. 26. n. 24. Ratio est: jura ex una parte speciale titulum assignant, ex altera parte non potest casus alius convenientior ostendi, in quo locum habeat, quam iste a nobis adductus: ergo. Accedit L. 3. ff. *Pro hærede*: *Plerique putarunt; si hæres sim, Et putem, rem aliquam ex hæreditate esse, quæ non sit, posse me usucapere.*

Neque hic titulus semper debet esse verus, sed sufficit etiam existimatus, si quis *justo errore* *pro hærede* haberetur, qui tamen ob occultum defectum hæres non esset. Quare & talis rem alienam in massa hæreditaria titulo existimato *pro hærede* usucapere posset. Quæ autem requirantur ad justum errorem, colligitur ex dictis §. præcedenti: ubi nota, errorem non esse justum, nec sufficere ad titulum existimatum *pro hærede*, si quis hæredem se putat illius, quem falso defunctum existimat: sed requiritur, ut revera defunctus sit ille, cujus se hæredem credit. L. 3. C. *Pro hærede*: *Opinione falsa mortis pro hærede possessio rerum absentis procedere non potest.* Ita resolvit Haunoldus L. 1. de J. & J. t. 5. n. 249.

Atque hic titulus Haunoldo L. c. n. 251. etiam procedere videtur, quando defunctus non nomine suo, sed ex titulo depositi rem alienam possedit, nunc autem hæres eam accipit, & tenet sufficiente tempore tanquam bonum hæreditarium, & suum



suum. Verum huic assertioni sese merito opponit Clariss. D. Rath : & ego pariter judico, si postmodum certo constet, Antecessorem defunctum possedisse rem ut depositam, tunc eam ab hærede non posse usucapi; quia hic vitium antecessoris certo cognitum transfret in hæredem. Hoc iterum de jure communi.

Laudato loco n. 244. iterum tenet Haunoldus, quod etiam hæredes *sui* ex titulo pro hærede possint usucapere, eoquod ex nullo solido fundamento contrarium possit elici : ubi etiam solvit fundamenta AAriorum. Meretur legi Author citatus, qui in emergentia casus plenioram notitiam dabit.

Resolvo 4. Titulus *pro donato* sufficiens ad præscriptionem ordinariam tunc datur, quando alicui aliquid donatur ab eo, qui creditur Dominus talis rei, & non est. Et quidem debet res esse actu donata, nec sufficit opinari, illam esse donatam. L. 1. ff. *Pro donato*. ibi : *Pro donato is usucapit, cui donationis causa res tradita est : nec sufficit opinari, sed & donatum esse oportet.* Ubi nihilominus illa observanda sunt, quæ de titulo existimato superius sunt dicta. 389

Resolvo 5. Titulus *pro derelicto* non habet locum, si is, qui vere est Dominus rei, eam derelinquit, aut derelinquere creditur; nam si talis Dominus revera rem suam derelinquit, tunc alter, qui eam capit, statim dominium illius acquirit, quia res derelictæ fiunt primo occupantis, & sic neque titulo præscriptionis, neque ipsa præscriptione opus est, ad dominium rei vere derelictæ consequendum. Si autem res a parte rei non est derelicta a vero Domino, & tantum putatur ab eo esse derelicta, tunc nunquam currit præscriptio, ut habetur L. *Nemo*. 6. ff. *Pro derelicto*, quæ ita sonat : *Nemo potest pro derelicto usucapere, qui falso existimaverit, rem pro derelicto habitam fuisse.* Adeoque ad usucapionis titulum *pro derelicto* requiritur, ut res non solum falso credatur esse derelicta, sed & actu sit derelicta. 390

Hujusmodi ergo titulus *pro derelicto* tunc datur, quando aliquis, qui non habuit dominium alicujus rei, sed illam prius tantum bona, vel etiam mala fide possedit ut suam, quando, inquam, talis non Dominus rem illam derelinquit, & alius, putans,



tans, eam revera esse derelictam a Domino vero, illam occupat, ac possidet: ubi habetur derelictio a parte rei, quamvis illa sit invalida. Exemplum habes in donatione; hæc enim si fiat a Domino rei, potente rem suam alienare, & alteri donare, per se transfert dominium: adeoque non opus tunc est præscriptione ad acquirendum dominium talis rei donatæ; si autem falso creditur donatio intervenisse, tunc donatio hæc mere existimata non sufficit ad titulum pro donato. Quare tunc tantum titulus *pro donato* datur, quando aliquid actu quidem donatur: sed a non Domino. Idem cum proportionem de titulo *pro derelicto* est dicendum.

391

Resolvo 6. *Pro dote* præscribit, qui rem alienam pro dote accipit. L. *Titulus*. 1. ff. *Pro dote*. *Pro legato* vero usucapit, qui accipit aliquid tanquam legatum, quod tamen legatum non subsistebat, e. g. quia factum est ab eo, qui legare non poterat, aut contigit circa rem alienam, quæ legantis dominio non suberat &c. debet tamen legatum revera a parte rei fuisse factum, ut de titulo pro donato, & pro derelicto &c. dictum est. Ita expresse habetur L. *Legatum* 1. & L. *Si possideam* 2. ff. *pro legato*.

Hoc etiam speciale est titulo *pro legato*, quod non invenitur in titulo *pro hærede* secundum assertionem supra positam, quod scilicet aliquis possit usucapere illam rem, quam legati nomine traditam bona fide possidet, existimans, legantem mortuum esse, etsi is adhuc vivat. L. 5. & 6. ff. *pro legato*. ibi: *Ea res, quæ legati nomine tradita est, quamvis Dominus ejus vivat, legatorum tamen nomine usucapietur, si is, cui tradita est, mortuum esse existimaverit.*

Enumeratis titulis adduntur alii ex *sententia in judicio lata*, ex *transactione*, *permutatione*, *societate*, qui etiam dicuntur *pro judicato*, *pro transacto*, *pro permutato*, *pro socio*: de quibus consulendi sunt Civilistæ.

392

Resolvo 7. Tituli generales *pro suo*, & *pro soluto* ordinarie non recte allegantur sine suis specialibus, ex quibus ortum habent. Engel, Reiffenstuel, & alii Juristæ communiter. Ratio est  
1. quia



1., quia tituli generales sine specialibus sunt incerti : 2. Tituli generales sunt quasi accessorii specialibus : ergo sublati titulis specialibus tanquam principalibus , necessario quoque tolluntur tituli generales , ceu accessorii.

Nihilominus sunt casus aliqui , in quibus tituli *pro suo*, & *pro soluto* sufficiunt, etsi nullus ex supra specificatis titulis adsit, dummodo possidens aliunde habeat justam causam credendi, rem, quam possidet, esse suam. Talis justa causa potest desumi v.g. ex modis acquirendi dominium jure Gentium, qui ex se sunt causæ aptæ ad transferendum dominium æque, ac emptio, legatum, donatio &c. Quare titulus ad præscriptionem *pro suo* foret 1, si aliquis feram alterius cicurem pro sylvestri caperet, eoquod crederet, eam adhuc esse in naturali libertate. 2. Si quis pecuniam alterius, tantum custodiæ causa in terra defossam, bona fide tanquam thesaurum apprehenderet. 3. Si quis rem suam ab altero præscriptam, iterum ut suam apprehenderet, eoquod fuerit ignarus præscriptionis alterius. Tali modo etiam successor Prælati jura, & bona ab antecessore relicta præscribere potest, ut ait Engel L. 2. Decret. tit. 26. n. 23. Ex his tandem.

Resolvitur dubium illud, an bonæ fidei inventor possit res inventas præscribere, dum Dominus legitime inquisitus non comparet? nam R. ad hoc dubium: quod tandiu, quamdiu probabilis est spes, quod Dominus sit compariturus, non possit inchoari præscriptio, saltem ordinaria. Ratio hujus est: Si talis vellet præscribere rem inventam, tunc deberet præscribere ex titulo *pro derelicto*: atqui ex hoc non potest præscribere: ergo. M. est AAriorum. m. p. vel a parte rei Dominus, qui rem illam inventam perdidit, eam vere dereliquit, vel non ita dereliquit, sed tantum probabiliter putatur esse derelicta? *si primum*: tunc talis præscriptio omnino est inutilis, cum per ipsam inventionem, & occupationem rei revera derelictæ acquiratur dominium ejus, ut constat ex dictis: ergo non requiretur amplius præscriptio ad acquirendum hoc dominium. *si secundum*: tunc non potest dari præscriptio saltem ordinaria; quia ad rem *pro derelicto* usucapiendam necessario, & indispensabiliter a jure

B b b b 2

re-



requiritur, ut talis res revera sit, & non tantum putetur, esse derelicta, ut patet ex L. 6. ff. *pro derelicto*.

Dices : Saltem talis res potest ufucapi ex titulo inventionis : ergo. R. N. a. nam inventio, nisi sit occupatio rei derelictæ, consequenter nisi concurrat cum titulo *pro derelicto*, non potest esse sufficiens titulus ad transferendum dominium, neque ad ufucapiendum.

394

Petes : Quid ergo faciendum inventori, si Dominus sufficienter inquisitus non apparet ? R. sub distinctione : Vel enim res, quæ est inventa, est talis, ut possit servari, & quam Dominus etiam prudenter præsumitur velle sibi in individuo servari : vel est talis, quæ non potest conservari, & quam Dominus non præsumitur velle, sibi restitui in individuo, utpote contentus, si eam in æquivalenti recipiat ? *si secundum* : tunc non tenetur inventor tamdiu in individuo conservare illam rem, quamdiu affulget spes veniendi in notitiam Domini, sed potest talem rem consumere, hac tamen cum intentione & obligatione, ut Domino postmodum comparenti eadem in æquivalenti compensetur. *Si primum* : tunc debet asservari in individuo, donec omnis probabilis spes, quod Dominus sit compariturus, evanuerit.

Quando autem ex diuturnitate temporis, & aliis circumstantiis moraliter certum videtur esse, quod Dominus non amplius sit rediturus, aut rem suam repetiturus, tunc talis res præsumitur esse omnino derelicta, adeoque censetur fieri inventoris, tanquam primo occupantis. Quid in hoc puncto statuatur jus Bavanicum, jam notatum est, agendo de rebus inventis, ubi videatur.

\*\*\*\*\*

## ARTICULUS V.

### *De Objecto, & subjecto Præscriptionis.*

**O**bjectum præscriptionis est res talis, quæ potest præscribi : per *subjectum activum* intelliguntur illi, qui possunt præscri-

scri-



scribere, & *subjectum passivum* sunt ii, contra quos potest dari præscriptio. Jam sit

## §. I.

## De Objecto Præscriptionis.

Aliquæ res in jure dicuntur non posse præscribi, vel quia 395  
circa eas omnino non currit præscriptio, vel quia saltem tempore ordinario non possunt præscribi. Antequam eas enumeremus, notandum est, universaliter omnes res posse usucapi, nisi earum præscriptio lege, vel speciali ratione prohibeatur, & invalidetur.

Res autem *vitiosæ*, quæ non possunt præscribi, sunt sequentes:

1. Quæ jure divino alicui competunt, ab alio præscribi nequeunt. Sic jurisdictio, & potestas summi Pontificis, cum sit juris divini, a nullo præscribi potest. Item, quæ jure naturali sunt prohibita, nulla temporis diuturnitate, vel præscriptione possunt fieri licita; siquidem diuturnitas temporis non minuit, sed auget malitiam. cap. *cum haberet. de eo, qui duxit in matrimonium.*

2. A Laicis præscribi non possunt res sacræ, quales sunt, quæ per Episcopos rite sunt Deo consecratæ, & quæ communiter pro sacris habentur, ut Ecclesiæ, Sacella, Oratoria, Monasteria, Altaria, Calices, vestes & ornamenta sacra, Reliquiæ Sanctorum &c. L. 9. ff. *de Usurpat. & usucap.* ibi: *Usucapionem recipiunt maxime res corporales, exceptis rebus sacris, sanctis, publicis populis Romanis, & civitatum, item liberis hominibus.* Item neque jura spiritualia a Laicis usucapi possunt, veluti jus decimarum, primitiarum, oblationum, jus eligendi, aut conferendi beneficia Ecclesiastica, jus cognoscendi & judicandi causas Clericorum; quia hæc jura a Laicis possideri nequeunt, consequenter neque ab ipsis possunt præscribi, cum præscriptio sine possessione non detur. c. *causam. 7. de Præscriptionibus.*



Dixi 1. *A Laicis*; nam a Clericis, qui res & jura spiritualia possidere possunt, eadem etiam valent præscribi. Dixi 2. *Res sacræ, & jura spiritualia*; nam bona Ecclesiastica, quæ sacra non sunt, possunt etiam a Laicis præscribi, non quidem tempore ordinario, sed extraordinario.

Hic etiam excipi debet *jus Patronatus*, quod, cum Laicis etiam competere possit, ab iis etiam præscribi valet: de quo videri possunt Canonistæ L. 3. Decret. tit. 39., qui & consulendi sunt, si aliquis specialis casus exurgat de jure decimandi, ac præscriptione decimarum, seu deinde Clericus, seu Sæcularis velit præscribere aliquas decimas, quia plura sunt notanda, & distinguenda circa præscriptionem decimarum.

Id quoque observa: licet Laici non possint præscribere decimas, posse tamen præscribere exemptionem a decimis solvendis; nam ad præscribendam hanc exemptionem in præscribente non requiritur specialis capacitas: neque potest assignari speciale privilegium irritans talem præscriptionem, sed potius ei favet consuetudo, vi cujus receptum est, ut de certis fructibus decimæ non solvantur. Videatur Antonius Mayr T. 8. n. 428. ac Layman apud eundem citatus. Quare dicit Haunold L. 1. t. 5. c. 2. n. 358., quod Laici possint præscribere immunitatem a solvendis decimis non solum tempore immemoriali, sed cum titulo etiam 40. annorum spatio. Et hoc non solum verum est, juxta laudatum Haunold, respectu personarum particularium, sed etiam integrarum Communitatum, quæ se eximere possunt a solvendis decimis, dummodo aliunde Sacerdotes habeant congruam sustentationem.

3. Nequeunt præscribi res religiosæ, quales sunt sepulchra, & loca, in quæ corpus, ossaque hominis illata sunt, ut ibi perpetuo maneant. §. 9. *Instit. de rerum divisione*. Hodie tamen cæmetaria non cujusvis voluntate sunt, sed autoritate Episcopi consecrantur. c. 4. *de Religiosis domibus*. Deinde quamvis dominium alicujus sepulchri, vel cæmeterii non possit præscribi, potest tamen jus sepulturæ in aliquo loco acquiri per præscriptionem. Ita Accursius apud König.



4. Præscribi nequeunt *Res sanctæ*, seu illæ, quæ speciali *sanctione*, seu constitutione ab injuria hominum sunt defensæ. §. 10. Instit. de rer. divis. Tales sunt muri, & portæ civitatum, quas violare capitale est per §. 10. cit., ac Imperium Romano-Germanicum, quod ideo lingua vernacula dicimus *das heilige Rö-mische Reich*, seu sacrum Imperium Romanum.

5. Præscribi nequeunt res publicis usibus deputatæ, ut forum, via publica, pons, theatrum, scholæ, curiæ, porticus &c., idque verum est, quamvis populus hisce rebus uti destinatus; sufficit enim, quod illis uti possit, & ad hunc finem sint destinatæ. L. 9. ff. de Usurpat. & Usucap., quæ superius est allegata: juxta quam etiam liber homo non potest ullo tempore præscribi, ut fiat servus, quamvis possessor bona fide eum emerit, putans esse servum. §. 1. Instit. de Usucapionibus. Contra vero servus potest præscribere libertatem contra Dominum, si per 20. annos bona fide, etiam sine titulo libertatis, se gessit pro libero. Hoc specialiter a jure in favorem libertatis est concessum.

6. An Beneficia Ecclesiastica in titulum collata, a Clericis quoque præscribi possint, non ita certum est inter Doctores: Reiffenstuel, ac König cum pluribus aliis a se citatis id negant. Contra P. Antonius Mayr affirmat, dummodo hæc quatuor in præscribente concurrant: 1. fides bona: 2. pacifica possessio beneficii per triennium: 3. titulus coloratus. 4. ingressus non simoniacus, seu ut beneficium non fuerit obtentum per Simoniam, ac denique ut Beneficiatus se non intruserit in beneficium. Sedi Apostolicæ in corpore Juris reservatum. Fundat se laudatus Author in Regula 33. Cancellariæ.

7. Præscribi nequeunt *Res liberæ facultatis*, hoc est, quæ citra obligationem, aut conventionem cujusvis libero arbitrio relinquuntur. Quare communis est regula apud Jctos: *Per actus liberos non inducitur præscriptio*. Sic, qui alicui Hospitali per plurimos annos certam summam pecuniæ donavit, cogi non potest, ut imposterum similiter donet: sic etiam, si 40. vel pluribus annis accessisti ad certum molendinum Pauli, ut ibi frumentum moleres, non potest Paulus prætextu præscriptionis



te impedire, quo minus, si libet, ad aliud molendinum accedas. Recte tamen addit P. Engel, in actibus, & rebus meræ facultatis non procedere præscriptionem, nisi alteri, prohibitionem interponenti, ille, qui meram facultatem habet, cum patientia acquieverit, & tali modo prohibentem in quasi possessione, & se in putativa obligatione constituerit. Potest hæc res obviis exemplis declarari.

8. Non possunt præscribi limites Episcopatum, & Parochiarum, modo sufficienter, ac certo constet, limites eo usque fuisse præfixos. C. quia. 9. de Præscript. Idem etiam sentiunt aliqui apud Engel de limitibus, ac finibus Provinciarum, & terrarum, qui publica authoritate constituuntur: idque etiam Hostiensis extendit ad limites Ducatum, & Comitatum.

Habet tamen præscriptio locum circa limites, quando hi sunt dubii, ut docet Engl; quia in dubio melior esset conditio possidentis. 2. Potest etiam aliquis illam terram præscribere, ubi limes positus est, dummodo limes maneat in ratione limitandi, ac nihilominus finem Episcopatus, ac Parochiæ designet. Barbosa apud Engl consentientem. 3. Neque impediri præscriptio Jurium Episcopatum in alienâ diocesi circa particulares Ecclesias, vel præscriptio decimarum in aliena Parochia, si fiat salvis de cætero limitibus. Panormitanus, ac Barbosa apud laudatum Engl Tit. de Præscript. n. 7.

9. Nemo potest *extinctive* præscribere contra obedientiam, visitationem, & procuracionem ratione visitationis debitam legitimis suis Superioribus, ita videlicet, ut obtineat absolutam exemptionem respectu omnium Superiorum Ecclesiasticorum. c. 12. & 16. de Præscript. absurdum enim est, dari homines Acephalos sine capite, & Superiore. Potest autem *translative* præscribi obedientia &c. scilicet, ut ea debeatur alteri, quam proprio Episcopo, aut Superiori, vg. ut debeatur immediate Summo Pontifici &c. Engl, Reiffenstuel, ac alii apud hunc citati. Advertit etiam recte Reiffenstuel Tit. de Præscript. n. 54. in tali casu non tam subditum præscribere contra obedientiam Prælato debitam, sed potius novum Superiorem, cui se subditus volun-



luntarie subicit, ejus visitationem admittendo, præscribere contra Superiorem priorem: ubi etiam recte addit, ad hoc, ut aliquis ab Episcopi, vel alterius Superioris inferioris jurisdictione exemptus, & immediate Papæ subjectus censeatur, requiri, quod talis tanquam immediatus subditus tractatus, & habitus fuerit ab Ecclesia Romana: idem dicendum est de alio Prælato, qui translativè censetur præscripsisse jurisdictionem in aliquem subditum contra Superiorem priorem; debet enim & iste talem subditum specialiter tractare, & recognoscere tanquam sibi, & non alteri subiectum.

10. Res indivisim communes pluribus ab aliquo sociorum non possunt præscribi, etiam si longissimo tempore eas detinuerit. Reiffenstuel, Mezger, & alii. Ratio est: quia ejusmodi rem indivisim pluribus sociis communem censetur quis non suo tantum, sed etiam aliorum nomine possidere. L. *Si communem. ff. Quemadmodum servitutes amittantur*. Proinde eam nunquam poterit suo nomine præscribere; cum *sine possessione præscriptio non procedat*. R. 3. J. in 6.

11. Præscribi nequeunt Res pupillorum tempore ætatis pupillaris, etiam si pupillus habeat Tutorem. Idem dicit Engl de rebus Minorennum, quas ait, ordinario tempore non posse usucapi, quamvis tempore longissimo præscribantur. An autem, & quomodo Minorenni concedatur restitutio in integrum contra præscriptionem etiam longissimi temporis, bene expendit D. Arnoldus Rath Tit. de Usucap. c. 4. assert. 14. & seqq.

12. Neque præscribi possunt *Res dotales*, quia alienari prohibentur, nisi præscriptio jam fuerit inchoata, antequam talis res fuit facta dotalis, vel in dotem data. L. *si fundum. 16. ff. de fundo dotali*, & L. un. C. de Usucapione pro dote.

13. Regulariter, quando Res prohibentur alienari, etiam non possunt præscribi. Et hoc absolute verum est, quando ideo prohibentur alienari, quia non sunt in commercio humano, nec earum possessio haberi potest: tales sunt res spirituales, quæ a Laicis, & res publicæ, quæ a privatis possideri nequeunt. Rursus ista assertio procedit, quando in injusta alienatione. *P. Kick. Theol. Tom. IV.*



natione intervenit error juris, qui non prodest ad Usucapionem secundum dicta superius: in aliis autem casibus, quando non intervenit error juris, & res alienata est in commercio hominum, ejus tamen alienatio est prohibita ex alia causa, vg. ex favore ipsius rei, ut contingit in fundo dotali, feudo, fidei commissis, seu illis rebus, quæ testamento alienari prohibentur: in his inquam, & similibus rebus saltem non potest inchoari præscriptio ordinaria, quando res est actu prohibita alienari, vg. quando est actu data in dotem: possunt tamen præscribi tempore etiam ordinario, si præscriptio jam ante est inchoata, ut proxime est dictum, & habet P. Pichler. An autem res fidei commissæ subjectæ non possint præscribi præscriptione extraordinaria, idem est de re dotali &c., videri potest apud Civilistas, & apud P. Pichler n. 89. Deinde, si lex prohibet alienationem non simpliciter, sed tantum, ne fiat sine certa solemnitate, tunc data bona fide, & excluso errore juris procedit præscriptio, dummodo cætera ad præscribendum requisita adsint: ut, si rem acquisivisti a Minore, quem putabas esse Majorem, vel a Prælato Ecclesiæ, putans, Capitulum legitime consensisse, quod tamen non consenserat &c.; tunc enim non intervenit error juris, sed solus error facti. Reiffenstuel cit. num. 48.

14. Non possunt præscribi *Res furtivæ*, vel *per vim*, scilicet ablativam, aut expulsivam *possessæ*, non tantum a fure, qui tanquam malæ fidei possessor de se incapax est præscriptionis, sed neque a quocumque bonæ fidei possessore, qui forte illas a fure, vel etiam a tertio emit, nisi hoc vitium furti aut violentiæ purgatum fuerit. §. 2. & 3. Instit. de *Usucap.* Purgatur autem 1., si tales res denuo reversæ fuerint ad Dominum suum. Sub nomine Domini etiam venit possessor bonæ fidei, seu ille, qui tales res antecederet bona fide possedit. Revertuntur autem ejusmodi res ad Dominum vel formaliter, & in sua natura, vel æquivalenter per satisfactionem præstitam Domino, vel si fur postmodum hæres fuerit Domini. 2. Purgatur per lapsum 30. annorum: quare res furtivæ præscriptione extraordinaria, seu triginta annorum præscribi possunt. Idem per omnia statutum est de rebus acceptis contra legem Juliam Repetundarum: sunt autem istæ res, quas Magistratus, Assessor, Curator, vel  
alius



alius Officialis publicus accipit ex eo fine, ut facerent id, ad quod faciendum alias jam vi muneris sui erant obligati. L. penult. ff. de *Lege Julia Repetundarum*. An autem neque fructus ex re furtiva bona fide percepti præscribi possint, dubitant Doctores.

Ex quibus apparet, quam raro currat præscriptio in rebus mobilibus: vel enim alienantur a Domino? & tunc ordinarie valet alienatio, & sic non opus est præscriptione: vel alienantur a non Domino? & tunc plerumque laborant vitio furti, & sic non possunt præscribi, etsi per mille manus transferint, donec vitium furti uno ex prædictis modis fuerit purgatum.

15. Bona Fisco jam incorporata non usucapiuntur tempore ordinario, bene extraordinario. §. 9. Instit. de *Usucap.* L. 4. C. de *Præscript.* 30. vel 40. annorum. Idem est de bonis Principis Patrimonialibus, quæ non sunt bona fiscalia, sed res Dominicæ appellantur, & a Principe tanquam privato possidentur: hæc etiam longissimo tantum, non autem ordinario tempore usucapiuntur. L. 2. 3. & Rubrica. C. *Ne rei dominicæ* &c., ac L. 3. & 4. C. de *Præscript.* 30. vel 40. annorum. König. Si autem bona fiscalia nondum sint Fisco incorporata, nec ei denunciata, quamvis ei sint debita, præscribuntur quadriennio, quando non debentur ex delicto, sed ob mortem decedentis sine legitimo hærede. L. 1. C. de *Quadriennii Præscriptione*. si autem debentur ex delicto, vg. ob vectigal non solutum, tunc præscribuntur quinquennio. L. 2. C. de *Vectigalibus*. Ita Reiffenstuel cit. n. 28.

16. Denique reservata Principi in signum supremi domini, puta, præstatio tributi, ac hujusmodi, nullius temporis præscriptione tolluntur. L. *Comperit.* C. de *Præscriptione* 30. vel 40. annorum. Reiffenstuel. Neque possunt præscribi officia publica. *Novell.* 8. c. 7. König.



## §. II.

*De Subjecto Præscriptionis.*

396

ASSERO 1. Præscribere non possunt sequentes: 1. ille, qui non est compos mentis, uti infans, amens; quia tales non possunt apprehendere animo, & intentione rem possidendi ut suam: possunt tamen & isti præscribere, si rem apprehendant per Tutorem, Curatorem &c. item potest ille, qui amens est factus, continuare præscriptionem, si eam ante amentiam jam apprehendit, & possedit ut suam. 2. Neque illi possunt præscribere, qui non sunt capaces dominii, aut juris activi; cum hi per præscriptionem nequeant acquirere dominium, aut jus activum, uti servus, & Religiosus in particulari in ordine ad jura realia, & res temporales. 3. Nequeunt præscribere, qui rem nomine alieno detinent, sicut Pignoratarius, seu Creditor pignus, Depositarius rem depositam detinet.

397

Assero 2. Non potest præscribi contra sequentes: 1. contra illos, qui nullum habent jus activum, ut patet 2.: Qui impedimento juris constricti in judicio agere, & jura sua tueri non possunt. Ita non potest præscribi contra filiumfamilias quoad bona adventitia toto tempore, quo est sub patria potestate. L. 1. §. 2. C. de *annali exceptione*. Sic & contra uxorem stante matrimonio non præscribitur ullo modo quoad bona dotalia, nisi si maritus ad incitas redigatur; tunc enim ipsa agere permitteretur. Sic etiam contra illum Creditorem, qui ante certum diem, vel ante certam conditionem evenientem prohibetur petere debitum, non potest currere ulla præscriptio, nisi dies ille jam advenerit, vel conditio fuerit impleta.

Dixi: qui impedimento juris &c.; contra eos enim currit præscriptio, qui tantum impedimentum facti habent, quo minus in judicio rem suam petant, ut: si tantum impediantur ob absentiam, distantiam loci, inopiam &c. nihilominus & hi restitui possunt contra præscriptionem adversus se completam: de quo alibi.

ARTI-



## ARTICULUS VI.

*De tempore ad Præscriptionem requisito, ac nonnullis aliis huc facientibus.*

**N**OTA 1. Res alias esse *mobiles*, alias *immobiles*: *Priores* sunt, quæ possunt loco moveri, ut pecunia, vestis, animalia, navis &c. *Posteriores* sunt, quæ loco moveri nequeunt, ut domus, fundus &c. Inter res *mobiles* etiam computantur *jura*, & *actiones ad res mobiles*, vg. actio ad debitum certæ pecuniæ, prout recte advertunt Reiffenstuel in Theol. morali, & Pichler in jure Canonico: sic e contrario *actiones*, & *jura ad bona immobilia*, ad res quoque *immobiles* reducuntur: ad quas etiam referuntur beneficia Ecclesiastica, census, ac redditus, jus Patronatus, ususfructus, servitutes prædiorum, & alia ejusmodi jura; hæc enim omnia (ut loquitur Reiffenstuel) fixa manent, & instar immobilium afferunt fructum suum, & utilitatem &c.

398

Nota 2. Aliud tempus esse breve, aliud longum, aliud longissimum, ac immemoriale. *Tempus breve* sunt pauciores, quam 10. anni, vg. tempus trium, aut quinque annorum. *Longum* sunt 10. anni inter præsentis, & 20. inter absentes. *Longissimum* sunt 30. vel 40. anni, aut omnino plures. *Immemoriale* est, cujus initium hominum existentium excedit memoriam. Igitur.

Præscriptio *immemoralis* tunc datur, quando possessio tamdiu duravit, ut initium ejus hominum memoriam exceßerit. cap. *Super quibusdam. de V. signif.* Requiritur autem tunc potissimum, quando præscribens non habet titulum, & jus ei resistit. c. 1. *de Præscript. in 6.* Obtinet hæc præscriptio in Jure maximam autoritatem, & vim privilegii, dummodo prætendens ejusmodi immemorabilem Usucapionem sit capax possessionis rei illius, quam vult præscribere. Neque terminis generalibus, quibus alias præscriptio prohiberi solet, comprehenditur: quare tali præscriptioni immemorali non obest illa clausula: *non obstante præ-*



*scriptione.* Probari solet per testes, qui affirmant, saltem per 40. annos se ita vidisse, & scire esse practicum; & a suis Majoribus etiam audivisse, semper antecedenter sic esse factum, vg. agrum hunc a tali familia esse possessum. Ita P. Engl.

Nota 3. Tempus in praescriptione rerum computari tantum civiliter, id est, de die in diem, non naturaliter de momento in momentum. Quare sufficit, si ultimus dies temporis ad praescriptionem requisiti sit inchoatus, etsi non sit completus. L. 15. ff. de diversis, & temporalibus Praescript. principio. In Usucapione ita servatur, ut etiam si minimo momento novissimi diei possessa res sit, nihilominus repleatur Usucapio, nec totus dies exigitur ad explendum constitutum tempus. Aliud est in praescriptione actionum personalium, & obligationum his respondentium, ad quam requiritur, ut ultimus dies sit completus. L. 6. ff. de obligationibus, & actionibus. Videatur Haunoldus p. 1. t. 5. c. 2. n. 267. H. N.

399

Afferro 1. Res mobiles, etiam pretiosae, Privatorum cum titulo & bona fide regulariter praescribuntur triennio: 2. sine titulo autem requiritur spatium triginta annorum. Reiffenstuel cum Communi.

Prob. 1. pars ex L. un. C. de Usucapiane transformanda. & §. 1. Instit. de Usucap. ubi facta mentione de bona fide, & titulo subjungitur: *Cautum est, ut res quidem mobiles per triennium usucapiantur.* Consentit etiam jus Bavaricum. Cod. Maximil. p. 2. c. 4. §. 8. ibi: *Die bewegliche Ding in drey Jahren mit einem Titel (werden) verjaret.*

Pars 2. colligitur ex L. 2. & 3. C. de Praescript. 30. vel 40. annorum; quae leges quidem loquuntur de rebus immobilibus: verum ex iis recte ducitur etiam argumentum ad res mobiles privatorum; cum enim de his nihil sit speciale statutum pro casu, quo titulus deficit: hinc censendae sunt pari passu procedere cum rebus immobilibus. Ita argumentatur Holzman ex Schmalzgrueber. Adde, quod alias ad praescribendum sine titulo ex aequitate naturali majus tempus videatur requiri, quam cum titulo: atqui aliunde constat, quod ad praescriptionem 30. annorum titulus non requiratur.

Dixi



Dixi in conclusione 1. etiam pretiosæ; quia iura universaliter loquuntur, nec excipiunt res pretiosas. Dixi 2. *regulariter*; excipi enim debent res furtivæ, & aliæ, de quibus supra. Dixi 3. res *mobiles*, ita tamen, ut cum re mobili non præscribatur simul jus pignoris, posito, quod res fuerit oppignorata alicui creditori; nam ad præscribendum jus pignoris de jure communi ad minimum requiritur longum tempus, & de jure Bavariæ quinque anni inter præsentēs, & decennium inter absentes; nam *Landrecht* Tit. 9. art. 6. ita habet: *Wann aber solche fahrende Haab einem andern verpfändt ist, so ersizt der Inhaber Nuz, und Gewehr wider die Verpfändung balder nicht, dann in 5. Jahren gegen den, der im Land ist, und in 10. Jahren gegen den, welcher ist außer Lands.* Hoc quidem statuitur in jure patrio antiquo, an autem etiam de jure Maximiliano moderno id tenendum sit, de quo in illo nihil continetur, dubitari potest. Adducunt tamen annotationes Excellentiss. Dni. de Kreittmayr sanctionem, & ordinationem antiqui juris: an autem hæc ordinatio in suo valore maneat, dijudicent Legistæ, ad quos in simili casu mitti possunt, & debent consilium petentes.

Hoc etiam nota: quando res mobiles non per se præscribuntur, sed per modum accessorii, tunc neque ad earum præscriptionem requiritur triennium, sed quamprimum præscribitur res principalis, censetur etiam res accessoria esse præscripta.

Affero 2. Ad præscribenda bona immobilia Privatorum cum titulo de jure communi requiritur spatium 10. annorum inter præsentēs, & 20. annorum inter absentes: sine titulo autem utrobique requiritur, & sufficit tempus 30. annorum. Communis DD. Probationes utriusque partis desumuntur ex §. 1. Instit. de Usucap. & ex LL. pro 2. parte assertionis primæ citatis. 400

Dixi 1. *De jure communi*; hic enim attendenda sunt statuta particularium Provinciarum, & Regionum, si alicubi sunt contraria juri communi.

Dixi 2. *Inter præsentēs &c.* Præsentēs autem in proposito dicuntur illi, qui in eadem Provincia commorantur: absentes, qui



qui in diversis Provinciis habitant, five deinde res, quæ præscribitur, in eadem Provincia sita sit, five in diversa. Vide Reiffenstuel in Theol. morali T. 7. d. 6. n. 23. & seq. König dicit, respectu Clericorum eandem Provinciam reputari, & esse præsentem, qui sunt in eodem Archiepiscopatu. Jus Bavaricum novum Cod. Maximil. p. 2. c. 4. §. 8. pro absente habet illum, qui alibi, quam in loco supremæ ditionis Electoris Bavarie commoratur. Ratio autem, cur plus temporis concedatur, si præscribens, & ille, contra quem præscribitur, non sint præsentem in eadem Provincia, est; quia stante hac absentia ille, contra quem præscribitur, facilius ignorantiam rei suæ ab altero possessæ prætereundere, & non tam facile præscribentem ad iudicium trahere potest. Pichler etiam vult, absentiam, non ex Persona hic vel ibi versante, sed ex domicilio, vel ex loco, ubi fixit domicilium, dignosci debere. Quando aliquis partim absens, partim præsens fuit, tunc pro uno anno absentie semper duo sunt computandi. v.g. fuit aliquis præsens octo annis, & duobus absens, tunc ad præscriptionem rei immobilis requiruntur 12. anni; quia loco duorum annorum, quibus absens fuit, debent quatuor numerari.

Dixi 3. in utraque assertione: *bona Privatorum*; nam hic excipiendæ sunt res tam mobiles, quam immobiles Principum, ac fiscales, de quibus Art. præc. §. i. nec non res Ecclesiasticæ, de quibus Assert. seq., item res immobiles Civitatum, quæ 30. annis usufructuantur ex Novella III. cap. un. Imo si hæ Civitates sint status Imperii, tunc juxta P. Pichler n. 65. earum bona immobilia gaudent privilegio præscriptionis 40. annorum.

401

Assero 3. Ad præscribenda bona immobilia contra Ecclesiam, Monasterium, vel Hospitale, aut alias pias causas, cum vel sine titulo regulariter requiruntur, & sufficiunt 40. anni, excepta Ecclesia Romana, ac nonnullis Monasteriis, & Religiosis Ordinibus, qui speciali privilegio sunt muniti. Communis, ac certa; ita enim deciditur Authent. *quas actiones. C. de SS. Ecclesiis.* ac cap. *de quarta. c. ad aures. c. ad audientiam. de Præscriptionibus.*

Dixi



Dixi 1. ad præscribenda bona *immobilia* &c., inter quæ etiam numerantur jura spiritualia vg. eligendi Prælatum Ecclesiasticum: item jus decimandi, ac jus Patronatus, si hæc ultima duo jura spectent ad Ecclesiam, vel Monasterium &c.; si vero convenient alicui Laico, tunc ad ea præscribenda sufficit probabilius tempus longum, vg. 10. vel 20. annorum. ita P. Pichler. Pariter inter bona immobilia veniunt jura temporalia Ecclesiarum, & Monasteriorum, vg. jus pascendi, ligna cædendi &c.

Dixi 2. *contra Ecclesiam* &c. sub nomine Ecclesiarum, & bonorum Ecclesiasticorum non veniunt Clerici singulares quoad bona profana, & patrimonialia; contra hos enim præscribitur, sicut contra alios Laicos.

Dixi 3. *Regulariter requiruntur, & sufficiunt 40. anni cum vel sine titulo*; nam limitari debet conclusio in casu, quo præscribenti jus commune resistit juxta dicta n. 383.; tunc enim etiam præscriptio 40. annorum non currit, nisi assignetur titulus: sine hoc autem sola præscriptio immemorialis procedit. Sic 1. jus eligendi Capitulo illud habenti non potest adimi præscriptione privativa, nisi hæc sit 40. annorum cum titulo, vel immemorialis sine titulo; nam jus resistit taliter præscribenti cap. 1. *de Electione*. Aliud est, si præscribens tantum quærat una cum Capitulo interesse electioni. 2 Jus decimandi, competens ex titulo & officio spirituali, ut convenit Parocho; & Monasterio, cui Parochia est incorporata, sine titulo non præscribitur, nisi tempore immemoriali. cap. 2. *de Restitut. spoliatorum* in 6. 3. Sic & jus Patronatus contra Ecclesiam, quæ hoc jure fuit libera, non præscribitur, nisi tempore immemoriali, saltem si non adsit titulus. Vide Tridentinum sess. 25. c. 9. de Reform.

Dixi 4. *Excepta Ecclesia Romana* &c.; nam 1. contra bona Ecclesiæ Romanæ currit solum præscriptio centenaria, vel 100. annorum. c. 13. & 14. *de Præscript.*, & c. 2. *eod. tit.* in 6., in quo ultimo excipitur unicus casus his verbis: *Si post mortem hæreticorum (qui, dum viverent, Catholici putabantur) bona ipsorum a Catholicis eorum filiis, vel nepotibus, aut extraneis quibuscunque spatio 40. annorum fuerint bona fide possessa: sancimus, eos super*  
*P. Kick Theol. Tom. IV. D d d d bonis*



bonis hujusmodi (etiamsi ad Romanam pervenire deberent Ecclesiam (in hoc casu ulterius non esse molestandos. 2. Simili privilegio centenariæ præscriptionis gaudent Monasteria Ordinis Cisterciensis in superiore Germania ex concessione Urbani VIII. & domus Ordinum Mendicantium ex concessione Leonis X. & Pii IV., Arnoldus Rath, Pichler &c. Aliæ autem Ecclesiæ exemptæ hoc privilegium non habent, nisi agatur de jure exemptionis, nam si de hoc agitur, tunc simul agitur de præjudicio Ecclesiæ Romanæ, ut dicit Pichler. 3. Sexagenariæ præscriptionis privilegium accepit Ordo Benedictinus ab Eugenio IV. & Julio II., ut affirmant plures apud Pichler allegati, ut Arnoldus Rath, Haunold, Engel, Lessius.

402

Quæres 1. An res mobiles Ecclesiarum etiam præscribantur triennio, vel an ad earum præscriptionem requirantur 40. anni? R. Hoc esse dubium inter DD. Non pauci cum Pichler dicunt, sufficere possessionem triennalem ad usucapiendas res mobiles Ecclesiarum, saltem illarum, quæ sunt inferiores Ecclesia Romana. Probant 1. suam assertionem ex Auth. *quas actiones. C. de SS. Ecclesiis.* ubi expresse habetur, quod sufficiat præscriptio triennalis respectu rerum mobilium ad Ecclesias spectantium. 2. Jus civile universaliter ait, triennium sufficere ad præscribendas res mobiles, & jus canonicum non facit exceptionem circa res ad Ecclesias pertinentes. 3. Ex æquitate naturali; quia Ecclesia usucapit triennio res mobiles contra alios: ergo & alii contra Ecclesiam.

Verum Engel, Schmier, Reiffenstuel, Holzman putant, res mobiles Ecclesiarum eadem, qua bona eorum immobilia, gaudere præscriptione, scilicet regulariter tali, quæ 40. annis completur, saltem tunc, si tales res mobiles sunt pretiosæ. Ratio est 1., quia ex una parte jus civile, aliquid expresse statuens circa Ecclesias, non habet efficaciam aliquam: ex altera parte jus Canonicum requirit 40. annos ad præscribenda bona Ecclesiis propria, nullam distinctionem faciendo inter bona immobilia & mobilia. 2. Bona mobilia pretiosa Ecclesiarum in jure Canonico videntur æquiparari immobilibus, eo quod etiam res mobiles pretiosæ non possint alienari sine debitis solemnitatibus, si-

cut



cut & bona immobilia. Adeoque de bonis mobilibus pretiosis Ecclesiarum loquendo, videtur esse probabilius, quod ad eadem præscribenda tantum tempus requiratur, quantum ad immobilia: alia vero, quæ non sunt pretiosa, videntur triennio usucapi, ut Reiffenstuel in Jure Canonico tenet. Et sic aliquo modo concordari potest utraque sententia.

Quæres 2. Quando præscriptio dormiat, vel interrumpatur? Ante responsionem. 403

Nota 1. Juxta jura, & omnes Juristas, ac Th. Th. requiri continuam possessionem rei illius, quæ præscribitur. Et quidem hæc possessio non debet interrumpi unquam toto tempore, quod ad præscriptionem requiritur; si enim talis interruptio fieret, tunc possessio, per tempus præcedens habita, nihil valeret ad præscriptionem, sed deberet de novo inchoari.

Nota 2. Magnum esse discrimen inter *dormitionem*, & *interruptionem* præscriptionis; dormit enim tunc, quando ad tempus suspenditur ejus cursus, ita tamen, ut tempus præcedens, & subsequens dormitionem computetur, non autem intermedium, quo dormivit, aut suspensa fuit præscriptio: interruptitur tunc, quando supervenit tale impedimentum, quod facit, ut totum tempus præcedens nihil valeat ad præscriptionem. His not.


R. 1. Præscriptio prius cæpta, qua contra Pupillum deberet aliquid præscribi, dormit durante ætate pupillari, ita ut contra eum nulla præscriptio tunc currat: item respectu Minorennis durante minorennitate suspenditur saltem præscriptio ordinaria, non autem extraordinaria, L. 3. C. *Quibus non objicitur*. 2. Dormit præscriptio contra bona adventitia filiifamilias durante patria potestate, & contra bona dotalia uxoris vivente Marito: de quibus jam supra. 3. Præscriptio contra Ecclesiam dormit sede vacante, quando non habet Prælatum, vel quando habet aliquem, qui est impeditus agere ob censuram, aut captivitatem &c.; quia tunc Ecclesia censetur carere legitimo defensore. 4. Respectu omnium dormit præscriptio tempore pestis, & belli, quo tribunalia clauduntur; quia



quia generaliter contra non valentem agere non currit præscriptio.

R. 2. Præscriptio interruptitur naturaliter, & civiliter. *Naturalis* interruptio datur, quando ex post facto deficit unum ex requisitis ad præscriptionem: ut si præscriptioni, & possessioni bona fide, & legitime cœptæ superveniat mala fides. *Civiliter* interruptitur, quando nullum requisitum a parte rei deficit, juris tamen fictione censetur deficere: sic interruptitur per litis contestationem, ac per libelli oblationem, aut citationem judicalem. L. 2. & L. fin. C. de *annali exceptione*. extrajudicialis autem denunciatio non statim interruptit præscriptionem: tum, quia a jure talem vim non habet: tum, quia non statim bonæ fidei possessor tenetur credere illi, qui dicit, rem hanc ad se pertinere.

Hoc etiam nota, si Actor succubuerit in lite, vel sponte, aut ob pactum aliquod vel transactionem a lite cessarit, aut fraudulenter tantum (prout ex circumstantiis dijudicandum erit) ex animo interrumpendi possessionem & præscriptionem, litem moverit, tunc non interrupti præscriptionem, & perinde esse, ac si talis lis nunquam fuisset mota. Engel, Reiffenstuel & alii.



## ARTICULUS VII.

*De Præscriptione actionum, servitutum, debitorum indefinite contractorum, præstationum annuarum.*

§. I.

*De Præscriptione actionum, ac servitutum.*

404 **N**OTA 1. Actiones reales regulariter extinguuntur præscriptione ejusdem temporis, quo præscribuntur res mobiles, & immobiles, ac jura, in quibus fundantur. Verum quid sentiendum sit de præscriptione actionum seu realium, seu personalium,



nalium, aut quocumque nomine nuncupandarum, ad Theologos, qui tantum fori interni, non autem externi, & contentiosi curam habent, parum pertinet. Qui tamen majorem notitiam desiderat, eam apud Juristas, & Canonistas inveniet.

Nota 2. Hic recolenda esse ea, quæ n. 201. sunt dicta de servitute. Quibus adde, servitutem, vulgo *Grund-Dienstbarkeit* computari inter bona immobilia, ac dividi in realem, & personalem. *Personalis* tantum tres species sub se complectitur, scilicet usumfructum, usum, & habitationem, de quibus omnibus jam supra cit. num. est actum.

Nota 3. Servitutem *realem* aliam esse affirmativam, aliam negativam. *Affirmativa* est jus positivam actionem exercendi in fundo, vel ædificio alterius: ut vg. jus eundi per alterius agrum, ac jus immittendi tignum, vel trabem in domum alterius. *Negativa* est jus inhibendi, ne alter aliquid faciat in suo fundo, vel ædificio, vg. ne alter suas ædes altius tollat, ne luminibus meis officiat, ne fenestram adversus meas ædes faciat &c.

Nota 4. Aliam etiam esse servitutem *urbanam*, *eine Hausdienstbarkeit*, & aliam *rusticam*, *Feld-Dienstbarkeit*. utraque jam fuit allegato loco definita secundum acceptionem juris communis Cæsarei, a quo tamen videtur discordare jus Bavaricum. Proinde operæ pretium erit definitiones a statutis Bavaricis traditas propriis terminis allegare. Jam servitutem realem, seu prædialem in genere T. 26. art. 1. ita describit: *Eine Gerechtigkeit, welche jemand hat auf des andern Grund, oder Haus von wegen seines daran stossenden Grund, oder Haus.* Art. 2. ita definit servitutem urbanam, quod sit illa, *die einer auf des andern Haus, Stadt, Stallung, oder dergleichen Gebäu hat*: servitus autem rustica est, *die einer hat auf den Feld-Grundstücken, als Aeckeren, Wiesen, Gärten, Holzwachsen, Wasseren, Weyern, Auen, und dergleichen.*

Hinc patet, secundum jus Bavaricum prædium urbanum & rusticum non desumi ex usu urbano, vel rustico, sed ex ipsa natura, & qualitate horum prædiorum; si enim ea sint ædificia aliqua, tunc semper ad prædia urbana spectant: si vero sint  
D d d d 3 fundi,



fundi, agri, aut horti &c. inter prædia rustica numerantur. Idem de servitutibus cum proportionem intelligendum est.

Nota 5. Aliquas servitutes prædiales esse *continuas*, alias *discontinuas*. *Continuæ* sunt, quæ semel constitutæ actum continuum habent, semperque serviunt prædio dominanti, absque ulteriori facto hominis interveniente: Talis servitus est immissio tigni in alterius parietem; talis trabs semel immissa continuo manet immissa: item aquæductus semel factus per fundum alterius permanet, etsi nullum factum hominis amplius accedat. *Discontinuas* sunt, quæ semel constitutæ non habent semper actum continuum, eoquod usus talium servitutum consistat in exercitio hominum, quod non semper continuatur, ut iter *ein Fussteig*: actus *Trib*: via *Landstrassen*.

405

Resolvo 1. Servitus personalis, quam alii mixtam vocant, præscribitur cum titulo & bona fide 10. annis inter præsentem, & 20. inter absentes: sine titulo autem annis 30. Reiffenstuel L. 2. Decret. T. 26. n. 157. cum Lessio, Gomez, & aliis. P. L. fin. §. pariter finali. C. de *Præscript. longi temporis*. deciditur, circa usumfructum, & cæteras servitutes quoad præscriptionem idem esse observandum, quod observandum est in præscriptione bonorum immobilium: atqui bona immobilia cum titulo præscribuntur tempore ordinario, seu 10. annis inter præsentem, & 20. inter absentes, ac 30. annis sine titulo: ergo.

406

Resolvo 2. Servitus realis tam affirmativa, quam negativa, tam rustica, quam urbana, continua, vel discontinua cum titulo & bona fide de jure communi præscribitur contra præsentem 10. annis, & 20. contra absentem. Reiffenstuel laudatus n. 158. cum pluribus aliis a se citatis. Probatur hæc assertio ex lege finali mox allegata. Et hoc de jure communi: quid autem de jure Bavarico ulterius requiratur, statim patebit numeris seqq.

407

Resolvo 3. Ad præscriptionem servitutis continuæ etiam sine titulo, interveniente tamen scientia, & potentia adversarii, sufficiunt 10. anni inter præsentem, & 20. inter absentes. Reiffenstuel cit. n. 159. P. ex L. 1. & 2. C. de *Servitutibus*, & aqua.



*aqua.* ubi expresse dicitur, servitutem, quæ habet causam continuam, sciente adversario, nec reclamante, acquiri per longi temporis spatium: atqui longi temporis spatium sunt 10. anni inter præsentés, 20. inter absentes: ergo. Hoc de jure communi. Statuta autem Bavarica, licet non requirant titulum ad præscribendas longo tempore, seu decennio &c. servitutes continuas, exigunt tamen præter scientiam, ac potentiam adversarii, ut hæc scientia & potentia adversarii probetur. Tit. cit. Art. 5. quæ probatio de jure communi non requiritur, ut notat Chlingensperger. Adjungit laudatum jus Bavaricum mox cit. Art. 5.: *Hätte aber jemand ein solche Dienstbarkeit, deren Gebrauch ohne Unterbruch beschicht, nicht nur 10., oder 20. sondern 40. Jahr hergebracht, der ist nicht verbunden zu beweisen, daß sein Gegentheil solches gewußt, gestattet, und geduldet.* Quare secundum jus Bavaricum in quadragenaria præscriptione talis probatio scientiæ, & potentiæ adversarii non requiritur. Verum & in hoc ipso iterum jus Bavaricum a jure communi differt; nam de jure communi videntur 30. anni sine titulo, & scientia ac potentia adversarii sufficere ad præscribendas ejusmodi servitutes continuas. L. 3. C. de præscriptione 30. & 40. annorum. Chlingensperger jam laudatus.

Resolvo 4. Servitus discontinua, ut jus agendi currum, vel jumentum per fundum alterius, absque titulo solum præscribitur tempore immemoriali. Reiffenstuel cit. n. 160., Chlingensperger de differentiis inter jus Bavaricum, & Commune Tit. 26. Art. 2., & alii contra alios. Desumitur ex L. servitutes. ff. de servitutibus. & clare habet jus Bavaricum Landrecht Tit. 26. Art. 3. Neque ad talem præscriptionem immemoriam requiritur scientia, & potentia adversarii, ut clare iterum habet cit. jus Bavaricum Art. 5. ubi dicit: *ein solche lange Zeit ersetzt alles*, scilicet titulum, & scientiam, ac potentiam adversarii.

Si autem tempore ordinario aliquis in Bavaria vult præscribere servitutem discontinuam, sequentia observare debet: *Es wäre dann, daß einer zu Behauptung einer solchen unterbrochenen Dienstbarkeit sich auf eine Verjährung von 10. oder 20. Jahren wollte gründen: in solchen Fall muß man nicht allein einen zu der Verjährung tauglichen Titel, sondern auch, daß der Gegentheil*



theil sein Innhaben, und Gebrauch der Dienstbarkeit gewußt, zuge-  
sehen, und gedultet hab, beweisen &c. Landrecht Tit. cit. art. 5.

409

Resolvo 5. Servitutes reales tam discontinuæ, quam con-  
tinuæ, item servitutes personales extinguuntur per non usum  
longo tempore, seu 10. annis inter præsentēs, & 20. inter ab-  
sentes. Reiffenstuel, & alii. P. ex L. *Sicut usumfructum* 13. C.  
*de servitutibus*, & *aqua*. ubi nostra assertio expresse statuitur de  
usufructu, ac cæteris servitutibus.

Excipit ab hac assertione Pichler habitationem, quæ est  
servitus personalis, ob legem 10. in principio. ff. *de usu & ha-  
bitatione*. dicentem, quod habitatio per non usum non amittatur.  
Verum Reiffenstuel de habitatione pariformiter loquitur, sicut  
de usufructu, & usu, ac cæteris servitutibus, utique ob legem 10.  
mox citatam.

Hoc tamen notandum est de servitutibus *realibus*, nimirum,  
quod eæ, si sint rusticæ, tollantur per merum non actum: si  
vero urbanæ sint, requiratur, ut dominus prædii servientis bo-  
na fide faciat actum possessorium positivum, & per eum possi-  
dere incipiat suam libertatem. Sic jus immittendi trabem in al-  
terius parietem non perdis, nisi alter positivam actionem huic  
juri contrariam exercuerit, e. g. obstruendo foramen, vel ejici-  
endo trabem bona fide: huic actioni si acquiescis, incipit alter  
possessionem libertatis ab hac servitute, quam possessionem si  
10. annis &c. bona fide continuat, præscribit contra te exem-  
ptionem a servitute. Quare tunc etiam tempus 10. vel 20. an-  
norum est computandum a tali actu contrario. Ita desumunt  
Juristæ ex L. *Hæc autem jura*. 6. §. *item si tigni*. 1. ff. *de servi-  
tutibus urbanorum prædiorum*. Aliud est in servitute rustica, ubi  
sola cessatio, & non usus sufficit ad talem servitutem amitten-  
dam. Jus tamen Bavaricum quoad hoc punctum non videtur  
attendere discrimen inter servitutem urbanam, & rusticam, sed  
aliud, quod intercedit inter servitutem continuam & discontinu-  
am: ad continuam requirit actionem positivam pro possessione in-  
choanda, non autem ad discontinuam. Ita Chlingensperger in Tit.  
26. & Art. 7. juris Bavarici, & videtur ipse textus consentire.

Sed



Sed petes, quid dicendum de iis servitutibus, quibus ille, 410  
qui jus activum servitutis habet, non potest continuo uti, et-  
si vellet. v. g. ex pacto, vel alia de causa Petrus tantum habet  
jus, ut certis diebus, aut temporibus eat, vel currum agat per  
fundum alterius, ita, ut post usum servitutis semper debeat in-  
terponi non usus, isque quandoque longior, quandoque brevi-  
or, per annum, mensem, septimanam &c. durans? Quo tem-  
pore talis servitus per præscriptionem expirat, an ordinario,  
vel extraordinario?

R. ad hoc quæsitum verbis formalibus juris Bavarici Tit.  
26. art. 2. ibi: *Seind es Dienstbarkeiten, die mit Unterbruch ge-  
braucht werden, so ist wieder ein Unterschied zu halten: dan eint-  
weders ist einer befugt, solche Dienstbarkeiten nicht jederzeit, wann  
es die Gelegenheit, und Nothdurft erforderet, sondern allein um-  
gewechslet zu gebrauchen, und da solche Umwechslung nur auf ein  
Stund, einen Tag, oder Wochen um die andern beschicht, so wird  
sie inner 10. zwischen denen, die im Land, und 20. Jahr zwis-  
schen denen, so ausser Land, durch Unbrauch verlohren. Hat aber  
jemand ein Dienstbarkeit allein ein Monath, oder Jahr um das an-  
der zu gebrauchen, so wird zu Verliehrung derselben doppelte Zeit,  
nemlich 20., und 40. Jahr erfordert. Ita jus Bavaricum, cui per  
omnia videtur concordare jus civile. L. Si sic constituta. 7. §. Si  
vero alternis diebus. ff. Quemadmodum servitus amittatur.*

Non desunt tamen, qui aliquam disconvenientiam inter jus  
Bavaricum, & commune volunt statuere: 1. in hoc, quod in-  
terruptio hebdomadalis jam sit longior, & consequenter pro-  
pter eam tempus præscriptionis duplicandum de jure civili. 2.  
quod de jure civili in longiore quoque interruptione sufficiat  
tempus 20. tantum annorum etiam inter absentes. Verum, quod  
hoc alterum attinet, puto, probabilius requiri 40. annos inter  
absentes; nam verba legis citatæ sunt: *duplicato constituto tem-  
pore amittitur*: atqui tempus alias constitutum sunt 20. anni in-  
ter absentes: ergo. Videantur Hermanus Chlingensperger, ac  
Illustriss. D. L. B. de Schmid in laudatum Tit. & Art. juris Ba-  
varici.



411

Quæres iterum: An ad præscriptionem servitutis, vel exemptionis a servitute requiratur bona fides theologicæ talis? R. affirmative; id enim aperte colligitur ex cap. fin. de *Præscriptionibus*. superius allegato. Hinc

Colliges 1. Quando ad præscribendam libertatem a servitute requiritur aliquis actus positivus, non posse talem præscriptionem procedere, nisi bona fide, & sine scientia juris alterius ejusmodi actus ponatur; nam, si scienter contra jus alterius aliquid agerem, vg. trabem ejus ex meo muro ejicerem, peccarem, & sic essem in mala fide.

Colliges 2. Quando ad præscribendam exemptionem a servitute requiritur solus non usus alterius sine actu positivo, potes præscribere cum scientia juris alterius. Sic: etsi scias, quod Petrus habeat jus pecora agendi per tuum fundum, non debes desuper eum monere, si omittat uti hoc jure, sed potes expectare, donec tempus ad præscribendum necessarium effluxerit, & tunc libertatem ab hac servitute præscribere. Ratio est: quia nemo tenetur alterum monere, ut jure suo utatur, sed potest aliquis sine labe injustitiæ eum permittere in neglectu sui juris, & tandem contra illum præscribere.

Eodem modo intervenit bona fides in præscriptione pœnæ: v. g. si alicujus bona in pœnam non soluti vectigalis sunt ad dicta fisco, intra quinquennium præscribuntur contra fiscum ex L. 3. C. de *vectigalibus*, & *commis*; delinquens enim pergit bona fide possidere rem suam, sciens, se non teneri esse executorem suæ pœnæ, nec ultro debere solvere mulctam a Principe, vel ejus Officialibus neglectam. Ratio horum omnium est: quia nec servitus, nec pœna debetur, nisi exigat is, qui habet jus exigendi: si ergo talis negligat exigere, sibi imputet. Hac ratione possunt plures actiones præscriptione extinguí, si Actor neglexerit eas proponere intra tempus a jure præfixum: prout tollitur actio injuriarum lapsu unius anni, si injuriatus eam proponere neglexerit: sicut & privilegium Nundinarum perditur lapsu decennii, quando illud impetrans a Principe, per tantum tempus eo usus non fuit. L. 1. ff. de *Nundinis*.

§. II.



## §. II.

*An, & quo tempore debita indefinite contracta possint præscribi a debitore sciente jus alterius?*

NOTA 1. Quæri hic, an ille, qui scit, se debere alteri aliquid, v. g. certam summam pecuniæ, quam ab eo mutuo accepit, possit non obstante sua scientia præscribere contra creditorem, & per præscriptionem se liberare ab onere solutionis faciendæ?

412

Nota 2. Quæstionem esse de illis debitis, quorum solutio determinato tempore non exigitur; hæc enim sunt debita *indefinita*, quorum scilicet solutionis tempus non est definitum, vel determinatum; si enim certum tempus pro solutione esset statutum, vel eam creditor legitimo tempore exegisset, tunc debitor non solvens non esset amplius in bona fide, consequenter non præscriberet.

Nota 3. Debitum posse tripliciter exigi a debitore: 1. per conventionem partium; si enim ex pacto, & conventionem certa dies solutioni est destinata, tunc hæc ipsa dies interpellat pro creditore, & hujus loco exigit solutionem. 2. per juris dispositionem; nam & juris interpellatio æquivalet exactioni, & interpellationi hominis. cap. fin. *de Locato*. Sic jus ipsum in contractu venditionis & emptionis exigit, ut emptor, quamprimum acceperit mercem, reddat pretium, ne simul mercem, & pretium retineat. 3. potest exigi per ipsum creditorem. Si autem uno ex istis modis exigatur debitum, & illud non reddatur, tunc mora debitoris non est sine culpa: cum culpa autem non stat bona fides, ad omnem præscriptionem necessaria.

Quare controversia solum agitur de debito, cujus solutionem nec exigit dies certa ex conventionem statuta, nec juris constitutio, neque ipse creditor; si enim nullo ex his modis exigatur debitum, tunc juxta multos videtur debitor non esse in culpa, consequenter habere possessionem bonæ fidei, proinde & posse præscribere. H. N.



413

Affero : Talia debita indefinite contracta nequidem præscriptione longissimi temporis, seu 30. annorum, possunt præscribi a debitore sciente jus creditoris. Covarruvias, Rath, Haunoldus, Engel, Schmalzgrueber, Reiffenstuel contra P. Schmier, Pichler, nostrum Holzman, & plures alios ab his, & aliis citatos.

Prob. 1. Qui sciens, rem esse alienam, eam nihilominus possidere incipit, vel continuat, est in mala fide, & non præscribit, ut constat ex cap. ult. *de Præscript.* sæpius jam allegato : ergo etiam, qui scit jus alienum, & illi non satisfacit, est in mala fide, & non præscribit; quia nomine rei etiam venit jus. L. 23. ff. *de V. S.* ibi: *Rei appellatione & causæ, & jura continentur.* Subst. atqui in nostro casu debitor scit jus alienum, & non satisfacit illi per solutionem debiti indefiniti : ergo talis debitor est in mala fide, & non præscribit.

Prob. 2. Vel ejusmodi debitor habuit animum solvendi, vel non habuit? si habuit animum solvendi, tunc non fuit in quasi possessione libertatis a debito, sed creditori suam obligationis activæ possessionem integram reliquit, consequenter non potuit contra creditorem præscribere; cum sine possessione non currat præscriptio. Reg. 3. §. in 6. Si autem non habuit animum solvendi, tunc non egit ex bona fide; nam ille, qui debitum certum non vult solvere, non est in bona fide: atqui sine bona fide non subsistit præscriptio.

Neque respondeas cum Pichlero, debitorem habere animum solvendi, sed sub conditione, si creditor exegerit: & sic eum esse in bona fide, & quasi possessione suæ libertatis, quæ tollitur tantum per exactionem. Ast contra hanc præcipuam Ariorum responsionem, quæ continuo ab ipsis datur, est: Talis debitor debet habere animum absolutum solvendi, & si hunc non habet, aut tantum sub conditione illa velit solvere, est in mala fide: ergo nulla responsio. A. p. absolute se obligavit ad solvendum, dum tale debitum contraxit. Neque obstat, quod tale debitum sit indefinitum; nam etiam in debito indefinito manet absoluta obligatio solvendi, donec prudenter præsumi possit.



fit, illud esse a Domino remissum: atqui per hoc, quod creditor non exigit, non statim censetur illud esse remissum: ergo.

Confirm. Quamvis creditor non petierit, ipse tamen debitor scivit suam obligationem satisfaciendi, quæ pro creditore interpellat: ergo, etsi creditor non exigit, tamen tenetur præstare solutionem, & quidem absolute, tempore saltem arbitrario, & illo, quo creditor prudenter præsumitur, velle fieri solutionem. Adde, quod morosi tantum, & tergiversantes debitores soleant importunas exactiones expectare: alii autem prudentiores agnoscunt se obligatos ad satisfaciendum suis creditoribus, etsi nulla ab ipsis fiat exactio.

P. 3. Per se absurdum videtur, quod debitor possit præscribere libertatem a solutione præstanda ex eo, quia creditor ex urbanitate, aut alia rationabili causa tacuit, & non petiit debitum: ergo. Accedit, quod exactio, vel non exactio debiti ex parte creditoris habeat speciem actus meræ facultatis, qui potest, ac solet fieri, & non fieri: atqui per actus meræ facultatis non inducitur præscriptio. Atque hæc ratio videtur tunc omnino procedere, quando ex natura contractus debitori datur dilatio voluntaria ad solvendum, prout contingit in debitis indefinite contractis.

Objic. 1. Textus juris Canonici, bonam fidem in præscriptione exigentes, loquuntur solum de præscriptione rerum, non de præscriptione obligationum, & debitorum. c. ult. de Præscript.: ergo ad hoc, ut aliquis præscribat obligationibus & debitis, non requiritur bona fides. R. 1. retorq. Argum. ergo neque requiritur bona fides ad præscribendum obligationibus, & debitis definitis: quod negabunt AArii. R. 2. N. a. Ratio negandi 1. patet ex prima probatione nostræ assertionis. 2. Capitulum istud generaliter derogat omni præscriptioni, quæ sine peccato non potest fieri: atqui etiam præscriptio obligationum, & debitorum, quæ fit mala fide, non potest fieri sine peccato. 3. Per illud capitulum annullatur præscriptio, qua res alienæ possidentur mala fide: atqui, dum debita non solvuntur, saltem æquivalenter possidentur res alienæ, & quidem mala fide, si quis vellet ista omnino non solvere: ergo.

E e e e 3

Objic.



Objic. 2. Servitus rustica potest præscribi ab eo, qui scit, se eam debere, si nempe Dominus ea non utatur: ergo etiam potest debitum præscribi ab eo, qui scit se debitorem, dummodo creditor illud non exigat. R. N. c. & parit. disparitas est: quia servitus tantum debetur sub conditione, si alter, qui habet jus servitutis activum, exigat: ast debitum indefinitum debetur absolute, etsi creditor non exigat. Eadem est responsio, si objiciatur, quod a sciente obligationem suam possit præscribi actioni pœnali, ac pœnis; nam hoc ideo verum est: quia istæ pœnæ tantum debentur, si exigantur, non autem absolute: adeoque ille, qui non solvit, neque vult solvere ejusmodi pœnas ante exactionem, est in bona fide: non vero est in bona fide debitor, qui non vult solvere, nisi exigatur debitum.

Objic. 3. Proprietarius, seu Dominus directus præscribit usumfructum contra usufructuarium, si hic longo tempore non utatur suo jure, seu usufructu, atqui huic præscriptioni in Domino directo non obstat scientia juris alieni, quod habet usufructuarius: ergo idem a pari in nostro casu. Ant. constat ex dictis. R. N. c. & parit. Nam aliquæ obligationes sunt, quæ suapte natura tantum referuntur ad patiendum, vel subeundum aliquod onus, si ab altero petatur, vel exigatur. Sic obligatio respondens servituti rusticæ ordinarie obligat solum ad aliquid patiendum, v. g. ad permittendum transitum, si scilicet petatur. Talis obligatio ex parte Domini directi est, quæ respondet usufructui, & usufructuario; debet enim vi hujus obligationis Dominus directus permittere usufructuarium colligere fructus, posito, quod velit eos colligere. Hinc, si usufructuarius negligit colligere fructus, tunc culpa ipsius solius est, non autem Domini directi, qui proinde, altero negligente collectionem fructuum, & usum sui juris, bona fide & absque peccato incipit possidere exemptionem a servitute ususfructus.

Aliud est in iis obligationibus, quæ sua natura tendunt ad agendum, vel omittendam actionem: sic obligatio restituendi debitum tendit ad agendum, obligatio autem proveniens ex servitute urbana negativa refertur ad non agendum, ad non ædificandum altius, ad non officiendum luminibus alterius, ad non aperi-

aperi-



aperiendam fenestram versus hortum alterius &c. Tales autem obligationes nequeunt ullo tempore per præscriptionem extinguī ab illo, qui habet scientiam juris alterius, ut recte docet Reifsenstuel Tit. de Præscript. n. III. Ratio est: quia tales obligationes nequeunt præscriptione deleri, nisi vel omittendo actum debitum, v. g. solutionem debiti, vel exercendo actum oppositum juri alterius: atqui, qui scienter omittit actum debitum, vel facit actum oppositum juri alterius, peccat, & est in mala fide: ergo. Quæ doctrina ad alia multa dubia expedienda est summopere notanda.

Objic. 4. Hæres præscribit Legatum alteri relictum, si Legatarius 30. annis non petat Legatum, non obstante, quod hæres sciat, illud esse relictum alteri: ergo idem a pari in nostro casu. R. N. a. quod difficulter probabit P. Pichler, qui ita argumentatur. Saltem in foro conscientiae talis hæres adhuc obligatur ad reddendum Legatum illi, cui erat relictum: quidquid sit de foro externo, in quo post 30. annos elapsos, si agere vellet, ejusmodi Legatarius non amplius audiretur, ut ex seq. objectione constabit. Quare

Objic. 5. L. Sicut. 3. C. de Præscript. 30. annorum. dicitur, quod lapsu 30. annorum omnis actio extinguatur: ergo & actio personalis, quam habet creditor adversus debitorem: si autem creditor non habet amplius actionem, tunc neque habebit jus in debitum. R. D. a. actio in se formaliter talis extinguitur, quatenus talis creditor non amplius auditur, si velit post 30. annos agere in foro externo C. a. extinguitur etiam fundamentum hujus actionis, seu debitum in foro interno conscientiae N. a. Forum externum sæpe non admittit aliquam actionem ad amputandas lites, ubi tamen obligationem in foro conscientiae relinquit: sic qui læsus est infra dimidium in contractu emptionis, non potest agere in judicio, & foro externo, quamvis interea lædens teneatur adhuc in conscientia refarcire damnum læso.

Idem dic de actione redhibitoria, & quanti minoris, quibus venditor, rei venditæ vitium sciens, proinde in mala fide existens, præscribit, priori quidem spatio 6. mensium, & alteri



teri lapsu unius anni : imo in Bavaria , saltem secundum jus antiquum, utrique actioni 14. dierum spatio præscribitur. *Landrecht* Tit. 6. Art. 4. Sic & exceptio *non numeratæ pecuniæ* post biennium non potest amplius opponi in iudicio. R. enim ad hæc universaliter : in his casibus non proprie præscribitur, sed post lapsum temporis negatur tantum actio in foro externo ad minuendas lites, remanente interea obligatione in conscientia ad refarciendum damnum parti læsæ.

Objic. 6. Talis non solvens debitum, quod non exigitur, non agit contra jus alterius, nec peccat : ergo habet bonam fidem. R. D. a. non peccat, si non habeat animum solvendi, sed velit solutionem penitus subterfugere N. a. si habeat animum solvendi *subd.* tunc non peccat quidem, sed non habet possessionem requisitam ad præscriptionem C. a. habet N. a. Explicatio responsionis patet ex probationibus.

Objic. 7. Creditor non exigens debitum per 30. annos, censetur illud remittere : ergo eo ipso debitor non tenetur illud solvere. R. N. a. universaliter ; quia sæpe potest adesse causa non exigendi tale debitum, v. g. urbanitas, metus reverentialis, oblitio &c. ; quin propterea censeatur creditor velle tale debitum remittere, maxime si debitum sit magnum ; quia ordinarie ab hominibus tam magna debita condonari non solent.

### §. III.

*An, & quanto tempore præscribi possint, aut extingu præstationes annuæ?*

415 **NOTA 1.** Certum videri, quod jus petendi, exigendi, & accipiendi annuos redditus, census &c. possit præscriptione acquiri ; nam si alia jura possint obtineri per præscriptionem, cur non etiam hoc ? Unde Pichler judicat, 30. annis tale jus præscribi posse, & Schmalzgrueber ait, hanc esse communem Doctorum sententiam.

**Nota 2.** Magnam controversiam esse, an etiam hæc præstationes 30. vel 40. annorum præscriptione penitus extinguantur ?



*§. III. De Præscriptione Præstationum annuarum.* 593

tur? v. g. Petrus obligatus ad 100. florenos, singulis annis pendendos Paulo, omisit hanc pensionem præstare continuis 30. annis, fide bona credens, se non esse obligatum. Modo quæritur, an præscripserit huic obligationi ita, ut neque imposterum amplius ad talem pensionem teneatur, neque pro annis præcedentibus obligatus sit satisfacere?

Nota 3. Sat graves DDes. esse, qui cum Engel contendunt, quod per omissionem præstationum annuarum, per 30. vel 40. annos factam, equidem præscribatur obligationi, imposterum tales pensiones præstandi, & consequenter hæc obligatio universaliter, ac in perpetuum extinguatur: negant autem mordicus, sic etiam universaliter præscriptum esse omnibus præstationibus, ac pensionibus præteritis, hocce tempore omisis. Rationem dant: quia, cum singulis annis fuerit solvenda aliqua pensio, hinc ex omissione talis pensionis cujuslibet nascitur aliqua distincta actio, per distinctam & peculiarem præscriptionem extinguenda. Sic si anno 1700. omisisti solvere pensionem annuam in 10. florenis consistentem, & sic perexististi omittere usque ad annum 1740., tunc anno 1730. præscribis primæ, & unicæ pensioni, quam debuisses pendere anno 1700.; præstationem autem alteram, quam debuisses solvere anno sequenti, scilicet 1701., præscriptione primum extinguis anno 1731., & sic successive semper singulis annis unam pensionem extinguis, a cujuslibet omissione 30. annos completos numerando, reliquis autem, a quarum omissione necdum 30. completi anni sunt elapsi, primum annis futuris præscribere potes. Aliud dicunt esse de præstationibus futuris; nam si per 30. vel 40. annos secundum dicenda bona fide omisisti solvere censum annuum &c. tunc anno 30. completo præscribis immunitatem ab obligatione pendendi tales præstationes; sublata autem obligatione corrumpitur universaliter debitum respectu omnium præstationum. Ita isti ratio- cinantur. Verum contra illos

Affero: Hujusmodi annuis debitis, & obligationibus contra privatum 30., contra Ecclesias & Monasteria 40. annorum cessatione præscribitur, sine ulla distinctione inter præstationes præteritas, & futuras. Ita Haunoldus, Christophorus Chlingen-  
*P. Kick Theol. Tom. IV.* 416  
Ffff iper-



spenger L. 2. Instit. de Ufucap. q. 24. Arnoldus Rath, Schmalzgrueber, Pichler, & alii.

Prob. 1. L. Sicut. 3. & L. Omnes. 4. C. de Præscript. 30. vel 40. annorum, universim statuitur, quod tanto tempore extinguatur omnis actio: adeoque & illa, quæ datur ad exactiones annuas.

Prob. 2. ex L. Eos. 26. C. de Usuris. ubi deciditur, quod 30. vel 40. annorum præscriptione tollatur obligatio solvendi usuras tam præteritas, quam futuras: atqui usuræ sunt præstationes quædam annuæ: ergo. Verba legis sunt: *Eos, qui principali actione per exceptionem* (id est, præscriptionem) 30. vel 40. annorum sive personali, sive hypothecaria ceciderunt, jubemus, non posse super usuris, vel fructibus præteriti temporis aliquam movere quæstionem, dicendo ex iisdem temporibus eas velle sibi persolveri, quæ non ad triginta, vel quadraginta præteritos annos referuntur, asserendo, singulis annis earum actiones nasci; principali enim actione non subsistente, satis supervacuum est, super usuris vel fructibus adhuc judicem cognoscere.

Prob. 3. ex cap. de quarta. 4. de Præscriptionibus. juxta quod Clericus quadragenaria præscriptione extinguit obligationem, solvendi Episcopo annuatim quartam partem decimarum, & obligationum funeralium: ergo de jure Canonico quadragenaria præscriptione extinguuntur annua debita, & quidem tam præterita, quam futura; nam citatum capitulum absque ullo discrimine inter debita præterita & futura illimitate admittit talem præscriptionem.

Hæc sententia etiam de jure Bavarico est recepta Cod. Maximil. p. 2. c. 4. §. 8. ibi: *Ist auch 2. in Präscribirung jährlicher Zinsen, oder Verrechnungen nicht nöthig, jede derselben besonders zu verjähren, sondern sie werden alle zusammen in einer Zeit sowohl active, als passive verjähret.*

417

Objic. 1. L. Cum notissimi. 7. §. ult. C. de Præscript. 30. vel 40. annorum. sic dicitur: *In iis etiam promissionibus, vel legatis, vel aliis obligationibus, quæ dationem per singulos annos, vel menses, aut aliquod singulare tempus continent, tempora præscriptio-*  
num



§. III. De Præscriptione Præstationum annuarum. 595

num non ab exordio talis obligationis . sed ab initio cujusque anni vel mensis , vel alterius singularis temporis computari manifestum est. Ex qua lege clare deducitur , præscriptionem respectu omnium talium præstationum non simul & semel inchoari ab exordio , dum prima præstatio omittitur , sed singulas præscriptiones a singulis annis , quibus pensiones omittuntur , inchoari. Quare & quælibet præstatio omissa peculiarem , & sibi propriam præscriptionem exigit juxta explicationem in Notandis datam. Et hæc est præcipua objectio , quæ contra nos potest fieri. Verum

R. Explicando legem : Imperator in hac lege solum statuit , quod præscriptio non incipiat statim ab exordio , quo obligatio per promissionem , vel legatum est constituta , & inchoata : bene autem quovis illo anno , quo primitus intermissa est solutio , & pensio annua. Nec te moveat , quod lex dicat : *tempora præscriptionum* ; hoc enim non dicit , quasi singulæ præstationes omissæ singulas exigèrent præscriptiones , sed loquitur tantum relate ad præcedentia , ubi pariter in plurali ait : *in iis promissionibus , vel legatis*. Dein in fine addit : *manifestum est* ; non autem manifestum est , a singulis annis singulas inchoari præscriptiones : bene vero nostra sententia quoad inchoationem est manifesta.

Objic. 2. Pensiones annuæ sunt obligationes in certum diem , vel sub conditione ; quia tantum certo tempore , vel sub conditione temporis evenientis solvi debent : atqui obligationibus in certum diem , vel sub conditione non potest præscribi , nisi dies advenerit , aut conditio fuerit impleta , ut dictum est n. 397. & habetur L. *cum notissimi*. cit. §. 4. ergo harum præstationum præscriptio non potest inchoari ante singulos annos , quibus debent solvi. R. N. M. nam ille , cui debentur præstationes annuæ , habet ad has absolutum , & purum jus , quod parit etiam unam tantum , & absolutam obligationem , quamvis effectus hujus obligationis , seu præstationes sint diversæ , & diversis temporibus pendi debeant. Aliud est de obligationibus in certum diem , vel sub conditione ; hæc enim ante illum diem , & adventum obligationis neque quoad actum primum , seu ipsum jus existunt : consequenter non possunt præscriptione extingui ; nam quod necdum est , neque extingui potest.



Objic. 3. Anni, quibus hæ præstationes debentur, sunt distincti: ergo & obligationes eas pendendi sunt distinctæ, consequenter & distinctis præscriptionibus tolli debent. R. N. c. nam unum est jus has præstationes exigendi: ergo & una obligatio easdem pendendi, quæ una præscriptione tolli potest.

Objic. 4. Debitor, dum prima vice omittit pensionem annuam præstandam, non possidet immunitatem a præstationibus futuris sequentium annorum: ergo dum prima vice omittit talem pensionem, non potest incipere præscriptionem immunitatis pro sequentibus annis; cum aliquis non possit incipere præscriptionem illius rei, cujus non cepit possessionem. A. p. obligatio pendendi pro annis futuris necdum existit, cum singulis annis incipiat nova obligatio: ergo neque immunitas ab hac obligatione pro futuris annis potest jam hoc præsentis anno existere, & possideri. R. N. a. utrumque; nam obligatio hæc datur simul & semel quoad omnes pensiones annuas, etiam futuras, quamvis hæ non debeant simul pendi. Hinc non singulis annis oritur nova obligatio, aut novum jus tales pensiones exigendi, sed perdurat antiquum: ita quoque tota immunitas quoad omnes pensiones, etiam futuras, possidetur simul, & hæc possessio incipit, quando præscribens bona fide desinit eas solvere, & ita se habet, ac si esset liber ab omni obligatione easdem præstandi secundum dicta superius.

418

Quæres: An præscriptio legitime completa iterum rescindi possit? R. affirmative; rescinditur enim, dum adversus eam restitutio in integrum conceditur. Solet autem concedi 1. Minoribus quadriennio continuo a die, quo Majores facti sunt, id est, ab anno 25. completo usque ad annum 29. completum. L. un. C. *Si adversus Usucapionem*. 2. Ecclesiis, & piis locis integro quadriennio, numerando a die, quo re intellecta integrum fuit restitutionem petere. ca. 1. & 2. *de Præscript. in 6*. 3. ex causa, quæ Judici justa videbitur, restitutio etiam indulgetur Majoribus L. 1. ff. *ex quibus causis major*. qualis causa justa censetur, si legitime constet, aliquem non potuisse præscriptionem interrumpere per litis contestationem ob absentiam causa Reipublicæ, studiorum, vel aliam similem rationem. An vero talis cau-

sa



sa etiam sit ignorantia prioris Domini, dubium est: sententia tamen id negans Juri videtur conformior. Certe, si ignorantia prioris Domini causa foret sufficiens præscriptionis, quilibet contra præscribentem deberet, vel posset restitui in integrum, & sic vix unquam finis præscriptionis obtineretur, neque litium foret finis, prout consideranti liquet.

Hæc omnia de præscriptione vim habeant de Jure communi: quid autem sit de Jure Bavarico, & aliis Statutis particularibus alicubi vigentibus, videatur ibidem, & consulantur Jurisconsulti talium statutorum, & consuetudinum periti.

## DISSERTATIO V.

### De Justitia, & Injuria.

#### ARTICULUS I.

*Quid, & quotuplex sit justitia, ac quale objectum habeat?*

##### §. I.

*Varia notanda de Justitiæ natura, & divisione.*

**N**OTA 1. Justitiam, cujus nomen a justo derivatur, varie 419  
posse sumi: 1. pro collectione omnium virtutum, quomodo accipitur Matth. 3. *Decet nos implere omnem justitiam.*  
2. pro justitia originali. 3. pro gratia sanctificante, seu pro forma nostræ justificationis, a quo homo justus dicitur, ut patet ex Trident. sess. 6. c. 7. 4. ad propositum autem sumitur pro speciali virtute morali, ac ab Ulpiano L. *Justitia. ff. de J. & J.* describitur, quod sit *constans & perpetua voluntas jus suum cuique tribuendi.* quæ descriptio hunc sensum facit: *Justitia est virtus moralis inclinans ad jus suum cuilibet tribuendum.*

F f f f 3

Dici-



Dicitur 1. *Virtus moralis*: tum, quia non est virtus theologia: tum, quia est virtus voluntatis, non autem intellectus. Dicitur 2. *inclinans ad tribuendum cuilibet*, id est, alteri; nam justitia est virtus ad alterum: alteri ergo debet tribuere jus passivum, seu debitum, & quidem *legale*, ac stricte tale: per quod differt ab omnibus aliis virtutibus, quæ non inclinant ad jus rigorosum alteri tribuendum. Sic pietas, Religio &c. etsi sint virtutes ad alterum, tamen alteri non tribuunt vere & stricte dictum jus. Tribuitur autem jus vel negative, vel positive, hoc est, vel faciendo, quod oportet facere, vel omittendo, quod oportet omittere, ad servandum illæsum jus alterius. Ex quibus.

Nota 2. Ad veram justitiam requiri sequentes conditiones. 1. requiritur altereitas Personarum non solum physica, sed & moralis; nemo enim justitiam erga seipsum exercere dicitur. Sic qui equitat in equo suo, aut utitur jure suo, exercet quidem actum dominii, non autem justitiæ, neque per hoc est justus positive, sed solum negative, quatenus non est injustus, & nemini facit injuriam. Quare justitia semper tendit in alterum, & reddit alteri, quod illi debetur. Atque hæc altereitas debet etiam esse *moralis*, consistens in altereitate & distinctione jurium; nam (ut recte loquitur Mastrius) alter in ordine ad justitiam exercendam dicitur ille, qui non tantum physice est ab alio quoad personam distinctus, sed qui insuper proprium jus habet, quod cum altero commutare, vel alteri reddere, vel quo per alterum privari potest. Hinc juxta Aristotelem, & communem Th. Th. ac Juristarum sententiam inter Patrem & Filium non potest vera justitia reperiri; quia Pater & Filius reputantur una moraliter persona, eoquod Filius respectu patris non sit sui juris. Quoad hanc altereitatem moralem jam distinguitur justitia ab omnibus fere reliquis virtutibus moralibus.

Requiritur 2. jus, seu debitum legale; est enim duplex debitum: unum *legale*, & stricte tale, ad quod alteri reddendum aliquis vi juris activi proprietatis in altero residentis adstringitur. Dicitur debitum *legale*, quia oritur ex jure activo proprietatis superius descripto, seu ex potestate legitima alterius, quæ in *Legibus* fundatur. Insuper justitia, & jus proprietatis ordinarie  
exi-



exigit, ut inter redditionem debiti, & jus activum fiat æqualitas, seu ut tantum reddatur, quantum debetur, ita quidem, ut alias non exerceatur actus justitiæ, sed vel alterius virtutis, vel omnino nullius. Sic, si 100. debes Paulo, totidem reddere ei obligaris, secus non observas justitiam; id enim speciale est justitiæ, ut per actus suos virtuosos ponat æqualitatem inter datum & acceptum, inter jus activum & passivum, ut vel ex nomine ejus, quod *æquitatem*, seu *æqualitatem* signat, colligitur. Debitum morale est, ad quod alteri reddendum aliquis non tenetur ex vi juris activi stricti, seu proprietatis alterius, sed tantum ex honestate virtutis, & ex decentia morali. Debitum hoc est insufficiens ad virtutem justitiæ, ad quam exigitur debitum legale.

Nota 3. *Æqualitatem* esse duplicem: una est secundum proportionem *arithmeticam*, per quam intelligitur vera æqualitas rei ad rem, v. g. centum ad centum absque ullo respectu ad personas, quæ debent, aut quibus debetur talis res. Altera est secundum proportionem *geometricam*, quæ non est perfecta æqualitas, ac datur tunc, quando aliqua bona dispensantur inter plures cum respectu ad merita, ac qualitates eorum, inter quos dispensatur: ut puta, si habenti merita ut duo detur unus florenus, habenti merita ut quatuor assignentur duo floreni. Ubi vides, non adesse perfectam æqualitatem nec inter rem & rem, nec inter rem, & personas; etenim unus, & duo floreni non sunt æquales inter se, neque merita ut duo, & florenus unus inter se adæquantur: habetur tamen æqualitas proportionalis, & geometrica, quæ datur inter duas proportionem; nam sicut unum proportionatur ad duo, sic duo proportionantur ad quatuor; unum enim respectu duorum est dimidium, & duo respectu quatuor aliam dimidiam partem efficiunt. Paucis: ad æqualitatem geometricam requiritur, ut Persona dignior dignius officium, vel bonum majus, Persona minus digna minus dignum officium, aut bonum inferius accipiat, servata semper debita proportione excessum inter, & defectum dignitatis, ac meritorum Personæ.

Nota 4. Plures esse virtutes affines Justitiæ, quæ tamen ab ea in aliquo ex requisitis, Notando 2. enumeratis, deficient, & sic solum partes potestativæ justitiæ nuncupantur: non autem



autem sunt partes subjectivæ, vel veræ ejus species. Tales sunt omnes virtutes ad alterum: quarum tamen aliquæ non possunt reddere æquale, ut Religio, pietas erga parentes: aliæ vero in hoc deviant a vera justitia, quia non habent debitum legale, fundatum in jure activo proprietatis alterius, sed vel fundantur in jure activo jurisdictionis, ut obedientia; vel in honestate virtutis & morum, ut gratitudo, veracitas; honestas enim exigit, ut nostris benefactoribus simus grati, & erga alios veraces.

Observa etiam, partes subjectivas justitiæ a plerisque assignari justitiam *commutativam*, *distributivam*, & *legalem*. *Commutativa* juxta nostrum Reiffenstuel est, quæ versatur in commutationibus rerum, pactis, & contractibus &c.; observatur autem, quando fit commutatio rerum secundum æqualitatem, considerando solum valorem rerum sine ullo respectu ad personas contrahentes, seu illæ sint nobiles, seu plebeie: ut accidit in venditione, quando res tanto pretio venditur, quanto secundum moralem æstimationem hic & nunc constat: vel quando ille, qui alteri debet mille florenos, eidem totidem reddit: & sic de aliis. Hoc etiam habet justitia commutativa, quod ea intercedat inter personas quæ particulares: sic dum Petrus etiam cum Principe, vel Communitate contrahit, Princeps ac Communitas spectantur ut personæ privatæ. Idem est, si homo privatus integre Communitati, v. g. civitati det mutuo pecunias, tunc ejusmodi Communitas non consideratur ut talis, sed ut pars, & persona privata.

Justitia distributiva residet in Communitate, vi cujus per ipsam Communitatem, vel ejus Administratores bona, ac officia communia dispensantur in membra ejusdem Communitatis juxta cujuslibet membri dignitatem, merita &c. ita, ut digniori officium excellentius, minus digno minus quoque officium committatur.

Differunt autem justitia Commutativa & distributiva 1. quia justitia commutativa respicit jus stricte dictum, non autem distributiva. 2. quia Commutativa attendit primario & per se æqualitatem arithmeticam, distributiva proportionalem & geometricam. 3. quia justitia commutativa membrum Communitatis ad aliud membrum refert, & inter homines tantum quæ particula-  
res



res & privatos intercedit: ast distributiva ordinat Communitatem ad membra sua, & ad homines particulares, & intercedit ex una parte inter Communitatem qua talem, & ex altera inter membra sua qua talia.

Justitia tandem *legalis* est, quæ obligat membra Communitati, vi cujus membra adstringuntur, ut ordinent suas actiones, & interdum sua quoque bona in commodum communitatis per observationem legum, præstationem certarum rerum, ut tributorum, obsequiorum &c. Nam, ut Suarez, Gormaz, Antonius Mayr ajunt, vi juris hujus, seu vi justitiæ legalis membra debent Communitati præstare tributa, quamvis ea etiam alio ex jure possint communitati esse debita. Hæc justitia differt a reliquis duabus, quia membra qua talia refert ad communitatem, & ea obligat communitati, quod non faciunt reliquæ duæ species.

An autem hæ tres justitiæ sint veræ partes subjectivæ, seu veræ species, participantes exacte essentiam justitiæ in rigore talis, superius descriptam, sequentibus paragraphis decidetur. Contra hæc notata vero

Objic. 1. Qui defendit suum jus contra alios, est justus, 420  
et si non tribuat alteri jus suum; ergo ad justitiam non requiritur, ut alteri tribuatur jus suum. R. D. a. est justus negative, seu non est injustus C. a. est justus positive N. a.

Objic. 2. Possum ex affectu justitiæ suadere alteri, ut debitum mihi solvat: sed in tali casu habeo actum justitiæ, et si non tribuam alteri jus suum; etenim per ejusmodi suasionem quaero jus meum, non alterius: ergo justitia non semper tribuit alteri jus, sed & erga seipsum exerceri potest. m. constat; quando enim ex affectu castitatis alicui suadeo castitatem, tunc mea suasio habet honestatem castitatis: ergo & idem a pari in proposito est dicendum. R. D. m. habeo actum justitiæ reductive talem C. m. formaliter talem N. m. Non ideo ego proprie sum humilis, si alteri suadeo humilitatem, vel humilitatem in alio amo: neque ideo ego sum liberalis, si suadeo alteri, ut erga me sit liberalis: ergo neque ideo proprie sum justus, si



tantum suadeo, ut alter exerceat justitiam; quamvis aliquo modo reductive ad justitiam pertineat, velle alios esse justos, & ad humilitatem, velle alios esse humiles, vel in aliis amare, & procurare humilitatem.

Objic. 3. Erga seipsum potest aliquis exercere iniustitiam, ut dum homo seipsum occidit: ergo & justitiam. R. N. a. Talis homo est injustus contra Deum, cuius servum, necat, & sic ejus jus lædit, non autem contra seipsum.

Objic. 4. Justitia commutativa non semper servat æqualitatem: ut si ille, qui multa debita contraxit, non habet amplius, unde omnia solvat. Talis justitiæ satisfacit, si reddat, quantum potest, quamvis non solvat, quantum debet: ergo. R. D. a. non servat per accidens ob casum impotentiae C. a. non servat per se, & ex intentione primaria N. a.

## §. II.

### *De Justitia commutativa.*

421 **ASSERO 1.** Justitia commutativa est vere, & proprie dicta justitia, ac proinde virtus specialis ab omnibus aliis distincta. Prob. 1. *pars.* Justitia commutativa observat omnes conditiones ad justitiam rigorose talem requisitas, ac superius enumeratas: ergo est vera, & rigorose dicta justitia. A. constat; est enim virtus ad alterum, & servat perfectam altereitatatem non solum physicam, sed & moralem. Hinc inter Patrem & filium qua tales non solet intercedere; quia inter hos non datur altereitas moralis. 2. respicit jus proprietatis, ac debitum legale stricte dictum, reddendum ad æqualitatem.

Prob. etiam 2. *pars.* quod sit virtus specialis: quia respicit speciale objectum, quod nulla alia virtus respicit, id, quod partim patet ex dictis, & colligetur amplius ex dicendis.

422 **Assero 2.** Objectum materiale proximum justitiæ commutativæ est operatio externa, per quam alteri tribuitur jus suum, &



& ponitur æqualitas inter debitum unius, & jus activum alterius. Herinex, Viva, Holzman &c.

Prob. 1. Illud est objectum materiale proximum cujusvis virtutis, circa quod proxime versatur: atqui justitia commutativa versatur proxime circa operationem externam, per quam tribuitur alteri jus suum, v. g. per quam restituitur res aliena, solvitur debitum &c. ergo ejusmodi operatio externa est proximum objectum materiale justitiæ commutativæ.

Prob. 2. Justitia est habitus practicus: ergo immediate respicit praxin, & operationem externam, ad quam ordinatur. Proinde justitia commutativa tantum remote, & mediate respicit rem, quæ debetur, quæ solvi debet &c. sicut & misericordia mediate tantum respicit rem, v. g. pecuniam, quæ pauperi datur: immediate autem pro objecto habet ipsum actum elargitionis pecuniæ in pauperes.

Objic. 1. Justitia commutativa intendit operationem solum per accidens, quatenus nempe per eam ponitur, ac datur res debita: ergo primario intendit rem ipsam, non autem operationem. R. N. c. Justitia intendit primario illud, in quo relucet honestas objectiva justitiæ: atqui hæc relucet in operatione externa, non autem in ipsa re debita; res enim debita secundum se nec honesta, nec inhonesta est, sed est tantum honesta, quatenus redditur alteri, cui debetur, consequenter honestas objectiva residet in operatione redditionis.

Objic. 2. Virtutes theologicæ non habent pro objecto proximo operationem, sed rem, circa quam versantur, v. g. fides pro objecto non habet actus fidei, sed Deum, & res, quæ creduntur: item spes respicit pro objecto materiali bona illa, quæ sperantur: ergo idem dicendum de justitia. R. N. c. & parit. nam 1. Virtutes theologicæ ex natura sua debent in Deum tanquam objectum suum principale, & proximum tendere, non item virtutes morales; nam in hoc virtutes morales a theologis distinguuntur. 2. Actus virtutum theologicarum sunt media, quibus tenditur, & attingitur objectum materiale earumdem: ergo non possunt esse ipsum objectum. Ast vero actus externi virtutum moralium, præsertim justitiæ, non sunt tale me-



dium, quo attingitur objectum materiale, cum medium hoc sit actus internus, & elicitus justitiæ; hoc enim mediante imperatur, & attingitur actus externus tanquam objectum materiale.

Ex his

424

Deduces 1. Actum internum, seu elicitum justitiæ non esse objectum materiale ejus. Ratio est 1., quia objectum virtutis distinguere debet non solum ab habitu, sed etiam ab actu elicitum virtutis. 2. quia actus internus, seu volitio reddendi unicuique jus suum, est medium tendendi in objectum: ergo non est ipsum objectum.

Deduces 2. Non esse objectum justitiæ commutativæ jus activum, nec passivum. Ratio est: quia utrumque hoc jus potius præsupponitur ad objectum materiale justitiæ, non autem est id, quod justitia immediate intendit ponere. Patet a simili in misericordia, cujus objectum materiale est actus eleemosynæ, quo sublevari miseriam pauperis, non vero est ipsa miseria, quæ tantum actui misericordiæ, & eleemosynæ præsupponitur: ergo a pari objectum justitiæ est actus, quo redditur jus alteri ad æqualitatem, non autem est ipsum jus, quamvis hoc ad actum justitiæ præsupponatur. Nihilominus

Deduces 3. Jus *activum*, vel potius personam, quæ habet jus activum, & illo quadam ratione informatur, esse saltem objectum *cui*, seu est illud suppositum, cui debitum & jus passivum debet præstare.

Deduces 4. Justitiam non versari circa passiones, sed tantum circa actiones. Communis. Justitia enim per se non moderatur passiones animi, iram, amorem &c. ratio est: quia virtus illa, quæ ex primario suo fine moderatur passiones, reddit hominem duntaxat bonum ad se, non autem ad alterum. Per quod tamen minime nego, quod justitia per accidens, & secundo etiam passiones moderari valeat, v. g. nimiam cupiditatem habendi &c., in quantum nimirum ejusmodi moderamen est necessarium, ne actus justitiæ proprius, v. g. restitutio rei alienæ, impediatur. Id tamen justitia non præstat per se, sed per alias virtutes, quibus ejusmodi moderationem imperat.

Asse-



Assero 3. Objectum formale *quo*, seu motivum justitiæ commutativæ, est honestas æqualis, relucens in illa operatione externa, quæ est objectum materiale justitiæ. Consistit autem hæc honestas æqualitatis in hoc, quod reddatur, vel detur tantum, quantum alteri vi juris activi proprie & rigoroſe dicti debetur. Herincx, Holzman, & alii. 425

Prob. Motivum formale cujuslibet virtutis moralis est honestas illius rectitudinis, quæ primario respicitur ab aliqua virtute, & hanc specificat: atqui honestas æqualitatis primario respicitur a justitia, hancque specificat: ergo. M. patet in misericordia, & aliis virtutibus moralibus. m. iterum constat; dum enim aliquis ex motivo justitiæ vult restituere, intendit ponere æqualitatem inter suum debitum, & jus activum alterius: & si actus hujus restitutionis hanc æqualitatem posuerit, censetur satisfecisse justitiæ.

Pro objectionibus solvendis nota 1. Aliæ virtutes exigunt interdum æqualitatem qualemcunque, non autem inter jus activum proprietatis unius, & debitum legale alterius. Quare 2. hæc æqualitas primario attenditur inter jus prædictum, & debitum, non autem inter res. 3. Vix videtur possibile, ut quis alteri solvat deliberate debitum, quin intendat hanc æqualitatem ponere, saltem implicite: si autem non intendat etiam implicite hanc æqualitatem, habet solum actum justitiæ materialiter, non autem formaliter talem.

Quæres 1. Qualem æqualitatem justitia commutativa intendat? R. per se, & primario intendit æqualitatem arithmeticam; justitia enim commutativa non attendit ad qualitatem Personarum, saltem primario & per se; principaliter enim respicit jus activum & passivum, & inter hoc utrumque per actum justitiæ quærit ponere æqualitatem, absque ullo respectu ad Personas, & conditionem earum &c. Dixi: *per se*, & *primario*; concomitanter enim in aliquibus casibus justitia commutativa etiam attendere debet ad proportionem geometricam, quando nimirum in hac ex contractu, vel alia ex causa interdum fundatur jus activum: ut si Petrus suo hæredi relinquat mille florenos, in pauperes studiosos dispensandos juxta horum merita, quæ 426



habent in studiis. In hoc casu debet hæc dispensatio vi justitiæ commutativæ fieri juxta proportionem geometricam, ita, ut magis eminenti in studiis plus, minus excellenti minus detur. Ratio est: quia magis doctus & excellens ex voluntate Testatoris jus acquisivit ad majorem partem pecuniæ &c. Ratio rationis: si in simili casu concomitanter non attenderetur ad proportionem geometricam, neque observari posset æqualitas arithmetica inter jus activum unius, & debitum legale alterius: atqui hæc semper, quantum possibile est, debet in justitia observari, nisi aliqua causa legitima per accidens excuset ab ejus observantia: ergo.

427

Quæres 2. Quale medium observet justitia commutativa? Ante responsionem nota 1. omnem virtutem debere quoddam medium observare. Unde vulgatum illud: *Virtus consistit in medio*. Ex quo patet, quod virtus debeat mediam quasi viam tenere inter duo extrema.

Nota 2. Extrema illa, inter quæ consistit virtus moralis, ordinarie esse vitiosa; sunt enim excessus, & defectus peccaminosus: ut patet in misericordia, quæ mediat inter prodigalitatem, & tenacitatem, quarum prior peccat per excessum, altera per defectum. Nihilominus interdum ambo hæc extrema, inter quæ virtus moralis intercedit, non sunt peccaminosa, ut constat in ipsa virtute justitiæ; si enim debes 100., tunc quidem contra justitiam peccas per defectum, si minus quam 100. das, & restituas: non autem delinquis, si des plus, quam centum; hic enim excessus non est necessario vitiosus, quamvis per eum non exerceas actum justitiæ. Igitur, ut recte advertit Herincx, omnis virtus moralis saltem eatenus habet medium inter duo extrema, quatenus tendit in aliquam determinatam materiam sub certa latitudine, ut saltem, si minus, vel amplius fiat, non exerceatur actus talis virtutis.

Nota 3. Medium virtutis aliud dici *rationis*, aliud *rei*. Medium *rei* dicitur, quod ex ipsa natura rei desumitur, & non taxatur, aut variatur ex diversis conditionibus & circumstantiis, ac dispositionibus personarum operantium. Medium *rationis* est, quod taxatur, & variatur juxta diversas dispositiones, & conditiones personarum operantium. H. N.

R. Re-



R. Regulariter, & per se *justitia commutativa* intendit æqualitatem inter jus activum & passivum absque respectu ad personas debitoris & creditoris, an eæ sint divites, nobiles, vel ignobiles &c., sed intendit præcise hanc æqualitatem poni ab omnibus sine discrimine. Aliud est de temperantia: sic quantitas cibi, quæ respectu hujus personæ est medium proportionatum, potest respectu alterius personæ esse excessus, vel defectus. Et ita de aliis virtutibus moralibus, quæ semper ad dispositiones personarum, circumstantiarum &c. attendunt. Non tamen nego, quod concomitanter interdum *justitia commutativa* respiciat medium rationis, quando scilicet aliunde non potest colligere quantitatem juris activi, nisi considerentur certæ conditiones, vel qualitates personarum, debitoris nempe, & creditoris.

Quæres 3. An *justitia commutativa* sit virtus una specie atoma, vel an sit virtus generica, & possit in plures species dividi? R. Probabilius est virtus generica, comprehendens sub se plures species. Sic diversæ videntur *justitiæ* illæ, quarum una versatur circa bona corporis & vitæ, altera circa bona famæ, tertia circa bona fortunæ. Mastrius cum aliis. 428

Prob. 1. Diversa sunt jura, quæ versantur circa bona vitæ, famæ, & fortunæ: ergo & diversæ *justitiæ*, quæ versantur circa hæc jura. 2. Secundum æstimationem moralem alia formaliter, & specie honestas censetur inesse actui, quo redditur fama proximi, quam illi, quo restituuntur bona fortunæ. 3. Læsis proximi in bonis famæ est specie diversa *injustitia* ab illa, qua læditur idem proximus in bonis fortunæ: ergo & *justitia commutativa*, quæ versatur circa bona famæ, est specie distincta ab illa, quæ se occupat circa bona fortunæ.

Dices: Ergo & furtum, quo aufertur aurum, est specie distinctum a furto, quo aufertur argentum. R. N. illatum; nam furtum auri a furto argenti solum differt materialiter, non autem formaliter, aut in æstimatione morali, quæ hic præcipue attenditur.



## §. III.

*De Justitia distributiva, & legali, nec non retributiva.*

429

ASSERO I. Justitia distributiva non est proprie, & uni-  
voce, sed tantum analogice justitia. Smising, Herincx, Palao,  
Suarez, Lugo, Lessius, Illsung &c. Prob. Illa virtus non est  
justitia proprie dicta, quæ non respicit jus & debitum proprie  
dictum: sed justitia distributiva non respicit jus, & debitum  
proprie dictum: ergo justitia distributiva non est justitia pro-  
prie dicta. M. est certa; nam a jure specificatur justitia. m. p.  
Jus enim, quod membra Communitatis secundum proportionem  
suæ dignitatis habent ad bona Communitati superabundantia, &  
ad officia publica &c., non est jus rigorose dictum, nec im-  
portat debitum proprie tale, sed solam obligationem honestatis,  
& decentiam: nempe decens, & honestum est, ut bona super-  
abundantia Communitatis in membra distribuantur, & ut in di-  
stributione servetur proportio inter bona, & dignitatem personarum.

Confirm. Illud non est rigorosum jus justitiæ, cujus vio-  
latio non inducit obligationem ad restitutionem damni alioquin  
reparabilis: atqui violatio juris, quod respicit justitia distribu-  
tiva, non inducit obligationem ad restitutionem damni repara-  
bilis: ergo. m. probabitur infra. M. videtur satis clara.

Neque Communitas bona communia non distribuendo se-  
cundum majorem, vel minorem dignitatem personarum, acci-  
peret personas; siquidem acceptio personarum non intervenit,  
ubi alicujus verum & strictum jus non læditur. Etenim acce-  
ptio personarum est prælatio personæ unius contra jus vere ta-  
le personæ alterius, quæ prælatio importat injuriam: atqui tunc,  
dum Respublica, & Communitas tota alicui minus merito plus  
daret de bonis communibus, quam magis merito, non læderetur jus  
magis meriti, neque fieret ei injuria; cum non habuerit jus pro-  
prie & strictè dictum ad majorem partem de bonis communi-  
bus: ergo. Plura, quæ huc facere possunt, dicentur inferius,  
ubi ista res exactius dilucidabitur. De cætero, etsi sola justitia  
distributiva non obliget ad restitutionem, & non importet jus  
rigo-



rigorose dictum, saepe tamen cum distributiva simul concurret justitia commutativa, quæ exigit reparationem damni, & restitutionem.

Ex his patet, justitiam commutativam distingui specie a distributiva; quia justitia proprie, & in rigore talis ab impropria distingui debet.

Affero 2. Justitia legalis est virtus specialis, ab omnibus reliquis distincta. Communior. P. Justitia legalis habet honestatem distinctam ab honestate omnium aliarum virtutum: ergo etiam ab omnibus aliis virtutibus distinguitur. A. p.; nam nulla alia virtus, nec charitas, nec pietas in patriam, procurat bonum commune ex motivo illius juris, quod Communitas tanquam totum aliquod habet in sua membra, & in suas partes, ex quibus componitur.

Objic. 1. Etiam pietas obligat ad procurandum bonum commune: ergo pietas non distinguitur a justitia legali. R. D. a. pietas obligat ad procurandum bonum Communitatis, quatenus hæc fuit nobis nascendi principium, & quatenus talis patria, vel Communitas contulit auxilium ad nostrum ortum C. a. pietas procurat bonum Communitatis ex motivo hoc, quia aliquis tali Communitati tanquam pars conjungitur N. a.

Objic. 2. Omnes virtutes tendunt in bonum commune: ergo justitia legalis est complexio omnium virtutum. R. D. a. tendunt in bonum commune materialiter, quatenus a justitia legali possunt extrinsecus ordinari, & imperari in ordine ad bonum commune, sicut & omnes virtutes a charitate possunt imperari C. a. tendunt in bonum commune formaliter ex motivo proprio, intrinseco, & immediato N. a.

Objic. 3. Omnes virtutes tendunt in suum objectum observando omnes circumstantias ejusdem: atqui inter circumstantias cujuslibet objecti virtuosi est procuratio boni communis: ergo omnes virtutes tendunt in bonum commune, consequenter bonum commune non est speciale objectum, aut honestas justitiæ legalis. m. patet; nam leges, quæcumque imperant aliquem actum virtutis, semper respiciunt bonum commune. R.



D. M. tendunt in suum objectum observando omnes circumstantias, positive & formaliter intendendo earum honestatem n. M. negative, & non formaliter intendendo earum honestatem c. M. Sic quaelibet virtus, quando ejus actus est præceptus a Superiore, debet etiam ipsum præceptum observare materialiter, ponendo nimirum materiam præceptam: non autem necesse est, ut eam ponat, quia præcepta est, ex motivo formali obedientiæ.

Objic. 4. Unum & multa juxta D. Thomam non distinguunt virtutem: ergo justitia legalis respiciens Communitatem, non distinguitur a particulari, seu commutativa, quæ respicit personas privatas. R. D. a. nisi illa multa ratione unionis moralis fundent motivum honestatis diversæ C. a. secus N. a.

431<sup>I</sup> Afferro 3. Neque justitia legalis est proprie, & univoce dicta justitia. Smising, Herincx, & alii. P. I. Quia sæpe tantum obligat ex decencia & honestate, non autem ex rigorosa obligatione, quæ peccatum inducat: atqui justitia proprie dicta debet rigoroſe, & sub peccato obligare: ergo.

Prob. 2. Justitia legalis non importat jus rigoroſe dictum: ergo non est rigoroſe dicta justitia. A. p. qui habet jus rigoroſe dictum, seu proprietatis, potest pro libitu alterum, adversus quem habet jus, obligare: atqui sic pro libitu Respublica non potest obligare vi juris & justitiæ legalis: ergo. M. constat ex definitione juris proprietatis, quod est jus rigoroſe dictum. m. p. nam membra non ideo obligantur ad procurandum bonum commune in necessitate, quia Communitas vult: sed quia aliunde pars naturaliter & irremissibiliter adstringitur ad conservationem, & indemnitate totius ob vitam socialem tranquille, & honeste conservandam. Aliud est in jure activo proprietatis, quod obligat ad libitum habentis illud.

Confirm. Violatio justitiæ legalis juxta communem DD. non inducit onus restitutionis, de quo suo loco: atqui violatio justitiæ proprie dictæ inducit onus restitutionis: ergo.

432 Petes: An justitia legalis in Principe existens, sit specie distincta ab illa, quæ existit in subditis? R. negative; habet enim



§. III. De *Justitia distributiva, legali, & retributiva.* 611

enim idem motivum, scilicet bonum Communitatis procurandum a partibus, & membris ejusdem Communitatis, quale membrum, licet principale, etiam est Princeps. Cæteræ disparitates, quæ possunt afferri, sunt tantum materiales.

Dices 1. Juxta D. Thomam justitia legalis in Principe est architectonice, in subditis ministerialiter: ergo justitia legalis, quæ est in Principe, distinguitur specie ab illa, quæ est in subditis. R. N. c. hæc enim est tantum disparitas materialis, non autem formalis, & moralis, eoquod motivum sit idem in Principe & subdito.

Dices 2. Alia est prudentia, quæ dirigit justitiæ legalem in Principe, quam in subdito: ergo etiam alia specie justitia legalis est in Principe, quam Subditis. R. N. c. & parit. nam intendere bonum commune prædicto modo, neque importat speciale motivum, aut specialem, & aliam difficultatem in Principe, quam in subditis. Secus est in prudentia politica Principis & subditorum; nam longe alia dictamina & principia in Principe requiruntur, ad bonum commune debite administrandum, leges condendas &c. quam in subditis, quibus sufficit, si cognoscant, se esse obligatos ad obediendum, quando ipsis aliquid ob bonum commune imponitur. Quare & peculiarem difficultatem habet prudentia Principis, quam non patitur prudentia subditorum.

Quæres: Quid dicendum de justitia *retributiva*? R. 1. Justitia retributiva est illa, qua præmia retribuuntur bene meritis, & pœnæ infliguntur delinquentibus. Dividitur in duplicem classem: una est *præmiativa*, dispensans præmia secundum merita, altera est *vindicativa*, plectens scelera. 433

R. 2. *Præmiativa* pro motivo habet honestatem, & decetiam, vi cujus congruit, ut bene meritis & virtuosis destinentur convenientia præmia: altera autem pro motivo habet honestatem, quæ relucet in hoc, ut delicta non maneant impunita. Nulla ex his est proprie dicta justitia; quia nulla ex parte illius, cui debetur præmium vel pœna, supponit jus activum rigorose dictum. Certe enim delinquens non habet jus activum, vi cujus exigit, ut ipsi imponatur pœna. Utraque igitur hæc



## ARTICULUS II.

§. I.

*Præmittuntur Notiora.*

Deduces 1. Neque patrem, neque filium peccare contra justitiam, neque teneri eos ad restitutionem, si deficient in iis, quæ deberent qua tales præstare. Ratio est: quia talia omittendo solum peccant contra pietatem.

Deduces 2. Patrem non peccare contra iustitiam, si filium suum sub patria potestate constitutum non curet, alit, honeste educet, aut instruat: neque filium delinquere contra iustitiam, si patri deneget auxilium in necessitate &c. Ratio est: quia ad ista



*§. I. Inter quos possit intercedere Justitia commutativa? 613*

ista & similia pater & filius qua tales obligantur : atqui inter patrem & filium qua tales nulla potest intercedere obligatio justitiæ, sed tantum pietatis : ergo. Idem cum proportionem judicium esto de domino & servo, marito & uxore spectatis qualibus.

Certum est 2. Inter patrem & filium, maritum & uxorem &c. posse intercedere justitiam commutativam, & injuriam oppositam huic justitiæ, si spectentur non qua tales. Ratio est: quia pater & filius in multis rebus habent jura distincta, & reputantur esse personæ distinctæ: ut si filius habeat bona castrensia, vel quasi castrensia, & hæc filio contra fas auferantur, vel si filius sit emancipatus. Sic etiam mancipium quoad membra & vitam est sui juris, & non est subiectum Domino. Quare, si occideretur a Domino, ei inferretur injuria. Potest etiam Dominus ex peculiari pacto obligari mancipio; ubi iterum servus & Dominus reputantur duæ personæ. Idem cum proportionem dicendum de marito & uxore.

Ex his patet, quod filii peccent contra justitiam, teneanturque ad restitutionem, dum surripiunt aliquid de bonis patris. Ita etiam peccare possunt uxores, auferendo bona mariti &c.

His præmissis gravis restat difficultas, an Deus creaturæ, & creatura Deo possit obligari ex rigorosa justitia commutativa? pro qua

Nota 1. Deum habere jus proprietatis absolutissimum in omnes res creatas, & in omnes actiones creaturarum, & hoc dominium & jus nec ex toto, neque ex parte posse a Deo abdicari, sicut neque alia prædicata, & perfectiones Dei simpliciter simplices, qualis est etiam dominium, sunt a Deo abdicabiles, & separabiles.

Nota 2. Omnem creaturam esse essentialiter servam Dei, & subiectam, ac obligatam juri proprietatis, quod Deus in eam habet, quodque circa illam pro libitu in omnem usum sibi possibilem exercere potest citra omnem injuriam creaturæ. Quare Deus nullam injuriam creaturæ infert, si eam destruit, affligit &c., quia Dominus de re sua disponere potest pro libitu citra

H h h h 3

in-



injuriam alterius. Dixi: Creaturam esse *essentialiter* servam Dei: hinc creatura ab hac obligatione, & subiectione passiva, quam habet erga Deum, nec per divinam omnipotentiam liberari potest. H. S. fit

## §. II.

*An Deus possit obligari creaturae ex rigorosa Justitia? vel an possit erga creaturam exercere actum Justitiae commutativae?*

435

ASSERO, & R. negative. Ita Scotus 4. d. 46. q. 1. §. *ad propositum*. ubi ait: *Prima illarum* (id est, justitia commutativa; de hac enim ibi loquitur) *non potest simpliciter esse in Deo respectu creaturae: quia non potest esse simpliciter aequalitas, sed potest esse aliquid secundum proportionem.* Habet quidem alibi Scotus, quod Deus ex justitia commutativa, & secundum strictam justitiam remuneretur merita de condigno. Verum ibi vult, quod tantum aliqua similitudo inter justitiam commutativam, & istam remunerationem intercedat, quia solvitur illud, quod est debitum *ex promissione* sub conditione operis condigni: quare debet intercedere ratio dati & accepti, & aliqua aequalitas: deficit tamen ex nostra ratione. Cum Scoto sentiunt ex nostris Alensis, D. Bonaventura 4. d. 46. art. 2. q. 1. ad 2. Scot. Smising, Maftrius, Herincx &c. ex RR. vero Lugo, Vaquez, Lessius, Gormaz, Esparza contra Vivam, ac plures alios.

Prob. 1. Si Deus erga creaturam obligaretur ex justitia commutativa, & hanc erga illam exerceret, tunc Deus deberet erga creaturam habere debitum stricte dictum: sed tale debitum Deus erga creaturam non potest habere: ergo Deus erga creaturam non potest exercere justitiam commutativam. M. constat ex dictis; quia justitia ex natura sua ordinatur ad extinguendum, vel adaequandum debitum stricte dictum. m. p. ex Auctoritate S. Augustini, qui L. 1. Confess. Deum ita alloquitur: *Reddis debita nulli debens.* & L. 2. de libero arbitrio: *Deus nulli debet aliquid; quid ergo ei erogas, ut tanquam debitum poscas.* S. Anselmus in Prosologio c. 10. *Iustus es, non quia reddis debi-*



*§. II. An Deus possit obligari creaturæ ex Justitia?* 615

*debitum, sed quia facis, quod decet te summe bonum. S. Bernardus Serm. 1. de Annuntiatione. Neque talia sunt hominum merita, ut propterea vita æterna debeatur ex jure, ut propterea Deus injuriam aliquam faceret, nisi eam donaret.*

Confirm. Si Deus creaturæ obligaretur ex justitia commutativa, tunc creatura deberet adversus Deum habere jus activum strictè dictum, & Deus esset debitor strictè dictus respectu creaturæ: atqui hæc sunt absurda; quia sic creatura quodammodo superioritatem erga ipsum Deum vi juris sui obtineret, & Deus suo modo esset subjectus creaturæ; creditor enim respectu debitoris videtur habere aliquam superioritatem, & debitor est uo modo subjectus creditori. Implicat autem, ut creatura vi juris strictè talis sibi competentis superioritatem erga Deum prætere tendere possit.

P. 2. efficacissime. Si Deus creaturæ obligaretur ex justitia commutativa, tunc Deus posset aliquid de jure proprietatis abdicare: sed Deus non potest aliquid de jure proprietatis abdicare: ergo. m. videtur certa; quia jus proprietatis illimitatum, & plenissimum in omnes res creatas est Deo essentialiter identificatum, & ab eo neque quoad partem aliquam abdicabile. M. iterum constat; quicumque enim alteri se ex justitia commutativa, v. g. per pactum aut contractum obligat, abdicat se aliquo suo jure, & hoc transfert in alterum, cui se obligat.

Confirm. 1. Si creaturæ adversus Deum competeret jus strictum in rem aliquam creatam, v. g. in gloriam æternam, tunc hæc res esset exempta a pleno dominio Dei, ut de ea Deus non posset pro libitu disponere in omnem usum possibilem absque injuria creaturæ: sequela est absurda: ergo. M. patet; si enim Petrus in aliquam rem habet jus proprietatis adversus alios, tunc alii non possunt de hac re disponere sine injuria Petri: sic non possunt absumere vinum, vel panem Petri &c. vel si dicas: quod Deus adhuc sibi reservet jus, & potestatem disponendi de re tali pro suo libitu sine injuria creaturæ, tunc dico, quod creatura non habeat jus strictum adversus Deum, neque Deus ex justitia commutativa obligetur creaturæ. m. vero p. Tali modo creatura non subesset pleno dominio, & juri Dei, ut



utpote de qua non posset pro libitu suo disponere citra injuriam creaturæ: quod videtur implicare.

Confirm. 2. Servus qua talis nunquam potest sibi aliquod dominium acquirere, sed quia omnis servus qua talis est quasi peculium, & res domini sui, hinc omnia, quæ acquirit, Domino suo acquirit: ergo a pari, quia creatura semper & essentialiter est serva, & peculium, ac res Dei, quidquid acquirit juris, accrescit ipsi Deo: adeoque si Deus tribueret jus creaturæ, hoc ipsum jus propriissime ad Deum spectaret, qui proinde de tali jure creaturæ pro libitu posset disponere, & sic creatura nullum jus strictum adversus Deum haberet, sicut servus qua servus non habet jus strictum adversus dominum.

Dices: Potest Dominus quandoque ex pacto se obligare suo mancipio ad certum præmium præstandum, si hoc vel illud fecerit: ergo etiam Deus ex pacto, consequenter ex justitia commutativa potest se obligare creaturæ ad dandam gloriam æternam, si creatura certa merita posuerit. R. N. c. & parit. Nam dominium Deo est essenziale, quod habet in creaturas, ita quidem, ut illud neque quoad partem possit abdicare: ast dominium, quod homo habet in mancipium, non est ipsi essenziale; hinc potest hoc vel totum, vel quoad partem pro libitu suo abdicare. Plura, quæ pro confirmatione hujus assertionis faciunt, ex solutione objectionum colliguntur. Quare

436

Objic. 1. S. Scriptura, & SS. PP. sæpissime Deo tribuunt justitiam, ut 2. ad Timoth. 4. Deus dicitur *justus Judex*: ergo Deo competit justitia. R. D. a. tribuunt Deo justitiam in sensu largiori C. a. justitiam commutativam in rigore talem N. a. Justitia in his textibus sumitur pro *fidelitate*, quatenus Deus homini reddit *fideliter* tantum, quantum ei promisit, absque omni tamen jure, quod creatura haberet adversus Deum. Hinc nota, magnam esse disparitatem inter obligationem justitiæ commutativæ, & fidelitatis; si enim Deus titulo justitiæ commutativæ est obligatus ad dandam, e. g. mercedem creaturæ, tunc creatura habet jus strictum adversus Deum, & Deus stricte esset debitor creaturæ: proinde & Deus deberet aliquid de suo jure



jure dimittere, & illud dare creaturæ. Ex quo ulterius sequitur, quod Deus creaturæ possit facere injuriam, non reddendo mercedem debitam. Aliud est, si obligatio dandi mercedem proveniat ex fidelitate, aut veritate &c; tunc enim nullum jus ex parte creaturæ resultat, nec fit ei injuria, si merces promissa ex fidelitate non solvatur. Quare tota obligatio reddendi mercedem, orta ex fidelitate, vel veritate, aut alia simili virtute, se tenet ex parte promittentis, qui ideo adstringitur ad observandum promissum, ne alias non observando incurrat maculam, & inhonestatem infidelitatis, mutabilitatis, falsitatis &c. Unde D. Thomas 1. 2. q. 114. Art. 1. ad objectas auctoritates recte respondet, Deum non esse simpliciter debitorem nobis, sed sibi ipsi, in quantum conveniens est, ut sua ordinatio, & promissio, quam nobis de danda mercede fecit, adimpleatur.

Dices: Verba S. Scripturæ, & SS. PP. debent sumi in sensu proprio, nisi quid obstat: atqui, si per justitiam intelligeretur fidelitas, verba Scripturæ non sumerentur in sensu proprio: ergo. R. 1. N. m. Nam (ut bene advertit Herincx) satis proprie secundum vulgarem loquendi modum *Justitia* dicitur, cum alicui merces promissa integre, ac proinde fideliter redditur, sive deinde is, qui reddit, sit obstrictus debito justitiæ commutativæ, sive solius fidelitatis; in usu enim istius nominis, saltem in communi & vulgari locutione, non tam attenditur vis obligationis, quam æqualitas & congruentia rerum, quæ ponitur, quæ etiam communiter, licet non semper in omni rigore, dici solet justitia, ac æquitas.

R. 2. Dato, quod S. Scripturam, & SS. PP. acciperemus in sensu improprio, tamen id faceremus ex gravi auctoritate, & ratione in probationibus assignata: atqui propter gravem rationem licet accipere Scripturam in sensu improprio. Adde etiam, quod Concilium Tridentinum sess. 6. c. 16. nostræ explicationi faveat plurimum; sic enim loquitur: *Bene operantibus proponenda est vita æterna, & tanquam gratia filiis Dei misericorditer promissa, & tanquam merces, ipsius Dei promissione fideliter reddenda.* Nota, quod dicat, promissam mercedem nobis fideliter, non ex stricto jure, reddendam esse.

P. Kick Theol. Tom. IV.

IIII

Insta-



Instabis: Deus potest ex fidelitate nobis obligari: ergo etiam ex justitia commutativa. R. N. suppositum, quod Deus vi fidelitatis obligetur *nobis*, sed potius *sibi soli* obligatur, ne per infidelitatem in se aliquid indecens admittat. Deinde eo ipso, quod obligatio fidelitatis nullum importet jus ex parte creaturæ, & in Deo non dicat abdicationem juris, non sequuntur illa absurda, quæ alias sequerentur ex obligatione justitiæ commutativæ.

Objic. 2. Deus potest abdicare a se aliquod jus: ergo nostra sententia cum suis probationibus non subsistit A. p. 1. sic Deus remittens peccatum abdicat se jure ad indignationem & pœnam, quod habet adversus peccatorem. 2. Deus destruens creaturam aliquam cedit jure proprietatis, quod habet in talem creaturam; nam, quando creatura est destructa, & in nihilum abit, non amplius potest esse sub dominio; cum dominium verifetur tantum circa res existentes, ut dictum est.

R. N. a. cum utraque probatione, Jus ad iram & pœnam, quod Deus habet adversus peccatores, semper manet, neque per remissionem peccati remittitur, sed tantum tollitur objectum talis juris. Sic etiam dominium Dei in res creatas semper manet, etsi interdum ejus objecta mutantur, dum aliquæ res destruuntur; dum enim destructio fit alicujus similis objecti, tantum perit aliqua denominatio extrinseca utriusque juris. Sicut in Philosophia solemus dicere, si per hypothesein impossibilem musca v. g., aut alia creatura implicaret, & non posset amplius produci, per hoc non mutaretur Omnipotentia divina intrinsece & entitative, sed tantum extrinsece & connotative, in quantum non connotaret talem creaturam tanquam objectum suum. Adverte quoque, jus hoc, quod Deus habet in res creatas, esse conditionatum secundum nostrum intelligendi modum; habet enim Deus jus & dominium creaturarum, *si existant*. Sic habet etiam jus odio persequendi, & vindicandi peccatum, *si hoc existat*: atqui post remissionem, quæ fit per actum voluntatis divinæ, non amplius existit peccatum: ergo.

Dices: Duplex est in Deo jus, unum essenziale, & inabdicabile, alterum accidentale, & abdicabile: ergo. R. N. a. nam



nam illud, quod Adversarii dicunt jus accidentale, est actualis connotatio extrinseca objecti talis juris, proinde est potius exercitium juris, quam ipsum aliquod jus.

Objic. 3. Quamvis justitia commutativa non possit reperi in Deo cum suis imperfectionibus, quas habet, potest tamen in eo reperi ut depurata a suis imperfectionibus: ergo. R. D. a. Si justitia commutativa depurata a suis imperfectionibus retineret adhuc naturam, quam importat, & quam ejus nomen significat C. a. secus N. a. Sunt aliquæ perfectiones, quæ ablati omnibus imperfectionibus, non amplius retinent essentiam & naturam, quam nomen earum significat: talis perfectio est obsequium Deo præstitum, cujus essentia consistit in servitio & subjectione: & in hoc ipso sita est tota ejus imperfectio. Quapropter perfectio obsequii, utpote essentialiter annexam habens imperfectionem, non potest Deo competere. Idem est de justitia commutativa; hæc enim in sua essentia importat illas imperfectiones, quas in probationibus adduxi: proinde nequit Deo competere in rigore.

Objic. 4. Licet Deus non possit abdicare jus universale, & absolutum, potest tamen cedere creaturæ jus privatum, & basum, quod habetur ex contractu inter Deum & hominem: ergo. R. N. a. & suppositum; si enim Deus per contractum cederet jus creaturæ, deberet aliquid dimittere de jure suo illimitato, & universali, ut non posset amplius pro libitu de re tali, quæ venit in contractum, disponere sicut ante.

Objic. 5. Creatura habet verum dominium libertatis ad actus liberos eliciendos, vel non eliciendos: ergo potest Deus inire contractum cum creatura libera, & se ei ex justitia commutativa obligare ad dandum præmium, si eliciat actum liberum. R. D. a. creatura habet verum dominium libertatis, exemptum ab essentiali servitute erga Deum N. a. secus C. a. Quia igitur dominium creatum actuum liberorum est essentialiter subiectum Deo, sic, quidquid creatura per istud acquirit, Deo acquirit, non sibi: ut dictum in probationibus.



Objic. 6. Non repugnant simul hæc duo jura, jus altum, quod habet Princeps adversus subditos in eorum bona, & jus bassum, quod habent subditi adversus Principem: ergo etiam non repugnat in Deo jus illimitatum, quod habet in bona creaturæ, & jus privatum, quod creatura habet adversus Deum. R. N. c. & parit. Jus altum in Principe est limitatum, vi cuius tantum pro casu necessitatis publicæ potest bona subditorum usurpare: item hoc jus non est verum jus proprietatis, consequenter bene potest stare cum jure proprietatis subditorum, qui, quamvis in casu necessitatis non possint licite contra prohibitionem Principis disponere de bonis suis, possunt tamen alias, cessante ista necessitate: imo absente necessitate publica habent jus adversus Principem, ne ab eo suis bonis priventur, aut ab eorum usu impediuntur. Aliud est in Deo, qui habet jus, non solummodo ad casum unum necessitatis restrictum, sed absolutissimum, illimitatum, & universalissimum, & quidem jus proprietatis inabdicabile, & a creatura inimpedibile.

Objic. 7. Saltem Deus & creatura possunt simul habere dominium in solidum respectu ejusdem rei creatæ juxta dicta: ergo non implicat, quin Deus servet suum dominium, & tamen creaturæ, quatenus hæc habet dominium particulare, obligetur ex justitia. R. D. a. Deus & creatura possunt habere dominium in solidum, ita, ut creatura habeat dominium & jus adversus Deum, & Deus ex justitia commutativa obligetur creaturæ N. a. ita, ut creatura adversus aliam creaturam habeat jus C. a. dominium creaturæ, quod stat cum dominio Dei, est adversus alias creaturas, quæ obligantur, non autem adversus Deum. Ex quo

Colliges, quod creatura respectu Dei in res creatas, etiam actiones suas liberas, tantum habeat usum simplicem facti, ad nutum a Deo revocabilem *absque injuria* creaturæ, seu absque læsione juris, quod in creatura resideret. Et si quandoque Deus non potest amplius revocare ejusmodi usum facti, uti in Beatis non amplius revocat usum gloriæ, id non ex jure creaturæ, sed ex sua fidelitate & veritate, quam tenet in promissis, oritur. Quare, dum interdum dicimus, hoc vel illud competi-



*§. III. An creatura erga Deum possit exercere justitiam?* 621

petit creaturae vi juris creationis, id non de stricto jure justitiae commutativae intelligendum venit.

*§. III.*

*An creatura erga Deum possit exercere justitiam, vel injustitiam commutativam stricte dictam?*

ASSERO 1. Creatura non potest erga Deum exercere actum justitiae commutativae proprie talem. Vasquez, Gormaz disput. 10. sect. 2. de J. & J. 437

Prob. 1. Qui exercet justitiam commutativam erga alterum, v. g. solvendo debitum, debet necessario extinguere jus proprietatis alterius: atqui creatura non potest per suum actum extinguere jus proprietatis Dei: ergo non potest exercere actum justitiae erga Deum. m. constat ex §. præc. & ex hoc, quia quoscunque actus præstiteris Deo, Deus tamen retinet jus proprietatis integrum, plures, & plures in infinitum exigendi. M. vero probatur exemplis: sic Paulus solvens Petro 100. florenos, quos eidem debuit, extinguit in Petro jus alterius exigendi solutionem illorum 100. florenorum.

Prob. 2. Qui præstat actum justitiae commutativae erga alterum, acquirit etiam jus vere & proprie tale contra alterum: atqui creatura non potest acquirere jus vere & proprie tale contra Deum: ergo. M. p. qui enim solvit alteri debitum, acquirit jus extinctivum debiti, vel jus immunitatis a debito, vi cuius alterum obligatum habet, ne iterum exigat solutionem jam præstitam.

Objic. 1. Datur in Deo verum jus proprietatis, vi cuius Deus potest exigere nostra obsequia, & nostras operationes: ergo nos etiam possumus exercere actum justitiae commutativae stricte dictum, si præstamus nostra obsequia conformiter juri illi proprietatis. R. D. a. datur jus proprietatis in Deo inextinguibile, & inabdicabile C. a. fecus N. a.

Objic. 2. Si non posset a creatura poni actus justitiae erga Deum, tunc ideo, quia creatura non potest ad æqualitatem



solvere debitum Deo obsequium ; nam quaecumque Deo præstiterit creatura aliqua, semper plura potest exigere : atqui hæc ratio nulla est : ergo. m. p. etsi Petrus ad incitas redactus, non potest totum debitum ad æqualitatemolvere, satisfacit tamen, & exercet actum justitiæ, si partem debiti solvit : ergo. R. N. M. sed ratio nostra præcipua est, quia jus divinum neque ex parte extinguipotest. Hinc disparitas est inter Petrum, qui ob impotentiam tantum partem debiti præstat ; hic enim adhuc jus saltem parziale creditoris extinguit, ita, ut hac solutione facta non tantum deinceps debeat, quantum prius debuërat.

Objic. 3. Christus qua homo satisfecit suo Patri cælesti ex rigore justitiæ commutativæ : ergo creatura potest erga Deum exercere actum justitiæ rigorosæ. R. N. a. de quo plura in tractatu de Incarnatione.

438

Affero 2. Potest tamen creatura erga Deum exercere actum injustitiæ proprie dictum : Herincx, Gormaz cit. n. 534. P. Deus habet jus strictissimum in omnes res creatas, & vi hujus juris potest a creatura certas actiones exigere, quas si creatura denegat, violat jus illud, & sic exercet actum injustitiæ, & injuriæ proprie dictum : ergo. A. constat ; nam actus injustitiæ & injuriæ nihil aliud est, quam violatio juris alterius. Inde putat Herincx, quod violetur justitia, & jus Dei, quod habet ad famam & honorem, si aliquis sit contra Deum blasphemus. Certum quoque est, quod per homicidium injustum violetur jus & dominium Dei, quod habet in vitam hominis.

Objic. 1. Non potest erga Deum exerceri justitia strictè dicta : ergo neque injustitia. R. N. c. Ad actum justitiæ requiritur simul integritas omnium conditionum, quas debet habere vera justitia, & si vel una deficit, jam non potest dari actus justitiæ : atqui juxta probationes nostras una similis conditio deficit in proposito. Aliud est de injustitia, ad quam sufficit vel unicus defectus contra jus proprietatis alterius. Totum patet ex recepto apud Theologos axioma : *Bonum ex integra causa, malum ex quolibet defectu.*

Objic.



§. III. *An creatura erga Deum possit exercere iustitiam?* 623

Objic. 2. Deus non habet jus proprietatis vere tale: ergo illud non potest violari a creatura. A. p. Deus non potest nos obligare ad actionem aliquam in bonum proprium: atqui jus proprietatis tantum obligat in bonum proprium illius, qui habet tale jus: ergo. M. patet; nam nostræ operationes Deo nihil profunt; siue enim bene, siue male agamus, Deus manet semper idem, & ejus felicitas per nos nec augeri, nec minui potest. R. N. a. ad prob. d. M. in bonum proprium intrinsecum c. M. extrinsecum, quod Deus obtinet per promotionem honoris sui extrinseci n. M.

Objic. 3. Si possum lædere jus Dei, tunc jus & dominium Dei non est perfectissimum: sequela est absurda: ergo & id, unde sequitur. M. p. de ratione perfectissimi dominii est, non posse in ejus usu impediri: atqui si possem lædere jus Dei, tunc possem Deum in usu sui juris impedire, v. g. non præstando illud, quod vi juris exigit: ergo. R. n. M. utramque; nam de ratione dominii perfectissimi tantum est, posse sine injuria alterius exigere usum omnem possibilem rei suæ, non autem de ejus ratione est, non posse impediri ab usu. Deinde Deus impeditur per nos ab usu rerum suarum, seu creaturarum, & nostrarum potentiarum, quia nobis reliquit libertatem, quam ne lædat, permittit potius violari suum dominium.

Petes 1. An omne peccatum sit actus injustitiæ contra Deum? R. Hoc quæsitum resolvi in tractatu de peccatis. Lugo d. 439 3. de Incarnatione. sect. 3. resolvit negative: Herincx vero in Tractatu de peccatis disputat in utramque partem.

Petes 2. An ille, qui actum injustitiæ commisit erga Deum, teneatur ad restitutionem? R. 1. Si aliquis enormiter læsit honorem Dei per contumelias & blasphemias, tunc eum probabilissime teneri ad resarcitionem talis injuriæ. Lugo cit. ita enim lumen naturæ dicat.

R. 2. Regulariter loquendo non tenetur homo ex titulo justitiæ ad restitutionem propter injuriam, vel injustitiam erga Deum commissam. Lugo cit. Ratio est: si ex peccato relinquere-



retur debitum per restitutionem refarciendi injuriam Deo illatam, tunc teneretur peccator ad reddendum in individuo, vel æquivalenti illud, quod abstulit: Non primum: fingamus enim, quod ideo læserim jus Dei, quia non elicuerim actum amoris, quem mihi vi dominii, quod in me & meam voluntatem habet, præcepit. Jam, vel præcepit mihi Deus, ut actum hunc eliciam pro instanti, ? tunc elapso hoc instanti non possum reddere illud idem in individuo, quod exigebatur, scilicet amorem pro hoc determinato instanti; cum instans illud non amplius existat, nec sit existitumur postea. Si autem præcepit amorem pro tempore indeterminato, tunc, si hoc tempore non amo, teneor quidem amorem ponere tempore subsequenti, non autem ex debito proveniente ob omissionem præteritam, sed ideo, quia præceptum adhuc durat. Neque teneor ad restituendum æquivalens; quia tunc tantum ad restitutionem in æquivalenti adstringimur, quando creditor in bonis suis habet minus, quam ante illatam injuriam habuit: atqui Deus per peccatum non habet minus in suis bonis; siquidem ille non habet minus, qui facillime, dummodo velit, possit bonum ablatum recuperare: sicut Deus potest, dummodo velit, illum, qui omisit actum amoris, aut alium excitare per auxilium gratiæ ad similem, aut perfectiorem actum amoris. Per hoc tamen manet, quod talis omisio fuerit actus injustitiæ, utpote commissus contra jus Dei talem actum exigentis.

Dixi in responsione 2. *ex titulo justitiæ*; non enim nego, quin homo ex alio motivo, & præcepto teneatur pro quovis peccato satisfactionem præstare Deo, nisi velit pro eo satisfacere saltem in purgatorio.

Petes 3. An in Deo sit justitia distributiva, præmiativa, & vindicativa? R. 1. In Deo non est talis justitia distributiva, quæ in creatura importat strictum jus, & in Deo strictum debitum. Constat ex dictis.

R. 2. Potest tamen in Deo admitti justitia præmiativa, & etiam distributiva, quæ non supponit tale jus, & debitum. Sic Deus Beatis juxta proportionem geometricam meritorum, & gratiæ sanctificantis distribuit præmia æterna.

R. 3.



*Art. III. An per iteratam solut. possit exerceri justit. &c. 625*

R. 3. In Deo etiam datur justitia vindicativa: ut iterum certum est; quia justitia vindicativa in creatura punienda non importat strictum jus, & insuper dicit honestatem, Deo maxime convenientem, vi cujus delicta proportionata poena castigari oportet.

R. 4. In Deo non datur justitia legalis. Ratio est: Justitia legalis residet in membris, & partibus Reipublicae qua talibus; atqui implicat, Deum habere rationem membri, vel partis; imperfectio enim est, esse partem. Videatur Herincx part. 1. d. 7. de voluntate Dei. q. 7. n. 58. & seqq.



**ARTICULUS III.**

*An homo possit satisfacere ex rigorosa Justitia per actus iteratos, seu ut alii vocant, per actus supererogatorios?*

**N**OTA 1. Statum quaestionis etiam sic formari: an idem debitum ex justitia commutativa solvi possit iteratis, & repetitis totalibus solutionibus? v. g. debes centum florenos Cajo: hos solvis hodie integre. Crastina die iterum 100. das eadem ex intentione solvendi debitum illud. Modo quaestio est: an iterata ista solutio sit actus justitiae?

Nota 2. Quaestionem esse, an iterata totalis solutio sit actus justitiae *effective*, & vere a parte rei, ac per se talis, praescindendo a conscientia erronea &c.? non enim volo litigare, an propter affectum internum, vel propter conscientiam erroneam, qua iterato solvens credit, se actum justitiae exercere, talis solutio possit per accidens obtinere honestatem justitiae. H. S.

Affero, & R. negative. Ita Viva cum Communiore contra Lugonem, Haunoldum, nostrum Aquilinum Aman, & alios. **440**

P. 1. Per actum justitiae ex essentia sua debet alteri tribui jus suum: atqui per iteratam secundam solutionem totalem non p-

*P. Kick Theol. Tom. IV.*

K k k k

test



test alteri tribui jus suum : ergo iterata solutio totalis non potest esse actus justitiæ. M. est nota ex definitione justitiæ. m. p. Talis , cui præstatur secunda solutio , non habet jus ad hanc exigendam : ergo per talem iteratam solutionem non potest ipsi præstari jus suum. A. p. Jus omne , quod ad solutionem habuit , per primam solutionem est totaliter extinctum : ergo.

Dices cum Lugone : Talis creditor , cui jam est præstita integra totalis solutio , non habet quidem jus actuale , habet tamen præteritum. *Contra est* : Jus præteritum perinde est ac nullum jus : atqui illi , qui nullum habet jus ad solutionem , non potest hæc ex justitia præstari : ergo neque illi , qui habet jus præteritum. M. constat ; nam jus præteritum , est jus extinctum : sed jus extinctum est nullum jus , sicut ignis extinctus est nullus ignis , & sicut ignis extinctus non potest urere , sic neque jus præteritum , & extinctum potest obligationem justitiæ parere.

Confirm. Non esset actus justitiæ effective , & per se talis , si aliquis vellet præstare solutionem pro debito possibili : ergo etiam si vellet solvere debitum præteritum. C. p. ideo solutio pro debito possibili non esset actus justitiæ , quia ad hoc , ut solutio sit actus justitiæ , requiritur debitum præsens , & actu existens , quale non est debitum mere possibile : atqui etiam debitum præteritum non est præsens , & actu existens : ergo.

P. 2. Justitia commutativa intendit ponere æqualitatem inter jus activum creditoris , & passivum debitoris , seu , vi justitiæ commutativæ debet tantum solvi , quantum debetur : atqui si idem debitum sæpius totaliter solveretur , non poneretur æqualitas , sed inæqualitas ; nam si 100. deberes , & per iteratas solutiones 200. solveres , tunc utique non tantum , quantum deberes , sed plus dares , & sic foret inæqualitas , quæ est contra naturam justitiæ : ergo.

441 *Objic. 1.* Potest eadem materia successive informari pluribus formis , & idem corpus in pluribus locis poni : ergo etiam potest successive eidem debito per plures solutiones satisfieri. R. N. c. & parit. nam prima forma non extinguit penitus appeti-



petitum & potentiam materiæ ad plures, & alias formas; hæc enim potentia est identificata materiæ, & durat, quamdiu materia durat. Aliud est de debito, utpote quod per primam solutionem totalem penitus extinguitur, adeoque ei, utpote non amplius existenti, non potest satisfieri per secundam solutionem. Idem est ad paritatem de ubicatione; nam potentia ad ultteriores, & ultteriores ubicationes est corpori identificata, nec per primam ubicationem penitus extinguitur.

Objic. 2. Potest idem peccatum sæpius in confessione explicari, & per absolutionem iterato remitti: ergo & idem debitum potest sæpius per iteratas solutiones extinguui. R. 1. N. a. nam per iteratam absolutionem peccatum jam semel remissum, non denuo actu & formaliter, sed tantum radicaliter remittitur, in quantum conceditur nova gratia sanctificans, quæ esset remissiva peccati, si illud adhuc in homine existeret. Quare & forma absolutoria facit primario, & essentialiter hunc sensum: *Concedo tibi gratiam ex se remissivam peccatorum tuorum.* non autem dicit necessario: *Remitto tibi actu & formaliter tua peccata.* R. 2. Tr. a. n. c. & parit., quia est magna disparitas inter condonationem, & remissionem iteratam offensæ ac injuriæ, & inter iteratam solutionem ejusdem debiti, ut statim dicetur. Quare

Objic. 3. Potest idem debitum sæpius condonari: ergo & sæpius totaliter solvi. R. N. c. & parit. Condonatio iterata offensæ, vel debiti pro objecto immediato non habet extinctionem debiti, sed obligationem creditoris, qua se adstringit ad non exigendum debitum: atqui non implicat, ut aliquis se sæpius obliget ad non exigendum idem debitum: sicut & in physicis aliquis jam semel ligatus potest sæpius, & fortius ligari. Contra solutio iterata debiti primario, & ex natura sua respicit extinctionem debiti; hoc enim est de natura solutionis, in quantum est actus justitiæ: atqui debitum jam prima solutione extinctum non potest amplius extinguui: sicut lumen jam semel penitus extinctum, non potest amplius extinguui, & homo jam totaliter mortuus, & occisus, non potest amplius morte affici, neque semel solutus omnibus vinculis potest iterum solvi.

2. Condonatio iterata offensæ, vel debiti in aestimatione mora-



li fere est eadem cum priori, & eundem effectum parit, quamvis aliter, scilicet obligationem non exigendi amplius debitum, aut satisfactionem: contra solutio secunda non est eadem moraliter cum prima, nec per eam datur eadem pecunia, sed solvitur nova, nec ponitur æqualitas, sed inæqualitas.

Objic. 4. Qui opus ex obedientia injunctum cum majori diligentia vel celeritate præstat, quam debeat, & obligatus sit, satisfacit ex virtute obedientiæ: idem est: si obligatus ad unum sacrum audiendum, duo audit die festo: ergo etiam qui plus dat, aut facit, quam ex justitia obligetur, satisfacit ex justitia. R. N. c. & parit. siquidem, ut recte advertit D. Thomas 2. 2. q. 104. ad actum obedientiæ non requiritur determinate, ut actus sit debitum ex præcepto, & Superior ad eum ponendum obliget, sed sufficit, si ejusmodi actio sit conformis voluntati Superioris, & juxta ejus voluntatem ac beneplacitum, etiam interpretativum, fiat. Proinde, si talis celeritas, vel auditio secundi Sacri sit actus obedientiæ, debet etiam fieri saltem secundum voluntatem, & beneplacitum interpretativum Superioris, etsi præceptum hoc faciendi non adsit. Aliud est de justitia, hæc enim expresse & determinate intendit ponere æqualitatem, & extinguere debitum: atqui neutrum fit, si plus solvitur, quam debeatur. Posset etiam retorqueri argumentum: qui plus facit, quam voluntas Superioris saltem interpretativa vult, non exercet actum obedientiæ: ergo neque ille exercet actum justitiæ, qui plus dat, quam debet.

Objic. 5. Zachæus reddens quadruplum, fecit actum justitiæ: ergo etiam actus supererogatorius potest esse actus justitiæ. R. D. a. fecit actum justitiæ mixtum liberalitate C. a. purum N. a. Fecit actum justitiæ, quatenus reddidit, quantum debuit: quatenus autem hæc redditio excessit debitum, eatenus non fuit actus justitiæ, sed liberalitatis, quare hic actus participavit honestatem duplicis virtutis, scilicet justitiæ, & liberalitatis. Id, quod sæpius contingit: ut si homini debeas alimenta indeterminate, huic obligationi satisfaceres per largitionem alimentorum etiam infirmorum, in hoc casu, si præbeas alimenta optima, exerces actum mixtum ex justitia & liberalitate. Idem dic,



*Art. III. An per iteratam solution. possit exerceri justit. &c. 629*

dic, si debens unum aureum, duos solvis; tunc enim, si non determinas, quisnam aureus sit pro debito, & quisnam gratis, tunc hæc solutio ad justitiam simul pertinet, & ad liberalitatem: si autem determinas unum pro debito, tunc ejus solutio tantum est actus justitiæ, alterius autem aurei datio est actus liberalitatis.

Objic. 6. Qui secunda vice solvit, secunda vice obligat creditorem ad non exigendum debitum: unde & ille, qui non valet in judicio probare primam solutionem a se factam, quia v. g. chyrographum perdidit, satisfacit, si secunda vice solvit: ergo secunda solutio etiam est actus justitiæ. R. D. a. qui secunda vice solvit, obligat creditorem ad non exigendum debitum, & satisfacit, quia actu, & formaliter extinguit debitum, & ponit æqualitatem N. a. quia radicaliter extinguit debitum, seu quia ponit actionem ex se extinctivam debiti, si quod adesset C. a. & N. c. Ad solutionem debiti, quæ sit actus justitiæ, requiritur, ut actu, & formaliter extinguatur debitum, & tribuatur alteri jus suum.

Objic. 7. Anticipata solutio debiti est actus justitiæ: ergo etiam solutio debiti jam antecederet soluti. A. constat: sic si solvo hodie debitum cras contrahendum, satisfacio ex justitia, nec obligari possum ad novam solutionem. R. D. a. anticipata solutio debiti nullo modo existentis N. a. anticipata solutio illius, quod indeterminate debetur c. a. Potest aliquis esse indeterminate obligatus, ut vel hodie, vel cras solvat: tali modo, si hodie solvat, exercet actum justitiæ per anticipatam solutionem. Item potest fieri contractus, ut hodierna die præstetur solutio pro merce crastina die primum tradenda: & in hoc casu iterum est actus justitiæ. Ratio est: quia vi contractus tale debitum jam hodie existit. Si autem debitum nullo modo hodie existeret, sed esset mere possibile, solutio pro illo facta nullatenus rationem justitiæ vindicaret.





## ARTICULUS IV.

### *De Injustitia, seu injuria.*

442 **I**njustitia hic sumitur pro defectu opposito justitiæ speciali, ac in rigore dictæ. Atque in hoc sensu iterum accipi potest vel pro habitu, aut actu pugnante contra justitiam: in primo sensu est habitus inclinans ad lædendum jus alterius, in secundo est actus, quo violatur jus alterius. Et de injustitia in secundo sensu accepta, quæ est ipsa injuria, modo controvertitur. Potest autem injuria, seu injustitia actualis definiri, quod sit *violatio juris alieni*: ubi per jus intelligitur jus stricte dictum, seu proprietatis, quod respicitur a justitia commutativa.

Injuria sic descripta dividitur in *materialem*, & *formalem*. *Materialis* est, quando quis lædit jus alienum inculpabiliter: ut si quis ex ignorantia invincibili bona fide detinet rem alienam invito Domino. *Formalis* est, quando scienter & mala fide violatur jus alienum: ut si sciens, rem esse alienam, eam tamen surripias, non restituas, aut eadem utaris contra voluntatem Domini. His præsuppositis quæstio remanet, an possit inferri injuria scienti, & consentienti? v. g. an Petrus inferat injuriam Paulo, si huic scienti, & consentienti auferat librum, vel aliquid aliud?

443 **A**ffero. Scienti, & valide ac efficaciter consentienti non potest fieri injuria. Communis. P. 1. ex Regula 27. J. in 6. quæ sic habet: *Scienti, & consentienti non fit injuria.*

Prob. 2. Si aliquis scienter, & valide consentit in certam actionem, tunc eo ipso cedit jure, quod habet ad prohibendam talem actionem, vel certe suspendit in actu secundo obligationem talis juris: atqui posita semel tali cessione juris, vel suspensione obligationis, jam non potest amplius fieri injuria; quia non potest amplius lædi jus alienum, quod hic & nunc non obligat: ergo.

Dixi



Dixi in assertione 1. *Scienti*; si enim consensus in aliquam actionem daretur ex ignorantia invincibili, qua quis ignorat, sibi ab alio malum parari, adhuc talis pateretur injuriam; quia si sciret fraudes alterius, haud dubie foret invitus, & sic praesumitur implicite non consentire.

Dixi 2. *Valide, ac efficaciter consentienti*; nam per consensum invalidum, aut inefficacem non tolleretur jus, aut obligatio juris, proinde adhuc locum haberet violatio juris, prout ex objectionibus mox ponendis patebit. Hinc

Objic. 1. Pupillus consentiens in contractum sibi perniciosum absque autoritate Tutoris, patitur injuriam: ergo etiam efficaciter consentiens potest pati injuriam. R. D. a. pupillus consentiens invalide C. a. valide N. a. Talis consensus pupilli absque autoritate tutoris, vel judicis est a legibus invalidatus.

444

Objic. 2. Fœnerator, seu Usurarius accipiens usuras a consentiente, infert ipsi injuriam, & tenetur ad restitutionem: ergo. R. D. a. a consentiente efficaciter N. a. ineffaciter C. a. Mutuatarius aut nescit, aut scit usuras esse iniquas? si scit, & eas solvit mera necessitate coactus, & non ex gratuito animo eas donandi, tunc hoc ipso non vult cedere jure suo, sed vult pecunias suas inique ab Usurario acceptas, denuo ab eodem recipere: si autem nescit iniquitatem usurarum, tunc iterum lædatur in jure suo tanquam ignorans & invitus.

Objic. 3. Viator, qui metu mortis adactus donat latroni pecuniam, patitur injuriam a latrone: sed viator in hoc casu valide consentit in donationem pecuniæ: ergo etiam valide consentiens potest pati injuriam. m. constat; quia contractus etiam metu gravi extortus, est validus, ut suo loco dicetur. R. D. m. valide consentit in donationem secundum se, & quoad substantiam C. m. in omnes etiam circumstantias donationis N. m. Viator consentit quidem in donationem, & renunciat juri ac dominio, quod habet in pecuniam: non autem renunciat juri, quod habet adversus metum a latrone incussum, & coactionem, qua inique fuit adactus ad donandam illam pecuniam. Hæc respon-



sponsio servit ad plures casus, in quibus aliquis dolo alieno inductus validum contractum celebrat.

Objic. 4. Homicida volentem, & rogantem occidens, committit injustitiam, & injuriam: ergo. R. D. a. & hoc ideo, quia jure vitæ nullus homo potest efficaciter cedere C. a. secus N. a. Jus vitæ nostræ a Deo, qui est Dominus vitæ, pendet: & hinc tali jure nos efficaciter non possumus cedere.

Objic. 5. Uxor, etiam consentiente proprio marito, alienum thorum accedens, evadit adultera, & infert injuriam proprio marito: ergo etiam consentienti fit injuria. A. quoad 1. partem probatur ex propositione 50. ab Innocentio XI. damnata hujus tenoris: *Copula cum conjugata consentiente marito non est adulterium: adeoque sufficit in confessione dicere, se esse fornicatum.* Si autem talis copula est adulterium, tunc etiam est injuria Marito illata, ex quo etiam probata manet 2. pars Antecedentis. R. D. a. sicut prius: infert injuriam Marito, quia Maritus non potest valide consentire Tr. a. secus N. a. Transmissi primum membrum distinctionis, quia non desunt, qui docent apud Herincx, & alios, per adulterium consentiente Marito factum, non inferri ipsi Marito injuriam, sed tantum puritati matrimonii, & bono prolis. Neque obstat propositio damnata; nam adhuc adulterium consentiente Marito commissum distinguitur a simplici fornicatione, eoquod hæc non opponatur bono prolis & puritati matrimonii.

Nota præterea ex Viva: Jus Mariti in uxorem non est sicuti jus in domum, quam alteri commodare potest, sed est jus tantum ad exigendum debitum: adeoque huic soli juri cedere potest. Iterum, quamvis Marito consentienti per adulterium conjugis non inferatur injuria ratione dedecoris sui, cui etiam cedere potest: irrogatur tamen injuria matrimonio, & bono prolis, cui Maritus cedere non potest: & ideo hujusmodi adulterium in confessione explicandum est; quia quamvis non habeat completam rationem injustitiæ, habet tamen incompletam. Ita ille.

Objic.



Objic. 6. Qui in Clericum, etiam volentem & consentientem, cum peccato gravi injicit manus violentas, afficit eum injuria, & incidit in Excommunicationem latae sententiae. cap. contingit. 1. de sent. Excommunic. ergo. R. D. a. & hoc ideo, quia privilegium, ac jus Canonis non est penes particularem Clericum, sed penes totum Clerum, quo proinde Clericus non potest valide cedere C. a. secus N. a. Existimant aliqui, quod Clerico sic consentienti non fiat injuria, quatenus est persona privata, bene autem quatenus est persona publica, ad statum clericalem elevata: rationem dant; quia jure, quod habet tanquam persona privata, cedere potest, non vero illi privilegio Canonis, quod ei qua personae publicae convenit, valide renunciare potest.

Objic. 7. Martyres Christi passi sunt injuriam, etsi voluntarie consenserint in mortem, & tormenta: ergo. R. D. a. etsi voluntarie consenserint cedendo jure suo, aut positive volendo injustas actiones tortorum N. a. etsi voluntarie consenserint, id est, permiserint, & acceptarint mortem ac cruciatus, ex hypothese, quod tyranni jam aliunde fuerint parati ad eos injuste inferendos C. a. Fuit ergo facta SS. Martyribus injuria, quia tantum permiserunt, & acceptarunt mortem a tortoribus illatam, non autem positive cesserunt jure, quod habebant ad vitam: imo nec poterant cedere, cum ipsi non fuerint Domini vitae. Hinc & Sap. 5. SS. Martyribus tribuitur actio injuriarum contra tortores in extremo judicio. Dum autem Martyres aliqui condonarunt omnem injuriam, propterea tamen non abdicarunt jus omne ad vitam, sed tantum per similem condonationem renunciaverunt juri ad indignationem & vindictam in hac vita de suis tortoribus sumendam.





## TRACTATUS II.

*De Restitutione.*

## DISSERTATIO I.

*De Natura, necessitate, & radicibus Restitutionis.*

## ARTICULUS I.

*De Natura Restitutionis.*

## §. I.

*Quid sit, & ad quam virtutem pertineat Restitutio?*

445 **A**SSERO I. Restitutio potest definiri, quod sit *rei acceptæ red-  
ditio, vel damni illati compensatio secundum arithmeticam æ-  
qualitatem.* Ita Holzman, ac quoad rem Communis. Per  
redditionem rei acceptæ intelligitur, quod res debeat vel in in-  
dividuo, vel in æquivalenti reddi. Hæc descriptio aliis vide-  
tur nimium lata, quia comprehendit etiam redditionem mutui,  
commodati, depositi, pignoris, ubi non præcessit juris alieni  
violatio. Hinc tradunt pressiore, quæ solum se extendit ad  
restitutionem faciendam alteri propter injuriam illi illatam, seu  
propter jus ipsius sive materialiter, sive formaliter læsum. Di-  
cunt igitur cum Cardinali de Lugo D. 8. n. 17. quod restitu-  
tio sit *juris alieni redintegratio, vel actus justitiæ commutativæ,  
quo reparatur jus alterius, materialiter aut formaliter læsum.* Per  
jus in hac definitione intelligitur jus proprietatis, & rigorosum.  
Utraque descriptio est satis bona, & retineri potest. Ex his

Colliges I. Restitutionem differre a satisfactione I., quia  
satisfactio est quid generalius restitutione; satisfactio enim signi-  
ficat



*§. 1. Quid sit, & ad quam virtutem pertineat restitutio? 635*

ficat solutionem cujuslibet debiti, sive ea fiat ex præcepto justitiæ, aut aliarum virtutum, v. g. charitatis. Ast restitutio significat tantum redditionem ex præcepto, & obligatione justitiæ commutativæ. 2. Satisfactio pressius, & specificè accepta est amica reconciliatio per obsequia, petitionem veniæ, & similia, non autem restitutio: imo per satisfactionem & reconciliationem potest sæpe deleri offensâ, & tamen remanere onus restitutionis, ut patet ex Tractatu de Charitate. 3. Satisfactio est præcipue in commodum satisfaciens, ut sic propter obsequia, & petitionem veniæ liberetur a pœna: contra vero restitutio non est in utilitatem restituentis, sed illius, cui fit restitutio, ut clarum est.

Colliges 2. Restitutionem quoque esse diversam a satisfatione, 1. quia satisfactio est actus justitiæ vindicativæ, restitutio autem est actus justitiæ commutativæ. 2. Satisfactio regulariter non debetur ante sententiam judicis: restitutio ante omnem sententiam fieri debet.

Colliges 3. Restitutionem etiam differre a solutione, etenim solutio non semper est actus justitiæ commutativæ, ut si solvas illud, quod debes ex charitate, vel misericordia, voto, juramento &c. Ast, ut jam dictum est, & statim probabitur, restitutio est actus solius justitiæ commutativæ. 2. Sæpe fit restitutio, ubi tamen non fit solutio: ut si reddis pignus, depositum, commodatum, rem furto ablatam, tunc diceris restituere, non autem solvere.

Affero 2. Restitutio est actus proprius solius justitiæ commutativæ. DD. communiter contra paucos. Prob. 1. Restitutio versatur circa jus proprietatis, ac rigorose dictum, quod ad æqualitatem arithmeticam reparat: atqui sola justitia commutativa per actus suos versatur circa jus proprietatis, ac rigorose dictum: ergo. m. constat ex dictis de objecto, & natura justitiæ commutativæ.

446

Prob. 2. Neque justitia legalis, neque distributiva, neque alia virtus, quæ distinguitur a justitia commutativa, obligat ad restitutionem: ergo obligatio restitutionis

L 1112

ex



ex sola justitia commutativa oritur, consequenter restitutio ad hanc solam virtutem spectare debet. Antec. præcipue probabitur §. seq. Interea

Objic. 1. Superior, vel Magistratus non æqualiter distribuens bona Communitatis, & sic peccans contra justitiam distributivam, tenetur ad restitutionem: ergo restitutio etiam ex justitia distributiva oritur. R. D. a. tenetur ad restitutionem, si distribuendo simul lædat justitiam commutativam C. a. si solam justitiam distributivam lædat N. a.

Objic. 2. Etiam per violationem justitiæ distributiæ infertur alteri injuria: ergo etiam violans justitiam distributivam tenetur ad restitutionem; nam omnis injuria debet per restitutionem reparari. R. D. a. infertur alteri injuria, quæ sit contra jus proprietatis alterius N. a. secus C. a. Sola injuria, quæ est læsio juris proprietatis alterius, infert onus restitutionis.

Objic. 3. Qui alterum impedit vi, vel fraude a consequendo beneficio, tenetur ad restitutionem, & tamen non violat justitiam commutativam, vel jus proprietatis alterius: ergo. R. N. a. nam quilibet habet jus strictum adversus alterum, ne per vim, vel fraudem a beneficio aliquo impediatur. Verum, ut plenius intelligatur, quomodo ex sola justitia commutativa proveniat obligatio restituendi, sequentes §§vi. ponentur, in quibus & plura praxi multum utilia discutientur.

## §. II.

*An oriatur obligatio restitutionis ex violatione Justitiæ distributiæ, vel restitutio sit actus Justitiæ distributiæ?*

447

NOTA 1. Hic duplicem quæstionem moveri posse: prima est, an sit obligatio restituendi vi solius justitiæ distributiæ? v. g. Communitas omisso digniore contulit minus digno officium pingue, ac multorum reddituum: nunc quæritur, an magis digno propterea debeat fieri restitutio, quia ipsi est prælati minus dignus cum damno suo non modico in bonis fortunæ,



tunæ, eoquod redditibus talis officii adeo pinguis frui non possit? Tota ergo difficultas in hoc hæret, an præcise ratione majoris dignitatis, & majorum meritorum ac qualitatum, aliquis ad prælationem in ordine ad bona, & officia communia habeat tale, ac tantum jus, ut ejus violatio inducat obligationem restitutionis; nam justitia distributiva unice, ac præcise attendit ad illud jus, quod oritur ex majore dignitate, aptitudine, ac qualitate alicujus personæ, ut satis constat ex dictis Dissert. præc.

2. Controverti potest, an saltem vi justitiæ commutativæ in distributione bonorum & officiorum communium obligatio restitutionis oriri possit tunc, dum officia & bona communia minus dignis, vel omnino ineptis & indignis dispensantur: potest enim quæri, an non tota Communitas se ex tacito contractu & pacto, consequenter ex justitia commutativa obliget membris, & civibus particularibus, quod velit in distributione bonorum communium attendere ad proportionem geometricam, & dignitati ac meritis membrorum proportionare collationem officiorum, & bonorum Communitati redundantium.

Nota 2. Bona communia posse conferri immediate a tota Communitate per suffragia totius populi, vel mediate per Administratorem, aut Rectorem ac Principem a Republica constitutum, aut per aliquem, qui ex speciali commissione a Communitate aut Principe est deputatus, ut bona communia secundum proportionem distribuat.

Nota 3. In hoc suo decidendum esse, an obligatio restitutionis ex sola justitia distributiva, & majore dignitate unius præ altero possit oriri. In reliquis autem §§vis dicetur de obligatione, quæ ex contractu, & justitia commutativa resultat. H. N.

Assero 1. Dignus, aut dignior, præcise & unice ratione suæ etiam majoris dignitatis, non habet jus stricte dictum ad officia publica, & bona communia Reipublicæ redundantia. Communis cum Herinex, & aliis plurimis. 448

Prob. 1. Dignus, vel dignior ratione suæ dignitatis in ordine ad bona communia non habet jus in re, nec ad rem: ergo



go non habet jus stricte dictum ; hoc enim dividi solet in jus in re , & ad rem. A. prob. Si enim dignus, aut dignior haberet jus in re præcise ratione dignitatis, tunc jam ante collationem officii, vel boni communis posset talis homo illud vindicare tanquam proprium, & de illo tanquam re propria, & ad se pertinente disponere secundum suum beneplacitum ; quia vi solius suæ dignitatis etiam sine collatione jam esset Dominus talis boni communis, quod est absurdum, & ab omnibus negatur.

Neque habet jus ad rem stricte dictum ratione solius dignitatis suæ, 1. quia dignitas importat tantum aptitudinem & decentiam ad ista bona præ aliis obtinenda, non autem jus stricte dictum. Hinc 2. neque ex praxi habetur, quod aliquis in judicio persequatur hoc jus, & exinde litem moveat, quod ipsi minus dignus in officio, vel favore quodam Communitatis sit prælatus, neque privatim urgeat restitutionem pro jure suo læso ; cum tamen alia jura stricte dicta in judicio, & privatim soleant defendi, & restitutio pro iisdem læsis efficaciter peti.

Prob. 2. Communitas de se tantum est obligata, ut per distributionem suorum bonorum procuret utilitatem communem totius Reipublicæ : ergo dum Communitas distribuit bona sua particularibus dignioribus, id facit citra obligationem stricte dictam, quam erga tales personas particulares, qua particulares haberet.

Confirm. & explicatur. Dum Respublica distribuit bona communia, & officia publica magis meritis, tunc id solum facit, quia per distributionem sic factam magis promovetur bonum commune : ergo potius Respublica suum bonum, & obligationem, quam in ordine ad se, & ad suam utilitatem curandam habet, respicere solet in tali distributione, quam utilitatem personarum particularium : neque solet attendere majorem dignitatem in se, ac si ea importaret aliquod jus, sed illam respicit tanquam melius, & opportunius medium in ordine ad bonum commune procurandum. Ex quo colliges, justitiam distributivam, & proportionem geometricam hic per accidens attendi citra obligationem stricte dictam, ex majore dignitate personæ particularis resultantem.

Prob.



§. II. An restitutio sit actus Justitiæ distributiæ &c. ? 639

Prob. 3. In magnis Provinciis, imo & in Curia Romana, ut ait Vogler, citra scrupulum venduntur officia sæcularia: atqui hoc non posset fieri, si ratione dignitatis aliquis haberet jus strictum ad talia officia: ergo. m. p. vel enim talia officia venderentur minus dignis? & sic læderetur jus digniorum, quod haberent præ minus dignis: vel venderentur magis dignis? & taliter iterum illis fieret injuria; quia ratione solius majoris dignitatis jam habuissent jus strictum, ad hæc officia etiam sine pretio recipienda. Unde dicendum est, quod dignitas vel aptitudo etiam major non importet jus strictum, sed tantum aliquam decentiam citra obligationem strictè talem.

Affero 2. Violatio solius justitiæ distributiæ non importat onus, aut obligationem restitutionis. Communis. 449

Prob. 1. Juxta S. Thomam, & alios Th. Th. communiter obligatio tantum oritur ex violata justitia commutativa: ergo. 2. Obligatio restituendi originem habet ex injuria strictè dicta, quæ est læsio juris propriæ, & in rigore talis: atqui violatio justitiæ distributiæ non est læsio juris propriæ, & in rigore talis, ut patet ex Assertionem præc. ergo. 3. Ideo ex læsione obedientiæ, charitatis &c. non oritur obligatio restitutionis, quia hæc virtutes non important jus rigorosum in altero: sed etiam justitia distributiva non importat jus rigorosum in altero: ergo. Ex his.

Deduces 1. Quando Communitas nullo pacto, aut contractu se obligavit personis particularibus, posse eam per se ipsam, vel per alios bona sua temporalia, & officia distribuere minus dignis, vel omnino indignis, etiam extraneis, seu extra Rempubicam constitutis, quin per hoc lædat jus strictè dictum, aut incurrat obligationem Restitutionis. Ita Illfing: & colligitur ex dictis. Plura de hoc num. 451.

Deduces 2. Hæc omnia procedere *vi solius justitiæ distributiæ*; sæpe enim obligatio justitiæ commutativæ observanda in distributione bonorum, & officiorum communium concurrere solet: de quo §vo seq.

Objic.



Objic. 1. Bona communia spectant ad totam Communitatem: ergo singula membra habent jus stricte tale, saltem inadæquatum ad hæc bona. R. N. c. si singula membra seorsim, & divisim sumuntur; nam sic accepta non possunt disponere de bonis communibus: bene, si accipiantur conjunctim, & indivisim pro persona aliqua ficta. Ex hac objectione sequeretur, quod membra etiam inepta habeant jus ad officia publica, & hæc illis conferri debeant, quod est falsum. Imo universaliter officia non debent indigenis conferri; cum sæpissime longe melius prospiciatur Reipublicæ, si vocetur extraneus.

Objic. 2. Bona communia, saltem secundo, ordinantur ad utilitatem hominum particularium in Republica existentium: ergo personæ particulares habent strictum jus ad bona communia. R. N. a. Finis hic secundarius, seu utilitas hominum privatorum abunde obtinetur, si distributores bonorum communium, & officiorum debent æquam facere distributionem ex justitia distributiva, vel ex lege positiva ipsis a Communitate præscripta, vel ex contractu, aut ex charitate, etsi deinde membra ratione suæ dignitatis non habeant strictum jus.

### §. III.

*An non saltem Justitia commutativa obliget ad restitutionem illum, qui inique distribuit bona communia?*

450 **NOTA 1.** Hic esse quæstionem de Electoribus, & distributoribus bonorum communium a Communitate constitutis, v. g. de Principibus, & Gubernatoribus Communitatum: Item de aliis, qui per Principem deputantur ad officia, & bona communia distribuenda.

**Nota 2.** Duplicis generis esse bona communia: aliqua ordinantur primario in utilitatem Reipublicæ qua talis, cujusmodi sunt officia publica: alia vero saltem ex se, & natura sua primario videntur ordinari in utilitatem accipientium, seu illorum, quibus a Republica dispensantur: talia sunt bona fortunæ Reipublicæ redundantia, quæ in populum dispensantur juxta cujusvis merita; quamvis & in hac distributione ultimato a Repu-



§. III. An ad restitutionem obligetur inique distribuens &c. ? 641

Republica intendatur bonum commune, dum per dispensationem conatur remunerari merita præterita in suum bonum collata, & alios ad bonum publicum promovendum sua liberalitate provocare.

Nota 3. Bona secundi generis, si ea aliquando vi legis, aut ordinationis a Communitate factæ distribuenda sunt ab Officiali aliquo in personas particulares, tunc ea plerumque servata forma justitiæ distributivæ, & proportionem meritorum &c. esse dispensanda, ita quidem, ut, si secus fieret, justitia commutativa læderetur, & distributor teneretur ad restitutionem personis particularibus, quibus obfuit, faciendam. Ita Illfung T. 4. d. 2. q. 1. art. 3. §. 1. n. 8. Ratio est: quia Communitas, vel etiam Princeps, dum vult dispensari bona communia in personas particulares, prudenter præsumitur velle, & ex tacito quasi contractu obligare distributorem, ut plus det dignioribus, & minus largiatur minus dignis. Atque per talem voluntatem Principis, aut Communitatis subditi acquirunt jus rigorosum ad partem suæ dignitati commensuratam accipiendam. Quare in hoc casu justitia commutativa cum distributiva concurrit: imo forma justitiæ distributivæ, & proportio geometrica se hic habet tantum materialiter. Proinde iniquus distributor in simili casu solum peccat formaliter contra justitiam commutativam, & satisfacit dicendo in confessione, intuli aliis grave damnum in bonis temporalibus, non autem debet addere, quod simul violaverit justitiam distributivam, aut proportionem geometricam, utpote quæ solum in proposito attenditur per accidens, & propter jus rigorosum alterius cognoscendum, aut dimetiendum, non autem propter, ac per se. Videatur Illfung laudatus.

Nota 4. Etiam aliqua bona communia secundi generis esse, in quæ membra Communitatis possunt habere jus rigorosum, quæsitum ex aliquo contractu ab ipsis, vel aliis cum Communitate inito: ut si aliqua sylva hac sub obligatione justitiæ commutativæ fuerit donata, vel legata Communitati, ut annuatim singulis civibus certa portio, pro cujuslibet civis dignitate & meritis, detur. In hoc, & aliis similibus casibus Officialis non debite distribuens ligna peccat contra justitiam commutativam, ac tenetur ad restitutionem civibus illis faciendam, quibus portio-



tionem suam secundum intentionem donantis non concessit. *Ma-*  
*strius in Theol. moral. d. 7. q. 1. n. 9. in fine, P. Elbl, & alii.*

His ergo præmissis remanet quæstio de bonis communibus  
 primi generis, seu de officiis publicis tam civilibus, quam Ec-  
 clesiasticis, pro quibus

Nota 5. Eligens, vel promovens omnino indignum, & in-  
 eptum ad aliquod officium sæculare, vel beneficium Ecclesiasti-  
 cum, præsertim curatum, peccat mortaliter contra fidelitatem,  
 & justitiam commutativam, vi cujus ex tacito contractu talis,  
 dum officium Electoris, aut Promotoris, vel Gubernatoris sus-  
 cipit, se obligat ad mala Reipublicæ impedienda, & ejus bo-  
 num promovendum. Non desunt, qui satis probabiliter apud  
 Herincx p. 3. d. 7. q. 1. n. 6. defendunt, etiam graviter pec-  
 care illos Principes & Superiores, qui ad officium sæculare gra-  
 vis momenti, v. g. Judicis, inter plures absolute dignos non  
 præferunt notabiliter digniorem. Rationem dant: quia Princeps,  
 vel officiorum distributor, saltem ex fidelitate tenetur non so-  
 lum impedire damna Reipublicæ, sed etiam majus ejus bonum  
 promovere, dum facile potest: atqui, si ex pluribus absolute  
 dignis assumeret notabiliter digniorem, promoveret majus bo-  
 num Reipublicæ: ergo. Alii tamen probabiliter contradicunt  
 huic assertioni apud eundem Herincx, eoquod Princeps, vel  
 Elector sæcularis non censeatur se obligasse ad exactissimam di-  
 ligentiam in promovendo bono communi, sed videtur sufficere  
 diligentia ordinaria, quam ostendit, dum semper officiis publi-  
 cis studet præficere personas absolute, & certo dignas, ac ido-  
 neas. Aliud est de Beneficiis Ecclesiasticis, præsertim curatis,  
 quibus ordinarie præfici debent digniores, ut patet ex Triden-  
 tino, & aliis Canonibus gravem obligationem inculcantibus.  
 Vide Herincx cit. q. 2. n. 10. & seqq. Reiffenstuel in Theol. mo-  
 ral. Hic tantum quæritur de obligatione restitutionis, si offici-  
 um conferatur indigno, vel minus digno.

Antequam quæstio ista resolvatur, nota obiter ex D. Tho-  
 ma, universaliter non esse digniorem, qui doctior, aut sancti-  
 or est, sed qui pensatis omnibus utilior est Ecclesiæ, vel Rei-  
 publicæ futurus, sive, qui consideratis omnibus circumstantiis  
 per-



§. III. An ad restitutionem obligetur inique distribuens &c.? 643

personæ, loci, temporis, &c. aptior censetur ad ministerium, quod ratione beneficii, vel officii peragendum est. Certe illi, qui majori pollent scientia, non statim habiliores sunt ad regendum, præcipue si superbia, quæ scientificos non raro comitari solet, eorum spiritum inflet, ut experientia sæpe sæpius in Ecclesia jam est testata. H. N.

Affero 1. Distributor iniquus officiorum sæcularium, & Beneficiorum Ecclesiasticorum per se, & regulariter nihil tenetur restituere personæ dignæ, aut digniori omissæ. E. g. Princeps, vel ejus Minister dedit officium publicum pinguißimum Paulo indigno, & inepto ad id administrandum, omisso Petro, qui erat dignissimus, & aptissimus. In hoc casu nihil tenetur restituere Princeps Petro omisso. Idem est de Beneficiis Ecclesiasticis inique distributis. Lugo, Herincx, Vogler, Sporer, ac alii plurimi apud P. Vogler de Restitutione n. 215. citati.

451

Prob. Neque personæ dignæ, vel digniores habent jus strictum ad hæc officia ratione dignitatis suæ, neque ratione pacti, vel contractus cum ipsis a Republica initi: ergo violatio talis juris non importat onus restitutionis. A. quoad 1. membrum constat ex syvo præc. secundum pariter patet; quia neque ex præxi, aut aliunde colligitur, quod Respublica, aut Princeps se obligent membris dignis, vel dignioribus in particulari consideratis, ad danda ipsis Beneficia, vel officia.

Dixi: *Per se, & regulariter*; Excipias enim 1. casum, quo dignus, aut dignior jam fuit legitime nominatus, electus, aut præsentatus ad beneficium, vel ipsi officium aut beneficium jam est debite collatum; facta enim collatione, præsentatione &c. jam habet jus quæsitum strictè dictum, cujus læsio esset injuria rigorosè talis, quæ induceret onus restitutionis.

Excipe 2. Nisi beneficia, vel officia conferantur per concursum; si enim plures edicto convocantur ad examen, ut eorum dignitas exploretur, & eligatur dignissimus, tunc fit injuria strictè dicta dignissimo, si non eligatur, aut assumatur præ reliquis minus dignis, & Elector tenetur ei ad restitutionem.

M m m m 2

nem.



nem. Lugo. d. 34. n. 42. Herincx d. 7. n. 29. Vogler n. 216. & alii communissime. Ratio est: quia in concursu intervenit aliquod pactum saltem implicitum, vi cuius concurrenti promittitur Beneficium, vel officium sub conditione hac onerosa, si subeat examen, & in eo dignior præ cæteris inveniatur. Hoc pactum si violetur, tunc concurrenti fit injuria stricte & rigoro- se dicta, ex qua oritur obligatio restitutionis faciendæ.

452

Affero 2. Scienter, & voluntarie eligens indignum, & ineptum ad Beneficium Ecclesiasticum, aut officium sæculare publicum, sæpe obligari potest ad restitutionem Ecclesiæ, vel Reipublicæ faciendam. Herincx mox citatus, & alii communissime. P. Talis Elector, dum subit officium Electoris, vel distributoris officiorum, contractu saltem implicito se obligat, quod in officiorum distributione velit semper Rempublicam, vel Ecclesiam indemnem servare: ergo, si per electionem indigni damnum causat Ecclesiæ vel Reipublicæ, jus stricte dictum, quod Ecclesia vel Respublica per ejusmodi contractum acquisivit, violat, adeoque ad reparationem talium damnorum tenetur, si ea sint reparabilia, & nisi electus ipse, qui primario ad eorum reparationem, & restitutionem obligatur, ea compenset.

453

Affero 3. Qui ad officium, vel beneficium eligit notabiliter minus dignum, dummodo talis re ipsa absolute dignus appareat, non tenetur ad restitutionem Ecclesiæ, vel Reipublicæ faciendam. Herincx p. 3. d. 7. n. 29. & teste Vogler n. 241. longe communior Authorem, quorum aliqui sententiam suam certam, aut omnino certissimam dicunt.

Prob. 1. Tanta obligatio reparandi damna ob electionem absolute digni ad officium, vel beneficium, præterito digniore, non agnoscitur in praxi: ergo ea non datur. A. constat; quia ex communi, ac timoratorum etiam praxi habetur, quod damna ex electione dignorum secuta, quamvis eligi potuissent digniores, absque remorsu conscientiæ non reparentur per restitutionem.

Prob. 2. Qui suscipiunt negotia aliena tractanda, communiter ex justitia commutativa non obligantur ad summam diligenti-



gentiam, & administrationem omni modo meliorem: ergo neque Princeps, vel officiorum distributor, dum hoc officium in se suscipit, se ex justitia commutativa obligat ad bonum commune omni modo meliori promovendum, & semper ad optimorum Officialium delectum, sed tantum ad eligendos semper dignos, & absolute bonos. A. constat; quia Oeconomus non semper obligatur ex justitia commutativa, ut operarios & artifices optimos constituat, sed sufficit, si eligat simpliciter, & absolute bonos.

Prob. 3. Quamvis sæpe Distributores, præsertim beneficiorum Ecclesiasticorum, imo juxta aliquos etiam illi, qui distribuunt officia sæcularia, teneantur ad eligendos digniores vi præcepti seu naturalis, seu positivi, tamen hoc præceptum videtur tantum obligare ex fidelitate debita Ecclesiæ, vel Reipublicæ, non autem ex justitia commutativa; saltem, ut ex dictis claret, incertum est, an Respublica, vel Ecclesia suos distributores velit ex titulo justitiæ commutativæ obligare: ergo non sic obligantur, consequenter non tenentur ad restitutionem.

Confirm. 1. Propter maximam auctoritatem DD. nobis faventem, & propter rationes adductas saltem dubium oritur, an eligens minus, absolute tamen dignum, violarit justitiam commutativam, & an teneatur ad restitutionem ob damna inde emergentia: atqui quando possessor, & Dominus suorum bonorum vere est dubius, an violaverit justitiam commutativam, & teneatur restitutionem facere ex bonis suis, quæ juste possidet, tunc non censetur esse obligatus ad talem restitutionem: ergo. m. constat; quia nemo ob dubium est spoliandus certa possessione suorum bonorum.

Confirm. 2. Specialiter de eligente, vel promovente minus dignum ad beneficium Ecclesiasticum: dum Ecclesia digniores vult præfici Beneficiis, præsertim curatis, & majoribus, id solum postulat, & stricte præcipit fieri ob evitacionem damnorum spiritualium, non autem temporalium: ergo Ecclesia ob collationem Beneficii factam minus digno, non obligat ad compensanda damna temporalia, inde Ecclesiæ emergentia. A. constat ex constitutionibus Ecclesiæ circa hoc punctum factis, quæ



semper attendunt ad pericula animarum præcavenda. Quare in ordine ad damna temporalia evitanda se habet Ecclesia, sicut Respublica sæcularis: atqui Respublica sæcularis non obligat Collatorem officiorum civilium ex justitia commutativa ad conferenda ea digniori, & ad damna refarcienda, quæ sequuntur ex collatione minus digno facta: ergo.

Objic. 1. Si notabiliter minus dignus eligitur, exponitur Ecclesia, vel Respublica periculo, ne ei omnino indignus præficiatur: atqui sic Ecclesiam, vel Rempubicam periculo exponere, videtur in Electore esse contra justitiam commutativam: ergo. R. N. M. vel claritatis gratia dist. nisi de minus digno certo constet, quod sit absolute dignus c. M. fecus n. M. Nos ponimus, quod aliquis certo sciatur dignus: atqui dum certo dignus præficatur, non potest esse periculum præficiendi omnino indignum, ut ex terminis claret.

Objic. 2. Ipsa lex naturalis videtur obligare, ut digniores saltem ad Episcopatus, ac Parochias, & alia beneficia curata majoris momenti promoveantur: ergo. R. D. a. lex naturalis videtur obligare ex justitia commutativa N. a. ex charitate, vel fidelitate, quarum neutra importat onus restitutionis C. a. & N. c.

454

Quæres 1. An Princeps possit vendere officia sæcularia? Dixi: *sæcularia*; Beneficia enim Ecclesiastica ob Simoniae vitium vendi nequeunt: de quo forte in hoc Tractatu aliqua dicuntur. R. affirmative, dummodo certæ conditiones in tali venditione observentur. Ita D. Thomas Opusc. 21. ad Ducissam Brabantiae, Herincx, & alii passim.

Conditiones autem sunt istæ: 1. ut non vendantur cuilibet, præsertim illi, qui tantum plus pretii solet offerre, sed solum personis dignis, & quidem, quantum possibile est, dignioribus, ne ex aviditate lucri homines inepti cum periculo subditorum præponantur officiis. 2. Debet adesse autoritas in vendente, qualis est in supremo Principe, non autem in inferiore Officiali, nisi forte ex ju. causa a supremo Principe hanc auctoritatem obtinuerit. 3. Ut necessitas Reipublicæ ejusmodi venditio.



*§. III. An ad restitutionem obligetur inique distribuens &c. ? 647*

ditionem exposcat. 4. Ut non vendatur ipse labor officio annexus; hic enim est onus, quod alteri vendi non potest. Neque potest vendi pretium alias debitum, & labori, qui est officio annexus, commensuratum; nam & hoc jam aliunde ex justitia debetur illi, qui laborem & officium in se suscipit. 5. Igitur requiritur, ut præter laborem, & stipendium justum pro labore emptor ex tali officio reportet specialia quædam emolumenta, v. g. magnam eminentiam & dignitatem: sic non raro prædia, & dominia satis caro venduntur ob solum titulum magnificum aut eminentem, ipsis annexum, etsi cæteroquin paucos fructus, & redditus temporales ferant. Iterum excessus ille, quo stipendium annuum superat æstimationem laboris officio annexi, etiam pretio æstimabilis, & vendibilis est. Ratio hujus est: quia Respublica excessum illum stipendii posset Officiali omnino justè subducere: ergo & eum illi vendere potest. Insuper, si officium sit tale, ut occasionem faciendi quæstum præbeat, etiam pretio sit æstimabile; nam & ædes, quæ ad faciendum quæstum sunt opportunæ, ideo pluris venduntur.

Ex his causis, & sub his limitationibus aliquando justè possunt officia sæcularia, saltem moderato pretio, vendi: id, quod praxis obtinuit in variis Curiis, etiam Romana. Neque obstat Novella 8. c. 7. in qua prohibetur officiorum publicorum venditio: nam ibi vel solum prohibetur venditio ista sine additis circumstantiis facta, vel hæc Novella non est usu recepta. Addo nihilominus, ejusmodi venditiones minime expedire, sed sæpe posse esse perniciosas; nam, dum officia fiunt vendibilia, sæpe obtinentur ab indignis, & sola causa divitum promovetur, omiſſis aliis longe dignioribus: unde etiam studia negliguntur, & quisque pecuniis corradendis insudat.

Quæres 2. An violans justitiam legalem teneatur ad restitutionem? R. negative. Communis: ratio est; quia justitia legalis non importat jus, & debitum rigoroſe dictum: ergo ejus violatio non obligat ad restitutionem. Accedit communis omnium DD. sententia. Videatur Illſung T. 4. d. 2. q. 1. n. 20. ad finem.



## ARTICULUS II.

*De necessitate Restitutionis.*

## §. I.

*An Restitutio sit necessaria necessitate medii, vel præcepti?*

455 **N**OTA 1. Illa esse necessaria necessitate *medii*, quæ sunt media per se requisita ad consequendam, aut constituendam justificationem hominis, ita quidem, ut iis etiam inculpabiliter, v. g. ob ignorantiam invincibilem, aut impotentiam physicam omisiss, justificatio, consequenter & æterna salus de lege ordinaria nunquam obtineatur. Justificatio autem est gratia prima sanctificans, per cujus receptionem homo vel liberatur a peccato originali, vel a peccato mortali, & Filius ac Amicus Dei ex mancipio dæmonis evadit.

Hoc modo necessaria sunt 1. Baptismus, qui per se requiritur, ut deleat peccatum originale, & conferat homini gratiam sanctificantem. 2. Fides Dei unius, & Remuneratoris, quæ per se in adultis disponit ad gratiam primam sanctificantem. 3. Pœnitentia post lapsum in peccatum actuale grave, quæ juxta ordinationem Dei nos reconciliat cum Deo, & nobis reddit stolum primam, seu gratiam primam justificantem. 4. Gratia sanctificans ipsa; hæc enim est forma justificans, & formaliter constituit justificationem hominis &c.

Nota 2. Præcise, & unice necessaria necessitate *præcepti* sunt illa, quæ quidem non sunt media per se ordinata ad justificationem, & gratiam primam sanctificantem acquirendam, est tamen obligatio sub præcepto ad ea ponenda, ita ut aliquis peccet, si non adimpleat tale præceptum. De cætero, si aliquis inculpabiliter, v. g. ex ignorantia, aut impotentia illud non facit, quod est necessarium necessitate præcepti, seu quod præcise, & unice præcipitur, nihil obest, neque talis peccat. Et quoad hoc  
est



est notabile discrimen inter illa, quæ requiruntur necessitate medii & præcepti. Iterum, quæ requiruntur necessitate medii, debent per se influere in gratiam sanctificantem, & illam conferre: quæ autem exiguntur necessitate præcepti, non influunt in gratiam sanctificantem primam per se, tanquam media necessaria, & indispensabilia, sed tantum requiruntur, ut evitetur novum peccatum, quod committeretur per transgressionem præcepti. Verum plura de hoc in Tractatu de Virtutibus theologicis. H. P.

Assero. Restitutio non est necessaria necessitate medii ad salutem. Ita fere omnes Theologi contra paucos antiquos. P. 456  
1. Restitutio non est medium per se requisitum ad justificationem, nec per se confert gratiam primam, sed tantum requiritur, ut evitetur novum peccatum: ergo non est necessaria necessitate medii. 2. Restitutio inculpabiliter omissa non obest saluti hominis: atqui illa, quæ requiruntur necessitate medii, etsi inculpabiliter omittantur, obsunt saluti hominis: ergo restitutio non est necessaria necessitate medii.

His non obstantibus restitutio est necessaria necessitate præcepti. Et quidem, ut alia taceam, urget ad restitutionem præceptum naturale, deductum ex illo principio naturali: *Quod tibi non vis fieri, alteri ne feceris: vel, quod tibi vis fieri, alteri feceris*: atqui tu vis, ut tibi restituatur tuum; ergo & tu restitue. 2. Jure naturali alteri jubemur non inferre damnum, neque etiam illatum continuare: atqui, qui non restituit, continuat damnum illatum: ergo. Quare recte dixit D. Augustinus Can. 1. caus. 14. q. 6. *Non dimittitur peccatum, nisi restituatur ablatum.*

Objic. 1. In illo, qui inique per peccatum mortale aliquem damnificavit, restitutio vel in se, vel in voto est necessaria ad justificationem, & gratiam primam recipiendam: ergo restitutio vel in se, vel in voto requiritur necessitate medii, sicut Baptismus, aut Pœnitentia. A. constat; talis enim saltem votum, & propositum implicitum debet habere restituendi, casu, quo restitutio fieret possibilis.

R. D. a. Restitutio vel in se, vel in voto est necessaria per se, & tanquam medium per se influens in justificationem

P. Kick Theol. Tom. IV.

N p n n

N. a.



N. a. per accidens, & ne novum fiat, vel antiquum peccatum continetur, & sic per accidens obex ponatur requisitis per se necessariis ad justificationem C. a. Restitutio seu in voto, seu in se non est necessaria necessitate medii ad justificationem, seu non est medium per se influens in justificationem. In adducto tamen casu requiritur per accidens, ne per ejus omissionem fiat novum peccatum, vel continetur antiquum, & per illud ponatur obex illis mediis, quæ ad gratiam primam per se concurrere debent; nam sine tali proposito restitutionis, vel restitutione ipsa non haberetur pœnitentia de peccato, quæ tamen pœnitentia est medium necessarium ad justificationem in gravi peccatore.

Objic. 2. Si daretur præceptum restituendi, tunc per illud præcipue stringeretur nolens restituere: atqui nolens restituere non stringitur ejusmodi præcepto: ergo non datur præceptum restituendi. m. p. Creditor tenetur ex charitate relinquere bona sua, ne proximus damnetur: adeoque tenetur remittere debitum nolenti restituere, ne hic damnetur; atqui si nolenti restituere remittitur debitum, non amplius stringeretur præcepto restitutionis: ergo. m. constat; quia non stringitur præcepto restitutionis, qui rem alienam consentiente Domino detinet. R. Et nolentem, & volentem, qui rem alienam rationabiliter invito Domino detinent, stringi præcepto restitutionis. ad prob. N. M. charitas enim solum obligat, ut salutem proximi succurratur cum jactura bonorum temporalium, quando is est in necessitate, & quando seipsum liberare non potest ab æterna damnatione: ast in proposito se ipsum liberare posset, dummodo vellet, imo seipsum voluntarie per nolationem restitutionis in æternæ damnationis periculum conjicit. Accedit, quod obligatio remittendi cuivis debita, redigeret omnes brevi tempore ad extremam paupertatem, & omnibus rapinis & furtis viam aperiret: imo non esset amplius possibile furtum; quia Dominus ex charitate teneretur impedire peccatum grave furis, & huic dare jus in sua bona. Verum ista sunt absurdissima.

Colliges tamen, quod restitutio non sit ita necessitate præcepti necessaria, ut animæ defunctorum e purgatorio liberari nequeant, donec ab eorum hæredibus fiat restitutio, prout homines



§. II. *An præceptum restitutionis sit affirmativum?* 651

nes simplices sibi non raro persuadent. Elbl, Holzman, ac alii. Ratio est: vel defunctus, dum vivebat, fecit, quantum potuit, & debuit sub mortali facere ad præceptum restitutionis adimplendum, vel non fecit? si secundum: tunc non est in purgatorio, sed in inferno. Si primum: æquitas non admittit, ut, postquam pro suis peccatis est satis passus, patiatur amplius ob culpam hæredis a se inimpedibilem.

Dices: Ex historiis constat, quod animæ defunctorum moverint hæredes restitutionis faciendæ, ut sic citius liberarentur: ergo. R. per ejusmodi restitutionem ab hæredibus factam animas e purgatorio posse sæpius per accidens liberari: tum, quia ipse actus restitutionis est aliquis actus satisfactorius, & ex pio, eo-que meritorio commiserationis affectu per modum suffragii pro defunctis debitoribus potest offerri ab hæredibus: tum, quia illi, quibus restitutio fit, & qui inde aliquam eleemosynam percipiunt, possunt moveri ad preces fundendas pro debitore defuncto. Nego autem, quod restitutio ista fuerit conditio necessaria, sine qua animæ e purgatorio non fuissent liberatæ.

§. II.

*An præceptum Restitutionis sit affirmativum, vel negativum?*

ASSERO: Est potius affirmativum, quam negativum. 458  
Herincx, Sporer, Vogler, Holzman, contra Mastrium, Hauldum, & alios plures.

Prob. Illud præceptum est affirmativum, quod directe & primario præcipit positionem actus positivi, ut in Tractatu de legibus est dictum: atqui præceptum restitutionis directe & primario præcipit positionem actus positivi, scilicet redditionem positivam debiti, compensationem damni illati &c.: ergo præceptum restitutionis est affirmativum. Adde: quamvis præceptum restituendi reductive pertineat ad præceptum negativum non furandi, directe tamen longe aliquid aliud præcipit, quam præceptum non furandi; siquidem aliud est, omittere furtum, & aliud restituere, vel compensare: quæ diversitas explicari



non potest, nisi admittatur, præceptum restituendi esse affirmativum, saltem principaliter, quamvis reductively spectet ad præceptum negativum non furandi, & importet negationem continuationis injuriæ illatæ: quæ tamen negatio non potest aliter obtineri, quam per actum positivum refarcitionis damni illati.

459

Objic. 1. Perinde est dicere: *restituere*, ac: *non detinere rem alienam*: ergo præceptum restituendi est negativum; præcipit enim negationem detentionis rei alienæ. R. N. a. *Restituere*, & *non detinere rem alienam* presse non videntur idem sonare; nam multi non detinent rem alienam, non tamen propterea vere, & propriè restitunt. Sic ille, qui nunquam proximum læsit in bonis suis, aut ei nihil debet, non detinet rem alienam, non tamen ideo restituit proximo. 2. Si præcepto restitutionis nihil aliud præciperetur, quam ut non detineatur res aliena, fur satis faceret huic præcepto, si rem inique ablatam dilapidaret, aut in flumen projiceret; sic enim jam non amplius detineret rem alienam: atqui sequela est absurda: ergo.

Objic. 2. Præceptum restitutionis potest impleri sine actu positivo: ergo est præceptum mere negativum. A. p. 1. Si equus ablati sine cooperatione furis ad Dominum suum sponte rediret. 2. Si fundum inique occupatum Dominus vindicaret, & tu vindicanti non resisteres. 3. Si sponte possessionem talis fundi defereres: in his casibus restitueres, & tamen nullum positivum actum exercerēs: ergo.

R. N. a. ad prob. 1. & 2. dico: si res aliena ad Dominum revertitur sine illius cooperatione, qui talem rem debuisset restituere, tunc non adimpleri præceptum restitutionis ob defectum positivæ redditionis: quamvis hoc præceptum per accidens obligare cesset, quatenus materia, & objectum ejus aufertur, dum res ablata ad proprium Dominum revertitur.

Nota igitur, quod aliud sit, præceptum impleri, & aliud, illud cessare obligare. Impleri dicitur, dum ponitur actus positivus præceptus, si præceptum sit affirmativum: cessat autem obligare variis aliis modis. Sic præceptum audiendi Sacrum non im-



impletur nisi actu positivo auditionis Sacri, cessat vero ob alias varias causas obligare, v. g. ob ægritudinem, ignorantiam inculpabilem diei festi, aut assistentiam necessariam moribundo exhibendam. Ita quoque præceptum restituendi non impletur, dum debitor non potest restituere, & tamen in hoc casu obligatio hujus præcepti per accidens cessat. Sic discurre etiam in nostro casu.

Ad 3. exemplum dico: neminem posse possessionem prius ceptam relinquere saltem sine actu voluntatis exterius manifestato: adeoque jam intervenit actus positivus.

Objic. 3. Præceptum restitutionis obligat semper, & pro semper, sicut alia præcepta negativa: ergo etiam est negativum. R. N. a. Sæpe enim obligatio hujus præcepti saltem per accidens cessat, aut suspenditur ob impotentiam illius, qui tenetur restituere, ut dicitur, agendo de causis excusantibus a restitutione.

Objic. 4. auctoritatem Scoti 4. d. 15. q. 2. §. de quarto. n. 28. & 29., ubi videtur tenere, quod præceptum restitutionis sit præceptum negativum, & quidem hoc: *Non furtum facies*: proinde, quod restitutio sit cessatio a furto, & negatio injustæ detentionis: ergo nostra conclusio est contra Scotum. R. 1. Scotum solum velle, quod præceptum restituendi reductivè pertineat ad præceptum negativum non furandi. 2. Scotus cit. loc. tantum vult, quod restitutio non sit satisfactio sacramentalis, quæ in confessione a Sacerdote injungi solet, cujus rationem dat: quia jam ante omnem impositionem pœnitentiæ a Sacerdote factam ex præcepto naturali aliquis tenetur restituere. Hæc erat Scoti decisio, quam ibi pro praxi statuit, parum sollicitus, an præceptum restitutionis intendat cessationem a furto directe, vel indirecte tantum. Item, dum paritatem ponit inter præceptum *non mæchaberis*, & *restitutionis*, hoc unice vult, quod præceptum restitutionis jam ante impositionem satisfactionis sacramentalis obliget, sicut præceptum non mæchandi. Reliqua, quæ de præcepto negativo ibi obiter inspersa sunt, non ex propria assertiva mente proferre videtur.



## DISSERTATIO II.

*De Radicibus Restitutionis.*

460 **T**itulus, seu radix restitutionis nihil est aliud quam causa, ob quam restitutio fieri debeat. Tales radices communiter duæ tantum assignantur, ut videre est apud Reiffenstuel, & Elbl Conferent. 1. de Restit. n. 2. Titulus primus scilicet est *res accepta*, alter *injusta acceptio*, vel *læsio*. Ratio primi tituli est: quia ille, qui rem alienam etiam optima fide possedit, si advertat, esse alienam, tenetur eam statim restituere. Ratio rationis: quia res aliena, etiam apud bonæ fidei possessorem existens, semper clamat ad Dominum suum. Item: talis bonæ fidei possessor habet plus in bonis suis, quam vi juris sui activi ipsi competit: Dominus vero, ad quem res aliena spectat, habet minus: adeoque est inæqualitas, quæ per restitutionem debet tolli. Accedit, quod bonæ fidei possessor rei alienæ saltem inferat injuriam materiale, quæ resarciri debet redditione, quamprimum advertitur, quod hæc res sit aliena, seu ad alium pertineat.

Ratio secundæ radices per se patet; quia injuste accipiens rem alienam, alterum formaliter, & scienter damnificat, ac inæqualitatem ponit, quam restitutione a fortiori reparare debet.


Sunt aliqui, qui cum Sporer & Holzman quatuor radices enumerant, scilicet 1. ex re accepta. 2. ex injusta acceptione. 3. ex damnificatione. 4. ex contractu. Imo La-Croix L. 3. p. 2. n. 18. addit quintam ex lege positiva, ex eo, quod jus in certis casibus injungat restitutionem damni, quamvis nec sit res aliena accepta, nec injusta acceptio, vel damnificatio, neque contractus; ut si animal Joannis occiderit animal Petri.

Verum tres istæ radices, quas laudati Authores addunt, facile ad duas nostras reducuntur. Sic ad injustam acceptionem pertinet damnificatio injusta; hæc enim est quædam subtractio rei alienæ, quamvis ejusmodi res aliena non sit utilis damnificanti:



*Art. I. §. I. Quid debeat restituere possessor bonæ fidei? 655*

canti : cum injusta damnificatio supponatur tunc contingere, cum quis rem alienam malitiose destruit sine utilitate propria, uti faciunt devastantes segetes, vel accendentes alienam domum. Ad eandem radicem reductive spectant obligationes restituendi ex contractu, & lege positiva; quia in his præsupponitur injusta læsio, aut præcavetur, eoquod quandoque soleat, & sæpe possit intervenire. His suppositis sit



*ARTICULUS I.*

*De Restitutione debita ex re accepta, seu a bonæ fidei possessore.*

*§. I.*

*Quid, & quantum possessor bonæ fidei debeat restituere de substantia rei alienæ?*

**N**OTA 1. Bonæ fidei possessorem tantum teneri restituere ex titulo rei acceptæ, seu, quod idem videtur esse, ex delicto materiali; siquidem delictum formale, aut formalem injuriam non commisit: adeoque ex injusta acceptione non tenetur. 461

Nota 2. Magnam esse differentiam inter restitutionem faciendam ex titulo rei acceptæ, & ex titulo injustæ acceptionis, prout ex seqq. Articulis patebit.

Nota 3. Pro restitutione facienda a bonæ fidei possessore, seu ex titulo rei acceptæ, esse hanc universalem regulam: Mensura restitutionis ex delicto materiali, seu ex re accepta, est *quantitas possessionis*. id est: Possessor bonæ fidei tenetur restituere tantum, quantum de re aliena adhuc possidet formaliter, vel quantum inde est factus ditior. Regula hæc per sequentes Assertiones expendetur. Hinc

Ass.



462

Affero 1. Possessor bonæ fidei, ubi certo cognovit, rem, quam hætenus possedit, esse alienam, tenetur illam restituere: & quidem 2. eandem in individuo, per se loquendo. DD. communiter. P. Res semper clamat ad Dominum suum, & manet semper devincta suo Domino, atque cum hac obligatione, ut suo Domino restituatur, redit a quemcunque possessorem: ergo bonæ fidei possessor tenetur eam restituere, & quidem ante omnem sententiam judicis; cum lex naturalis ante omne imperium judicis cuilibet injungat, ut cuique reddatur jus, & res sua. Ex quo

Colliges: Petrum, qui rem alienam emit a fure bona fide, nesciens eum esse furem, teneri ad restitutionem rei hujus alienæ, etsi debeat jacturam pretii pro tali re expensæ subire. Ratio hujus est jam data; quia ejusmodi res clamat ad Dominum suum: neque Petrus potest evitare jacturam pretii sui cum injuria, & læsione juris alterius. Debet ergo sibi computare, quod rem alienam a fure, & non Domino emerit:

Prob. etiam 2. membrum Assertionis: quia res in individuo est alterius: adeoque in individuo clamat ad alterum tanquam Dominum. Hoc tamen intelligendum est *per se loquendo*; nam 1. si quis fidei bonæ possessor restituendo rem alienam in individuo incurreret grave incommodum, utique posset reddere aliam ejusdem valoris, & bonitatis; tunc quippe creditor non esset rationabiliter invitatus ob non redditam eandem in individuo rem. 2. Satisfacit debitor reddendo aliam rem æqualis bonitatis, quando Dominus prudenter præsumitur alia re æquivalente fore contentus, prout regulariter præsumi potest, si res sit usu consumptibilis, ut pecunia, vinum, triticum &c. ita Holzman.

Dixi in Assertionem: *ubi certo cognovit*; nam si dubio invincibili laborat, num res sit aliena; rem sibi licite retinet, vel consumit, alienat &c. quia *in dubio melior est conditio possidentis*, ut superius jam est dictum.

463

Affero 2. Si res aliena non quidem exstat formaliter apud bonæ fidei possessorem, est tamen apud eum virtualiter, in quantum hic inde factus est ditior, tunc tenetur & illud restituere,

in



in quo ex re aliena factus est locupletior. Communis P. Pretium, aut id, in quo talis possessor factus est ditior, succedit loco rei alienæ. ergo sicut rem alienam adhuc existentem tenetur restituere, ita tenetur restituere pretium, five id, in quo factus est ditior.

Confirm. L. 14. ff. de conditione indebiti habetur: *Natura æquum est, neminem cum alterius detrimento fieri locupletiolem; atqui, nisi possessor bonæ fidei teneretur restituere illud, in quo factus est ditior, cum alterius detrimento fieret locupletior ex re aliena: ergo.*

Petes: Quid sit ex re aliena fieri ditiolem? R. Esse nihil aliud, quam aliquem per se ex re aliena capere aliquod emolumentum, vel parcere aliquibus sumptibus, quos alias de suo fecisset, nisi rem alienam in hunc finem impendisset. Quantum ergo est tale emolumentum, vel in quantum parcat rebus suis, illarum loco rem alienam applicando, in tantum dicitur factus ditior ex re aliena.

Res hæc explicatur exemplis: 1. Rem alienam a fure donatam accepisti bona fide, quam iterum donasti liberaliter alteri, cui alias nihil donasses, nisi tali dono fuisses affectus: in hoc casu non es factus ditior ex re aliena; quia ratione rei alienæ non habes aliquod emolumentum, vel bonum in rebus tuis, quod alias non habuisses, si rem istam alienam non possedisses. 2. Si autem alias donasses eidem, etsi rem illam alienam non recepisses, tunc donando rem alienam fis ditior; quia dando rem alienam parcis rei tuæ, quam alias dedisses. 3. Attrivisti vestem alienam, 50. florenis constantem: interea autem, nisi hanc vestem alienam habuisses, attrivisses aliam 20. florenis constantem. Tali casu ex re aliena tantum factus es ditior 20. florenis; quia 20. florenos tantum, non autem plures expendisses de pecuniis tuis, nisi veste aliena usus fuisses.

Assero 3. Si bonæ fidei possessor rem alienam ita consumpsit, ut neque per eam sit factus ditior, ad nihil restituendum tenetur. Communissima. P. In tali casu neque ex re accepta, neque ex injusta acceptione est obligatio ad restituendum: ergo ex nullo capite, cum tantum duo prædicta capita, & tituli restitutionis sint. A. constat; non enim tenetur ex re accepta; quia



hæc non amplius exstat in se formaliter, neque æquivalenter in eo, in quo possessor esset factus ditior: atqui res non amplius existens formaliter, aut æquivalenter, non potest amplius clamare ad Dominum suum, neque Domino est obligata. Neque tenetur *ex injusta acceptione*, eo ipso, quod supponatur esse bonæ fidei possessor, qui detinendo, vel consumendo &c. rem alienam, nullum peccatum contra justitiam commisit. Dixi: *contra justitiam*; esto enim aliquis consumendo talem rem peccaverit contra alias virtutes, v. g. castitatem, bona hæc impendendo in luxuriam, non tenetur ad restitutionem; mala enim fides, & peccatum, quod fundat obligationem restitutionis, debet pugnare contra justitiam commutativam, ex qua sola oritur onus restitutionis.

Objic. contra 2. Assertionem: Si debet bonæ fidei possessor restituere, in quantum est ditior factus ex re aliena, tunc etiam debet restituere is, qui in aliena domo bona fide comedit cibos furtivos, & sic factus est ditior: sed talis non videtur teneri restituere: ergo. m. p. si talis teneretur restituere, tunc etiam ille, qui in aliena domo se calefacit ad ignem, ex lignis furtivis excitatum, quatenus sic parcit lignis suis, quæ alias comburere deberet: sed sequela videtur absurda: ergo.

R. C. M. n. m. ad prob. min. disparitas est; nam talis, qui se ad alienum ignem calefacit, non censetur in moralis æstimatione ligna illa consumere, sed se habet ad istam consumptionem mere per accidens, & ex tali consumptione per accidens fit ditior. Aliud est de eo, qui comedit, & bibit alienam rem; talis enim ex intentione, & non per accidens consumit cibos: adeoque ex tali consumptione non per accidens, sed per se fit ditior. Ex his

Colliges 1. Si durante bona fide res aliena apud possessorem bonæ fidei pereat vel casu, vel etiam negligentia possessoris, eum nihil teneri restituere, nisi forte sit factus ditior. Ratio est: quia neque ex injusta acceptione, neque ex re accepta tenetur, ut patet ex dictis.

Colliges 2. Si rem alienam bona fide emeris, ac illam postea eodem, vel minori pretio vendideris, ad nullam restitutionem.



tutionem teneris, Domino rei faciendam: Holzman ex Molina, & Dicastillo. Ratio est: quia apud te nec formaliter, nec æquivalenter exstat, cum inde plus non habeas in bonis tuis, quam habuisses aliunde, etsi caruisses semper tali re aliena. Si autem rem illam majori pretio vendideris, adeo ut rem tuam familiarem auxeris, teneris tale augmentum restituere Domino. Dixi: non teneris ad restitutionem Domino faciendam; nam, an emptori non tenearis ad restitutionem pretii, alibi decidetur.

§. II.

*An bonæ fidei possessor una cum re aliena teneatur etiam restituere fructus ex ea perceptos?*

NOTA 1. Per fructus hic intelligi omne id, quod percipitur ex re, vel occasione rei. Dividuntur in *naturales*, *industriales*, & *mixtos*. *Naturales*, vel *spontanei* sunt, quos natura ipsa producit, quin interveniat notabilis industria humana, ut ligna cædua in sylvis, herbæ pratorum, poma arborum &c. *Industriales* sunt, qui fere unice, vel certe præcipue ex industria humana ortum habent, ut lucrum ex pecunia; nam pecunia est ex se sterilis: ergo lucrum non est fructus pecuniæ, sed industriæ illius, qui pecunia negotiatur. Item artefactum alieno instrumento confectum, fructus industriæ, non instrumenti est. *Mixti* sunt, quando natura, & industria fere æqualiter ad eorum productionem concurrunt: tales sunt segetes, uvæ, oleum, cerevisia, caseus, butyrum, fata omnia in agris & hortis. Atque hos fructus, quos nos mixtos dicimus, Civilistæ etiam *industriales* appellant. His addunt nonnulli fructus *civiles*, qui non ex ipsa re, sed occasione rei mediante aliqua obligatione civili proveniunt, ut usuræ, mercedes, salaria, pensiones, census, & alii redditus annui.

Nota 2. Fructus alios esse *perceptos*, alios *percipiendos*. *Percepti* sunt non solum illi, qui perfecte sunt collecti, veluti qui jam sunt illati in horreum, sed etiam ii, qui industria hominum sunt a solo, vel a re fructifera separati, licet necdum in horreis, vel cellariis reconditi. L. Si fructuarius. 13. ff. Quibus



modis ususfructus amittatur. ubi dicitur : *Fructum percipi spica, aut feno cæso, aut uva adempta, aut excussa olea, quamvis nondum tritum frumentum, aut oleum factum, vel vindemia coacta sit.* Aliud est, si olea per se decidit, & absque industria hominis separata est a solo, ut statim subjungit lex citata. Fructus percipiendi, seu pendentes sunt illi, qui adhuc pendent, & corpori fructificanti, v. g. solo, arbori &c. adhærent. Insuper fructus percepti alii sunt consumpti, qui non amplius existunt in rerum natura, & quos possessor in suos usus convertit. Aliqui sunt existentes, & non consumpti, quos nempe non sic consumpsit. Deinde fructus etiam consumpti possunt esse virtualiter existentes, in quantum scilicet ex iis possessor est factus ditior, vel eos in æquivalenti possidet, ut, dum loco eorum habet pretium, pro quo tales fructus sunt venditi. Denique fructus possunt esse consumpti, vel percepti ante, vel post litis contestationem. H. S.

466

Affero I. Fructus mere industriales non tantum bonæ, sed etiam malæ fidei possessor pleno jure facit suos, ita, ut nihil pro iis teneatur restituere, quamvis adhuc formaliter existant, vel possessor inde sit factus ditior.

P. Fructus mere industriales sequuntur industriam : ergo ad illum spectant, ad quem pertinet industria, atqui hæc spectat ad ipsum possessorem, qui talem industriam impendit : ergo & fructus industriales pertinent ad ipsum possessorem sive bonæ, sive malæ fidei. A. constat ; sicut enim fructus rei sequitur rem, ita fructus industriæ comitatur industriam.

Confirm. I. Ipsum lumen naturæ dictat, esse nostrum, quod nostra industria est partum ; eoquod lucrum tale non sit rei, sed personæ : sic nemo imaginem, a Paulo confectam penicillo alieno, v. g. Petri, huic, scilicet Petro, adjudicat, sed potius Paulo, cujus industriæ & artis opus, & fructus est.

Confirm. 2. Quælibet res fructificat Domino suo : atqui industriæ suæ Dominus est possessor, ponens hanc industriam, sicut & omnium reliquarum actionum suarum dominium habet : ergo industria etiam fructificat tali possessori, & fructus industriæ  
ad



*§. II. Quid debeat restituere possessor bonæ fidei? 661*

ad eundem pertinent. Juristæ, qui huic assertioni oppositum videntur dicere, revera non sunt oppositi; nam illi non loquuntur de fructibus mere industrialibus, sed de mixtis, quos ipsi etiam industriales vocant.

Deduces 1. Eum, qui lucratus est pecunia aliena, eam proprio nomine exponendo in lusu, vel pro censu, aut applicando ad negotiationem, nihil teneri restituere, nisi ipsam pecuniam sic expositam, non autem lucrum occasione ejus reportatum. Ratio est: quia tale lucrum non est fructus pecuniæ de se sterilis, sed industriæ eam exponentis.

Deduces 2. Qui alienum triticum alio, ubi plus valet, deportat, & ibi proprio nomine cariori pretio vendit, satisfacit restituendo simile triticum. Ratio est eadem, quæ prius. Hoc tamen notent ejusmodi, qui re aliena negotiantur invito & inscio Domino, sæpe eos posse ad plus restituendum obligari ratione lucri cessantis, vel damni emergentis, quod Dominus forte subire debet ex eo, quia ob alterius iniquitatem re sua ad tempus caret, & ea uti nequit.

Assero 2. Bonæ fidei possessor tenetur una cum re aliena restituere fructus necdum perceptos, seu a solo. aut re fructifera necdum separatos, deductis tamen expensis utiliter factis, & æstimatione laboris. P. Tales fructus censentur esse pars rei fructiferæ: ergo si debet restitui tota res fructifera, debent etiam fructus ejus restitui A. constat ex L. *Fructus pendentes. 44. ff. de rei vindicatione.* ibi: *Fructus pendentes pars fundi videntur.* Quod autem expensas, & æstimationem laboris deducere valeat, habetur ex L. II. C. *de rei vindicatione.* 467

Assero 3. Bonæ fidei possessor una cum re aliena tenetur restituere fructus etiam perceptos, tam naturales, quam mixtos, formaliter existentes, nisi hi jam sint legitime præscripti: potest tamen ab his iterum deducere expensas utiles, & æstimationem laboris, ac industriæ. Communis. 468

Prob. 1. Res fructifera semper fructificat Domino suo: ergo ad ipsum spectant omnes fructus rei tam naturales, quam  
O o o o 2 mi-



mixti, in quantum hi, scilicet mixti, respondent naturæ, in quantum autem respondent industriæ humanæ, spectant ad possessorem: adeoque æstimationem industriæ suæ deducere potest, uti & alias expensas utiliter factas in rem fructiferam conferendam, excolendam &c.

Prob. 2. Ex L. *Certum. 22. C. de rei vindicatione.* quæ sic habet: *Certum est, malæ fidei possessores omnes fructus solere cum ipsa re præstare: bonæ fidei vero existentes: post litis autem contestationem universos: ergo.*

Et hi fructus, sicut & necdum percepti, debent restitui etiam casu, quo Dominus non fuisset eosdem percepturus ex re apud se existente, sive ex sua negligentia, sive ex alia causa, quia scilicet agrum non coluisset. Ratio est: etsi Dominus ex re sua apud se existente non collegisset fructum, tamen certum est, quod res, apud quemcunque sit, sui Domini sit, & huic fructificet, non autem alteri, qui non habet ejus dominium.

469

Objic. 1. Bonæ fidei possessor acquirit dominium fructuum ex re aliena perceptorum, etiam formaliter existentium, & quidem tam naturalium, quam mixtorum: ergo eos non tenetur restituere. a. p. L. *bonæ fidei. 48. ff. de acquirendo, vel amittendo rerum dominio.* dicitur: *Bonæ fidei emptor non dubie percipiendo fructus etiam ex aliena re suos interim facit, non tantum eos, qui diligentia & opera ejus pervenerunt, sed NB. omnes. id est, non solum industriales, sed etiam naturales, & mixtos.* Et addit lex: *quia, quod ad fructus attinet, loco Domini pene est, scilicet bonæ fidei possessor.*

R. D. a. acquirit dominium revocabile C. a. irrevocabile N. a. Dominium hoc fructuum tantum esse revocabile, & durare tamdiu, donec possessor bonæ fidei in notitiam veri Domini, ad quem res aliena pertinet, veniat, ex ipsa lege citata colligitur; dicit enim, fructus suos interim facit. Tali modo etiam explicantur aliæ leges, quæ dominium fructuum naturalium & mixtorum adjudicant bonæ fidei possessori: uti lex qui scit. 25. §. 1. ff. de usuris & fructibus. ibi: *Bonæ fidei possessor*  
in



§. II. Quid debeat restituere bonæ fidei possessor? 663

in percipiendis fructibus idem juris habet, quod Dominis prædiorum tributum est; loquitur enim de jure revocabili. Idem est de lege sequitur. 4. §. 19. ff. de Usurpat. & Usucap. ibi: Lana ovium furtivarum, siquidem apud furem detenta est, usucapi non potest: si vero apud bonæ fidei emptorem, contra: quoniam in fructu est, nec usucapi debet, sed statim emptoris fit. ubi bonæ fidei emptor lanam, tanquam fructum rei alienæ non debet præscribere, ut ejus dominium revocabile, bene ut irrevocabile obtineat.

Objic. 2. Dominium revocabile nullum est dominium: ergo hæc lex, uti & aliæ citatæ, quæ bonæ fidei possessori tribuunt dominium fructuum naturalium & mixtorum existentium, non possunt loqui de dominio revocabili. A. constat in nobis Franciscanis, qui eo ipso, quod habeamus tantum facultatem revocabilem utendi rebus usu consumptibilibus, non habemus verum dominium. R. N. a. nam dominium revocabile est verum dominium, & jus disponendi pro libitu, & nomine proprio de tali re, donec scilicet ejusmodi dominium legitime revocetur. Sic in proposito tamdiu bonæ fidei possessor habet plenum jus nomine proprio, & secundum beneplacitum applicandi fructus haud aliter, ac verus Dominus, quamdiu perdurat bona fides, & Dominus rei alienæ fructiferæ ignoratur. Quod non est verum in Franciscanis, qui non ex jure, & nomine proprio, ne quidem revocabili, res sibi concessas consumunt. De reliquo dominium, & jus proprie dictum revocabile non est res insolita; tale enim dominium revocabile habet maritus in dote uxoris, utpote quod revocatur dissoluto matrimonio.

Objic. 3. L. 28. ff. de Usuris & fructibus dicitur, quod possessor bonæ fidei pleno jure acquirat fructus: atqui si acquirit pleno jure, acquirit irrevocabiliter: ergo. R. N. m. nam non semper possidetur irrevocabiliter, quod pleno jure possidetur, ut patet ex L. generaliter. §. sub conditione. ff. Qui, & a quibus manumissi. ubi servus sub conditione legatus alteri, pendente, seu necdum adimpleta conditione, dicitur esse pleno jure hæredis, quamvis tantum revocabiliter ad ipsum spectet, scilicet tamdiu, donec conditio fuerit impleta; hac enim purificata talis servus tradi debet Legatario.

Objic.



Objic. 4. Eadem L. 28. ff. *de Usuris*. Bonæ fidei possessor in ordine ad fructus comparatur Usufructuario: atqui Usufructuarius acquirit irrevocabile dominium fructuum: ergo & bonæ fidei possessor. R. D. M. comparatur Usufructuario in ordine quoad perceptionem fructuum c. M. quoad retentionem n. M. Hæc distinctio, & explicatio dari debet, ut ista lex cum aliis jam allegatis concordetur.

Objic. 5. Ad nihil prodest dominium istud revocabile: ergo frustra attribuitur bonæ fidei possessori. R. N. a. Servit enim 1., ut talis possessor permanente bona fide possit pro libitu de fructibus talibus disponere. 2. Juxta Reiffenstuel, & Pichler fructus isti non possunt per Dominum, dum rem suam evincit, a bonæ fidei possessore peti actione reali, & vindicatione, sed tantum implorando judicis officium, vel actione personali, scilicet conditione sine causa. Ratio hujus est: quia illud vindicari actione reali non potest, cujus quis non est Dominus: sed horum fructuum Dominus non censetur ille, ad quem res aliena spectat, sed bonæ fidei possessor, cui jura dominium fructuum perceptorum, revocabile tamen, tribuunt. Unde est disparitas inter fructus perceptos, & pendentes; illos enim, qui adhuc pendent, cum re sua vere actione reali potest Dominus vindicare.

Objic. 6. L. *fructus*. 45. ff. *de Usuris*. habetur: quod uxor, vel vir, ex re sibi donata a conjuge (quæ donatio invalida est) adeoque ex re aliena, faciat tantum suos illos fructus, quos operis acqviserit, veluti ferendo; nam si pomum decerpserit, vel ex sylva cæciderit, non fit ejus, sicut nec cujuslibet bonæ fidei possessoris; quia non ex facto ejus is fructus nascitur. ergo saltem fructus mixti, ad quos industria bonæ fidei possessoris concurrat, ita sunt ejus, ut illos non teneatur restituere, etsi debeat restituere fructus mere naturales, ad quos ejus industria parum, aut nihil confert. Hæc objectio confirmari potest ex §. 35. Instit. *de rerum divisione*. ubi bonæ fidei possessori relinquitur fructus agri pro cultura, & cura.

R. N. c. Nam & ex hac lege tantum infertur dominium revocabile fructuum mixtorum: vel si irrevocabile, tunc illud se extendit tantum ad fructus mixtos, quantum hi respondent indu-



§. III. Quid debeat restituere possessor bonæ fidei? 665

industriæ in eos producendos impensæ, non autem in quantum respondent naturæ, Idem dic ad §. 35. Instit. pro confirmatione allatum.

Tandem nota, bonæ fidei possessorem non teneri ad restitutionem fructuum percipiendorum, seu illorum, quos potuisset percipere, non tamen percepit, quia v. g. ex negligentia agrum alienum, quem ut suum bona fide possedit, omisit colere. Ratio est: quia bonæ fidei possessor solum tenetur restituere ex titulo rei acceptæ: ergo solum tenetur restituere illud, quod de re aliena adhuc possidet formaliter, vel æquivalenter: atqui de ejusmodi fructibus nihil possidet formaliter, aut æquivalenter; cum nihil de iis unquam perceperit: ergo. Similiter neque tenetur bonæ fidei possessor restituere fructus illos, ex re aliena bona fide perceptos, quos jam penitus consumpsit ante litis contestationem, & ante notitiam, quod res illa, quæ fructus hos protulit, sit aliena. Dixi: quos jam penitus consumpsit, ita quidem, ut inde non sit factus ditior, & tales fructus nec formaliter, nec virtualiter existent. Ratio est eadem, quæ prius; nam nihil amplius possidet de his fructibus: ergo eos non tenetur restituere.

Tenetur tamen talis bonæ fidei possessor restituere universos fructus post litis contestationem consumptos, etsi ex iis non sit factus locupletior; post hanc enim incipit esse in mala fide fictione juris: atqui qui mala fide consumit rem alienam, tenetur ad eam restituendam ex titulo injustæ acceptionis, vel damnificationis: ergo. Concordat lex *Certum. 22. C. de rei vindicat.* superius n. 468. allegata. His tanquam facilioribus præmissis sit.

§. III.

*An bonæ fidei possessor etiam obligatus sit ad restituendos fructus bona fide ante litis contestationem consumptos, quando ex iis factus est locupletior?*

ASSERO: Bonæ fidei possessor ante præscriptionem legitime completam probabilius tenetur restituere fructus tam naturales, quam mixtos, etiam æquivalenter existentes, seu in quantum ex eorum usu, venditione &c. est factus locupletior, deductis

*P. Kick Theol. Tom. IV.*

P P P P

ta-



tamen expensis, & æstimatione laboris. Assertio hæc intelligenda est secundum jus commune; si enim alicubi jus aliquod municipale aliud statuerit, tunc hoc illo in loco erit observandum. Hanc nostram sententiam tenet Reiffenstuel L. 2. Decret. T. 13. n. 149. & 153. ac seqq., qui allegat pro se Abbatem Covarruviam, Bartolum, qui licet sententiam contrariam dicant probabilem, nostram tamen probabiliorem agnoscunt. Idem facit Palao, qui, quamvis in oppositam sententiam inclinet, tamen dicit, nostram tanquam communioem, & juri naturali conformiorem, esse tenendam. Pro nostra sententia etiam stant omnes Theologi antiqui, & Juristæ non pauci ex antiquis, quibus etiam accedit ex Recentioribus Joannes Christophorus Schambogen, celeberrimus per 30. circiter annos in Universitate Pragenfi Jurium Professor. Est contra Jctos modernos, & paucos Theologos, ac Canonistas RR. scilicet Haunoldum, Illsung, Zetl, Ininger, Holzman, Schmier, Pichler, Wiestner. Verum contra hos.

Prob. I. Ex una parte jus naturale antecederet ad leges positivas certo obligabat ad restitutionem fructuum prædictorum, etiam virtualiter exstantium: & ex altera parte non est certum, sed summe dubium, an hæc obligatio juris naturalis sit sublata per legem aliquam positivam: ergo obligatio juris naturalis manet in sua certa possessione, & consequenter vi hujus tenetur bonæ fidei possessor restituere una cum re aliena etiam fructus virtualiter exstantes. C. patet; quia jus certum non tollitur per jus dubium; certitudo enim semper prævalet dubio: & aliunde constat, legem certo præexistentem tamdiu in sua possessione perseverare, donec non solum dubie, sed suo modo certo constet, eam esse correctam, vel sublatam. Imo etiam lex humana antecederet certo lata debet observari, quando ejus abrogatio est dubia: ergo id a fortiori est tenendum de Jure naturali.

Ant. quoad I. membrum constat *tum* ex confessione ipsorum Adversariorum: *tum* ex eo, quia tale augmentum, in quo factus est ditior, ei accrevit ex re aliena: ergo est quidam fructus rei alienæ: atqui secundum jus naturæ a bonæ fidei possessore debent una cum re aliena restitui fructus, & augmenta per se collecta ex re aliena: ergo. *tum* quia id indicat jus civile



le L. 14. ff. de conditione indebiti. ibi: *Hoc natura æquum est, neminem cum alterius detrimento fieri locupletiorum*: atqui sic bonæ fidei possessor fieret locupletior cum alterius detrimento, quod alter subire deberet, si non restitueretur emolumentum ex re sua natum. tum quia hic adest titulus restitutionis *ex re accepta*, vi cuius & ipsa res aliena, & augmenta ex re aliena capta reddi debent vero Domino.

Prob. etiam alterum membrum primi Anteced. Nam 1. nec ipsi AArii audent dicere, suam sententiam esse certam, sed ad summum eam defendunt ut probabiliorum. Imo nec ullam legem civilem possunt ostendere, quæ certo, & clare jus naturale revocaret: atqui jus naturale certo præexistens manet in continua sua possessione, donec iterum per certam legem humanam exturbetur e sua possessione. Plane probabilitas etiam major non prævalet certitudini, nec eam e possessione jam legitime præhabita deiecit. 2. Gravissimi Jurisconsulti, & plurimi Theologi, qui pro nostra sententia stant, pensatis etiam utriusque sententiæ fundamentis nostram sententiam judicant esse probabiliorum, atque in praxi tenendam: ergo contraria sententia non potest esse certa. 3. Teste, vel ipso Haunoldo, qui primus dicitur ex Theologis oppositam nobis sententiam tradidisse, jura circa hoc punctum sunt valde intricata, & non facile perceptibilia. Quomodo ergo ex tam obscuris & incertis textibus certam, vel etiam probabiliorum correctionem juris naturalis manifeste elicient Adversarii? 4. Leges, quas AArii adducunt, rationabilem patiuntur explicationem. Et si nos forte unam, vel alteram legem non adeo expedite resolvamus, habent & ipsi aliquas, in quibus enodandis ad explicationes non adeo faciles confugere debent, quas expositiones præcipue excogitant in favorem suæ sententiæ, ut eam possint defendere.

Ex quibus omnibus concludes, hæc jura humana, quibus ajunt corrigi jus naturale nobis favens, esse valde dubia: adeoque per ea jus, & obligationem naturalem certo præexistentem non elidi.

Prob. 2. Hæres ante aditam hæreditatem, & dum alius eam adhuc bona fide possidet, tantum habet jus ad rem, &



non in re, & tamen debent ei evicta hæreditate restitui fructus virtualiter exstantes, seu augmentum, secundum quod possessor prior ex fructibus consumptis illius hæreditatis factus est ditior, ut clarum & certum est apud omnes JCtos & Th. Th. & habetur ex L. *item veniunt.* 20. & L. *Sed etsi.* §. 5. ff. de *petitione hæreditatis.* ubi de bonæ fidei possessoribus dicitur, eos debere restituere, in quantum sunt facti locupletiores. Idem habetur L. 40. §. 1. ff. & L. 1. C. de *petitione hæreditatis.* ergo a fortiori debent ejusmodi fructus a bonæ fidei possessore etiam reddi in judicio particulari, quando non agitur de petitione hæreditatis, sed de re particulari, v. g. de fundo; nam in tali judicio particulari ille, cui hæc restitutio fieri debet, habet jus in re, & dominium fundi, ab alio bona fide possessi: atqui jus in re est fortius, quam tantum jus ad rem: ergo etiam fortius ligat.

Rdebis cum Haunoldo, & aliis, hanc obligationem restituendi fructus æquivalenter exstantes, seu in quantum possessor factus est ditior, esse specialiter statutam pro judicio universalis, seu pro petitione hæreditatis, non autem pro aliis judiciis particularibus. *Contra est:* ex una parte major ratio pugnat pro judiciis particularibus, quam universalibus: ex altera parte non potest ostendi, quod jura pro judiciis particularibus oppositum statuerint: ergo idem a fortiori dicendum est de judiciis particularibus.

Confirm. Jus civile quoad restitutionem fructuum non videtur facere discrimen inter judicia universalis, & particularia, ut colligitur ex §. *etsi in rem.* 2. Instit. de *Officio Judicis.* ibi: *Etsi hæreditas petita sit, eadem circa fructus interveniunt, quæ diximus intervenire de singularum (seu particularium) rerum petitione.*

Rdebis: Hunc textum solum intelligendum esse de fructibus formaliter, non vero de æquivalenter existentibus. *Contra est:* hæc responsio est prorsus arbitraria, ac gratis data: quinimo, si ea esset vera, tunc non eadem intervenirent quoad fructus in petitione hæreditatis, & rerum singularum. Et dato, quod inter petitionem hæreditatis, & petitionem aliarum rerum singularium sit aliquod discrimen, eoquod petitio hæreditatis sit alia actio, quam petitio rei particularis, in hoc tamen conveniunt,



niunt, quod in utroque hoc iudicio & actione æqualiter fructus sint a Iudice adjudicandi.

Objic. 1. Pichlerus contra nostram primam probationem: 471  
Non est certum, quod stantibus hisce legibus civilibus, quas adducunt Adversarii pro se, existat adhuc jus naturale, obligans bonæ fidei possessorem ad fructus virtualiter exstantes restituendos: ergo non videtur hæc obligatio juris naturalis amplius manere in certa possessione. R. ad hæc, & alia; quæ laudatus Author L. 3. Decret. T. 12. n. 15. fere ad finem adducit, Neg. ant. & nostrum argumentum iterato sic propono: Obligatio restituendi in nostro casu ex lege naturali fuit certa ante leges positivas: ergo etiam stantibus legibus civilibus, seu post has editas manet certa; quia obligatio certa antecedens est in possessione, nec tollitur, nisi per deobligationem certam: qualis tamen certitudo deobligationis non evincitur ex illis legibus civilibus, quas Adversarii pro se adducunt, prout fatetur ipse Pichler. Adde, quod & Clariss. hic Doctor in suo Candidato Jurisprudentiæ abbreviato L. 2. T. 14. n. 5. insinuet, non esse a jure naturali recedendum ob leges positivas & humanas, nisi in his legibus clare exprimatur talis recessus: ergo idem in proposito est dicendum. Denique ex communi apud omnes Theologos recepta doctrina liquidum est, legem prius certo latam semper manere in possessione, quamdiu tantum dubium est, an iterum sit sublata, vel in ea dispensatum sit. Videantur dicta in Tractatu de Actibus humanis, de conscientia dubia, & probabili.

Instat idem: Etsi lex confitendi peccata mortalia sit certa, tamen qui probabiliter iudicat, se aliquod peccatum grave esse confessum, non tenetur, illud amplius confiteri: ergo ab obligatione legis certæ potest se aliquis sæpe eximere ob rationem probabilem, quæ re ipsa est dubia: ergo idem in proposito est dicendum. R. 1. N. a. sic nude acceptum, & intellectum. Certe per dubiam solutionem, & satisfactionem obligationi certæ non satisfacit. Et hinc P. Holzman, licet sit noster adversarius, ait, P. Pichlerum sine fundamento hac in parte esse locutum, addens, communem esse Theologorum sententiam, paucissimis tantum exceptis, quod ille adhuc teneatur confite-



ri, qui certo scit, se peccasse mortaliter, & dubitat seu positive, seu negative, an peccatum suum grave certo commissum fuerit confessus. Aliud est, prout advertit Elbl de Sacramento Pœnitentiæ n. 192., quod ille, qui est timorata conscientia, ac conscientiam suam debite semper ante confessionem discutit, nec solet alias gravia peccata in confessione reticere, facile se possit resolvere in tali dubio, quod ejusmodi peccatum confessus fuerit, quia habet pro se certam præsumptionem, & non tantum dubiam, aut probabilem rationem. Hinc posset 2. distin. A. non tenetur confiteri, si ex aliis principiis possit se certo resolvere, quod tale peccatum confessus fuerit, vel quod saltem in his circumstantiis ob scrupulos, aut aliam similem rationem Deus ab ipso non exigat confessionem hujus peccati C. a. secus N. a.

472

Objic. 2. Plures sunt leges, quæ dicunt, bonæ fidei possessorem non teneri restituere fructus consumptos: atqui fructus, qui non formaliter existant, jam sunt consumpti: ergo bonæ fidei possessor non tenetur restituere fructus illos, qui non formaliter, sed tantum æquivalenter existant. R. D. M. fructus penitus consumptos c. M. non penitus consumptos n. M. Fructus illi, qui æquivalenter adhuc existant, non sunt penitus consumpti; etli enim in se formaliter non existant, existunt tamen in augmento, in quo possessor ratione talium fructuum est factus ditior. Porro secundum ipsas leges civiles non censetur esse absumptum illud, quod æquivalenter exstat, ut patet ex L. 72. ff. de Legatis, & fideicommissis. quæ sic habet: *Non enim absumitur, quod in corpore patrimonii retinetur.* Ubi sermo est de eo, qui aliena pecunia suos creditores solvit, & consequenter suis pecuniis pepercit, adeoque alienas in corpus sui patrimonii vertit, in quo virtualiter existant quoad augmentum, secundum quod est factus ditior. Idem colligitur ex aliis legibus: ut ex L. 25. §. 1. ff. de petitione hæreditatis. *Quemadmodum si consumpsisset, in totum locupletior factus non videbitur.* Et eadem lege §. 15. *Si is, qui hæres non erat, totum, quicquid apud se fuit, consumpsisset, sine dubio non tenetur, quasi locupletior non factus.* Ex quibus omnibus colligitur, quod secundum modum loquendi juris civilis illud non censetur esse absumptum, quod adhuc virtualiter exstat, & in quo aliquis est locupletior factus,



*§. III. Quid debeat restituere possessor bonæ fidei?* 671

Etus, etsi formaliter non amplius sit in rerum natura. Dum ergo jus agit de fructibus consumptis, non statim loquitur de fructibus tantum virtualiter exstantibus; fructus enim virtualiter exstantes juxta mox dicta non censentur esse absumpti.

Has responsiones etiam applica ad Jus Bavaricum, quod Tit. 9. Art. 10. sequentia habet: *Wird einer um Gut, das er mit guten Glauben besessen, angesprochen, ehe er Nuz und Gewehr ersehen, so ist er gleichwohl schuldig, demjenigen, welchem es von rechtswegen gebühret, das Gut wieder zuzustellen: doch die aufgehobene Nuzungen, sie seyen durch ihne erzigtet, oder selbst gewachsen, oder wie sie Nahmen haben mögen, ist er zu erstatten nicht schuldig, wann sie allbereits verzehret seyn.* Videtur enim hic articulus loqui de fructibus omnino consumptis, & ne quidem virtualiter exstantibus.

Objic. 3. §. 35. Inst. de rerum divisione. dicitur: *Naturali ratione placuit, fructus, quos percepit (possessor bonæ fidei) ejus esse pro cultura, & cura, & ideo, si postea Dominus supervenerit, & fundum vindicet, de fructibus ab eo (scilicet bonæ fidei possessore) consumptis agere non potest.* Sed si possessor talis ditior factus teneretur hos fructus in æquivalenti exstantes restituere, nihil haberet pro cultura & cura: ergo hos fructus non teneretur restituere. R. N. m. habet enim hoc bonæ fidei possessor pro cultura, quod nihil debeat restituere pro fructibus omnino consumptis, & neque virtualiter exstantibus.

Dices: Etiam bonæ fidei possessor, qui agrum omnino non coluit, hoc habet, quod non debeat restituere fructus penitus consumptos, & neque virtualiter exstantes: ergo talis bonæ fidei possessor, qui agrum coluit, pro cultura nihil speciale haberet, cum tamen jura velint, ipsum aliquid speciale habere. R. C. a. d. c. talis bonæ fidei possessor, qui agrum coluit, nihil speciale haberet: quo tamen non obstante illud, quod habet, ex speciali titulo haberet C. c. secus N. c. Talis enim primo hos fructus haberet, vel potius eos non teneretur restituere, quia eos consumpsit bona fide: & hæc bona fides est titulus primarius. 2. haberet etiam ex titulo culturæ. Prior titulus esset etiam communis alteri bonæ fidei possessori, qui non coluit agrum, non autem secundus. Adde, quod ille, qui coluit



luit agrum, etiam possit deducere expensas pro cultura, quod ille non potest facere, qui non coluit agrum. Quare posset etiam negari antecedens.

Objic. 4. L. 4. §. 2. ff. *Finium regundorum*. dicitur, quod eum, qui fructus bona fide percepit, *lucrari oporteat*, si eos consumpsit: ergo bonæ fidei possessor lucratur fructus consumptos. Atqui non potest quis lucrari fructus omnino consumptos; quomodo enim illud, de quo penitus nihil exstat, potest esse lucro? ergo debet lucrari fructus non omnino consumptos, seu virtualiter exstantes: consequenter eos facit suos, & non tenetur amplius restituere. R. N. m. subsumptam. Satis lucratur talis bonæ fidei possessor, quod pro fructibus omnino consumptis, & ne quidem virtualiter exstantibus non teneatur ex suis facere compensationem. Sic & secundum receptissimum modum loquendi lucrari causam dicitur ille, qui de damno dato accusatus, absolvitur ab omni onere restitutionis, aut refusionis, & tamen in hoc casu non fit locupletior.

Objic. 5. In sola possessione hæreditatis alienæ jura exprimunt obligationem restituendi fructus virtualiter exstantes, seu augmentum, in quo quis factus est ditior: ergo, cum jura hanc obligationem non exprimant in aliis casibus, censentur velle solum obligare ad hanc restitutionem in casu hæreditatis, non autem in aliis particularibus casibus. R. N. c. 1. enim eo ipso, quod Imperator non faciat mentionem de aliis casibus, vult in iis jus naturale in suo vigore relinquere. 2. Sæpe leges civiles insinuant obligationem juris naturalis in uno loco, quin eam inculcent in alio; quia jam per se est nota. 3. Non dicatur, quod per leges civiles specialis exceptio sit facta circa possessionem hæreditatis; nam contra est: non hic fit exceptio casus hæreditatis, sed potius est inclusio, ut ex probatione nostra constat. Item si casus hæreditatis hic exciperetur, tunc deberet dari regula universalis, vi cujus bonæ fidei possessores nullos fructus, saltem virtualiter exstantes, restituere tenerentur; ab hac enim regula universali excipi deberet casus specialis hæreditatis: atqui necdum probatum est, neque constat, quod existat talis regula universalis. 4. Ex jurbus civilibus, statutis circa posses-

fiq-



tionem hæreditatis, desumimus nos potius argumentum pro nobis, quam contra nos, ut patet ex probatione nostra secunda. Cui accedit, quod ratio legis, & constitutionis factæ circa possessionem hæreditatis etiam ad alios casus extendi possit; nam ratio illius legis est, quia fructus virtualiter exstantes, per quos aliquis fit ditior, sunt quasi *augmenta hæreditatis*, adeoque hæredi sunt restituendi: atqui in aliis casibus particularibus fructus æquivalenter exstantes ex re aliena, sunt quasi augmenta alterius substantiæ, utpote ex qua quasi nascuntur: ergo cum jura agnoscant obligationem restituendi hos fructus virtualiter exstantes in possessione hæreditatis alienæ, non est ratio excludendi hanc obligationem a possessione aliorum bonorum.

Objic. 6. Obligatio restituendi fructus virtualiter exstantes est valde gravis, ac obnoxia mille scrupulis, præcipue cum vix fieri possit, quantum quis ex fructibus his sit ditior factus: ergo. R. 1. Retorq. Argum. etiam debet possessor malæ fidei restituere fructus virtualiter exstantes, imo & damnum emergens ac lucrum cessans, etsi difficile sit æstimare, quousque se extendat quantitas talis damni &c. R. 2. Sicut in omnibus dubiis de quantitate restitutionis, sic etiam hic debet moralis diligentia adhiberi in æstimanda quantitate debiti, & illud, quod prudenter æstimatum est, restitui, donec certius quid innotescat: Quod non est quid nimis grave, aut impossibile.

Objic. 7. Sententia adversa in praxi observatur in tribunalibus: ergo ea est vera. R. d. a. observatur in praxi in specialibus locis, ubi forte habentur specialia jura Tr. a. observatur in praxi universaliter N. a. Quod aliqui judices contrariam nobis sententiam præstent, id potest evenire 1., quia eam probabiliorum judicant, vel quia, nescio quibus reflexionibus utuntur, de quibus ipsi viderint. 2. vel hoc fit, quia iudicibus non clare constat, an bonæ fidei possessor ex fructibus consumptis sit ditior factus. 3. Etsi pauci ex Theologis & Canonistis testentur, hanc praxin esse receptam, id ipsis non est credendum contra tot alios, qui volunt, nostram sententiam esse in praxi tenendam. Forte tales solum loquuntur de praxi locorum quorundam particularium. Verum a locis particularibus ad universum orbem Christianum non est facienda extensio.



Dixi in Assertionem: *ante præscriptionem legitime completam*; potest enim contingere, ut aliquis fructus legitime jam præscripserit, etsi res aliena fructifera necdum sit præscripta; eoquod ad fructus, tanquam res mobiles, cum titulo præscribendos minus tempus requiratur, quam ad præscriptionem rei fructiferæ immobilis: in quo eventu res fructifera aliena, non autem fructus ejus præscripti, etiam si essent formaliter exstantes, restitui deberent. Porro quod etiam fructus æquivalenter exstantes possint triennio usucapi, probabilius esse ostendit Sanchez in Decal. L. 2. c. 32. n. 92. ratio est; quia actio personalis, seu condictio succedit vindicationi: ergo sicut contra vindicationem fructuum triennio potest præscribi, ita & a fortiori contra actionem illam personalem, etsi alias actiones personales & condictiones tantum extinguantur 30. annis. Item possunt fructus citius accessorie præscribi L. *eor. 26. C. de Usuris*. Vide P. Anton. Mayr T. 8. n. 598. occasione hujus.

473 Quæres 1. An etiam fructus rei furtivæ possint triennio, vel tempore ordinario usucapi, vel an laborent etiam vitio furti, & consequenter non possint usucapi, sicut ipsæ res furtivæ? R. Probabilius tales fructus, ex re furtiva collecti non a fure, sed a bonæ fidei possessore, qui rem furtivam bona fide a fure accepit, possunt tempore ordinario præscribi, & non laborant vitio furti. Ita D. Arnoldus Rath cap. 4. de Præscript. Thesi 27. & Vitus Pichler de Præscript. n. 81. Favent L. *qui vas argenteum*. 48. §. 6. ff. *de furtis*. & L. *bonæ fidei emptor*. 48. §. 2. ff. *de acquirendo rerum dominio*. ubi videtur supponi, tales fructus non laborare vitio furti, etsi deinde tales fructus ex re fructifera jam pependerit tunc, dum res illa fuit furto subducta, solo quoad hoc ultimum punctum excepto partu, seu fœtu ancillæ. Neque obstant verba finalia §. quinti cit. legis *qui vas argenteum*; ea enim, ut notat Arnoldus Rath non sunt resolutiva, sed legi debent per modum interrogationis: resolutio autem dubii sequitur §. 6. sequenti.

Hoc etiam notes, quod ipsa possessio rei fructiferæ alienæ bona fide facta, sit loco tituli; possessio enim hæc est titulus acquirendi dominium, saltem revocabile, eoquod possessor



§. IV. Quid in gen. teneatur restituere possessor malæ fidei? 675

for bonæ fidei sit fere loco Domini, quantum attinet ad fructus: adeoque præter bonæ fidei possessionem non requiritur alius titulus ad usucapiendos triennio, seu tempore ordinario fructus.

Quæres 2. Quid censendum de fructibus civilibus? R. idem, 474  
quod de fructibus naturalibus, vel mixtis, saltem regulariter loquendo. Quare, qui rem alienam elocavit pro pretio, tenetur una cum re aliena etiam ejusmodi pretium restituere, deducta tamen æstimatione laboris & diligentiae, quam in elocanda tali re impendit. Layman, Sanchez, Lugo, & alii, qui saltem communiter pretia elocationis rerum volunt esse fructum suo modo naturalem, qui non provenit ratione industriæ, sed ratione ipsius rei elocatae. Ratio hujus est; quia teste Herincx d. 4. de Justitia q. 8. n. 161. fructus civiles vim fructuum obtinent, & ad fructus vel mixtos, vel naturales revocantur. Consentit lex 34. ff. de Usuris. sic habens: *Usuræ vicem fructuum habent, & merito non debent a fructibus separari.* & L. 36. eod. Tit. *Prædiorum urbanorum pensiones pro fructibus accipiuntur.* Si autem in aliquo casu secundum æstimationem moralem totus fructus civilis industriæ impensæ responderet, tunc non deberet restitui, sicut neque fructus alii mere industriales.

§. IV.

Quid in genere teneatur restituere malæ fidei possessor?

Hæc controversia equidem pertineret ad articulos sequentes, in quibus agetur de titulo injustæ acceptionis: quia tamen habet magnam connexionem cum immediate dictis, ideo generales regulæ, hanc materiam concernentes, in isto §vo ponentur, specialiores vero difficultates specialibus quoque articulis excutientur. H. N.

Affero I. Malæ fidei possessor debet restituere rem, & 475  
fructus ejus naturales & mixtos, tam pendentes, quam perceptos: etiam rem alienam consumptam, uti & fructus prædictos consumptos, quamvis inde non sit factus ditior. Communis TT. & JJ. Ratio est: quia malæ fidei possessor debet refarcire totum damnum, quod intulit Domino rei: sed non refarciret,

Q q q q 2

nisi



nisi prædicta omnia, quæ ad Dominum spectant, compensaret: ergo. m. est clara. majorem dicat lumen naturale. Idem clare habetur ex lege certum. 22. C. de rei vindicatione. Hæc Assertio tamen intelligenda est de fructibus, quos possessor tempore malæ fidei percepit; si enim is tempore aliquo in bona, & alio tempore in mala fide existisset tunc de fructibus tempore bonæ fidei perceptis, & consumptis idem dicendum foret, quod §vis præcedentibus diximus de bonæ fidei possessore.

476

Assero 2. Malæ fidei possessor tenetur etiam illos fructus restituere, quos ipse quidem percepit, aut omnino consumpsit, Dominus vero nunquam fuisset percepturus. Communis. Ratio est: quia fructus, quamprimum sunt nati ex re aliena, transierunt in dominium illius, ad quem talis res spectat; quia quælibet res Domino suo fructificat: ergo, dum alius mala fide hos fructus percepit, & consumpsit, injuste Dominum in re sua damnificavit, & consequenter tenetur ad reparationem hujus damni.

Casus est: Petrus agrum suum non coluisset, neque ex eo fructus collegisset: hunc autem inique & mala fide occupat, colit, & ex eo fructus colligit, ac absumit Joannes. Jam Joannes tanquam malæ fidei possessor tenetur ad restitutionem fructuum, quos ex alieno agro percepit, non obstante, quod Dominus ejus, scilicet Petrus, non coluisset eundem agrum, neque ex eo fructus percepisset.

Objic. 1. Si Joannes fructus penitus consumpsit, tunc ex nullo titulo tenetur ad restitutionem. non ex re accepta; quia nihil amplius restat de fructibus hisce, utpote omnino absumptis: non ex injusta acceptione; quia non intulit damnum Petro, eoquod Petrus eo tempore nullos fructus percepisset ex illo agro, quem omisit colere: ergo. R. N. a. tenetur enim ex injusta acceptione, & damnificatione; nam esto, quod Dominus ipse nullos fructus percepisset, ex supposito tamen, quod ager ipsius fructificaverit, eo ipso fructus ei proprii facti sunt. Proinde dum malæ fidei possessor fructus hos accipit, & absumit, damnum insert Domino agri, ad quod reparandum tenetur.

Objic.



§. IV. Quid in gen. teneatur restituere possessor malæ fidei 677

Objic. 2. Juxta communem sententiam non debent restitui ea, quæ pereunt apud furem, si similiter periissent apud Dominum, ut infra dicitur: ergo neque tenetur malæ fidei possessor restituere fructus a se absumptos, quos alias Dominus non percepisset. R. D. a. non debent restitui, si fur in æstimatione morali non fuit causa efficax damni C. a. secus N. a. In proposito malæ fidei possessor absumendo fructus est causa efficax damni, dum actu destruit fructus alienos.

Assero 3. Malæ fidei possessor tenetur etiam restituere illos fructus, quos ipse non percepit, percepisset tamen ipse Dominus. Communis. Ratio hujus est: quia malæ fidei possessor tenetur ad reparationem cujuscumque damni injuste illati per ablationem, detentionem, vel destructionem rei alienæ: atqui Dominus per ablationem, vel detentionem suæ rei patitur damnum in fructibus, quos ipse alias percepisset, si rem suam habuisset: ergo malæ fidei possessor tenetur ad reparationem hujus damni per restitutionem etiam illorum fructuum, quos Dominus percepisset, quamvis illos iniquus possessor quacumque ex causa non perceperit. Ex his tandem 477

Colliges 1. hanc regulam universalem: Mensura restitutionis faciendæ a malæ fidei possessore est *quantitas damni illati*, seu tantum debet restituere, in quantum damnificavit alterum. Ita recte P. Elbl de Restit. n. 67. Ratio est: Justitia commutativa obligat ad æqualitatem: atqui æqualitas non observaretur, nisi malæ fidei possessor tantum redderet, quantum alterum damnificavit. Debet ergo tantum restituere, quantum alias habuisset Dominus rei, nisi re sua fuisset privatus, vel nisi fuisset injuste damnificatus.

Colliges 2. Malæ fidei possessorem teneri etiam domino a se damnificato compensare omne damnum emergens, & lucrum cessans. Ratio est: quia, nisi hoc refarciretur, Dominus non reciperet tantum, quantum alias habuisset, nisi fuisset injuste damnificatus & læsus. *Lucrum autem cessans* est omnis utilitas, quæ alias ex re sua ad Dominum pervenisset, hic vero & nunc ad ipsum non pervenit ex eo, quia re sua caret, & uti non potest.



v. g. si artifice omne penitus instrumentum auferatur, oritur lucrum cessans; quia carens instrumento, nihil amplius per artem suam lucrari potest. Sic etiam, qui alteri aufert pecuniam, qua negotiatus fuisset, vel occupat ejus agrum, quem messuisset, est causa lucri cessantis. *Damnum emergens* est omne nocumentum, distinctum a lucro cessante, quod Dominus patitur ob carentiam rei suæ. Sic si ablato equo proprio debes pretio conducere alienum, tunc expensio pretii est *damnum emergens*.

478 Affero 4. Malæ fidei possessor non tenetur restituere fructus mere industriales, neque in foro interno debet reddere fructus, quos ipse non percepit, & de quibus constat, quod eos Dominus etiam non percepisset, quamvis ipse, vel Dominus eos potuisset percipere. Prima pars jam est probata superius n. 466. secundam tenet Elbl de Restit. n. 68. & Antonius Mayr n. 634. posterior plures alios pro se allegat. Ratio est: quia ex una parte res aliena non fructificat; adeoque neque ex suppositione, quod fundus v. g. fructificaverit, ejusmodi fructus Domino deberent reddi, prout dictum est n. 476. ex altera parte Dominus nullum damnum, aut lucrum cessans patitur, eoquod ratione talium fructuum nec minus, nec plus habuisset, etsi injusta damnificatio non fuisset facta, ut consideranti liquet; nam ipse Dominus hos fructus, quamvis habuisset fundum in usu, & possessione sua, supponitur certo non fuisse collecturus.

Dixi: *in foro interno*; in externo enim malæ fidei possessor condemnatur ad restituendos fructus non tantum perceptos, sed etiam illos, quos honeste percipere potuisset, ut apud Mayr cit. tradunt Gletle, & alii ex L. 33. & 62. ff. *de rei vindicatione*. Verum hæ leges non obligant ante sententiam judicis; quia sunt pœnales, factæ in odium malæ fidei, ut advertit Gletle.

479 Quæres; An bonæ & malæ fidei possessor in restitutione facienda possit deducere expensas, & melioramenta, quæ ipse possessor talis primum addidit rei alienæ: de his enim solum potest esse quæstio? Ante responsum

Nota 1. Melioramenta alia esse *intrinseca*, quæ quasi transeunt



seunt in ipsam substantiam rei, quam meliorem reddunt, ut ster-  
coratio agri, implantatio arborum, si radices egerint: alia esse  
*extrinseca*, quæ rei tantum extrinsece adhærent, & salva ejus  
substantia separari possunt: cujusmodi sunt picturæ, fenestræ, ja-  
nuæ &c.

Nota 2. Aliquas expensas, & melioramenta esse necessa-  
ria, alia esse utilia, nonnulla esse voluntaria. Expensæ *necessa-  
riæ* sunt (idem est de melioramentis) quæ si non fuissent fa-  
ctæ, res omnino periisset, vel fuisset facta deterior. Tales sunt,  
quæ in reficienda domo v. g. tunc fiunt, quando hæc refectio  
judicatur necessaria ad præservandam domum a ruina, *Utiles*  
sunt, sine quibus res illa tam uberes fructus non protulisset.  
Tales sunt, quæ fiunt in plantandis arboribus, in agris extra-  
ordinarie meliorandis. *Voluntariæ*, vel *voluptuariæ* sunt, quæ non  
serviunt ad majorem utilitatem, sed tantum ad ornatum, osten-  
tationem &c. ut arbores non fructiferæ, fontanæ &c. H. N.

R. 1. Possessor seu bonæ, seu malæ fidei non tenetur una  
cum re aliena restituere melioramenta extrinseca, quæ ipse ad-  
jecit tali rei. Ratio est: quia talia melioramenta extrinseca ma-  
nent sub dominio possessoris, adeoque hic non tenetur ad ea-  
dem reddenda Domino.

Objic. Si possessor malæ fidei potest auferre, & sibi reti-  
nere melioramenta extrinseca, tunc poterit etiam diruere ædifi-  
cium, vel tollere materiam ædificii diruti, quod ante in solo alie-  
no posuit; atqui sequela videtur esse contra leges §. 30. Inst.  
*de rerum divisione*. & L. 7. §. 12. ff. *de acquirendo rerum dominio*.  
ergo. R. Quamvis non liceat tollere ædificium in alieno solo ædi-  
ficatum, quia illud ad Dominum talis soli pertinet: videtur ta-  
men licere, repetere materialia, postquam tale ædificium est di-  
rutum, ut colligitur ex L. 2. C. *de rei vindicatione*. ibi: *Si ve-  
ro ædificium fuerit dissolutum, ejus materia ad pristinum Dominum  
redit, sive bona, sive mala fide exstructum sit, si non donandi ani-  
mo ædificia alieno solo imposita sint.* Imo L. *Julianus*. 37. ff. *de  
rei vindicatione* dicitur de eo, qui ab initio bonam fidem ha-  
buit, & primum postea quam rescivit, solum esse alienum, ædi-  
ficavit, de tali inquam, dicitur: *Sed hoc ei concedendum est, ut si*  
ne



*ne dispendio Domini arce tollat ædificium, quod posuit.* Cæterum de casu hoc ædificationis leges sunt multum difficiles, nec facile concordari possunt inter se. Quare responderi potest 2. si leges nobis sint oppositæ, tunc hunc casum esse specialem, qui non debet generaliter extendi ad alios casus. Quare in aliis casibus hæc prima, & subsequentes resolutiones locum habent.

R. 2. Ex opposito melioramenta intrinseca, quæ talis possessor adiecit, una cum re aliena debent Domino a quovis possessore restitui. Ratio hujus est: quia melioramenta intrinseca (non autem extrinseca) ratione ædificationis, aut plantationis cedunt solo, & spectant ad Dominum talis soli vel fundi, cui adjiciuntur: ergo etiam Domino talis fundi reddi debent, ut colligitur ex dictis n. 319.

Circa fructus, qui ex melioramentis intrinsecis sunt nati, idem servandum est, quod circa fructus ipsius rei alienæ tam a bonæ, quam malæ fidei possessore observari debet; nam & ejusmodi melioramenta intrinseca fructificant Domino, sicut res ipsa aliena. Ex hoc tamen dubitabis, an non saltem pro melioramentis talibus intrinsecis, & pro expensis factis bonæ, & malæ fidei possessor possit aliquid deducere, vel exigere a Domino? Pro quo dubio enotando sint sequentes resolutiones. Unde

R. 3. Possessor malæ fidei ratione melioramentorum intrinsecorum mere voluntariorum, uti & ratione expensarum voluptuariarum a se in rem alienam factarum, nihil potest detrahere, sed debet sibi imputare, quod cogatur amittere eas expensas, quas circa rem alienam scienter, & quidem citra consensum vel utilitatem legitimi Domini fecit. Elbl, Holzman, & plures alii. Ratio est; quia per has expensas & melioramenta ejusmodi iniquus possessor negotium Domini non gessit utiliter: ergo nihil ab eo potest exigere.

Neque possessor bonæ fidei in foro interno potest aliquid prætere pro melioramentis, & expensis mere voluptuariis, vel voluntariis. Holzman T. 2. de Restitut. n. 372. Ratio est eadem, quæ prius fuit data. Et certe iniquum videtur, Dominum obligari ad eas expensas compensandas, quæ nullo modo in ipsius utilitatem, sed in meram voluptatem alterius, scilicet possessoris, sunt applicatæ.

Dixi



§. IV. Quid in gen. teneatur restituere possessor malæ fidei? 681

Dixi: in foro interno; nam in foro externo bonæ fidei possessori conceditur facultas, cogendi Dominum ad refundendas ejusmodi expensas: aut, si nolit eas refundere, ad totam rem sibi justo pretio vendendam. Ita Holzman L. cit. Elbl de Restitut. n. 70. ac Tamburinus, & Sporer a P. Elbl citati.

R. 4. In foro conscientiæ non solum bonæ, sed & malæ fidei possessor potest detrahere expensas necessarias, & Domino utiles. Idem est de melioramentis intrinsicis necessariis, ac Domino utilibus. Elbl, Holzman, Antonius Mayr, ac alii. Ratio est 1. quia si has expensas possessor non deduceret, Dominus plus acciperet, quam ipsi deberetur. 2. Quia uterque hic possessor negotium Domini utiliter gessit faciendo istas expensas, & melioramenta: ergo ex æquitate naturali pro his ei est debita congrua compensatio. Ex his Lugo, & alii apud Elbl n. 69. inferunt, si res aliena cum melioramentis necdum detractis, aut compensatis pervenit ad Dominum suum, hunc in conscientia obligari pro iis satisfacere etiam possessori malæ fidei.

Nec obstat, quod L. 7. §. ex diverso, ff. de acquirendo rerum dominio. possessori malæ fidei negetur actio ad repetendas expensas; nam lex illa est pœnalis; pœna autem juxta communissimam DD. non obligat ante sententiam judicis. Unde ante sententiam judicis Dominus naturali obligatione adstringitur ad refundendas ejusmodi expensas & melioramenta; quamvis hoc ipsum alii multi apud Elbl citatum non improbabiler negent. Videatur Antonius Mayr n. 682. præsertim circa finem ejusdem numeri, ubi ex Voglero addit, non posse in hoc casu malæ fidei possessorem auferre expensas, vel uti occulta compensatione; quia ejus jus non est certum, cum ei obstet jus probabile Domini.

R. 5. In deductione, & computatione expensarum a bonæ, vel malæ fidei possessore esse plures circumstantias bene ponderandas: 1. enim possessor rei alienæ nihil potest deducere præcise ex eo, quia res apud se est pretiosior, vel melior facta, quam fuisset facta apud ipsum Dominum. Ratio est: hoc incrementum est intrinsicum rei, & per se spectat ad ipsum Dominum rei. 2. Nihil potest deducere bonæ fidei possessor pro



expensis, quas impendit in fructus jam penitus consumptos, & nec virtualiter, nec formaliter exstantes. Ratio est: quia hæ expensæ non sunt utiles Domino, eoquod nihil de his fructibus ad Dominum redeat. Hinc in responsione 4. dixi, expensas utiles Domino. 3. Neque deduci possunt expensæ extraordinariæ, & per accidens, ac fortuito causatæ. Sic si possessori in cultura agri pereat equus, non potest expensas, quas pro alio equo emendo fecit, computare; tales enim expensæ sunt extraordinariæ, & casu fortuito causatæ. 4. Sic neque subtrahi possunt expensæ plures factæ, quam fecisset ipse Dominus, si æquali modo agrum e. g. coluisset. Dominus v. g. pro cultura tantum unum aureum solvisset, possessor vero ejus debuit quatuor solvere: in hoc casu tantum unus, non autem quatuor aurei deduci possunt a possessore. 5. Pro melioramentis intrinsecis non potest plus deduci, quam ea valent, dum res ad Dominum redit. Ratio est tum ex L. in fundo. C. de rei vindicatione. tum ex eo, quia solum eatenus cedunt in utilitatem Domini. Idem dicendum de expensis aliis. 6. Melioramenta, & expensæ debent compensari etiam ex fructibus omnino consumptis, etsi ex his possessor bonæ vel malæ fidei ditior non sit factus. Ratio est: quia quo plures fructus ex re aliena percepit, eo minus censetur de suis in meliorationem rei alienæ expendisse. Quod autem fructus ejusmodi omnino consumpserit, & inde non sit factus locupletior, sibi imputet; reipsa enim fructus percepit, quibus, si voluisset, expensas sibi compensare potuisset. Holzman, & alii passim. 7. Inter expensas deducendas etiam venit ipsa industria possessoris, si quam impendit; siquidem & hæc est pretio æstimabilis, & supponitur talis possessor non voluisse laborare gratis, sed pro lucro. Lugo, Holzman, & alii.


Objic. 1. Possessor malæ fidei colens rem alienam, videtur gratis laborare, & donare suam operam eo ipso, quod sciat, rem, in qua laborat, esse alienam, & Domino, non sibi fructificare: ergo. R. N. a. Certe talis possessor vult ipsam rem, & fructus ejus inique retinere: vel si hos non possit habere, saltem vult pretium sui laboris.

Objic. 2. Talis malæ fidei possessor injuste, & invito Do-  
mi-



Do-  
mi-

Objic. 3. Dominus non tenetur solvere operarium, qui invito ipso ingreditur vineam ejus, & in illa laborat: ergo etiam non tenetur solvere expensas malæ fidei possessori, qui invito ipso excoluit rem suam. R. N. c. & parit. Hujusmodi operarius nec implicate laborat ex voluntate Domini, qui alios operarios jam constituit, aut certe constituet, vel saltem constitueret: ast possessor malæ fidei saltem ex implicita voluntate Domini laborat; quia cum Dominus non possit in talibus circumstantiis, in quibus sua res ab alio inique detinetur, constituere operarios & cultores suæ vineæ, vult implicate & tacite eam a quocumque utiliter coli.



Do-  
mi-

Do-  
mi-

**I**njusta acceptio hoc loco significat opus externum, quo proximo damnum culpabiliter infertur: vel injusta acceptio est actio externa, proximo damnosa, quæ conjuncta est cum peccato, vel culpa contra justitiam. Ex quo sequentes controversiæ nascuntur: 1. est quæ, 2. qualis, 3. quanta debeat esse culpa damnum inferentis, ut exinde in foro conscientiæ nascatur obligatio restituendi. Seu quæritur 1., an solum ex culpa theologica, vel etiam juridica hæc obligatio oriatur: 2. an sufficiat solum peccatum internum contra justitiam: 3. an per culpam quoque theologice venialem aliquis onus restitutionis incurrat? Hæc dubia per sequentes §§vovs resolventur.



## §. I.

*An ex sola culpa theologica nascatur obligatio restituendi?*

480

NOTA 1. Aliam culpam esse theologicam, aliam juridicam. Culpa *theologica* est quodlibet peccatum in foro conscientiae & coram Deo, vel est offensa, & quidem formalis Dei. Dicitur culpa theologica, quia peccatum Theologi praecipue considerant. Culpa *juridica*, *civilis*, & *politica* est omissio alicujus diligentiae, qua damnum proximi impediri potuisset, sive deinde talis omissio in foro conscientiae, & coram Deo sit peccatum, sive non. Hanc culpam Juristae, & Judices considerant, ac juxta hanc ferunt sententiam in foro externo, in quo interna non patent.

Nota 2. Culpam juridicam dividi in quinque classes, nimirum in *latissimam*, *latiorem*, *latam*, *levem*, & *levissimam*. Culpa *latissima* est dolus apertus, cum quis aliquid agit, vel omittit, intendens positive proximi damnum, quod ex tali actione, vel omissione secuturum praevidet. *Latior* est, cum quis quidem non intendit positive, praevidet tamen damnum proximi ex sua actione vel omissione secuturum, & vocatur *dolus praesumptus*: cui annumeratur ignorantia juris communis, saltem in illis Personis, in quibus ignorantia haec non toleratur. *Lata* est omissio diligentiae, quam homines ejusmodi conditionis solent communiter & ordinarie adhibere. *Levis* est omissio diligentiae, quam diligentiores, & providentiores adhibent. *Levissima* denique est omissio diligentiae, quam adhibent diligentissimi, & providentissimi.

Declaratur exemplo: Si librum, quem commodato habuisti, das furi, intendens positive, ut illum auferat, in hoc casu committis dolum apertum, & culpam latissimam. Si eundem librum relinquis in domo furis, praevidens illum a fure furripendum, committis culpam latiore, & dolum praesumptum. Si domo egressus ostium apertum reliquisti, unde fures ingressi rem alienam, v. g. librum illum tibi commodatum, abstulerunt, commististi culpam latam; nam ostium solent claudere homines, etiam tantum mediocriter diligentes. Culpam autem levem contrahes, si clausisti quidem, sed ita, ut facili negotio aperiri pos-



*§. I. De Restitutione ex titulo injustæ acceptionis.* 685

posset. Culpa autem levissima erit, si quidem bene claufisti, sed non etiam manu tentasti, an pessulus sit probe obductus.

Nota 3. Culpam juridicam, vel etiam theologicam, quæ in una materia est levis, posse in altera esse gravem; major si quidem requiritur diligentia, si agitur de bono publico, quam si de privato: major in curando morbo valde periculoso, quam illo, qui est minus periculosus &c.

Nota 4. Injuriam a Jctis dici illud, quod non jure, vel contra jus alterius factum est per culpam juridicam, etiam levem, & levissimam. Et in hoc sensu injuriam etiam accipiunt leges civiles, de quibus statim dicetur. Quare

Nota 5. Hic sciri debere, quid sint, & quid statuunt leges noxales, & Aquilia. Lex igitur *Aquilia*, seu potius *Plebis scitum Aquilium*, sic dicta est ab Aquilio Tribuno plebis, quo rogante populus eam legem tulit. Habuit hæc lex olim tria capita: sed secundum hodie nec exstat, nec est in usu. In primo capite agitur de eo, qui mancipium alienum, aut pecudem alterius gregatim pasci solitam occidit *per injuriam*, scilicet juridice intellectam. Hic proinde ibi obligatur ad refarciendum damnum, & in tantum condemnatur, quanti plurimi ea res illo anno valuerit: seu debet solvere pecudem illam occisam tanto pretio, quanto per illum annum valuit eo tempore, quo fuit in valore maximo. Capite autem tertio præcipitur compensatio cujusvis damni per injuriam proximo illati. Intelligitur autem hic iterum injuria juridice accepta, & Notando 4. explicata.

Leges noxales sunt, quæ jubent reparari damnum omne alteri illatum, etsi inferendo nulla culpa proprie dicta, nequidem juridica, sit commissa. Sic 1. si animal natura sua mansuetum, præter consuetudinem ex pavore vel lascivia, aut quacumque causa vulneret, aut occidat alterius animal, Dominus animalis, quamquam nullam commiserit culpam, debet refarcire damnum, vel animal suum noxæ dare, seu reddere pro damno illato. Ita integro titulo statutum est Instit. & ff. *Si quadrupes pauperiem fecisse dicatur.* 2. Si mancipium tuum ex sua,



absque tua tamen culpa, alteri nocuerit, teneris tradere mancipium alteri, qui ab eo est læsus, vel refarcire damnum. Instit. ff. & C. de noxalibus actionibus. 3. Si ex domo, vel navi tua per inquilinos, aut famulos tuos aliquid etiam absque tua culpa effusum, vel projectum sit, quod transeunti, vel adstanti nocuit, obstringeris ad damnum compensandum in duplo, quando clamatum non fuit, ut transiens; vel adstans sibi caveat. Idem est, si aliquid e domo tua suspensum fuerit supra viam, quod alteri nocumentum attulit. L. 1. 5. & penult. de his, qui effuderint. 4. Similes quoque leges sunt illæ, quibus præcipitur, ut exercitor navis, stabuli, vel cauponæ conveniatur de dolo, vel furto, quod ab ejus ministris in navi, stabulo, vel caupona fuit commissum. Huc etiam reducitur casus, quando per culpam coqui in culina, stabularii in stabulo, lotricum in lavatrina excitatum incendium corripuit vicinas ædes, ubi Dominus convenitur de tali damno per suos famulos illato, et si ipse sit sine omni culpa.

Quæstio igitur remanet, an istæ leges obligent ante, vel post sententiam judicis, si damnum fuit datum absque culpa theologica? H. N.

481

Affero I. Ad pariendam obligationem restitutionis ex delicto in foro conscientiae ante judicis sententiam extra contractum, & quasi contractum requiritur culpa theologica, nec sufficit mere juridica, habens conjunctam inadvertentiam theologice inculpabilem. Herincx, Reiffenstuel, Holzman, ac Communis Th. Th. contra plures J. J.

P. In foro conscientiae non est statuenda obligatio ex delicto, & injusta acceptione, nisi in eodem foro sit commissa formalis injustitia; atqui, nisi committatur culpa theologica, in foro conscientiae non committitur injustitia, saltem formaliter talis, & quæ coram Deo peccatum esset: ergo.

Confirm. Talis, qui meram habet culpam juridicam; non autem theologicam, non tenetur restituere ex titulo rei acceptæ; per se enim supponitur, quod nihil amplius possideat de re aliena, nec ex ea sit factus ditior: neque obligatur ex titulo



lo injustæ acceptionis ; cum in foro theologico formalem injustitiam non commiserit.

Affero 2. Nec lex Aquilia, neque leges noxales obligant in conscientia ante sententiam judicis, si nulla præcessit culpa theologica. Communis Th. Th. 482

Prob. 1. eodem modo sicut præcedens conclusio. 2. Allegatæ leges nullibi clare exprimunt obligationem in conscientia ante sententiam judicis : imo contrarium patet ex L. 2. C. de lege Aquilia, quæ ita dicit : *Competentis judicis autoritate consequeris. Judicis cura impetrabis.* ergo ipsa lex vult tantum obligare, si prius instituatur actio legis Aquiliæ, & judicis sententia fuerit secuta, 3. Neque istæ leges videntur esse in tanto rigore acceptatæ, ut etiam obligent in foro conscientiæ ante sententiam judicis ; ita enim testantur fere omnes Th. Th., quibus, si agitur de obligatione conscientiæ, plus credendum, quam JCtis. 4. Istæ leges, si obligarent ante omnem sententiam, forent nimis arduæ, & humanæ conditioni non attemperatæ ; imponent enim onus gravissimum, seipsum spoliandi rebus suis ob aliquod damnum, nulla sua voluntate datum, & tale, quod magis casui videtur adscribendum, quam culpæ, saltem theologicæ ; atqui leges nimium rigidæ & difficiles, ac humanæ conditioni non attemperatæ non obligant, nec habent aliquam vim, ut constat ex Tractatu de Legibus. 5. Leges noxales sunt quasi pœnales, non fundatæ in contractu, aut delicto proprio, adeoque adinstar aliarum legum pœnalarum proprie talium non obligant in conscientia ante sententiam judicis, ut advertit Engl L. 5. Juris Canonici T. 36. n. 45. Sic etiam lex Aquilia, in quantum ultra modum & æstimationem damni debet restitui, legibus pœnalibus æquiparatur, nec proinde obligat ante judicis sententiam, ut tenet clariss. Cletle. 6. Vi legis naturalis seclusa culpa theologica præfata leges non obligant in conscientia ante sententiam judicis : jura autem civilia sunt saltem dubia, an velint, vel omnino ita possint obligare. Insuper probabilius videtur, quod ipsa consuetudo, & praxis neget talem obligationem : ergo dicendum est, quod talis obligatio non existat, & jus naturale deobligans a tanto onere sit in possessione sua certa.

Affero



483

Affero 3. Post sententiam judicis legitime latam præstari debet etiam in foro conscientie culpa juridica, quamvis nulla intercesserit culpa theologica. Ita communiter Th. Th.

Prob. 1. Sententia justa judicis etiam in foro conscientie obligat: atqui ista sententia foret justa, utpote secundum leges lata: ergo. M. constat; quia subditus judici aliquid juste præcipienti etiam in foro conscientie obtemperare debet. m. supponitur. Prob. 2. Lex Aquilia est justa, uti omnes supponunt: ergo affert aliquam obligationem in conscientia, saltem post sententiam. P. 3. Finis harum legum, quæ imperant refarctionem damni etiam ex culpa juridica, non obtineretur, si homines non tenerentur parere judici, talem compensationem secundum præfatas leges imponenti; atqui finis harum legum debet obtineri; non enim sunt frustra latæ: ergo. Hanc tamen Assertionem intellige de illis tribunalibus, ubi istæ leges adhuc sunt in suo rigore receptæ: ideo etiam dixi: *post sententiam judicis legitime latam*; sententia enim debet esse legitima, id est, debet esse conformis legibus adhuc vigentibus, & in usu existentibus; alias ea foret injusta, & non pareret obligationem.

Obji. 1. Saltem jura, & DD. antiquiores communiter tradunt, obligationem restituendi etiam in foro conscientie oriri ex culpa lata juridica: ergo. R. 1. opponendo fere tot alios, vel omnino plures DD., qui stant a nostra sententia. R. 2. d. a. tradunt hoc de culpa juridica lata, in se præcise spectata N. a. de ea ut conjuncta cum culpa theologica C. a. ordinarie cum culpa lata solet conjungi peccatum mortale, & ideo taliter loquuntur illi Doctores.

Obji. 2. Potius favendum est illi, qui damnum nulla sua culpa patitur, quam ei, qui saltem culpam juridicam committit: ergo committens culpam tantum juridicam debet alteri, quem læsit, facere restitutionem. R. D. a. Si ille, qui culpam juridicam committit, simul sit culpabilis coram Deo, & in conscientia C. a, si non sit culpabilis coram Deo, subd.: tunc ei &c. favendum est potius media actione, & sententia judicis C. a. secus N. a. Favetur potius damnum passo, quam inferenti, quia



quia damnificatus habet actionem rei suæ, in qua damnum tulit, persecutoriam, & quia per judicis sententiam potest obtinere compensationem. 2. Videtur etiam durum, & contra equitatem naturalem, quod quis sua sponte, nulla sententia judicis interveniente, statim seipsum debeat privare propriis bonis ad reparandum damnum non sua voluntate, sed ex inadvertentia, & quasi fortuito datum. Imo hoc videtur durius, quam ut aliter patiatnr tale damnum, inadvertenter & coram Deo inculpabiliter causatum.

Objic. 3. Lex justa pro foro externo est etiam justa pro foro interno: sed prædictæ leges sunt justæ pro foro externo: ergo etiam pro foro interno: ergo etiam obligant pro foro interno. R. D. ult. conf. ergo etiam obligant pro foro interno post sententiam C. c. ante sententiam subd. obligant judicem ad imponendam damnificatori restitutionem C. c. obligant ipsum damnificatorem ad faciendam restitutionem, antequam hæc sit per judicem imperata N. c.

Objic. 4. Leges noxales sunt conformes legi Mosaicæ, & S. Scripturæ Exod. 21. & approbantur a jure Canonico c. finali de Injuriis, ubi Gregorius IX. ita habet: *Quod si animalia tua nocuisse proponas, nihilominus ad satisfactionem teneris, nisi ea dando passis damnum velis liberare te ipsum.* ergo. R. Legem Mosaicam quoad judicialia esse abrogatam, nec amplius vigere in Lege Evangelica, ut videre est apud Reiffenstuel. Deinde summus Pontifex loquitur de foro externo, non de interno. Idem dic ad illa verba, quibus laudatus Pontifex eodem cap. approbat legem Aquiliam, dicens: *Si culpa tua datum est damnum, jure super his satisfacere te oportet. Nec ignorantia te excusat, si scire debuisti, ex facto tuo injuriam verosimiliter posse contingere, vel jacturam.* Ratio hujus responsionis est, quia ibi Pontifex se reflectit ad jus civile, & proinde loquitur de compensatione, quam vi ejusdem juris civilis facere oportet, nimirum in foro externo, & post sententiam judicis: vel certe loquitur de ignorantia vincibili, adeoque theologicæ culpabili.



## §. II.

*An, & qualis obligatio restituendi nascatur ex culpa theologica solum veniali?*

484

NOTA 1. In damnificatione, vel ablatione rei alienæ varie posse committi culpam venialem. *Primo* quidem potest talis ablatio, vel damnificatio esse venialis ob parvitatem materiæ, ut si tantum paucos obolos alicui diviti auferas. Quo casu certum est, quod tantum sit obligatio levis reparandi ejusmodi damnum. 2. Potest aliquis venialiter solum peccare ob indeliberationem, & inadvertentiam, non autem ob parvitatem materiæ, utpote quæ de se est satis gravis, & notabilis: ut si quis ex motu iræ secundo primo alterius gemmam, 100 vel adhuc pluribus florenis constantem, projiciat in flumen. Ubi peccatum solum est veniale ob defectum plenæ advertentiæ, & tamen materia damni illati est gravis. 3. Potest aliquis solum venialiter delinquere per omissionem diligentiae leviter tantum culpabilem in avertendo damno alterius: ut si ex venialiter tantum culpabili negligentia domus aliena conflagret. 4. Potest fieri, ut quis sciat, & plene advertat gravitatem materialem damni, non autem formalem: ut si quis ex plena deliberatione sit furatus Principi tres aureos, pretium monetæ ablatae probe sciens, bona tamen fide existimans, hanc quantitatem, Principi tam diviti subductam, non sufficere ad peccatum mortale. Idem est, si aliquis Summam vere gravem successive solum per furta minuta sæpius repetita auferat, ita quidem, ut sciens, & volens omnia ista furta faciat, & sic omnes partes hujus Summæ, proinde & totam Summam advertenter auferat, cum ignorantia tamen invincibili gravis peccati, quia scilicet nunquam, nequidem in ultimo furto apprehendit se graviter peccare.

Nota 2. Hic solum esse quæstionem de restitutione facienda mere ex titulo injustæ acceptionis, non autem ex titulo rei acceptæ. Proinde supponitur, quod ille, qui damnum cum peccato veniali intulit, nihil amplius habeat de re aliena, neque inde sit factus ditior; alias enim jam teneretur ex titulo rei acceptæ. H. N.

Asse-



Affero 1. Ex culpa veniali non plene deliberata, seu tali, quæ oritur ex defectu sufficientis deliberationis, & advertentiæ, non oritur obligatio gravis compensandi totum damnum, vel partem notabilem damni. Lugo, Lessius, Vogler, Mezger, Mastrius, Herincx, Poncius, Sannig, Holzman, Sporer, Reifensstuel cum plurimis aliis. 485

Prob. 1. Ejusmodi læsio, quæ non est plene libera & voluntaria, in humanis censetur quasi esse casus fortuitus: atqui ex casu fortuito non oritur obligatio gravis restituendi, ut suo loco dicitur: ergo.

Prob. 2. Ex una parte obligatio restituendi, & resarciendi damnum notabile, est valde gravis, ac difficilis: ex altera parte culpa venialis semideliberata facillime committitur etiam a diligentissimis, & accuratissimis, ac maxime timoratis: esset ergo omnino durum, aliquem ob hujusmodi culpam subreptitiam obligare, ut se spoliet quantitate notabili suorum bonorum, iisdem faciendo compensationem damni alteri illati: ergo hæc obligatio non est conveniens, neque optabilis generi humano.

Confirm. Eo ipso, quia talis culpa subreptitia facillime committi potest in custodia, aut administratione &c. rei alienæ, plurimi, imo vero omnes homines conscientiosi absterrentur a cura suscipienda rerum alienarum, ne committentes talem culpam, quæ vix evitari potest, ad gravem Summam alteri restituendam in conscientia obligentur: atqui tali modo magnum præjudicium pateretur societas humana, cum nullus alterum in curandis, custodiendis &c. ejus rebus adjuvaret: ergo iterum talis obligatio restituendi ex culpa semideliberata non expedit generi, & societati humanæ. Ex his

Colliges, neque Oeconomum, Procuratorem, aut alium Officalem &c., qui ex negligentia tantum venialiter culpabili fuit causa gravis damni, teneri sub mortali ad reparandum totum illud damnum, vel partem ejus notabilem. Lugo, Vogler, Antonius Mayr. Ratio est: quia & talis culpa est levis, ac vix evitabilis etiam apud Officiales timoratos: consequenter & du-



rissimum foret, tales statim obligare sub gravi ad restitutionem quantitatis notabilis ex propriis bonis faciendam.

486

Objic. 1. Cap. *Si culpa tua. finali de Injuriis.* superius n. 483. citato dicitur, eum tantum excusari a restitutione, vel compensatione damni, *qui de contingentibus nihil omisit*: atqui peccans venialiter, aliquid de contingentibus omittit: ergo. R. Pontificem ibi loqui de culpa lata, quæ est conjuncta cum peccato gravi: non autem est intelligendus de negligentia solum venialiter mala, & tali, quæ moraliter loquendo ab hominibus vitari nequit.

Objic. 2. Etiam sic venialiter peccans lædit alterum injuste: ergo ex titulo injustæ acceptionis tenetur restituere. R. D. a. lædit injuste voluntate, & scientia plena, ac perfecta N. a. non plena, & imperfecta, quæ non est sufficiens ad obligationem gravem restitutionis C. a.

Objic. 3. Qui per errorem venialem alteri graviter detrahit, tenetur restituere famam ablatam: ergo etiam ille, qui alterum per peccatum veniale damnificavit in bonis fortunæ, tenetur refarcire damnum, in istis illatum. R. 1. Retorq. argum. etiam ille tenetur adhuc restituere famam, qui illam quoque per errorem omnino inculpabilem abstulit: ergo etiam ille tenetur facere restitutionem in bonis fortunæ, qui in his omnino inculpabiliter, etiam sine peccato veniali alterum damnificavit. Consequentiam negabunt Adversarii: adeoque non est paritas inter restitutionem circa bona famæ, & fortunæ. Hinc R. 2. omisso Ant. N. c. Ratio hujus uberior dabitur, dum tractabitur de restitutione famæ.

Objic. 4. Æquius videtur, ut nocens damnum ferat, quam innocens: sed qui venialem culpam commisit, est saltem aliquantulum nocens, & alter est omnino innocens: ergo R. 1. Retorq. Argum. Etiam videtur æquius, ut subeat damnum ille, qui est causa damni, & non alius, qui illud passus est: atqui qui lædit per casum mere fortuitum sine omni culpa theologica & juridica, est causa damni, qui autem sic læditur, non est causa dam-



damni : ergo æquius est, ut subeat, & compenset damnum etiam ille, qui alterum læsit per merum casum fortuitum : quod tamen est contra omnes, etiam Adversarios. R. 2. D. M. videtur æquius in uno, vel altero casu particulari tr. M. attentis omnibus casibus possibilibus simul sumptis n. M. Non est considerandum, quid in casu particulari, sed quid universim magis expediat, & optabile sit societati, & generi humano. Ast vero non expedit generi humano, ob culpas semideliberatas, moraliter inevitabiles, tantum onus restitutionis imponere, facilis usque est, pati damnum quasi fortuitum, quam ita datum debere sub gravi compensare. Neque illis, qui per ejusmodi culpas læduntur, infertur tantum præjudicium; cum & ipsis possit contingere, ut alios tali modo lædant : ubi tunc ipsi quoque excusabuntur a restitutione. Dein antecedenter ad omnes eventus particulares quilibet censetur, potius velle subire ejusmodi damnum, quam si omnia a se danda ex talibus subreptiis culpis compensare debeat cum non modico fortunarum suarum detrimento.

Objic. 5. Pro culpa levi imponitur gravis pœna, ut pœna purgatorii, quæ est gravissima : item excommunicatio minor, quæ & ipsa est pœna valde gravis : ergo etiam ob culpam levem potest imponi obligatio gravis restituendi damnum notabile. R. 1. indirecte : ergo etiam ob furtum unius oboli potest imponi restitutio mille florenorum; nam solutio tantæ Summæ longe minor pœna est, quam illa, quæ in purgatorio infligitur pro furto etiam unius oboli. R. 2. N. a. ad ejus primam probat, de purgatorio d. a. pœna purgatorii est gravis respectu pœnarum, quæ infliguntur in foro humano, & in hac vita C. a respectu pœnarum, quæ infliguntur in foro divino, & in altera vita N. a. Alius est ordo pœnarum in foro Dei, & altero mundo, & alius in foro humano : in foro divino pœna purgatorii, tanquam temporalis, est adhuc levis, imo levissima respectu pœnæ æternæ, quæ damnatis infligitur. 2. In foro divino præcipue attenditur, quid decèat, ut quis ingredi possit vitam æternam, & quomodo satisfieri debeat pro offensa infinitæ Majestatis divinæ : in Republica humana spectatur, quid expediat felicitati temporali, & commercio humano, & quomodo satisfieri debeat ob injuriam homini alteri factam : atqui pro injuria homini, qua tali



tali factam non debet tanta satisfactio statui, quanta statuitur in foro Dei pro injuria, infinitæ Majestati divinæ irrogata. Iterum si pro levibus delictis tantas pœnas injungeret Respublica humana, quanta Deus dicit in purgatorio, omnes homines jam pridem fuissent vivicomburio sublati: adeoque tam graves pœnæ pro levibus delictis non sunt proportionatæ societati humanæ. R. 3. ad alteram prob. de Excommunicatione minore negatur a. Excommunicatio enim minor, licet videatur esse suo modo pœna gravis, tamen in æstimatione morali non reputatur talis, quia facillime tollitur per absolutionem.

Objic. 6. Si non posset ob peccatum leve imponi pœna gravis, esset injusta lex Aquilia; atqui non est injusta: ergo. R. 1. hoc argumentum probare nimium; probat enim, ob culpam mere juridicam etiam levem, vel omnino levissimam posse imponi obligationem restitutionis, quod tamen ab Adversariis non conceditur. R. 2. D. M. si non posset absolute, aut respective ad certum finem imponi pœna gravis ob culpam levem c. M. si saltem respective ob certum finem potest imponi pœna gravis n. M. Quamvis damna per culpam levem, aut venialem data ex natura sua non sint punibilia obligatione gravi restitutionis notabilis, ita tamen per legem positivam possunt esse punibilia respective, seu in ordine ad certum finem, videlicet ad excitandam majorem diligentiam hominum in cavendis aliorum damnis. Hic tamen finis necdum est efficaciter intentus a natura, neque a lege positiva humana, saltem ita, ut ante omnem judicis sententiam ob culpam mere venialem ex indeliberatione, aut mere juridicam restitutio rei notabilis fieri debeat.

487

Affero 2. Ex ejusmodi culpa ob imperfectam deliberationem veniali neque oritur obligatio levis ad compensandum damnum grave, vel gravem ejus partem. Lessius, Lugo, Mastrius, Herincx, Vogler, & alii.

Prob. 1. Obligatio legis naturalis in materia notabili, & gravi nunquam est levis, sed vel est gravis, vel omnino nulla: atqui ad ejusmodi restitutionem urget lex naturalis; positiva enim nulla ostendi potest, quæ eam imponeret: ergo talis obligatio



ligatio non potest esse levis, sed debet esse vel gravis, vel omnino nulla. Subsummo: atqui talis obligatio gravis non est, ut patet ex prima Assertionem: ergo nulla est. m. principalis constat. M. etiam patet ex principiis universalibus de Legibus; lex enim naturalis obligat necessario, & consequenter debet tantum obligare, quantum materia est obligationis capax: ergo si in materia gravi obligat, debet necessario sub gravi obligare, quia materia gravis est capax obligationis gravis: si autem non obligat graviter in materia gravi, signum est, quod omnino non obliget.

Prob. 2. Per se videtur mirabile, quod aliquis ad Summam gravissimam, v. g. mille florenorum restituendam tantum sub levi obligetur.

Prob. 3. Non obligatur aliquis sub levi ad sustinendas poenas gravissimas pro homicidio dictatas, si illud per levem inadvertentiam est commissum: ergo neque obligatur aliquis sub levi ad restitutionem gravem ob damnum ex inadvertentia leviter tantum mala datum.

Objic. 1. Potest dari meritum de congruo, quod non habet proportionem aut condignitatem ad præmium; ergo etiam potest dari demeritum congruum, quod non habet proportionem ad poenam, & obligationem gravem subeundam. R. N. c. meritum enim de congruo sapit liberalitatem in præmiante: demeritum autem congruum, & poena, ac obligatio ultra condignum & proportionem, argueret crudelitatem punientis, vel obligantis: atqui crudelitas non cadit in naturam, seu legem naturalem. 488

Objic. 2. Obligatio levis esset proportionata culpæ levi: ergo. R. N. a. Non est proportionata obligatio levis culpæ levi, si per eam etiam grave onus, quale est notabilis & gravis restitutio, sit subeundum. Et plane non est modicum onus, aut rem gravem restituere, aut semper manere in peccato veniali: atqui tantum onus pro culpa mere veniali & indeliberata non censetur natura imponere homini.

Objic. 3. Potest aliquis ex voto se tantum obligare sub levi ad materiam gravem, v. g. ad dandam eleemosynam 100. florenorum: ergo etiam lex naturalis potest obligare sub levi ad



materiam gravem. R. N. c. Obligatio voti est libera, & dependet totaliter a voluntate, & libertate voventis, qui se potest vel graviter, vel leviter obligare pro suo beneplacito. Aliud est de obligatione legis naturalis, quæ est necessaria, & quæ tantum obligat, quantum est materia capax obligationis. Sic responde etiam ad obligationes contractuum, & fidelitatis, ac legum positivarum humanarum, quæ omnes sunt liberæ.

Objic. 4. Potest aliquis sub gravi obligari ad restituendam materiam levem: ergo ex opposito potest aliquis sub levi obligari ad restituendam materiam gravem. A. p. qui sartori furatus est acum, unice necessariam ad laborem & victum, tenetur eam sub gravi restituere. 2. Fingamus, ad furtum grave exigì quantitatem medii floreni: jam ejusmodi fur, qui abstulit medium florenum, graviter obligatur ad restitutionem: sed tantum obligatur ad restituendam materiam levem, v. g. unum vel alterum crucigerum; restituto enim uno vel altero crucigero, jam non amplius est materia gravis, aut medius florenus.

R. N. a. ad ejus primam prob. dico, obligationem gravem non esse ad restituendam acum præcise, sed ad cavendum, ne sartor patiatur notabile damnum emergens. *Ad 2. prob.* N. m. obligatio enim gravis, qua fur medii floreni adstringitur ad restitutionem, indirecte quidem respicit materiam levem, directe vero gravem; quippe directe obligatur talis fur, ad non retinendam materiam gravem alienam: indirecte vero sub gravi tenetur ad restituendum unum vel alterum crucigerum, quatenus ejusmodi restitutio est medium ad non retinendam penes se materiam gravem rei alienæ. Sic, si subduxisti jam 28. crucigeros indirecte sub gravi teneris abstinere a furto reliquorum duorum crucigerorum, quia directe graviter obligaris ad non furandam materiam gravem, quam tamen auferres, si reliquos duos crucigeros prioribus jam ablati adderes.

489

Quæres: An in materia gravi, & notabili damnificans ex culpa veniali per inadvertentiam, saltem leviter obligetur ad refarciendam partem damni parvam, ac tali culpæ proportionatam, v. g. ad aliquot crucigeros compensandos? R. negative. Quare



talis, qui ex culpa ejusmodi veniali ob indeliberationem alterum etiam gravissime damnificavit, tenetur ad nullam omnino restitutionem. Ita probabiliter sentiunt Lessius, Sotus, Herincx, Mezger, Vogler, ac alii contra La-Croix, Elbl, Holzman &c. *Prob.* Ex actu votendi, qui ob inconsiderationem tantum est semiplene voluntarius, nequidem sub veniali oritur obligatio implendi votum, vel partem voti: ergo idem a pari in proposito. C. p. Ideo actus votendi cum semiplena advertentia non inducit aliquam obligationem, quia non est perfectus in ratione voti: ergo idem est de acceptione propter semiplenam advertentiam venialiter injusta, quia & hæc est imperfecta in ratione injuriæ, consequenter non inducit obligationem restituendi.

Objic. 1. Qui ex culpa ob indeliberationem veniali infert grave damnum, ordinarie habet sufficientem cognitionem & deliberationem in ordine ad partem modicam talis damni: ergo talem partem modicam tenetur saltem sub levi refarcire. R. Hoc argumentum esse contra statum quæstionis; ponimus enim, quod totum damnum quoad omnes partes suas sit causatum ex culpa ob indeliberationem veniali. Et cur talis hypothesis & casus, quem nos ponimus, non sit possibilis?

Objic. 2. Obligatio restituendi totum damnum oritur ex injuria plene voluntaria: ergo ex injuria semiplene voluntaria oritur obligatio saltem restituendi partem levem respondentem tali injuriæ. R. N. c. Obligatio restituendi solum sequitur injuriam perfectam in ratione injuriæ, non autem imperfectam, & semiplene voluntariam, ut patet ex instantiis voti, juramenti, præcepti Superioris &c., quæ tamdiu non obligant juxta probabilem sententiam, quamdiu procedunt ex imperfecta deliberatione, adeoque sunt imperfectæ in ratione voti, juramenti, præcepti &c.

Objic. 3. Damnum, aliquo modo voluntarie illatum, est restitutioni obnoxium; atqui ejusmodi damnum est aliquo modo voluntarie illatum: ergo est restitutioni obnoxium. Atqui non est totum damnum restitutioni obnoxium, nec pars ejus notabilis, ut patet ex præcedentibus: ergo saltem pars levis. R. D. M. si voluntarium sit sufficiens ad hanc obligationem, & tale,  
P. Kick Theol. Tom. IV. Tttt le,



le., ut damnum potius ex voluntate, quam ex casu fortuito contigisse censeatur c. M. fecus n. M. damnum ex semiplena advertentia & deliberatione illatum. censetur potius fortuito datum, quam ex malitia voluntatis.

Notes tamen, Confessarium non facile credere debere, quod damnificatio externa gravis contigerit citra sufficientem deliberationem; licet enim in internis motibus, & cogitationibus semiplena deliberatio frequenter accadat, ea tamen in externis non adeo frequens esse solet; nam opera externa, præsertim talia, quæ gravis momenti sunt, ipsa gravitate sua advertentiam nostram excitant, periculum insinuant, & mentem ad deliberationem quasi compellunt. Ita recte monet Vogler de Restit. n. 122.

## §. III.

*Continuatur præcedens materia.*

490

Affero 1. Qui per plura furtiva minuta, & peccata venialia plene deliberate commissa, pervenit ad materiam gravis damni, tenetur postea sub mortali illud damnum resarcire. Nunc communissima. Et hæc conclusio locum habet, quando neque in ultimo furto, in quo completur summa gravis, neque in præcedentibus advertitur malitia gravis, consequenter nullum peccatum mortale in ejusmodi ablatione committitur.

Prob. 1. ex propositione 38. ab Innocentio XI. damnata, quæ sic habet: *Non tenetur quis sub pœna peccati mortalis restituere, quod ablatum est per parva furtiva, quantumcunque sit magna summa totalis.*

Prob. 2. Jus naturale obligat sub mortali ad resarciendum damnum grave, quod alteri scienter, & voluntarie est illatum; atqui dum aliquis intra duos menses v. g. Domino suo per furtiva minuta clepit 100. denarios, eidem scienter & voluntarie infert grave damnum: ergo jus naturale sub mortali obligat talem hominem ad resarciendum totum hoc damnum. M. patet; jus enim naturale ad materiam gravem obligat sub gravi & mortali,



tali, ut dictum est. m. p. ex communi persuasione hominum, qui judicant, talia minuta furta in unum damnum grave coalescere.

Prob. 3. Qui singulis diebus unius integri anni acciperet mutuo uno denarium, teneretur completo anno sub gravi restituere illi, a quo mutuo accepit, 360. denarios: ergo idem dicendum de furante singulis diebus unum denarium.

Prob. 4. Hæc obligatio antecedenter ad omnes eventus videtur exoptabilis humano generi; quia alias homines non satis absterrentur a furtis minutis deliberatis, & frequentatis, quibus sæpe magnum damnum interitur: ergo censendum est, quod hæc obligatio sit introducta lege naturali.

Affero 2. Si quis unica actione venialiter tantum mala alterum lædit injuste, sciens quidem gravitatem materiale, non autem formalem damni, talis tenetur sub mortali ad restitutionem totius damni gravis. Ut si quis una ablatione Principi furatus sit tres aureos, valorem monetæ optime sciens, bona tamen fide credens, hanc quantitatem tam diviti ablatam non sufficere ad peccatum mortale: ejusmodi fur sub gravi tenetur ad resarcitionem hujus damni, etsi omnes tres aureos jam consumpserit, nec inde sit factus ditior. Illfing, Mezger, Vogler, Elbl, Holzman. Ratio est eadem, quæ pro priori assertionem; si enim tres aureos teneris restituere, quos successive per furta minuta venialiter mala, plene deliberata subtraxisti, a fortiori teneris eos restituere simul una actione plene voluntaria surreptos; quia homines majorem læsionem, & injuriam in furto simultaneo, quam successivo, quantitatis gravis agnoscere videntur.

Objic. 1. Prædicta propositio Innocentii XI. non fuit damnata in sensu opposito nostræ conclusioni: ergo non possumus ex ejus damnatione probare nostram conclusionem A. p. fuit damnata, prout jacet; atqui prout jacet, potest plures habere sensus falsos, ac damnabiles, inter quos tamen non est sensus nostræ conclusioni oppositus: ergo. m. p. hæc propositio potest intelligi 1. de eo, qui rem alienam, per furta minuta subtrahat, adhuc penes se retinet. 2. de eo, qui mala fide, & cum



conscientia peccati mortalis, rem talem alienam absumpsit. 3. de illo, qui furta minuta perpetravit cum animo perveniendi ad summam gravem. In triplici hoc casu est obligatio gravis ad restituendum: in primo quidem ex titulo rei acceptæ, in secundo & tertio ex titulo injustæ, ac graviter contra justitiam peccaminosæ acceptionis: adeoque propositio falsâ, & merito damnata est, dum in triplici hoc sensu funem ejusmodi deobligat a restitutione.

R. N. a. ad prob. N. min. summus Pontifex non damnavit prædictam propositionem in eo sensu, in quo eam nullus Authorum tradidit; atqui, ut plures advertunt, in triplici adducto sensu nullus Authorum eam propositionem docuit: ergo in triplici illo sensu non est damnata, sed potius in alio. M. p. nam intentio Pontificis erat, damnatione sua laxiores quorundam doctrinas restringere. Et certe inutilis foret damnatio sententiæ illius, quam nullus Authorum docuisset; sic enim frustra vibrarentur fulmina Apostolica, cum non esset, quem ferirent. Videatur Cardenas in Crisi in propositiones ab Innocentio XI. damnatas Dissert. 23. c. 3. n. 98. & seq.

Solent etiam AArii hic facere aliquas instantias ex legibus propositionum contradictoriarum. Verum ad eas universaliter R. 1. a Pontificibus in damnatione propositionum non attendi rigorem, & subtilitatem Summulisticam, saltem semper; per has enim speculationes logicas, & metaphysicas sæpe eludetur mens, & veritas, quam per suam damnationem intendit Sedes Apostolica. 2. Neque semper ad veritatem ex propositione confixa eruendam sufficit propositio contradictoria, præsertim quando ex intentione propositionem damnantis colligitur, plus peti. Hinc 3. ut veritas certa colligatur ex propositione aliqua proscripita, debet præcipue attendi ad intentionem, & mentem Pontificis, talem propositionem configentis.

Obje. 2. Damnum grave, per talia furta minuta illatum, non est voluntarium, neque cognitum: ergo non datur gravis obligatio illud refarciendi. C. patet; nemo enim tenetur sub gravi, compensare damnum sibi involuntarium. R. D. a. non est volun-



voluntarium, vel cognitum quoad gravitatem formalem C. a. quoad gravitatem materialem subd. non est cognitum qua totum collective Tr. a. non est cognitum quoad omnes partes distributive N. a. Quamvis ejusmodi fur, successive clepens gravem summam, non velit omnes partes hujus summæ, & damni collectim una volitione, vult tamen eas omnes distributive pluribus & distinctis volitionibus, plene deliberatis: & sic vult totam summam per modum plurium damnorum levium, re ipsa coalescentium in unum grave damnum.

Objic. 3. Si esset gravis obligatio restituendi talem summam, minutim ablatam, vel proveniret ex titulo rei acceptæ, vel ex titulo injustæ acceptionis? non ex primo; quia supponimus, rem sic ablatam non amplius existare. Non ex titulo injustæ acceptionis; quia juxta superius dicta ex culpa veniali non oritur obligatio gravis restituendi: ergo.

R. N. m. & dico, quod talis homo teneatur ad restitutionem ex titulo injustæ acceptionis, si ad titulum hunc etiam reducatur obligatio restituendi ex contractu, & quasi contractu, prout & nos reducimus n. 460. Quin imo, ut advertit Esparza L. 8. de justitia q. 25. omnis obligatio restitutionis ex injusta acceptione ultimato resolvitur in naturalem, & tacitam omnium gentium conventionem, contractum, ac consensum, quo antecedenter ad omnes eventus quilibet se vult in bonis suis illæsum ab alio servari, & si scienter, ac plene voluntarie in iisdem lædatur, vult, & exigit compensationem damni: consequenter vult etiam ipse illæsa servare quilibet bona & jura proximorum, & si aliquem in iis scienter læserit, damnum ex æquo resarcire, juxta illud legis naturalis principium: *Quod tibi non vis fieri, alteri ne feceris*. Quod autem in casu nostræ Assertionis talis tacita conventio sit inter omnes homines, patet ex eo, quia simile tacitum pactum est maxime utile & necessarium, ut consulatur felicitati, ac societati humanæ, prout ex quarta probatione primæ Assertionis colligitur.

Objic. 4. Restitutio est pœna; atqui pœna gravis non debet imponi pro delictis venialibus: ergo restitutio gravis non



potest imponi pro peccatis venialibus, etiam multiplicatis. m. constat; talis enim pœna gravis non esset proportionata culpis levibus. R. D. M. restitutio est pœna, proprie intenta ad vindicationem delicti n. M. est pœna impropria, & conventionalis, intenta ad reparationem damni illati c. M. & d. m. sed pœna proprie talis, intenta ad vindicationem delicti, non debet imponi pro peccatis venialibus c. m. pœna conventionalis, intenta ad reparationem damni, non debet imponi pro culpa levi *subd.* nisi per eam sit *scienter*, & *plene voluntarie* illatum damnum grave C. m. secus N. m. Qui sciens, & plene voluntarie alteri per furta minuta surripit, imponit sibi, vel potius ex quasi contractu naturali in se suscipit pœnam, ac obligationem reddendi res quaslibet, ita successive ablatas: ergo suscipit etiam obligationem reddendi gravem summam, si ea per furta minuta est ablata, & quidem sub gravi; quia ad materiam gravem præsertim vi legis naturalis censetur esse obligatio gravis.

Objic. 5. Peccata inæqualia debent inæqualiter puniri; atqui hoc non fieret in nostra sententia, in qua peccatum mortale & veniale æquali obligatione restitutionis punirentur; sive enim per furtum mortaliter peccaminosum, vel solum venialiter malum ablata sit summa gravis, tamen tota deberet restitui: ergo. R. N. m. etsi enim in hoc convenient furtum mortaliter, & venialiter malum, quando per illud damnum notabile causatur, quod debeat fieri æqualiter restitutio, seu etsi convenient in pœna conventionali: non tamen sunt æqualia in omni pœna; cum pro peccato veniali pœna tantum purgatorii & temporalis, pro furto mortali pœna inferni & æterna, ac privatio gratiæ sanctificantis sit statuta. R. 2. D. M. peccata inæqualia debent inæqualiter puniri spectando castigationem, & satisfactionem offensæ c. M. spectando compensationem damni illati *subd.* nisi etiam per peccata inæqualia plene tamen deliberata sit *scienter* illatum damnum grave, & æquale c. M. secus n. M. &c.

Objic. 6. Furta minuta venialiter mala non dant justam causam gravis offensæ illi, cui sunt facta: ergo neque obligant ad restitutionem gravem. R. d. a. furta minuta venialia seorsim accepta, non dant rationabilem causam gravis offensæ C. a. non dant



*Art. III. §. I. Ad quid teneatur negat. damnificans alterum? 703*

dant simul accepta *subd.* si adlit onus restituendi Tr. a. si desit n. a.

Illa, quæ ad maiorem dilucidationem hujus paragraphi facere possunt, explicabuntur inferius, dum de restitutione ob furtum debita tractabitur.



*ARTICULUS III.*

*An teneatur ad restitutionem, qui alterum impedit a consequendo bono, vel ipsi ex odio nocet?*

*§. I.*

*An teneatur ad restitutionem, qui alterum negative tantum damnificat, seu impedit a consecutione alicujus boni?*

**A**SSERO 1. Qui alterum impedit a consecutione boni, quod illi jam est debitum ex justitia commutativa, peccat contra justitiam, & tenetur compensare damnum. 2. Qui autem aliquem impedit a consecutione boni, quod ipsi ex justitia commutativa non est debitum, non peccat contra justitiam, nec ad aliquam restitutionem tenetur, dummodo non impediat vi, vel fraude &c. Communis apud Elbl n. 97.

493

Prob. breviter 1. *pars.* Qui impedit aliquem a bono, ipsi debito ex justitia commutativa, seu a tali bono, ad quod habet vel jus in re, vel ad rem, facit tali homini injuriam strictè, & proprie dictam, quæ fundat obligationem refarciendi jus læsum: ergo.

Et quidem, si ejusmodi homo, qui sic impeditur, habuit jus in re, tunc tenetur tantum refundere, quanti valet bonum, a quo impeditur, & damna emergentia, ac alia præstare, quæ præstare debet aliquis fur &c. Ratio est: quia in æstimatione morali idem operatur, ac fur; cum perinde sit, impedire,



re, vel non dare aliquod bonum alteri proprium, quam illud auferre. Imo si possibile est, debet talis impediens curare, ut hoc bonum saltem postea tribuatur ei, qui antecedenter habuit jus in re, & quem læsit in hoc suo jure.

Si autem alter, qui ex impeditus ab aliquo bono, tantum ad illud habuit jus ad rem, scilicet ob promissionem meam traditione nondum secuta, præsentationem, concursum, expectativam, & alios similes titulos, ex quibus conceditur actio personalis ad rem, tunc impediens non tenetur ad tantum, quanti valet res, & bonum impeditum, sed quanti valet spes boni, vel jus ad rem illam impeditum; etenim, quia bonum speratum, & ad quod solum habetur actio personalis, adhuc pendet a mutabili, & diversimode impedibili voluntate hominum, hinc illud notabiliter minus valet, quam bonum aliquod actu obtentum, & tale, ad quod habetur jus in re. Quanti autem valeat jus ad rem, & spes boni consequendi, non potest universaliter, & unica conclusione decidi, sed debet secundum varias circumstantias per Confessarios, arbitros, aut alios prudenter aestimari, vel inter lædentem & læsum transactio, aut amicabile compositio fieri. P. Elbl de Restit. n. 107. judicat, quod res actu obtenta, & cujus habetur actuale dominium, plus duplo aestimetur, quam res tantum sperata: hinc putat satisfieri obligationi restitutionis, si impedito a consequendis mille florenis, ad quos habuit spem, & jus ad rem, restituantur 500. floreni. P. Vogler autem in thesibus de restitutione ait: certe spes consequendi 100. & mille aureos sæpe non aestimatur 10. aureis.

Prob. 2. *pars. 1.* Eo ipso, quod talis, qui impeditur, non habeat jus ad bonum impeditum, non potest ipsi fieri injuria strictè dicta, ex qua sequeretur obligatio restituendi. 2. Ille non peccat contra justitiam, nec obligatur ad restitutionem, qui alteri non confert bonum illud, ad quod alter non habet jus: ergo neque iste peccat contra justitiam &c., qui impedit talem hominem, ne conferat bonum non habenti jus ad illud. 3. Videtur contra rationem, quod ille peccet contra justitiam, & obligationem restitutionis incurrat, qui alterum, volentem pro

pro



pro hærede scribere Petrum, precibus, donis, obsequiis; consiliis, sine vi vel fraude, vel læsione juris alicujus inflectit, ut se potius quam Petrum hæredem instituat; alias semper peccares contra justitiam, quoties aliquod donum ab altero postulare, quod Dominus probabiliter alteri ex mera liberalitate, & sine aliquo debito justitiæ fuisset concessurus, quod est absurdum, & contra communem omnium Consensum. Accedit lex 3. seu finalis C. *Si quis aliquem testari prohibuerit, vel coegerit.* Quæ aperte huic secundæ parti Assertionis favet; sic enim habet: *Judicium uxoris postremum* (seu ultimam voluntatem) *in se provocare maritali sermone* (precibus, aut aliis verbis) *non est criminofum.* Ubi utique alii, qui vel ab intestato, vel ex Testamento successissent, impediuntur a bono.

Objic. 1. Juxta Philosophum 2. Physic. c. 5. t. 56. Quod 494  
*parum distat, nihil distare videtur*; sed parum distant bonum jam debitum alteri, & bonum tale; quod alter sibi certa spe promittit liberaliter dandum a Domino: ergo etiam nihil distant: consequenter etiam parum, ac omnino nihil distare videtur, si-  
ve aliquem impedias a bono, quod ipsi jam est debitum, vel quod sibi certo promittit: proinde in utroque casu æqualiter ad restitutionem teneris.

R. 1. Tr. M. n. m. nam bonum debitum vi juris veri quæ-  
siti, & bonum solum speratum sine jure, non parum, sed plu-  
rimum in æstimatione morali differunt. R. 2. Hoc axioma in mo-  
ralibus non semper habet locum; nam qui parum abest, ut fu-  
retur, vel homicidium committat, non ideo est fur, aut homi-  
cida, nec propterea ad restitutionem homicidis, & furibus in-  
cumbentem obligatur. Sic etiam ille, qui parum abest a sum-  
mo Pontificatu, seu qui proxime est eligendus in Papam, nul-  
la adhuc gaudet jurisdictione: si autem electus est, summam  
potestatem & jurisdictionem obtinet.

Nihilominus interdum prædictum axioma in materia resti-  
tutionis quoque applicari potest, prout advertit Vogler: ut si  
quis destruxisset fructus alieni agri, qui parum aberant a matu-  
ritate, teneretur ad eandem compensationem faciendam, quam  
P. Kick Theol. Tom. IV. U u u u de-



deberet præstare, si fructus penitus maturos devastasset; quia fructus jam fere maturi ab omnino maturis in æstimatione morali parum, aut nihil differunt. Aliud est in nostro casu, ut patet ex prima responsione.

Objic. 2. Clement. 1. *de Privilegiis*. in virtute SS. obedientiæ, & sub mortis æternæ comminatione interdicitur Religiosis, ne, dum interfunt testamentis condendis, retrahant testatores a legatis faciendis. Matricibus Ecclesiis, neve suadeant, ut testans bona sua potius relinquat Monasteriis sui Ordinis: ergo peccat contra justitiam, & tenetur ad restitutionem, qui sine vi, vel fraude impediit Matricem Ecclesiam a consecutione aliqujus boni, et si nullum jus ad illud habuerit.

R. N. c. Præceptum illud est positivum, & Ecclesiasticum ob pacem conservandam inter Clerum sæcularem & Religiosos, nec obligat ad restitutionem, saltem ante sententiam judicis, vel saltem antequam ab illis, quorum interest, talis restitutio petatur. Ratio hujus est: *tum*, quia Clementina illa non obligat ex motivo justitiæ: *tum*, quia etiam in pœnam non imponit restitutionem, faciendam ante sententiam judicis, vel antequam exigatur ab illis, quorum interest. Statuuntur tamen certæ pœnæ ibi in Religiosos transgressores hujus constitutionis, & in Prælatos Monasteriorum, nisi hi ultimi, scilicet Prælati, *Personis Ecclesiasticis, aut Ecclesiis damnificatis, vel læsis plenariam exhibuerint satisfactionem intra mensem, postquam super hoc fuerint requisiti*. Ita textus cit. Clement. Verum de hoc videantur Canonistæ. Ex his

495

Resolves: Non peccare Sacerdotem, nec teneri ad restitutionem, qui moribundum, jamjam resolutum ad condendum testamentum, & pro hærede unice instituendum Sempronium, eo adducit sine vi vel fraude, ut sibi potius aliquid leget, vel se, aut suum consanguineum hæredem instituat, quam Sempronium. Quod præsertim verum est, si hoc faciat ex discreto Zelo, & prudenti consilio. Ita Elbl n. 114. Ratio est: quia hic non læditur jus alterius, consequenter neque justitia: ergo neque oritur obligatio restitutionis. Neque prudens consilium, quod



§. I. Ad quid teneatur negative damnificans alterum? 707

quod supponitur in hoc casu esse datum, peccato obnoxium esse potest: proinde talis neque contra aliam virtutem, v. g. charitatem, peccat. Nec obstare potest Clementina allegata, quæ solum continet casum specialem, quando moribundus vult aliquid legare Ecclesiæ Matrici, quod hic non reperitur.

Monitos tamen hic vult R. P. Elbl Religiosos, ne facile se immisceant testamentis, aut legatis, procurando, ut ea in favorem suorum Conventuum fiant; talia enim Religiosis Personis avaritiæ notam inurunt, sæculum offendunt, ac Episcoporum, & Clericorum sæcularium indignationem post se trahunt. Quæramus animas, & Deus nobis certo de necessariis vitæ providebit. Plane res indigna! si Operarius in vinea Domini plus pecuniæ lucrum, quam fructum animarum curat: si & in Personas Deo sacras illud cadit: *Omnes quæerunt, quæ sua sunt, non quæ Jesu Christi.* Mercenarii ejusmodi & Deo sunt execrabiles, & animarum saluti parum proficui, ac aliis plurimum graves.

Dixi autem in secunda Assertionis parte, & sapius repetii, dummodo non impediat *vi vel fraude.* Hinc

Asserto 2. Regulariter, qui alterum illegitima vi, vel fraudibus & mendaciis impedit a consecutione boni, libere & licite conferendi, peccat contra justitiam, & tenetur tantum restituere, quanti valebat spes boni impediti. Communis DD. apud Elbl, & alios.

496

Prob. 1. Et si alter non habeat jus aliquod ad Beneficium, vel aliud bonum, sibi liberaliter & licite conferendum, habuit tamen verum jus adversus quoscunque, ne per eos in consecutione talis beneficii per vim injustam, fraudem, dolum, mendacia, aut alias machinationes contra justitiam pugnantes, impediat: ergo, qui illum tali modo impedit, vere agit contra justitiam, adeoque obligatur compensare damnum, non quidem refundendo totum bonum speratum, sed potius valorem & æstimationem spei, quam habuit ad consequendum tale bonum; sola quippe hac spe alterum privavit, ponendo ejusmodi impedimentum. Prob. 2. Nimia sequeretur perniciēs in Republica

U u u u 2

hu-



humana, si citra obligationem restitutionis aliquem liceret per vim, vel fraudem impedire a bono consequendo: ergo.

497

Objic. 1. Si per vim, vel mendacium impedis Paulum, ne Andreæ conferat beneficium, vel bonum aliquod, potius Paulo, quam Andreæ facis injuriam; nam illi fit injuria, cui fit vis, vel mendacium: ergo Paulo, & non Andreæ teneris ad restitutionem. R. N. a. Qui immediate impedit per vim, vel fraudem Paulum, ne præstet beneficium, etiam impedit mediate Andreæ a consequendo tali beneficio: consequenter etiam Andreæ fit injuria, & quidem *damnosa*, quæ per restitutionem compensari debet; sola enim injuria *damnosa*, seu damnum illatum restitutione reparari debet, non autem illa, quæ non est *damnosa*, qualis est in Paulo, qui per vim impeditur a collatione beneficii, per quod impedimentum nullum damnum, saltem reparabile per restitutionem, patitur in suis bonis vel juribus, ut consideranti liquet: consequenter ipsi nulla debet fieri restitutio.

Objic. 2. Domini sæpe fallacibus verbis, & dolosis promissis detinent apud se famulos, & impediunt a meliore servitio: & tamen propterea nemo eos obligat ad restitutionem: ergo etiam per fraudem aliquem impediens a bono aliquo, non tenetur ad restitutionem. R. N. a. quoad ult. memb. Sicut enim sponsus, qui falsis promissis mulierem impedit a meliore matrimonio, tenetur ad restitutionem, ita & Dominus, vel Domina sic decipiens famulum, vel famulam.

Objic. 3. Ex nostra conclusione sequitur, etiam ad restitutionem obligari 1. Opifices & Mercatores, qui falsis laudibus extollunt suas merces, & mendaciter aliorum Mercatorum merces contemnunt, sicque impediunt alios mercatores & opifices a lucro. 2. Mendicos, qui simulatis morbis, vel sanctitate aliis pauperibus eleemosynas præripiunt: atqui nimis durum est, istos obligari ad restitutionem: ergo.

R. D. M. sequeretur, ad restitutionem obligari mercatores, quando efficaciter impediunt alios mercatores a notabili lucro, & mendici, quando magnas eleemosynas simulationibus suis

ex-



*§. 1. Ad quid teneatur negative damnificans alterum?* 709

extorquent, & per mendacia proxime impediunt alios pauperes  
c. M. fecus n. M. Ex quo

Colliges 1. Interdum tales mercatores, opifices, ac mendicos a restitutione non esse excusandos, quando scilicet revera proxime, & efficaciter per fallacias suas alios a justo lucro, vel emolumento impediunt.

Colliges 2. Sæpe tamen sic mentientes esse a restitutione deobligandos: 1. quia plurimi ita mentientes tantum venialiter delinquant, tum, quia non attendunt ad damnum proximi: tum, quia non satis penetrant gravem obligationem; atqui ex ejusmodi peccato veniali non oritur obligatio gravis restituendi. 2. Quia talia mendacia satis frequenter sunt in usu apud opifices, & mercatores, quorum quilibet suam artem, & merces arti, & mercibus alienis præferre solet: hinc admodum parva, vel omnino nulla fides se, & sua extollentibus, ac alienam laudem depimentibus adhiberi solet. Quare per ejusmodi mendacia vix aliquod damnum aliis efficaciter causari potest. Idem est de mendicis; scitur enim ab omnibus, quod hi ordinarie suas necessitates exaggerent, varios morbos fingant, ut inde titulum aliquid acquirendi habeant. Quare talibus Personis extraordinariæ elemosynæ non solent dari. Hinc non inferunt adeo notabile præjudicium aliis egenis.

Objic. 4. Sequeretur ulterius, teneri ad restitutionem Candidatum alicujus officii, qui mendaciter tegit suos defectus, quibus cognitis eligerentur alii: sequela est absurda: ergo. R. Neg. sequelam; nam talis tegens suos defectus primario, & directe non intendit impedire alterum a consecutione officii, sed vult tantum occultare suos defectus, quos manifestare non debet: ex qua occultatione defectuum per accidens sequitur damnum & impedimentum, ne eligatur, vel assumatur alius ad officium. Nos autem loquimur de eo, qui primario & directe per suas fallacias aliquem molitur impedire a consecutione officii.

Objic. 5. Non peccat contra justitiam, nec tenetur ad restitutionem, qui per vim, vel fraudem facit, ut beneficium,

U u u 3

vel



vel officium conferatur magis digno, & denegetur minus digno, qui alias illud accepisset licite, ut ponitur in casu: ergo etiam ille non tenetur ad restitutionem, qui alium impedit a bono, quod licite accipere potuisset.

R. 1. Non deesse, qui negant Antecedens, ut Henriquez, & Dicastillo d. 8. n. 29. R. 2. C. a. prout & illud apud Vogler n. 398. concedunt, & defendunt Covarruvias, Thomas Sanchez L. 2. Consil. c. 1. dub. 49. & Tamburinus. D. c. Regulariter loquendo, & ubi Respublica vel Ecclesia absolute non approbat, aut consulit, ut ejusmodi homo impediatur a bono consequendo N. c. fecus C. c. Quamvis Respublica, & Ecclesia reprobet modum fraudulentum, & violentum acquirendi beneficia aut officia: approbat tamen, & consulit, ut semper, quantum fieri potest, dignior assumatur, & minus dignus impediatur, & rejiciatur. Quare impedire talem minus dignum etiam per fraudem, vel dolum, non videtur injuria, vel certe non est gravis injuria, quæ onus restitutionis importet. Et ob hunc casum in Assertionem addidi to. *regulariter*.

Porro ad alia plura, quæ obijci possent, solvenda nota ex La-Croix l. 3. p. 2. n. 82. conclusionem nostram tantum procedere, quando aliquis per vim vel fraudem aliquem proxime, & directe impedit a consecutione alicujus boni, & sic talis actio dolosa, vel violenta proxime est conjuncta cum damno, & detrimento alterius. Aliud est, si consecutio alicujus boni tantum per accidens, ac remote impeditur; tunc enim sic impediens non tenetur ad restitutionem. Sic in casu: Cajus injuste occidit Stichium, alias liberalissimum in pauperes: adeoque pauperes tali modo injusta actione homicidii impedivit a multis eleemosynis consequendis a Stichio. Quaritur: an Cajus propter hoc impedimentum obligetur ad restitutionem aliquam pauperibus faciendam? & Rdetur negative; quia hoc damnum, & impedimentum pauperum ex occisione Stichii non proxime, sed tantum remote, ac per accidens oritur. Verum de hoc plura alibi.

Assero



*§. I. Ad quid teneatur negative damnificans alterum? 711*

Affero 3. Non tenetur ad restitutionem, qui aliquem vi 498  
illegitima, vel fraude &c. impedit a bono, quod talis non poterat juste accipere. Vogler, & alii apud hunc citati. Prob. 1. Nemo eum condemnat ad restitutionem, qui fraude, vel dolo impediit latronem, aut furem a lucro iniquo, captando ex furtis, latrociniiis, & cædibus: ergo. P. 2. Quia aliquis tantum censetur habere jus efficax adversus eos, qui ipsum fraudibus impediunt a bono, quod juste poterat petere, & ei juste poterat conferri; atqui tale bonum, quod alter sperat, vel ipse juste non potest petere, vel ipsi non potest juste conferri: ergo talis non habet jus efficax adversus eos, qui ipsum fraudibus impediunt: consequenter, dum sic impeditur, non fit ipsi injuria talis, quæ restitutione debeat reparari. Deinde fit quidem aliqua injuria tali homini, dum quis erga eum utitur mendaciis, & fraudibus, non tamen ei fit injuria eatenus, quatenus per fraudes impeditur a consecutione boni; cum talis in nullo casu possit jus aliquod prætereendere ad bonum illud, quod juste nequit accipere. Imo Lessius in hoc casu judicat, mendacia & fraudes non opponi justitiæ, sed tantum veritati.

Affero 4. Etiam non tenetur ad restitutionem, qui fraude, 499  
vi &c. aut aliis malis artibus impedit alterum a bono, quod sine peccato gravi contra quamcumque virtutem, etiam a justitia distinctam, non poterat accipere, & alius non poterat dare. Tamburinus l. 8. t. 3. c. 3. §. 3. n. 9. La-Croix l. 3. p. 2. n. 72. Vogler de Restit. n. 380.

Do exemplum: Paulus mittere intendit honoraria puellæ ex pravo fine, ut eam invitet ad peccatum carnis. Petrus famulus novit intentionem Domini, & indolem lubricam puellæ, quæ dono recepto certo esset consensura in scelus. Hinc dolo, vel mendacio avertit Dominum, ne talem donationem faciat. In hoc casu, etsi mendacio puellam impedierit a notabili bono, nihil ei tenetur restituere. Prob. Nec Paulo, nec puellæ in hoc casu videtur facta esse injuria, eoquod per mendacium a re illicita, & graviter peccaminosa sint impediti.

Hæc conclusio præcipue procedit, si donatio tam ex parte donantis, quam ex parte recipientis sit peccaminosa. Si vero



ro ea non ex parte utriusque, sed solum ex parte donatoris, vel solum ex parte donatarii sit illicita, tunc existimat Tamberinus, impediens fraude &c. peccare contra iustitiam, & esse obnoxium restitutioni parti læsæ. Verum hæc res indiget ampliori discussione, ut sapienter Voglerus cit. advertit.

500

Ex his Assertionibus pro praxi sequentia elicies. Deduces ergo 1. non peccare contra iustitiam, nec ad restitutionem obligari, qui precibus importunis, blanditiis &c. impetrat, ut Cajus sibi impendat beneficium, quod alteri jam destinaverat conferre, sed omnino gratis & liberaliter, seu absque jure, & debito iustitiæ præcedente.

Deduces 2. Contra iustitiam peccare, & ad restitutionem obligatos esse sequentes: 1. qui mendaciis, fraude, vel criminationibus, præsertim falsis, impediunt revera opifices, operarios, vel famulos ab opere, aut servitio suo, quo erant lucraturi. 2. qui mercatores impediunt a lucro captando artibus, & modis injustis. 3. Qui simili fraude a magistris abstrahunt discipulos, cum dispendio ejusmodi magistrorum. 4. Qui detinent injuste opifices in ergastulis, vel alio modo iniquo impediunt, ne interea sua arte & industria aliquid lucrari valeant. 5. Illi, qui veros mendicos impediunt injuste fraudibus, criminationibus &c. quo minus mendicando possint necessaria ad vitam sustentandam acquirere. 6. Qui impediunt Tabellarios, vel Procuratores, ne pro suo Principali possint agere, & sic sunt causa alicujus damni, inde Principali evenientis. 7. Qui mendaciis impediunt a beneficio, vel officio vere dignum, præsertim si non adsit dignior, qui præferatur. La-Croix, Vogler, Elbl.

Deduces 3. Qui aperit litteras alterius, & per apertionem est causa, cur aliquis non impetret beneficium, vel officium, talem apertorem teneri ad restitutionem. Ratio est: quia apertio litterarum in hoc casu est iniquum, & injustum impedimentum a consequendo beneficio.

Sed fingo casum: Sempronius, postquam legit litteras Caji a se dolose apertas, eas dextere iterum obsignat, ac ad locum debi-



§. 1. *Ad quid teneatur negative damificans alterum?* 713

debitum satis tempestive mittit; hoc tamen simul nequiter facit: utitur enim notitia illa, quam ex litteris injuste lectis hausit, ac alias litteras suo nomine supplices addit, & ipse præ Cajo impetrat beneficium. Jam quæritur, an teneatur ad restitutionem Cajo faciendam? R. probabilius affirmative. Ita sentiunt Lugo, & La-Croix n. 77. Ratio est: quia Sempronius injuriam fecit legendo, ex qua lectione proxime videtur secutum damnum Cajo. Est tamen contrarius Sporer cum aliis ex ratione; quia licet injuste legit litteras, non tamen injuste usus est scientia ex illis hausta. Sic etiam, qui ope dæmonis acquirit scientiam, vel artem, eadem juste postmodum utitur. Verum hoc exemplum non est ad rem; quia scientia ope dæmonis non obtinetur injuste, seu peccato contra justitiam, sed superstitiose tantum. Aliud est in præsentī casu.

Ast quid dicendum in sequenti casu: Cajus accepit litteras, quibus significatur, magnam esse futuram alicujus rei penuriam. Hoc nuncio in suam utilitatem usus Cajus, non modicam quantitatem talis rei currente pretio comparare statuit, ut postea superveniente penuria eam maximo pretio cum ingenti suo lucro vendere possit: litteras tamen dilacerat, dilaceratasque in mille fragmenta in foro projicit. Alius vero curiosus fragmenta omnia ita apte colligit, & ordinat, ut sensum litterarum integre percipere valeat. Quare absque mora congregando & coemendo, quidquid de tali re, cujus penuria imminabat, acquirere poterat, prævenit Cajum, & multum lucrum præripuit. Quæritur, an juste? & an non teneatur ad restitutionem faciendam Cajo? R. negative. Ita contra Rebllum resolvunt apud Vogler n. 388. Silvester, Layman, & Sporer, quibus & ipse consentit; nam, cum Cajus sua sponte projecit litteras laceratas in foro, dedit omnibus potestatem in fragmenta litterarum, ut quilibet iis uti possit in suum commodum. Aliud tamen P. Vogler dicendum putat, si quis alienas litteras legeret in iis locis, ubi moraliter certo constaret, eas non esse voluntarie, sed tantum casu relictas.

Deduces 4. Non licere quidem, alicui affingere crimina falsa, ut talis per similes detractiones impediatur a consequendo  
*P. Kick. Theol. Tom. IV.*

X x x x

ali-



aliquo beneficio, vel officio: quo tamen non obstante, licet interdum occulta crimina Superiori, vel alteri manifestare, ut sic indignus repellatur ab officio, vel opes non relinquantur homini lurido, qui illis esset abusus.

Petes autem, quid dicendum, si aliquis alterum publice diffamat de criminibus occultis, & sic impedit a consequendo officio, an saltem tunc non teneatur ad restitutionem? R. sub distinctione: Vel solum crimen in se, ut revelatum, collatori est causa, cur tali Candidato criminoso non conferatur officium? vel potius hujus causa est non tam crimen cognitum collatori, quam infamia publica, ex divulgatione criminis orta, quæ hominem facit vilem, & officio indignum? Si primum: tunc diffamator probabilius tenetur tantum ad restitutionem famæ, non autem ad compensationem pro damno incurso ratione officii impediti. Ratio est: quia impedimentum obtentioni beneficii ponit sola manifestatio, & notitia criminis, quatenus ea facta est collatori: sed eatenus non est injusta, & potuit fieri ob bonum publicum. Si secundum: tunc præter famam debet pro rata spei compensari damnum beneficii, vel officii impediti, utpote quod ex injusta diffamatione, & publicatione criminis oritur. Lessius, de J. & J. L. 2. c. 12. n. 124. Lugo d. 18. de Restit. n. 92.

## §. II.

*An actio externa, quæ secundum se non est contra jus alterius, aut contra justitiam, fiat talis, si ea ponatur ex animo nocendi proximo?*

501 **N**OTA 1. Hic non esse quæstionem de actionibus illis, quæ ex se sunt indifferentes ad hoc, ut sint, vel non sint noxiæ proximo; nam certum est, tales per intentionem internam posse fieri injustas. Talis actio est acceptio v. g. mone-tæ, vel libri alicujus, quæ est indifferens, ut sit contra justitiam, vel non sit; si enim tollis monetam ex intentione, ut eam consideres, librum, ut Authorem ejus videas, non peccas contra justitiam: si autem pecuniam, vel librum arripis cum ani-



mo furandi, violas jus alterius, & obligaris ad restitutionem. En! quomodo sola intentio acceptionem pecuniæ, & libri, tanquam actionem indifferentem, possit ad hoc determinare, ut sit noxia proximo, & contra jus illius. Hinc

Nota 2. Quæstionem esse de illis actionibus externis, quæ ex se sunt quidem nocivæ, vel possunt esse noxiæ proximo, non tamen sunt secundum se contra jus alterius. Modo quæritur, an tales actiones saltem fiant injustæ, & restitutioni obnoxia, si eæ procedant ex mala intentione, si scilicet ponantur ex odio, studio vindictæ, & ex determinata intentione proximo nocendi? In exemplo: Judex in reum, quem juste condemnare potest, fert sententiam ex odio, invidia &c. Vel magis ad propositum: Titius sine vi, aut fraude, sed precibus & aliis mediis non injustis avertit Cajum, ne faciat testamentum in favorem Antonii: & hoc facit ex mero odio, invidia, aut aliis passionibus, quibus interne erga Antonium exagitur. Atque in hoc ultimo præcipue casu quæritur, an talis actio externa, secundum se non injusta, fiat injusta, & obligationem restituendi importet ob odium internum, & malevolum animum, ex quo ponitur?

Affero: Qui sine vi, vel fraudibus alterum impedit a consequendo bono aliquo, quod ipsi non est debitum ex justitia commutativa, non tenetur ad restitutionem, etsi hoc impedimentum ponat ex odio, aut mera prava intentione alteri nocendi. Imo universim non tenetur ad restitutionem, qui ex odio, aut malo sine ponit actionem externam, noxiam quidem alteri, non tamen repugnantem juri alterius, Lessius, Vogler, Antonius Mayr, Herincx disp. 5. de Just. q. 1. n. 6. La-Croix L. 3. p. 1. n. 148. Poncius noster, Sporer, Holzman, Elbl n. 108. & alii plures.

Prob. 1. Non inducitur onus restitutionis, nisi per actionem externam lædatur effective jus alterius: atqui etiam stante odio interno &c. per actionem talem externam, de qua hic est sermo, non lædatur effective jus alterius: ergo per talem actionem externam, etiam stante odio interno, non inducitur onus restitutionis. M. videtur constare; Justitia enim, quæ pri-



mario attendit æqualitatem, non vult reparari restitutione efficaci externa jus aliquod, quod non fuit efficaciter, seu effective læsum externe. m. vero prob. nam 1. ejusmodi actio externa secundum se, & præsciindendo ab odio interno &c., non lædit effective jus alterius, ut concedunt Adversarii, & status quæstionis supponit. 2. Neque sic lædit talis actio externa, quatenus est conjuncta cum odio; alias enim effective læderet justitiam, & ad restitutionem teneretur judex, qui fontem legitime convictum, ex odio condemnaret ad mortem; item carnifex, qui debite condemnatum ex prava intentione nocendi convenienti supplicio afficeret; atqui nullus ex his effective injuste agit, aut ad restitutionem obligatur, etsi ex odio, aut alia iniqua affectione procedat, ut fatentur omnes: ergo neque actio externa alioquin justa, seu non repugnans juri alterius, effective lædit justitiam, dum est conjuncta cum odio interno.

Prob. 2. Ex una parte obligatio restitutionis, quam in hoc puncto imponunt Adversarii, est valde gravis, ex altera parte non sufficienter probatur: ergo ea non datur.

503 *Objic. 1. Scotus 4. d. 15. q. 2. n. 40. §. ad ultimum dico.* videtur esse oppositus nostræ conclusioni: ergo. R. N. a. nam ut notant Cavellus ibi in Scholio, ac ex eo Herincx citatus, & Poncius d. 52. q. 2. n. 8. Scotus ibi explicari debet de actione fraudulenta, seu quæ fraudem involvit.

*Objic. 2. L. Fluminum. 25. §. finali. & L. Proculus. 26. ff. de damno infecto. & L. in summa. 2. §. 9. de aqua, & aquæ pluviæ arcendæ.* statuitur, eum infestari non posse per juridicam actionem, qui facit aliquid in ædificio, vel fundo proprio, v. g. qui fodit puteum, aut derivat torrentem, eo tantum animo, ut sibi proffit: secus, si faciat mero animo alteri nocendi: ergo malus animus, & sinistra intentio nocendi alteri est contra justitiam, & obligat ad restitutionem.

R. 1. N. a. quoad ult. membrum, si intelligatur de intentione qualicumque nocendi, & non conjuncta cum dolo externo, vel alia actione externa, repugnante juri alterius. R. 2. Pri-



Primæ duæ leges nullam mentionem faciunt de intentione : sed prima ait, quod non possim tam profunde fodere, ut murus tuus corruat : quod etiam verum est, etsi non adsit mala intentio ; quia talis suffossio per se injusta est, & repugnat juri alterius. Altera dicit, quod non liceat alteri damnum positive facere, bene autem liceat, impedire lucrum alterius, si scilicet tale lucrum non est debitum ex justitia, quod iterum nihil est contra nos. Tertia tandem lex vult, non licere torrentem sibi minime noxium avertere in agrum proximi ; hæc enim actio externa de se est injusta, & contra jus proximi : adeoque ista lex non loquitur præcise de intentione nocendi, quæ non esset conjuncta cum actione externa de se injusta. Adde, quod leges civiles per se non considerent intentionem internam, sed actionem externam, ex qua intentionem pravam inferunt.

Objic. 3. Per solam malam intentionem, accedentem operi externo, potest aliquis incurrere excommunicationem : ergo etiam per solam intentionem malam, accedentem operi externo, potest quis incurrere obligationem restitutionis. A. p. ex Clement. 1. §. Verum. ubi censuram excommunicationis fubeunt Inquisitores, dum ex odio, vel amore lucri temporalis negligunt ea, quæ ratione muneris facere deberent adversus hæreticos. R. D. c. si opus per intentionem fiat alteri nocivum C. c. si jam sit antecedenter nocivum, & simul non sit de se læsivum effective juris alterius N. c. Pœna excommunicationis potest ferri etiam ob alia peccata, quam injustitiæ : ast obligatio restitutionis tantum limitatur ad sola peccata externa injustitiæ, quibus effective læditur jus alterius.

Objic. 4. Qui alterum vi, vel fraude impedit ab officio, vel beneficio, tenetur ad restitutionem : ergo & ille, qui hoc facit ex odio. R. N. c. 1. enim, quod vis, metus, & fraus obsint juri alterius, & pugnent contra justitiam commutativam, consentiunt omnes DD. non ita conspirant circa odium, aut intentionem pravam internam. 2. Justitiæ finis præcipuus est indemnitas alienæ voluntatis, aut libertatis circa dispositionem rerum suarum ; atqui huic indemnitati opponitur vis, metus, ac fraus ; siquidem actio dolosa, vel violenta minuit, aut tollit vo-



luntatem alterius, & impedit Dominum a libero usu suarum facultatum, & bonorum sine legitima causa. Ast vero odium, vel intentio prava interna non sic lædit, aut restringit voluntatem, aut libertatem alienam quoad usum suarum facultatum & bonorum: ergo vis, metus, fraus, non autem intentio prava, aut odium, opponuntur fini justitiæ.

Objic. 5. Juxta Notandum primum aliqua actio externa propter solam intentionem internam potest fieri injusta, & obnoxia restitutioni: ergo sola intentio interna potest vitare actionem externam, & afferre obligationem restituendi. R. D. a. aliqua actio, quæ secundum se est indifferens, ut sit nociva, vel non nociva proximo, potest fieri injusta, & obnoxia restitutioni per solam intentionem C. a. aliqua actio jam antecedenter nociva, non tamen repugnans juri alterius N. a. &c. Si aliqua actio externa jam est nociva proximo, & tamen non opposita juri proximi, non fiet injusta, aut contraria juri alterius per quamcumque intentionem internam, ut patet in sententia juste a judice lata secundum leges; esto enim, judex moveatur mala mente ad ferendam talem sententiam: quia tamen ea est conformis legibus, & sic non repugnat juri alterius, talis judex non agit externe & effective contra justitiam, neque tenetur ad restitutionem. Aliud est de actione externa, quæ secundum se est indifferens, ut sit nociva proximo; hæc enim actio, uti per intentionem internam potest determinari ad hoc, ut noceat proximo, ita etiam per ejusmodi affectum & intentionem potest determinari, ut lædat jus alterius. Exemplum rei hujus habemus in Notando primo.

Objic. 6. Qui magis bibit ex hac prava intentione, ut sequatur pollutio, peccat contra castitatem, non peccaturus contra eam, si biberet quidem liberalius, non tamen intendere, sed solum permetteret ejusmodi effectum turpem: ergo etiam sic peccat contra justitiam, & ad restitutionem tenetur, qui positive intendit damnum alterius per actionem nocivam, etsi non peccaret alias, absente tali intentione. R. N. c. Pollutio per se opposita est castitati: adeoque ut ea fiat forma-



maliter peccaminosa, nihil aliud requiritur, quam voluntas, quæ habetur per ejusmodi intentionem pravam. At actio nociva proximo, de qua hic litigamus, de se non est opposita juri alterius, nec est de se injusta: consequenter, ut fiat actu, & effective injusta, ac formaliter obnoxia restitutioni, non sufficit sola intentio prava.

Ad alias objectiones solvendas nota 1. illa, quæ dicta sunt in Notando primo. Nota 2. Restitutionem non oriri ex quocumque affectu interno injustitiæ, sed ex injustitia externa effective illata, & effective externe damnificante. Hinc non multum disputo, an tale odium, vel intentio prava nocendi interdum ad injustitiam affectivam reduci possit, vel debeat: sed dico, ejusmodi actus internos etiam cum externis illis, de quibus loquimur, esse insufficientes ad inferendam obligationem restitutionis. Nota 3. Si damnum per accidens datum secundum se, præscindendo ab omni intentione & odio &c., non sit materialiter saltem contra jus alterius, non fieri injustum, & contra jus proximi per solam intentionem. Hinc ad casus ponendos, qui varii possunt esse, respondeatur semper sub conditione. v. g. in hoc casu, quem objicit, & solvit P. Vogler n. 412. Mulier prægnans, si sumit medicinam concomitanter occisivam proli, est homicida, si eam sumit ex intentione occidendi prolem. Hic enim casus sic distingui potest: est homicida, si aliunde ex circumstantiis, vel ex se, independentem ab intentione, talis medicina est injuste occisiva proli *conc.* secus *subd.* est homicida affective *transf.* effective, & externe *neg.*









§. I. De restitutione ex contractu, & quasi contractu. 721

fraude, aut certa & voluntaria malitia res commodata &c. apud commodatarium perit. 2. Potest perire ex culpa mere juridica, seu ex omissione alicujus diligentiae, ita tamen, ut non peccetur theologicè, saltem mortaliter. 3. Ex casu fortuito. Quid sit culpa theologica, & juridica jam superius est explicatum: modo tantum declaratur natura casus fortuiti. Quare

Nota 4. Ex casu fortuito tunc aliquid perire, quando ejusmodi interitus, jactura, damnum non potest humana providentia, aut diligentia prævideri, aut præcaveri: ut dum equus subito fulmine tangitur, aut alias in loco bene tuto positus rapitur a latronibus. In foro interno, & theologico etiam fortuitum dici potest. quod fit indeliberate, & sine sufficiente cognitione, consequenter sine culpa theologica: in foro autem juridico, & civili casus fortuitus pressius accipitur, & tunc solum contingit, quando nulla adest culpa juridica, & adhibita est omnis diligentia & providentia humana, quæ in simili negotio secundum leges civiles, ac jus naturale debuit adhiberi.

Nota 5. Per leges civiles sequentia esse ordinata circa restitutionem faciendam ex contractu oneroso. 1. Si alterius res sit apud te per contractum, qui in tuam solius utilitatem cedit, teneris refarcire damnum datum non solum ex culpa juridica lata, sed etiam ex levi, & levissima. Ita statuitur L. in rebus commodatis. ff. commodati. ibi: *Talis diligentia præstari debet, quam quisque diligentissimus Paterfamilias adhibet.* Excipitur tamen precarium; quamvis enim hoc cedat in utilitatem solius precario accipientis rem alienam, tamen est revocabile ad nutum a dante. Quare sic accipiens non debet præstare culpam levem, aut levissimam, sed tantum dolum, & culpam latam. L. contractus. ff. de Regulis Juris.

2. Quando contractus cedit in utilitatem solius dantis, recipiens tenetur solum ex dolo, & culpa lata; ut si quis apud te deponat suam pecuniam absque commodo tuo, si ea pereat sine dolo, aut culpa lata tua, etsi commiseris culpam levem, aut levissimam, non teneris compensare damnum. L. 32. ff. depositi.



3. Quando contractus cedit in utilitatem utriusque contractantis, dantis scilicet & accipientis, ut quando locatur domus, ubi unus accipit pretium pro domo elocata, & alter domo utitur ad suum commodum, tunc accipiens tenetur ad restitutionem ex culpa lata, & levi, non autem ex levissima. L. 5. §. 2. & L. 18. ff. *Commodati*.

Nunc autem restat duplex difficultas: 1. An, & quomodo ex contractu debeat præstari casus fortuitus: 2. Quomodo allegatæ dispositiones juris in foro conscientiæ sint receptæ? Hinc sit

## §. II.

*An casus fortuitus, & culpa juridica debeat præstari ex contractu?*

505

ASSERO 1. In contractibus, in quibus dominium rei acceptæ non transfertur in accipientem, ut in commodato, locato &c. accipiens per se, & regulariter non tenetur ad restitutionem ex casu mere fortuito. Communissima. P. 1. ex cap. un. de *Commodato*. ubi dicitur: *Fortuitus autem casus, nisi interveniat culpa vel pactum, vel nisi in mora fuisset commodatarius, non est illi imputandus.*

P. 2. Casus fortuiti per nostram diligentiam, & providentiam nequeunt præcaveri: ergo non videtur æquum, ut per se loquendo aliquis teneatur resarcire rem alienam, casu fortuito apud se pereuntem. Adde, quod nullum exstet jus naturale, aut positivum, ex quo aliquis teneatur ad præstandum casum mere fortuitum. Unde quasi regulæ loco habetur: *Res, quæ fortuito perit, Domino suo perit.*

Dixi in Assertionem: *per se, & regulariter*; nam excipe 1. nisi speciale pactum accesserit de præstando casu mere fortuito; ita enim limitat cap. un. de *Commodato*. mox citatum. Accedit ratio: quia tale pactum supponitur esse justum: ergo etiam de jure naturæ, & in foro conscientiæ observandum erit. Advertendum tamen, ejusmodi obligationem restituendi descendere immediate ex illo pacto, quod specialiter est factum de præ-



*§. II. De restitutione ex contractu, & quasi contractu. 723*

præstando casu fortuito. Atque tale speciale pactum semper licite & juste exigit Dominus in gratuito commodatis, & similibus, non tamen in locatis pro justo pretio; quia supra justum pretium non potest exigi aliquid pretio æstimabile: atqui obligatio præstandi casum fortuitum est pretio æstimabilis: ergo eam Dominus supra justum pretium pro re sua elocata non potest exigere ab altero, cui elocat rem suam. Ita recte argumentatur Holzman t. 2. de Restit. n. 421.

Excipe 2. Nisi commodatarius, vel alius, qui rem alienam ex contractu habuit, fuerit in culpabili mora restituendi. Ita iterum Capitulum laudatum. Rationem addit P. Vogler: quia in tali casu tenetur præstare casum fortuitum vel ob injustam detentionem: vel si vult injustitiam effugere, debet contractu implicito se obligare etiam ad casum fortuitum præstandum.

Excipe 3. Nisi commodatarius, vel alius, qui rem alienam ex contractu habuit, ea non fuerit usus modo, aut loco debito, v. g. alio modo, quam fuerat conventum, vel alio loco, præsertim si illo in loco, ubi majus periculum damni erat, eam asservavit contra pactum initum.

Petes: An e. g. commodatarius tunc in foro conscientie teneatur ad præstandum casum fortuitum, ex sua mora secutum, quando bona fide credidit, Dominum non fore invitum, si re ejus diutius utatur, quam erat conventum. R. Probabiliter negative, dummodo quasi certo, vel saltem probabilissime sibi persuaserit, Dominum non esse rationabiliter invitum quoad ejusmodi moram, vel usum, aut modum utendi alium. Vogler de Restit. n. 141. citans Cardinalem de Lugo d. 8. n. 124. Ratio est hæc: quia ejusmodi mora, aut modus utendi non est culpabilis: neque videtur intervenire pactum implicitum de præstando casu fortuito, eo ipso, quod bona fide credatur, Dominum sine ejusmodi pacto non esse invitum quoad moram, aut modum utendi talem. Dixi: dummodo quasi certo, aut probabilissime sibi persuaserit, Dominum non esse invitum; secus enim contractu implicito se debet obligare ad præstandum casum fortuitum: aut certe non effugit culpam, & peccatum



per moram suam, aut modum illum alium utendi. Adeoque vel ex contractu, vel certe ob peccatum iniustitiæ commissum in mora, tenetur compensare damnum etiam fortuitum, ex ejusmodi mora proveniens.

506

Objic. 1. Videtur contra naturalem æquitatem, ut Dominus solus sustineat damnum rei suæ, apud te casu fortuito pereuntis: ergo. Ant. videtur constare; nam non censetur æquum, ut Dominus reportet damnum ex beneficio tibi exhibitum per commodationem rei suæ. R. 1. Retorq. Argum. Neque videtur æquum, ut commodatarius, vel alius teneatur compensare damnum, ex nulla sua culpa secutum: ergo. R. 2. N. a. Ratio negandi habetur 1. ex retorsione. 2. Quia hoc est plane per accidens, quod ex suo beneficio damnum patitur commodans. 3. Dominus nollet esse ex iustitia obligatus ad præstandum casum fortuitum, si forte aliquando ipsi aliquid commodaretur: ergo neque potest prudenter velle, esse ita obligatum alium; nam, quod tibi non vis fieri, alteri ne feceris. Hæc tamen intellige extra pactum speciale affecurationis commodato adjectum. 4. Commodans, quando rem suam concedit tantum in utilitatem alterius, vult ei præstare beneficium singulare: quale tamen revera non esset, vel saltem plurimum diminueretur, si commodatarius deberet etiam præstare casus fortuitos.

Objic. 2. Saltem, quando contractus cedit in utilitatem utriusque contrahentis, videtur æquum, ut damnum fortuito secutum dividatur: ergo. A. p. uterque contrahens ex tali contractu percipit commodum: ergo æquum est, ut uterque portet damnum, ex casu fortuito secutum. R. N. a. ad prob. N. c. Rationes negandi habes tum ex probationibus nostris, tum exinde; quia naturæ repugnat, ut compenset alterius damnum ille, qui nec culpam theologicam, nec juridicam commisit.

Objic. 3. Saltem præstandus est casus fortuitus a commodatario, vel alio ejusmodi, qui ex contractu accipit, aut detinet rem alienam, quando res traditur æstimata: ergo. A. p. ex L. *Si ut certo loco*. 5. §. 3. ff. *Commodati*. & ita sentiunt Bartolus, Antonius Gomez, & alii cum Glossa. R. D. a. Si traditur



§. II. De restitutione ex contractu, & quasi contractu. 725

ditur res æstimata æstimatione faciente venditionem, vel si constat, æstimationem ideo esse factam, ut totum periculum esset penes accipientem, & non penes Dominum C. a. secus N. a. Responsio hæc videtur colligi ex ipsa lege citata, quæ ita habet: *Etsi forte res æstimata data sit, omne periculum præstandum ab eo, qui æstimationem se præstaturum recepit.*

Objic. 4. Mutuatarius tenetur ad restitutionem, etsi pecunia mutuo accepta casu fortuito pereat: ergo. R. N. c. In contractu mutui transfertur dominium in Mutuatarium: ergo mutuatario talis pecunia perit; quia, quidquid fortuito perit, Domino perit. Conclusio autem nostra per se loquitur de contractibus illis, in quibus non transfertur dominium.

Objic. 5. Res, quæ perit fortuito, non semper Domino perit. ergo. A. p. Si res aliqua est vendita, & nondum extradita, manet sub dominio venditoris: & tamen, si perit, emptori, & non venditori perit, ut patet ex variis legibus, juxta quas emptor pretium debet solvere, etsi res emptæ ante traditionem perierit apud venditorem. Quare emptor debet totum damnum terre, solvendo pretium pro re aliena, quæ periit: ergo res, quæ perit fortuito, non semper Domino perit: consequenter nostræ probationes non subsistunt. R. N. a. ad prob. d. a. si res determinata sit absolute vendita, & nondum extradita, manet sub dominio venditoris, ita tamen, ut fictione juris quoad commoda & pericula talis rei emptæ ipse emptor censeatur Dominus C. a. secus N. a. Quamvis emptor ejusmodi rei non sit Dominus absolute, & quoad omnes effectus dominii, est tamen Dominus fictione juris quoad commoda, vel pericula, meliorationem aut deteriorationem rei determinatæ, ac absolute venditæ: de quo plura in Tractatu de contractibus.

Objic. 6. Jus Bavaricum *Landrecht*. T. 17. art. 1. vult, ut Dominus non sustineat totum damnum, si res fortuito apud commodatarium pereat, sed debet commodatarius cum Domino transigere: ergo. R. 1. Hoc tantum esse de jure Bavarico, non autem de jure communi. R. 2. Neque hæc juris Bavarici constitutio obligat ante sententiam judicis in conscientia, uti collige-



ligetur ex dicendis num. seq. ; si enim culpa mere juridica in foro conscientiae non debet praestari ante sententiam judicis , minus praestari debet casus mere fortuitus.

507

Affero 2. Per se loquendo nemo sub gravi tenetur ad restitutionem in contractibus ante sententiam judicis , nisi ex culpa theologica gravi : tenetur tamen post sententiam. Lugo , Sporer , Herincx , Vogler , Elbl , Holzman , ac alii plurimi ex modernis contra Communiorem saltem antiquorum , ut vult Lessius , docentem , leges praedictas de contractibus §. praec. allatas , obligare in conscientia etiam ante omnem sententiam judicis.

Prob. 1. Lex Aquilia , & leges noxales non obligant ante sententiam judicis : ergo neque istae de contractibus ; est enim par ratio. A. patet ex dictis.

Prob. 2. Hae leges vel non intendunt obligare ante iudicis sententiam , vel si intendunt ita obligare , non sunt in hoc rigore receptae : ergo. Ant. constat ex praxi ; nullus enim commodatarius facit sibi scrupulum exinde , quod non compenset damnum secutum ex culpa sua levissima , quando in custodienda re commodata adhibuit diligentiam , quam diligentiores adhibent , etsi non adhibuerit illam , quam impendere solent diligentissimi.

Prob. 3. Sicut in foro externo secluso contractu requiritur aliqua culpa juridica , ut possit imponi restitutio , ita ut & in foro interno & theologico possit aliquis adigi secluso contractu , & sententia judicis ad restitutionem , requiritur culpa theologica , & quidem gravis , si grave damnum est compensandum : ergo &c.

Prob. 4. Quando ex casu fortuito res aliena perit apud commodatarium , non est obligatio , etiam in foro civili , eam compensandi : ergo etiam , quando ex aliqua indeliberatione res aliqua perit apud eundem , non tenetur ad damnum compensandum in foro theologico ; eoquod in foro theologico casus fortuitus , & casus ille , qui ex indeliberatione , vel defectu plenae advertentiae accidit , parum differre videantur. Videantur quoque pro-



*§. II. De restitutione ex contractu, & quasi contractu. 727*

probationes n. 482. positæ, quæ omnes cum proportionem hic applicari possunt.

Pars altera Assertionis etiam probata manet ex dictis num. 483. Accedit, quod saltem per contractum aliquis se obliget ad præstandam etiam culpam juridicam secuta sententia.

Objic. 1. Quomodo leges obligent, præcipue debemus intelligere ex interpretatione, & sensu DD. atqui isti communissime fatentur, leges de contractibus obligare etiam ante sententiam judicis ob culpam mere juridicam, levem, & levissimam: ergo. R. 1. Et si antiqui DD. plus sententiæ contrariæ subscripserint, tamen autoritate modernorum fat gravi & magna quoque munitur nostra sententia. 2. Authores antiqui, saltem plures ex iis, videntur posse intelligi de culpa quidem absolute levi, vel levissima, respective tamen gravi, & omnino mortifera, vel ut plerumque cum peccato mortali conjuncta. 3. Non solum ex autoritate, sed etiam ex praxi, & aliis adminiculis potest desumi interpretatio legum. R. 2. in forma tr. M. d. m. ita tamen, ut sufficiens autoritas, ac rationes valde graves, aut omnino graviores pro nostra sententia stent. C. m. secus N. m. & c. 508

Objic. 2. Contrahentes videntur se implicite obligare ad præstandas culpas juridicas secundum præscriptum legum: ergo. R. N. c. nam leges non præscribunt, ut præstentur istæ culpæ ante sententiam judicis, vel si præscribunt, non sunt in hoc sensu receptæ.

Objic. 3. Etiam vi juris, & luminis naturalis est major obligatio custodiendi res alienas, concessas in meram nostram utilitatem, quam illas, quas tantum accepimus ob commoditatem, & utilitatem aliorum: ergo si jure naturali præstari debet culpa lata, & theologica mortalis in contractu, qui cedit in utilitatem alterius, tunc etiam culpa juridica levis, & levissima vi ejusdem juris præstari debebit in contractu, qui cedit in utilitatem solius accipientis. R. N. c. Ex hac objectionem solum sequitur, quod ad evitandam culpam mortalem major diligentia requiratur in uno contractu, quam in altero. Sic ipsa lex natura-



turalis videtur sub culpa, etiam theologia, obligare, ut majorem diligentiam impendamus rei alienae, nobis ex contractu in nostram tantum utilitatem concessae, quam illi, quae & nobis accipientibus, & danti cedit in commodum: uti & major diligentia requiritur in re aliena pretiosa custodienda, quam alia, quae est minoris aestimationis. Unde & minor negligentia in re pretiosa asservanda, & custodienda peccatum mortale efficere potest. Non autem sequitur, quod sine omni culpa theologia mortifera gravis adsit obligatio, compensandi damnum, ex culpa mere juridica datum.

**Objic. 4.** In emptione & venditione venditor in conscientia, & ante sententiam judicis ad evictionem tenetur, modo res emptori per sententiam evicta fuerit: ergo etiam in quolibet contractu ante sententiam judicis, & in conscientia praestanda est culpa juridica C. p. Ideo tenetur venditor ad evictionem, quia haec obligatio est inter naturalia contractus venditionis: atqui etiam praestatio culpae juridicae videtur esse inter naturalia diversorum contractuum, qui quandoque majorem diligentiam ex natura sua exigunt: ergo.

Ante responsionem nota, evictionem esse, quando Dominus rem suam, tibi a non Domino, v. g. fure, venditam, per sententiam judicis vindicat, & sibi recuperat. In quo casu ille, qui tibi vendidit ejusmodi rem non suam, seu alienam, tenetur ad evictionem: & quidem, si mala fide, seu sciens, quod res sit aliena, eam tibi vendidit, tunc post evictionem tenetur non solum ad restitutionem pretii tibi emptori faciendam, verum etiam ad interesse, seu ad resarciendum damnum, & lucrum cessans, quod pateris ob ejusmodi evictionem. Si autem venditor nescivit, esse rem alienam, & bona fide processit, tunc in foro conscientiae, & ante sententiam tenetur tantum ad refundendum pretium. Et hoc ideo, quia hoc in isto contractu, ultro citroque obligante, tacite includitur, ut venditor emptorem indemnem servet quoad rem emptam, sicut & emptor debet venditorem indemnem servare quoad pretium. Unde

R. N. c.



§. III. De restitutione ex contractu, & quasi contractu. 729

R. N. c. & parit. similis enim obligatio præstandi culpam mere juridicam in foro conscientiae non potest ostendi ex lege positiva, aut naturali, prout tamen ea ostenditur circa evictionem &c.

§. III.

De Obligatione restituendi ex quasi contractu, & aliis huc pertinentibus.

NOTA: Quasi contractum vocari illum, in quo non intervenit formalis, & explicita, sed tantum implicita, & virtualis voluntas se obligandi. Quinque species quasi contractuum enumerantur Instit. de Obligationibus, quæ ex quasi contractu nascuntur. nimirum: negotiorum gestio, tutelæ administratio, cura communis rerum, hæreditatis aditio, & indebiti solutio. Communiter tamen defacto nomen quasi contractus ad quodvis munus, ac officium Gubernatoris, Judicis, Medici, Advocati, imo cujuslibet opificis & artificis: item Episcopi, Parochi, Confessarii &c. extenditur; nam omnes, qui in se suscipiunt aliquod munus, virtualiter ac interpretative sese obligant ad debitam in ejus functione diligentiam adhibendam. H. N.

Affero: Nemo per se loquendo obligatur ex quasi contractu ad compensationem damni gravis, nisi ob culpam theologice gravem. Lessius, Lugo, Mezger, Herinx, Holzman, Vogler, ac alii quam plurimi. Probatur hæc Assertio iisdem argumentis, quæ fuerunt adducta num. 485. 509

Objic. 1. Nostra sententia est contra leges, & contra Communem Authorum: ergo. R. 1. opponendo alios plurimos Auctores modernos, qui communiter defendunt nostram sententiam, quidquid sit de antiquis. R. 2. Leges loquuntur de obligatione restituendi secuta sententia. R. 3. eodem modo, sicut respondi num. 508. ad objectionem primam.

Objic. 2. Qui pro mercede & stipendio servit, ad majorem diligentiam tenetur, quam ille, qui gratis servit; sed ille, qui gratis servit, tenetur ita esse diligens in suo officio, ut



evitet omne peccatum grave, & culpam latam juridicam, alias obligandus ad restitutionem: ergo ille, qui servit pro mercede, tenetur etiam evitare culpam levem, & venialiter peccaminosam, alioquin erit ad restitutionem obligandus,

R. 1. Quamvis Officialis, vel famulus mercede conductus teneatur ad ampliorem diligentiam, quam alius, qui pure gratis servit, nihilominus non debet majorem diligentiam adhibere, quam communiter solent alii Officiales mercede conducti; atqui tales communiter tantum solent adhibere illam diligentiam, qua evitatur culpa lata, ac theologicè gravis. Plane pessime consultum foret Medicis, etiam pro mercede servantibus, si cogerentur ad restitutionem, quoties per ignorantiam, aut inadvertentiam venialiter culpabilem causa sunt acceleratæ mortis: uti & Judicibus, qui moraliter evitare nequeunt culpas, omnes theologicè leves in decidendis, & tractandis causis forensibus &c. Et certe, cum facile committantur similes negligentiae venialiter culpabiles, omnes fere timorati abhorrerent ab acceptatione munerum publicorum, si compensari deberent damna, data per ejusmodi venialiter culpabilem negligentiam. R. 2. Ex hoc solum sequitur, quod apud Officiales stipendio conductos ad constituendum peccatum mortale sufficiat minor negligentia, quam apud illos, qui gratis serviunt, vel liberaliter aliquod munus administrant. Hinc in forma R. 3. D. M. ad majorem diligentiam tenetur, ita tamen, ut nunquam ad restitutionem sub gravi obligetur, nisi commiserit negligentiam graviter theologicè culpabilem c. M. fecus n. M.

Dixi in conclusione: *per se loquendo*; per accidens enim interdum in quasi contractu oriri potest gravis obligatio præstandi culpam respectivè levem, & levissimam, ac tantum venialiter, vel omnino in foro theologico non peccaminosam: 1. in casu, quo quasi contractui adjicitur pactum assicurationis de præstandis ejusmodi culpis tantum juridicis, imo etiam de casibus fortuitis. 2. Quando artifex, vel officialis se jactat peritior aliis, sicque efficit, ut alii magis periti relinquantur, ac ipse assumatur cum periculo non modici damni, quod alii inde possunt incurrere. Quo in casu ejusmodi Officialis tenetur ad



*§. III. De restitutione ex contractu, & quasi contractu. 731*

adhibendam exactissimam diligentiam, ut damna aliorum evitentur; secus ad restitutionem erit obligandus. 3. Quando aliqua res exigit diligentiam exactissimam, ut si sit negotium magni momenti. Verum in duobus ultimis casibus rectius dicitur, negligentiam etiam modicam, & culpam absolute levem posse sæpe esse latam, & theologice gravem. Ex dictis

Colliges: Custodes ædium, aut vinearum &c. qui per negligentiam venialem duntaxat fores relinquunt apertas, cujus occasione alii intrantes grave damnum inferunt, non teneri ad compensationem talis damni. Sequitur ex dictis; quia scilicet non est commissæ culpa gravis: ergo neque videtur propterea imponenda obligatio refarciendi damnum grave, præsertim quia neque gravitas materialis hujus damni plene est cognita.

Quæres: An in communi periculo incendii, tempestatis, naufragii &c. teneatur aliquis rem alienam, quam possidet ex contractu, præferre rebus propriis, ita, ut si salvare nequeat utramque, teneatur potius periculo eripere rem alienam, quam propriam? Casus sit: Petrus habet apud se depositas plures res alienas: incenditur domus ejus, ac in periculo interitus est omnis substantia sua, una cum rebus illis alienis apud se depositis. Modo quæritur: an si res suas, & alienas non possit simul salvare, teneatur potius incendio eripere res alienas depositas, quam proprias? H. N. ad quæsitum.

R. 1. Si res propria sit æque pretiosa, vel omnino pretiosior, quam aliena, tunc in foro interno non est obligatio salvandi rem alienam præ propria. Ita Elbl de Restit. n. 157. & Holzman ibid. n. 422. cum Communi aliorum. Ratio est: quia in contractu quocumque nemo se obligare præsumitur ad expensas extraordinarias, in conservatione rei alienæ faciendas: atqui, si deberet aliquis pro conservatione rei alienæ expendere, & perdere res proprias æque pretiosas, vel omnino pretiosiores, eo ipso teneretur ad expensas extraordinarias: ergo. M. constat; quia nemo vult potius conservare rem alienam, quam propriam in pari periculo. Plane amor ordinatus erga seipsum suadet, ut quis in tali periculo potius suis, quam alienis rebus consulat.

Zzzzz

R. 2.



R. 2. Si ex amissione tuarum rerum, etiamsi non sint ita pretiosæ, ut alienæ, debeas subire notabile ac grave damnum, non teneris, res alienas in tali periculo tuis præferre, nisi sis moraliter certus de damno tuo resarciendo. Sporer, Holzman, & alii apud istum citati. Ratio est eadem, quæ prior; quia nemo censetur, se velle per contractum obligare ad custodiendas, & servandas res alienas cum notabili damno suarum rerum, nisi forte bonum publicum, vel altior quædam ratio contrarium exposcat.

Petes: Unde erit colligendum, quod ejusmodi detrimentum sit notabile? R. Per virum prudentem debere pensari tuam, & alterius jacturam: item tuam paupertatem vel indigentiam, & alterius, cujus res apud te deposita est, divitias. 2. debere quoque attendi, an contractus sit in tui gratiam solum factus, vel etiam in alterius? si in tui solius gratiam res aliena ex contractu apud te existit, tunc æquitas naturalis exposcit, ut pro ea servanda majus damnum subeas, quam si tantum in commodum alterius apud te esset deposita. Ita recte Tamburinus explicationis Decalogi L. 8. t. 3. c. 5. §. 3. n. 6. Ex his

Resolves 1. hunc casum: Joannes inops Paterfamilias 100. tantum aureis sine spe uberioris fortunæ se, suamque familiam ægre sustentat. Hos igitur 100. aureos non obligatur amittere, ut servet gemmam prædivitis cujusdam Principis, valentem decem millia aureorum, nisi certus sit, quod damnum suum 100. aureorum sibi refundendum sit a Principe. Tamburinus cit. n. 5.

Resolves 2. Te non excusari a conservatione rei alienæ, quæ valet mille, si times jacturam unius aurei. Elbl cit. Ba-  
benstuber t. 7. d. 4. Art. 3. n. 41. Hoc saltem verum est, nisi aliæ speciales circumstantiæ interveniant, quæ jacturam etiam unius aurei valde notabilem reddant. Ratio hujus est: quia unus aureus, licet in se sit materia gravis, & sufficiens ad peccatum mortale furti: non est tamen notabilis in casu, & prout hic to *notabilis* sumitur: seu non est magna, & notabilis respective, seu respectu summæ 1000. aureorum: atqui hic per damnum notabile non qualecumque, sed respective notabile intelligi debet: ergo. Jam ad quæsitum supra positum.

R. 3.



*§. III. De restitutione ex contractu, & quasi contractu. 733*

R. 3. Si res tua sit admodum vilis, & ex hujus amissione non patiaris magnum detrimentum, tunc teneris rem alienam e periculo eripere, etsi tua pereat. Tamburinus cit. n. 7. Elbl, ac Holzman pariter cit. cum aliis. Ratio est: quia semper in ejusmodi contractibus imbibitur obligatio custodiendi res alienas, quando moraliter & prudenter possunt custodiri: atqui in casu responsionis hujus possunt moraliter & prudenter custodiri, & servari, cum tuum damnum, quod propterea subire debes, sit exiguum: ergo.

Hoc etiam notes, quod alter, cujus rem servasti cum detrimento tuæ, teneatur tibi, tanquam utili suorum negotiorum gestori, damnum hoc exiguum, quod incurristi, compensare. Imo Tamburinus laudatus n. 8. judicat, si prævideas, Dominum tibi non soluturum pretium tuæ rei vilioris, te non teneri ex justitia servare rem illius pretiosiore cum jactura tuæ vilioris. Ratio est: quia te in servanda re alterius non videris obligasse ad patiendum detrimentum proprium sine hujus refusione. Hoc tamen intellige, nisi detrimentum esset adeo exiguum, ut judicio prudentis censereris, te ad illud subeundum obligasse. Existimat ulterius laudatus Author, etsi ex justitia non obligeris, saltem ex charitate te teneri ad patiendum tale damnum ob conservandam rem alienam notabilem, & pretiosam. Ratio est: quia charitas dicat, ut subveniamus gravi damno proximi, quando sine notabili nostro detrimento possumus.

Observe etiam, has resolutiones solum procedere de foro interno: siquidem in foro externo jura præsumunt, quod quis res suas liberans, alienas vero negligens, dolo malo procefferit, & consequenter in tali foro condemnabitur ad restitutionem. Holzman cit. cum aliis.







## ARTICULUS V.

*De obligatione restituendi ex damno per ignorantiam, errorem, aut per accidens dato.*

### §. I.

*De damno per accidens, & præter intentionem dato, per restitutionem iterum reparando.*

**N**OTA, varios posse contingere casus, ubi ex aliqua actione per accidens præter intentionem, & advertentiam sequitur aliquod nocumentum alteri in bonis fortunæ, honoris, aut omnino vitæ: ut si honestæ venationi incumbens, trahias præter opinionem tuam aliquem hominem, utpote quem invincibiliter credidisti feram: & sic de aliis pluribus. An ergo in ejusmodi damnis per accidens, & præter intentionem contingentibus sit restitutionis obligatio, per sequentia quæsitā breviter expedietur. Igitur

**511** Quæres I. An vacans operi licito, v. g. honestæ venationi, alteri præter intentionem, & ex ignorantia invincibili dans damnum, ac lædens ipsius jus, teneatur ad restitutionem?

R. I. negative. Prob. I. Juxta Can. *quantum*. 48. d. 50. & cap. finale *de injuriis*. non obligatur restituere, *qui nihil de contingentibus ad præcavendum damnum omisit*. Atqui nihil censetur omisisse, qui damnum dedit in illa contingentia & circumstantia rerum, in qua damnum ob ignorantiam invincibilem non potuit prævideri: ergo.

Prob. 2. Infans, vel amens dans aliquod damnum, non tenetur ad restitutionem, quia non habent cognitionem talis damni: ergo, quia adultus procedens ex ignorantia invincibili, ac præter intentionem, etiam non habet cognitionem damni, hinc neque iste tenetur ad restitutionem.

Prob.



*§. 1. De restitut. ex damno per accidens, aut error. &c. dato. 735*

Prob. 3. Talis homo non tenetur ex titulo rei acceptæ; suppono enim, quod nihil de re aliena, in qua damnificavit, ad ipsum pervenerit, sed tota res sit consumpta, vel destructa: neque tenetur ex radice injustæ acceptionis; nam culpa injustæ acceptionis debet esse voluntaria; atqui voluntaria non est, nisi damnum ejusmodi fuerit præcognitum; cum nihil voluntarium, aut volitum sit, nisi fuerit præcognitum.

Ex quo habes, illum, qui in venatione occidit hominem, quem invincibiliter, & omni cautela adhibita putat esse feram, in omni foro absolvi ab homicidio, nec teneri ad restitutionem.

R. 2. Præcedens resolutio etiam vera est in casu, quo damnum ex errore invincibili inferens, habitualiter aut actualiter animo est ita comparatus, ut vellet injustum damnum causare, dummodo suppeteret occasio damnificandi. v. g. Petrus credit quidem invincibiliter, animal illud, in quod exonerat sclopetum, esse feram, interne tamen optat, ut ejus loco adesset Paulus inimicus, quem occidendi maximum affectum habet. Et ecce; facta explosioneprehendit, se revera non feram aliquam, sed hominem, & quidem Paulum inimicum suum petiisse, & occidisse. In hoc casu Petrus peccavit quidem graviter ob internum affectum homicidii: non tamen censetur peccasse peccato externo homicidii, neque obligatur ad restitutionem ob damna. ex occisione Pauli aliis emergentia. Ita Elbl de Restit. n. 86. & Communis aliorum. Ratio est; quia ob merum affectum internum aliquis non obligatur ad restitutionem, sed requiritur, ut damnum externum sit deliberate & voluntarie positum: atqui in casu hujus Assertionis damnum, v. g. homicidium, non est voluntarie & deliberate positum, quia non fuit præcognitum: ergo.

Neque obstat affectus pravus internus; hic enim non est efficax, & absolutus, sed tantum inefficax & conditionatus, ac concomitans, nec dirigit efficaciter & effective actum externum: ergo neque in eum influit. Ant. constat; quia efficaciter non solet intendi, quod non cognoscitur, vel quod hic & nunc non cognoscitur possibile: atqui in simili casu damnificans non cognoscit, sibi esse possibilem occisionem sui inimici, eoquod  
ere-



credat, inimicum suum non esse præsentem, sed potius feram: ergo. Paucis: ex affectu illo interno, & prava dispositione animi solum sequitur, quod occisio hominis fuisset volita, & voluntaria, si fuisset cognitus inimicus: non autem sequitur, quod nunc fuerit actu, absolute & efficaciter volita, ac voluntaria: imo cum Petrus non sciverit inimicum præsentem, potius sequi debet, quod occisio inimici non fuerit efficaciter volita.

512

Quæres 2. An etiam dans operam rei prohibitæ, vel illicitæ, & inde per accidens, ac præter intentionem causans alteri damnum, teneatur ad restitutionem? R. I. Dans operam rei illicitæ, quæ est tantum contra alias virtutes, non autem justitiam, & inde per accidens, ac præter intentionem damnificans alterum, non tenetur ad compensationem ejusmodi damni per accidens dati. Casus est: Sempronius die festo contra præceptum Ecclesiæ laborat in officina fabrilis, & præter omnem opinionem, ac prorsus improvise excitat incendium, & comburit aedes sui proximi. Quo in casu non tenetur ad restitutionem damni, proximo illati. *Prob.* Sempronius in hoc casu non peccavit contra justitiam formaliter: ergo ex titulo injustæ damnificationis non potest obligari. *Ant.* constat; peccavit enim solum contra præceptum Ecclesiæ, non autem contra justitiam, eoquod damnum secutum, & incendium nullo modo fuerit prævisum, & omnino involuntarium.

Neque obstat, quod labor fuerit voluntarius; nam esto, quod labor in se fuerit voluntarius, non tamen fuit voluntarius secundum circumstantiam incendii exinde secuti. Et sæpe peccatum secundum se est voluntarium, non autem secundum suas circumstantias invincibiliter ignoratas: ut si aliquis peccet cum ligata, quam invincibiliter putat solutam, talis non excusatur a peccato carnis secundum se, excusatur tamen a gravi ejusdem peccati circumstantia, scilicet ab adulterio.

Objic. Clericus, qui dat operam rei illicitæ, & exinde præter intentionem est causa mortis, punitur in jure ut homicida; fit enim irregularis, quamvis opus prohibitum, quod exercuit, non sit contra justitiam, sed aliam virtutem: ergo  
eti-



*§. I. De restit. ex damno per accidens, aut errorem Sc. dato. 737*

etiam talis dans operam rei illicitæ, et si ea non sit contra iustitiam, potest obligari ad restitutionem, quando ex tali operatione illicita per accidens sequitur damnum proximi. Ant. patet ex cap. *Tua nos. 19. de Homicidio*. Ubi Monachus Sacerdos, cæteroquin artis chirurgicæ peritus, ac nullam gravem negligentiam in curando infirmo committens, pronunciatur irregularis, quia, dum chirurgiam contra prohibitionem Ecclesiæ exercuit, & strumam gutturis incidit, per accidens ex tali incisione infirmus est mortuus.

R. N. c. & parit. Irregularitas enim potest incurri ob specialem juris dispositionem, ubi non incurritur obligatio restitutionis. Et talis specialis juris constitutio habetur circa Clericos; nam ut hi fierent remotiores a periculo homicidii, statuit Ecclesiæ, ne ullo modo, quando alii sæculares in arte periti adsunt, chirurgiam exercent, saltem quoad aduersionem, abscissionem, & incisionem, utpote in quibus actionibus majus, & frequentius videtur subesse periculum mortis. Addidit etiam pœnam irregularitatis, a transgressoribus Clericis incurrendam, secuta morte, ex tali aduersione, incisione &c., de quibus vide Reiffenstuel T. 13. d. 3. q. 2. in Additionibus ad n. 23.

Dices: In prædictis casibus irregularitas incurritur ut pœna propter homicidium voluntarium: ergo ipsum homicidium per accidens secutum ex actione illicita jam est sufficienter voluntarium. At, si est sufficienter voluntarium, tunc nostra ratio nihil probat. R. 1. N. a. Irregularitas in ejusmodi casibus non incurritur ut pœna propter homicidium voluntarium, sed incurritur propter opus illicitum, & prohibitum, scilicet propter aduersionem factam contra præceptum Ecclesiæ, ita tamen, ut homicidium requiratur tanquam aliqua conditio sine qua non; homicidium enim, utpote nec in se, nec in causa prævisum, non potest esse voluntarium. R. etiam 2. d. a. irregularitas imponitur propter homicidium re ipsa, & in se voluntarium N. a. propter homicidium interpretatione legis voluntarium C. a. Homicidium equidem in se non est voluntarium: lex tamen illud interpretatur esse voluntarium; quia oritur ex actione aliqua, quæ specialiter est prohibita ob periculum homicidii.



Jam ad quæsitum 2. R. 2. Si ex opere tuo etiam formaliter injusto, ac læsivo juris alterius per accidens, & præter intentionem sequatur adhuc aliud damnum, cum priore ex natura sua non connexum, nec ex eo communiter, aut valde frequenter sequi solitum, non teneris ad reparationem damni posterioris. Vogler n. 170. pro se allegans plurimos primæ notæ DD. Elbl de Restit. n. 87. ac Communissima aliorum contra Mastrium in Theol. morali d. 9. q. 2. n. 30.

Casus hujus responsionis declarativus sit: Cajus cum lumine alterius domum nocturno tempore fuit ingressus animo furandi, & actu furatus est: diligenter tamen cavit, ne incendium oriretur: idque nihilominus ob inculpabilem ipsius incuriam fuit exortum. Hoc igitur in casu tenetur quidem restituere ea, quæ furto furripuit, non autem quæ incendio perierunt.

Prob. Damnum hoc posterius nullo modo est voluntarium: ergo nullo modo est restitutioni obnoxium. A. p. non est voluntarium in se & directe; quia non est prævisum, nec intentum. Neque est voluntarium indirecte, & in causa; nam effectus ordinarie non dicitur volitus, aut voluntarius in causa, nisi per se, ac necessario, vel communiter & valde frequenter oriatur ex tali causa, & ex hac cognoscatur oriturus: atqui iterum supponitur, quod talis effectus, & damnum posterius non per se, neque communiter &c. oriatur ex priori tanquam causa: ergo. Ex quo

Deduces contra Mastrium: nihil referre, an opus, ex quo sequitur damnum alteri, sit contra justitiam, vel contra aliam virtutem, v. g. obedientiam, castitatem &c. dummodo ex eo per accidens tantum, & præter advertentiam ac intentionem sequatur damnum illud; quia tali modo damnum hoc semper est involuntarium, adeoque propter illud ex titulo injustæ acceptio-  
nis vel læsionis nihil restituendum.

R. 3. Regulariter excusaris a restitutione, etsi prævideas damnum aliquod ex actione tua illicita, vel injusta fecuturum, dummodo illud non sequatur ex natura tuæ actionis, neque ex  
ea



*§. I. De restit. ex damno per accidens, aut errorem &c. datō. 739*

ea sequi communiter, vel ut plurimum soleat: sed potius oriatur ex malitia, ignorantia, aut errore aliorum. Tamburinus in Decal. L. 6. c. 4. §. 1. & 2. Vogler n. 172. Elbl n. 98. cum aliis communissime.

Prob. Damnificatio tunc solum est radix obligationis restituendi, quando est causa externa physica, vel moralis damni consecuti: atqui in proposito non est causa physica vel moralis, sed tantum mera occasio ejusmodi damni consecuti: ergo. M. patet in aliis obligationibus restituendi ex titulo injustæ damnificationis. m. iterum liquet; si enim actio tua, ex qua sequitur damnum, non est ex se, aut ex natura sua, neque ut plurimum connexa cum tali damno, tunc per se non censetur physice vel moraliter influere. Ratio hujus est: quia influxus causæ physicae ex hoc desumitur, quod ea per se, & ex natura sua, vel necessario connectatur cum tali effectu: influxus vero moralis inde colligitur, quia ut plurimum ex positione talis actionis sequitur talis effectus, v. g. damnum tertii.

Confirm. Etsi charitas dicat, ut omnem etiam occasionem, unde malum proximi prævidemus oriturum, fugiamus, tamen justitia ad hoc non obligat, sed solum adstringit, ut secluso alio pacto, solum non præbeamus positivam causam moralem, vel physicam damno proximi: ergo etsi talis peccet contra charitatem, non tamen peccat contra justitiam, consequenter non obligatur ad restitutionem. A. constat; sæpe enim teneor impedire damnum proximi ex charitate, v. g. incendium domus ejus extinguere, si sine gravi meo incommodo possim, vel alia præstare, aut aliqua omittere, ad quæ facienda habeo alias jus, quin tamen teneam ista præstare ex justitia: ergo idem est in proposito. Ex hoc

Inferitur, quod si etiam prævideas, & positive intendas ejusmodi damnum, de quo in hac resolutione est sermo, te propter id secutum non obligari ad restitutionem. Tamburinus cit n. 3. La-Croix l. 3. p. 2. n. 156. Ratio est: quia prava intentio non facit actionem externam injustam, nisi ex natura sua sit causa saltem moralis injusti damni: ergo neque ex tali prava intentio-



ne inferri potest onus restitutionis, utpote quod oritur tantum ex causa externa injusta damni. Ex dictis

513

Innumeri casus resolvi possunt : 1. Petrus aufert Joanni, homini avarissimo, omnem ejus pecuniam, prævidens, eundem ob istud furtum moriturum, quod & accidit. In hoc casu Petrus est tantum occasio, non autem causa mortis. Quare ratione ejus tantum peccavit contra charitatem, non autem justitiam: sicque ad damna, ex tali morte hæredibus secuta, & etiam prævisa, nihil tenetur restituere: reddere tamen debet pecuniam surreptam, ut per se clarum est.

2. Joannes occidit aliquem occulte: Cædes imputatur Paulo, qui & 1. debet autoritate judicis hæredibus occisi compensare omnia damna illata per mortem illius. - 2. Debet alias plures expensas facere. In hoc casu Joannes tenetur quidem Paulo refundere illa, quæ debuit solvere hæredibus necessariis occisi: cujus ratio est; quia homicida, ut dicitur suo loco, jure naturali tenetur restitutionem facere hæredibus occisi: ergo etiam tenetur postea satisfacere iis, qui loco ipsius coacti sunt, hanc restitutionem hæredibus facere. Non autem obligatur Joannes, reliquas expensas refundere. Ratio est; quia Joannes harum expensarum, & damni non est causa, sed tantum occasio: & per accidens est, quod Paulo homicidium fuerit imputatum. Quis enim dicet, quod ideo imputetur homicidium Paulo, quia illud fecit Joannes? ut ait Tamburinus.

3. Si aliquis cadaver occisi ponat ante januam alterius, ex quo deinde imputatur homicidium alteri, non videtur esse per se causa hujus imputationis, & damnorum inde sequentium. Vogler. Ratio est: quia situs iste cadaveris non est causa sufficiens ad imputationem, & talis imputatio sequeretur solum ex ignorantia, vel malitia judicis, quam aliquis ex justitia non tenetur impedire. Hoc tamen intellige, nisi ille, cujus foribus apponitur corpus occisi, non sit aliunde de cædibus commissis infamatus, vel suspectus: item, nisi habuerit cum occiso notorias, aut capitales inimicitias. Ratio hujus est; quia cædes, & collocatio corporis occisi ante fores alterius in his circumstantiis  
fa-



*§. II De reſtit. ex damno per accidens, aut errorem &c. dato. 741*

facta, ſolet ut plurimum eſſe cauſa, ut alteri homicidium imputetur, & gravia ei damna inde immineant. Plures ſimiles cauſus reſolutos vide apud Vogler, Tamburinum, & La-Croix citatos.

Dixi in reſponſione tertia: *regulariter*; quia interdum actio, etſi in ſe non ſit cauſativa damni, eſt tamen talis ex circumſtantiis, in quibus exercetur. Et tunc certe erit obligatio reſtituendi; quia habetur moralis influxus in damnum. Ad diſcernendum autem, an adſit ejusmodi moralis influxus, hæc ſit regula: ſi ex tali actione, juncta cum ſuis circumſtantiis, ſequitur ut plurimum, vel communiter damnum tertii, tunc ſignum eſt moralis influxus, atque ejusmodi actio eſt vera cauſa, & non tantum occaſio damni. Ita Tamburinus cit. §. I. n. 4. Plura de hac re valde practica apud Caſiſtas.

*§. II.*

*An compensari debeat excessus damni invincibiliter ignoratus?*

Eſt hic quæſtio de exceſſu per ſe connexo cum damno, voluntarie dato, v. g. Titius projicit in mare gemmam Caji, valentem ducentis aureis, quam ipſe *invincibiliter* credebat valere tantum centum. Inquiritur ergo, an Titius ſcienter in mare jactans gemmam, teneatur ſolum compensare damnum, quod cognovit, ſcilicet valorem 100. aureorum, vel an teneatur quoque reddere exceſſum hujus damni, & ſic ducentos aureos Cajo refundere? Solet hæc quæſtio etiam taliter proponi, An ille, qui ſcienter intulit damnum grave, ſed invincibiliter ignoravit, eſſe tam grave, teneatur totum hoc damnum, quantum in ſe eſt, compensare? Ad hoc dubium reſpondendo

Aſſero: Ejusmodi damnificator non tenetur compensare exceſſum damni invincibiliter ignoratum. Poncius, Dicaſtillo, Haunoldus, Mezger d. 32. Art. 2. n. 19. La-Croix l. 3. p. 2. n. 194. Vogler n. 187. Elbl n. 9. contra Lugonem, Illſung, & nonnullos alios.

514



Prob. 1. Ad talem excessum resarciendum neque ex titulo rei acceptæ, aut injustæ damnificationis, vel acceptionis tenetur: ergo nullo ex titulo tenetur. A. quoad 1. memb. per se patet: 2. prob. quoad excessum illum, utpote invincibiliter ignoratum, non contingit formalis, ac voluntaria damnificatio: ergo damnificans ad illum excessum resarciendum non tenetur ex titulo injustæ damnificationis.

Confirm. Si totum damnum non esset cognitum, v. g. si Titius invincibiliter credidisset, hanc gemmam esse suam, & non alterius, vel eam non esse gemmam, sed vitrum nullius valoris, tunc fuisset deobligatus a compensando toto hoc damno: ergo a pari, si pars, & excessus damni non est cognitus, tunc neque ad illam partem damni compensandam tenetur. C. patet; ideo enim non est compensandum totum damnum in casu Antecedentis, quia totum ob defectum cognitionis est involuntarium: atqui etiam pars, & excessus ille damni pariter est involuntarius ob æqualem defectum cognitionis: ergo.

Prob. 2. Non est obligatio reparandi damnum extrinsecum, & per accidens cum alio damno per se intento connexum, quando hoc damnum extrinsecum non fuit prævisum, ut patet ex suo præced. ergo a pari idem est de damno intrinsecum, & per se connexo cum alio: dummodo hoc damnum intrinsecum etiam non sit prævisum.

Neque obstat, quod hoc damnum intrinsecum sit identificatum, vel per se connexum cum altero; non obstante enim hac identitate, vel connexione potest unum damnum ab altero per intellectum præscindi, & unius malitia esse cognita, ac voluntaria, non autem alterius: & consequenter una pars damni moraliter imputari damnificanti, non vero altera. Talis præcisio fit etiam tunc, dum aliquis peccat cum ligata, quam invincibiliter existimat esse solutam: ubi peccans committit quidem fornicationem, non autem adulterium formale. Idem dic cum proportionem de nostro casu.

515

Objic. 1. Obligatio restituendi excessum damni invincibiliter ignoratum, est toti generi humano optabilis, ut per eam fures, &



*§. II. De restit. ex damno per accidens, aut errorem &c. dato. 743*

& iniusti rerum alienarum consumptores absterreantur ab injuriis inferendis : ergo hæc obligatio defacto datur. R. 1. Retorq. Argum. in damna tantum extrinseca, & per accidens facta ; quia obligatio compensandi etiam hæc damna extrinseca absterreret fures, & alios ab injuriis inferendis : & tamen talis obligatio etiam juxta Adversarios non datur. R. 2. N. a. nam cum excessus hujus damni invincibiliter ignoretur, & sit extra prudentem suspicionem, ideo damnificanti neque aliquid de obligatione hunc excessum compensandi incidet : si autem nihil de tali obligatione cogitat, tunc per eam non potest absterri ab injuria ; rei enim incognitæ nulla est cupido, & nullus timor. Dein obligatio compensandi ex suis illa damna, quæ quis inadvertenter, & involuntarie dedit, est nimis dura, & non adeo naturæ, ac societati humanæ conveniens.

Objic. 2. Videtur æquius, ut injustus damnificator ferat hunc excessum damni, quam innocens Dominus : ergo. R. 1. Retorq. sicut prius. R. 2. d. a. videtur æquius, ut ferat hunc excessum damni, si eum voluntarie & scienter intulit C. a. si involuntarie *subd.* videtur æquius accedente sententia judicis C. a. secus N. a. Non videtur natura æquum, ut aliquis tam gravem pœnam sibi ipsi dicat, & in se exequatur ante omnem alterius judicis sententiam ob delictum tantum materiale, & involuntarium.

Objic. 3. In dubio debet præferri causa innocentis potius, quam rei : atqui in proposito damnificator est reus, qui scienter, saltem quoad reliquam partem, damnum fecit, & Dominus est innocens : ergo. R. 1. Retorq. Argum. In dubio non debet condemnari reus : atqui damnificator hic est reus : ergo non debet condemnari ad restitutionem. Item : in dubio nemo spoliari debet dominio certo suarum rerum : ergo neque talis damnificator debet spoliari dominio certo suarum rerum, ut ex iis faciat compensationem pro debito dubio. R. 2. d. m. damnificator est reus etiam quoad partem invincibiliter ignoratam N. m. quoad aliam partem non ignoratam C. m.

Objic. 4. Justitia exigit medium rei : ergo exigit, ut tantum restituat damnificator, quantum nocuit. R. d. c. exigit, ut tantum



tantum restituat, quantum nocuit voluntarie, & formaliter injuste C. c. involuntarie N. c. Alias etiam ille deberet compensare totum damnum, qui ex incuria inculpabili ædes alterius accendit, & combussit, quod tamen falsum est.

Objic. 5. Pœnæ pro delictis gravibus statuta incurrun-  
tur, etsi has ignorarint delinquentes, saltem regulariter loquen-  
do, ut in Tract. de Actibus humanis est dictum: ergo etiam  
obligatio resarciendi totum damnum incurritur, etsi pars nota-  
bilis ejus fuerit ignorata. R. d. a. dummodo ejusmodi delin-  
quentes totam malitiam delicti, cui respondet pœna, cogno-  
verint C. a. si eam non cognoverint N. a. Adeoque hæc obje-  
ctio potius videtur esse pro nobis; quia etiam pœna non in-  
curritur, nisi malitia, cui pœna taxata est, fuerit cognita: sic  
excessus quoque damni debet esse cognitus, ut obligatio restitu-  
endi eidem excessui respondens incuratur.

Objic. 6. Qui peccat mortaliter, meretur pœnam æter-  
nam, etsi de ea non cogitaverit: ergo etiam, qui projicit si-  
milem gemmam in mare, debet restituere totum damnum in-  
de illatum, etsi de toto hoc damno non cogitaverit. R. i. Re-  
torq. Argum. Qui peccat mortaliter, & meretur pœnam æter-  
nam, debet cognoscere malitiam gravem & mortalem, cui re-  
spondet pœna æterna: ergo etiam, qui debet restituere totum  
damnum, & consequenter præfatum excessum, debet etiam co-  
gnoscere totum hoc damnum, & excessum illum, cui respon-  
det obligatio talis restitutionis. R. 2. d. a. etsi nihil cogitet de  
pœna, cognoscat tamen, & advertat malitiam gravem C. a. se-  
cus N. a. & c.

Objic. 7. Saltem ejusmodi damnificator committit peccatum  
mortale, cui proportionata pœna est restitutio totius damni: ergo.  
R. d. a. committit peccatum mortale quoad damnum illud, quod  
infert scienter C. a. quoad excessum damni, quem infert ignoran-  
ter N. a.

Objic. 8. Homicida tenetur etiam in foro interno resarci-  
re illa damna, quæ ex cæde proveniunt uxori, & liberis occisi,  
etsi de istis damnis sub actuali occisione ordinarie non cogitet:  
ergo idem est in proposito. R. d. a. etsi de istis damnis non co-  
gitet



*§. II. De restit. ex damno per accidens, aut errorem &c. dato. 745*

gitet explicite & signate C. a. confuse, exercite & implicite N<sup>o</sup> a. Sic Sacerdos, etsi signate non cogitet, se esse personam sacram, sacrilegium tamen committit, dum actu contra castitatem peccat; quia saltem exercite, & implicite advertit, se esse per votum castitatis Deo dicatum. Si tamen in aliquo casu contingeret, ut homicida invincibiliter crederet, illum, quem occidit, esse sine liberis & uxore, non teneretur ad restitutionem aliquam illis faciendam, ut ait Vogler n. 198. & probat Lugo d. 11. n. 90. distinctio & responsio ista data ad plures similes casus applicari debet.

Objic. 9. Commodatarius, qui est in mora culpabili, & intra præfixum tempus non restituit rem commodatam, debet eam totam compensare, si casu fortuito apud ipsum pereat, ut dictum est: ergo etiam in proposito debet totum damnum refarciri a damnificante. R. N. c. & parit. Commodatarius ideo tenetur præstare casum fortuitum, vel quia se scienter, saltem implicite, ad hoc obligavit, vel tenetur ob labem injustitiæ in mora culpabili voluntarie, & advertenter contractam. Ast neutrum locum habet in nostro casu, ubi ejusmodi excessus, de quo disputamus, penitus ignoratur, adeoque nec de eo refarciendo potest fieri tacitus contractus, de rebus enim, quas nullo modo cognoscimus, non paciscimur: neque potest fieri peccatum injustitiæ in pessumdando tali excessu; quia omne peccatum debet esse voluntarium, & ex advertentia procedere.

Objic. 10. Qui projicit gemmam alterius in mare, vult executive totum, quod habet in manu, projicere. & perdere: ergo totum damnum hoc, quale in se est, executive intendit, consequenter & totum illud reparare tenetur. R. 1. Retorq. in illum, qui gemmam, quam in mare projicit, invincibiliter putat esse vitrum; hic enim executive totam gemmam alienam perdit, & tamen ab Adversariis non condemnatur ad restitutionem, quia ex ignorantia fecit: ergo. 2. Joannes invincibiliter credens, animal, quod videt, esse feram, vult executive illud occidere, quod ante se videt: ergo si tale animal visum esset homo, tunc Joannes executive intenderet occidere hominem, & propterea teneretur ad restitutionem: quis hoc credit? R. 2. in forma d. a. vult totum executive perdere, & pro-



dicere, quod habet<sup>1</sup> ante se juxta suam cognitionem, vel quod ex errore invincibili judicat se habere C. a. quod habet contra, vel præter suam cognitionem & existimationem N. a. Sicut Joannes vult occidere feram, quam putat ante se habere, non autem hominem, quem non cognovit, ita & ejusmodi damnificator vult illud projicere, & rem tanti pretii perdere, quanti credebat ante se habere.

Ast quid resolvendum, si talis homo adhuc vellet projicere gemmam, etsi sciret ejus integrum valorem? R. dummodo hic & nunc actu integrum valorem non agnoscat, tunc eum non obligari ad totum refundendum. Ratio hujus responsionis colligitur ex dictis num. 511. in Resp. 2.

Ad alia resolvenda observa, me in Assertionem dixisse: *excessum NB. invincibiliter ignoratum*, de quo nulla scilicet prudens suspicio habetur; sæpe enim ignorantia potest esse tantum vincibilis, & prudens dubium adesse, an non valor talis rei sit major, vel gravior, quam quis eum judicaverit, ubi rem alienam destruens, teneretur totum valorem resarcire.

## §. III.

*An errans in Persona læsa teneatur ad restitutionem, & quidem ex titulo injustæ acceptionis.*

516

NOTA 1. Quæstionem esse, ad quid teneatur Cajus, qui damnum intulit Titio, putans, & volens illud inferre Stichio? Casus est: Cajus intendit furari Stichio equum: ast per errorem invincibilem abstulit equum alterius, scilicet Titii. Vel Antonius voluit devastare segetes Petri, capitalis sui inimici: per errorem vero invincibilem incidit in agrum Pauli, & hujus segetes est depopulatus. Modo quæritur, quid, & cui, & ex quo titulo hujusmodi damnificatores, in persona læsa *invincibiliter* errantes teneantur restituere.

Nota 2. Certum esse, quod Cajus nihil teneatur restituere Stichio, cui tantum voluit furari, non autem actu est furatus; quia nullam ei damnosam injuriam intulit.

No



*§. III. De reſtit. ex damno per accidens, aut error. Sc. dato. 747*

Nota 3. Certum iterum eſſe, ſi talis per errorem damni-  
ficans, aliquid de re aliena, in qua damnum intulit, adhuc pe-  
nes ſe formaliter, vel virtualiter habet, illud debere reſtitui per-  
ſonæ læſæ, & damnificatæ, & quidem ex titulo rei acceptæ,  
ut claret ex dictis de radicibus reſtitutionis.

Nota 4. Solam igitur eſſe controverſiam, an damnificator,  
prædicto modo errans in perſona, adhuc teneatur compenſa-  
re damnum perſonæ læſæ, quando res aliena, in qua damnum  
factum eſt, tota eſt deſtructa, & abſumpta, ita, ut nihil de  
ea reſtet? vel, quod perinde eſt, an teneatur reſtituere ex ti-  
tulo injuſtæ acceptionis, & damnificationis? H. N.

Aſſero: Qui furatur, conſumit, aut deſtruit rem Titii, 517  
putans invincibiliter, eſſe Stichii, tenetur ad reſtitutionem, quam-  
vis inde non evaſerit ditior. Thomas Sanchez, Bonacina, Hau-  
nold, Vogler, n. 202. cum Communi: adeoque juxta hanc ſen-  
tentiam tenetur reſtituere ex titulo injuſtæ acceptionis, contra  
Molinam, & Tamburinum, quibus videtur eſſe probabile, in  
hoc caſu tantum dari obligationem reſtituendi ex re accepta, &  
quando res aliena per errorem ablata adhuc exſtat: ac contra  
La-Croix l. 3. p. 2. n. 200. qui exiſtimat, tunc eſſe obligatio-  
nem reſtituendi, ſi Cajus per errorem furans equum Titio, eſ-  
ſet animo ita comparatus, ut adhuc furaretur, etſi ſciſet, ta-  
lem equum eſſe Titii, & non Stichii: ſecus autem ab onere  
reſtitutionis eum abſolvit, ſi animo ita ſit comparatus, ut non  
furaretur, ſi ſciſet, eum eſſe Titii: additque laudatus Author,  
in hanc diſtinctionem conſentire Cardinalem de Lugo d. 17. a.  
num. 77. Verum contra hos.

Prob. Aſſertio. Cajus, etſi ſic erret, eſt vere, & forma-  
liter fur, ac ſcienter accipit, & abſumit rem alienam invito  
Domino: ergo etiam ex titulo injuſtæ acceptionis tenetur ad  
reſtitutionem; nam omnis formalis fur tenetur ad reſtitutionem  
ex hoc titulo.

Confirm. 1. Quamvis Cajus erret in perſona damnificata,  
tamen hic error in furto, & damnificatione non eſt ſubſtantia-  
lis, ſed mere accidentalis: ergo non obſtante hoc errore com-



mittitur injusta damnificatio, & contrahitur obligatio restituendi ex titulo injustæ damnificationis. A. p. Non obstante isto errore, manent omnia substantialia ad furtum, vel injustam damnificationem requisita, siquidem ad furtum formale, vel formalem damnificationem nihil aliud exigitur, quam ut res aliena scienter auferatur, vel destruat: atqui non obstante tali errore Cajus aufert, & destruit rem illam, sciens, eam esse alienam, & sciens, Dominum esse rationabiliter invitum: ergo.

Confirm. 2. Qui emit rem aliquam ab Antonio, quem putat invincibiliter esse Franciscum, emit valide, dummodo non erret circa substantiam mercis, teneturque Antonio pretium solvere, etsi forte interne ita fuerit dispositus, ut non emissit, si scivisset rem hanc esse Antonii, & non Francisci: ergo etiam inique absumens rem Antonii, tenetur ad reparationem hujus damni, etsi animo ita comparatus fuerit, ut non absumpsisset, aut damnificasset, si scivisset, rem esse Antonii, & non Francisci.

Accedit, quod hic non debeat attendi dispositio animi interna, qua voluisset abstinere a furto, vel damno, si hoc vel illud scivisset; hæc enim dispositio animi est tantum conditionata, & inefficax, ac non influit in actionem externam, ac proinde nec obnoxiam facit restitutioni, nec ab ea liberat. Debet autem attendi voluntas efficax, quæ actu externe influit: atqui actu habuit Cajus voluntatem efficacem damnificandi, quia actu libere externe intulit damnum, quamvis forte non intulisset, si personam damnificatam scivisset: ergo.

518 *Objic. 1.* In nostro casu non inferitur injuria formalis Titio v. g. cujus res per errorem destruitur, aut aufertur: ergo non debet ei fieri restitutio ex titulo injustæ acceptionis; hic enim titulus fundatur in injuria, & damnificatione formali. A. p. In nostro casu damnificans non cognovit jus Titii: ergo non potuit formalis injuria inferri Titio; formalis enim injuria præsupponit cognitionem juris in tali persona residentis.

R. N. a. ad prob. d. a. non cognovit jus Titii sub omni prædicato C. a. non cognovit sub aliquo prædicato N. a. Damnificans.



nificator iste non cognovit quidem jus Titii sub hoc determinato, & individuali prædicato, quatenus erat jus hujus determinate hominis; scivit tamen esse jus alterius rationabiliter invitum, & non consentientis in destructionem, aut ablationem rei suæ: atqui ad contrahendam malitiam injuriæ formalis contrarium, & legitimum Dominum sufficit, ut quis sciat, actionem suam esse contra jus, & voluntatem illius, qui revera Dominus est, esto, non sciatur, quis determinate, & in individuo sit ille Dominus. Sic ille, qui absumit bona incerta ex delicto, formaliter injurius est illi, qui est Dominus horum bonorum, etsi hunc in individuo nesciat. Idem est, si quis bona inventa retineat, & non inquiret in Dominum debita adhibita diligentia; hi enim, quamvis ignorent Dominum, tamen ab injustitia formali in illum, qui revera Dominus est; commissa non excusantur; quia sciverunt saltem generaliter, hæc bona esse aliena, & Dominum esse rationabiliter invitum quoad absumptionem, vel retentionem eorundem: ergo a pari, etsi Cajus ignoret, rem hanc, quam destruit, esse Titii, tamen est injurius eidem Titio; quia scit, rem esse alienam, & Dominum, quicumque demum sit, non consentire in destructionem talis rei.

Objic. 2. Error in persona invalidat matrimonium: ergo etiam talis error invalidat injuriam formalem, & facit, eam esse nullam. Ant. constat; invalidum est enim matrimonium, quando quis voluit contrahere cum Anna, & per errorem contraxit cum Bertha. R. 1. Retorq. Argum. Error in persona non invalidat alios actus, excepto matrimonio, v. g. Baptismum, vel Ordinem. Sic valet Sacramentum Baptismi, dum baptizas filium Joannis, etsi invincibiliter credas, te baptizare filiam Gregorii. Idem est de contractu emptionis, prout ex 2. Assertionis confirmatione patet: ergo etiam talis error non invalidat injuriam formalem. R. 2. N. c. & parit. nam error circa personam in matrimonio est circa ipsam substantiam matrimonii, utpote quod versatur circa conjunctionem personarum & corporum: contra vero in injuria error circa personam non est semper circa substantiam injuriæ; cum non obstante hoc errore possint omnia essentialia ad injuriam formalem requisita manere, ut patet ex probatione nostra.



Objic. 3. Qui occidit Joannem Clericum, putans invincibiliter, eum esse Laicum, non committit injuriam in Clericum: ergo etiam, qui destruit rem Pauli, putans, eam non esse Pauli, non committit injuriam formalem in Paulum. R. d. a. committit tamen injuriam in hominem C. a. secus N. a. & d. c. vel potius N. c. & parit. Qui occidit Clericum per errorem invincibilem, non cognoscit in eo ullum prædicatum, quod sufficeret ad contrahendam malitiam sacrilegii, & injuriæ in Clericum: qui vero destruit rem Pauli, etsi nesciat, esse Pauli, cognoscit tamen, eam esse alienam, & illum, cujus est, non consentire in destructionem: ergo jam habet sufficientem cognitionem ad injuriam formalem tali Domino, scilicet Paulo, inferendam. Dein potest etiam Rderi 2. Retorq. Argum. Etsi talis homicida excusetur a sacrilegio, tamen non excusatur ab homicidio; quia, licet nesciat, quisnam homo ille sit, quem occidit, scit tamen, eum esse talem hominem, qualiscumque demum sit, qui habet jus ad vitam, quo citra injuriam spoliari non potest: ergo etiam, qui destruit rem Pauli, etsi nesciat, esse Pauli, tamen non excusatur ab injuria formali; quia saltem scit, hanc rem esse alienam, & se eam citra injuriam alterius non posse destruere. Ex his

519

Deduces 1. Eum peccare contra justitiam, & teneri ad restitutionem convenientem, qui occidit Paulum loco Petri, etsi interne ita comparatus fuerit, ut nolisset occidere, si scivisset esse Paulum. Ratio est: quia revera voluntarie homicidium hoc commisit, & egit contra jus occisi & aliorum, qui ex tali occasione damna patiuntur, dummodo hæc damna præviderit. Deinde error occidentis est tantum accidentalis; non obstante enim hoc errore habet sufficientem cognitionem malitiæ, & injustæ suæ actionis, utpote cognoscens, hanc suam actionem esse prohibitam lege naturali, & quinto præcepto Decalogi, ac esse contra jus hominis ibi stantis, aut prætereuntis, qualiscumque sit.

Deduces 2. Ejusmodi occisorem, etsi in persona erraverit, posse plecti pœna ordinaria in homicidas statuta, ut habent Covarruvias in cap. *Alma Mater*. §. 10. n. 14. Molina tom. 4. d.



§. III. De restit. ex damno per accidens, aut error. &c. dato. 751

30. ac longe communior, & probabilior teste Vogler n. 209. Homicida enim non punitur pœna mortis præcise, quia Petrum, aut Paulum, sed quia hominem, qualiscumque sit, contra jus occidit. Adjungit tamen laudatus Voglerus, quod in ejusmodi casu interdum possit pœna mitigari, tum quia homicidium quoad personam individualement non ita est voluntarium: tum, quia non tam gravis injuria redundat in consanguineos defuncti. Et in hoc sensu forte intelligendus est Julius Clarus L. 5. sent. §. homicidium: ubi sustinet, talem homicidam esse solum afficiendum pœnis arbitrariis, non autem ordinariis.

Deduces 3. Excommunicationem Canonis incurrit etiam ille, qui percutit Franciscum Clericum, quem invincibiliter credit, esse Clericum Antonium, etsi ita constitutus sit, ut nolit percutere, si sciret, hunc Clericum esse Franciscum, & non Antonium. Communissima apud Thomam Sanchez L. 9. de Matrimonio d. 32. n. 27. Ratio est: quia voluntarie & scienter percutit aliquem Clericum, etsi nesciat, quisnam in individuo ille sit.


Deduces 4. Eum, qui prætereuntem sceminam graviter infamat, putans aliam esse, quam sit, teneri ad restitutionem. Ratio hujus colligitur ex dictis, & ex L. Eum, qui nocentem. 18. §. 3. ff. de Injuriis. ibi: Si injuria mihi fiat ab eo, cui sum ignotus, aut si quis me putet Lucium Titium esse, cum sim Cajus Sejus, prævalet, quod principale est, injuriam eum mihi facere velle; nam certus ego sum, licet ille me putet alium esse, quam sum, & ideo injuriarum actionem habeo.

Objic. contra has illationes: Si quis putans se percutere servum nocentem, percutiat hominem liberum, tunc libero non conceditur actio injuriarum adversus percutientem. L. Illud relatam. 3. §. 4. ff. de Injuriis. ergo etiam tunc non est locus actioni injuriarum, quando quis percutit, vel mutilat Petrum, putans se percutere, aut mutilare Paulum. R. N. c. & parit. Si aliquis vult percutere, aut castigare servum nocentem, nullam vult alteri inferre injuriam, cum habeat jus percutiendi servum nocentem: Contra qui vult percutere, aut mutilare alium, in quem non habet jus, vult illi, quiscumque demum sit, inferre

re



re injuriam; cum velit agere contra jus illius cognitum. Potest etiam retorqueri argumentum ex lege immediate citata in deductione, & illatione quarta.



## ARTICULUS VI.

*Reliqua de Restitutione, facienda a bonæ & malæ fidei possessore.*

§. I.

*An ille, qui rem alienam a fure emit, possit eam eidem restituere ad recuperandum suum pretium?*

520 **N**OTA 1. Quæstionem hanc agitari tam de bonæ, quam malæ fidei emptore, id est, tam de illo, qui scivit, dum emit, rem illam esse alienam & furtivam, quam de eo, qui hoc nescivit, & bona fide processit.

• Nota 2, Quæstionem esse, an hujusmodi emptor rem furtivam emptam teneatur immediate reddere Domino, cui est ablata: vel an possit eam reddere furi, a quo emit, ut hac ratione ab illo recuperet pretium suum.

Nota 3. In ista materia certum esse 1., quod res furtiva ab emptore immediate debeat restitui Domino, quando pretium non amplius potest recuperari, ut si fur aufugit. Ratio est: quia res aliena semper clamat ad Dominum suum, nec potest aliquis retinere illud, quod scit esse alienum, & sibi a non Domino venditum: cujus uberior ratio colligetur ex mox dicendis.

Certum est 2., quod etiam tunc immediate Domino debeat res talis restitui, quando ea sic reddita emptor non patitur jacturam pretii. Ratio hujus est: Si liceret, talem rem furtivam reddere furi, tunc solum ideo, quia taliter, & non ali-



aliter emptor recuperaret pretium suum : ergo , si aliunde recuperare potest pretium , non est ratio , cur rem illam non immediate restituat Domino. Adde , quod ejusmodi emptor non possit rem proximi periculo injustæ ablationis exponere sine legitima causa : sed sic exponeret rem illam , si eam immediate furi redderet , & quidem sine legitima causa , seu sine periculo deperdendi pretium suum. Ex quo patet , quod a fortiori tunc debeat immediate Domino reddi res furtiva ab emptore , quando hic necdum pretium pro ea solvit. Idem judicium est de eo , qui rem furtivam a fure gratis dono accepit ; quia hujusmodi emptor , & donatarius non incurrerent periculum deperdendi alicujus pretii , nec censentur habere aliam causam excusantem a restitutione immediate facienda Domino , ad quem res illa aliena per se clamat.

Certum est 3. ex opposito emptorem posse rem furtivam furi restituere tunc , quando nullum est prudens dubium , quin ipse fur ejusmodi rem sit Domino redditurus. Ratio est : quia in tali casu Dominus non incurrit damnum ex hoc , quod res ipsius fuerit tradita furi. Quare

Controversia remanet , an tunc ab emptore res furtiva empta possit reddi furi , quando certum est , aut prudenter dubitatur , an fur sit illam Domino restitutus. Atque in hoc ultimo casu , in quo Dominus incurrit morale periculum rem suam deperdendi , si ea ab emptore ad furem redeat , agitur questio , an ob pretium recuperandum emptor possit rem furtivam immediate tradere furi ? H. P.

Assero : Emptor bonæ fidei potest in prædicto casu rem immediate reddere furi. Toletus , Bonacina de Restit. d. 1. q. 4. punct. 2. n. 2. Valentia , Dicastillo , Lessius , Lugo d. 7. sect. 2. Mezger , Babenstuber , Viva , Maffrius , Herincx , Sporer , Elbl , Holzman contra Cajetanum , La-Croix L. 3. p. 2. n. 100. nostrum Henno , ac Antonium Mayr , & alios. 521

Prob. 1. Justitia me non obligat , ut cum æquali , vel majori meo damno promoveam bonum proximi , & ejus damnum  
P. Kick Theol. Tom. IV. Ccccc evi-



evitem : ergo iustitia me non obligat , ut cum damno , & periculo æquali perdendi pretium immediate restituam Domino rem furtivam emptam.

Prob. 2. Si quis advertat , rem alienam a se in platea publica inventam , & acceptam sibi fore damnosam , potest illam reponere in eodem loco , in quo invenit , nec tenetur servare , ut Domino reddat ; ergo etiam in nostro casu res empti potest reddi furi , ne ea emptori sit damnosa.

Prob. 3. Si ejusmodi res non posset immediate reddi furi , tunc ideo , quia eam sic reddens cooperaretur ad injustitiam furis , & rem alienam e statu meliori , quem acquiserat , in deteriore abjiceret : atqui talis emptor non cooperaretur *positive* ad injustitiam furis , posito etiam , quod hic non sit restitutus Domino , neque *positive* rem in deteriore statum reponeret : ergo. M. est ratio principalis , & fere unica Adversariorum. m. ex solutione objectionum clare patebit.

522

Objic. 1. Res illa furtiva empti clamat ad Dominum : ergo debet Domino restitui. R. d. c. ergo debet Domino restitui mediate , vel immediate C. c. semper immediate *subd.* nisi adsit causa legitima excusans ab immediata restitutione C. c. si adsit N. c. Æquale damnum , & periculum perdendi pretium suum , quod emptori imminet , est causa excusans ab immediata restitutione. Sufficit ergo , quod ista res mediate per furem , qui habet majorem obligationem restituendi , reddatur. Neque Dominus in hoc casu potest esse rationabiliter invitatus ; quia ipsa charitas dicat , ut emptor potius proprium , quam alterius , scilicet Domini , damnum & periculum evitet.

Objic. 2. Non licet rem alienam , quæ jam meliorem statum acquisivit , in deteriore rejicere : sed si res aliena e manibus furis ad emptorem pervenit , jam acquisivit statum meliorem , quam habuit in manibus furis : ergo non licet eam iterum in manus furis tanquam statum deteriore rejicere. M. constat ; si enim rem alienam ex incendio extraxisti , non potes eam iterum in illud injicere ; quia talis res ex igne extracta jam acquisivit statum meliorem , quam habuit in igne. m. iterum claret ; nam dum est in manibus furis ,  
est



est in statu summe periculoso, e quo valde difficulter, aut omnino non ad Dominum revertetur: ast apud bonæ fidei possessorem non est in tanto periculo, utpote a quo longe facilius Dominus rem suam recuperabit, quam a fure.

R. D. M. Non licet rem alienam in deteriorem statum rejicere positive C. M. permissive n. M. ad paritatem dico: Ille, qui rem e rogo extractam iterum in ignem injicit, eam positive in deteriorem statum reponit, ac physice, & in æstimatione morali destruit: Ast emptor, qui rem reddit furi, non positive ponit eam in statum deteriorem; siquidem non ideo reddit, ut fur retineat, sed ut ipse possit suæ obligationi satisfacere, & Domino restituat: quod autem fur non restituat, provenit solum ex ejus malitia, quam emptor potest permittere, & non tenetur impedire cum gravi suo damno.

Quoniam autem hæc paritas præcipuum adversæ sententiæ fulcrum est, hinc ea amplius est declaranda. Nota igitur bene, quod natura ignis sit causa necessaria, ex natura sua necessitata, & determinata ad unam absumptionem vestium, & aliarum rerum combustibilium: non autem ea est indifferens ad consumptionem, vel conservationem, & retentionem rei. Quare si aliquis rem alienam injicit in rogam, tunc illam necessario in statum deteriorem rejicit; quia nullus deterior status esse potest, quam perditionis, quem ejusmodi res in igne invenit. Inde sequitur ulterius, quod deliberate vestem, aut aliam similem rem igni tradens, in æstimatione quoque morali eam censeatur positive consumere, vel destruere. Aliud est de fure; hic enim ex se, & ex natura sua non est necessitatus, aut determinatus ad non restituendas res alienas, sed est indifferens & liber ad restituendum, vel non restituendum. Quare, si res ad ipsum pervenit, non necessario est in statu interitus, & non recuperationis: sed potius est in tali statu, in quo & potest, & debet ad Dominum reverti, dummodo fur velit uti sua potentia, & conscientiæ suæ satisfacere. Atque in hunc statum bonum, id est, in manus furis, quatenus potentis, & obligati restituere, reponit emptor rem furtivam emptam, dum illam furi reddit: ad statum vero malum, qui est ipsa malitia, ac no-



litio restituendi, ac per accidens ex prava voluntate cum fure connectitur, emptor se habet tantum materialiter, & permissive, & quidem ex justa causa.

Dices: Redditio est actio positiva: ergo dum emptor furi reddit rem alienam, positive eam in statum deteriorem rejicit. R. D. a. est actio positiva, si spectetur physice C. a. si spectetur moraliter, & quoad influxum moralem in damnum, quod Dominus ex tali redditione patitur N. a. Talis actio ex se non auferit rem a proprio Domino, neque ex natura sua facit, ut difficilius ad Dominum redeat: sed potius ordinatur ad hoc, ut Dominus rem suam recuperet, quamvis deinde fur hac actione abutatur in detrimentum ejusdem; quem tamen abusum in his circumstantiis emptor non tenetur impedire.

Objic. 3. Si fur est fuga elapsus, vel omnino mortuus, tenetur emptor rem furtivam emptam reddere ipsi Domino, quamvis hic non sit refusus pretium: ergo etiam ita immediate Domino res reddi debet, quamvis fur adhuc compareat, & vivat. R. D. a. & hoc ideo, quia in isto casu mediate per furem non potest reddi Domino C. a. secus N. a. Res aliena debet reddi Domino vel mediate, vel immediate. Si ergo mediate non potest, debet id fieri immediate.

Objic. 4. Quando emptor praevidet, rem a fure non reddendam Domino, & tamen eam furi restituit, cooperatur peccato, & injustitiae furis: sed qui cooperatur peccato, & injustitiae alterius, ipse peccat, ac injuste agit: ergo & emptor in hoc casu peccat, & injuste agit. M. p. quando aliquis praevidet, hominem furiosum abuturum gladio ad occidendum alterum, & tamen eidem reddit gladium, peccat, & cooperatur homicidio: ergo a pari in nostro casu.

R. D. M. cooperatur peccato & injustitiae furis remote, & materialiter c. M. proxime, & formaliter n. M. & d. m. sed qui cooperatur peccato alterius formaliter & proxime, peccat c. m. qui tantum materialiter & remote cooperatur n. m. Sæpe per actionem indifferentem licet materialiter, & remote coo-  
perari



perari ad peccatum alterius, quando adest sufficiens causa. Sic mutuarius offerendo usuras mutuant, quando habet necessitatem mutui, non peccat cooperando materialiter peccato usurarii. Pariter possum cooperari materialiter occisioni alterius, ne ipse occidat: v. g. Joannes furiosus, aut alias plurimum malitiosus vult me occidere, nisi dem ipsi gladium meum, quo vult abuti ad alium interficiendum: in hoc casu ex communi sententia, nisi aliter possim evadere, possum ei dare gladium meum, & materialiter cooperari ad occisionem alterius. In his enim circumstantiis, quia justam habeo causam ponendi istas actiones remotas, materiales, & indifferentes, cum quibus ex malitia, vel amentia alterius damnum, aut injustitia conjungitur, excusor ab injustitia & peccato, & censeor illud tantum moraliter permittere: aliud esset, si non haberem causam justam has actiones indifferentes exercendi. Idem est in nostro casu, ubi ex justa causa, ne perdat nempe pretium, redditur res aliena furi, qui redditio est actio ex se indifferens, & non necessario sibi connexam habet injustitiam furis: imo ex intentione emptoris potius ordinatur ad justitiam adimplendam, & restitutionem vero Domino faciendam. Quare sic reddendo ex gravi causa emptor ejusmodi non cooperatur proxime & formaliter injustitiae furis, consequenter nec peccat. Aliud esset, si sine justa causa furi immediate redderet: sicut & ille peccaret formaliter, saltem contra charitatem, qui gladium furioso, & ad alterum occidendum parato, sine justa causa cederet.

A prob. posset inverti argumentum, v. g. dicendo: quando aliquis praevidet &c., & tamen habet sufficientem causam, potest in illis circumstantiis furioso reddere gladium: ergo a pari. In forma d. a. peccat, & cooperatur homicidio, si non habet justam causam reddendi gladium C. a. secus N. a. Roboratur hæc responsio per aliud exemplum a P. Viva adductum p. 5. d. 4. q. 5. n. 20. quod brevitatis gratia omitto.

Objic. 5. Si Paulus posset rem furtivam emptam reddere furi ad recuperandum pretium, posset pariter alteri eam vendere ad recuperandum pretium: sequela est falsa: ergo. R. neg. sequelam; I. quia venditio rei alienae & furtivae est injusta; nam, dum venditur res aliena, accipitur pretium pro illa re,

C c c c c 3

cujus



cujus dominium non transfertur, nec transferri potest a venditore, quod injustum est. 2. Quia Paulus sic rem illam poneret in novo periculo, in quo eam non invenerat. Ast dum eam reddit furi, non ponit eam in periculo novo, sed tantum priori, in quo reperit illam, restituit.

Objic. 6. Saltem, si aliquis vellet auferre pecuniam meam, nisi aperuero arcam, vel cubiculum Petri, in quo iste habet suas pecunias repositas, possem aperire; quia secundum nostras responsiones sic me haberem tantum permissive, & materialiter ad ablationem pecuniæ Petri, & quidem ex justa causa, ne mea pecunia auferatur; sequela est absurda: ergo. R. neg. sequelam; nam aperire cistam, vel cubiculum alterius, est actio per se positive alteri injuriosa, & contra justitiam: aliud est de illa actione, qua res furtiva redditur furi; hæc enim ex se est indifferens ad justitiam vel injustitiam, & sit injusta primum per malitiam alterius, nolentis restituere Domino rem ab emptore acceptam. Verum quidem est; me non posse positive damnificare alterum, vel positive actioni damnificativæ formaliter tali cooperari, effringendo januas alterius &c. ne ego consimile damnum subire debeam: sicut non possum ipse alterum interficere, aut positive cooperari actioni occisivæ alterius, ne ipse interficiatur. Possum tamen per actionem indifferentem, v. g. reddendo rem furtivam emptam ipsi furi, materialiter & remote cooperari damno alterius, ne ego damnificer: sicut possum per redditionem gladii materialiter cooperari neci alterius, ne ego occidar, ut fatetur ipse Antonius Mayr, quamvis noster Adversarius, n. 656.

Objic. 7. Judex, si in hoc puncto imploraretur ejus officium, deberet emptorem cogere, ut rem emptam immediate reddat Domino, & non furi, etiamsi emptor pretium perdere deberet: ergo signum est, quod emptor in conscientia sit obligatus ad rem talem immediate Domino reddendam. R. N. c. 1. in foro externo, ne detur ansa fraudibus, præsumitur talis res furtiva esse emptam mala fide. Quare judex in penam culpæ saltem præsumptæ deceat, ut res illa Domino restituatur, etiamsi emptor jacturam pretii subire debeat. Nihilominus non tene.



tenetur emptor hanc pœnam subire, priusquam a iudice dicte-  
tur. 2. Iudex procedit per media tutiora, ut unusquisque ha-  
beat, quod suum est. Hinc adjudicat Domino rem suam, em-  
ptori vero pretium, si fur, qui vendidit, possit inveniri: si  
autem jam fuga est elapsus, vel aliunde pretium ab eo recu-  
perari nequit, tunc per se emptor tenetur, rem immediate Do-  
mino restituere, ut in notandis est dictum. 3. Iudex procedit  
petente Domino, qui habet jus ad accipiendam, & vindican-  
dam rem suam immediate, nec potest prohiberi, dum rem su-  
am a quocumque possessore recuperat, & vindicat, quia uti-  
tur jure suo, ut amplius dicetur objectione sequente: atqui Do-  
minus sic vindicans ad hoc exequendum utitur manibus iudicis:  
ergo sicut ipse Dominus potuisset rem per se apprehendere, &  
recuperare, sic etiam iudex potest sententiam ferre, ut res hæc  
immediate ad Dominum redeat.

Objic. 8. Potest ipse Dominus ab emptore exigere rem suam:  
quo in casu debet ea immediate ipsi Domino exigenti restitui:  
ergo etiam ita debet immediate Domino dari, quamvis expres-  
sis verbis non exigat, quia semper præsumitur velle, ut sibi  
suum restituatur. R. N. a. quod in tali casu emptor teneatur  
rem furtivam emptam positive reddere domino exigenti. Ete-  
nim Dominus vi juris realis potest quidem rem suam, ubicum-  
que fuerit, sibi vindicare, & accipere, ac exigere ab eo, qui  
eam habet. Quare etiam ille, qui possidet ejusmodi rem alie-  
nam, tenetur non impedire Dominum, dum quærit, & acci-  
pit rem suam; quia Dominus utitur jure suo: insuper talis pos-  
sessor tenetur rem illam alienam non abscondere, non tamen ob-  
ligatur eam positive Domino reddere cum suo ingenti detrimen-  
to. Sic si extraxisti Petrum de flumine, & dum eum supra  
aquas suspensum tenes, periclitaris ipse de vita, nisi illum mer-  
gi permittas: in hoc casu non potes quidem Petrum positive  
impedire, ne saltu, vel alio modo se a mortis discrimine libe-  
ret, non tamen teneris eum positive juvare, nec suspensum te-  
nere cum tanto tuo dispendio. Idem dic in nostro casu. Et ali-  
unde constat, quod fere nunquam possit Dominus impediri, si  
rem suam vindicat, & ipse accipit; cum tamen sæpe sæpius sit  
causa



causa excusans, ne ea immediate & positive a possessore Domino restitui debeat.

523

Quæres: An etiam emptor malæ fidei, dum eum postea pœnitet, possit rem furtivam emptam furi reddere ad recuperandum pretium? R. affirmative. Ita noster Alexander Alensis, Sylvester, Lælius, Angelus *ſ. Restitutio*. Gabriel, Cardinalis de Lugo, & alii plures, quamvis non omnes, ex citatis Assertionem præcedente.

Ratio hujus responsionis est, quia inter bonæ & malæ fidei emptorem par est ratio quoad hoc punctum: quod probatur: Si malæ fidei emptor non posset rem furtivam emptam immediate reddere furi, tunc obstarat emptio mala fide facta, hæc non obstat: ergo. m. p. emptio hæc supponitur esse rescissa, & retractata ab emptore, qui propterea etiam pretium suum repetit: atqui emptio rescissa, & annullata non amplius influit, nec effectum aliquem parit: ergo. Unde rescissa emptione malæ fidei emptor se habet, sicut bonæ fidei emptor.

Confirm. 1. Qui injuste aliquid accepit, tenetur solum tollere injustam acceptionem: ergo etiam, qui injuste aliquid emit, tenetur solum tollere injustam emptionem, eam rescindendo, & rem emptam venditori reddendo.

Confirm. 2. Tota injustitia hujus emptionis consistit in hoc, quod emptor rem alienam accipiendo a fure, hunc impedierit a restitutione facienda, ad quam tenebatur: atqui hoc impedimentum penitus tollitur, dum res illa iterum furi ad restituendum obligato redditur, qui ea reddita potest suæ obligationi satisfacere: ergo.

Confirm. 3. Emptor talis non tenetur immediate restituere Domino ratione rei acceptæ; nam eodem modo teneretur emptor bonæ fidei; cum restitutio ratione rei acceptæ non proveniat ex mala fide, sed ex re ipsa existente apud possessorem: neque tenetur ex injusta acceptione; nam mala fides, & injusta emptio, ac acceptio jam est retractata, & consequenter non amplius influit, nec facit, ut Dominus carere debeat re sua.

Dicta



*§. II. De cooperantibus ad injustam damnificationem. 761*

Dicta tamen limites 1. pro casu, quo emptor se aliquo modo participem fecisset furti, præbendo recursum, aut per frequentem emptionem animando furem ad similia furta; tunc enim emptor malæ fidei positive cooperaretur ad damnum alterius, & sic alteri, seu Domino immediate satisfacere teneretur: de quo inferius, dum agetur de causis cooperantibus ad damnum. 2. Tam bonæ quam malæ fidei emptor potest obligari ad refusionem Domino faciendam, si, postquam cognoverunt, rem emptam esse alienam, eam diu detinent, ita ut ex ejus detentione damnum sequatur aliquod Domino, vel furi omnino impossibilis, aut difficilior reddatur restitutio, & Domino recuperatio rei suæ.

Objic. Emptio mala fide facta, seu injusta acceptio rei alienæ obligat emptorem, ut servet Dominum indemnem: sed non servat Dominum indemnem, si rem ejus reddit furi: ergo. R. D. M. ut servet Dominum omni modo possibili indemnem n. M. ut servet Dominum indemnem ita, ut vi suæ actionis, & emptionis mala fide factæ nullum damnum sequatur c. M. Atqui si emptio mala fide facta retractetur, non sequitur amplius vi ejus aliquod damnum; postquam enim est revocata, non amplius potest influere.

Dices: dum emptor malæ fidei scienter rem alienam emit, censetur in se suscipere omne periculum talis rei: ergo. R. D. a. censetur in se suscipere omne periculum pro eo tempore, quo eam apud se retinet C. a. pro alio etiam tempore N. a.

*§. II.*

*De causis cooperantibus ad injustam damnificationem.*

NOTA 1. Dupliciter posse contingere injustam damnificationem: 1. Si quis immediate per seipsum inferat alteri damnum injustum in suis bonis. 2. Si hoc faciat *mediate*, cooperando ad iniquam actionem alterius, qua proximus damnificatur. Hæc autem cooperatio potest fieri mandato, consilio, aut alio simili modo movendo alterum ad injustam damnificationem proximi.

*P. Kick Theol. Tom. IV.*

D d d d d

Nota



Nota 2. Certum esse, quod ille, qui cooperatur efficaciter ad damnum alterius, teneatur ad restitutionem, & quidem in solidum, seu ita, ut in defectum aliorum teneatur totum damnum, in quod efficaciter influxit, resarcire. Patet ex propositione 38. ab Innocentio XI. confixa, quæ sic habet: *Qui alium movet, aut inducit ad inferendum grave damnum tertio, non tenetur ad restitutionem damni illati.* Ratio est: quia ille, qui est causa efficax injusti damni, tenetur ad illius compensationem: ergo & talis cooperans.

Dixi autem: qui *efficaciter*, seu ita cooperatur, ut vi suæ cooperationis sequatur effective, & re ipsa damnum, & quidem quoad substantiam, & non solum quoad modum; nam si damnum omnino non sequatur, eoquod alter non utatur maligno consilio sibi dato, tunc de se nulla compensatio damni, utpote quod non est illatum, fieri debet. Item si damnum quidem inferatur, non autem vi consilii, aut cooperationis, sed aliunde, tunc iterum non tenetur cooperans, v. g. consulens ad restitutionem. Ratio est: quia ille solum obligatur ad restitutionem, qui re ipsa influit in damnum injustum alterius: atqui talis consulens non influit re ipsa in damnum alterius, eoquod hoc non vi hujus consilii, sed aliunde sequatur: ergo. Sic 1. si des consilium furandi alicui, qui jam antecederet firme erat determinatus ad furtum, quod tu consulisti, patrandum, tunc non teneris aliquid propterea resarcire etiam in defectum furis. 2. Si quis præstiterit auxilium v. g. tenendo scalas, sine quo adhuc damnum fuisset secutum, licet non tam celeriter, vel tam faciliter, talis non censetur obligari ad restitutionem; quia non influxit efficaciter in ipsam substantiam furti & damni, sed tantum in modum ejus: ut ait Holzman de Restit. n. 437. 3. Si illi, qui jam est firmissime determinatus ad furandum Paulo septimana sequenti, suadeas, ut hac adhuc hebdomade illud ipsum furtum committat, non teneris restituere. Ita iterum Holzman n. 546. allegans pro se plures alios. Ratio est: quia neque in hoc casu efficaciter influxisti in substantiam damni, & furti, sed tantum in modum ejus, faciendo, ut citius fiat, quod alias certo, licet serius, vel cum majore difficultate fuisset factum.

Nota



§. II. De cooperantibus ad injustam damnificationem. 763

Nota 2. Cooperantem teneri ad illud refarciendum, ad quod efficaciter fuit cooperatus: ut si ad partem damni efficaciter suades, partem restituere debes: si ad totum damnum, totius restitutio tibi incumbit, servato semper ordine illo, qui inferius indicabitur. Sic si determinato auferre 100. suadeas, ut auferat ducentos, juxta probabilem sententiam teneris tantum ad 100. quia tantum in 100. efficaciter influxisti suadendo.

Petes: Quid dicendum, si duo consilio suo dato aliquem antea indifferentem determinent ad damnum, ita quidem, ut nulus seorsim suo consilio sufficeret ad persuadendum, sed ambo simul juncti causam adequate motivam constituent? R. etiam in hoc casu tenetur quilibet seorsim restituere in solidum, & in defectum alterius totum damnum refarcire. Ratio est: quia quilibet ex his seorsim spectatus est causa totius damni, saltem totalitate effectus, quamvis non totalitate causae: uti recte iterum discurret Holzman. n. 436. H.N.

Quæres: Quanam, & quot sint causae cooperantes ad injustam damnificationem? R. sunt novem: sex priores sunt positivæ, tres posteriores sunt negativæ. Comprehenduntur autem omnes sequentibus versiculis:

*Jussio, Consilium, Consensus, Palpo, Recursus,  
Participans, Mutus, non obstant, non manifestans.*

Per *jussionem* intelligitur *mandans*, seu ille, qui expresse opus damniferum injungit alteri v. g. famulo, vel filio: vel saltem tacite, ut si dicat, utinam quis pro me Paulo nocumentum inferret in bonis fortunæ &c. Si aliquis ex tali implicito, vel explicito mandato moveatur ad inferendum damnum injustum alteri, tunc sic mandans obligatur ad restitutionem ejusmodi damni. Ita Herincx.

Petes: An teneatur ad restitutionem etiam ille, qui ratum habet injustum damnum, suo nomine alteri a famulo, vel filio suo, aut alio illatum? R. negative; nam ratihabitio, quæ primum subsequitur damnum jam complete factum, non influxit efficaciter in actionem damnificantem, eo ipso, quod non



præcedat, sed sequatur damnum. Neque huic resolutioni obest Regula 10. Juris in 6. dicens: *Ratihabitionem retrahere, & mandato non est dubium comparari*; nam ista regula respicit tantum forum externum, in quo ratihabens puniretur sicut ille, qui mandavit tale maleficium: vel procedit solum de contractibus, & aliis quibusdam actibus, qui per ratihabitionem confirmantur, perinde ac si mandatum præcessisset, non autem dicta regula loquitur de naturali obligatione restituendi. Videatur Herinx d. 8. n. 40. & seq. ubi etiam aliquam objectionem solvit.

*Consilium* est, quo suades, consulis, mones, exhortaris, modum ostendis, quomodo damnum sit inferendum. *Consensus* est, quando præstas suffragium, vel alio modo conspiras, & sic efficax causa es, ut damnum inferatur. *Palpo*, seu *Palpator* est, qui vel laudando iniquum factum, vel exprobrando ignaviam non audentis illud committere, incitat aliquem ad executionem operis: ut si tali modo laudando, vel exprobrando incites aliquem ad vindictam sumendam per cædem sui inimici. *Recurfus* est, quo quis res furtivas in custodiam accipit, vel ipsos fures receptat, sicque ipsos facit animosiores ad furta, & damna ulterius continuanda, vel non resarcienda.

*Participans* ad propositum dicitur ille, qui est causa totius iniquæ actionis, præbendo v. g. malefactori instrumenta, aut auxilium ad totum damnum inferendum: qui proinde ad totum damnum resarciendum tenetur. Per *Participantem* potest etiam intelligi ille, qui partem participat de re furtiva, etsi non fuerit causa talis furti, nec ad illud induxerit suadendo, aut auxilium ferendo &c. in quo casu tenetur tantum ad restituendam partem illam, quam ex re furtiva accepit, non autem totum damnum. Verum hic non est quæstio de Participante in posteriore, bene in priore sensu.

*Mutus* est, qui tacet, dum deberet loqui prohibendo, reprehendendo, dissuadendo, clamando, vel strepitum edendo. *Non obflans* est, qui non impedit damnum, dum potest, & tenetur. *Non manifestans* est ille, qui non manifestat malefactorem,



rem, dum potest, & tenetur vel ad impediendum, vel ad reparandum damnum.

Porro notabile est discrimen inter causas positive, & negative cooperantes; nam positive cooperantes semper tenentur ad compensationem damni vi talis cooperationis secuti secundum ordinem assignandum. Contra negative cooperantes solum tunc obligantur restituere, quando ex contractu, vel quasi contractu erat obligatio impediendi damnum alterius. Ratio hujus est: quia qui positive cooperatur ad injustam damnificationem alterius, semper peccat contra justitiam, & facit alteri injuriam, dum ad læsionem juris influxum positivum præstat: talis autem injuria ex titulo justitiæ commutativæ violatæ compensari debet per restitutionem. Secus est de negative cooperantibus; hi enim non positive influunt in damnum alterius, sed illud solum permittunt, seu non impediunt. Quando ergo non ex speciali contractu, vel quasi contractu se obligant ad impediendum damnum proximi, tunc sic non impediendo peccant solum contra charitatem, non autem contra justitiam: quare tunc non obligantur ad restitutionem, uti communis est omnium sententia. Hinc si Petrus videt fures ascendere in ædes sui vicini, illosque posset facillime clamando impedire, illos tamen non impedit, peccat quidem contra charitatem, quæ præcipit, ut proximi damnum impediamus, si facile possumus impedire, non autem peccat contra justitiam, quia nullo contractu, vel quasi contractu se Vicino obligavit ad custodiendas eius res, & damna ab eo avertenda: sicque ad nullam refarcitionem tenetur.

*Ex dictis sequentes resolutiones practicæ deducuntur.*

I. Mandans ad nullam restitutionem tenetur, si ante pertrata injuriam, quam v. g. famulo demandavit, revocet suum mandatum, & hæc revocatio innotescat mandatario, etsi deinde mandatarius tali revocationi non acquiescat, sed nihilominus pergat, injuriam & damnum proximo inferre. Communis. Ratio est: quia in tali casu mandatum, utpote revocatum, non amplius efficaciter influit in injuriam. Si autem hæc, non obstante revocatione, nihilominus inferatur, inferatur ex sola malitia



litia mandatarii, cui proinde totum onus restitutionis incumbit. Aliter resolvendum est, si revocatio ante patratum facinus mandatario non innotescat; vel si innotescat quidem, mandatarius tamen credat, eam revocationem non esse seriam, aut eam inculpabili oblivioni det, in ejusmodi enim casu mandatum prius datum adhuc efficaciter movere pergit, & vi illius damnum injustum inferitur: quod proinde mandanti principaliter adscribetur, uti gnaviter advertunt Authores.

2. Consulens, si re adhuc integra, seu ante patratum facinus damnosum, consilium suum retractet, interdum a restitutione deobligatur, interdum non; si enim simpliciter tantum rogavit, vel quasi imperando consuluit, ut alter damnum inferat, non autem simul suggessit modum, quo possit inferri damnum, neque motiva addidit, ob quæ debeat inferri, tunc revocato efficaciter consilio, re adhuc integra, consulens non tenetur ad restitutionem. Ratio est: quia ejusmodi consilium revocatum non permanet moraliter, consequenter non influit efficaciter in damnum. Idem est, si aliquis falsum consilium dedit, vel falsum motivum adhibuit, tunc falsitate detecta ejusmodi consilium non potest amplius movere. Secus est, si suggessit motivum efficax, v. g. ostendendo utilitatem, quæ ex ejusmodi damno damnificanti posset oriri, vel detegendo modum, quo damnum posset inferri: ratio est; quia motiva a consulente semel suggesta, etsi postmodum revocentur, tamen adhuc movere pergunt, & proinde ad damnum inferendum efficaciter incitant. Quare sic consulens, etsi revocarit suum consilium, tamen adhuc tenetur ad restitutionem, posito, quod sequatur, & inferatur damnum ab illo, cui ita consuluit: quod etiam verum est, quamvis alter, seu damnificans ab initio consilium non acceptarit, dummodo postmodum illo motus operetur. Ita Lugo, Lessius, Herincx, Holzman, Elbl. Atque quoad hoc punctum est disparitas inter *mandatum*, & *consilium*; mandatum enim præcise influit propter authoritatem, & voluntatem mandantis, quæ per revocationem tollitur: ast consilium non movet tam ratione voluntatis, & authoritatis alterius, quam ratione motivi suggesti, quod etiam revocatione facta, adhuc in mente alterius remanet, & non vim motivam exercet.



§. II. De cooperantibus ad injustam damnificationem. 767

3. Si homini, efficaciter determinato ad auferendum 100. aureos Petro, suadeas, ut *eidem* Petro auferat tantum 10. vel si volenti occidere Petrum, suadeas, ut *eundem* tantum vulneret, non teneris ad restitutionem. Ratio est: quia in hoc casu tantum censeris consulere diminutionem majoris mali, non autem consulis positive minus malum, sed illud permittis. Herincx, & alii.

Dixi 1. Si suadeas; si enim ipse simul adjuvares hominem illum ad patrandum minus malum, & simul cum ipso actionem damnificativam exequeris, furando 10. aureos, vel vulnus simul infligendo, tunc tenereris ad restitutionem, quia tunc vere & physice influeres in damnum etiam minus, & illud non solum permetteres. Dixi 2. *Eidem* Petro; si enim illi, qui paratus est furari Petro 100. aureos, suadeas, ut potius alteri, v. g. Paulo, tantum 10. auferat, & pecunias Petri intactas relinquat, iterum obligaris ad restituendum. Ratio est: quia non licet impedire unius etiam gravius damnum cum alterius innocentis pariter notabili damno. De hoc tamen casu utiliter potest legi Herincx d. 8. de injuriis in bonis fortunæ n. 47. & seqq. ubi multa notabilia refert ex Authoribus.

4. Consiliarius, qui dat suffragium ad injustam gabellam, iniquam causam &c., antequam sufficientia vota pro concludenda tali causa adsint, & sic etiam partialiter constituit numerum votorum sufficientium, & requisitorum ad decisionem talis causæ, secuta iniqua sententia tenetur ad restitutionem. Neque obstat, et si talis Consiliarius sciat, quod ipso etiam non suffragante, aut annuente, alii post ipsum votantes sint ompleturi numerum illum suffragiorum injustorum; nam talis Consiliarius vere est causa efficax damni, constituendo majorem partem suffragantium, sicque prævenit obligationem restituendi, quam reliqui postea votantes in se suscepissent. Sicut peccas, & teneris ad restitutionem, si equum furto auferas, etsi præciveris, te non auferente certo alium venturum, qui eundem equum abduceret.

Aliud dicendum de dantibus suffragium injustum primum post



post numerum suffragiorum jam completum, seu postquam jam habetur major pars votorum pro causa iniqua; nam illa tantum suffragia, quæ primo, & immediate majorem partem constituunt, sunt solum causa efficax damni, & injustæ sententiæ, ita ut hæc æque sequeretur, etsi posteriora suffragia deessent: contra vero deficientibus prioribus sententia iniqua non ferretur, neque damnum inferretur. Herincx cit. n. 51. ac Lugo d. 19. n. 17. cum communi DD., quam allegat laudatus Herincx.

5. Qui Marito exprobrat adulterium uxoris, ipsumque taliter excitat, ut adulteram interficiat, restituere tenetur ad damna ex homicidio secuta.

6. Obligantur ad restitutionem caupones, & ejusmodi, qui filiosfamilias domi suæ receptant, ut ibi paternam pecuniam potu, vel lusu consumant, parentibus absolute, & quoad substantiam invitis. Holzman, & alii. Idem est, si quis receptet, & occultet furem, ne eum lictores deprehendant, si per hoc furi præbeatur spes ulterioris refugii, quo ille animatur ad ulteriora furta perpetranda, secus est, si ipsum recipiat, abscondat &c. ne per Magistratum pcena capitali, aut alia afficiatur, & quidem absque spe ulterioris refugii; in hoc enim ultimo casu actum charitatis exercet, & nulli injuriam infert, neque peccat, saltem secluso præcepto speciali Magistratus: in priore autem casu recipiens est causa efficaciter movens furem ad ultteriores injustitias.

7. Si scias, prædones in via grassari, & aliquis te de hac re interroget, tuque neges, & alter tuo credens dicto viam prosequatur, ac spoliatur a prædonibus, teneris ad restitutionem; quia sic mentiendo causa fuisti injusti hujus damni, quatenus animasti itinerantem ad iter hoc periculosum continuandum. Aliud esset, si solum negative te habuisses, & neque affirmative, neque negative respondiisses.

8. Restituere tenentur Principes, Magistratus, Consilarii, Belliduces, dum non impediunt furta, latrocinia, iniqua molitionia, & alia peccata damnifera, quando impedire possunt sine



*§. II. De cooperantibus ad injustam damnificationem. 769*

sine notabili detrimento vitæ, honoris, famæ, & rei suæ familiaris. Ratio est: quia tenentur ea impedire ex quasi contractu, nempe ex officio: adeoque, si non impediunt, peccant contra justitiam commutativam.

Dixi: *quando impedire possunt &c.* non enim censentur ejusmodi munia suscepisse cum tanto onere, ut damnum etiam cujuslibet privati avertere teneantur cum suo majori, aut æquali damno. Nihilominus damna Communitatis, præsertim spiritualia, v. g. hæreses, scandala &c. tenentur impedire etiam cum periculo vitæ; nam horum malorum evitatio, & bonum commune longe anteferri debet bono privato Principis. Ita Holzman, ac plures apud eum cit.

9. Custodes agrorum, sylvarum, gabellarum &c. non impediunt damna, quæ per devastationem agri, cætionem lignorum, omissionem gabellæ &c. inferuntur, tenentur ad restitutionem omnium damnorum directe causatorum; nam tales ex officio, & contractu tenentur impedire ejusmodi damna, & inferentes ea manifestare; in hunc enim finem a Dominis sunt conducti. Quoad Custodes gabellarum videri potest P. Elbl de Restit. n. 11.

Dixi: *ad restitutionem damnorum directe causatorum;* non enim videntur obligari ad restitutionem pœnæ, vel mulctæ, quam alias rei, si fuissent manifestati, solvere debuissent. Ratio est: quia talium Custodum officium non est, Dominos suos locupletare ex lucro pœnarum, sed tantum conservare res suæ curæ commissas. Holzman n. 446. allegans Sporer; & La-Croix. Inde

Colliges 1. Si Procurator fiscalis sit in causa, cur fiscus non accipiat mulctam, a lege impositam delicto, vel si judex mulctam debitam non imponit, aut sine causa relaxat, vel imminuit, non tenentur ad restitutionem. Ita La-Croix l. 3. p. 2. n. 83. citans Vasquez, Tannerum, Lessium, Lugo disp. 37. n. 112. Illfung T. 1. d. 2. n. 77. Nam horum officium primario est ad hoc, ut delicta delata non fiant, & secundario tantum ad bonum fisci. Tum etiam, quia similes mulctæ debentur tantum ex justitia vindicativa, cujus violatio non importat onus restitutionis.



Colliges 2. Qui iuste interrogatus, fraude vel mendacio declinat multam sibi imponendam, vel aliis ob delictum, non tenetur restituere propterea fisco. La-1. 3. p. 2. n. 82. Sanchez, Lessius, Lugo disp. 18. n. 108. & disp. 37. n. 110. alique cum Diana. Nam 1. Fiscus non habet jus ad pœnam ante sententiam. 2. Fraus, vel mendacium tantum indirecte, & remote concurrunt ad damnum illud fisci; primario enim solum tendunt ad damnum a se, vel ab altero avertendum, & ad defensionem sui, vel aliorum, & ad occultationem delicti. Idem est de illis, qui mendaciis & fraudibus impediunt, ne ipsi, vel alii accusentur ob delicta commissa: item de Advocatis, & aliis similibus, qui falso defendunt reum, sicque impediunt, ne mulctetur.

10. Qui tantum malo exemplo inducit alios ad damnificandum, non tenetur ad restitutionem, quamvis peccet contra charitatem: ut si quis alienam vineam devastans, suo exemplo moveat, ut & alii id ipsum tentent. Ratio est: quia tantum ad restitutionem tenetur ille, qui ad injustitiam concurrat tanquam causa influens, & non præcise est occasio: at, qui suo malo exemplo inducit ad injustum damnum, est tantum occasio ejus, non autem causa per se influens. Ita Alanus Pfeiffer citans pro se Molinam, Bonacinam, Dicastillo & alios. Imo etsi ex animo, & intentione alium inducendi ad injustam damnificationem, malum exemplum vel occasionem præbeas, non teneris ad restitutionem, ut advertit laudatus ex Bonacina; quia intentio interna non facit injustam actionem externam nocivam proximo, si ea ex se non est injusta, & contraria juri alterius, ut alibi dictum est.

Restarent etiam aliqua dicenda de ordine, quem in restitutione debent servare concurrentes ad injustam damnificationem. Verum de hoc videre potes P. Reiffenstuel T. 9. d. 5. q. 4. ubi & alia hic omissa invenies resoluta.



## ARTICULUS VII.

### *De causis excusantibus a Restitutione.*

**C**Ausæ excusantes a restitutione convenienter enumerantur decem, etsi alii recenseant plures. Sunt autem sequentes: 527  
 1. Impotentia. 2. Necessitas propria. 3. Ignorantia. 4. Damnum ex restitutione creditori, vel alteri imminens. 5. Rei, quæ in individuo debetur, interitus. 6. Remissio creditoris. 7. Compensatio debiti. 8. Compositio facta autoritate juris, vel iudicis. 9. Cessio bonorum, & 10. ingressus in Religionem. Hæ tamen causæ non æqualiter excusant; priores enim quatuor ordinarie solum excusant ad tempus, ut scilicet restitutio differri valeat: posteriores sex vero excusant in perpetuum. De quibus plura examinant Casistæ: ego vero duo tantum puncta trutinabo: primum est, an accipiens rem alienam, & eam absumens in extrema necessitate, teneatur ad restitutionem, postquam ad pinguiorem fortunam pervenit? secundum, an ille, qui non potest restituere in uno genere bonorum, teneatur in alio?

#### §. I.

*An accipiens, & absumens rem alienam in extrema necessitate, teneatur ad restitutionem?*

NOTA. Necessitatem, seu inopiam esse triplicem. Una est extrema, quæ datur, quando aliquis ex rerum necessariorum defectu deberet amittere vitam, vel membrum aliquod principale, vel sensum, v. g. oculos, aut sustinere perpetuum carcerem, vel perpetuam infirmitatem. Altera est gravis, in qua ex rerum necessariorum defectu non sine notabili molestia vita trahitur, uti contingeret illi, qui e statu commodo delapsus cogeretur solo pane, vel oleribus victitare, aut alias in fama, vita, aut suis rebus grave damnum pati. Tertia est necessitas communis, quæ vitam aequaliter miseram reddit juxta statum patientis



entis hanc necessitatem. Hac laborans non debet notabiliter decedere a statu suo legitime acquisito, sed tantum occurrunt aliquæ molestiæ, quæ eidem statui communiter annectuntur. Talem necessitatem patiuntur mendici triviales, & ostiatim mendicantes. H. N.

528

Affero: Qui rem alienam consumit in extrema necessitate, quando re simul, & spe pauper est, ordinarie transacta necessitate, si pervenerit ad pinguorem fortunam, non tenetur eam restituere. Scotus 4. d. 15. q. 2. n. 26. Lugo d. 16. n. 171. Herincx d. 8. de injuriis, & Restit. n. 125. Holzman, Reiffenstuel, & alii. *Prob.* Si talis, absumens rem alienam, teneretur ad restitutionem, tunc vel ex titulo rei acceptæ, aut ex titulo injustæ acceptionis: atqui ex neutro tenetur; non ex primo: cum supponatur tota res hæc esse absumpta in extrema necessitate, ita quidem, ut neque virtualiter aliquid de ea existet. Neque ex titulo injustæ acceptionis; nam extrema necessitas saltem concedit licentiam utendi rebus alienis, vel usum facti, quantum requiritur ad eandem necessitatem sublevandam juxta communem DD. sententiam: ergo talis non illicite, neque injuste absumit rem alienam, sicut & Franciscanus non absumit injuste res sibi ad usum simplicem facti concessas.

Dixi in hac probatione: *saltem concedit licentiam &c.*; Volunt quidem aliqui, quod in necessitate extrema fiant omnia communia, & in statum pristinæ libertatis reducantur, adeoque necessitas hæc dominium quodammodo, & jus stricte dictum in accipientem transferat. Verum hoc gratis mihi videtur dici; nam necessitas extrema non plus juris videtur tribuere, quam requiritur ad eandem necessitatem sublevandam: atqui ad necessitatem extremam sublevandam, non requiritur concessio juris & domini in rem alienam, sed sufficit sola licentia, & usus simplex facti in eadem licentia fundatus: ergo.

Dices: Ad sublevationem necessitatis extremæ sufficit, quod concedatur res aliena sub conditione onerosa, ut fiat restitutio ab accipiente, si ad pinguorem fortunam pervenerit. *Contra* est: Quamvis Dominus forte posset adjicere ejusmodi conditionem onerosam, tamen non præsumitur velle eam adjungere, quando



do patiens necessitatem extremam est pauper in re & in spe, vel quando nulla, aut tantum modica, & vix æstimabilis spes est futuræ pinguioris fortunæ; nam in tali casu Dominus censetur gratis donare rem sic acceptam, & spem illam pinguioris fortunæ, & restitutionis aliquando faciendæ pro nihilo reputare. Saltem in tali casu non adeo rationabiliter ageret, si vellet adjicere similem conditionem onerosam. Porro in ejusmodi necessitate Dominus deberet ultro, & gratis succurrere: ergo debet præsumi, quod accipientem nolit, aut omnino non possit simili conditione onerosa gravare. Et dato etiam, quod Dominus vellet accipientem gravare tali conditione onerosa, accipiens tamen non teneretur eam acceptare, aut in eam consentire stante tanta necessitate, qua aliquis spe, & re est pauper; quia talis necessitas licentiam tribuit simpliciter accipiendi, & assumendi, quantum ad occurrendum ejusmodi indigentia est necessarium: ergo tunc neque accipiens præsumi potest, se velle obligare ad restituendam rem alienam ita absumptam.

Dixi in Assertionem: *ordinarie*; sunt enim aliquæ exceptiones faciendæ. 1. Non procedit conclusio, si debitor, vel absumens in necessitate extrema rem alienam, esset actu pauper, & spe dives; tunc enim non haberet necessitatem accipiendi simpliciter, sed potius emendi, vel mutuo petendi cum conditione onerosa, postmodum, ubi ad meliorem fortunam pervenerit, compenlandi acceptum. Quare Dominus in tali casu non posset præsumi donare rem suam necessitatem patienti. Idem dic de eo, qui per honestam mendicationem, aut alia via potest sublevamen acquirere in suis miseriis; talis enim non est in extrema necessitate aliquid ab alio accipiendi propria autoritate.

2. Non procedit, si debitor in extremam necessitatem incideret ratione delicti; quia tunc potius delicto, quam necessitati extremæ fortuitæ deberet adscribi consumptio rei alienæ: atqui delictum non excusat a restitutione: ergo.

3. Neque locum habet, ubi in necessitate constitutus non absumit rem alienam, sed suam, quam ab alio justo titulo emptionis, vel mutui accepit: ut si frumentum ab alio antea mu-



tuo acceptum in extrema necessitate absumas; nam in hoc casu homo ille succurrit suæ necessitati ex bonis propriis, quæ Domino suo pereunt, & non alteri.

Objic. Ex hoc sequeretur, quod ille, qui ante extremam necessitatem furatus est bovem, possit illum in extrema necessitate absumere absque onere restitutionis: sequela est absurda: ergo. Rdet Herincx, ac ipse Scotus pro conclusione citatus §. *Ad aliud*. seu n. 37. neg. M. Ratio est; quia in hoc casu obligatio restituendi habet ortum ex injusta acceptione præcedente extremam necessitatem: atque hæc obligatio jam antecederet orta, per supervenientem extremam inopiam non tam extinguitur, quam ad tempus sopitur. Aliud est, quando quis rem alienam accipit in extrema necessitate; talis enim rem illam juste accipit, & juste absumit. Nihilominus P. Vogler concedit M. & n. m. nam esto, res aliena habita fuerit ex delicto, vel ex contractu, tamen in ejusmodi necessitate, nisi res sit valde pretiosa, tenetur Dominus ejus gratis succurrere, nec censetur velle adjicere conditionem illam onerosam, quando accipiens, ac absumens est pauper re & spe. Neque obstat autoritas Scoti; nam ibi loquitur dubitative, ut patet ex illis verbis: *videtur, quod sic posset dici*: Et ultima hæc responsio videtur mihi verior, & conformior nostræ sententiæ.

529 Quæres: quid tenendum, si creditor & debitor simul incidunt in extremam necessitatem?

R. I. cum Scoto 4. d. 15. q. 2. n. 36. §. *Ad aliud*. Si debitor prius incidit in extremam necessitatem, quam creditor, tunc debitor potest retinere, & absumere rem illam creditoris; quia necessitas hæc ipsi prius, & consequenter potius jus tribuit. Si autem simul incidunt in necessitatem extremam, tunc juxta Scotum cit. debitor tenetur eas res restituere, quarum antea dominium non acquisiverat, utputa quas ante statum extremæ necessitatis acceperat a creditore per contractum depositi, aut commodati, vel per furtum, rapinam, aut simile delictum. Ratio est: quia extrema necessitas non dat jus sibi attribuendi, vel retinendi, & absumendi rem alienam Domini, in pari necessi.



cessitate, & indigentia constituti, atque in ejusmodi casu Dominus non teneretur succurrere alteri, sed potius sibi. Iterum Dominus in hoc casu habet duplicem titulum pro se, scilicet dominium & possessionem juris, nec non extremam necessitatem, ubi alter pro se solam necessitatem allegare potest: ergo causa Domini est potior. Atque hæc sententia est communis inter Scotistas, quibus etiam consentit Lugo d. 21. n. 4. nec dissentit La-Croix l. 3. p. 2. n. 429. citans etiam pro Scoti sententia Richardum, & Palidorum.

R. 2. Communior aliorum, & vere probabilis, ac practice tuta sententia est, quod ejusmodi debitor possit rem alienam retinere, & absumere. Ratio præcipua videtur; quia ordo charitatis obligat, ut debitor prius sibi, suisque proxime conjunctis, quam personæ extraneæ subveniat: atqui hoc facere non potest, nisi bona creditoris in casu illo retineat: ergo. Huic sententiæ ex Scotistis etiam subscribit Elbl n. 349. Id ipsum etiam verum est a fortiori, non contradicente Scoto, de bonis illis, quæ in debitoris dominium jam ante casum extremæ necessitatis transierunt per contractum mutui, emptio- nis, venditionis &c. quia tunc debitor est Dominus talium bonorum: atqui in pari casu, & necessitate melior est conditio Domini, quam alterius, qui non est Dominus: ergo.

## §. II.

*An excuset a restitutione impotentia restituendi in eodem genere?*

NOTA: Triplex bonorum genus a DD. distingui, scilicet *infimum*, *medium*, & *supremum*. In *infimo* ordine ponuntur bona fortunæ, utputa pecunia, vinum, frumentum, agri, animalia &c., ad *medium* pertinent honor, & fama: in *supremo* ordine collocantur bonum vitæ, & integritas membrorum, sanitas, libertas, virginitas, & similia. Huc etiam spectant bona spiritualia, vel bona animæ: quorum alia sunt naturalia, nempe usus rationis, ingenium, liberum arbitrium, artes, & habitus naturales &c. alia sunt supernaturalia, videlicet gratia Dei, virtutes, Sacramenta, & id genus alia, quæ ad salutem



& sanctitatem animæ pertinent. Imo bona animæ, saltem supernaturalia, in speciali, seu quarto, ac reliquos ordines bonorum transcendente gradu poni merentur. Quæritur ergo, an ille, qui non potest restituere in eodem genere, in quo damnum intulit, teneatur saltem reddere in alio genere: v. g. ob inopiam non potes amplius reddere pecunias, & bona fortunæ, quæ surripuisti: quæritur ergo, an saltem tenearis damnum hoc illatum compensare per bona alterius generis, v. g. per bona spiritualia, per preces, opera bona? Iterum læsisti alterum in membris suis mutilando: quæritur jam, an non tenearis ad restitutionem pecuniariam, cum membrum ipsum reddere nequeas? & sic de aliis. H. N.

531

Affero: Probabilius, & in praxi tutum est, quod ille, qui non potest restituere in eo genere, in quo nocuit, non teneatur restituere in alio seu superiore, seu inferiore genere, ac ordine bonorum. Lugo d. 11. n. 5. Lessius, Herincx disp. 5. de Injuriis. q. 6. Sporer, Holzman, Vogler n. 450. & alii plures apud Vogler citati.

Prob. 1. Pro vita, membris, & integritate eorum nihil debet restitui; quia restitutio hæc non potest fieri in eodem genere bonorum, in quo præcessit damnum, seu quia ipsa vita adempta, ac membra abscissa nequeunt restitui: ergo qui non potest restituere in eo genere, in quo nocuit, ad nullam teneatur restitutionem. A. p. ex L. finali. ff. de his, qui effuderint, vel dejecerint. ubi dicitur: Cum liberi hominis corpus ex eo, quod dejectum, effusumve quid erit, læsum fuerit, Judex computat mercedem Medicis præstitas, cæteraque impendia, quæ in curatione facta sunt; præterea operarum, quibus caruit, aut cariturus est ob id, quod inutilis factus est. Cicatricum autem, aut deformitatis nulla fit æstimatio; quia liberum corpus NB. nullam recipit æstimationem. Idem habetur ex L. qua actione. ff. Ad legem Aquiliam. & §. ob hominem. 1. Instit. de obligationibus, quæ quasi ex delicto nascuntur. Imo id ipsum dicit lex vetus Exod. 21. ubi illum, qui alterum in rixa percussit, & debilitavit membro, ut debeat ambulare super baculum suum, absolvit a reliquo onere restitutionis, condemnando solum ad restitutionem lucri cessantis, &

ex-



expensarum in Medicos; ait enim: *Innocens* (id est, liber ab alia restitutione) erit, qui percusserit, ita tamen, ut operas ejus, & impensas in medicos restituat. Ex quibus sic

Argumentor: Incredibile est, quod S. Scriptura, & Principes Christiani voluerint percussorem liberare a restitutione pro ipsis membris, & nocumentis corporis, si pro iis fuisset jure naturæ, vel aliunde debita aliqua restitutio. Certe nec S. Scriptura, neque Legislatores humani voluerunt in hac parte derogare juri naturali: ergo potius dicendum est, quod aliunde, & quidem de jure naturæ talis restitutio pro læsione in bonis corporis, & vitæ non sit debita, sed tantum pro lucro cessante, & damno emergente, quod non raro sequitur in bonis fortunæ ex læsione corporis, aut membrorum.

Prob. 2. Non est in praxi restitutio pro vita & membris: ergo talis obligatio non datur. A. constat; quia nullus mutilator, aut homicida condemnatur, ut aliquid reddat pro vita occisi, vel pro membris mutilati.

Nec dicas: Vitam occisi satis compensari per supplicium ultimum, & sententiam capitalem, quam homicida debet subire. *Contra* est: Per mortem homicidæ, quam subit ex justitia vindicativa, nullatenus satisficit justitiæ commutativæ, neque redditur aliquid occiso, vel ejus hæredibus. 2. Fur propter capitale supplicium non eximitur a restitutione rei furtivæ: ergo etiam homicida, si sit obligatus ad restitutionem, propter capitale supplicium non eximetur ab illa facienda. 3. Restitutio ex natura sua facit, ut ille, qui per læsionem alterius deperdidit aliquid, id ipsum, quod deperdidit, actualiter vel æquivalenter recipiat: atqui occisus per ultimum supplicium homicidæ non recipit amplius suam vitam actualiter, aut æquivalenter: ergo.

Prob. 3. Obligatio compensandi damna illata alteri etiam ad hæredes transit: atqui ad hæredes non transit obligatio compensandi damnum vitæ alteri illatum ab homicida defuncto: ergo censendum est, quod talis homicida etiam in vivis non fuerit obligatus compensare damnum vitæ. m. constat; nullus enim



hæres, etsi timoratissimæ conscientiæ, putat se obligari ad pecuniariam compensationem pro vita occisi ab illo, cui ipse ut hæres successit: neque aliquis Confessarius ejusmodi hæredem ad aliquam restitutionem etiam per bona spiritualia v. g. preces, faciendam obligat.

Prob. 4. Justitia commutativa intendit pro motivo æqualitatem: ergo, ubi æqualitas poni non potest, cessat obligatio justitiæ commutativæ. Atqui non potest poni æqualitas inter bona diversi generis & ordinis, quæ mutuo sunt incompensabilia: ergo non est obligatio justitiæ commutativæ refarciendi damnum alteri illatum per bona diversi ordinis: consequenter non est obligatio, ut pro vita ablata restituatur pecunia, vel fundantur preces: neque pro honore, si hujus restitutio sit impossibilis, debet præstari aurum &c. m. subsumpta prob. Inter bona diversi ordinis non datur communis mensura: atqui inter illa bona, inter quæ non datur communis mensura, non potest dari æqualitas: ergo. 2. Æqualitas, quam restitutio ex natura sua intendit, consistit in hoc, ut injuriam passus habeat aliquo modo id, quod debebat habere, vel quod ipsi per injuriam est ademptum: atqui etsi omnes pecunias expendas pro vita occisi, omnes preces pro eo fundas, eleemosynas distribuas, ejusmodi tamen occisus nunquam habebit id, quod ipsi debetur, & quod ipsi fuit ademptum, scilicet vitam &c. Idem cum proportionem dic de aliis bonis.

532

Neque dicas: Justitia, ubi non potest ponere æqualitatem perfectam, saltem intendit imperfectam: ergo si non potest restitui in eodem genere, saltem intendit justitia, ut restituatur in diverso genere bonorum, & sic ponatur æqualitas saltem imperfecta.

Contra est: Etiam tunc, dum justitia intendit æqualitatem imperfectam, intendit talem, qua extinguitur saltem pars debiti adæquate, & ponitur æqualitas perfecta cum una parte debiti: atqui per restitutionem bonorum in diverso ordine neque ponitur æqualitas perfecta cum parte debiti: ergo. M. constat; nam justitia vult quemque habere, quod suum est, & quidem adæquate, & ad æqualitatem perfectam & completam, si debitor possit ponere æqualitatem illam perfecte & adæquate: vel saltem si hoc non possit, debet pars debiti adæquate

ex.



extingui. Sic : si damnificasti, 100. florenos auferendo, justitia obligat, ut omnes 100. restituas, si talis restitutio sit tibi possibilibis: si vero non potes restituere omnes centum, sed 10. tantum, tunc obligaris reddere 10. Ratio hujus est: quia in ejusmodi casu, dum restituas 10., non reddis quidem aliquid æquale toti damno, reddis tamen aliquid æquale parti damni; nam auferendo 100. florenos, abstulisti etiam 10. ac justitia non solum obligat, compensare ad æqualitatem totum damnum, sed etiam quamlibet partem damni. Jam vero, quando pro membro, vel vita restituas pecuniam, tunc ille, cui restituas, nec adæquate, nec inadæquate habet suum membrum, vel vitam; etenim adhuc facta tali compensatione pecuniaria totaliter caret suo membro, adeoque sic non satisfit intento justitiæ. Quare in forma ad instantiam Adversariorum neg. conf.

Nec dicas 2. Saltem per bona diversi ordinis potest dari æque, vel magis bonum, vel tale quid, quod alter pluris æstimat, vel æstimare debet, quam v. g. membrum amissum: ergo tali modo potest adhuc per bona diversi ordinis finis justitiæ obtineri. A. constat; sic enim facile reperies aliquem, qui pluris faciat triginta millia aureorum, quam digitum auricularem, & hunc pro tanta summa libenter sibi præscindi permittat.

Contra est: Quamvis possit aliquis pro membro accipere aliquod bonum, quod est altioris ordinis, vel quod ipse pluris æstimat, quam membrum, nunquam tamen compensatur damnum membri amissi eo modo, quo justitia commutativa illud exigit compensari; nam justitia commutativa præcise & unice intendit, ut alter per restitutionem aliquo modo recuperet illud ipsum bonum, quo est privatus per damnificationem: at qui per hoc, quod detur id, quod injuriam passus pluris facit, quam membrum amissum, non recuperat ille suum membrum, sed eo privatus manet sicut ante. Quare in hac questione bene attendi debet, qualem æqualitatem intendat, & respiciat justitia commutativa, nempe illam, quam indicavi, & quam aliquis per bona diversi ordinis ponere non potest; alias enim, si alicui infideli, quem lethaliter vulnerasti, procurasses ante mortem aliquem Sacerdotem, qui eum converteret, & ba-



ptizaret, sufficienter compensasset damnum, dando pro vita temporali æternam, & spiritualem: quod tamen meo iudicio falsum est.

533

Objic. 1. Legem veterem, & positivas, in quibus dictatur compensatio pecuniaria pro damnis, in bonis vitæ, & corporis illatis: ergo talis compensatio est necessaria. R. Istam compensationem dictari tanquam pœnam, non autem esse debitam ex titulo iustitiæ commutativæ, & tanquam restitutionem.

Objic. 2. Nostra sententia est contraria Scoto 4. d. 15. q. 3. §. de secundo. n. 6. ubi ait de homicida: *Tenetur ergo ad restitutionem spiritualem æquivalentem vitæ, quam abstulit, sicut potest esse æquivalentia in talibus*: ergo vult, quod homicida per opera pietatis, orationem, lucrandas indulgentias &c. debeat occiso restituere spiritualiter, cum aliter non possit. R. 1. Doctor ibi loquitur de consilio, vel de foro interno pœnitentiæ, in quo Confessarius potest, vel etiam debet obligare pœnitentem, ut satisfactionem aliquam præstet in bonum defuncti: non autem ibi agit de debito naturali restitutionis, quod vi iustitiæ commutativæ jam obligat ante injunctionem Confessarii. 2. Doctor ibi defendit suam sententiam ut probabilem, & tutiorem, quod & nos non negamus: per hoc tamen nostram sententiam non rejicit tanquam improbabilem, aut omnino non tutam. Bene notetur, quod in assertionem dixerim: *probabilius, & in praxi tutum est &c.*

Objic. 3. Occidens asinum tenetur ad reparationem damni, saltem pecuniariam: ergo a fortiori occidens hominem; alias, qui occideret hominem, esset melioris conditionis, quam qui occideret asinum. R. N. c. & parit. nam asinus, & pecunia sunt bona fortunæ, & in eodem ordine, & sunt mutuo compensabilia, non item vita hominis, & pecunia. Item juxta Aristotelem 5. Ethic. c. 5. pecunia est pretium, & mensura omnium rerum, seu omnium bonorum fortunæ: ergo mirum non est, quod damna omnium bonorum fortunæ plerumque per pecuniam possint compensari. Dein per pecuniam potest iterum emi asinus, vel aliud bonum fortunæ: adeoque recipiens pecuniariam compensationem pro asino, censetur æquivalenter recipere ipsum ali-



asinum. Ast vero pro pecunia non potest amplius obtineri vita semel deperdita, aut membrum abscissum: adeoque per pecuniam neque æquivalenter recipitur, aut compensatur vita adempta, aut membrum abscissum.

Objic. 4. Si fama ablata in se non possit restitui, debet restitui in æquivalenti per honorem: ergo, si vita in se non possit restitui, debet restitui in æquivalenti per bona spiritualia, aut pecuniam. R. N. c. & parit. Quamvis enim honor, & fama inter se differant, sunt tamen multum affines, ac ad eundem ordinem bonorum pertinent, adeoque mutuo compensari possunt. Aliud est de bonis aliis, quæ ad diversum ordinem spectant. Nota interea ex Reiffenstuel T. 9. dist. 6. n. 2. Famam esse opinionem communem de virtute, sapientia, prudentia, vel rebus præclare gestis alterius: honorem vero esse testificationem excellentiæ alterius. Differunt igitur honor, & fama; quia hæc consistit in interiore opinione, quæ, dum exit in opus, dicitur laus: Honor vero consistit in extrema significatione opinionis nostræ, quam habemus de excellentia alterius. Hæc igitur significatio externa supponit opinionem internam; alias tantum foret illusio.

Objic. 5. Sæpiissime libertas venditur pecunia, castratio puerorum admittitur ob congruam sustentationem, & vita gravissimis periculis exponitur a militibus, & aliis pro lucro temporali: ergo ista bona possunt compensari, & taxari pretio aliquo pecuniario. R. 1. cum Holzman: vitam, membra &c. non esse in se æstimabilia pretio, nec per pretium compensabilia, bene autem posse æstimari, & vendi comparative ad utilitatem, quæ ex eisdem membris &c. haberi potest. Sic venditur servus, & quidem eo majori pretio, quo utilior est ementi, nulla habita ratione vitæ, vel membrorum ejus. R. 2. cum Vogler n. 459. ad finem. dist. cons. possunt prædicta, scilicet vita, membra, libertas compensari, & taxari pretio aliquo per conventionem, & pactum privatum C. c. potest esse obligatio ista compensandi ex jure naturali, & antecedenter ad istam conventionem liberam partium N. c. Si enim ex liberali & gratuita promissione potes obligari alteri ad solvendam certam summam pecuniæ: cur non etiam potes sic obligari ex pacto alio oneroso,

Fffff3

quo



quo promittis alteri dare pecuniam, si permittat sibi amputari digitum? Certe hoc pactum adimpleta conditione obligat, ut dicetur inferius Tract. seq. Ast independenter a tali pacto non videris obligari ad restitutionem faciendam pro membro, vita, aut aliis bonis, quæ in proprio genere nequeunt reparari.

Objic. 6. Restitutio præcipue jure naturæ intenditur, ut tollatur dolor illius, qui injuriam, vel damnum est passus: atqui si pauperculus est passus damnum, vel injuriam in membro, facile tollitur dolor ejus per magnam pecuniæ summam: ergo per pecuniæ summam potest fieri restitutio pro membro. R. 1. N. M. nam restitutio præcipue intenditur, ut damnum passus rem suam, quam per injuriam perdidit, iterum recuperet saltem in æquivalenti, modo sapius jam explicato: atqui per pecuniam læsus in membro non acquirit amplius membrum. Hinc R. 2. d. M. ut tollatur dolor, & præcipue radix doloris, quæ consistit in eo, quod aliquis bonum non habeat, quod alias deberet, & posset juste habere c. M. ut tollatur solus dolor n. M.

Objic. 7. Pro vita hominis servi, & mancipii est aliquid restituendum, quando tale mancipium est occisum: ergo a fortiori pro vita hominis liberi. R. d. a. pro vita hominis servi secundum se N. a. pro vita hominis servi, quatenus ratione operarum suarum erat utilis Domino C. a. Vita servi non secundum se, sed ratione operarum, quas ejusmodi servus Domino præstare debet, & potest, pretio æstimatur, ejusque jactura computatur inter damna realia Domini.







# TRACTATUS III.

**A**mplius quidem hac in materia excurrendi se offert campus. Quia vero materia hæc plerumque Juris-Consultos tangit, sufficet, hic saltem aliqua explanare, reliquæ Juri Canonico, & Theologiæ morali reservare. Inde sit

## DISSERTATIO I.

### *De Contractibus in genere.*

### ARTICULUS I.

#### *De Natura, divisione, & requisitis Contractus.*

##### §. I.

#### *Quid, & quotuplex sit Contractus?*

**C**ontractus potest dupliciter accipi, large scilicet, & stri- 534  
cte: *Large* acceptus convenit cum simplici pacto, ac ut genus sub se comprehendit omnem prorsus contractum, seu gratuitum, seu onerosum. *Stricte* autem acceptus sub se continet solum contractum onerosum, qui nimirum parit obligationem reciprocam ex utraque parte paciscentium.

Contractus *late* sumptus, seu *pactum* definitur, quod sit duorum, vel plurium in idem placitum, & consensus. L. I. ff. de Pactis. Scotus 4. d. 46. q. I. §. ad solutionem. ac alii. Ratio hujus definitionis est; quia nullus contractus potest cogitari, in quo non plures convenient, & consentiant in unam sententiam in ordine ad aliquid dandum, faciendum, vel omittendum. Et hac de causa donatio est contractus, vel pactum; quia est consensus duorum, unius dantis, alterius acceptantis.



Insuper ad contractum non sufficit, ut quovis modo duo in idem consentiant, sed necessarium est, ut consensus suos in se mutuo dirigant, ac unus det, vel promittat, alter acceptet. Hinc si duo quidem consentirent inter se de re aliqua alteri tertio danda, non esset contractus, nisi & tertius mutuo consensum præberet acceptando: ut recte advertit Reiffenstuel in Theolog. moral. T. 8. d. 1. n. 5.

Contractus *strictæ* sumptus, & græce συναλλαγμα dictus, definitur, quod sit pactum reciprocum onerosum, quod ex utraque parte paciscentium obligationem parit. Reiffenstuel cit. n. 8. Et desumitur ex L. *Labeo*. ff. de V. S. ibi: *Contractus est ultro, citroque obligatio*. Vel potes etiam sic describere: Contractus est duorum vel plurium in idem consensus, ultro citroque obligationem pariens. Tales contractus sunt emptio, venditio, locatio, conductio, & hujusmodi; nam in contractu venditionis obligatur venditor tradere mercem, emptor vero solvere pretium.

Varie dividi potest contractus: 1. in *lucrativum*, & *onerosum*. 2. in *implicitum*, & *explicitum*, id est, in contractum, & quasi contractum, de quibus vide dicta num. 504. & 509. Hoc solum addo: juxta Reiffenstuel 1. Decret. T. 35. n. 12. inter tacitos, & implicitos contractus etiam numerari actionem illam, qua creditor reddit debitori cautionem, seu chirographum suum; per hanc enim redditionem censetur tacite, & interpretative pacisci de non petendo debito, ac illud remittere. L. 2. ff. de *Pactis*. Non autem tacite redditur debitum, si debitori restituis pignus, uti statim habet lex sequens, seu 3. ff. *eod. tit.* Cujus disparitatis duplicem rationem dat Reiffenstuel allegatus; quia redditio chirographi nullam aliam affert utilitatem debitori, nisi ut eum liberet a solvendo debito: quare ne frustra fiat actio hæc redditionis, censetur ideo reddi. Aliud est de pignore. Vide ibi.

Dividitur 3. in contractum *bonæ fidei*, & *stricti juris*. Contractus *bonæ fidei* dicuntur, circa quos judex multa, pensatis circumstantiis, arbitrari potest ex æquo & bono. Hi distincte enumerantur §. *Actionum*. 28. Instit. de *Actionibus*, scilicet emptio, ven-



venditio, locatio, conductio, depositum, commodatum, mandatum, tutela, pignus, societas &c. alique ibi enumerati: quibus adde contractus a Principe initos, cujus dignitatem decet liberalis interpretatio juxta Glossam in L. *Princeps*. ff. de V. S. Contractus *stricti juris* sunt, in quibus iudex alligatur ad verba contrahentium, ut sunt liberalis promissio, stipulatio, donatio, feudum, mutuum, Emphytheusis. L. *Ad aures*. ff. de *Æditio edicto*. quia ratio dicit, ut non fiat lata interpretatio in præjudicium liberaliter promittentis, donantis, infeudantis &c.

Dividitur 4. in *nominatum*, & *innominatum*. *Nominatus* est, qui proprium, & specificum nomen in jure habet, ut emptio, locatio &c. *Innominatus* est, qui caret nomine determinato: cujusmodi quatuor recensentur: *do, ut des: facio, ut facias: do ut facias: facio, ut des*. Et quamvis hi contractus, quos innominatos dicimus, vocari soleant *permutationes*; tamen hoc nomen permutationis est genericum, & omnibus aliis contractibus etiam nominatis convenire potest.

Dividitur ulterius Contractus generaliter sumptus pro pacto in pactum *nudum*, & *vestitum*. *Pactum nudum* est, quod parit tantum obligationem naturalem, non autem civilem; nam vi pacti nudi in foro externo non conceditur actio, sed tantum exceptio, saltem de jure communi, quidquid sit de consuetudine. *Pactum vestitum* est, quod vestitur certa solemnitate civili: unde & in foro externo ac civili tribuit actionem, vi cujus altera pars a iudice ad insistendum contractui compelli debet. Vestiuntur autem pacta 6. modis: 1. Si ex parte Actoris contractus traditione rei sit impletus. 2. Si contractus sit nominatus. 3. Si stipulatio accesserit. 4. Si pactum etiam non vestitum fuerit adjectum vestito, quasi in uno continenti. 5. Si gaudeat privilegio legis: si nimirum sit pactum aliquod ex iis, quibus specialis aliqua lex actionem concedit, cujusmodi referuntur a Glossa in L. *Juris Gentium*. §. *sed cum nulla*. & *Igitur*. ff. de *Pactis*. 6. Si fuerit juramento firmatum. Vide Reiffenstuel cit. L. 1. Decret. t. 35. n. 19.



## §. II.

*Qualis consensus requiratur ad contractum?*

535

ASSERO : Ad valorem contractus requiritur verus consensus internus. Herincx disp. 1. de contractibus. n. 23. cum communiori contra Vasquez, Turrianum, Basilium, Poncium, Dicastillo, qui putant, ad validum contractum sufficere, quod aliquis libere proferat sola verba externa significantia contractum, fiste tamen, & absque animo se obligandi.

Prob. 1. L. 1. ff. de Pactis dicitur, quod pactum sit *duorum vel plurium in idem placitum, & consensus*: atqui ista lex loquitur de vero, & non simulato placito, & consensu: ergo pactum debet esse verus consensus, & non solum simulatus.

Prob. 2. L. 55. ff. de obligationibus & actionibus. habetur: *In omnibus rebus, quæ dominium transferunt, concurrat oportet affectus ex utraque parte contrahentium; nam siue ea venditio, siue donatio, siue conductio, siue qualibet alia causa contrahendi fuit, nisi utriusque animus consentit, perducere ad effectum id, quod inchoatur, non potest*: ergo requiritur etiam animus, & affectus, ac consensus internus ad validum, & obligantem contractum, & quidem omnem.

Prob. 3. ex paritate a contractu matrimoniali, qui est certo invalidus, si desit consensus internus ex una parte contrahentium, ut fatentur omnes Th. Th. & Canonistæ: ergo.

Prob. 4. Omnis contractus, & pactum est lex privata, quam sibi ipsi imponunt contrahentes. L. 51. ff. de Actionibus empti. L. 1. C. de Pactis. L. 23. ff. de R. J. atqui de essentia legis est consensus, & actus internus voluntatis Legislatoris, ergo etiam de essentia contractus & pacti est actus voluntatis contrahentium. Quemadmodum ergo nulla lex obligat, aut existit, si desit in Principe interna voluntas obligandi, ita etiam nullus contractus qua talis, seu sub ratione contractus obligat, si desit interna voluntas vel unius contrahentis.

Objic.



Objic. 1. Pacta verbis externis inita sine animo interno 536  
se obligandi, habentur pro validis in foro externo: ergo sunt  
valida. R. 1. Retorq. Argum. Etiam matrimonium, & profes-  
sio Religiosa, ac donationes gratuita, quæ juxta AArios sine  
animo interno sunt invalidæ, habentur pro validis in foro ex-  
terno: ergo. R. 2. D. a. habentur pro validis præsumptive, &  
si fîcte contrahens suam fictionem probare nequeat C. a. secus  
N. a. Talia pacta re ipsa non sunt valida, neque obligant: quia  
tamen, si contrarium probari nequeat, in foro externo præ-  
sumitur adfuisse animus se obligandi, sic etiam præsumuntur esse  
valida.

Objic. 2. Sufficit, quod consensus internus sit debitus. seu  
sit obligatio habendi eum, etsi actu non sit præstitus: ergo non  
requiritur actualis consensus internus. A. p. Eo ipso, quod ta-  
lis consensus sit debitus, ex eo omisso jam sequitur obligatio  
præstandi id, quod fuit externe contractum. Atque hæc obliga-  
tio oritur ex ipsa injuria, quæ fuit alteri parti per fictionem,  
& simulationem externam illata: ergo. R. N. a. utrumque; Esto  
enim, quod consensus sit debitus, & quod ejus omissio sit in-  
juriosa, tamen contractus ejusmodi externus sine consensu in-  
terno nihil operatur, neque habet vim obligandi sub ratione  
contractus; cum essentia & virtus obligativa contractus confi-  
stat vel unice, vel principaliter in consensu voluntatis. 2. In-  
juria, quam fîcte contrahens infert, sistit præcipue in hoc, quod  
mendaciter & fîcte procedat, quæ tamen non debet reparari per  
observantiam pacti, quod nullum est, & nullam parit obliga-  
tionem. 3. Neque damnum alter patitur in hoc, quod non de-  
tur ei res fîcte promissa; nam per fîctam promissionem, vel si-  
mulatum contractum non acquisivit jus ad rem sic promissam.  
4. Si nihilominus per fictionem aliquis sit alteri causa aliorum  
damnorum, quæ distinguuntur a carentia rei in contractum de-  
ductæ, & a fîcte contrahente promissæ, tunc tenetur quidem  
fîcte contrahens ea resarcire, sed non vi pacti, quod nullum  
est, bene autem vi injuriæ damnosæ, quatenus scilicet media  
sua fîctione existit causa ejusmodi damnorum. Imo si aliter hæc  
damna non essent reparabilia, deberet fîcte contrahens ratifica-  
re contractum, & consensum, qui defuit, postea supplere.



Objic. 3. Posset saltem Respublica autoritate sua supplere consensum internum, & signis externis eandem vim tribuere sine animo interno, quam haberent cum tali animo: ergo saltem in tali casu contractus obligaret æque, ac si adesset consensus internus. R. D. a. Ita tamen, ut hæc vis tunc non oriretur ex natura contractus C. a. ut oriretur illa ex natura contractus N. a. In tali casu non esset obligatio vi contractus, utpote essentialiter consistentis in consensu duorum contrahentium: sed tota hæc obligatio oriretur vi legis, aut voluntatis Principis, vel Reipublicæ habentis dominium altum in bona subditorum: adeoque fieret tunc quædam donatio, vel translatio domini per ipsum Principem vel Rempublicam, ut contingit in casu præscriptionis, non per personas privatas paciscentes, ut fit in contractu.

Dices: Respublica supplet consensum in pactis tacitis; si ve enim consentiat conductor prædii, si ve non consentiat, res in prædium illatæ sunt tacite hypothecatæ locatori: ergo. R. D. a. & talia pacta tacita, in quibus tantum fingitur a jure, vel præsumitur consensus contrahentium, sunt pacta vere talia N. a. sunt pacta analogice talia C. a. Pacta tacita ejusmodi, de quibus in distinctione est dictum, habent quamdam similitudinem cum pactis veris, quatenus ex juris dispositione eosdem effectus operantur, ac vera pacta: differunt tamen ab his; quia vera pacta hunc effectum operantur ratione consensus veri, & actu præstiti, pacta autem tacita tantum ratione dispositionis, & fictionis juris.

Objic. 4. Si aliquis, ignorans naturam contractus, vellet quidem contrahere, & ex hac intentione poneret signa externa contractus, nollet autem simul se obligare, talis a parte rei verum contractum celebraret: atqui talis non haberet consensum internum: ergo etiam sine consensu interno potest dari verus contractus. R. N. M. Si enim utraque hæc volitio contrahendi, & se non obligandi est efficax, non potest fieri contractus: imo sic volens contrahere, vellet aliquid impossibile, sicut ille, qui vellet equitare sine equo, aut alio animali, cui insideret. Si tamen voluntas contrahendi sit omnino efficax & absoluta, voluntas autem se non obligandi sit quasi conditionata, & minus efficax, ac ex suppositione, quod sine tali animo, & consen-



§. II. Qualis consensus requiratur ad contractum? 789

si interno stet natura contractus, tunc valebit contractus vi alterius intentionis efficacis præponderantis: prout in simili dicitur de Ministro Sacramenti, quando is habens duas intentiones oppositas administrat Sacramentum.

Uterius ad consensum validum pro contractu requiritur:  
1. ut sit mutuus & reciprocus ex utraque parte contrahentium, prout omnes fatentur. 2. ut sit aliquo signo externo expressus; alias enim non posset alteri contrahenti intimari, nec ab eo acceptari: quæ tamen acceptatio ita necessaria est ad valorem pacti, vel contractus, ut sine hac nullam obligationem inducat. De qua acceptatione forte plura, quando de promissione, & donatione agemus. 3. Requiritur, ut signa externa manifestati-  
va consensus interni ad alterum dirigantur. Hinc, si aliquis exterius verba promissionis proferret, & promissarius in occulto præsens ea audiret, & acceptaret, non foret valida acceptatio; quia in hoc casu verba promissoria non sunt ad ipsum directa. Debet ergo voluntas ex intentione seria promissionem suam vel per se, vel per alium a se missum alteri intimare, & sic utriusque voluntas uniri, prout recte discurret Herincx d. 1. de Contractibus n. 27. 4. Denique requiritur, ut talis consensus acceptetur ab altero, ut colligitur ex dictis. Plura de acceptatione inferius dicentur.

Hoc præterea notandum est, ad completum contractum, ac dominium per illum transferendum requiri etiam traditionem; nam, ut ait Lex *Traditionibus. 20. C. de Pactis. Traditionibus & Usucapionibus dominia rerum, non nudis pactis transferuntur: nimirum, si venditio aut aliqua iusta causa præcesserit*, ut dicitur *L. Nunquam. 31. ff. de acquirendo rerum dominio*. Necessitas autem traditionis non est de jure naturæ, ut est per se clarum, sed est de jure positivo statuta: tum quia congruit, tradi res: tum quia sic certius evitatur incertitudo dominiorum.

Sunt tamen casus aliqui excepti, in quibus sine traditione per contractum in alterum transfertur dominium: ut 1. Si quid venditum, donatum aut legatum &c. fuerit Civitatibus, vel Ecclesiis, aut piis locis, aut pro redemptione Captivorum.



2. Beneficii Ecclesiastici dominium acquiritur sola collatione, & acceptatione ante ejus traditionem, vel apprehensionem. 3. Jus reale, & dominium hæreditatis acquiritur sola aditione: seu acceptatione, & professione, quod quis velit esse hæres, five deinde talis professio fiat per verbum, aut factum. 4. Si alicui legatur res in individuo: ubi legatarius dominium acquirit, quamprimum hæres hæreditatem adit. 5. Si alicui donatio est facta sub modo, vel conditione, ut donanti alimenta præstet: si ista non præbeat, redit dominium rei donatæ statim ad donatorem. 6. Princeps, si vult uti suis Privilegiis, potest absque traditione transferre dominium. An autem actu velit uti hisce suis privilegiis, ex verbis, quibus donat, vel contrahit, desumendum erit: si nihil exprimat, censetur se accomodare legibus communibus. 7. In contractu societatis omnium bonorum per matrimonium, bona statim fiunt communia absque traditione.

---

## ARTICULUS II.

*An dolus, vel error obscent valori contractus?*

§. I.

*Notanda, & aliquæ Conclusiones.*

537

NOTA I. Contrahentem in celebratione contractus posse decipi dupliciter, scilicet a se ipso, aut ab alio. Priore modo decipitur, quando propria opinione, & a nemine alio inductus, putat rem, quæ in contractum deducitur, esse aliam, quam est: ut si ex propria erronea persuasione judicet, hanc personam, quam vult ducere in uxorem, esse nobilem, divitem, cum tamen talis non sit: vel si putat, illud, quod emit, esse gemmam, cum tamen sit merum vitrum. Atque hæc deceptio absolute *error* vocatur. Posteriore modo potest contrahens decipi ab alio, nempe a contrahente, vel alia tertia persona ad contractum non pertinente, ut si a talis personæ assertis sedu-

ctus



Stus credat, rem, de qua paciscitur, esse aliam, quam est. Et hæc deceptio vocatur *dolus*.

Nota 2. Errorem, vel dolum in contractibus posse contingere circa *substantiam rei*: ut si putes, te emere aurum, & emas aurichalcum, aut si putes, te ducere Catharinam, & ducas Bertham, vel circa *accidentia*, & *qualitates rei*, ut si emas equum octennem, putans esse quadrimum, aut si ducas in uxorem Annam plebeiam & pauperem, putans esse nobilem & divitem. Regula autem, qua dignosci possit, an error in contractu circa substantiam, vel accidentia versetur, inferius dabitur, & per exempla practica declarabitur.

Nota 3. Errorem & dolum tam substantialem, quam accidentalem ulterius dividi in *antecedentem*, & *concomitantem*. *Antecedens* est, quidat causam contractui, ita ut eo absente contractus non fieret. Error *concomitans*, *consequens*, & *incidens* est, qui non dat causam contractui, seu quo absente contractus adhuc iniretur: v. g. si scivisses, hoc vinum esse recens, non emisisses: in hoc casu error iste accidentaliter dat causam contractui; quia hic non fuisset initus absente tali erronea persuasione. Si autem tempore emptionis ita fuisti dispositus, ut adhuc emereres vinum hoc, etsi scivisses, illud esse recens, quamvis pro minori pretio, tunc est error incidens. H. N.

Affero 1. Error, vel dolus circa substantiam rei non solum antecedens, sed etiam concomitans, seu incidens vitiat, & irritat contractum. Ita DD. communiter. Prob. 1. Contractus est essentialiter consensus: atqui consensus errantis est nullus L. 9. C. de *Juris & facti ignorantia*; voluntas enim non potest ferri essentialiter in incognitum: ergo etiam contractus errantis circa substantiam rei illius, circa quam contrahitur, est nullus. P. 2. ex L. 45. ff. de *contrahenda emptione*. ubi dicitur, nullam esse venditionem, si vendatur aurichalcum pro auro. P. 3. Contractus, & pactum est essentialiter consensus duorum in idem: atqui, quando unus contrahens errat circa substantiam rei, quæ est objectum contractus, tunc jam non duo consentiunt in idem; cum errans consentiat in rem diversam ab illa, de qua contrahitur.



hitur, v. g. in aurum, non in aurichalcum, in gemmam, non in vitrum &c.

Hæc etiam vera sunt, si error sit antecedens, sive concomitans; error enim concomitans, etsi non causet positivum involuntarium, tamen causat non voluntarium, seu negationem voluntarii, aut (ut alias dici solet) involuntarium negativum: atqui contractus debet esse positive voluntarius circa substantiam rei, de qua contrahitur, utpote in quam essentialiter debet consentire: ergo neque potest esse negative involuntarius, seu non voluntarius circa eandem substantiam. C. patet; quia negatio, & carentia voluntarii non potest stare cum positivo voluntario circa idem omnino objectum. Ex quo habes, quod ejusmodi contractus, ubi unus contrahentium errat circa substantiam, nullam omnino pariat obligationem.

Objic. Quando res inaurata venditur pro aurea, fit error circa substantiam, & tamen venditio est valida. L. 14. ff. de contrahenda emptione. ergo etiam error circa substantiam non invalidat contractum. R. 1. opponendo L. 41. ff. eodem. ubi contractus declaratur nullus, quo mensa auro cooperta, vel inaurata pro solida, id est, pro vere aurea venditur. Imo in ipsa lege 14. in objectione cit. ad finem dicitur: *Venditio, si res pro auro vaneat, non valet.* R. 2. in forma: per rem inauratam intelligi illam, quæ non solum in superficie parum de auro, sed etiam in ipso corpore notabilem quantitatem auri immixtam habet: ubi proinde, saltem ex notabili parte, ipsa substantia, quæ venditur, & non tantum ejus superficies & cooperimentum, aurea est. R. 3. Si præfata responsio non placet, tunc mea pace dimittatur præfata lex 14., utpote quæ satis eliditur per alias leges, quarum aliquas jam allegavi, & quibus potius standum est.

539

Assero 2. Error, vel dolus etiam antecedens, qui versatur circa accidentia qua talia, jure naturæ contractum non invalidat. Herincx disp. 11. de Contractibus. n. 35. Palao t. 14. d. 2. punc. 5. n. 19. Mastrius disp. 4. Theolog. moral. q. 1. Art. 2. n. 15. Sporer in Decalogum Tract. 6, c. 2. n. 95. & seq. Holzman T. 3. de Contract. n. 658. & alii.

Prob



Prob. 1. In hoc casu dolus non versatur circa materiam, aut substantiam contractus, sed circa causam impulsivam contrahendi, cui tanquam conditioni non alligatur consensus: ergo non tollitur consensus circa substantiam, consequenter talis contractus jure naturæ valet.

Prob. 2. Certo valet contractus matrimonii, in quo erratur circa accidentia; alias enim innumera matrimonia essent irrita, quia sæpissime aliquis contrahit cum ea, quam deceptus putat nobilem, divitem, pacificam, prudentem &c. cum tamen talis non sit: ubi tamen juxta omnes tale matrimonium, non obstante simili errore accidentali, valet, etsi aliquis nolisset contrahere, aut etiam non contraxisset, si scivisset, ejusmodi defectu laborare suam sponsam. Idem itaque est dicendum in aliis quoque contractibus.

Objic. 1. Scotus 4. d. 15. q. 2. art. 2. Conclus. 3. ad valorem & justitiam permutationis, seu contractus exigit absentiam erroris, & doli non solum in substantia, sed etiam in quantitate, & qualitate: ergo. R. cum Mastrio, juxta Doctorem requiri absentiam utriusque, sed in sensu accommo. Absentia erroris & doli circa substantiam exigitur, ne contractus reddatur omnino invalidus: absentia autem erroris circa accidentia exigitur, ne contractus sit illicitus, ac contra leges justitiæ, prohibentis ejusmodi contractum. 540

Objic. 2. Si ejusmodi accidens fuisset prævisum, contractus non fuisset initus: v. g. Petrus non voluisset emere vinum, si scivisset, esse ita recens; ergo error, vel ignorantia talis accidentis reddit contractum involuntarium, & consequenter nullum. R. N. c. Ex hoc tantum sequitur, quod absente tali errore contractus non fuisset initus: non autem sequitur, quod defacto re ipsa non sit initus; defacto enim habuit consensum in substantiam rei, de qua contrahebatur, & hoc sufficit ad valorem contractus.

Objic. 3. Saltem tunc, quando committitur error antecedens circa qualitatem, vel accidens, censetur contrahens alligare suum consensum certæ qualitati, & accidenti ita, ut nolit  
*P. Kick Theol. Tom. IV.* Hhhhh cou-



contrahere, nisi hæc vel illa qualitas subsit, v. g. ut nolit emere vinum, nisi sit vetus, & 7. vel 8. annorum: ergo dum committitur talis error antecedens, contractus est nullus. A. videtur clarum. Conf. patebit ex statim dicendis. R. N. a. Quamvis enim consensus contrahentis possit ita alligari tali qualitati, ordinarie tamen non ita censetur esse alligatus, consequenter ordinarie tales contractus adhuc valent, quod mox amplius explicabitur.

Dixi in conclusione: dolus vel error circa accidentia *qualitativa*: per quod volo indicare, quod accidentia possint per se intendi, ac <sup>ad</sup> ea intentio principalis contrahentis alligari, ita quidem, ut actu nolit esse obligatus, si hic & nunc non subsit tale accidens. In tali autem casu accidens non manet amplius accidens, sed ingreditur ipsam substantiam, & motivum contractus, quo non subsistente contractus quoque non subsistit. Ratio hujus est; quia tunc contrahens implicite, vel explicite dicit: contraho tecum puella, si sis nobilis, & non aliter: dono tibi hoc, si sis meus consanguineus, prout asseris, alias non: emo a te vinum hoc, si sit vetus, non autem si sit recens. Ubi vel ex terminis liquet, non dari consensum etiam in substantiam rei, de qua contrahitur, nisi revera adsit qualitas intenta. Quare si error circa eam contingat, contractus est invalidus ob defectum consensus essentialiter requisiti. Ex his

541

Petes regulam aliquam, ex qua conjici possit, quando aliquis contrahens censeatur ad aliquam qualitatem, vel accidens restrinxisse suam primariam intentionem?

R. I. Certum est, quod non universaliter intentio contrahentium restringatur ad tales etiam notabiles qualitates, ita ut iis non subsistentibus non valeat contractus. Ratio est: quia si universaliter alligaretur sic intentio ad omnia accidentia, & circumstantias, ita, ut contractus esset invalidus, si error antecedens circa hæc accidentia contingeret, tunc omnes fere contractus essent invalidi, vel saltem de eorum valore dubitari posset; quia plerumque aliqua circumstantia, vel qualitas deesset, cui fuisset alligata intentio. Quoties vel solus contractus matrimonii in dubium vocaretur? nihil enim frequentius auditur, quam:



quam: si scivissem, conjugem meum esse talis genii, tam pauperem, tot debita habentem &c. non eum duxissem, vere decepta sum.

R. 2. Illa prædicata, & qualitates censentur ingredi substantiam rei in contractibus, ad quæ, vel quas aut expresse per clara verba in contractu expressa actu restringitur, aut saltem implicite & virtualiter ex communi usu, vel dispositione legis censetur esse restricta intentio contrahentium. Primam partem hujus regulæ tenet Communis omnium: alteram tradit Haunold Tom. 3 Tract. 8. n. 78. & seqq. Et plane hæc res aliter non potest decidi, nisi attendendo, quid hominum usu, & consuetudine sit receptum, & quid lege sit præscriptum. Ex quo

Deduces 1. Errorem circa personam esse substantialem in matrimonio, non autem in emptione, nam ex ipsa consuetudine, & recepto usu constat, quod contrahentes matrimonium, consensum ad determinatam in individuo Personam alligent. Quare si intendas contrahere cum Petronilla, & per errorem contrahas cum Anna, matrimonium est nullum: in emptione vero habetur contrarium ex usu; venditores enim non curant, etiam emptor non sit ille, quem putant esse.

Deduces 2. In contractu venditionis errorem esse substantialem, si in re emptæ, vel venditæ fiat error. e. g. heri vidiisti equum, quem tibi alius obequitavit: hic tibi ob suas, quas in eo deprehendisti, dotes singulariter placuit. Quare redi altera die, & vis eundem equum tibi obequitatum emere: venditor vero fraudulenter producit alium, externe quidem similem priori, discolum tamen, & minime tractabilem. Tu nihil sciens de hoc dolo, emis hunc alterum equum: modo quaeritur, an hic contractus sit validus? R. negative. Ita Haunold cit. Ratio est: quia ex communi consuetudine homines solent in simili casu alligare suum consensum ad illas dotes, quas in tali equo sibi obequitato antecederent viderunt: quare talis contractus est tacite conditionatus: volo emere hunc equum, si sit ille ipse, quem heri vidi, vel cujus dotes heri vidi.



Deduces 3. Non valere legatum, si quis leget rem alienam alicujus extranei, nesciens, esse alienam. Cujus ratio non est, quasi non posset legari res aliena, si testator eam sciat esse alienam, sed est hæc; quia communiter homines non solent habere intentionem legandi rem alienam, præsertim personis extraneis, & hoc modo gravandi hæredem. Et hæc ratio in ipso textu juris insinuat, in quo deciditur iste casus §. 4. *Instit. de Legatis*. Vide Haunold cit. n. 81.

542

Affero 3. Similis error, vel dolus, etiam antecedens, circa accidentia qua talia neque jure positivo irritat contractum onerosum, sive is sit stricti juris, sive bonæ fidei. Cardinalis de Lugo, Herincx, Haunold, Mastrius, Sporer, alique quam plurimi contra alios non paucos quoad contractus bonæ fidei.

Prima pars de contractibus stricti juris, quæ inter DD. satis est communis, colligitur ex §. 1. *Instit. de Exceptionibus*. ubi dicitur: *Si metu coactus, aut dolo inductus, aut errore lapsus stipulanti Titio promissisti, quod non debueras promittere, palam est, jure civili te obligatum esse, & actio, qua intenditur, dare te oportere, efficax est: sed iniquum est, te condemnari, ideoque datur tibi exceptio quod metus causa, aut doli mali, aut in facto composita ad impugnandam actionem*. Ex quibus sic argumentor: ille contractus valet in foro civili, qui parit obligationem, & actionem civilem: atqui contractus stricti juris (qualis est juxta dicta promissio) initus ex dolo, vel errore versante circa rei accidentia parit obligationem & actionem civilem, ut ex mox cit. §. 1. *Instit.* desumitur: ergo contractus stricti juris ex dolo, vel errore initus valet in foro civili.

Secunda pars de contractibus bonæ fidei, quæ est contra multos, non adeo facile probatur. 1. Aliqui probant ex L. 5. *C. de rescindenda venditione*. ubi dicitur, venditionem, quæ est contractus bonæ fidei, dolo initam esse rescindendam: atqui, quod primum rescindi debet, antedecenter valuit: ergo talis venditio dolo inita valuit. Verum (ut notat Haunoldus *Tract. 8. de J. & J. n. 88.*) etiam contractus ipso jure invalidi dicuntur



tur rescindendi, & irritandi, sufficit enim ad eorum rescissionem, quod defacto teneant, quamvis de jure non valeant.

Probant alii 2. ex L. 13. ff. de Actionibus empti, & venditi. ubi emptori decepto conceditur actio ad interesse: ergo supponitur contractus valuisse. Verum contra est: L. 62. ff. de contrahenda emptione. etiam emptori rerum sacrarum datur hujusmodi actio, & tamen contractus fuit omnino nullus.

Probatur igitur aliter, & melius 1. ex L. Rem alienam. 28. & L. 34. ff. de contrahenda emptione. & aliis pluribus legibus apud Herinex citatis, ex quibus patet, validam esse venditionem rei alienae, quam emptor dolo inductus credidit esse venditoris: ergo valet contractus bonae fidei, qualis est venditio, et si dolo initus.

Prob. 2. Adversarii non possunt adducere ullum clarum textum, quo irritarentur hujusmodi contractus: ergo illi manent in suo valore, quem a jure naturae acceperunt; quia correctio juris naturalis sine claro textu non est asserenda. C. claret. A. probabitur ex solutione objectionum.

Prob. 3. De utroque contractu. Dolus, & metus in jure æquiparantur. cap. cum contingat. de Jurejurando. & L. dolo. C. de inutilibus stipulationibus, sed metus dans causam contractui, non irritat eum jure positivo: ergo nec dolo dans causam contractui, eum sic irritat. Accedit, quod finis ille, qui per irrationem intenderetur, magis obtineatur, si contractus valeat, & non sit irritus ipso facto, sed tantum irritabilis a decepto, si hic velit; nam finis hic est, ut exhibeatur favor decepto: atqui major favor est, si talis pro libitu suo possit stare contractu, vel eum rescindere. Tali ratione minime favetur dolo, cum dolum inferens nullum commodum ex suo dolo reportet, sed potius incommodum, ut patebit ex Assertionem sequenti.

Objic. 1. L. 7. in principio ff. de dolo. dicitur, nullam esse venditionem, si quis in hoc ipso, ut venderet, circumscriptus est. Deinde L. 3. §. 3. ff. pro Socio. habetur: Societas, si dolo malo coita sit, ipso jure nullius est. Idem fere habetur de emptione dolose, vel erronee facta L. 1. C. de rescindenda venditione: er-



go saltem contractus bonæ fidei, quales sunt societas, venditio, ac emptio sunt nulli, si dolus vel error interveniat.

R. N. c. ad primum textum dico, legem in eo loqui de Minorenni per dolum circumvento, ut venderet suum servum, qui contractus utique est nullus, cum Minorennis absque consensu Curatorum alienare non possint. Vel si hæc responsio non placet, applica istam, quam do ad sequentes duas, & alias similes leges dicendo, & distinguendo, quod hujusmodi contractus sint nullius momenti, quatenus possunt rescindi, si velit eos rescindere deceptor, penes cujus beneplacitum stat, an velit contractum ratificare, vel penitus annullare. Hinc ulterius isti contractus bonæ fidei, uti & stricti juris, sunt nulli & irriti ex parte decipientis, qui vi talis pacti non potest obligare deceptum, aut aliquid ab ipso exigere, si ipse deceptor nolit: valent autem ex parte decepti, & per errorem inducti, ita ut possit, si velit adstringere alterum ad observandum contractum. De quo mox plura.

Objic. 2. Nemo in contractu obligatur ultra intentionem: sed deceptor non habet intentionem se obligandi, nisi & alter, seu deceptor obligetur: ergo, si deceptor non obligatur, neque decipiens obligabitur, consequenter hic contractus ex utraque parte contrahentium erit nullus. R. 1. Retorq. Argum. Nemo etiam vi juris naturalis obligatur ultra intentionem: sed &c. ergo neque deceptor vi juris naturalis obligabitur, quod est contra AArios. R. 2. N. m. Deceptor enim habet intentionem se obligandi, quantum vi contractus potest, & debet obligari, si & deceptor intendat se obligare, quantum potest: atqui deceptor implicite intendit se obligare, quantum potest vi talis contractus, scilicet non stabiliter, & ita, ut possit rescindere contractum tali dolo initum: ergo & deceptor debet obligari, quantum potest, & debet, scilicet ex parte sua irrevocabiliter.

Objic. 3. Contractus bonæ fidei ex sua natura censentur excludere omnem dolum; nihil enim magis contrarium bonæ fidei, quam dolus: ergo dolus penitus irritat tales contractus. R. N. a. & supposit. quod bona fides, prout sumitur pro recto



Et dictamine conscientiae sit illa forma, a qua denominantur contractus bonae fidei; bona enim fides pro illo dictamine conscientiae accepta, in omnibus contractibus etiam stricti juris requiritur. Igitur contractus bonae fidei sunt illi, in quibus iudex potest secundum bonum & æquum quædam judicare, aut supplere, quæ per simplicitatem contrahentium non sunt expressa. Et his contractibus bonae fidei non magis opponitur dolum, quam aliis, qui sunt stricti juris. Ex quo ulterius sequitur, quod nulla sit ratio, cur leges potius velint valere contractum stricti juris, si sit dolo initus, quam contractum bonae fidei. Porro non est credibile, quod leges velint fovere dolum, & deceptorem liberare ab omni obligatione: quod tamen fieret, si ejusmodi contractus ex utraque parte contrahentium esset nullus.

## §. II.

Continuat<sup>ur</sup> præcedens materia.

ASSERO 4. Si dolo circa qualitatem qua talem det causam contractui, & proveniat ab altero contrahente, vel falsam alter contrahens sit particeps doli, tunc contractus ejusmodi, si sit natura solubilis, potest rescindi ad arbitrium decepti. Herinc<sup>x</sup> cum Comuni. 544

Prob. 1. ex L. Si dolo. 5. C. de rescindenda venditione. ubi dicitur: Si dolo Adversarii deceptum venditionem prædii te fecisse Praeses Provinciæ aditus animadverterit, sciens, contrarium esse dolum bonae fidei, rescindi venditionem jubebit.

Prob. 2. Deceptus in hoc casu patitur injuriam, quatenus dolo inducitur ad contractum, quem non fecisset: ergo hæc injuria debet reparari ab inferente dolum. Sed non potest aliter reparari, nisi deceptus restituatur in statum pristinae libertatis, in quo potest se vel libere obligare acceptando contractum, vel respuere omnem obligationem, penitus rescindendo contractum, ac si nunquam fuisset factus.

Prob. 3. Leges, quæ irritant contractum ex dolo factum, debent ita explicari, ut cedant in odium decipientis, & in fa-



vorem decepti: atqui hoc fit, si deceptus pro libitu suo potest vel annullare contractum, si is sibi sit inutilis, vel eodem stare, si sibi sit proficiuus: ergo. Quare talis contractus claudicat; quia vi illius solum gravatur decipiens, qui pro libitu suo non potest resilire: non autem sic obligatur deceptus, qui ad nutum & libitum suum potest vel resilire, vel ratificare contractum.

Dixi in hac Assertionem 1. *dolus*, non addendo etiam errorem: cujus ratio colligetur ex dicendis. Dixi 2. si *dolus proveniat ab altero contrahente*, non autem ab aliquo tertio, qui non est unus contrahentium: ratio hujus limitationis iterum mox dabitur. Dixi 3. *vel saltem alter contrahentium sit particeps doli*; non enim requiritur, ut ipse contrahens dolose & fraudulenter mendaciis &c. alterum contrahentem inducat, sed sufficit, si sit conscius doli ab aliquo tertio facti. Ratio hujus est: quia contrahens, conscius doli ab altero patrati, facit se ejusdem participem, adeoque in aestimatione morali censetur ipse decipere. Accedit, quod venditor teneatur, etiam non rogatus, omnia occulta vitia rei suae detegere L. 13. ff. *de actionibus empti*. & L. 1. ff. *de aedilitio edicto*. ergo, si hoc non facit, tollendo errorem, aut deceptionem alterius, etiam a tertio proveniente, censetur ipse dolum committere, & injuriam alteri contrahenti, v. g. emptori, inferre. Hinc ne talem injuriam continuat, debet obligationem alteri contrahenti, dummodo hic velit. remittere per rescissionem contractus.

Dixi 4. *Si contractus natura sua sit solubilis*, ad excipiendo contractus natura sua irrefcindibiles, quales sunt matrimonium, & Professio religiosa, ubi dolus accidentaliter nihil juvat ad rescindendum propter utriusque insolubilitatem.

Dixi 5. *rescindi potest ad arbitrium decepti*, & quidem propria autoritate, saltem si res adhuc sit integra, & contractus ex altera parte necdum impletus sit. Ita Henno T. 2. de J. & J. disp. 5. q. 6. conclus. 2. Rationem dat: decipiens ex justitia tenetur deceptum in priorem libertatis statum reponere ante omnem sententiam judicis: ergo & deceptus ante omnem sententiam judicis potest per rescissionem injuriam illatam excutere, & suam



suam libertatem priorem recuperare; hoc enim videtur & aequitati, & rationi consonum. Volunt tamen aliqui apud eundem, hoc non amplius habere locum, quando contractus jam ex altera parte est impletus, & sic res non amplius integra, in quo casu putant requiri sententiam judicis.

Dixi in Assertionem 6. *Si dolus det causam contractui*, ob dicenda Illatione 3. ad finem hujus §. 545

Petes: An etiam tunc errans possit rescindere contractum initum, quando alter contrahentium non est particeps doli, sed contrahens est deceptus a se ipso, & sua propria opinione, vel a tertio, qui non erat unus contrahentium? R. 1. DD. factis conveniunt apud Herincx & Holzman, quod etiam in hoc casu sponsalia, & contractus gratuiti possint irritari, & rescindi ab illo, qui est deceptus vel a se, vel a tertio.

Ratio hujus est: quia promissiones gratuita facilius dissolvi possunt, quam contractus onerosi; cum enim pendeant ex sola libera voluntate promittentis, benigne interpretandae sunt, ita, ut promittens censeatur se noluisse obligare in omnem eventum, sed tantum tunc, quando res in eodem statu permanent, & non notabiliter immutantur. Quare a DD. haec regula traditur apud Laymann: *Promissio gratuita desinit obligare, si re adhuc integra notabilis mutatio accidat*. Atque in his contractibus perinde est, siue notabilis circumstantia, ac mutatio contractui primum superveniat, siue ea tempore promissionis jam adfuerit, sed tamen fuerit invincibiliter ignorata.

De Sponsalibus ratio est: quia haec ad amorem mutuum, & matrimonium, quod est vinculum perpetuum, ordinantur, benigne explicari debent, & Sponsis relinqui libertas illa dissolvendi, si notabilis mutatio superveniat, vel cognoscatur, quae prius non adfuit, vel saltem non fuit cognita.

R. 2. Probabiliter non possunt in hoc casu irritari a persona decepta contractus onerosi. Lugo d. 22. sect. 6. n. 83. Molina, & Rebellus apud Herincx citati, Holzman, ac alii. Ratio hujus est 1., quia hi contractus dependent non solum ex voluntate unius, sed etiam a consensu alterius contrahentis, onus suum ferentis, & pariter obligati ad aliquid praestandum: ergo



go non possunt sicut gratuiti rescindi, nisi & alter contrahens consentiat, præsertim ex eo, quia alter contrahens non est causa, nec etiam est particeps doli, aut erroris. 2. Neque hic militat eadem ratio, quæ pro sponsalibus. 3. Sibi imputet deceptus a se ipso, quod rem antecederet non melius examinavit: vel si deceptus est a tertio, habet contra hunc actionem L. Si proxeneta. ff. de Proxenetis. proinde ab hoc debet ipsi compensari omne damnum secutum ex tali dolo: ergo non est ulla ratio, cur rescindere possit contractum, nolente altero contrahente. 4. Jus rescindendi contractum provenit ab injuria, quam unus contrahens patitur ab altero contrahente: atqui in proposito contrahens non patitur injuriam ab altero contrahente, sed a persona tertia, vel debet sibi ipsi totum damnum adscribere: ergo tali contrahenti decepto non competit jus rescindendi contractum. Ex his.

Deduces 1. Quod in his casibus deceptus habeat contra alterum non quidem actionem *redhibitoriam*, quæ est ad rescindendum contractum, bene vero actionem *quanto minoris*, id est, ut reducatur contractus ad æqualitatem, & de pretio tantum refundatur, quanto minoris res emptæ ob vitium detectum æstimmatur.

Deduces 2. Quod in hoc casu etiam contra tertium, qui decepit, detur actio de damno, & dolo: imo tertius in conscientia tenetur illi refarcire omnia damna, secundum omnes, quia suo dolo injusta eorum causa existit.

Deduces 3. Si error, aut dolus etiam ab altero contrahente causatus, non sit antecedens, id est, si non det causam contractui, sed non obstante illo contractus adhuc fuisset initus, quamvis alio modo, v. g. minori pretio, in hoc casu non posse rescindi contractum; quia injuria tantum est facta quoad excessum pretii, adeoque iste solummodo est compensandus, & ad hunc datur actio *quanto minoris*. Unde fingamus, quod emas vinum Austriacum, ex alterius contrahentis mendaci persuasionem credens, esse Rhenanum, empturus tamen, sed minori pretio, etsi scias, esse Austriacum. In hoc casu tenet contractus, nec potes eum rescindere: nihilominus competit ti-

bi



bi actio adversus decipientem venditorem, & huic incumbit obligatio solvendi, quantum interest, dolum non fuisse commissum, teneturque contractum ad æqualitatem reducere. Communis cum Holzman, & aliis.



# ARTICULUS III.

## De Contractibus metu initis.

### §. I.

#### *Premittuntur faciliora.*

**N**OTA I. Aliud esse vim, vel violentiam, & aliud esse metum. *Vis*, vel *violencia* est corporalis coactio ad patientem, vel faciendum aliquid, ut, si tibi violenter eripiatu-  
 dum, si vi curventur genua coram Idolo. Definitur L. 2. ff. liber, si vi curventur genua coram Idolo. Definitur L. 2. ff. *de eo, quod metus causa*. taliter: *Est majoris rei impetus, qui repelli non potest*, seu cui simpliciter nequit resisti. Atque hæc vis facit simpliciter involuntarium, tollitque consensum in rem illam, quam quis pati, vel facere cogitur. *Vis*, seu violentia multiplicitur dividitur, ut videri potest apud Reiffenstuel L. 1. Decret. Tit. 40. n. 4. & seqq.

546

*Metus est instantis, vel futuri periculi causa mentis trepidatio*, ut loquitur textus L. 1. ff. *de eo, quod metus causa*. Seu, metus est passio mentis, fugientis malum aliquod sibi imminens: & accedit, quando quis propter instans, vel futurum periculum aliquid agit, quod alioquin, absente tali periculo, sponte non ageret: veluti si ad effugiendam mortem mercator tempore naufragii merces jactet in mare, vel si minis compulsus viator latroni det pecuniam, eam alias minime daturus. Metus dicitur etiam *vis conditionata, compulsiva, ac modificata*.

Nota 2. Metum etiam gravem non causare involuntarium simpliciter, sed tantum secundum quid. Unde ille, qui ex metu



tu aliquid agit, simpliciter voluntarie id facit, quamvis non spontanee. Ita tenet communis Th. Th. & Canonistarum sententia, & patet ex dictis in Tractatu de Actibus humanis. Quare, qui ex metu mali cujusdam adorat idola, vel aliquid aliud intrinsece malum facit, peccat; cum habeat sufficiens voluntarium. Ratio hujus ulterior est ex communi illo dicto: *coacta voluntas est voluntas*. Insuper qui ex metu agit, illud, quod agit, libere assumit tanquam medium ad evitandum majus malum, quod timet: sic viator libere dat pecunias latroni minitanti, ut per hanc largitionem tanquam medium evadat mortem, quam alias inferendam timet. Hinc notabilis est disparitas inter vim *præcisam*, & *absolutam*, seu violentiam, & inter metum, qui est tantum vis *conditionata*.

Nota 3. Metum posse incuti *ab intrinseco*, vel *extrinseco*. Metus *ab intrinseco* incussus est, qui provenit a causa naturali, & non libera, puta a morbo, incendio, feris, periculo naufragii &c., ad quod declinandum forte emittis votum. Metus *extrinsecus* est, qui incutitur a causa libera creata, puta ab homine, minis te adigente ad aliquid faciendum, vel omitendum. Hic metus aliquando *juste* inferitur, ut si incutiens habeat jus, vel tu causam præbueris alteri, ut tibi jure possit metum inferre: ut si tibi judex ob flagitia tua carcerem, vel excommunicationem minitetur. *Injuste* autem incutitur, quando inferens nullum habet jus, aut causam inferendi metum: ut si latro metu mortis adigat viatorem ad dandos 10. aureos. In tali acceptione per decursum metum justum, & injustum accipiam, quamvis alias metus *justus* etiam cum gravi confundatur: qui proinde quoque vocatur *probabilis*, seu talis, quem jura probant, & pro tali habent, qui merito aliquem movere possit ad aliquid faciendum, vel omitendum.

Nota 4. Metum alium esse *gravem*, alium *levem*. *Gravis* est, qui cadit in virum constantem, vel constantissimum, seu est talis, qui hominem alias fortem, & non nimis meticulosum afficere, & movere potest, ut aliquid faciat, vel omittat, quod alias absente tali metu non faceret, vel omitteret. Et hic metus est *absolute gravis*, qui scilicet tunc datur, quando malum, quod



quod timetur, est tantum, ut quemvis virum fortem, & constantem movere valeat. Hujusmodi mala metum absolute gravem causantia sunt mors, mutilatio, carcer diuturnus, exilium diuturnum, atrox cruciatus, amissio status honorifici, jactura bonorum omnium, vel notabilis partis eorundem, aut aliud prioribus æquivalens malum, ut colligitur ex variis textibus juris. Metus autem *respective gravis* est tunc, quando malum, quod timetur, est tale, ut non quemvis virum constantem & fortem, sed tantum homines magis meticulosos movere valeat, uti pueros, scæminas, Minorennēs, senes, ac quosdam minus cordatos viros, apud quos sæpe minus malum sufficit ad excitandam gravem trepidationem, & perturbationem animi. Unde in tali casu dabitur metus *respective gravis*, qui tunc in tali particulari casu idem operabitur, ac metus absolute gravis. Quare de metu tam *respective*, quam absolute gravi pariformiter conclusiones, & Assertiones nostræ procedent.

*Metus levis* est trepidatio animi, orta ex malo imminente levi, uti est vexatio modica, levis indignatio Superioris, vel Parentum, levis infamia &c. imo etiam levis tantum metus oriri potest ex malo gravi, si illud non sit imminens, sed solum vane apprehensum, vel si ille, qui mina ur malum, hoc inferre non potest, aut non solet, aut illud alia ratione declinari potest. Ex quo

Nota 5. Juxta Scotum 4. d. 29. q. un. ad metum gravem has duas condiciones requiri: 1. est, ut malum, quod timetur, sit vere grave, intellige, vel absolute respectu omnium, vel *respective* respectu certarum personarum. 2. est, ut ejusmodi malum non vane & ex levibus conjecturis, sed vere probabiliter credatur imminere. Pro declaratione hujus secundæ conditionis alii apud Reiffenstuel cit. n. 19. addunt sequentes: & sic requirunt 3., ut metum incutiens possit minas exequi: 4. ut soleat easdem executioni dare: 5. ut metum patiens non possit facile avertere malum, v. g. monendo, rogando, judicem implorando, alienum auxilium procurando, fugiendo &c.

Nota 6. Ad metum gravem perinde esse, an tibi, vel personis tibi valde conjunctis intentetur malum grave, ut puta



parentibus, liberis, uxori, domesticis, amicis, probabiliter etiam consanguineis; & affinibus usque ad quartum gradum. Ratio hujus est: quia mala talium personarum putamus esse nostra. Parum etiam refert, siue metu impellaris ad aliquid dandum illi, qui metum infert, vel alteri. Ita P. Pichler tit. 40. n. 3. ad finem.

Nota 7. Metum posse incuti vel a contrahente altero, vel ab aliquo tertio: item ad extorquendum contractum, vel ob alium finem. H. N.

547

Affero 1. Valet in foro interno, & externo actus, vel contractus metu gravi intrinseco initus, ita quidem, ut neque propter ejusmodi metum sit rescindibilis. Communis. Prob. 1. ex communi omnium fidelium sensu, qui putant, se firme obligari ad servanda vota, quæ ex timore mortis emisissent in ægritudine &c., item ad exequendas promissiones, quibus ex timore mortis aliquid polliciti sunt, ut eos ex periculis aquæ, vel incendii liberarent: ergo. Prob. 2. In similibus casibus habetur consensus liber, & voluntarius: ergo tales contractus valent. Deinde non intervenit injuria, propter quam deberent rescindi ejusmodi actus: ergo firme & stabiliter valent, nec rescindi possunt.

Affero 2. Valent etiam, nec rescindi possunt contractus initi ex metu gravi extrinseco, juste tamen incusso. Reiffenstuel cit. n. 27. cum communi contra paucos. Prob. 1. ex una parte consensus ex tali metu præstitus est liber, & voluntarius, consequenter sufficiens ad valorem contractus, ex altera parte per ejusmodi metum, utpote justum, non inferitur injuria, propter quam rescindibilis foret contractus: ergo contractus talis valet, nec rescindi potest.

Prob. 2. In hoc casu metum patiens sibi ipsi metum infert, vel saltem est causa, cur talis metus inferatur: ergo non est ratio, cur talis actus ex metu factus non valeat, aut cur debeat rescindi, prout totum colligitur ex L. Si mulier. 21. in principio ff. de eo, quod metus causa.

Prob.



Prob. 3. Metus justus excommunicationis incussus a lege, vel iudice non invalidat matrimonium; valet enim matrimonium, si ille, qui sponsalia habuit cum Bertha, metu excommunicationis ad contrahendum matrimonium cum ea, ut colligitur ex cap. *ex Litteris*. 10. de *Sponsalibus*. atqui metus excommunicationis est gravis, cum nulla poena major sit in Ecclesia, quam excommunicatio: ergo actus, vel contractus initus ex metu gravi iuste incusso est validus. Ex his

Deduces 1. Valere matrimonium, & professionem religiosam initam ex metu in casu, quo Juvenem in stupro vel alio crimine deprehentum minitaris ad iudicem deferre, nisi matrimonium cum puella violata ineat, vel Religioignem profiteatur. Lugo de Contractibus d. 22. n. 160. Pichler cit. n. 8. circa finem, ubi pro se allegat etiam Palao p. 1. Tract. 2. punct. 10. n. 3. Ratio est: quia minae istae sunt iustae, cum habeas jus accusandi criminofum, ut suppono.

548

Nec dicas: Quamvis talis homo habeat jus accusandi, non tamen habet jus tali medio & metu extorquendi consensum matrimonii &c.: ergo talis metus infertur iniuste. R. enim. neg. Ant. nam, ut recte ait Lugo, accusatio de se est iusta, & habes jus ad eam: ergo non videtur ulla ratio, cur ea fiat iniusta, dum assumitur tanquam medium ad matrimonium obtinendum; alia enim media de se iusta, dum ad finem matrimonii adhibentur, non fiunt iniusta: ergo neque ejusmodi jus accusandi. Neque urget, quod per ejusmodi minas inferatur metus; nam non obstat metus, dummodo non sit iniustus; etiam minae excommunicationis iuste ferendae non obsunt valori matrimonii: ergo a pari &c.

Deduces 2. Toties valere contractum ex metu initum, quoties malum, quod minitaris, & ex cujus metu contractus sequitur, iuste, id est, citra peccatum injustitiae potuisti inferre alteri, cui talem metum incutis etiam in ordine ad extorquendum contractum. Ratio semper est eadem; quia videlicet talis metus non est iniustus.

Dedu-



Deduces 3. Si Pater minitetur defloratori, vel stupratori filiae suae, se eum velle occidere, nisi eam ducat in matrimonium, tunc hoc matrimonium non valere. Ratio est: quia matrimonium metu injusto gravi extortum est nullum, ut Tom. V. pluribus declarabitur: atqui talis metus est gravis, & simul injustus; cum homo iste non habeat jus autoritate privata occidendi stupratorem, vel reum: ergo. Si autem hoc metu injusto extorqueret contractum alium ex natura sua rescindibilem, v. g. donationem certae pecuniae, tunc is quidem valeret, sed non stabiliter; posset enim irritari juxta dicenda §. seq., quia nimirum omnis contractus natura sua rescindibilis, vel irritabilis metu gravi injusto, directe ad extorquendum ejusmodi actum incusso initus, potest ad arbitrium metum passi irritari.

Deduces 4. Si metum incutiens malum, quod minitatur, tenetur quidem non inferre ex charitate, aut alia virtute, non autem ex justitia, tunc adhuc contractum ex tali metu incusso extortum valere, neque posse propter metum irritari, etsi sit ceteroquin irritabilis. Ratio est: quia talis metus non est injustus, adeoque non infert injuriam, propter quam deberet contractus rescindi, aut omnino esse nullus. Unde Medicus, qui aegroto extreme, vel graviter decumbenti solum ex charitate, eoquod alium Medicum habere nequeat, non autem ex justitia, scilicet ex pacto implicito, vel explicito tenetur succurrere, potest minitari, se velle omittere medelam, nisi aegrotus promittat, se velle suam filiam in uxorem ducere: ubi, si hisce minis adductus infirmus promittit, eam accipere velle in conjugem, valet, & non potest rescindi ejusmodi promissio, uti & matrimonium vi ejus secutum. Ita sentiunt Mezger, & Holzman; in hoc enim casu medicus metum inferendo solum peccat contra charitatem, non autem contra justitiam. Alia plura videri possunt apud Lugo cit. a num 162. Interea si similes etiam quandoque implexi casus ponuntur objectionis gratia contra nostram assertionem, tunc iis non multum immorandum, sed quaerendum ex Adversariis, an supponant in tali casu, metum esse juste, vel injuste incussum? si juste incussus est, tunc valebit contractus, & neque rescindi poterit, etsi alias talis contractus natura sua sit rescindibilis: si est injuste incussus, tunc casus non est contra nostram assertionem.

Objic.



Objic. 1. Etsi lex possit hominem metu justo cogere ad matrimonium ineundum, non tamen sequitur, quod etiam homo, praesertim privatus, id possit: ergo nostrae probationes, & deductiones non subsistunt. R. N. a. Ideo talis metus, qui a lege, vel iudice incutitur, non invalidat matrimonium, quia ex una parte relinquit sufficientem libertatem, & ex altera parte non infert injuriam: atqui ista ambo praestat metus justus ab homine privato incussus; nam libertas, & voluntateitas est aequalis in utroque casu, & injuria in altero pariter abest; quia & homo privatus utitur jure suo. Neque potest ostendi, quod homo privatus injuriam inferat, dum utitur jure suo. 549

Objic. 2. Cap. *Veniens. 15. de Sponsalibus.* dicitur, quod valeat matrimonium de praesenti, nisi *Maritus metu coactus, qui posset in virum constantem cadere, feminam desponsaverit*: ergo metus cadens in constantem virum invalidat matrimonium, etsi justus sit; nam Capitulum loquitur generaliter, & indiscriminatim. R. D. a. nisi coactus fuerit metu injusto C. a. metu justo N. a. Capitulum intelligendum est secundum subjectam materiam, & secundum terminos habiles, ac phrasin juris, juxta quam ille non dicitur metum, vel vim pati, qui juste cogitur, ut colligitur ex L. *Continet. 3. §. Sed vim. ff. de eo, quod metus causa.* ubi sic habetur: *Sed vim accipimus atrocem, & eam, quae adversus bonos mores fiat, non eam, quam Magistratus intulit, & jure honoris quem sustinet.* Idem videtur docere Glossa in Cap. *cum Dilectus. de iis, quae vi, metusque causa sunt. & metum mortis.* Idem tenet Lugo disp. 22. de Contractibus in genere. n. 159. citans Immolam. 2. Capitulum in objectione citatum agit de viro, quem Pater invenit in propria sua domo dormientem cum sua filia: unde & eum statim coegit, ut cum eadem contraheret matrimonium, & credibiliter minitatus est mortem, nisi vellet inire hoc matrimonium: atqui metus mortis fuit injuste incussus, ut patet ex dictis: ergo iste casus non est contra nostram conclusionem, quae loquitur de metu juste incusso.

Objic. 3. Cap. *Gemma. 29. de Sponsalibus.* reprobat omnis poena, etsi ceteroquin justa, solvenda ab illo, qui resilit a contractu sponsalicio, ne alias matrimonium, quod liberrimum



esse debet, potius metu pœnæ, quam amore coalescat : ergo idem dicendum est in proposito.

R. 1. Retorq. Argum. & opponendo alia capitula, quibus timore excommunicationis, tanquam pœnæ maximæ, sponsus vel sponsa ad matrimonium compelli potest. R. 2. N. a. quod ibi reprobetur omnis pœna secundum se justa. Notes ergo, communem esse sententiam inter Th. Th., quod pœna ab illo solvenda, qui sine justa causa resilit, sponsalibus recte apponatur ex conventionione contrahentium : invalide vero, ac injuste adjiceretur, si per pactum solvi deberet ab illo, qui justa de causa resilit. Hancque ultimam, non autem priorem adjectionem pœnæ, tanquam libertati matrimonii contrariam, reprobatur citatum Capitulum, utpote quod loquitur de sponsalibus in impubertate, imo infra septennium contractis, a quibus licite & juste secundum dispositionem juris resiliari potest. Ulterius observatur, matrimonium liberrimum debere esse a metu injusto, non autem justo.

550

Petes: Quid tenendum in casu, quo quis metum incutit ex causa quidem justa, animo tamen simulato, quia non cogitat inferre istud malum, quod juste posset inferre ? potestne talis contractus rescindi, si sit rescindibilis ? vel est omnino nullus, si sit irrevocabilis ?

R. 1. Talis contractus, si sit natura sua rescindibilis, potest rescindi. Haunold, Molina, Lugo. Ratio est: etsi forte non ratione metus rescindi valeat, valet tamen ratione doli; quia inferens metum per simulationem, & dolum intendit extorquere contractum, & actu extorquet: atqui contractus dolo antecedente extorti, possunt rescindi, ut dictum est Articulo præcedenti: ergo.

R. 2. Matrimonium vero, & alii contractus natura sua irrevocabiles, seu tales, qui semel contracti non amplius possunt rescindi, valent, etsi ex tali metu simulato extorqueantur. Lugo. d. 22. n. 189. Nam dolus antecedens circa accidentia, qui adhuc relinquit liberum consensum substantialem, non irritat matrimonium, aut contractus alios irrevocabiles, ut patet ex dictis:



etis: ergo neque iste dolus, vel simulatio metus; quia & hæc adhuc relinquit consensum substantialem.

Dices: Metus gravis injuste incussus invalidat matrimonium, & contractus irrefcindibiles, ut dicitur §. seq. atqui in hoc casu habetur metus injuste incussus: ergo. m. p. nam 1. datur metus; quia ad metum sufficit, ut prudenter existimetur malum imminens, vel futurum, etsi revera eventurum non sit: atqui ponimus, quod alter ita externe simulet, & intentet malum, ut revera prudenter possit credi eventurum. 2. Metus iste est injustus ob simulationem: ergo R. Metum illum, qui invalidat matrimonium, debere non quomodocunque esse injustum ob denominationem extrinsecam, desumptam a dolo, per quem imperatur, sed debere esse injustum ex objecto, & intrinsece, quatenus est de malo injuste inferendo, seu tali, ad quod inferendum metum incutiens non habet jus: atqui supponitur habere jus ad malum hoc inferendum secundum se. Videatur Lugo citatus.

§. II.

*Sequitur difficultas præcipua.*

ASSERO 3. De jure naturali & positivo valent etiam, saltem aliqui actus & contractus, ex quocumque metu gravi injusto, & directe ad extorquendum consensum incusso, celebrati. Communis cum Herincx, Reiffenstuel, ac Holzman contra paucos alios. 551

Prob. 1. pars. Si contractus præfato modo celebrati essent jure naturæ nulli, id esset vel propter defectum voluntarii & consensus, vel propter injuriam illatam contrahenti per metum injustum: atqui neutrum est; non primum: nam quæ ex metu fiunt, sunt simpliciter voluntaria, & tantum involuntaria secundum quid, ut constat ex contractibus metu justo, vel intrinseco initis, quæ in ratione coactionis, & metus non differunt; cum per metum intrinsecum, vel extrinsecum justum possit proponi malum æque grave, ac per metum injustum, ubi proinde æqualis oritur trepidatio, & coactio mentis. Neque se-

K k k k k 2

cun-



*cundum* potest dici; nam injuria non invalidat statim contractum; alias enim dolus quoque accidentaliter eundem invalidaret, quod præc. Articulo rejectum est. Igitur injuria plus non facit, quam quod metum injuste incutiens teneatur ad restitutionem, non autem quod contractus sit invalidus.

Prob. 2. Optabilius est metum passio, si contractus valeat: vel enim est ipsi noxius, vel utilis? si noxius: potest petere rescissionem, & rescissionem damnorum. Si utilis: potest obligare alterum ad observandum contractum, quod posterius non posset, si contractus esset nullus: ergo non est ratio, cur talis contractus non valeat jure naturæ.

Prob. etiam 2. pars. §. 1. Instit. de *Exceptionibus*. superius cit. inter alia dicitur: *Si metu coactus stipulanti Titio promissisti, quod non debueras promittere* (consequenter si metus fuit injuste, & absque jure illatus) *palam est, jure civili te obligari*. Iterum L. 21. §. 5. ff. de eo, quod metus causa. Jctus ait: *Si metu coactus adii hæreditatem, puto, me hæredem effici; quia, quamvis, si liberum esset, noluissem, tamen coactus volui, sed per Prætorem restituendus sum, ut abstinendi mihi potestas tribuatur*. Ex quibus liquidum est, etiam jure civili tales contractus metu initos valere.

Confirm. Id, quod jure præcipitur infirmari, regulariter non est ipso jure nullum: atqui leges præcipiunt infirmari contractus, qui sunt initi ex metu injuste incusso: ergo. M. constat. m. p. L. ult. C. De his, quæ vi, metusque causa. dicitur: *Venditiones, donationes, transactiones, quæ per penam extortæ sunt, præcipimus infirmari*. Et Cap. 2. De his, quæ vi metusque causa. generaliter dicitur: *Quæ metu, & vi fiunt, debent in irritum revocari*.

552. Objic. 1. Metus injustus est contrarius consensui: ergo invalidat contractum. A. p. ex L. *Nihil consensui*. 116. ff. de R. J. & cap. cum locum. 14. de Sponsalibus. R. 1. Retorq. Argum. in metum justum, & ab intrinseco incussum, qui etiam est contrarius consensui. R. 2. D. a. est contrarius consensui in ratione consensus, & voluntarii simpliciter N. a. in ratione liberi, & voluntarii perfecti C. a. Leges adductæ loquuntur de contrarietate



te cum consensu perfecte libero, qualis quidem requiritur ad matrimonium, ac professionem Religiosam, tanquam actus ex natura sua irrefcindibiles, non autem ad alios actus.

Objic. 2. Metum inferens juxta nostram sententiam referret ex injuria commodum, & ex injustitia justitiam: atqui hoc videtur esse contra jus naturale: ergo. R. 1. Retorq. Argum. Etiam ille, qui metum levem incutit, referret ex injuria commodum, & ex injustitia justitiam, & tamen juxta AArios contractus ex metu levi incusso initi valent: ergo. R. 2. N. M. nam hoc commodum, & justitia non provenirent immediate & formaliter ex metu injusto qua tali, sed ex consensu libero, metus autem & injuria tantum se haberent occasionaliter: atqui non est novum, quod actio injusta sit occasio justitiæ. Deinde illud commodum, quod acquirit metum, vel injuriam inferens, vix æstimabile est; siquidem in foro interno tenetur illatum damnum rescire, & ad petitionem metum passi contractum rescindere: in foro autem externo compelleretur ad id ipsum, si metum passus instituerit actionem *quod metus causa*, quam actionem habet contra quemcunque possessorem rei suæ, per metum injustum sibi extortæ, & ad alium qualemcunque possessorem translatae L. 14. §. 3. ff. *quod metus causa*.

Objic. 3. Saltem contractus gratuiti, v. g. liberales donationes, & promissiones non valent metu injusto extortæ; nam in his requiritur voluntas omnino liberalis, & libera, ut ex eorum nomine constat: ergo. R. N. a. nam 1. ad valorem horum quoque actuum gratuitorum non videtur major libertas, & voluntareitas requiri, quam ad alios. 2. Qui donat ex metu, simpliciter vult illud, quod donat, fieri donantis, quamvis simpliciter affectu vellet non dare, si metus abesset: sicut ille qui metu naufragii merces projicit in mare, vult absolute eas jactare, quamvis per affectum conditionate nollet, si metus naufragii abesset. 3. Juxta L. ult. C. de his, quæ vi &c. superius in probatione allegatam, donationes per metum, ac potentiam extortæ jubentur in irritum revocari: ergo supponuntur fuisse validæ. 4. Dato, quod donationes, & contractus gratuiti metu extorti non valerent, tamen nihil obesset nostræ conclusioni, quæ



quæ tantum dicit, aliquos contractus sic extortos valere; valerent enim adhuc plures onerosi.

Objic. 4. Qui promisit ex tali metu alteri equum tradere, non peccat, si equum non tradat: ergo signum est, quod contractus ejusmodi sit invalidus, & non obliget. R. D. c. ergo signum est, quod sit invalidus, & non obliget conditionate, si nempe metum passus nolit observare hunc contractum C. c. quod non obliget absolute, etiam tunc, dum metum passus vult stare contractu N. c.

Objic. 5. L. 1. C. de rescindenda venditione. venditio per metum facta irrita appellatur: ergo contractus metu initus est invalidus. R. to irrita ibi idem significare, ac irritabilis, rescindibilis, vel irritanda, prout declarant verba statim sequentia: *Aditus itaque nomine tuo Præses Provinciæ auctoritatem suam interponet*, scilicet rescindendo venditionem illam metu extortam. Deinde contractus metu extorti etiam ideo in jure vocantur irriti, vel nullius momenti, quia ex parte metum passi nullam inducunt obligationem stabilem, & firmam, vel quia sunt contractus claudicantes, & ad nutum metum patientis rescindi possunt, & debent.

Objic. 6. L. qui in aliena. 6. §. Celsus. 7. ff. de acquirenda, vel omittenda hæreditate dicitur: *Qui metu verborum, vel aliquo timore coactus, fallens adierit hæreditatem, sive liber sit, hæredem fieri non placeat, sive servus sit, Dominum hæredem non facere*: ergo talis aditio hæreditatis omnino est nulla, si metu fiat. R. In citata lege formaliter quidem, & in se nulla dicitur aditio hæreditatis, ast non propter metum, sed propter defectum omnis consensus; quia hæres illam adiit fallens, id est, ficte, & simulans se adire, cum tamen animum adeundi non haberet. Ita Glossa in cit. Legem. R. 2. indirecte ad omnia argumenta ex legibus, opponendo alias leges in probationibus adductas.

Objic. 7. Dolus circa substantiam contractus reddit hunc irritum: ergo etiam metus injustus; quia dolus & metus in jure æquiparantur C. cum contingat. 28. de Jurejurando. R. N. c. & parit. Dolus circa substantiam impedit omnem consensum volun-



voluntarium, requisitum ad essentiam, & substantiam contractus, non autem metus. Porro dolus circa qualitates, & accidentia rei, ac metus æquiparantur, non autem ille dolus, qui est circa substantiam.

Objic. 8. Si contractus metu initus foret validus, tunc transferret dominium rei traditæ: atqui non transfert: ergo. M. constat; quia contractus validus, accedente traditione, transfert dominium. m. p. ex L. *Metum*. 9. §. *volenti*. & §. *licet*. ff. de eo, quod metu causa. ubi metum passo conceditur actio non solum personalis, sed & realis, in ordine ad rem talem traditam iterum recuperandam: atqui, qui habet actionem realem in ordine ad rem recuperandam, est Dominus rei, & consequenter in alterum non transfert dominium talis rei. Id, quod amplius confirmat ratio legi citatæ addita, sic si habens: quia res (quæ per contractum metu initum tradita est) in ejus bonis est, qui metum passus est: ergo res per metum alteri data, adhuc in bonis & dominio manet illius, qui metum passus est, & qui tradidit, consequenter talis non abdicat a se dominium.

R. N. m. Actio quod metu causa non dicitur ideo *realis*, vel in rem scripta, quasi res per metum tradita maneat in dominio metum passi: sed ideo, quia adinstar aliarum actionum realium potest institui contra quemvis possessorem, ad quem talis res per metum tradita pervenit. Res vero tradita dicitur esse in bonis metum passi, non quasi actu in bonis, & dominio ejus esset, sed quia per rescissionem contractus, & restitutionem in priorem statum facile a metum passo recuperari potest; res enim, etiam alienatæ, & ad alterum pertinentes, quæ facile a nobis recuperari possunt, quodammodo inter nostra bona referuntur, ut colligitur ex L. 15. ff. de R. J. ubi dicitur: Qui actionem habet ad rem recuperandam, ipsam rem habere videtur. Et L. Nemo. 5. ff. de in integrum restitutione. quæ ait, neminem exclusum a re, ad quam recuperandam actio ei a Præatore conceditur, & offertur. 2. Quamvis metum passus non sit Dominus rei per metum traditæ, censetur tamen illam fictione juris in rebus suis habere, quatenus eam per restitutionem in integrum recuperare potest, ut patet ex L. Nemo. ff. de Restit. in integrum. quæ dicit: Nemo videtur a re exclusus, quem Prætor in integrum

se



*se restitutum pollicetur.* Ita advertit Reiffenstuel L. 1. Decret. Tit. 40. n. 41. & observat Glossa in Legem *Metum*. cit. §. *licet etiam*. & in bonis ejus.

553

Dixi in Assertionem: *valent saltem aliqui contractus*; hæc enim conclusio non est omnino universalis, sed patitur suas exceptiones. Sic 1. excipiuntur contractus non amplius rescindibiles, postquam legitime sunt initi, ut Professio religiosa, & præcipue matrimonium; hi enim certo sunt nulli, si ex metu injuste, & directe ad eosdem extorquendos incusso celebrentur. Et sic sentit communis DD., quamvis aliqua sit controversia inter eos, quo jure sint irriti, scilicet an solo jure positivo humano, vel etiam naturali. Ratio autem hujus nullitatis est; quia, si hi actus semel valent, non possunt amplius rescindi: consequenter, si etiam ex metu initi valerent, non posset injuria per eos illata iterum reparari media rescissione illorum: quæ ratio non pugnat in contractibus rescindibilibus.

2. Etiam multi alii contractus per talem metum extorti, a variis dicuntur irriti jure positivo humano, scilicet omnia vota simplicia, quasi Deus ea ex simili metu concepta non acceptaret: item promissio, & solutio dotis: promissio quælibet facta ab eo, qui in carcere detinetur, si fiat in gratiam ejus, qui in carcerem conjecit, vel in eo detinet: absolutio a censuris, vel revocatio earum: promissio, & traditio rerum Ecclesiæ, ac juramentum de iis non repetendis: acta Tutoris inviti, vel per vim retenti. Adduntur etiam alii actus ab aliis, qui juxta eos metu initi non valent, ut: pronunciatio sententiæ judicialis: testamentum metu extortum, vel tale, ad quod testes sunt coacti: sponsalia: constitutio Procuratoris ad negotia: jurisdictio prorogata per metum &c. De quibus videri possunt Canonistæ, & Civilistæ in propriis locis, singulariter Reiffenstuel L. 1. Decret. tit. 40. n. 55. & seq. Pichler pariter eodem Tit. n. 11. Interea nostra conclusio adhuc subsistit, quod *aliqui* saltem contractus valeant, scilicet revocabiliter, ut venditiones, ac aditio hæreditatis, quæ sunt contractus bonæ fidei: item promissiones, & donationes, quæ sunt contractus stricti juris, nec non transactiones, ut colligitur ex cit. Legibus.

Quia



Quin imo omnes reliqui contractus metu initi debent etiam de jure positivo humano valere, qui non sunt clare excepti, & annullati per jus positivum humanum. Ratio hujus est: tales contractus valent de jure naturali: ergo etiam de jure positivo, nisi clarus textus ostendatur, quo fieret recessus a jure naturali; nam talis recessus non est admittendus sine claro textu juris positivi. Ex his

Inferes: Contractus illos, qui ex præfato metu initi valent, posse rescindi, & irritari ad nutum, & arbitrium metum passi. Communis. Ratio hujus habetur 1. ex communibus juribus supra citatis pro Assertionem tertia. 2. Ex æquitate naturali, quæ dicat, ut metum passo, & læso fiat adæquata satisfactio pro injuria illata: atqui non fieret talis adæquata satisfactio, nisi per rescissionem contractus injuriosi omnia restituerentur in pristinum statum, & omnia damna illata compensarentur. Quare vi juris naturalis quoque tenetur cuncta restituere, quæ ex contractu tali per metum extorto accepit, & quæ alias reddere debet malæ fidei possessor; si enim hæc omnia non refunderet, non compensaret damnum illatum ad æqualitatem.

Ex quo patet, nostram sententiam non esse nimis rigidam, sed benignam; nam vi hujus metum passo competit exceptio, si res necdum est tradita. Quare, si metum inferens petat rem sibi ex metu promissam, potest metum passus eandem libere etiam extra judicium denegare, & sic excipere contra ejusmodi petitionem. Si vero rem talem jam tradidisset, competit ei actio, vi cujus metum passus ita debet restitui in integrum, ut ipsi non tantum reddatur res tradita, sed omnia etiam illius emolumenta, & fructus, quos interea percepit ille, qui talem rem mala fide detinuit, sive deinde sit ille ipse, qui vim intulit, sive sit alius, modo malam fidem habeat.

## §. III.

*Aliqua Quæsitæ.*

QUÆRES 1. Quid dicendum, si metus ex alio fine, quam ad extorquendum contractum fuerit incussus?

*P. Kick. Theol. Tom. IV.*

LIII

R. I.



R. 1. Si metus fuit iuste incussus, tunc omnino valet talis contractus, nec potest rescindi. Ratio est: *tum*, quia per talem metum non inferitur injuria per rescissionem contractus reparanda. *tum*, quia metus talis non videtur esse causa ejusmodi contractus, ut amplius patebit ex responsione sequenti. Quare

R. 2. Pariter valent, neque rescindi possunt contractus, qui tali metu iniuste extorquentur. Sanchez L. 4. de Matrimonio D. 12. n. 3. & seqq. allegans communem, & certissimam DD. sententiam. Herincx D. 1. de Contractibus in communi. n. 50. & D. 3. de Matrimon. n. 4. Reiffenstuel cit. n. 28. Sperellus decisione 6. fori Ecclesiastici n. 4. contra Lugonem, Pichler & alios. Casus sit: Paulus Joannem deprehensum apud filiam suam in vindictam vult occidere, quamvis iniuste, neque per has minas mortis cogitat extorquere pecuniam: Joannes vero, ut mortem evadat, offert, & serio promittit pecuniam Paulo. In hoc casu promissio tenet, nec rescindi potest a Joanne. Ita citati.

Prob. 1. Injuria, & metus tantum ex se tendebant ad mortem, & vindictam, quamvis injustam, non autem inferebantur ex intentione extorquendi promissionem pecuniæ: ergo ad hanc promissionem se per accidens habebat metus, & injuria. Quare iste metus injustus non reddit contractum ejusmodi irritabilem.

Confirm. Metus, & coactio non tendebant ad promissionem pecuniæ, sed ad vindictam & mortem: ergo eo ipso nulla coactio versabatur circa promissionem, proinde ea non fuit coacta, sed voluntaria, & spontanea.

Prob. 2. In hoc casu homo ad contractum non impellitur ab alio, sed a se ipso; cum nullus tunc, ut supponitur, exigat contractum, sed contrahens eum voluntarie, sponte, ac proprio motu eligat tanquam medium ad evadendam mortem, vel aliud malum: ergo talis contractus censetur per se non procedere a metu, sed a libera voluntate eligentis, & offerentis eum alteri minitanti malum.

Prob. 3. Involuntarium, quod in ejusmodi contractu reperitur, non est intentum ab incutiente metum, neque ex metu



tu per se, sed tantum occasionaliter, & per accidens provenit, ut jam dictum est.

Prob. 4. a P. Haunoldo, qui etiam ex parte nobiscum videtur sentire. Optabilius est metum passis, valere tales contractus, quam non valere: ergo valent. C. patet ex saepius dictis. A. p. si enim similes contractus non valerent, vel ad libitum metum passi possent iterum rescindi, saepe non haberetur medium se liberandi a gravissimis malis, v. g. a morte intentata: sed optabilius est metum similem passis, valere tales contractus, quam non habere medium se liberandi a simili malo gravissimo: ergo. M. constat. Certe ille, qui intentaret mortem, non sineret se flecti a promissione pecuniae facta in his angustiis, si sciret, alterum, qui fecit talem promissionem, eam non teneri observare postea, sed posse pro libitu rescindere. Igitur potius optabit homo in hoc discrimine constitutus, ut valeat sua promissio, & sic ipsum liberet, quam ut non valeat, & sic medium se liberandi non habeat. Hinc.

R. 3. Si etiam ex simili metu alter promittat, aut omnino ineat matrimonium, vel Professionem religiosam faciat, tunc hos actus esse validos, & quidem irrevocabiliter, ut per se patet. Ratio colligitur ex dictis; quamvis enim contractus ex natura sua irrevocabiles sint invalidi, quando ex gravi metu injuste incusso celebrantur, tamen id solum verum est, si talis metus directe ex intentione extorquendi matrimonium, vel alium similem actum sit incussus. Ita laudati DD. Et quis neget matrimonium valere, si Princeps ex intentione, ut se liberet a bello, injuste ab altero inferendo, vel illato, det suam filiam, vel ipsa filia se offerat in matrimonium alteri Principi hosti? Sic etiam validum erit matrimonium, quando Pater in ultionem injuriae stricto gladio vult occidere adolescentem, impudice repertum cum sua filia, iste vero precibus impetret, ut sibi parcat, praestita promissione, quod ad compensationem injuriae velit filiam ejus accipere uxorem. Ita Reiffenstuel. Idem est, si aliquis injuste coniectus in carcerem, nec tamen facile ex eo liberandus, proprio motu eligat filiam judicis ducere, eamque ducat, iterum valet matrimonium; quia metus & injuria



non tendebant ad matrimonium, proin hoc libere & sponte contrahitur.

Deduces : a fortiori valere promissionem illi factam, qui ad metum, vel minas non est cooperatus : v. g. Petrus inter latrones constitutus promittit serio Joanni transeunti 10. aureos, si eum a latronibus liberet. In hoc casu, si opem præstat Joannes, & Petrum a periculo eximit, Petrus ei est ex justitia obligatus ad servandum promissum, ut fatentur omnes, etiam alias nobis Adversarii.

555

Objic. 1. Etsi metus non fuerit incussus ex intentione contractus, fuit tamen causa contractus : ergo contractus talis adhuc est injuste extortus, & irritandus. R. Neg. a. Talis metus injustus fuit tantum occasio, non autem causa contractus, utpote qui libere & sponte a contrahente fuit assumptus ad se liberandum a malo.

Objic. 2. Si ejusmodi matrimonium valeret, deberet contrahens invitus damnum pati : atqui illi contractus non debent valere, vi quorum innocens debet invitus damnum pati : ergo ejusmodi matrimonium non valet. R. N. M. Hoc matrimonium contrahens voluntarie & libere ex propria intentione eligit, adeoque, si aliquod damnum ex eo sequitur, illud libere, & non coacte patitur.

Objic. 3. Cap. 1. de his, quæ vi, metusque causa fiunt, videtur tanquam irrita declarari professio metu mortis facta, quamvis non fuerit metus hic directe ad extorquendam professionem incussus : ergo. R. N. a. nam ex textu Capituli colligitur, quod metus mortis directe fuerit ordinatus ad extorquendum a muliere ingressum in monasterium ; nam famuli, qui debuissent dominam suam occidere, sub tali conditione pepercerunt eidem, quod in monasterio de Colobris habitum susciperet monachalem.

Objic. 4. L. Nec timorem. 7. ff. de eo, quod metus causa dicitur : Proinde, si aliquis in furto, vel adulterio deprehensus, vel in alio flagitio, vel aliquid dedit, vel se obligavit, Pomponius L. 18. recte scribit, posse eum ad hoc edictum (scilicet rescissorium talis contractus) pertinere ; timuit enim vel vincula, vel mortem :  
ergo



ergo si aliquid promittatur ex metu mortis, etiam non directe incusso ad extorquendam promissionem, talis promissio potest rescindi.

R. 1. cum Sanchez superius allegato n. 14. hanc Legem loqui de casu, quo deprehensus in delicto timet, vel probabiliter suspicatur, fore, ut metu mortis adigatur ad ejusmodi promissionem, vel contractum: in quo casu metus directe tendit ad contractum. R. 2. Hanc legem loqui secundum praxin fori externi, juxta quam præsumitur metus ejusmodi esse incussus ad extorquendum contractum, nisi contrarium probetur. Ita Sperellus apud Reiffenstuel n. 29., ubi etiam notat, esse multum difficile in foro externo probare, quod talis metus, ex cuius occasione contractus sequitur, non sit directe ex intentione contractus incussus. Verum saltem in foro interno nostra Assertio locum habet: imo etiam in foro externo, si clare & certo constet, metum non esse ex intentione contractus illatum.

Objic. 5. Tali metum passo fuit facta injuria: ergo meretur absolvi ab obligatione, quam ex alterius injuria contraxit. R. D. a. fuit facta injuria, quæ tamen per se non influxit in contractum C. a. secus N. a. Ex his

Inferes: parum referre, siue metus fuerit injuste incussus ab ipso contrahente, siue ab alio tertio, dummodo sit directe incussus ex intentione extorquendi contractum; tunc enim ejusmodi contractus est omnino nullus, si sit ex natura sua irrefcindibilis: vel valet quidem, sed revocabiliter, si est ex natura sua rescindibilis, saltem de jure positivo.

Ratio primi est: quia ad valorem matrimonii, & similibus contractuum, qui ex natura sua sunt irrefcindibiles, requiritur secundum jura voluntarium, & liberum perfectum, quod est immune ab omni metu injusto, per se & directe impellente ad talem contractum.

Ratio secundi est ex L. 14. §. in hac actione. ff. de eo, quod metus causa. ibi; In hac actione non queritur, utrum is, qui convenitur, an alius metum fecerit; sufficit enim hoc docere, metum sibi esse illatum, & ex hac re eum, qui convenitur. etsi crimine



careat, lucrum tamen sumpsisse. Qui textus, sicut & §. *Pædus*, etfi loqui videantur de folis lucrativis contractibus, communiter tamen a DD. cum Glossa etiam ad ceteros contractus extenduntur.

Dixi in illatione: *saltem de jure positivo*; de jure enim naturali videtur contrarium dicendum quoad contractus rescindibiles, seu quoad 2. partem illationis, ut observat Haunoldus. Atque contractus onerosos jure naturali non posse rescindi, si tali metu sint initi, suadet ex rationibus superius propositis n. 545. in responsione 2. ad quæsitum, quas vide.

556

Quæres 2. An contractus ex metu levi, directe ad extorquendum contractum incusso, celebrati valeant, vel saltem sint irritabiles? R. 1. Valent contractus natura sua rescindibiles, si ex simili metu levi ineantur. Ratio est: valent ejusmodi contractus, si per metum gravem extorqueantur: ergo a fortiori, si tantum per metum levem.

R. 2. Valent etiam contractus natura sua irrefcindibiles, ex præfato metu celebrati, v. g. Matrimonium, Professio religiosa. Herincx D. 1. de Contract. n. 51. Ratio est: quia alias innumera fere matrimonia rescindi deberent, quibus subinde metus levis injustus causam dedit. Accedit, quod dolus circa accidens notabile non irritet contractum matrimonii, etfi ei causam dederit: ergo neque metus levis.

R. 3. Si metus levis injustus ex intentione contractus sit incussus, & revera det causam contractui ex natura sua rescindibili, tunc iste in foro conscientie irritari potest ad nutum metum passi. Sanchez L. 4. de Matrim. D. 9. n. 4. Herincx cit. n. 51. Haunold. Mezger D. 51. de Contractibus in genere Art. 3. n. 7. Holzman. *Prob.* Etiam per metum levem extorquens contractum, injuriam committit, quæ debet reparari per restitutionem in priorem statum & libertatem, media rescissione contractus. Imo, etfi metus sit levis, tamen injuria est gravis, si per eum extorqueatur consensus in contractum, graviter damnosum metum passo. 2. Esto jus civile non concedat in foro externo actionem quod *metus causa*. ob metum levem, id facit  
fo.



solum ob vitandam multipliciter litium, per hoc tamen non vult tollere obligationem conscientiae, qua metum inferens Coram Deo adstringitur ad reparandam injuriam.

Quæres 3. Quid dicendum de metu reverentiali? R. 1. Metus reverentialis est ille, vi cuius filii parentibus, subditi Superioribus &c. non audent contradicere ob reverentiam. 557


R. 2. Hic metus juxta Pichler est tantum levis: potest autem fieri gravis, si accedat timor alius, quo timetur aliud grave malum, si contradicatur parentibus. Si deinde malum hoc, quod filius timet a Patre sibi inferendum, est contra justitiam, tunc talis metus est injustus: si vero tantum sit contra charitatem, vel pietatem, tunc metus est quidem peccaminosus, & illicitus, non autem est injustus, ut recte notat Lugo D. 22. n. 151. & seqq. Quare non est metus injustus, si filius solum timet jurgia, asperum vultum, offensionem, malam tractationem, quia hæc mala omnia non pugnant contra justitiam; siquidem non lædunt injuste in bonis famæ, honoris, vitæ, vel fortunæ, sed solum ostenditur offensio concepta ex neglectis precibus, aut petitione Patris.

R. 3. Blanditiæ etiam sæpius repetitæ, & satis molestæ non statim inducunt injuriam contra justitiam, etsi aliquam vexationem contineant. Quis enim dicat, mendicos, sæpius satis moleste petentes eleemosynam, injuriam inferre illi, a quo petitur eleemosyna?

R. 4. De metu reverentiali, ac blanditiis idem dicendum, quod de metu alio. Hinc si metus talis reverentialis gravis injustus fuerit, eadem locum habent, quæ dicta fuerunt de alio metu gravi injusto. Idem dic de metu reverentiali tantum levi. Videatur Lugo citatus, qui hanc rem exacte discutit.

Dixi: Si metus injustus fuerit; summopere enim attendendum est, an talis metus pugnet contra justitiam; nam, si justitiam non violat, tunc non importat injuriam restitutione, vel refectione contractus reparandam, ut ex generalibus principiis de restitutione, ac de Jure, & Justitia colligitur.





## DISSERTATIO II.

*De Promissione, & Testamentis in specie.*

## ARTICULUS I.

*De Promissione.*

558 **A**gimus hic de promissione gratuita, liberali, & lucrativa, qua tantum promittens se alteri obligat, non autem ex parte promissarii obligatio aliqua alia mutua respondeat. Hæc describitur, quod sit deliberata fidei obligatio facta alteri homini, & ab hoc acceptata de re aliqua præstanda.

Dixi 1. *Homini*, ut distinguerem promissionem a voto, quo se homo obligat ipsi Deo, & non alteri homini. Dixi 2. *Obligatio facta*; nam de natura promissionis est, ut promittens se intendat obligare alteri. Et per hoc differt promissio a proposito, de quo inferius. Dixi 3. *Et ab hoc acceptata*; nam ad promissionem, ut ea obliget actu, requiritur, ut ea sit acceptata. Quare *promissio strictæ*, & *proprie* dicta duo dicit, scilicet oblationem & obligationem ipsius promittentis, ac acceptationem promissarii. Antequam fuit acceptatio facta ab altero, non vocatur promissio, sed *pollicitatio*, neque obligat. Hoc notato breviter examinantur conditiones requisitæ ad validam promissionem.

559 **A**ffero 1. Ad promissionem validam, & obligantem in conscientia, non sufficit semiplena deliberatio, vel voluntarium imperfectum, etsi res promissa tantum sit levis, sed requiritur plena libertas, & advertentia, Haunold, Reiffenstuel in Theol. mor. q. 1. de Voto. n. 4. & Communis aliorum.

Prob. 1. Talis promissio est lex aliqua privata, qua se homo alteri obligat: atqui nemo se alteri censetur velle efficaciter obligare, nisi plenam habeat deliberationem ejus, quod facit: ergo. Prob.



Prob. 2. Libertas actuum suorum est homini maxime propria, e contra obligationes sunt ei admodum adversæ: ergo tales obligationes cum præjudicio libertatis suæ ab eo non censentur induci sine consensu, & actu perfecte humano, & plene libero.

Objic. 1. Ad peccandum venialiter sufficit semiplena advertentia: ergo & ad se obligandum per promissionem. R. N. c. Peccatum est aliquod malum, ad quod sufficit quivis defectus, qualis jam stat cum semiplena advertentia; quia & cum illa jam aliquid amamus objectum vetitum, & malum: Contra promissio est actus positive bonus, inducens obligationem justitiæ, & fidelitatis: atqui ad bonum plus requiritur, quam ad malum, ut aliunde constat.

Objic. 2. Potest aliquis per actum semiplene voluntarium peccare contra justitiam, ac fidelitatem: ergo etiam potest aliquis se per actum talem semiplene liberum obligare ex præfatis virtutibus. R. N. c. quia ad peccandum tanquam malum & defectum, requiritur minus, quam ad positivam obligationem sibi imponendam ex propria voluntate.

Assero 2. Plena libertas requisita ad validam promissionem, 560  
votum, vel juramentum promissorium &c. potest stare cum ingenti passione inordinati amoris, iracundiæ &c. Haunoldus cum communi, ac certa Theologorum contra Bartolum, Decium, Jafonem, Felinum apud Sanchez.

Prob. 1. Juxta communem valent matrimonia, & sponsalia in ingenti æstu amoris contracta: ergo idem est de aliis. Ant. est certum; alias enim innumeri tales contractus irritari deberent.

Prob. 2. Valent contractus ex gravi metu justo: atqui similis metus æqualem, vel omnino majorem vim voluntati infert, quam aliæ passiones amoris, odii &c. ergo.

Prob. 3. Non obstantibus similibus passionibus habet aliquis sufficientem libertatem ad committendum peccatum mortale, directe & plene voluntarium: ergo etiam ad promissionem



validam; quia ad hanc non majus voluntarium requiritur, quam ad peccatum directe voluntarium.

Objectiones, quæ fieri possunt, vel loquuntur de casu, quo tanta fuit passionis intemperies, ut plenam rationis advertentiam impenderit, uti contingit in motibus primo, & secundo primis, de quibus nostra Assertio non loquitur. Vel loquuntur de casu, quo ex ira aliquis promissit, vel juravit facere rem illicitam, & sine peccato non observabilem: qualem casum continet L. 2. C. *Ad legem Juliam Majestatis*. ubi Dominus ex ira inconsulte, & male juravit, quod nollet unquam servo suo reconciliari.

561

Asserto 3. Promissio ante acceptationem non parit obligationem in promittente. Communis, & certa sententia. Prob. 1. ex L. 10. ff. *de donationibus*. Prob. 2. ex ratione, & jure naturali. Obligatio descendens ex promissione non potest intelligi sine mutuo consensu duorum juxta L. 1. ff. *de Pactis*: atqui ante acceptationem promissarii non est consensus duorum in idem: ergo neque tunc datur obligatio ex promissione descendens. 2. Ut promissio obliget, debet promissarius adversus promittentem habere jus activum, in quo fundatur obligatio passiva promittentis: atqui promissarius ignorans, vel non consentiens per acceptationem, non potest acquirere jus activum adversus promittentem: ergo. Unde omnis promissio habet imbibitam hanc conditionem: *Si acceptetur*. Ex hoc

Deduces 1. Promissionem, aut donationem, antequam acceptetur, semper esse revocabilem. Ratio est: quia promissio vel donatio tandiu est in potestate promittentis, & ab eo revocari potest, quamdiu ex illa nulla resultat obligatio: ergo, antequam acceptetur, semper revocari potest ad libitum promittentis. Hic tamen excipe casum promissionis, vel donationis factæ alicui civitati in ordine ad certa opera, vel officia eidem præstanda: quæ promissio, ut bene probat Herincx contra alios, equidem non valet ante acceptationem, non potest tamen amplius revocari a donante vel promittente: quod alii volunt etiam extendere ad causas pias: dissentit tamen Herincx; quia non omnia, quæ civitatibus conveniunt, statim ad causas pias

ex-



extendi debent. Sic etiam promissio infanti facta de emancipatione videtur per ipsas leges acceptari, & hinc non esse revocabiles.

Deduces 2. Promissionem, & donationem etiam juramento firmatam, ante acceptationem revocari posse. Mezger, & alii apud eundem citati contra Layman. Ratio est: quia juramentum, tanquam accessorium, sequitur naturam actus, cui adjicitur: ergo, si actus ille, videlicet promissio, cui adjicitur, potest revocari, pariter & juramentum est revocabile: patet etiam in sponsalibus juratis.

Petes: Quomodo promissio acceptari possit, ac debeat? 562  
R. 1. Potest, ac debet acceptari per signum externum, sufficienter manifestativum acceptationis, & consensus interni. Sola taciturnitas promissarii interdum æquivalet acceptationi, interdum non: æquivalet, & sufficit, quando res promissa promissario est favorabilis; tunc enim, *qui tacet, consentire videtur*, ut habet Reg. J. in 6. secus est, si res promissa sit odiosa promissario; tunc enim locum habet alia regula Juris: *Qui tacet, nec consentire, nec dissentire videtur*.

R. 2. Acceptatio donatarii, vel promissarii debet fieri per ipsum, aut alium ex ejus commissione, ut sic uniatur voluntas promittentis, & promissarii. Si promissarius, vel donatarius sit absens, requiritur ex parte promittentis, & donantis, ut suam promissionem, vel donationem sive per litteras, sive per nuncium significet. Unde non sufficit, si quis tertius, nullum habens mandatum, ejusmodi promissionem aut donationem promissario, vel donatario significet, & coram ipso fiat acceptatio; talis enim non potest representare personam, & voluntatem donantis. Ex parte autem promissarii, aut donatarii requiritur ut & ipse suam acceptationem sive per litteras, sive per internuncium significet promittenti. Neque sufficit, quod coram aliis, ad hoc non deputatis a promittente, enunciet, sese acceptare; quia ad quodlibet pactum requiritur unio voluntatum mutuo significata, quæ non habetur, quamdiu promissarius suam acceptationem non dirigit ad promittentem. Mezger, & Herincx.



563

Dubitabis : Quinam possint pro absente promissario acceptare promissionem ? R. 1. Ille, qui a promissario habet mandatum *speciale* ad hoc, vel saltem generale ad omnia pacta ejus loco ineunda. §. 19. Inst. *de inutilibus stipulationibus*. Herincx cum communi DD. contra Lessium, qui videtur asserere, quod sufficiat mandatum quodcunque generale ad quasvis res alterius nomine agendas. 2. Etiam illi, qui alteri, seu promissario, sunt pleno jure subjecti, ut filius non emancipatus Patri, Monachus Praelato, mancipium domino; mancipium enim (idem est de reliquis) censetur unius esse juris cum suo Domino; adeoque loco hujus stipulari potest. Aliud est de subditis respectu Principis, famulis respectu Heri, filiis emancipatis respectu Patris &c.: potest tamen Princeps pro subdito, Tutor pro pupillo, Curator pro eo, cui datus est, acceptare. Herincx: qui etiam Notariis publicis negat potestatem hanc pro aliis acceptandi promissiones, non autem illis personis, quibus interest promissionem valere, & adimpleri. Videatur Herincx de promissione n. 18.

Nota etiam 1. Juxta gravissimorum sententiam apud Herincx, promissionem, vel donationem inter vivos non posse amplius acceptari post mortem donantis, vel promittentis. Huic tamen contradicit Mezger cum aliis.

Nota 2. Mortuo donatario ante acceptationem per se extinguere donationem, & promissionem; quia potestas acceptandi est personalis, & personae donatarii affixa: ergo cum hac persona extinguitur. Mezger.

564

Affero 4. Promissio potest ex sola fidelitate obligare: & tunc obligat solum sub levi, etiam in materia gravi, Antonius Mayr, Holzman.

Prob. 1. pars. Pendet ex voluntate promittentis, quomodo se velit obligare, an velit obligationem justitiae, vel solius fidelitatis resultare ex suo actu: ergo non est ratio, cur talis non possit se ex sola fidelitate obligare.

Confirm. Ex ipsa praxi, qua multi aliqua promittunt alteri, quin intendunt ipsi dare strictum jus; volunt enim solum  
illi



illi dare testimonium suæ fidei: ergo tales se non obligant ex iustitia, sed ex fidelitate.

Prob. 2. pars. Qui alteri promittit aliquid sub fidelitate, non tribuit alteri jus: ergo eo ipso per tale promissum non importatur debitum strictum, quod sub gravi obligaret.

Confirm. Dum aliquis agit contra solam veracitatem, non peccat nisi venialiter: ergo etiam, dum aliquis peccat contra fidelitatem, tantum peccat venialiter; nam veracitas, & fidelitas valde affines sunt in modo obligandi. Ex dictis

Inferes 1. Promissionem ex titulo iustitiæ in materia gravi regulariter obligare sub gravi. Herincx cum Communi. Ratio est: quia talis promissio tribuit promissario verum jus, quod ubi in re gravi læditur, peccatum mortale committitur. Addit tamen laudatus Herincx Disp. 2. de promissione. n. 30. juxta communem DD. sententiam in violatione promissionis, strictæ & ex titulo iustitiæ obligantis, longe maiorem quantitatem requiri, quam in furto, aliove magis rigoroso debito. Sanchez L. 1. de Matrim. D. 5. n. 24. taxat quantitatem quadruplo maiorem, quam requiritur in aliis debitis. Castro Palao vero disp. 2. punct. 8. recurrit ad prudens arbitrium, desumendum ex causa promissionis, & qualitate promittentium.

565

Inferes 2. Promissionem ex titulo fidelitatis factam, multum differre a promissione ex titulo iustitiæ. Ratio est: quia promissio obligans ex titulo fidelitatis non parit jus ex parte promissarii, sed tantum spem, & fiduciam; etenim ex hoc motivo promittens dat alteri fidem suam, & quidem talem, cui tantum debetur spes & fiducia rei promissæ obtinendæ. Ex hoc iterum sequitur, quod ejusmodi promissio solum obliget ex honestate virtutis, non ex jure, quod residet in promissario: hanc vero honestatem si quis violet, non observando suum promissum, tunc equidem peccat, & notam incurrit hominis infidelis, seu talis, qui non est dignus, ut in ejus promissis spes, vel fiducia ponatur. Verum tale peccatum, & malitia est solum levis: quod colligitur exinde; quia veracitas & fidelitas sunt vir-



tutes multum affines: & sicut veracitas loquentis exigit, ut ab altero detur fides, vel assensus dictis talis loquentis, ita fidelitas petit, ut promittenti exhibeatur spes & fiducia: ergo si- cut violatio veracitatis ex genere suo est peccatum leve, ita & violatio fidelitatis.

Inferes 3. Plurimas promissiones in rebus etiam gravibus defacto non obligare sub gravi: vel, quia plerumque animus non adest sincerus se obligandi: vel, si adest, non vult promit- tens se obligare sub gravi, sed tantum sub levi, & ex sola fi- delitate.

Inferes 4. Simplex propositum, & promissum ex titulo fi- delitatis adhuc differre; siquidem (ut recte discurret Lugo D. 23. n. 1. & 92.) propositum præcise tale est voluntas præsens aliquid postea faciendi, nulla sibi ad hoc nova obligatione im- posita. Quare proponens non intendit sibi aliquam aliam turpi- tudinem adjicere contra aliquam specialem virtutem, saltem a constantia distinctam, si propositum non observet. Dixi: con- stantiam a constantia distinctam; nam etiam ille, qui sine sufficienti ratione propositum de aliquo bono opere faciendo con- ceptum non observat, venialiter peccare contra constantiam & perseverantiam, & turpitudinem venialem inconstantiae, & le- vitatis contrahere potest. Ex opposito promittens non solum habet animum, voluntatem, ac propositum faciendi, sed insu- per intendit se aliquo modo ligare, ita, ut si hoc promissum non observet, id opponatur contra aliquam specialem virtutem a perseverantia distinctam, nempe contra fidelitatem, vel omni- no iustitiam. Quare talis promissio fortius stringit, quam sim- plex propositum. Quod autem propositum possit dari sine pro- missione, patet ex illo Matth. 26. v. 35., ubi Petrus Christo dixit: *etiamsi oportuerit me mori tecum, non te negabo*: quæ ver- ba certe non continuerunt promissionem; alias enim Petrus tunc emisisset votum, cum fuisset promissio Deo facta de meliori bo- no: quod tamen non est verum. Fuit ergo simplex propositum.

566

Objic. 1. Homines putant, sibi injuriam fieri, si eis pro- missa non servantur: ergo promissio ex iustitia obligat, & ejus violatio injuriam inducit. R. 1. Retorq. Homines etiam putant, sibi



sibi injuriam fieri, si quis ipsis in faciem mentiatur, quin tamen obligatio non mentiendi sit ex justitia: ergo. R. 2. N. c. Si talibus hominibus sit injuria, ea non provenit præcise ratione rei promissæ non præstitæ, sed potius ratione vilipensionis promissarii; dum enim aliquis alteri in faciem mentitur, vel ei promissa non servat, videtur illius personam aliquammodo vilipendere, & sic ei inferre injuriam, quæ tamen vilipensio non efficit injuriam gravem.

Objic. 2. Obligatio promissionis transit ad hæredes defuncti: ergo debet esse obligatio justitiæ. R. 1. Retorq. Argum. Obligatio voti realis transit ad hæredes, & tamen non est obligatio justitiæ, sed religionis. R. 2. Tr. a. N. c. quia etiam aliæ obligationes, v. religionis, & fidelitatis possunt transire ad hæredes, ut Lugo explicat cit. loc. ac n. 98.

Objic. 3. Stipulatio, seu promissio stipulata obligat ex justitia: ergo etiam promissio non stipulata. R. D. a. si promittens habuit animum se obligandi ex justitia C. a. secus N. a. Esto enim, in promissione interveniat solemnitas stipulationis, qua unus interrogat: *promittisne?* & alter respondet: *promitto*: si tamen animus se obligandi ex justitia non adsit, obligatio talis non contrahetur. In foro quidem externo datur actio ob stipulationem; sed hoc inde oritur: quia in hoc foro præsumitur animus vere se obligandi ex titulo justitiæ.

Objic. 4. Promissio acceptata est pactum nudum: sed hoc obligat ex justitia: ergo. 2. Promissio onerosa obligat ex justitia: ergo & liberalis. R. ad 1. D. m. sed hoc obligat, si adsit animus se obligandi ex justitia C. m. secus N. m. Pactum nudum est tantum consensus duorum, & placitum in idem, qui consensus potest poni vel ex titulo fidelitatis, vel justitiæ. Ad 2. R. N. c. Promissio onerosa, & reciproca est semper aliquis contractus, in quo se contrahentes censentur mutuo obligare ex justitia: aliud est in contractibus gratuitis, in quibus se unus tantum, scilicet liberaliter promittens obligat, nulla obligatione, sed magis favore resultante ex parte promissarii.

Objic.



Objic. 5. Obligatio in materia gravi obligat sub gravi: ergo & promissio, etsi tantum ex fidelitate sit facta, obligabit sub gravi. R. N. a. universaliter acceptum; attendi enim debet, an virtus ex genere suo graviter obliget: quod si non faciat, uti non facit fidelitas, non erit mortale, eam obligationem etiam in materia gravi violare. Et certe mendacium, quatenus præcise veracitati, & non alteri simul virtuti, v. g. justitiæ opponitur, est tantum veniale, etsi sit in materia gravi; quia hoc peccatum ex genere suo est tantum veniale: ergo idem est de infidelitate in servandis promissis.

Objic. 6. Nec juramentum, nec votum obligat ex titulo justitiæ, & tamen utrumque obligat sub gravi: ergo, etsi promissio non obliget ex virtute justitiæ, tamen obligat sub gravi. Ant. patet; juramentum enim, & votum in materia gravi sub mortali obligant. R. N. c. nam votum, & juramentum inducunt obligationem religionis, quæ est longe gravior, quam fidelitatis: sic non est injuria gravis, vocare hominem in testem mendacii levis, quamvis sit talis, vocare Deum in testem etiam levissimi mendacii.

Leges, & Capitula, quæ forte in contrarium adduci possunt, agunt de casibus illis, ubi promittens se voluit obligare ex titulo justitiæ. Reliqua, quæ de promissione supersunt dicenda, in Reiffenstuel, & aliis Casistis, ac Canonistis videri possunt.

## ARTICULUS II.

### *Aliqua de ultimis Voluntatibus.*

#### §. I.

*Quid, & quotuplex sit ultima Voluntas?*

567 **U**ltima voluntas est iusta mentis nostræ sententia de eo, quod quis post mortem suam fieri vult. Vel: est gratuita dispositio



de bonis in tempus mortis, seu post mortem. Dicitur *ultima*, non quasi in vivis semel facta statim sit postrema, & talis, ut non possit in vita amplius mutari; hoc enim est contra rationem ultimarum voluntatum, quæ semper mutari, & revocari possunt, quando, & quomodo illi, qui eas fecit, tempore vitæ suæ placet: cum voluntas hominis ultima sit *ambulatoria usque ad vitæ supremum exitum*. L. 4. ff. de adimendis Legatis. Est ergo *ultima*, quia post, & per mortem redditur firma, & talis, ut eam alia non possit sequi. Porro species ultimæ voluntatis sunt sex: scilicet 1. Testamentum. 2. Codicillus. 3. Substitutio. 4. Fideicommissum. 5. Legatum. 6. Donatio mortis causa.

*Testamentum*, quod inter ultimas voluntates primas obtinet, & infinitarum litium occasio est, definitur ab Ulpiano L. 1. ff. de Testamentis, & ultimis voluntatibus: *Voluntatis nostræ iusta sententia de eo, quod quis post mortem suam fieri vult, cum directæ hæredis institutione*. Brevius describi potest: *est ultima voluntas, qua directe instituitur hæres*. Itaque hæreditatis institutio est de essentia Testamenti, & hoc primario, & essentialiter distinguit a Codicillo, & aliis ultimis voluntatibus. Censetur autem quis directe institui hæres, quando ita instituitur, ut hæreditatem immediate ab ipso Testatore sibi designatam habeat: ut si Testator dicat: *Cajus sit hæres meus*.

Testamentum principaliter dividitur in *solemne*, & non *solemne*. *Solemne*, seu *perfectum*, *ein zierliches Testament*, est, quod habet omnes solemnitates a jure requisitas. *Non solemne*, vel *imperfectum*, aut *privilegiatum* est, quod nullas, vel saltem non omnes habet solemnitates juris, nihilominus tamen ex speciali juris privilegio sustinetur, & valet. Ejusmodi testamenta privilegiata sunt 1. Testamentum ad causas pias. 2. Testamentum inter liberos, factum a Parentibus. 3. Testamentum militis in expeditione bellica. 4. Testamentum rustici. 5. Testamentum tempore pestis. 6. Testamentum publicum, seu ad acta datum, hoc est, vel coram Judice, aut Principe factum, aut ei oblatum.

*Solemne subdividitur in scriptum, & nuncupativum. Scriptum ein zierliches Testament in Schriften*, est, quod in Scripturam redactum, debito



modo subscriptum, & subsignatum est. Quod etiam *clausum* dicitur; quia necesse non est, ut Testator tenorem hujus manifestet: sed sufficit, si testibus dicat, suam in hac Scriptura contineri ultimam voluntatem. *Nuncupativum*, *ein von Mund ausgesprochenes Testament*, est, quod sine Scriptura, subscriptione, & subsignatione testium fit, ore tenus nominato coram testibus hærede, sive dein Notarius aliquis hanc ultimam voluntatem Testatoris in Scripturam redigat pro memoria, & faciliiori probatione, sive non.

Aliæ autem solemnitates sunt pro Testamento scripto, aliæ pro nuncupativo. Hujus posterioris solemnitas consistit in nuncupata directa hæredis institutione coram 7. testibus, specialiter rogatis. *Rogare* autem in proposito idem est, ac testes admonere, & certiores reddere, quare hic sint convocati. Unde non sufficerent testes quicumque transuentes, vel fortuito præfentes, nec specialiter vocati, & admoniti de re, quæ tractatur.

Ad testamentum scriptum exigitur jure civili 1., ut ultima voluntas vel ab ipso Testatore, vel ejus rogatu ab alio scribatur. 2. Requiritur 7. testes specialiter rogati, nullo jure testimonium ferre prohibiti, Testatori præfentes. Prohibentur autem in Testamento esse testes 1. mulieres. 2. Impuberes, seu qui necdum expleverunt 14. ætatis annum; nam masculi ante hunc, & fœminæ ante 12 necdum impletum annum vocantur impuberes: postea vero vocantur Puberes, Minorenes, vel Minores usque ad 25. annum expletum, ubi evadunt Majorenes, ac Majores. 3. Furiosi, & his æquiparati Prodigii declarati. 4. Muti. 5. Surdi. Huc etiam revocantur communiter cæci, qui Testatorem videre non possunt. 6. Infames. 7. Invidi, & coacti. 8. Qui sunt in potestate Testatoris, vel testis, vel ambo in potestate tertii. Sic filiusfamilias nequit esse testis in testamento Patris, nec vicissim, nec frater in testamento fratris, si uterque sit in patria potestate; quia personæ in eadem potestate existentes reputantur pro uno corpore familiæ. 9. Hæres: non tamen excluditur Legatarius; cum hujus negotium non principaliter, sed solum secundario geratur. 10. generaliter omnes, qui a lege tanquam improbi, & intestabiles reprobantur. 11. Qui nec testari, nec hæredes institui possunt. Plura de testibus videri possunt in Canonistis. 3. Requi-



Requiritur, ut singuli testes manu propria subscribant, & sigilla apponant. 4. Totum hoc negotium debet in uno contextu sine notabili interruptione, aut alterius negotii interpositione perfici.

Circa has solemnitates plura adhuc sunt observanda, quæ alii, præsertim Juristæ, fufius examinant, ego vero brevitatis gratia omittere cogor. Hoc solum noto, rem esse periculi plenam, facere velle testamentum solemne; cum illud ob multas solemnitates, quas requirit, facile possit inepte, & invalide confici. Quare semper suadendum, ut testamentum potius ad acta, quam solemne fiat.

*Codicillus* est ultima voluntas, qua quis de bonis suis disponit absque directa hæreditatis institutione. Potest fieri cum, vel sine testamento: item ante, vel post illud, scripto, vel oretenus. Servit ad hoc, ut illi, qui testamentum facere nolunt, libenter tamen aliqua legata, vel donationes mortis causa facerent, id possint per codicillum ab intestato dictum, seu sine testamento. Servit præterea, ut ii, qui testamentum jam fecerunt, possint illud declarare, mutare, augere, vel minuere, dummodo in hoc posteriori casu salva maneat hæredis institutio; alias enim testamentum prius conditum corrueret. 568

Forma Codicilli testamentarii, sive dein fiat ante, sive post testamentum, non est alia, quam ipsius testamenti, ut ait Holzman; est enim accessorius testamento: ergo imitatur naturam testamenti tanquam sui principalis. Forma vero Codicilli non testamentarii, seu qui absque testamento conficitur, sita est in 5. testibus, qui tamen non necessario debent esse rogati; nec specialiter qualificati: adeoque etiam scemina hic testari possunt, modo sint eodem tempore præsentis. Solent tamen excludi personæ legataria, ac fideicommissaria; harum enim personarum negotium in codicillo principaliter agitur, adeoque essent testes in propria causa, quod jura non concedunt, ut notat Holzman de Contractibus n. 714.

*Substitutio* in genere est unius, vel plurium in locum alterius, aut aliorum in ultima voluntate vocatio. Sicut ergo, 569



qui primo instituitur, & vocatur ad hæreditatem, *institutus hæres*, ita, qui secundo, tertio, quarto &c. loco vocatur, *substitutus* dicitur. Dividitur substitutio in *directam*, & *indirectam*. *Directa* est, quando substitutus consequitur hæreditatem, vel legatum immediate ab ipso Testatore, sine alterius ministerio *instituo Petrum: si vero Petrus hæres non erit, quia forte non volet, vel non poterit esse, utpote impeditus ob mortem, aut legem, Jacobus sit hæres meus.* aut brevius: *Petrus sit hæres meus, cui Jacobum substituo.* Substitutio *indirecta*, quæ etiam fideicommissaria dicitur, est, quando substitutus non immediate ab ipso testatore, sed mediante ministerio alterius, nempe prius instituti, jûs suum transferentis consequitur hæreditatem, vel legatum. Contingit ergo tunc, quando hæreditas quidem relinquatur immediate v. g. Sempronio, sed hic *rogatur*, id est, juxta sensum juris, obligatur, & gravatur, ut eam aliquando restituat, vel relinquat Cajo: ut si testator sic dicat: *Sempronius est hæres meus, rogo tamen, id est, volo, mando, ut moriturus hæreditatem meam relinquat, vel cedat Cajo.*

570 Hæc substitutio indirecta vocatur *fideicommissum*, quod dicitur *universale*, si hæres immediatus jubetur totam hæreditatem alteri relinquere: *particulare* autem est, si tantum rogatur partem, vel rem certam v. g. aliquod castrum cedere hæredi substituto. Hæres, qui rogatur, hæreditatem illam alteri relinquere, vocatur hæres *fiduciarius*, vel *gravatus*, vel *hæres fideicommissarius*: ille autem, cui restituenda, vel relinquenda est hæreditas, dicitur simpliciter, & sine addito *fideicommissarius*. Ex quo

Colliges, *fideicommissum* esse substitutionem indirectam, qua hæres vel ex testamento, vel ab intestato immediate succedens, gravatur, seu obligatur, hæreditatem totam, vel illius partem mediam, vel tertiam, vel rem certam alteri restituere suo tempore.

Forma fideicommissi per testamentum relictæ consistit in solemnitatibus testamentariis, relictæ vero per Codicillum in quinque rebus, qui & ipsi debent eodem tempore esse præsentibus, &



& subscribere, si fideicommissum sit scriptum. Quodsi fidei committens solemnitate quoque Codicillari supersedere velit, poterit fiduciarium coram se praesentem oretenus obligare, ut haereditatem alteri restituat: quo casu ad eam restituendam obligabitur in utroque foro: & si neget fidei commissum, poterit a fideicommissario compelli, ut vel juret, fideicommissum non esse relictum, vel ut illud restituat §. ult. Inst. & L. ult. C. de fideicommissis. Insuper fiduciarius a fideicommissario cogi potest iudicis implorato officio, ut haereditatem adeat, & restituat per legem 4. ad SCtum. Trebellianum.

Hoc quoque nota, si haeres directe & immediate institutus, seu fiduciarius, a quo jus transferri debet in substitutum, haereditatem non adeat, regulariter evanescere fideicommissum, nisi nempe causa pia esset substituta: in quo maximae differt fideicommissum a substitutione directa.

Nota 2. Fideicommissum, uti & alias ultimas voluntates, considerari posse *objective*, non pro actu voluntatis fideicommittentis, sed pro re & objecto, quod fidei committitur, vel fideicommissi vinculo ligatur. In hoc sensu dicitur, hoc castrum, haec domus, haec Hoffmarchia est fideicommissum, seu est necessario ex voluntate fideicommittentis restituendum aliis, seu substitutis.

Inter species fideicommissi numeratur etiam fideicommissum *Familiare*, seu *Gentilitium*, quando scilicet tota aliqua familia substituitur. Et hoc est valde commune apud illustres, qui ita sua bona immobilia relinquunt, ut Primogenitus alicujus lineae cum tota sua linea descendantium, ista autem extincta secundo genitus cum sua linea succedat. Et in hoc sensu est proprie *Primogenitura*: si autem ita ordinetur, ut semper natu maximus de tota familia succedat, non attendendo praecise ad lineam ultimi possessoris, strikte *Majoratus* vocatur, quamquam a nonnullis *Primogenitura*, & *Majoratus* confundi soleant. Verum haec res potius ad Civilistas, quam Theologos pertinet. Videatur Pichler L. 3. t. 26. n. 9.

*Legatum* est ultima voluntas, qua haeres jubetur, rem certam & particularem alicui tertio praestare. Ex hoc habes 1.,

N n n n 3

quod



quod legatum non possit fieri, nisi circa rem determinatam, ab hereditate diversam: sic domus, castrum, praedium, quantitas pecuniae, quae legantur, debent esse determinata. 2. Legatarius, etsi ignorantem, quod sibi aliquid sit legatum, statim fieri Dominum rei legatae, postquam haeres adiit hereditatem, non autem antea, per Legem 32. ff. *de Legatis* 2. dummodo legatum non repudiet. Hoc nihilominus observet Legatarius, se propria autoritate non posse occupare legatum, etiam post aditam hereditatem: sed debere expectare, donec illud ipsi ab haerede, vel alio ejus nomine tradatur; secus enim incurrit poenam legis, scilicet amissionem legati. 3. Ad legatum profanum in testamento factum requiruntur eadem solemnitates, quae ad testamentum, nisi adjuncta sit clausula Codicillaris.

572 *Donatio mortis causa* est ultima voluntas, qua aliquis intuitu mortis sua bona alteri confert, ea intentione, ut morte secuta ipsius fiant irrevocabiliter. Differt a Legato, quia donatio mortis causa debet acceptari a donatario, vel ejus deputatio; alias talis donatio non valet: & quidem haec acceptatio debet adhuc fieri ante mortem donantis: aliud est de legato, quod non debet positive acceptari, & tamen valet. Debet etiam in tali donatione exprimi, quod ea fiat mortis causa; alias praesumitur esse donatio inter vivos. Si talis donatio fiat ad causam profanam, requiruntur 5. Testes, uti ad omnem voluntatem ultimam circa causas profanas, excepto testamento, quod septem testes exigit.

573 *Quaeres.* Quo jure sit introducta facultas condendi testamentum, vel faciendi ultimam voluntatem.

R. I. Non habet originem a jure naturali, nec a jure Gentium proprie sumpto. Mezger contra Pichler.

Prob. I. pars. Vel haec facultas est de jure naturae tali, quod jam existit ante rerum, & dominiorum divisionem, vel quod subsequitur rerum divisionem? *Non primum*: quia ante divisionem bona omnia erant communia: ergo tunc non dabatur jus transferendi dominium post mortem in certam, & determinatam personam cum exclusione reliquorum hominum. *Non secun*



*secundum* : quia etiam post divisionem rerum vi juris naturalis nemo est Dominus alicujus rei post mortem : ergo non potest disponere de re aliqua post mortem. Imo post mortem homo non amplius existit : ergo neque tunc dominium habet, aut exercere potest etiam actione destructiva ; quia etiam ad hoc, ut aliquis actu destructivo, & negativo dominium exerceat, illud deperdendo, requiritur omnino usus libertatis, qui non nisi in vivente esse potest.

Confirm. & explicatur : Etsi testator ante mortem, cum adhuc vivit, & Dominus est, significet, se velle dominium suum transferri per ultimam voluntatem in alium, hoc tamen non vult transferri actu, nisi post mortem : ergo in effectu primum post mortem transfert, & disponit de bonis suis, ubi jam nullius dispositionis, & translationis dominii est capax, loquendo præcise de jure naturæ strictè tali.

Prob. 2. pars. Jus Gentium proprie dictum includit mutuum obligationem Gentium plurium inter se, quæ ordinata est ad communem felicitatem Gentium qua talium : atqui sic se non habet facultas faciendi testamenta, quæ non ordinatur ad plures Gentes qua tales, sed potius ad particulares personas plures unius gentis, nec ordinatur ad felicitatem gentium qua talium, sed tantum personarum privatarum. Verbo, consuetudo testandi apud gentes recepta jam ante leges civiles, non respiciebat plures diversas gentes inter se mutuo consideratas, sed respiciebat particularia membra cujuslibet Gentis.

R. 2. Descendit tamen hæc facultas testandi, & ultimam voluntatem faciendi a jure naturali, & Gentium minus proprie sumpto Mezger.

Ratio *primi* est : quia illud minus proprie est de jure naturali, quod suadente æquitate, & ratione naturali pro communi bono per leges civiles statuitur, aut consuetudine, & usu recipitur : sed ita res se habet circa facultatem testandi, & ultimas voluntates condendi.

Ratio *secundi* est : Jus Gentium late, & improprie sumptum est, quod apud omnes Gentes æqualiter custoditur, & usu



usu recipitur absque mutua obligatione: atqui testamenta, & ultimas voluntates etiam ante juris civilis originem, apud antiquissimas Gentes fuisse usu receptas, constat ex S. Scriptura Gen. 48. v. ult. ex testamento Patriarchæ Jacobi &c. Accedunt historiæ, attestantes de praxi Gentibus usitata jam ante conditas leges civiles. Ex quo

Inferes: Factionem testamenti non esse puram creaturam juris civilis, cum hæc jam ante omnes conditas leges civiles fuerit usu recepta apud Gentes. Id, quod eruitur partim ex dictis, partim ex L. 130. ff. de V. S. ubi dicitur: *Legē duodecim tabularum testamentariæ hæreditates confirmantur*: per quod significatur, lege 12. tabularum, quæ fuit prima pars juris civilis, tantum confirmari, & ratificari potestatem condendi testamenta tanquam præexistentem, non autem introduci tanquam aliquid novum. Addidit jus civile plures solemnitates, quæ antecederent apud gentes necdum viguerunt. Hinc factio testamenti in genere, & præscindendo ab ista forma essentiali & specifica, quam defacto habet, jam existit ante leges civiles.

## §. II.

*Aliquæ Conclusiones de valore Testamentorum.*

574 ASSERO 1. Testamentum privilegiatum, conditum in terris, & a Personis Romano Imperio temporaliter subjectis, deficiens in aliqua solemnitate superius explicata est irritum in foro externo, saltem regulariter. Est Communis contra Bartholum, & alios quosdam.

Prob. Prædictæ solemnitates secundum jus commune Cæsareum sunt de forma substantiali testamenti, & testamentum imperfectum ob defectum alicujus talis solemnitatis est irritatum, & annullatum a Legibus: ergo testamentum deficiens in aliqua tali solemnitate est irritum pro foro externo, saltem regulariter. A. p. ex variis Legibus. sic §. ex eo. 7. Instit. Quibus modis testamenti infirmantur. dicitur de testamento: nam imperfectum sine dubio nullum est. & L. hac consultissima 21. C. de testamentis. Ex



*Ex imperfecto testamento voluntatem defuncti tenere non volumus. L. Si unus. 12. C. eodem. Si unus de septem testibus defuerit, vel coram testatore omnes eodem loco testes suo, vel alieno annulo non signaverint, jure deficit testamentum.* Ex quibus juribus colligitur, quod hæc solemnitates non præcise ad probationem, sed ad substantiam, & valorem testamenti solemnitis saltem pro foro externo pertineant, & quod defectus harum solemnitatum in eodem foro reddat testamentum nullum.

Objic. 1. Leges irritant testamentum sine præscripta solemnitate factum propter præsumptionem fraudis: ergo ubi fraus nulla subest, testamentum valebit, saltem pro foro conscientie. R. D. a. irritant ex præsumptione universali, & ob periculum generale fraudis; quia nempe ultimæ voluntates defunctorum generaliter sunt multarum fraudum periculis expositæ C. a. ob præsumptionem particularem, quasi in tali determinato casu esset periculum fraudis N. a. & c. Leges fundatæ in præsumptione & periculo universali valent, & subsistunt, etsi in particulari casu fraus, vel periculum non subsit, ut dixi in Tractatu de LL. Videatur Reiffenstuel in Theol. moral. 575

Objic. 2. Leges civiles, quæ requirunt 7. vel 5. testes ad valorem testamenti, foveant peccatum, & sunt correctæ per jus canonicum: ergo testamentum, vel ultima voluntas facta sine hac solemnitate, & numero testium valet etiam pro foro externo. A. p. Cap. Cum esset. 10. de Testamentis. dicit Alexander III. *A divina lege, & SS. PP. institutis, & a generali consuetudine alienum esse, septem, vel quinque testes adhibere in ultima voluntate, uti jubent Leges civiles; cum scriptum sit, in ore duorum, vel trium testium stat omne verbum.* Ibique ait, valere testamentum, quod Parochianus facit coram Presbytero suo, id est, coram Parocho, & duobus testibus: ergo.

R. N. a. ad prob. dico 1., quod in laudato Capitulo per to alienum a lege divina &c. solum significetur, requisitionem 7. testium esse præter legem divinam, seu non esse præceptam lege divina, non autem esse contra legem divinam. 2. Si jus divinum prohiberet, in quibusdam causis plures, quam duos



vel tres testes exigere, tunc Concilium Tridentinum egit contra præceptum divinum, dum ad valorem matrimonii ultra duos vel tres testes requisivit præsentiam Parochi tanquam testis autorizabilis: magis peccasset Pontifex, dum Can. 3. c. 2. q. 5. ad condemnationem Episcopi requisivit 72. testes: quæ exempla serviunt pro retorsione, & inversione argumenti. 3. Præfatum Capitulum solum est intelligendum pro Personis Ecclesiasticis, Jurisdictioni imperiali non subjectis: item pro territoriis illis, in quibus Papa jurisdictionem temporalem exercet. Quare iterum notandum est, quod Papa pro suo territorio temporali possit etiam leges civiles, quales sunt leges testamentorum, condere: extra illud vero circa Personas sæculares non potest aliquid statuere in materia profana, & mere politica, nec leges Imperatorum & Principum corrigere, nisi hæc peccatum foveant, ut dictum est in Tractatu de LL.

Dices: Summus Pontifex cit. Cap. prohibet sub excommunicatione rescissionem testamenti, coram Parocho, & duobus testibus tantum facti: ergo talis rescissio foveat peccatum; nam excommunicatio locum non habet, ubi peccatum non est. R. Papam ibi loqui de casu, quo quis testamentum, coram duobus vel tribus testibus factum in terris dominio temporali Pontificis subjectis, pertinaciter impugnaret, & legi Pontificiæ pro territorio Papalitatæ refragaretur: quod utique peccatum foret. At tale peccatum non est in illis locis, & apud illas personas, quas non stringit laudata constitutio Pontificia.

Dixi in hac Assertionem 1. *Testamentum non privilegiatum*; specialiter enim privilegiatum valet, etsi aliquibus solemnitatibus careat. Dixi 2. *Conditum in terris, & a Personis Romano Imperio temporaliter subjectis*, ob immediate dicta in responsione ad 2. objectionem. Dixi 3. *Est irritum in foro externo*; quid enim sit in foro interno, dicetur Assertionem tertiam. Proinde iudex debet tale testamentum irritum declarare, quæ sententia, utpote secundum leges lata, est iusta, & in foro quoque conscientiæ obligat. Dixi 4. *Saltem regulariter ob conclusionem mox ponendam, qua fit exceptio*. Item hæc Assertio est intelligenda, nisi



nisi alicubi contraria vigeret consuetudo, vel leges municipales aliter disponerent.

Assero 2. Etsi testamentum careat una, vel pluribus solemnitatibus, a jure civili requisitis, valet tamen, etiam pro foro externo, quoad legata, & fideicommissa. 2. Imo etiam quoad institutionem hæredis pro casu, quo hæres, alias ab intestato succedens, ipsemet audivit, & fatetur voluntatem Testatoris. Reiffenstuel L. 3. T. 26. n. 77. & seq., ubi hanc conclusionem exacte pertractat, cujus fundamenta etiam referam. Pichler &c.

Prob. 1. pars. 1. ex L. *Non dubium*. 16. C. de Testamentis. ibi: Qui ex testamento, vel ab intestato hæres existerit, etsi voluntas defuncti circa legata, seu fideicommissa, seu libertatem legibus non sit subnixæ, tamen si sua sponte agnoverit, implendi ea necessitatem habeat.

Prob. 2. ex L. *Etsi inutiliter*. 2. C. de fideicommissis. ubi disponitur, quod ille non possit fideicommissum revocare, & repetere, qui hoc, etsi in testamento imperfecto, & defectuoso relictum, alteri solvit, & tradidit. Ratio ibi additur; quia sic tradens, & solvens præsumitur ipse audivisse, & scivisse voluntatem testatoris: ergo lex hæc supponit, quod tunc fideicommissa valeant, si hæres ab intestato succedens audiverit, & sciverit voluntatem testatoris, etsi deinde tale testamentum sit defectuosum, & carens solemnitatibus debitis.

Prob. 3. ex L. *Quæstionem*. 32. seu finali. C. de fideicommissis. ibi: Cum enim res per testium solemnitatem ostenditur, tunc & numerus testium, & nimia subtilitas legis requirenda est; lex etenim, ne quid falsitatis incurrat per duos forte testes compositum testamentum, majorem numerum testium exposulat, ut per ampliores homines perfectissima veritas reveletur. Cum autem is, qui aliquid ex voluntate defuncti lucratur (& maxime ipse hæres, cui summa autoritas totius causæ commissa est) dicere compellitur veritatem per Sacramenti Religionem: qualis locus testibus relinquatur, vel quemadmodum ad extraneorum fidem recurratur, propria & indubitata fide relicta? Ex hac lege habetur, quod si ipse hæres præsens



fuerit testamento, cum conderetur, & audierit, hoc vel illud fideicommissum, aut legatum alteri esse relictum, tunc hoc fideicommissum, vel legatum valere, & non requiri numerum testium, aliasque subtilitates, & solemnitates a Legibus alias requisitas; quia in tali casu, ubi ipse hæres, de cujus præjudicio agitur, veritatem agnoscit, hæc alio modo per testes non est exquirenda. Si vero ille, qui corrue[n]te testamento ab intestato succederet, neget, se præsentem fuisse factioni testamenti, aut se audivisse voluntatem testatoris, tunc in tali casu potest hæres in tali testamento defectuoso, & imperfecto institutus, vel ille, cui in eo legatum &c. relictum est, potest neganti deferre juramentum: quod si recusaret hæres ab intestato, tunc hæreditas devolveretur ad hæredem in testamento imperfecto institutum. Ita habetur cit. L. finali C. de fideicommissis. & §. finali Inst. de fideicommissariis hæreditatibus.

Ex hac ultima lege manet etiam probata pars secunda conclusionis; nam in illa dicitur generaliter, quod tunc tantum numerus testium, & nimia subtilitas sit requirenda, si res, seu veritas per solemnitatem testium ostenditur.

577

Objic. 1. Lex illa finalis C. de fideicommissis. tantum loquitur de fideicommissis, & legatis: ergo inepte a nobis ad testamenta extenditur. R. N. a. Ratio negandi est 1., quia lex illa etiam loquitur, & disponit de ipsis testamentis, ut patet ex iis verbis: *Lex enim, ne quid falsitatis incurrat per duos forte testes compositum testamentum &c.* 2. Testium solemnitas, & legum subtilitas in testamentis est inventa a jure civili, ut per ampliores homines perfectissima veritas reveletur, & ut securissime evitetur omnis fraus: atqui veritas non potest perfectior haberi, neque fraus magis evitari, quam si ipse hæres, qui ab intestato succederet, & de cujus præjudicio unice agitur, veritatem edicat, hoc ipso, quod propria talis hominis confessio sit omnium optima, ac plenissima probatio, vel potius probationis revelatio: ergo per ipsam scientiam, & confessionem talis hominis habetur totum id, quod deberet præstare testium major numerus: hinc iste in hoc casu non requiritur in testamento, & istud sine tali solemnitate suum effectum, & valorem ha-



habet. 3. Inter conditiones ad legem requisitas est etiam, ut ea sit utilis, & necessaria, prout dictum est in Tractatu de Legibus, & communis est doctrina omnium: atqui lex, ad evitandas, fraudes & acquirendam de voluntate testatoris veritatem præscribens solemnitates juris, non est necessaria, neque utilis in præsentī casu, ubi testamentum, ac ultima voluntas per hæredem ab intestato est cognitum, & confessatum: ergo talis lex præscribens solemnitates juris in isto casu non datur, seu se non extendit ad istum casum. m. p. in præsentī etenim casu nunquam potest subesse fraus. Deinde, ubi adest confessio partis adversæ, alia probationis media necessaria non sunt. Denique neque iudex attendere potest ad subtilitatem juris, quando ea obest veritati.

Objic. 2. Leges universaliter annullant testamenta debitis solemnitatibus destituta: ergo ea etiam in particulari hoc casu sunt nulla. R. D. a. sine omni exceptione N. a. cum exceptione aliqua, scilicet illa, quæ indicatur in L. final. C. de fidei commissis. C. a.

Objic. 3. Leges irritantes imperfecta testamenta fundantur in periculo universali fraudis: ergo, esto in particulari casu, quando hæres ab intestato novit, & confitetur voluntatem testatoris, non subsit fraus, tamen ob universale periculum tale testamentum est nullum. R. D. c. nisi sit specialiter exceptum C. c. secus N. c. Non tantum in uno vel altero particulari casu, sed universaliter in testamento abest omne periculum fraudis, quando hæres ab intestato, tamquam adversarius testamentum minus solemne impugnans, ipsēmet scit, & prout ponimus, fateatur, hanc fuisse testatoris voluntatem. Ex his igitur

Colliges, quod in valore suo subsistat testamentum illud, quod quidem solemnitatibus juris civilis caret, cui tamen, dum fiebat, interfuit ille ipse, qui ab intestato deberet succedere. Porro tale testamentum etiam valet, etsi hæres, alias ab intestato successurus, se neget interfuisse testamento, dum condebatur. A fortiori ejusmodi testamentum valet in foro interno: quia aliunde de jure naturæ, & Gentium minus stricte tali valet, & de jure civili non irritatur, imo potius confirmatur. Hinc potest tam hæres in tali testamento scriptus, quam Legatarius



tarius tuta conscientia relictam sibi hæreditatem, & legata accipere, & retinere: si autem hæres ab intestato hæreditatem, vel rem legatam occupasset, teneretur eas restituere: quodsi non restitueret, possent hæredes & Legatarii scripti uti occulta compensatione, vel agere contra eum. Ita Reiffenstuel cit. L. 3. Decret. tit. de Testamentis, feu 26. n. 98. & seq. deduciturque clare ex assertione posita, & hucusque dictis.

578

Affero 3. Etiam in casu, quo hæres ab intestato factioni testamenti non interfuit, valet testamentum minus solemne *in foro interno* quoad legata, & institutionem hæredis, quamdiu non pronunciatur invalidum. Ita cum antiquis Theologis, ac Juristis plerisque Reiffenstuel tit. de Testamentis n. 106. nec non in Theolog. morali. Pichler n. 30. contra Herinx, Mezger, Holzman, ac plures alios, quia putant similia testamenta etiam pro foro interno esse irrita.

Prob. 1. Ex una parte antecederet ad jus civile vi juris naturalis, & Gentium saltem improprie talis ejusmodi testamentum valuerunt pro foro interno: ex altera parte non sufficienter probatur, quod per leges civiles sit facta irritatio similium testamentorum pro foro interno: ergo adhuc valent pro foro interno, donec per sententiam judicis rescindantur.

Confirm. Correctio legum præexistentium semper est odiosa, & debet restringi, quantum potest: atqui per leges civiles, quæ requirunt solemnitates istas ad testamentum, corrigitur jus naturale & Gentium præexistens: ergo leges hæ civiles debent restringi, quantum possunt. Cum ergo commode possint intelligi de solo foro externo, hinc de isto solo, non autem etiam de foro interno intelligi debent.

Prob. 2. Alii multi actus & contractus, etsi a lege irritentur, valent pro foro conscientie ante sententiam judicis: ergo & testamenta sic irritata adhuc valebunt ante sententiam judicis.

Prob. 3. Leges civiles testamentariæ per se tantum spectant regimen politicum, & forum externum, instruendo iudices, quid in tribunalibus, & foro externo observandum, & pro-



pronunciandum sit: ergo nisi clare indicent, quod velint etiam ante sententiam judicis jam obligare in foro interno, id non est præsumendum. Atqui leges testamentariæ non clare exprimunt, quod velint irritare, & obligare ante sententiam judicis, vel saltem ante exceptionem partis adversæ: ergo. m. subsumpta ex solutione objectionum patebit.

Verum ut hæc Assertio, & alia plura, quæ in rebus moralibus semper redeunt, rite penetrentur, sequentia ex Reiffenstuel L. i. Decret. T. 2. de Constitutionibus n. 251. & seqq. adverte. 579

1. Dupliciter potest actus irritari a lege. 1. plenissime: 2. solum simpliciter. *Plenissime* irritatur aliquis actus, alias de jure naturæ validus, quando lex indicat, se annullare hunc actum pro omni foro, etiam interno, ac enervare omnem ejus obligationem, etiam naturalem. *Simpliciter* autem irritatur, quando lex quidem annullat, sed non explicat, an hæc irritatio etiam se extendat pro foro interno.

2. Certum est, quod actus, plenissime irritatus a legibus, nec civilem, nec naturalem obligationem pariat, neque pro foro externo, aut interno subsistat.

3. Si tantum simpliciter sit irritatus aliquis actus, tunc ille in foro conscientiae, ante sententiam judicis secutam, adhuc valet. Ita probabiliter sentit Reiffenstuel cit. Pichler eod. Tit. n. 68., quibus consentiunt Molina, Lessius, Wadingus, Innocentius, & alii. Ratio est: quia ex una parte legislatores potuerunt ita statuere, ut lex simpliciter, & non plenissime irritans tantum valeat pro foro externo, non pro interno, saltem ante sententiam: ergo dicendum est, sic statuisse; quia in correctione juris antecedentis, vel sublatione facultatis antecedentis tanquam in re odiosa, semper est stricta interpretatio facienda, & restringi debet, quantum potest: atqui hic agitur de correctione juris antecedentis, scilicet naturalis permissivi, quod valorem horum actuum saltem permittit. Accedit etiam, quod ipso usu non sint aliter receptæ præfatae leges, quam in sensu Assertionis nostræ. Plura alia apud laudatos Authores videre poteris.

4. Ter-



4. Termini, quibus lex indicat, contractum etiam pro foro interno esse nullum, sunt similes, aut æquivalentes: *Eti- am in foro animæ non suffragantur*. Id etiam potest desumi ex consuetudine, & sensu fidelium, recipiente, & agnoscente com- muni consensu irrationem ejusmodi plenissimam: vel etiam ex eo, quia alias lex irritans non obtineret suum intentum, & finem, nisi irritatio quoque pro foro interno procederet. Sic impedimenta matrimonii dirimentia communi consensu fidelium censentur irritare matrimonium pro foro etiam interno. Et hoc universaliter contingit in actibus illis, qui semel valide cele- brati, amplius rescindi nequeunt; hi enim, si lege irritantur, semper pro foro etiam interno irritari censentur. Ratio hujus est: si tales actus a lege irritati adhuc valerent pro foro inter- no, lex irritans non posset habere effectum; cum actus tales semel validi per sententiam judicis non possent amplius rescin- di, sed deberent deinde etiam pro foro externo in suo valore relinqui. Ex his habes, quod & Professio religiosa, quæ eti- am semel valide facta est irrefcindibilis, sit plenissime irritata, si emittatur a te 16. ætatis annum, vel ante annum Novitiatus completum. Tridentinum c. 15. sess. 25. de Regularibus. Pariter etiam electio, vel collatio beneficii Ecclesia- stici simoniace facta, est plenissime irritata, ac proinde neque pro foro interno valet, ut patet ex Cap. *Mattheus. de Simonia*. juncta extravagante *cum detestabile*, eod. Tit. Constat hoc ex ipsis verbis extravagantis, ubi dicitur, quod ejusmodi dispositiones, electiones, postulationes &c. viribus, NB. omnino careant: quod per easdem jus nullatenus acquiratur: quod ad illorum omnium, quæ ex tali beneficio perceperunt, restitutionem *sub animæ suæ periculo* sint adstricti, quæ utique satis significant omnimodam, ac plenissimam irrationem, etiam pro foro conscientia. Adde communem etiam sensum Doctorum & fidelium, qui agnoscit, irrationem hanc etiam pro foro interno procedere.

5. Sunt tamen alii actus, qui solum simpliciter irritati pro foro interno ante sententiam judicis, vel saltem ante exceptio- nem alterius partis valent, ut alienatio rerum Ecclesiasticarum in casu quidem licito, & sine detrimento Ecclesiæ, absque ta- men debitis solemnitatibus facta, quæ quidem a jure irritatur

sim-



simpliciter, sed valet in foro conscientiae juxta Abbatem Panormitanum apud Reiffenstuel cit. Ratio est: quia in foro conscientiae, & ad obligationem naturalem non plus requiritur, quam consensus solus. Idem tenet Layman L. 1. Theol. moral. T. 4. c. 16. n. 6., ac exemplificat de ludo alearum, de contractu cum pupillo celebrato, de testamento minus solemni, de poena sponsalibus adjecta, de donatione ultra quingentos solidos: item de electione, quae ob defectum alicujus solemnitatis, jure tantum positivo requisita, irrita est, & de nonnullis aliis. Vide Reiffenstuel in Theolog. moral. T. 8. de Contractibus. dist. 1. n. 21. & seqq.

Objic. 1. Omnes illas leges, quibus testamentum imperfectum dicitur nullum, vel voluntas defuncti non dicitur tenere sine solemnitatibus juris: ergo. R. Illis legibus non plenissime, & pro foro quoque interno irritari testamenta insolemnia, neque testatorem absolute inhabilem reddi ad testandum, ut colligitur ex probationibus, & dictis.

580

Objic. 2. Religiosi sine consensu Superiorum semper invalide disponunt de rebus temporalibus: ergo etiam invalide testatur aliquis sine consensu legislatoris per testamentum imperfectum. R. N. c. & parit. Religiosus enim, cum vi professionis suae sollemnis sit incapax domini, per se non potest nomine suo, & sine consensu Praelati disponere de rebus temporalibus, sicut & alius, qui non habet dominium alicujus rei, eam alienare, aut alio modo de ea disponere nequit; quia non potest disponere de re non sua. At testator, dum facit testamentum etiam imperfectum, disponit de re sua.

Objic. 3. Judex debet haeredi ab intestato adjudicare haereditatem, alteri in testamento imperfecto relictam: ergo talis haeres ab intestato jam antecedenter habuit jus, consequenter jam antecedenter tale testamentum non valuit. R. D. a. habuit jus conditionatum, si velit agere, vel excipere, & exceptione ac actione haereditatem illam sibi obtinere per judicis sententiam &c. C. c. habuit jus absolutum N. c.

Objic. 4. Si haeres ab intestato per errorem solvit legatum, vel fideicommissum relictum in Testamento defectuoso, putans



se teneri ad talem solutionem, potest iterum repetere tanquam indebite solutum. L. 7. C. *de conditione indebiti*: ergo idem erit de hereditate, quam forte per errorem tradidit heredi insolemniter instituto. Atqui quando solutum repeti potest, nec obligatio naturalis datur L. *naturales obligationes*. 10. ff. *de obligationibus*, & *actionibus*: ergo neque obligatio naturalis datur ex tali testamento.

R. 1. N. a. nam lex illa nec verbulum habet de relictis in testamento imperfecto: adeoque non est ad rem. Ejus verba sunt: *Fideicommissum, vel legatum indebitum per errorem facti solutum, repeti posse, explorati juris est*. R. 2. Tr. a. N. m. subsumpt. nam ea non est universaliter vera, praesertim tunc, quando obligatio naturalis per sententiam judicis tolli potest. Deinde lex *naturales obligationes* unice dicit, quod etiam ex hoc possit colligi, adfuisse naturalem obligationem, si solutum nequit repeti: non autem negat, in aliis quoque casibus, ubi solutum potest repeti, non posse dari obligationem naturalem. Tota lex ita habet: *Naturales obligationes non eo solo aestimantur, si actio aliqua earum nomine competit: verum etiam eo, si soluta pecunia repeti non possit*.

581

Deduces: 1. Plurimum referre in praxi, quid in hac quaestione dicatur; si enim nobiscum teneatur, testamentum tale valere pro foro interno, uti nos putamus, tunc haeres in ejusmodi testamento imperfecto tuta conscientia accipere, & retinere potest hereditatem, etsi sciat defectum testamenti, & nullitatem ejus pro foro externo: haeres vero ab intestato succedens, nisi velit impugnare testamentum, vel saltem excipere, teneatur ipsi relinquere hereditatem.

Deduces. 2. Si tamen haeres ab intestato exciperet, & non traderet hereditatem, tunc heredem institutum in imperfecto testamento, etiam nulla adhuc sententia judicis rescissoria secuta, non posse facere occultam compensationem. Ratio est: quia, ut liceat uti occulta compensatione, debet debitum alterius esse certum, & liquidum: atqui liquidum & certum non est, quod tale testamentum imperfectum, etiam ante sententiam judicis, in foro conscientiae teneat, cum contraria sententia sit vere probabilis, & a multis egregiis Theologis & Jctis sustineatur: con-

se-



sequenter etiam non est certum, quod hæres ab intestato succedens, vi testamenti imperfecti alteri, qui est in testamento imperfecto hæres institutus, restituere debeat: ergo.

Deduces 3. Solemnitatem quinque testium ad alias ultimas voluntates, quæ sunt extra testamentum, requiri ad valorem talium legatorum, fideicommissorum particularium, Codicillorum &c., & non tantum ad probationem, loquendo de foro externo. Pichler n. 33. Ratio est: quia æqualiter requiruntur 5. testes ad has ultimas voluntates, sicut ad testamenta requiruntur septem: atqui 7. testes requiruntur ad testamenta, ut valeant, & non tantum, ut probentur: ergo idem dicendum est de quinque testibus respectu aliarum ultimarum voluntatum. M. p. ex L. fin. C. de Codicillis. ubi dicitur: *In omni ultima voluntate, excepto testamento, quinque testes debent adhiberi*: ergo ad alias ultimas voluntates ita requiruntur 5. testes, sicut 7. requiruntur ad testamenta. Est tamen hæc assertio contra alios apud Pichler citatos.

§. III.

*Resolvuntur varia.*

ASSERO 1. Etsi testamentum profanum ob defectum solemnitatum declaretur nullum, tamen legata pia ei inserta, si de iis legitime constet, subsistunt. Communis. P. Cap. 2. de *Judiciis*. & singulariter Cap. *relatum*. II. de *Testamentis*: legata pia sunt causa spiritualis, quæ Pontificiæ, non autem Cæsareæ, vel civili dispositioni subjacet.

582

Objic. Accessorium sequitur naturam principalis: ergo corruente testamento profano ob defectum solemnitatum, corrumpunt etiam legata pia; quia hæc sunt accessorium ad testamentum. R. Hanc regulam in Antecedenti assumptam habere tantum locum, quando accessorium non est specialiter privilegiatum: atqui in nostro casu legata pia sunt specialiter privilegiata.

Assero 2. Regulariter, corruente testamento profano, corrumpunt etiam legata profana, etsi forte sufficiens solemnitas pro-

583



legato adesset. Ratio est: quia ejusmodi legata sunt accessoria testamento, neque sunt specialiter privilegiata: ergo hic procedit regula mox citata. Dixi tamen: *regulariter*; si enim testamento adjecta esset clausula codicillaris, tunc legata talia valerent. De clausula codicillari vide Theologiam moral. P. Reiffenstuel Tr. 8.

584 Afferro 3. Legata ad profanas causas facta, pio testamento sine solemnitatibus juris civilis confecto inserta, valent, & sunt præstanda. Ratio est: quia subsistente principali etiam accessoria subsistunt: sed testamentum pium etiam sine solemnitatibus juris civilis tenet, ut mox dicetur: ergo & legata profana eidem inserta subsistunt.

585 Afferro 4. Non tantum in terris Pontificiis, sed etiam Romani Imperii, pro foro quoque externo valent testamenta ad pias causas sine solemnitatibus juris civilis, dummodo habeant sufficientem probationem ultimæ voluntatis. Communis apud Reiffenstuel, Mezger, & alios. Prob. 1. ex communi DD. consensu, qui in hoc conspirat. P. 2. ex Cap. *relatum* II. de *Testamentis*. ubi de testamento ad causas pias ita statuitur: *Mandamus, quatenus, cum aliqua talis causa* (scilicet testamentum pium) *ad vestrum examen fuerit deducta, ea non secundum leges, sed secundum Decretorum* (id est, Canonum) *statuta tractetur, tribus, aut duobus legitimis testibus requisitis.* Hæc constitutio Pontificia concernit præcipue salutem, & favorem animæ: atqui constitutiones Pontificiæ, quæ præcipue concernunt salutem & favorem animæ, non tantum in territorio Pontificio, sed etiam Imperio sunt observandæ. Hæc, & alia plura exacte & breviter habet Reiffenstuel in Theol. mor. Tr. 8. d. 3. n. 20. & seqq. ubi vide.

586 Afferro 5. Testamentum posterius insolemne, ad pias causas tamen factum, derogat priori solemnni ad causas profanas. Mezger. Sequitur ex Assertionem præcedente; nam universaliter posterius testamentum validum derogat priori, quamvis valide confecto: sed testamentum insolemne ad pias causas est validum juxta dicta: ergo derogat priori solemnni, quod & annullat.



Affero 6. Potest etiam legari res aliena, servatis debitis conditionibus. Prob. textu claro §. 4. Inst. de Legatis. item L. 10. C. de Legatis. Favet quoque Canon 5. caus. 12. q. 5.

Dixi : *Servatis debitis conditionibus* ; nam valet tale legatum, si testator legans sciivit, rem esse alienam, non autem, si nesciivit : item, si res non sit aliunde exempta a commercio humano, si scilicet non sit publico usui deputata, ut templum, forum &c. vel res ad Ecclesiam spectans.

Nihilominus per hoc non imponitur dominio obligatio, rem suam, quæ fuit legata, cedendi Legatario, etiam pro pretio : sed hæres tenetur talem rem emere iusto pretio, vel si Dominus eam vendere nollet, tunc teneretur hæres pro ea Legatario dare æstimationem, ut patet ex variis legibus, præsertim §. 4. Inst. cit.

Objic. 1. Cap. 5. de Testamentis. a Gregorio IX. statuitur : *Leges sæculi hoc habent, ut hæres ad solvendum cogatur, si author ejus rem legaverit alienam : sed quia lege Dei, non autem lege hujus sæculi vivimus, valde mihi videtur injustum, ut res tibi legata, quæ cujusdam Ecclesiæ esse perhibentur, a te teneantur, qui aliena restituere debuisti* : ergo. R. 1. ex hoc textu ad summum haberi, quod prohibeatur legatum rei alienæ, si ea spectet ad Ecclesiam, sicut & res alienæ ad Imperatorem spectantes non possunt legari. Et hoc gratis transmittitur : ast nego per textum citatum invalidari etiam legatum rerum aliarum alienarum. R. 2. Ex verbis hujus Capituli tantum haberi, quod res aliena legata non possit retineri, invito Domino hujus rei, prout & nos fatemur.

Neque lex ista civilis, concedens facultatem legandi rem alienam, fovet peccatum ; non enim concedit Legatario potestatem accipiendi, & retinendi rem alienam invito Domino, ut ex dictis constat.

Objic. 2. Magis injustum est, scienter legare rem alienam, quam ignoranter : ergo si legatum rei alienæ ignoranter factum non valet, multo minus valet, si fiat scienter. R. N. suppo-



ſitum Antecedentis, quod ſit iniquum legare rem alienam. Quod autem legatum rei alienæ ignoranter factum non valeat, reddit jus Cæſareum ipſum hanc rationem: *Forſitan enim, ſi ſciwiſſet, rem alienam eſſe, non legawiſſet.* Ubi Legatario quoque imponitur onus probandi, quod Teſtator ſciverit, rem eſſe alienam.



### ARTICULUS III.

*De Contractu, & Lucro ob turpem causam.*

588 **C**ontractus ob turpem causam est, quando sub conditione operis turpis aliquid promittitur, ut quando Paulus promittit Sicario 10 aureos, si inimicum suum occidat, vel meretrici, si præbeat usum corporis, aut Judici, si ferat injustam sententiam.

Potest vero talis contractus contingere intra, aut extra materiam iustitiæ. Intra materiam iustitiæ est, si adimplendo conditionem turpem læditur jus alterius: extra materiam iustitiæ, si non læditur jus alterius. Intra materiam iustitiæ sunt casus de Sicario, & Iudice mox adducti, extra eandem materiam est casus de meretrice, quæ peccat solum contra castitatem, non contra iustitiam.

Quæritur præcipue 1. , an contractus ejusmodi valeant ?  
2. An illud , quod vi talis contractus , adimpleta conditione traditur , possit accipi , & retineri ? Putant Juristæ apud Lessium restituendum esse pretium , acceptum ob facinus , quod leges puniunt : sic juxta hanc sententiam Sicarius deberet restituere mercedem , quam ob patratum homicidium accepit. Alii sentiunt de pretio accepto ob crimen , quod non punitur a legibus , quale est peccatum meretricum. Alii vero judicant , restituendum esse quodcumque pretium ob turpem causam acceptum. Cajetano , & Soto placet , non posse retineri , & per consequens debere restitui acceptum ob turpem causam solum tunc

tunc



§. I. Quid juris tribuat contractus ob turpem causam? 855

tunc, quando ea est contra iustitiam, ut in casu de ficario, & iudice: non vero, si sit contra aliam virtutem, v. g. castitatem, ut in casu meretricis. Huc etiam reducitur quæstio de lucro ob honestam causam, præsertim si sit debita ex iustitia.

§. I.

Quid juris tribuat contractus ob turpem causam?

ASSERO 1. Contractus turpis ante impletam conditionem 589  
turpem nec obligat promittentem ad solvendum pretium, neque alterum ad patrandum facinus, seu purificandam conditionem: imo uterque potest, & debet resilire a contractu. Communissima apud Herinex disp. 2. de Promissione n. 23. & apud Viva p. 5. d. 4. q. 2. Art. 1.

Prob. 1. Non potest esse obligatio ad peccandum: ergo contractus ob turpem causam neutrum obligat ante impletam conditionem. C. p. Talis contractus non obligat e. g. ficarium ad patrandum homicidium; cum hic non possit obligari ad peccandum: neque promittentem obligat ad dandum pretium propter homicidium; promissio enim est conditionata, quæ ex una parte non obligat ad præstandam mercedem non purificata conditione, ex altera autem parte in ficario nulla est obligatio ad purificandam conditionem: ergo neque promittens obligabitur ad solvendum pretium ante positam conditionem.

Prob. 2. ex cap. fin. de Pactis. quod sic habet: *Pactiones factæ a vobis pro quibusdam spiritualibus obtinendis, cum in huiusmodi omnis pactio, omnisque conventio debeat omnino cessare, nullius penitus sunt momenti. Quod etiam de aliis dicendum, quæ observatæ vergunt in animæ detrimentum; nam etiam juxta legitimas sanctiones pactum turpe, vel rei turpis, aut impossibile de jure, vel de facto, nullam obligationem inducit. Accedit lex generaliter. de V. S. ibi: Generaliter novimus, turpes obligationes nullius esse momenti.*

Quod autem ejusmodi contractus ante impletam conditionem debeat rescindi, clare habetur ex Can. in malis. caus. 22.

q. 4.



q. 4., ubi S. Isidorus ait: *In malis promissis rescinde fidem, in turpi voto muta decretum; impia enim est promissio, quæ scelere adimpletur.* Ex his,

Deduces 1. Si promittens ante impletam conditionem solvit mercedem v. g. ficiario, tunc hunc teneri ad restitutionem, nec mercedem retinere posse. Ratio est: quia non impleto contractu solutio etiam non debetur.

Deduces 2. Contractum hunc ob conditionem turpem differre ab aliis contractibus conditionatis honestis in hoc, quod in his, seu honestis, pendente adhuc, & necdum purificata conditione saltem sit obligatio non resiliendi, aut rescindendi contractum, non autem in contractibus turpibus: convenire autem in hoc, quod nullus ex his contractibus obligationem absolutam in promittente inducat solvendi pretium ante præstitam, aut impletam conditionem.

590

Affero 2. Regulariter, & in foro conscientiae contractus de re turpi, adimpleta turpi conditione, obligat promittentem ad solvendum promissum, & promissarius potest illud acceptare, imo & exigere. Communis apud Lugo d. 8. sect. 3. ex D. Thoma, & apud Herincx d. 2. de promissione n. 36.

Prob. 1. pars 1. Contractus de re turpi eatenus ante impletam conditionem est rescindendus, & non obligat, quatenus obligat ad peccatum: atqui impleta conditione non obligat ad peccatum, cum solutio pretii tunc non sit peccaminosa: ergo contractus huiusmodi adimpleta conditione turpi obligat ad solvendum pretium.

Confirm. Quicumque se alteri obligat ex contractu oneroso ad actionem aliquam bonam, vel indifferentem, ad illam tenetur: atqui in casu Assertionis promittens se obligat ex contractu oneroso ad solutionem pretii, quæ jam adimpleta conditione turpi est actio honesta, vel saltem indifferens: ergo promittens, adimpleta a promissario conditione turpi, tenetur ad solutionem pretii.

Prob.



§. I. Quid juris tribuat contractus ob turpem causam? 857

Prob. 2. Qui sub conditione turpi deflorationis promittit puellæ matrimonium, tenetur eam, secuta defloratione, ducere etiam juxta AArios: ergo non est ratio, cur non etiam in aliis contractibus, secuta conditione turpi, debeat res promissa præstari a promittente.

Prob. etiam 2. pars., ac simul prima confirmatur. 1. ex L. 4. ff. de conditione ob turpem causam. ubi dicitur: *Meretrix turpiter facit, quod sit meretrix, sed non turpiter accipit, cum sit meretrix.* 2. Qui posuit turpe facinus in gratiam alterius, posuit rem alteri gratam, & utilem: ergo licet pro re turpi, qua turpi, posita non possit exigi, aut retineri pretium, potest tamen retineri, ac exigi pro ea, quatenus est grata, & commodata alteri: item pro fidelitate, quæ præstata est. 3. Promittens adimpleta conditione tenetur ejusmodi pretium solvere: ergo & promissarius potest illud exigere, accipere, & retinere:

Dixi: *In foro conscientiae*; in foro enim externo a legibus in pœnam talis contractus illicite celebrati sæpe promissario denegatur actio, quamvis in foro conscientiae illi debeatur pretium promissum. Interim & ipsæ leges aliquoties in foro externo adstringunt ad solvendum hujusmodi pretium, utputa pro opere meretricio.

Assero 3. Præcedens assertio secunda etiam locum habet, etsi conditio turpis sit contra justitiam. Citati. Sic 1. promittens tenetur sicario solvere mercedem pro patrato homicidio, etsi hoc sit contra justitiam. 2. Etiam veneficæ debet dari stipendium promissum posito veneficio, quo vi contractus initi nocuit alteri. 3. Judex quoque potest exigere pretium, & retinere pro sententia, quam vi talis pacti turpis injuste tulit. 4. Pariter custos sylvæ, concedens extraneis lignationem ob pretium ab iis promissum, potest hoc exigere, accipere, & retinere. Hi tamen omnes notent, quod, licet possint licite accipere, & retinere pretium, datum pro opere turpi, postquam hoc impleverunt, teneri tamen omne damnum compensare, quod tertio ex actione illa turpi est secutum. Sic ficarius in defectum mandantis debet compensare omnia damna, quæ hæredes occisi ex tali



tali homicidio patiuntur. Idem est de reliquis cum proportionem dicendum. Ratio autem Assertionis est: in simili casu pretium accipitur adhuc pro re emptori grata, & pretio aestimabili, & ad quam promissarius non tenebatur; & quamvis promissarius ponendo opus turpe, peccet contra justitiam respectu alicujus tertii, non tamen sic peccat respectu promittentis pretium; quippe cui nullam injuriam infert, & qui libere vult, ac valide potest promittere pretium: ergo.

592

Objic. 1. *L. Pacta. C. de Pactis.* ejusmodi pacta irritantur: ergo. R. 1. Retorq. Argum. in pactum sub conditione operis meretricii, & in sponsalia facta sub conditione deflorationis. R. 2. D. a. ejusmodi pacta irritantur, id est, non obligant ante positam conditionem C. a. posita conditione *subd.* non obligant aliquoties pro foro externo, quatenus pro eo non tribuunt actionem promissario C. a. pro foro interno N. a.

Objic. 2. Solutio pretii post patratum homicidium &c. est approbatio homicidii: ergo talis solutio est mala, & prohibita. R. 1. Retorq. Argum. sicut prius. R. 2. N. a. potest enim solvi pretium pro opere malo, quod hic & nunc jam displicet.

Objic. 3. Qui dat primum pro opere meritorio, & bono, approbat illud, & habet complacentiam: ergo etiam, qui solvit stipendium pro opere malo, hoc approbat. R. 1. iterum retorquendo. R. 2. N. c. Primum enim ordinarie solvitur pro opere bono, aut saltem grato pramianti; hinc trahit ejus complacentiam: contra pretium potest solvi pro opere malo, quod hic & nunc displicet, quamvis fuerit gratum tunc, dum pretium promittebatur.

Objic. 4. Actio talis v. g. homicidium non potest premiari: ergo neque pro illa ex pacto potest recipi pretium. R. N. c. Primum supponit meritum, quod necessario exigit actionem bonam & honestam: pretium autem est propter debitum, quod potest esse ex contractu etiam inhonesto.

Objic. 5. Obligatio hæc solvendi pretium post patratum a promissario facinus allicit promissarium ad peccandum: ergo ea est



est contra mores, & fovet peccatum, consequenter talis obligatio nulla est, ut patet ex probationibus Assertionis secundæ. A. p. Sicarius, si sciat, sibi ex debito justitiæ post patratam eadem pretium esse solvendum, allicitur ad facinus: si autem sciret, sibi non deberi, nec dandum esse ejusmodi pretium, facile retraheretur ab homicidio, ad quod conducitur: ergo. R. 1. indirecte. Spes remissionis futuræ multos allicit ad peccandum ergo neque Deus, neque homines deberent offensas remittere; quia ista remissio foret mala, & pugnaret contra bonos mores. R. 2. N. a. Obligatio hæc per se allicit ad actum justitiæ honestissimum, per accidens vero, & ex malitia hominum præbet occasionem criminis.

Objic. 6. Opus spirituale, v. g. administratio Sacramenti, ob suam dignitatem est supra omne pretium, & ideo vendi non potest: ergo etiam opus turpe ob suam villitatem est infra omne pretium, consequenter etiam vendi, aut pretio aestimari non potest. R. N. supposit. quod opus turpe qua tale, seu peccatum juxta nos vendi, vel pro eo aliquid accipi possit; nam nec peccatum, nec res sacra, aut opus spirituale vendi potest: potest tamen vendi incommodum, periculum &c., quod quis patrando scelus subit in gratiam alterius: item actio, quatenus est commoda, & grata alteri, nec non fidelitas &c. Ex ipsa ratione jure naturæ posset quidem vendi labor intrinsecus in perficiendo opere spirituali, quatenus hic est incommodus, vel gravis agenti. Quia tamen Deus tanquam supremus Dominus jure positivo præcipit spiritualia gratis dari, juxta illud Matth. 10. *Gratis accepistis, gratis date*: ideo contra justitiam peccat Simoniacus vendendo rem sacram, aut laborem intrinsecum illi annexum. Si enim Dominus mandat œconomo, vel administratori suo, ut aliquid gratis distribuat, & hoc non obstante œconomo pretium pro distributione accipiat, peccat contra justitiam, & ad restitutionem tenetur. Hinc etiam, quia jure saltem Ecclesiastico beneficia Ecclesiastica gratis conferenda sunt, ideo contra justitiam accipitur pretium pro collatione beneficiorum, quamvis beneficium secum afferat emolumentum temporale. Unde ab Alexandro VII. damnata est sequens propositio ordine 22.: *Non est contra justitiam, beneficia Ecclesiastica non*



*conferre gratis, quia collator non exigit pecuniam pro collatione beneficii, sed veluti pro emolumento temporali, quod tibi conferre non tenebatur.*

Objic. 7. Judex vendendo injustam sententiam, & conjux adultera usum sui corporis viro alieno, vendunt rem non suam; etenim nec judex est Dominus sententiæ injustæ, nec conjugata est domina usus sui corporis: ergo talis venditio neque adimpleta conditione obligat. R. N. a & supposit. Siquidem nec judex injustam sententiam qua talem, nec conjux adulterium formale vendunt: sed tantum vendunt incommodum, & periculum, quod ferendo iniquam sententiam, & admittendo adulterium subeunt in gratiam, & delectationem alterius. Vel vendunt actus hos, quatenus aliis utiles & delectabiles, ac sibi periculosos, non autem quatenus malos.

Dices: Judex, & adultera illicite subeunt illud periculum, & incommodum &c.: ergo vi hujus nihil possunt accipere. R. 1. Retorq. Argum. Meretrix fornicando illicite subit incommodum &c. & tamen pro eo potest accipere pretium. 2. Qui post prima sponsalia, inita cum Anna, contrahit matrimonium cum Catharina, illicite facit, & tamen non illicite præstat ea, quæ vi hujus contractus matrimonialis illicite initi debet. 3. Ille, qui votum fecit, quod velit nihil amplius alteri donare, illicite facit quidem donationem, non tamen illicite solvit ea, quæ donavit: & sic de aliis, quæ partim pro retorsione, partim pro ratione responsionis, & negationis serviunt. Quare in forma *neg. conseq.*

Objic. 8. Saltem pretium, quod ante patratum homicidium a sicario accipitur, post patratum illud non potest retineri; quia hoc fuit illicite, & contra justitiam acceptum: ergo. R. N. a. sic enim meretrix, etsi injuste & illicite ante crimen patratum accipiat pretium, non tamen peccat illud retinendo post crimen patratum; mutatur enim circumstantia, ratione cuius acceptio erat injusta.

Objic. 9. Reg. 18. J. in 6. ita habet: *Non firmatur tractu temporis, quod de jure ab initio non subsistit*: ergo contractus de



III.  
one be-  
re non  
onjux  
suam;  
njug-  
ne ad-  
n nec  
erium  
peri-  
ad-  
ven-  
pi pe-  
ricu-  
acci-  
subit  
2.  
mo-  
pra-  
de-  
alteri  
fol-  
tor-  
unt.  
nici-  
ine-  
go.  
men  
ndo  
cu-  
atu  
de  
re

§. I. Quid juris tribuat contractus ob turpem causam? 361

re turpi, utpote ab initio nullus, & non obligans, neque pos-  
stea, posita scilicet conditione, obligabit. R. D. a. non firma-  
tur tractu temporis, quod ab initio neque absolute, neque con-  
ditionate subsistit C. a. quod ab initio saltem conditionate sub-  
sistat N. a. Hæc regula juris loquitur de contractu absoluto ab  
initio invalido, qui nunquam convalescit, non vero loquitur de  
contractu conditionato; hic enim, quamvis ante impletam con-  
ditionem non sit obligatorius, potest tamen obligare purificata  
conditione: prout fit in proposito.

Objic. 10. Contractus sub conditione impossibili non va-  
lent, excepto matrimonio & ultimis voluntatibus: atqui con-  
tractus sub conditione turpi sunt etiam sub conditione impossi-  
bili; nam in jure, quæ sunt turpia, reputantur etiam esse im-  
possibilia: ergo. R. D. M. sub conditione impossibili, quæ est  
ex natura, vel defacto talis c. M. quæ est de jure talis *subd.*  
non valent ante positam conditionem c. M. posita conditione n.  
M. Conditiones defacto, & ex natura impossibiles non possunt  
purificari, bene de jure tales, etsi illicite.

Quæres: An etiam debeat solvi illud, quod prodige pro-  
missum est, si v. g. pro re, quæ valet tantum 10., promittas  
dare 100. florenos: vel si aliquis pro unico usu corporis pro-  
misit mulieri 1000. ? R. probabilius affirmative. Lugo. d. 18. n.  
61. Molina, Lessius, Viva, Alanus Pfeiffer.

593

Prob. 1. Quia, lieet promissio talis sit prodiga, & pecca-  
minosa, solutio tamen non est peccaminosa, imo est rationabi-  
lis & justa; quia fit propter jus a promissario acceptum: atqui  
quando solutio, & executio promissionis potest sine peccato po-  
ni, tunc debet hoc fieri, etsi in promissione peccatum sit com-  
missum: ergo. 2. Si aliquis promisso matrimonio virginem de-  
floravit, etiamsi ipse sit nobilis & dives, puella vero pauper,  
& longe villioris conditionis; imo etiamsi minori pretio potuis-  
set consensum, ac copulam impetrare, adeoque promissio fue-  
rit prodiga: tamen adhuc postea in conscientia tenetur promif-  
sum servare, & matrimonium cum puella illa inire, ut com-

Q q q q q

mu-



munitur docent Authores, & patet ex praxi Ecclesiæ ad id obligantis. Ratio ulterior jam est data; quia quamvis promissio sit prodiga, & illicita, non tamen est illicita ejus executio: imo supposito jure, alteri per promissionem collato, est justa, & debita.

Nota tamen, ad tale promissum implendum non esse obligandum, quando ex hoc orirentur scandala, & rixæ, vel alia peccata; quia justitia non obligat ad actum, qui sine scandalo non potest poni. Attendi etiam debet, an non ejusmodi promissio solum fuerit ficta; simulata enim, & ficta promissio nullam obligationem parit.

Dices: Qui promittit alteri usuras, non tenetur easolvere, nisi juraverit, eas velleolvere: ergo neque, qui prodige promittit aliquid, tenetur illudolvere. R. N. c. In nostro casu promissio quoad excessum censetur esse omnino liberalis, adeoque obligat: sicut si quis pro re, quæ tantum unum valet aureum, vellet 10. pendere, excessum quidem non tanquam justum pretium, sed tanquam donum gratuitum solvendo. Aliud est de usuris; nam illas aliquis promittit 1. non satis libere, sed coacte, quia alias non obtineret mutuum. 2. Neque eas promittit liberaliter, sed tanquam debitas ex mutuo. cum ergo non debeantur ex mutuo, promissio illa non obligat: sicut non obligaret illa promissio, qua promitterentur 100. aurei tanquam justum, & debitum pretium pro re valente tantum tres, vel quatuor aureos. Ex dictis.

Resolves: posse faminam accipere munuscula Amasii, si non sit certa de malo ejusdem proposito, neque verisimilius est, quod malo ex proposito ista donentur: saltem in tali casu, quamvis periculoso, non committitur peccatum mortale. Secus est, si sit certa, ipsum pravo affectu duci; nam in tali casu foveret impurum amorem, & peccaret peccato scandali: quo non obstante posset retinere illa, quæ peccaminose accepit; quia accipiendo non peccavit contra justitiam, sed tantum contra castitatem, & charitatem Alanus Pfeiffer.



## §. II.

## De Conditione operis aliunde debiti.

ASSERO 1. Retineri potest, quod accipitur ob causam 594  
honestam, non debitam ex iustitia, v. g. pro audiendo sacro,  
pro abstinendo a blasphemia, luxuria &c., pro deponendo odio,  
pro revelatione furis, si ad eam non teneris ex iustitia, sed  
solum ex charitate. Communis contra Lessium c. 14. dub. 9. pu-  
tantem, non posse accipi pretium pro opere debito ex charita-  
te, v. g. pro deponendo odio; cum huiusmodi pretium quasi  
coacte solvatur.

Prob. 1. Medicus tenetur ex charitate mederi extreme in-  
digenti: & tamen potest pretium accipere, & retinere pro ope-  
ra tali infirmo impensa: ergo. P. 2. Ejusmodi actiones hone-  
stæ, quæ non sunt debitæ alteri ex iustitia, sunt laboriosæ &  
difficiles ipsi operanti; cum omnis actus virtutis sit difficilis:  
& simul sint utiles alteri: ergo si in gratiam alterius ex-  
ercentur, potest pro illis acceptari, & retineri pretium. Prob.  
3. Pro actionibus inhonestis, in gratiam alterius exercitis, potest ac-  
cipi, & retineri pretium, ut ex §. præc. liquet: ergo a fortiori  
pro actionibus honestis.

Objic. 1. Ejusmodi pretium non datur libere, sed coa- 595  
cte: ergo illud non accipitur, nec retinetur iuste: sicut & usu-  
ræ, eoquod coacte solvantur, recipiuntur, & retinentur ini-  
que. A. p. Quivis vellet, ut alter has operationes in suam gra-  
tiam poneret gratis, & sine pretio, adeoque pretium tantum  
coacte pendit. R. 1. Retorq. Argum. Licet quilibet mallet, rem,  
quam pretio emit, sine pretio obtinere, non per hoc venditor  
injuste pretium recipit ab emptore: ergo a pari. R. 2. N. 2.  
Ratio negandi liquet ex retorsione. 3. Esto, quod tale preti-  
um detur aliquo modo coacte: habetur tamen voluntarium sim-  
pliciter tale, quamvis sit mixtum aliquo involuntario: atqui  
tale voluntarium sufficit ad inducendam obligationem, ut patet  
ex contractibus initis ex metu justo, seu tali, qui non est con-  
tra iustitiam, utpote qui valent, nec rescindi possunt, non ob-  
stante illo metu.

Objic.



Objic. 2. Saltem tunc ejusmodi pretium injuste accipitur, quando datur pro operatione, quæ soli operanti, non autem danti pretium est utilis: ut si des pecuniam tantum, ut alter abstineat a peccato, & te ipsum non damnet: ergo. R. N. a. nam etiam valet emptio, si rem aliquam emis non pro te, sed mere pro altero, ubi tamen nullam utilitatem ex tali re habes. Item satis utilis est talis res, vel actio tibi, quod ea cedat in finem, quem intendis vel in te, vel in alio obtinere per dationem pretii.

Objic. 3. Fingamus: Vovisti Ecclesiæ dare 50. aureos: quia autem voto non vis stare, offert tibi aliquis, vel ipsa Ecclesiæ 10. aureos, ut eidem satisfacias: In hoc casu istos 10. aureos nec accipere, nec retinere potes: ergo non potes accipere pretium pro actione debita ex virtute religionis. R. N. c. Hoc pretium non ideo reddi debet, quasi pro actu debito ex religione nihil omnino accipi posset: sed ideo, quia sine tali redactione non satisfacias voto. Ratio hujus est; vovisti enim dare Ecclesiæ gratis 50. aureos: atqui taliter non das eidem gratis, sed sub onerosa conditione, ut tibi refundantur 10. imo tali modo, si tibi debent solvi 10., non pendis 50. sed tantum 40., adeoque non satisfacias obligationi tuæ. Hinc perbene nota, conclusionem procedere in casu, quando, etiam accepto pretio, potest adhuc substantia præcepti, vel obligationis adimpleri: si vero ad ipsam substantiam obligationis spectat, ut res aliqua gratis præstetur; & sine accepto pretio, tunc dicta non procedunt, & est obligatio refundendi pretium acceptum, quamdiu currit tale præceptum gratis præstandi rem. Hoc tamen quoque advertite, obligationem reddendi pretium tunc non descendere ex justitia, sed ex illa virtute, ad quam præceptum adhuc obligans pertinet. Videri potest Lugo d. 18. n. 69. & seqq.

Objic. 4. Est simoniacum, promittere, & accipere temporale pro aliquo spirituali: atqui hoc fieret in nostro casu, in quo promitteres mancipio v. g. libertatem, si fidem accipiat, & baptizetur, Petro aureum, si die festo Missam audiat &c. ergo. R. N. m. nam in nostro casu conditionata promissio, & donatio non obligat, nec imponit onus promissario ad ponendum spi-



spirituale, quod tamen debet fieri in contractu simoniaco. Hinc donatio illa tantum allicit ad ponendam rem spiritualement libere. Neque hoc simoniacum est: sicut non est simoniacum, quod per distributiones quotidianas Canonici alliciantur ad assistendum Officio divino: neque simonia est, si alicui reo mortis vita donetur sub conditione, ut Christianus, vel Religiosus fiat. Accedit ipsa praxis, quam damnare foret insolentissimum, ut ait Suarez. Tandem hæc practice procedunt, quando bonum spirituale cedit in bonum ipsius donatarii, non autem donantis: si enim cedit in bonum donantis, tunc temporale censetur potius in commutationem dari, & animo obligandi ad conferendum spirituale. Vide Viva p. 5. d. 4. q. 4. n. 3.

Affero 2. Si opus honestum sit debitum ex iustitia, nihil pro eo accipi potest. Communis. Sic nihil potest accipi pro non furando, pro reddendo deposito, pro debito solvendo, pro ferenda iusta sententia. 596

Prob. 1. Ille, qui vendit rem non suam, non potest accipere, aut retinere pretium: atqui, qui vendit illud, quod debet præstare ex iustitia, vendit rem non suam, sed illius, cui ex iustitia debetur: ergo talis non potest accipere, aut retinere pretium.

Prob. 2. Si ex iustitia debes Petro 100., & accipis ab eo 20., ut inducaris ad solvendum ipsi debitum, jam non solvis totum, quod debes; debebas enim 100., & solvis tantum 80. detractis illis viginti. Accedit, quod Petrus habuerit jus accipiendi 100. sine onere alio imposito, quod hic non fit: ergo læditur jus Petri, & peccatur contra iustitiam, consequenter exurgit obligatio restituendi. Ex his.

Deduces: Nihil posse accipere 1. Judicem, ut sententiam iustam proferat: 2. nec inventorem: ut rem inventam reddat Domino: 3. neque testem, ut testificetur veritatem, quando ad testificandum obligatur ex iustitia: 4. neque depositarium, ut depositum restituat Domino: 5. nec a marito licite & iuste posse aliquid accipere uxorem, ne adulteret. Ratio horum, & similia est; quia hæc opera aliunde sunt debita ex iustitia: unde



pro ipsis inique petunt, & recipiunt mercedem, & tenentur ad restitutionem. Idem est dicendum de illo, qui aliquid accipit, ne alterum injuste infamet, vel occidat; nam & ista aliunde jam tenebatur ex justitia omittere.

597

Objic. 1. Juxta L. 2. ff. de conditione ob turpem causam. in foro externo non datur actio ad repetendum id, quod traditum est ob opus ex justitia debitum: ergo neque in foro interno restituendum est. R. Tr. A. n. c. In foro externo saepe denegatur actio ad amputandas lites, ubi in foro interno manet obligatio refarciendi damnum.

Objic. 2. A judice potest vendi sententia injusta: ergo & justa. R. N. c. Sententia injusta, etiam qua commoda, non est debita antecederet litiganti, adeoque illam vendendo judex non vendit rem alteri jam debitam ex justitia. Aliud est de sententia justa; hæc enim aliunde jam est debita ex justitia litigantibus, qui proinde habent jus, & obligant omnes, præsertim judicem, ut dent sibi rem suam, nempe sententiam illam justam.

Dubitabis: An non possit aliquid accipi a tertio pro justitia alteri debita? v. g. Potestne judex a Cajo pretium accipere pro sententia justa, ferenda in favorem Titii? R. cum Lugo, & Viva sub distinctione: si dat pretium judici in favorem Titii, ne hic in suo jure patiatür læsionem iniquam, tunc judex nihil potest accipere. Ratio est: in tali casu Cajus gerit negotium Titii, & hunc vult servare indemnem: ergo sicut judex pro hoc nihil potest, ab ipso Titio accipere, ita neque a Cajo, qui negotium gerit Titii. Si vero Cajus pretium daret in favorem ipsius judicis, ne hic peccet, se periculo infamiae, aut multæ exponat, tunc judex probabilius potest accipere pretium a Cajo. Ratio est: quia aliquis potest pretium accipere ab alio, ne se inebriet, ut absterneat a blasphemia, ne ludat ludo vetito: ergo etiam in hoc casu ob similem causam potest judex pretium acceptare, & acceptatum juste retinere.

Objic. Quamvis aliunde judex tenebatur abstinere ab injusta sententia, tamen non tenebatur ab ea abstinere in Gratiam Caji:



Caji : ergo potest aliquid a Cajo accipere, ut in gratiam ipsius abstineat. R. N. c. nam judex absolute ex justitia tenetur abstinere ab injusta sententia : ergo absolute ob hoc, ut non ferat injustam sententiam, vel ut ferat justam, non potest aliquid accipere.

ARTICULUS IV.

*An licitus sit Census Germanicus?*

**P**ER Censum germanicum intelligo illam praxin, qua passim 598 in Germania recipiuntur singulis annis quinque pro centum, tanquam aliquod interesse. Ut hæc res bene percipiatur, debent prius bene legi, & memoriæ imprimi, quæ habet Reifensstuel de usuris, & censibus.

Certum autem apud omnes est, nihil posse recipi pro mutuo qua tali ultra sortem principalem ; tale enim auctarium, quod ultra pecuniam mutuo datam (quæ est fors principalis) reciperetur, esset usura.

Certum est 2. Posse aliquid exigere, & recipi præter sortem principalem pro damno emergente, & lucro cessante, periculo perdendi, aut difficultate recuperandi sortem principalem ; sic enim solum occasione, non autem ratione mutui, sed alterius justii tituli auctarium illud acciperetur. Modo quæstio præcipua remanet, an etiam statutum Principis, vel praxis, & consuetudo communis possit esse sufficiens titulus, occasione mutui aliquid accipiendi ultra sortem principalem, posito etiam, quod periculum sortis admittendæ non adesset, si nempe per hypothecam fors principalis esset posita in securo : dato etiam, quod nullum damnum emergens, vel lucrum cessans sentiret mutuo dans, eo quod mutuo concedat tales pecunias, quas alias otiosas in cista reliquisset, & quibus interea nullam negotiationem exercuisset. In hoc præcipue casu controverso procedit conclusio, qua

Rrrrr 2

Asse-



599

Affero: Licet census Germanicus. Haunold, Reiffenstuel, Holzman, Pichler, & alii contra alios.

Prob. 1. Hic census, quo recipiuntur quinque pro centum, non est usurarius: ergo licet. Conf. patet; ideo enim Adversarii dicunt, eum esse illicitum, quia est usurarius. A. p. In hoc censu non recipitur auctarium ratione mutui, & ex mutuo, sed ratione iusti statuti, vel legis, aut consuetudinis concedentis, & transferentis hoc auctarium in mutuamentem.

Prob. 2. Princeps supremus ob dominium altum potest transferre dominia rerum, ut patet in praescriptione: ergo sic censetur transferre in censu germanico, ubi concedit, ut occasione mutui aliquid tanquam interesse exigatur ex bonis alienis.

Prob. 3. Judæi non injuste egerunt, neque exercuerunt veras, & in rigore dictas usuras erga Gentiles; quia Deus in hunc finem concessit Judæis dominium & jus in Gentilium bona: ergo etiam modo Christiani non agent injuste, neque exercebunt proprie usuras, etsi aliquid accipiant ultra sortem principalem; quia in hunc finem Respublica per legem, vel saltem consuetudinem concedit ipsis dominium, aut jus in bona mutuatarii.

Prob. 4. Leges fundatae in praesumptione universali etiam subsistunt, quamvis in particulari casu non subsit res praesumpta, ut patet ex Tractatu de LL.: atqui lex concedens accipere quinque pro centum fundatur in praesumptione universali; praesumit enim, quod universaliter adsit in dante mutuo lucrum cessans, aut damnum emergens, & inde concedit, quod 5. pro 100. possint in annos singulos per modum interesse recipi: ergo talis lex subsistit, etsi in tali particulari casu non subsit res praesumpta, seu lucrum cessans, vel damnum emergens. m. p. ex Recessu Imperii Spirensi, edito anno 1600. §.: *So viel nun diesnach der Vermuthung halber (ratione praesumptionis) das der Creditor sein Geld von solcher Zeit an anlegen, und zugelassener Weiß zum wenigsten von hundert Gulden 5. wohl haben möge &c.*

Acce-



Accedit, quod tale statutum sit multum rationabile; eo enim seculo vix daretur, qui vellet mutuo dare. Habent & miserabiles personæ, quæ suis pecuniis negotiari nequeunt, inde sublevamen. Evitantur etiam lites, si non debet assignari certus titulus alius, præter legem, aut consuetudinem.

Prob. 5. Consuetudo, & praxis recipiendi 5. pro centum est communiter recepta etiam apud timoratos, Religiosos, & Ecclesias, quæ alias non fuissent negotiatæ suis pecuniis, consequenter per dationem mutui non sentiunt damnum emergens, aut lucrum cessans: atqui talis praxis non potest damnari alicujus peccati ergo.

Objic. 1. Usura lucratoria prohibetur jure naturali, & divino, neque in ea dispensare potest summus Pontifex, ut habetur Cap. 4. de Usuris. ac Clement. un. tit. eodem. omnia statuta Principum usurarum exercitio faventia sunt prohibita: imo, qui putavit, has licite exerceri posse, tanquam hæreticus dicitur esse puniendus: atqui accipere 5. pro centum est usura lucratoria: ergo. R. c. M. n. m. nam in nostro casu non accipitur aliquid ratione mutui, sed ratione juris, quod ex lege, vel statuto aliquis habet ad accipienda quinque occasione centum mutuo datorum. Item quinque accipiuntur per modum interesse, ita ordinante lege universaliter procedente, & non attendente ad casum particularem, in quo ratio alicujus interesse cessat: atqui aliquid accipere ultra sortem principalem ratione interesse, non est usura: ergo. 600

Objic. 2. Respublica tantum permittit, non autem approbat ejusmodi auctaria, occasione mutui accepta: ergo. R. N. a. nam, quod positive approbentur talia auctaria, patet ex praxi tribunalium, ex usu & consuetudine piorum, ac timoratorum, ipsarumque Rerumpublicarum, & Ecclesiarum, quæ ejusmodi auctaria recipiunt occasione pecuniæ mutuo datæ.

Objic. 3. Hoc statutum accipiendi talia auctaria est valde noxium Reipublicæ: ergo non subsistit, saltem in foro con-



Scientiæ. R. N. a. Ratio negandi liquet ex dictis ante probationem quintam.

Objic. 4. Iniquum est, ex re non fructifera, uti est pecunia alteri mutuo data, commodum & fructum reportare: atque hoc fieret in casu conclusionis: ergo. R. Pecuniam non esse omnino sterilem; nam ea, accedente saltem industria hominis, fructum asserre, & utilis esse potest: unde & in pecunia quasi ususfructus constitui valet juxta Leges 1. & 2. ff. de U/usu fructu earum rerum, quæ usu consumuntur.

Ad objectiones universaliter solvendas nota 1. Non ex titulo mutui creditorem accipere auctarium illud, sed occasione mutui ex consensu Legislatoris. 2. Inter præscriptionem & tale statutum, quo recipiuntur 5. pro centum, non esse in omnibus paritatem: eam autem a nobis solum fieri cum præscriptione ob dominium altum, vi cujus uti in præscriptione, ita in recipiendis illis quinque potest ex rationabili causa alicui a Republica concedi jus in bona alterius; nam & lucrum ex re aliena est sub dominio alto Principis. 3. Neque per nomen census germanici verum a nobis intelligi censum emptum in bonis, aut persona alterius: etenim tota difficultas hæc sine recursum ad illas subtilitates census explicari potest per consensum Principis statuto, ac consuetudine, & praxi sufficienter constantem, vi cujus creditori danti mutuo conceditur jus ad capiendum a debitore lucrum 5. florenorum.

ARTICULUS V.

*De Contractu puro, conditionato, in diem, sub  
modo &c.*

601 **Q**UÆRES I. Quid sit contractus purus, & non purus? R.  
Contractus *purus* est ille, qui non pendet ab aliqua con-  
ditione, modo, causa, die, vel demonstratione. Con-  
tra-



tractus non purus est, qui pendet ab aliquo ex prædictis. Effectus contractus puri est, quod res promissa, vel in contractum deducta statim debeatur, adeoque ex ejusmodi contractu in continenti exurgat obligatio, & actio. Manzius L. 3. Instit. t. 16. §. 2. n. 3. Nihilominus to statim, & to in continenti debent accipi moraliter cum aliqua latitudine, non autem mathematicè & physice. Hinc executio, & solutio vi contractus puri debita potest interdum differri secundum prudens judicis, aut aliorum arbitrium, quod facile formari potest, si pensentur qualitates creditoris, debitoris, & debiti, uti & aliæ circumstantiæ. Imo in foro conscientiæ præsumitur creditor consentire in dilationem solutionis, si scienter, & sponte absque metu, vel pudore saltem reverentiali debitum, cum facile posset, non repetat.

Quæres 2. Quid sit, & quotuplex conditio, quæ potest contractui adjici? R. 1. Conditio est aliqua qualitas contractui adjecta, quæ suspendit valorem contractus in futurum, ita, ut, si illa qualitas & conditio evenerit tempore subsequenti, contrahens se obligatum velit, si autem non evenerit, se nolit esse obligatum, ut si dicas: *Promitto tibi 100. aureos, si Romam iveris.* Ut autem conditio sit talis, quæ suspendat valorem contractus.

Debet 1. esse *extrinseca*, non autem *intrinseca*; nam intrinsecæ conditiones, quæ vel ex natura sua, vel ex dispositione legis insunt, non suspendunt valorem, sed talis contractus statim obligat, quando fit, non obstantibus illis conditionibus. Ejusmodi conditiones sunt: promitto tibi 100. aureos, si poterō eos dare: voveo hoc, nisi Superior legitime in hoc voto dispensaverit: item, ducam te, nisi sis mihi consanguinea, aut alio impedimento labores &c. hæ, & similes conditiones non faciunt actum, & valorem ejus conditionatum, uti communiter advertunt DD.; alias enim nullus actus esset absolutus, sed omnes conditionati: cum cuilibet actui & contractui insint conditiones istæ intrinsecæ.

Debet conditio 2. esse *contingens*, seu talis, cujus existentia potest dari, & non dari: & quidem debet esse *de futuro*: hujusmodi enim conditio potest suspendere actum; conditio si-



quidem de presenti, vel praterito non est proprie conditio, quia non suspendit contractum, vel negotium. Vel enim subest talis conditio? & tunc statim obligat, & valet actus: vel non subest? & tunc non valet, ut patet in istis contractibus: *Promitto, vel do tibi 100. aureos, si meus sis consanguineus: si jam fueris ad Doctoratum promotus, te promoveo ad hoc officium &c.* Idem est de conditione necessaria; hæc enim eo ipso, quod necessario eventura est, non suspendit, neque incertum & dubium reddit valorem contractus, sed talis contractus sub simili conditione initus, statim valet, & obligat: ut si dico: *Promitto tibi 100. aureos, si crastina die sol oriatur.* Quod tamen limitant aliqui in casu, quo contrahentes putarent, conditionem esse contingentem, quæ tamen est necessaria.

Si eventus conditionis contingentis pendeat ex voluntate alicujus tertii, non autem alicujus ex contrahentibus, tunc vocatur conditio casualis. ut si sic dicas: *ducam te in conjugem, si pax fuerit sancita: si parentes tui consenserint.* Si vero pendeat ex voluntate illius, quocum contrahis, tunc dicitur potestativa: ut: *Ducam te, si fidem Catholicam susceperis.*

Debet conditio 3. esse possibilis. Si conditio est impossibilis ex natura rei, ut est ista: *Promitto tibi 10. aureos, si hircocervum occideris.* vel si est impossibilis de facto, ut: *Ducam te, si cælum tetigeris, si montem aureum in dotem attuleris,* tunc ejusmodi conditiones regulariter vitiant, & annullant contractum. Ratio est: quia eo ipso, quod hæc conditiones purificari nequeant, contractus nunquam valorem suum obtinebit. Ad conditionem impossibilem refertur etiam turpis, vel inhonesta conditio; quod enim non licet, censetur de jure non posse L. 15. ff. de conditionibus Institutionum. Verum quid de his conditionibus sit sentiendum, jam alibi est dictum.

Interea pro foro externo in matrimonio, & ultimis voluntatibus conditiones turpes, & impossibiles habentur pro non adjectis: adeoque præsumuntur absolute valere, non obstantibus ejusmodi conditionibus, nisi constet, quod consensus debitus contrahentis, vel testantis non adfuerit, & nisi in matrimonio



trimonio apponantur tales conditiones, quæ contra substantiam, & tria bona substantialia matrimonii, scilicet bonum prolis, fidei, & Sacramenti, pugnent,

R. 2. Si contractus est sub conditione possibili, honesta, extrinseca, contingenti, & de futuro, tunc quidem suspendit absolutam obligationem, nihilominus nullus contrahentium sine consensu alterius potest resilire pendente conditione, sed debet expectare, donec purificetur, vel non purificetur. Et in hoc differunt contractus conditionati sub conditione honesta ab illis, qui fiunt sub conditione turpi. Ex quo

Habes 1. Quod votum sub conditione reconvalescentiæ &c. emissum, non possit valide revocari, pendente adhuc conditione. Herinx.

Habes 2. Ex contractu conditionato etiam jus conditionatum ad hæredes promissarii transit, posito, quod promissarius prius moriatur, quam conditio fuerit purificata. Covarruvias, Molina, Palao, Herinx: ac habetur §. *sub conditione*. Instit. de verborum obligationibus. Debent tamen excipi ultimæ voluntates, in quibus transmissio hæc ad hæredes non habet locum, si institutus hæres immediatus, vel legatarius, vel fideicommissarius ante impletam conditionem moriatur, ut habetur L. *hujusmodi testatum*. ff. *Quando dies legatorum cedat* &c. Videatur Illung T. 4. d. 2. q. 6. art. 6. n. 366.

Quæres 3. Quid sit causa? R. Causa est id, ob quam tanquam præsens, vel præteritum aliquid fit, explicaturque per particulam *quia*: v. g. *Duco te, quia nobilis es: promitto tibi 100. aureos, quia studiosus es*. Si talis causa sit finalis, eique alligetur consensus, tunc, subsistente causa valet contractus, secus autem est invalidus. Imo si in tali contractu exprimitur causa finalis, tunc is non differt nisi verbis a contractu conditionato sub conditione de præsentis, vel præterito: adeoque subsistente causa statim valet, nec suspendit valorem, sicut contractus conditionatus sub conditione de futuro contingente.

Quæres 4. Quid sit demonstratio? R. Est appositio signi, exprimens qualitatem demonstrativam rei, & denotatur per voces relativas *qui, quæ, quod* &c. v. g. *Gemmam dono tibi, qui meus consanguineus es: lego tibi equum, quem emi a Cajo*. Demonstratio.



stratio, etiam falsa, non suspendit, nec vitiat valorem contractus, nisi ei fuisset alligatus consensus. Ratio est: quia per se tantum inducit errorem accidentalem.

605

Quæres 5. Quid sit modus? R. 1. Modus est onus, gravamen, vel moderamen contractui appositum, & explicari solet per particulam *ut*. v. g. si dicat Testator: *Lego Titio mille aureos, ut Jurisprudentiæ studeat, & Doctor fiat: Duco te in sponsam, ut mecum mercaturam exerceas.* R. 2. Modus adjectus non suspendit valorem contractus, sed is statim valet, ac obligat, quamprimum est perfectus, etsi modus necdum fuerit adimpletus: & in hoc differt contractus sub modo a conditionato. R. 3. Contractus conditionatus plerumque per particulam *Si*, & modus per particulam *ut* exprimitur. Quamvis autem hoc ordinarie verum sit, potest tamen, & solet quandoque explicari per particulam *ut*, & vicissim modus per particulam *si*: sed tunc ex circumstantiis colligenda est mens pactiscentium. Si omnibus consideratis manet dubium, tunc juxta Pichler L. 1. t. 35. n. 5. præsumenda est conditio, non modus, per legem 109. ff. de Conditionibus, & Demonstrationibus.

606

Quæres 6. Quid sit obligatio, vel contractus initus in diem? R. 1. Est ille, cui adjicitur dies, quo res promissa, vel in contractum deducta debet solvi. R. 2. Si dies adjectus est certus, & certo existiturus, v. g. dies 1. Augusti, tunc obligatio facto contractu statim quidem oritur, & res promissa debetur, actio tamen non potest intentari, neque res promissa efficaciter peti, antequam dies advenerit. Quare phrasi juris dici solet: in talibus contractibus *dies quidem cessit, sed nondum venit*: id est, res, de qua contractum est, statim debetur, sed non statim peti potest ante adventum illius diei: vel, obligatio ad diem quidem nata est, sed tamen dilata ad diem.

R. 3. Si dies adjectus sit incertus, sed tamen aliquando certo eventurus, ut v. g. dies mortis paternæ, tunc iterum obligatio promissionis in illum diem obligat, & valet statim, sed non urget ante adventum illius diei. §. *omnis stipulatio. 2.*

Inst.



*Instit. de verborum obligationibus.* ibi: *Id, quod in diem stipulamur, statim quidem debetur; sed peti prius, quam dies venerit, non potest.* Si vero sit dies incertus, & simul non certo eventurus, seu de cuius eventu & existentia dubium est, tunc obligatio suspenditur, usque dum tempus illud adveniat; quia virtualiter est pactio sub conditione de futuro contingente. Talis dies incertus est tempus pubertatis Titii; potest enim Titius mori, antequam ad pubertatem perveniat. Excipe tamen casum, quo dies fuisset adiectus in favorem solius promissarii: ut si puellae promittantur 100. aurei in diem nuptiarum; tunc enim non suspenditur obligatio, sed ejusmodi promissio statim, ut facta est, valet, adeoque, si forte ante nuptias moreretur puella, jus petendi 100. transmitteretur ad hæredes puellae. Ita Pichler L. 1. T. 35. n. 5. ad finem, quem vide.

Quæres 7. An obligatio annua, vel menstrua sit pura, vel in diem? R. Talis obligatio, vel promissio aliquid dandi singulis annis, mensibus &c. est pura, & non in diem, neque est conditionata. §. *At si ita.* 3. *Inst. de verborum obligat.* ibi: *At si ita stipuleris, decem aureos annuos, quoad vivam, dare spondes?* & pure facta obligatio intelligitur, & perpetuatur: quia ad tempus non potest deberi &c. 2. L. *Senatus censuit.* 35. §. 7. seu ult. ff. *de mortis causa donationibus, & capionibus.* Resolvitur, quod obligatio solvendi præstationes annuas sit una: ergo debet esse pura, quia est simplex, & sine partibus, ita, ut annua præstatio contineat tantum plura facta, & plures effectus unius absolutæ, puræ, & simplicis obligationis, juris, ac debiti. Quare non obligat conditionate, si scilicet annus venerit, sed absolute & pure. Unde non nascitur particularis & distincta obligatio ad adventum cujuslibet distincti anni; sed una absoluta manet respectu omnium annorum, jam ab initio promissionis vel obligationis existens. 3. Obligatio in diem est illa, quando dies differendæ solutionis gratia, vel in favorem debitoris est adjecta: atqui obligationibus annuis &c. dies non est adjecta differendæ, sed multiplicandæ in singulos annos solutionis gratia, & consequenter in favorem creditoris, non autem debitoris, qui gravatur: ergo. Ita argumentatur Clar. Man-



zins L. 3. Instit. t. 16. §. 3. n. 1., ubi clare & solide istam rem examinat.

608

Objic. 1. Vi obligationis puræ res promissa, vel debita statim peti potest: atqui præstationes annuas non potest creditor statim petere, sed debet expectare annum, & tempus: ergo obligatio solvendi præstationes annuas non est pura. R, ex clarissimo Manzio cit. n. 3. ex jure in continenti & statim exigendi præstationes annuas oritur actio, & obligatio quoad hoc, ut creditori permittatur in eum finem debitorem convenire, ut judex declaret, hunc esse debitorem, & debere solvere præstationes annuas: quoad hoc vero, ut debitum, si ve promissum annum exigatur actu, obligatio quoad annum præsentem est quidem pura, quoad sequentes vero annos *quoad effectum* censetur esse in diem. Dixi: *quoad effectum*, non *quoad jus*, & obligationem in actu primo. Hinc in forma D. M. vi obligationis puræ tam quoad jus & obligationem, quam quoad effectum in actu secundo c. M. vi obligationis tantum puræ quoad jus &c. non quoad effectum *subd.* potest statim peti res debita, ut solvatur etiam pro annis sequentibus n. M. ut declaretur, esse jam debita pro annis sequentibus c. M.

Nota etiam 1. Etsi debitor velit unica solutione pendere præstationes omnes simul, quæ deberent pro sequentibus annis pendere, non teneretur eas simul acceptare creditor. Ratio est: quia tempus non debitoris, sed creditoris gratia adjectum est: adeoque solutio non debet esse in arbitrio debitoris, sed creditoris, ut observat Manzius.

Nota 2. Si aliquis alteri aliquid promittat, vel debeat in singulos annos, tunc hoc debitum potest peti ad initium cujuslibet anni. L. 1. C. Quando dies legati cedat. ibi: Si competentis judici annua legata, vel fideicommissa tibi relicta probaveris, ab initio cujusque anni exigendi ea habebis facultatem.

Objic. 2. Saltem obligatio solvendi annua legata non est una, nec pura, sed est vel conditionata, vel in diem: ergo saltem non omnis obligatio annua est pura, & una. A. p. variis legibus, quæ nimis clare sunt. Sic L. 16. ff. de verborum obli-



Art. V. De Contractu puro, conditionato, in diem &c. 877

obligat. dicitur: *Stipulatio hujusmodi (scilicet in annos singulos) una est, & incerta, & perpetua, non quemadmodum finite legatum (scilicet in annos singulos) morte legatarii finiretur.* clarius loquitur L. 4. ff. de annuis legatis. ibi: *Si in singulos annos alicui legatum sit, Sabinus plura legata esse ait: & primi anni purum, sequentium conditionale; videri enim hanc inesse conditionem, si vivat: & ideo mortuo eo ad heredem legatum non transire.* Idipsum clarissime repetit L. 11. ff. eodem. *Cum in singulos annos legatur, plura legata esse placet, & per singula legata NB. jus capiendi inspicitur.* Ad hanc objectionem certe ponderosam, qua etiam impetitur conclusio superius posita de præscriptione præstationum annuarum ex legato provenientium, quam etiam nos admittimus.

R. N. a. Ad leges citt. dico cum clariss. D. Rath. c. 2. de Usucapionibus Assert. 8. n. 8. & 9. Etiam annua pensio descendens ex legato, quoad jus, & obligationem in actu primo est una, pura, & simplex, sicut alia similis obligatio ex stipulatione, aut quocumque alio titulo proveniens. Ratio hujus est: quia jus hoc ex uno titulo legati acquiritur, sicut alia similia jura ex uno contractu, vel stipulatione oriuntur. 2. In L. Cum notissimi. 7. §. fin. de præscript. 30. annorum. annua pensio ex legato, vel alio contractu debita æquiparantur quoad præscriptionem, quod non posset fieri, nisi etiam obligatio solvendi legata annua esset una, & pura; alias enim non posset, sicut aliæ similes obligationes ex contractu descendentes, una præscriptione præscribi, sed requirerentur tot diversæ præscriptiones, quot essent anni.

Neque dicas cum Accursio, annuam pensionem ex legato, & contractu debitam æquiparari in eo, quod in utroque casu præscriptio incipiat a tempore cessantis solutionis annuarum pensionum, non autem in modo præscribendi. Verum hoc est effugium, quod neque ex textu, neque ex ratione colligitur. Hinc

R. 2. Legatum annuæ pensionis quoad effectum transmissionis est multiplex, & suo modo conditionatum, quia tacite

S s s s s 3

sub-



subintelligitur conditio: *Si legatarius vixerit*. ideoque hæc conditio singulis annis in ordine ad transmissionem, & continuationem juris verificari debet. Et in hoc simile legatum differt a redditibus aliis annuis ex contractu debitis, utpote qui etiam quoad transmissionem puri sunt, ac perpetui, & ad hæredes transitorii: quoad obligationem vero in actu primo, & in ordine ad effectum præscriptionis nullum est discrimen; hæc enim etiam in censu annuo, qui ex legato debetur, est pura, una, indivisibilis, & durans, quamdiu vivit legatarius, ut colligitur ex rationibus adductis. Videri potest clariss. Rath. cit.

R. 3. In forma Dist. cum in singulos annos aliquid legatur, plura esse legata placet quoad effectum transmissionis: *conc.* quoad ipsam obligationem in actu primo, & jus, ac debitum: item in ordine ad præscriptionem: *neg.*

Objic. 3. contra ipsam ultimam responsionem. Saltem præstationes annuæ, Ecclesiæ debitæ, non possunt præscribi, & quidem ideo, quia sunt plures distinctæ obligationes: ergo. A. constat ex L. *Sancius*. 46. §. *si vero*. 9. C. *de Episcopis & Clericis*. ubi disertis verbis damnat Imperator omnem annuorum reddituum, ad Ecclesias spectantium, præscriptionem, & quidem ex hac ratione in terminis adjecta: *Cum per unumquemque annum talis actio nascatur.*

R. cum doctissimo Rath, hanc legem non habere auctoritatem Juris; ea enim a Godefredo primum ex manuscriptis exemplaribus a Jacobo Cuiacio inventis Corpori Juris est inserta, in reliquis vero Corporibus omissa. Hinc & Bartolus, ac Baldus, & alii in Codicem Justinianum commentantes nullam mentionem de ista lege faciunt. Imo multi Interpretes, ut ait laudatus, qui alias in præstationibus annuis, ex ultima voluntate debitis, præscriptionem in futurum rejiciunt, eam tamen in specie, & nominatim admittunt, si ejusmodi annuæ præstationes fuerint Ecclesiæ, Monasterio, vel alteri piæ causæ legatæ, ex hac ratione, quia tunc legatum sit unum, & perpetuum, ideoque una præscriptione tollatur. Cæterum annuas præstationes etiam contra Ecclesiam, & piam causam pos-



Art. V. De Contractu puro, conditionato, in diem &c. 879

posse præscribi, colligitur ex Cap. *Olim. de censibus*: juxta quod, cum inter Episcopum Spoletanum, & Clericos plebis Rupinæ quæstio versaretur in eo, quod præfati Clerici, posteaquam pro uno denario Papiensi, valente sex Lucenses, per plurimos annos tantum tres solvissent, eaque de causa veluti, ut putabant, jure præscriptionis tuti, etiam imposterum plus solvere recusassent, Innocentius III. rescripsit, prætenfam præscriptionem ideo non esse completam, quod a tempore ejusmodi solutionis ad summum 36. annorum tempus effluerit. ubi insinuat, præscriptionem tunc fuisse validam, si 40. anni, ad præscriptionem contra Ecclesiam requisiti, fuissent completi. Idem colligitur ex Cap. 6. de *Præscriptionibus*. ubi spatium 40. annorum obligatio solvendi decimas extinguatur. Ex his

Colliges: Legata annua, & contractus annuos in hoc præcipue differre, quod regulariter legata annua non transmittantur ad hæredes legatarii, sed una cum legatario moriatur jus eadem exigendi, & percipiendi: secus vero contingat in censibus annuis ex contractu debitis, ut clare patet ex L. 13. C. de *contrahenda stipulatione*. ubi etiam corriguntur veteres leges, quæ in ff. vel alibi contrarium videntur continere. Haunold Tract. 8. c. 4. n. 336. adjungit etiam hanc differentiationem, quod per solutionem 30. annis omissam præscribatur tota obligatio omnium præstationum annuarum, si hæc ex contractu sit orta: si vero ea sit nata ex legato, vel ultima voluntate, tunc præscribatur tantum præstatio primo anno debita. Verum hic videtur sui esse oblitus; nam Tract. 5. c. 2. n. 358. habet, quod 30. annorum spatium possint præscribi annui redditus tam præteriti, quam futuri: item non solum debiti ex oneroso contractu, sed etiam ex legato, & fideicommissio.





## DISSERTATIO III.

*Resolvuntur aliqua ex Tractatu de Judiciis.*

## ARTICULUS I.

*An Judex debeat ferre sententiam secundum allegata & probata, etiam contra propriam scientiam privatam?*

## §. I.

*Præmittuntur faciliora.*

609 **N**OTA 1. Duplicem in judice posse spectari scientiam : una est *privata*, quam judex extra judicium visu, auditu, vel alio sensu obtinuit : altera est *publica*, quam comparavit ex allegatis, & probatis in judicio.

Nota 2. Certum esse, quod judex regulariter teneatur judicare secundum allegata, & probata, seu secundum scientiam publicam. Patet ex L. *Illicitas*. 6. §. *Veritas*. 1. ff. de *Officio Præsidis*. ibi : *Veritas rerum erroribus gestarum non vitiatur ; & ideo Præses Provinciæ id sequatur, quod convenit eum sequi ex fide eorum, quæ probabuntur.* ubi *Summarium* sic habet : *Judex debet judicare secundum allegata, & probata, non autem secundum conscientiam.*

Jam dubium remanet, an judex possit, ac debeat judicare secundum allegata & probata, etiam contra propriam conscientiam, vel scientiam privatam ; id est, an debeat condemnare eum, qui per testes, aut alias probationes convictus est in judicio, quem tamen judex privata scientia certo scit esse innocentem ? Ad hoc dubium solvendum

Affero



*Art. I. An Judex debeat ferre sentent. secundum allegata &c. 881*

ASSERO 1. Quando judex non habet omnino certam, 610  
ac indubitatam scientiam privatam, tunc tenetur eam deponere, ac judicare secundum allegata & probata. Reiffenstuel L. 1. Decret. tit. 32. de Officio Judicis. n. 35. ac hoc teste communis. Ratio est: quia ordo judicialis exigit, ut Judex secundum allegata & probata procedat; & scientia publica prævalere debet notitiæ privatæ non certæ. Deinde totus ordo judiciarius perverteretur, si ob privatam aliquam notitiam, nondum certam, & fallibilem posset judex relinquere judicialiter allegata & probata.

Assero 2. Judex regulariter non potest condemnare illum, 611  
qui quidem a judice privata scientia scitur esse reus, sed in judicio nec est confessus, nec convictus, a fortiori, si se in judicio probaverit innocentem. Reiffenstuel cit. n. 36. Haunoldus de jure & Just. Tom. 5. Tract. 2. n. 27. & seqq. Ratio est: quia nec judex inferior a supremo judice, nec hic a Communitate aliam potestatem accipit, quam ut in condemnando procedat secundum allegata & probata; hoc enim exigit utilitas publica, & ne judices prætextu privatæ scientiæ audeant exercere tyrannidem, aut fraudes &c. Imo esset contra omne bonum regimen, dari uni hominum potestatem supra vitam aliorum, sine omni testimonio alio, quam suo: ut loquitur Haunoldus cit.

Ex quo resolves, quid dicendum de casu, quem Princeps supremus absque gravibus incommodis non posset agitare in judicio. v. g. an Rex possit ad mortem condemnare illum, quem deprehendit in flagranti opprimentem Reginam suam absque eo, quod hoc crimen in judicium ulterius deducat, & scientiam publicam eliciat, quia, nempe tale crimen non expedit vulgari.

Rdebis enim cum Haunoldo cit. n. 31. & Communi aliorum negative. Ratio est; quia Princeps non habet plus potestatis in subditos, quam illi concessum est a Republica, a qua constitutus est Princeps; atqui Respublica non  
*P. Kick Theol. Tom. IV.* Ttttt potuit



potuit dare hanc potestatem (utpote quam ipsa non habet) ut ob unius testimonium auferatur vita alicui membro suæ Reipublicæ: ergo.

Nihilominus addit Lugo, in hoc puncto posse Principi majorem potestatem concedi quoad causas civiles, ablationem beneficiorum, & bonorum; quia Respublica & Princeps in talia bona habet dominium altum, & potest de iis in bonum publicum disponere. Iterum Lessius apud cit. Haunold observat, conclusionem intelligi, si agatur de crimine mere puniendo; si enim simul ageretur de damno avertendo, quod immineret alias Principi, Reipublicæ vel Innocenti, nisi talis malefactor occideretur, tunc posset Princeps ex privata scientia curare interfici malefactorem. Ratio est: quia etiam privato ex privata notitia licet se, aut rem sibi commissam defendere, & quidem per occisionem alterius, servatis tamen servandis.

612

Affero 3. Quando iudex habet certam scientiam privatam pro reo, hoc est, si penitus indubitanter novit, eum esse innocentem, qui tamen secundum allegata & probata ostenditur nocens, tunc primo tenetur omnia media tentare pro liberando Reo ejusmodi. Reiffenstuel cit. n. 37. Haunold cit. n. 36., hæcque conclusio vera est, sive sint causæ civiles, sive criminales. Ratio est: quia hoc dicitur obligatio charitatis proximi, & Justitiæ, quæ prohibet proximum injuste lædi, & innocentem condemnari.

Media vero liberandi talem a parte rei innocentem, & secundum allegata reum sunt sequentia. 1. Exactius examinare testes & instrumenta, inquirere singulariter in circumstantias loci & temporis &c. 2. Inquirere causas, ob quas repelli possint accusationes. 3. Dissimulando permittere, ut innocens e carcere fugiat, modo id sine scandalo fieri possit. 4. Aut reum omnino absolvere, & aggratiare, si sit iudex supremus, qui habet jus aggratiandi, si vero sit iudex inferior, tunc potest reus talem judicem recusare, allegando, quod talis iudex ipsi sit necessarius pro teste: imo



imo & ipse iudex inferior potest totam causam ad altior<sup>m</sup> iudicem deferre, & ibi testem pro innocente agere.

Ex quibus patet, vix contingere casum, in quo non possit per præfata media, si adhibeantur, liberari talis innocens, etsi iudice convictus sit ut reus. Posito tamen, quod iudex sine gravissimo suo incommodo, quantum nemo ex charitate tenetur subire ad proximum suum liberandum, non possit liberare per præfata vel alia media talem innocentem, tunc sequentes regulæ in duabus conclusionibus proximis statuendæ observandæ sunt.

§. II.

Continuat<sup>r</sup> præsens materia.

ASSERO 4. In causis civilibus, ubi agitur e. g. de debito solvendo, & in minoribus criminalibus, ubi agitur e. g. solum de multa pecuniaria, aut privatione officiorum, potest iudex ferre sententiam secundum allegata & probata non obstante privata notitia innocentiae. Ita Reiffensuel cit. n. 46., Haunold cit. n. 38., Lessius, Layman, Chrystoph. Chlingensperg. L. 4. instit. Tit. 17. q. 4. Schmalzgrueber & alii apud hos cit.

Ratio est: 1. Quia Lex *Illicitas* &c. Notando 2. allegata expresse vult, ut iudex secundum allegata & probata, non vero secundum conscientiam, vel privatam scientiam ferat sententiam. 2. Alias Respublica propter bonum commune potest disponere de bonis his subditorum, ut patet in præscriptione. Proinde propter bonum publicum, ne ordo iudiciorum pervertatur, aut impediatur prætextu privatae scientiae, potest per iudicis sententiam disponere de his bonis, eadem adjudicando alteri, cui secundum allegata & probata debentur, quamvis a parte rei, & secundum certam iudicis scientiam privatam tamen, ei non debeantur. Hanc enim potestatem ita ferendi sententiam Respublica dare potuit ob dominium altum, & dedisse præsumitur ob utilitatem publicam & legem *Illicitas* &c.



Neque hoc displicere debet innocenti ; quia videt se a iudice aliter juvari haud posse , præsertim ; quia juxta Schmalzgrueber L. I. Decret. T. 32. n. 30. probabiliter per sententiam talem materialiter injustam , utpote fundatam in falsa præsumptione , dominium rei in multam alteri adjudicatæ non videtur amitti , imo talis innocens probabiliter retinet jus recuperandi illa bona , quibus per sententiam est privatus , & potest uti compensatione occulta , si aliter recuperare nequeat. Quod tamen intellige , si non sint bona publica , ut Officia , beneficia Ecclesiastica : de his enim Respublica & Ecclesia liberius disponere potest. Unde si aliquis per sententiam iudicis , legitimo jure ordinis servato , licet a parte rei sit innocens , illis privetur , etiam dominium illorum peribit. Vide laudatum Schmalzgrueber , & Lessium ibi allegatum.

Confirm. nostra conclusio ex *Capit. Pastoralis* 28. §. quia vero de officio delegati. juxta quod &c. ordinarius ad mandatum iudicis delegati , etsi sciat sententiam illius esse injustam , exequi nihilominus tenetur eandem , nisi apud eum efficere possit , ut ab hoc onere ipsum absolvat. Idem ergo dicendum in nostro casu : prout & Glossa ibidem v. tenetur expresse concludit . quod iudex debeat pronunciare secundum allegata & probata , non obstante scientia privata , qua scit hominem ejusmodi , contra quem judicat , esse innocentem. Quod roboratur *Clement. finali* §. sententiam vero definitivam , de verborum significatione , ubi dicitur , sententiam definitivam proferri debere ex petitione , & probatione , & aliis actibus in causa : ergo debet iudex posthabita scientia privata , sententiam proferre secundum scientiam publicam judicialiter haustam.

Confirm. iterum. Iudex est persona publica : ergo debet sententiam ferre secundum scientiam publicam , non vero privatam , nisi speciale quid obstet.

Objic. I. Exodi 23. dicitur : Non suscipias vocem mendacii , nec in iudicio plurimorum acquiescas sententiæ , ut a ve-



ro devies ; atqui iudex in nostro casu plurium testium iudicio acquiesceret , ut a vero devia- ret : ergo.

R. D. M. non suscipias vocem mendacii publice & iuridice cogniti , neque acquiescas plurium sententiæ non legaliter probantium , ut sic a vero iuridice & legaliter devies c. secus n. M.

Objic. 2. C. cum æterni 1. de sent. & re judicata dicitur : injuste judicari , quem æterni tribunal iudicis reum non habet ; atqui coram Deo non est reus , quem iudex privata notitia scit esse innocentem : ergo.

R. In illo Capitulo solum prohiberi , ne Iudices odio, vel alia passione aut præmio se excæcari permittant, ferantque sententiam ex simili motivo injusto contra reum , cuius crimen in iudicio non satis probatum est. Quod patet legenti totum textum Capituli.

Objic. 3. Lex Illicitas 6. potius nobis obest : ait enim : veritas rerum erroribus gestarum non vitiatur , & ideo , ut supra in eam legem Glossa v. convenit , ait , sequenda esse allegata & probata , si iudex ea deprehenderit esse vera ; secus vero , si ea esse falsa. Item v. probabuntur , non esse judicandum secundum allegata & probata , si ab allegatis & probatis veritas rei contraria iudici visa fuerit.

R. Explicando , si ea deprehenderit esse vera veritate publica, vel falsa falsitate publica , & si veritas publice & iuridice contraria iudici visa fuerit , eoquod allegata & probata secundum leges non subsistant , vel contraria sint legibus.

Objic. 4. Præsumptio debet cedere veritati ; atqui allegata & probata in iudicio tantum præsumptionem faciunt : ergo debent cedere veritati.

R. D. M. Veritati publice & iuridice cognitæ C. M. veritati



tati tantum privatim cognita N. M. & trans. m. N. conf. negari etiam posset minor; quia praesumptio differt a depositione testium, depositio enim testium in jure plenam probationem facit, non vero praesumptio, saltem universaliter.

Objic. 5. Obtento fine non debet amplius attendi medium; sed allegationes & probationes tantum sunt media ad veritatem eruendam: ergo si haec veritas aliunde in iudice jam datur, non debent amplius attendi probationes & allegationes illae judiciales. Subsumo, atqui veritas jam datur in iudice aliunde &c.: ergo.

R. D. m. Subf. Datur aliunde veritas jam satis & legaliter cognita N. m. non satis nec legaliter cognita C. m. & N. c. allegationes & probationes sunt medium ordinatum ad veritatem publicam & judicalem eruendam, quae in nostro casu non datur.

Objic. 6. Juxta Capit. 13. de restitutione spoliatorum, & Capit. 44. de sent. Excommunicationis, non licet alicui exequi sententiam, quam scit certo esse injustam, & juri naturali & divino repugnantem: ergo neque iudex potest pronunciare sententiam, quam certo scit esse injustam.

R. 1. Retorq. argum. ex Cap. Pastoralis 28. de Officio delegati. Vide confirmat. 1. conclus.

R. 2. N. c. Quod ejusmodi sententia esset injusta; sed foret conformis juri naturali & divino, & potestati, quam habet Respublica in bona temporalia subditorum. Unde est disparitas: quia in istis capitulis dicitur, quod conjuges putitii, ac laborantes impedimento occulto dirimente non possint exequi sententiam, qua jubentur carnaliter cohabitare: quia jus naturale, & divinum hanc cohabitationem prohibet; At non prohibet disponere de bonis subditorum, si exigat utilitas publica.

Objic.



§. III. *Resolvitur præcipua difficultas hujus articuli.* 887

Objic. 7. Depositio testium est in gratiam Rei concessa : ergo non debet verti in Ipsius dispendium.

R. D. a. Est in gratiam Rei concessa, contra Actorem C. a. etiam contra utilitatem publicam N. a. utilitas publica prævalere debet bono privato talis Rei.

§. III.

*Resolvitur præcipua difficultas hujus articuli.*

ASSERO 5. Nullo casu judici concessum est, ut hominem secundum publicas allegationes & probationes convictum morti adjudicet, si ejus innocentiam privatim certo cognitam habet. Ita laudati pro 4. conclusione, cum quibus sentiunt Adrianus, Liranus, Abbas, Rosella, Sa, Petrus Navarius, Antonius Mayr, Schmier, Besoldus, König, Pichler, & alii plures in manuscriptis. 614

Prob. 1. & datur disparitas inter causas criminales majores, ac civiles, quia in causis civilibus agitur tantum de bonis externis subditorum, quæ subsunt dominio alto Reipublicæ, quæ de iisdem disponere potest in utilitatem publicam; at in causis criminalibus majoribus in casu conclusionis agitur de vita & membris innocentis, quæ non subsunt dominio Reipublicæ, sed solius Dei, qui Reipublicæ non dedit potestatem privandi infontem vita vel membris suis. 2. Sententia ejusque executio circa causas criminales majores affert damnum naturaliter irreparabile; non item circa causas civiles, vel criminales minores: siquidem bona fortunæ deperdita per sententiam judicis iterum recuperari possunt, non vero vita vel membra ablata: ergo.

Confirm. Directe occidere innocentem, vel mutilare nunquam licet, nisi Deus det licentiam; ut constat ex S. Scriptura Exodi 23. v. 7. *infontem & justum non occides, quia averfor impium*: imo innocentem directe occidere, vel mutilare, æque intrinsece malum est ac fornicari. Quare sicuti



cuti judex matrimonium, quod secundum allegata publica validum apparet, ipse vero certo invalidum esse scit, nullo modo suadere, & multo minus sententiam ferre potest, ut tales conjuges putatitii carnaliter mutuo adhæreant: cum hæc copula non obstantibus probationibus publicis maneat intrinsece mala. *Capit. inquisitionis de sent. Excom.* Ita a pari ratione non potest per sententiam ad mortem condemnare hominem utut publice convictum, si eum certo privata scientia noscit esse innocentem.

615

Objic. 1. In nostro casu occiditur nocens, nempe secundum allegata & probata: ergo.

R. N. a. & suppositum, quod sola allegata & probata in causa sanguinis possint aliquem facere nocentem juridice, si judex privatam scientiam habeat de innocentia ejusmodi hominis.

Objic. 2. Judex in casu conclusionis tantum indirecte occideret ejusmodi hominem: directe enim intendit servare publicum judiciorum ordinem, cum quo indirecte & per accidens conjuncta est occisio innocentis; atqui occisio indirecta innocentis ex justa causa est licita: ergo. m. patet in oblatione urbis, in qua emissis globis sæpe innocentes pro nocentibus occiduntur.

R. N. M. Quia alias neque judex Remm revera nocentem directe occideret, sed tantum indirecte, quatenus directe solum intenderet ordinem judiciale observare, quod tamen non facile aliquis dixerit. Juxta dicta in Tract. de Jure & Justitia: tunc aliquis directe influit in homicidium, quando mors hominis tanquam finis immediatus, vel tanquam medium ad finem obtinendum intenditur ex natura actionis illius, quæ ponitur; atqui ex natura sententiæ talis intenditur mors, & infertur tanquam medium ad servandum ordinem judiciale: ergo. Ast si emittuntur globi in urbem hostilem, tunc mors innocentum non intenditur



*§. III. Resolvitur præcipua difficultas hujus articuli. 889*

tur tanquam finis, neque tanquam medium: nam finis tantum est nocumentum hostibus inferendum, ac victoria promovenda; medium vero ad hunc finem non est mors innocentum, sed hostium, ac eversio murorum; unde plane mere per accidens cum ejusmodi emissione globorum conjungitur interdum mors innocentum, & ab hoste emittente globos tantum moraliter permittitur.

Objic. 3. Deuteronom. 17. dicitur: *in ore duorum vel trium testium peribit, qui interficietur*: ergo.

R. 1. Retorq. Argum. & opponendo textum Exodi 23. adductum in prima objectione conclusionis præcedentis.

R. 2. Textus ille solum vult, necessarios esse duos testes saltem ad damnandum aliquem capitis; *nemo enim* (ut textus pergit) *occidatur uno contra se dicente testimonium*: non vero vult textus, quod duo testes statim sufficiant, etiam contra certam scientiam judicis.

Objic. 4. Judex est persona publica: ergo debet secundum scientiam publicam judicare.

R. D. c. in causis civilibus C. c. in criminalibus majoribus subdist. quamdiu potest præsumere scientiam publicam esse veram C. c. fecus. N. c.

Objic. 5. Nostra sententia aperit viam iniquis judicibus palliandi suas fraudes; dicent enim corrupti, se non posse contra propriam scientiam ferre sententiam: ergo.

R. N. a. Non est periculum hujus incommodi; in foro enim externo non creditur judici, si negligit juris ordinem, & non fert sententiam secundum allegata & probata, imo potius propterea punitur. Unde, si non urgeat propria conscientia, in gratiam alicujus Rei non subibit talia incommoda.



Objic. 6. Non debet plus credi uni testi, quam pluribus: ergo etiam non debet iudex plus sibi ipsi credere, quam duobus vel pluribus testibus.

R. N. suppos. quod hic agatur tantum de fide, sed de certa scientia. Concedo, quod major fides non sit habenda uni testi, quam duobus: At non debet in nostro casu certa scientia iudicis postponi fallibili, imo falso testimonio duorum vel plurium. Vel D. c. Non debet plus sibi ipsi credere Iudex, quando tantum habet notitiam fallibilem & probabilem C. c. quando habet evidentem vel certam N. c.

Objic. 7. Potuit Deus Reipublicæ, & Judici dare potestatem, ut infontem, convictum tamen publice morti adjudicet: & hanc potestatem esse judici datam, probat necessitas, ne alias iniqui fraudes suas palliandi ansam habeant: ergo.

R. N. 2. memb. a. Ratio negandi patet partim ex responsione ad object. 5. partim ex eo; quia in adversariorum sententia æquale periculum immineret; nam si sciretur, iudicem debere allegata & probata, etiam cognita ut falsa sequi, eodem modo possent ab Actoribus & Accusatoribus subornari falsi testes, & produci falsa acta ad perdendum hominem alias innocentem. Denique abusus doctrinæ ex malitia hominum secuturus non obest illius veritati.

Objic. 8. Juxta dicta in Tract. de Jure & just. potest aliquis membrum sanum in proprio corpore amputare, ut vitam conservet totius corporis, e. g. potest sibi amputare manum, ut possit se exuere vinculis, alias occidendus: ut habet Lugo: ergo etiam ut bonum totius civitatis conservetur, potest hæc membrum sanum & civem infontem occidere, vel morti adjudicare.

R. N. c. & parit. Respublica non habet tantam auctoritatem in suos cives, sicut homo in membra vitæ suæ necessaria-



*§. III. Resolvitur præcipua difficultas hujus articuli. 891*

cessaria. Etenim civis quilibet est suppositum per se subsistens, non habens essentialem dependentiam a Republica. Contra vero membra corpori humano necessaria essentialiter dependent a corpore reliquo, & ab hoc vitam etiam participant.

Obji. 9. Respublica ob bonum suum commune potest imperare alicui subdito infanti, ut vitam suam exponat periculo: ergo etiam potest morti adjudicare eundem ob bonum commune.

R. 1. Retorq. Argum. Civis ob bonum commune potest se exponere periculo vitæ: ergo etiam potest se ipsum occidere ob bonum commune, vel potest ipsum Respublica occidere, si aliter Respublica salvari non posset: v. g. si hostis peteret, ut talis a Republica vel a se ipso occidatur.

R. 2. N. c. & parit. exponere se vel alium periculo vitæ ex justa causa non est se directe occidere, sed tantum permittere mortem ab alio inferendam: atq. adjudicare aliquem morti est directe ipsum occidere.

Licet occidere amentem, dum me invadit, ac tentat occidere: ratio est; quia de jure naturæ licet vim vi repellere; atqui iste mihi vim facit: ergo. Dein licet amens non peccet formaliter, tamen ejus aggressio est materialiter injusta; atqui ejusmodi innocens judici vim non infert, neque est formaliter, neque materialiter nocens. 2. Hic quaestio est solum de notitia privata innocentiae Rei, non autem est sermo de notitia habita ex confessione sacramentali: hæc etenim non est humana, sed alterius ordinis, neque ea sine licentia pœnitentis judex uti potest extra sacramentum pœnitentiæ. Quapropter non obstante ejusmodi notitia sacramentali posset innocentem, probatum tamen ut nocentem occidere.

Ex his deduces 1. Conclusionem quartam maxime procedere de causis civilibus, item de criminalibus minoribus, ubi agitur solum de pecuniaria mulcta, vel privatione beneficiorum & officiorum, imo etiam de aliqua molestia, vel

Uuuuu 2


affli-



afflictione, quæ subito non adeo gravis foret, nec cum infamia alicujus momenti conjuncta esset. Ratio est; quia etiam Respublica ob bonum commune habet jus inferendi similem afflictionem: Ita Antonius Mayr Tract. 8. n. 227. Imo sæpius jam citat. Haunoldus extendit conclusionem quartam ad pœnam Exilii. Proinde in talibus causis posset judex secundum allegata & probata ferre sententiam etiam contra infontem, privatim certo cognitum ut talem, posito, quod nullum remedium talem innocentem liberandi suppetat. Neque propterea, quia liberare non posset innocentem, deberet judex subire privationem officii sui: quia Reipublicæ pluris interest, habere & conservare bonos Judices, quam in tali casu subditorum etiam innocentium bona defendi. Aliter loquendum est in criminalibus majoribus; nam potius judex deberet officium dimittere, quam innocentem morti, vel mutilationi adjudicare contra scientiam certam privatam, non obstante, quod tali dimissione officii ejusmodi innocenti nihil esset profuturus, ut habet Reiffenstuel L. 1. Decret. T. 32. n. 50. Lessius ibidem allegatus: Ratio est: quia ex nulla causa licet directe occidere innocentem certo cognitum ut talem. Quamvis casus iste sit metaphysicus, & vix occurrere possit, si media omnia liberandi ejusmodi innocentem adhibeantur, prout adhiberi debent.

Deduces 2. Quod ob rationem mox allegatam neque justitiæ minister, sive carnifex mortis sententiam exequi possit adversus condemnatum, quem certo scit esse innocentem. Layman. L. 3. Tract. 6. c. 2. n. 8. Ex quo tamen non sequitur, quod ipse innocens condemnatus possit publicæ potestati positive resistere; quia id sine scandalo fieri non potest, si ejus innocentia publice nota non est, & insuper talis subeundo mortem se tantum permissive habet. Videatur Layman citat.





## ARTICULUS II.

*Resolvitur quæsitum notabile de Reo.*

**A**N Reus legitime a iudice interrogatus teneatur fateri crimen revera a se commissum, si ob illud timeat pœnam mortis, mutilationis, vel confiscationis omnium bonorum, aut aliam gravissimam, & per celationem veritatis spes sit evadendi? 617.

Ante responsionem nota, Reum, si non interrogetur legitime, non teneri crimen suum fateri; v. g. si iudex non sit legitimus, si non præcesserit semiplena probatio, vel sufficiens infamia, aut sufficientia indicia de aliquo crimine. Ratio horum est: quia iudex non habet jus interrogandi reum, nisi iuridice, seu nisi servato juris ordine: ergo neque Reus habet obligationem respondendi, nisi sit interrogatus servato ordine juris. H. N.

R. ad quæsit. affirmative. favet Scotus 4. D. 15. q. 4. §. in tertio membro. n. 5. & seqq., ubi dicit, quod non liceat negare tale delictum certo commissum, de quo quis legitime interrogatur. Tenent autem meam sententiam D. Thomas 2. p. q. 69. Covarr., Cajetanus, Navarrus, Sotus, Toletus, Azorius, Lessius, Sanchez, Layman, & plures alii contra multos alios.

**Prob. 1.** Iudex in hoc casu habet jus interrogandi, & exigendi veritatem: ergo & Reo incumbit obligatio eam fatendi, facitque contra auctoritatem iudicis, si sic interrogatus veritatem occultat: nam jus interrogandi in iudice, & fatendi veritatem in reo sunt duo correlativa, quorum unum sine altero esse nequit. 2. Si reus non teneretur fideliter fateri veritatem, non posset iuste torturis adigi ad eam fatendam, cum sit iniquum, aliquem torturis adigere ad id, ad quod non tenetur. 3. Præceptum humanum iustum obligat cum periculo vitæ, dum imponitur ob bonum commune, grave & necessarium: sed tale est præceptum iudicis, sub quo exigit, ut Reus legitime interrogatus verum fateatur, quia bonum commune exigit, ut crimina puniantur, & iuridice interrogatus verum fa-



fateatur, ne alias sæpe judicia eludantur cum magno Reipublicæ damno, & multacrimina maneant impunita. 4. Catechismus Rom. de octavo præcepto ait: *De reis autem & fontibus vult eos Deus verum confiteri, cum ex judicii formula interrogantur.*

Dices 1. Judex habet jus præcipiendi Reo ad mortem condemnato, ne fugiat ex carcere, & tamen reo licet fugere: ergo idem est in nostro casu.

R. 1. Si Antecedens est verum, & judex habet jus præcipiendi reo, ne fugiat ex carcere, tunc non licet reo fugere, quia præceptum justum ac legitimum violare per se illicitum est.

R. 2. Transmisso A. N. C. hoc præceptum, ne fugiat reus, non est necessarium bono communi, sicut est præceptum clare fatendi veritatem, quia hæc fuga facile aliis mediis impediri potest.

Dices 2. Testes, a judice interrogati, veritatem dicere non tenentur, si inde sibi aut suis grave damnum timent: ergo neque reus tenetur, si timeat simile damnum.



R. N. C. Nam tunc jus interrogandi in tali casu se non extendit ad testes, sicut ad reum, nisi hoc sit necessarium ad impediendum grave damnum Communitatis: testes enim utpote infantes jus habent, vitam & bona sua, ac suorum consanguineorum conservandi, non autem reus ob crimen ab ipso admissum, & semiplene probatum. Inde discrimen est inter reum & testes, quia hi sunt innocentes, non autem ille.

Reliqua de reo & aliis de judiciis in Theologia morali discutientur.

Hæc modo sint satis Theologo scholastico de Jure & Justitia, Contractibus, Restitutione, & Judiciis, alia plura, quæ ad praxin spectant, in Casistis & Canonistis videri possunt, & Theologia moralis Tomo VI. plura dabit, & docebit.

FINIS.





# INDEX

## Rerum memorabilium in hoc IV. Tomo contentarum.

*NB. Numerus paginam indicat.*

### A.

**A**bbates habent solum potestatem administrandi fructus suorum beneficiorum tam ad congruam sustentationem, quam ad causas pias. pag. 457 possunt facere donationes; & quales. pag. 458  
Adamo non peccante Christus venisset in mundum. pag. 100  
Adventus Christi quomodo probetur contra Judæos. p. 20  
Aquila Lex, & Leges noxales sine culpa Theologica non obligant in conscientia. p. 687.  
bene tamen post sententiam Judicis. 688

### B.

Blanditiæ an irritent contractus?  
p. 823

Bona inventa ad quem pertinent item bona vacantia, & derelicta? 495

### C.

Casus fortuitus non subest restitutioni. p. 722

Causæ cooperantes ad injustam damnificationem. 763. quando teneantur ad restitutionem? 765

Causæ excusantes a restitutione. 771

Census Germanicus est licitus. 867

Christus est verus Deus, contra Judæos. 40. Incarnationis ejusdem causa effectiva est tota SS. Trinitas. 93. venisset, etsi Adam non peccasset. 100. venit in carne passibili ad redimendum hominem. 113. etiam



*Index rerum memorabilium*

am ob solum peccatum originale, etsi nullum personale fuisset a nobis committendum. 114. non venisset ob sola peccata personalia. 115. per opera Incarnationem subsequens Christus nec est meritis, nec potuit mereri Incarnationem. 125. nec meruit, potuisset tamen mereri continuationem unionis hypostaticæ. 133. meruit item varias Incarnationis circumstantias. 138. habuit scientiam infusam. 165. nec non experimentalem. 171. Voluntas ejus humana, si fuit efficax, fuit voluntati Dei in omnibus conformis. 181. secus dicendum de Voluntate inefficaci. 183. fuit quoad vim directivam ligatus Legibus, seu præceptis naturalibus. 187. & præcepto moriendi. *ibid.* vere meruit tota vita sua per omnes actus liberos, & ei, qua viatori convenientes. 236. & *seqq.* non satisfecit pro nobis ex rigore Justitiæ. 245. An ut homo sit Filius Dei naturalis? 276. an, qua homo, possit dici Filius Dei adoptivus? 277. an verus Filius Mariæ? 278. an fuerit Caput Ecclesiæ? 279. fuit vene Sacerdos. 280. verus Rex Ecclesiæ spiritualis: & in actu primo etiam temporalis totius mundi. 281.

Est in cælis, & fuit in terris verus Advocatus noster. 284. habuit in terris dominium universale, & excellentiæ in omnes res creatas, saltem in actu primo. 371. Ejus humanitas quomodo invocanda? 285. & ejus imagines? *ibid.* nec non instrumenta passionis? 286

Clerici saculares habent dominium in bona sua patrimonialia, & quasi patrimonialia. 402. enumerantur varia eorum bona. 401. *item* 406. quorum bonorum Ecclesiasticorum dominium non habeant? 406. sunt Domini reddituum beneficialium ad congruam sustentationem necessariorum. 410. etiam superfluum. 411. Beneficiati non tenentur ex justitia expendere superflua in causas pias. 418. peccant tamen secus faciendo contra virtutem Religionis. 434. Hæc eorum obligatio oritur ex sola Lege Ecclesiastica. 428. potest ab ipsis introduci consuetudo de danis beneficialibus testandi ad causas profanas. 444. quæ tamen non censetur actu introducta. 445. Codicillus quid sit? 835. Communicatio Idiomatum vere datur inter Deum, & hominem. 267. Communicationis hujus regulæ. 268

Con-



*in hoc IV. Tomo contentarum.*

Conditiones, quæ possint contra-	ignoratus, non debet restitui
ctibus adjici? 871	741
Conjugum varia bona. 459. ad	Defectus naturales quos assum-
quem ex alterutro spectent? 461	pserit Verbum? 286
Consensus verus internus re-	Deus est omnium rerum Domi-
quiritur ad contractus. 786	nus. 370
Consuetudo de bonis beneficia-	Distributionum quotidianarum
libus testandi ad causas pro-	Clerici habent dominium. 404
fanas potest introduci 444.	Divisio dominiorum post pecca-
non tamen est actu introducta.	tum licite & rationabiliter est
445	facta. 472. est jure Gentium
Contractus quid sint, & quo-	introducenda. 473
modo dividantur? 784. requi-	Dolus quomodo vitiet contra-
ritur ad eos consensus verus	ctus? 791. an si contigit circa
internus. 786. quando valeat	qualitatem contractus, hic
contractus metu initus? 806	possit rescindi? 799
quinam contractus obligent	Dominii divisiones. 342. potest
ad restitutionem? 722. tur-	illud separari ab usu in re-
pes, adimpleta conditione tur-	bus unico usu consumptibili-
pi valent. 856. etiamsi sint	bus. 353. ejus capacia solum
contra justitiam. 857. quæ-	sunt entia, intellectum & vo-
nam conditiones contractibus	luntatem habentia. 369. non
possint adjici? 871	tamen requiritur actualis usus
Creatura pura de absoluta po-	rationis. <i>ibid.</i> dominium ejus-
tentia &c. potuisset satisfacere	dem rei penes duos in soli-
pro peccato mortali alteri	dum dari nequit. 373. neque
us hominis, imo totius mundi.	permanens, 374. neque in-
258.	stantaneum. 379. dominium
Culpa Theologica qualem resti-	habet homo in famam, &
tutionem inducat? 690	honorem proprium. 398. do-
	miniorum divisio post pecca-
	tum licite, & rationabiliter
	est facta. 472. & jure Gen-
	tium introducenda. 473

D.

Damnum per accidens, & præter intentionem illatum an obliget ad restitutionem? 784.  
damni excessus, invincibiliter  
*P. Kick Theol. Tom. IV.*

E.

Emphytheusis quid sit? 344  
X x x x x  
Epi-



*Index rerum memorabilium*

Episcopus quondam Religiosus  
non fit capax domini. 456  
Errans in Persona læsa tenetur ad  
restitut onem. 746  
Error qualis irritet contractum ?  
791  
Essentia D. potest naturam hu-  
manam reddere subsistentem.  
85  
Expensæ quæ possint in restitu-  
tione detrahi ? 681

F.

Feudum quid sit ? 344  
Fideicommissa valent, etsi Te-  
stamentum careat aliquibus so-  
lemnitatibus a jure civili re-  
quisitis. 843  
Filiorum familias bona castren-  
sia, & quasi castrensia spe-  
ctant ad ipsos 466. bo-  
norum adventitiorum habent  
de jure communi dominium  
directum. 467. peculium au-  
tē profectitium spectat ad  
Patrem. 468. Filius familias in  
domo paterna laborans ne-  
quit prætere salarium, &  
si negetur, non potest sibi  
illud occulte compensare. 469  
Fraude aliquem a consecutione  
boni impediens quando pec-  
cet, & teneatur restituere ?  
707. & seqq. item 711. & seqq.  
Furi potest res bona fide em-  
pta immediate reddi. 753  
Furta minuta venialia quando  
ad restitutionem obligent ? 698

G.

Gloriam animæ, & corporis  
sui accidentalem Christus pro-  
meruit. 137  
Gratia sanctificans Christi non  
fuit infinita categorematicè.  
192. fuit quidem summa, &  
omnium maxima : *ibid.* non  
tamen summa negative. *ibid.*  
Gratiæ gratis datæ omnes fue-  
runt in Christo. 193

H.

Habitationis definitio. 344  
Homo non est Dominus vitæ  
sue, nec alienæ. 383. nequit  
seipsum occidere. 385  
Humanitas tota, & ejus partes  
omnes sunt in eodem instan-  
ti reali a Verbo assumptæ.  
63. cum aliqua tamen priori-  
tate signorum. 65  
Humanitas Christi habet gra-  
tiam sanctificantem. 190. quo-  
modo sit adoranda. 285  
Humores, pituita, bilis flava,  
& atra fuere immediate uni-  
ta Verbo D. 56

I.

Imagines Sanctorum pie, & li-  
cite coluntur. 316. & seqq.  
Impotentia in eodem genere ex-  
cusat a restitutione in alio  
genere. 776  
In-



Incarnatio Verbi divini quid sit. 1. est possibilis. 3. ante illius per-  
actionem nullus intellectus cre-  
atus hanc possibilitatem evi-  
denter cognoscere potuit, se-  
clusa revelatione. 11. fuit con-  
veniens Deo: 14. homini, 15.  
& toti universo. *ibid.* conve-  
nientius fuit assumpta natura  
humana, quam Angelica. *ibid.*  
convenientius Persona Filii,  
quam Patris, aut Spiritus S.  
fuit incarnata. 16. ad eam po-  
nendam Deus ante suum decre-  
tum liberum non fuit neces-  
sitatus, neque ex suppositione  
mundi producti. 17. nec  
fuit necessaria Incarnatio sup-  
posito peccato primi homi-  
nis. 18. nec, supposito, quod  
Deus hominem lapsum volue-  
rit reparare. 19. Incarnatio  
active spectata, est actio pro-  
ductiva unionis hypostaticæ.  
91. hujus existentia proba-  
tur Judæis. 20. *Et seqq.* Ean-  
dem, quoad substantiam,  
Christus non meruit per ope-  
ra ipsam præcedentia. 117.  
neque ita potuisset mereri de  
condigno. 120. bene tamen  
de congruo, cum aliqua sal-  
tem limitatione. *ibid.*

Injuria nequit fieri consentienti.

630

Inventio bonorum cui prodest?

495

Joannes XXII. quid senserit de  
usu facti? 366

Irritatio a Lege plenissima, vel so-  
lum simplex quid operetur? 847

Judex quando debeat judicare  
secundum allegata, & proba-  
ta? 881. *Et seqq.* In causis  
civilibus potest secundum ea  
judicare, non obstante scien-  
tia privata 883. non vero si  
agitur de morte inferenda.

887

Jus quid sit? 338. ejus divisio-  
nes. 341. *Et seqq.*

Justitia: ejus definitio. 597. quo-  
tuplex? 600. commutativa 602.  
distributiva, legalis, retribu-  
tiva. 608. commutativa quale  
medium observet? 606. & in-  
ter quos possit intercedere?  
612. an eadem, rigorosa, De-  
us possit obligari creaturæ?  
614. vel creatura Deo? 621

L.

Legari potest etiam res aliena,  
servatis debitis conditionibus.

853

Legata pia subsistunt, testamen-  
to profano ob defectum licet  
irrito declarato. 851

Libertatem habuit Voluntas Chri-  
sti a coactione, & necessitate:  
214. *Et seqq.* concordatur li-  
bertas voluntatis Christi cum  
ejus impeccabilitate. 220. *Et  
seqq.* refutatis quoad hoc alio-  
rum sententiis. 226. *Et seqq.*

X x x x x 2

M



*Index rerum memorabilium*

**M.**

- Maria B. V. de congruo promeruit maternitatem Dei 142.  
digna est cultu hyperdulæ. 294.  
est vere Deipara. 322.  
fuit Virgo ante partum. 328.  
in partu. 329. post partum. 330  
Melioramenta rei quæ debeant restitui? 679  
Membrorum suorum homo non est Dominus. 393. nisi ad conservandam vitam totius. 395  
Merita Christi non solum per gratiam sanctificantem, sed etiam per Personam Verbi dignificantur. 241  
Meritus est Christus pro nobis non solum condigne, sed & abundanter. 242.  
Metus quando vitiet contractus? 806.  
gravis, injuste incussus, non semper irritat contractus. 811  
Modi acquirendi dominium sunt occupatio. 474. nativitas. *ibid.*  
alluvio. 475. specificatio 477.  
confusio. 479. commixtio, vel permixtio. 480. accessio 481.  
ædificatio, & plantatio. 482.  
fructuum perceptio, & traditio, remissive. 483  
Moriendi præcepto Christus fuit adstrictus. 187

**N.**

- Necessitas extrema excusat a restitutione. 772

- Negative damnificans an teneatur ad restitutionem? 703  
Noxales Leges ante sententiam Judicis non obligant. 687

**O.**

- Obligatio restituendi oritur ex culpa Theologica. 684. non mere juridica. 686  
Obligatio in contractibus annua, vel menstrua an sit pura, vel in diem? 875

**P.**

- Patres antiqui de congruo meruerunt aliquas circumstantias Incarnationis. 144  
Paupertas religiosa obligat etiam ad non habendum usum simplicem facti rerum temporalium sine licentia Prælati. 458  
Peccare potuisset Humanitas Christi in signo priori naturæ ante unionem hypostaticam. 199.  
etiam in sensu composito ejusdem unionis. 203  
Persona una divina immediate posset assumere plures naturas humanas. 73. plures nequeunt simul eandem naturam humanam assumere. 88  
Persona D. secunda sola est incarnata 76. unita est immediate humanitati secundum personalitatem propriam, & proprietatem relativam filiationis 77.  
potest etiam immediate assumere



mere partes essentielles, seu unitas, seu non unitas physice, 74. item accidentia absoluta, non vero relativa. 75. Vide etiam *v. Verbum D.*

Possessio quid sit? 538. *Et seqq.* ejus divisio. 542. *Et seqq.* varia ejus commoda. 545. quomodo rerum corporearum possessio acquiratur? *ibid.* *Et seqq.* quomodo rerum incorporearum? 547. quomodo iterum amittatur? *ibid.* *Et seq.* an sit necessaria ad prescriptionem. 549. & qualis requiratur? 550

Possessor bonæ fidei quid restituere debeat? 656. quid, si ex fructibus consumptis factus est ditior? 665

Possessor malæ fidei quid in genere teneatur reddere? 675. quid non teneatur restituere? 678

Præscribere qui nequeant? 572

Præscribi quæ nequeant? 565

Præscriptio quid sit? 507. valet etiam in foro conscientiæ. 508. quænam ad illam requirantur? 512. bona fides. *ibid.* *Et seqq.* quale dubium huic obsit? 517. Possessio. 549. quem titulum requirat præscriptio? 552. ejus tempora. 573. Præscriptio servitutum. 580. debitorum 587. præstationum annuarum. 592.

Promissio debet esse plene libera 824. & acceptata a Promissario, 827. a quibus possit pro absente Promissario acceptari, 828

Q.

Quasi contractus non obligant ad compensationem damni gravis, nisi ob culpam Theologicam gravem. 729

R.

Religiosi in communi habent dominium bonorum temporalium, exceptis Franciscanis & Capucinis. 449. in particulari vero sunt incapaces domini. 451. exceptis aliquibus non solemniter professis. 452. habent etiam in particulari dominium rerum, & jurium spiritualium. 453. Reliquiæ Sanctorum pie, licite, & utiliter coluntur. 310

Restituere non tenentur Clerici Beneficiati, si bona superflua in causas pias non expendant. 418

Restitutio est actus proprius solius justitiæ commutativæ. 635. an oriatur ex violatione justitiæ distributivæ? 636. *Et seqq.* an saltem obliget illum, qui iniuste distribuit bona communia? 640. *Et seqq.* an ad hanc teneatur violans justitiam legalem? 647. an ea sit necessaria necessitate mediæ, vel præcepti? 648. *Et seq.* præceptum ejus est affirmativum. 651. restitutionis radices. 654. restitutio debita ex re accepta 655. *Et seqq.* debita ex titulo injustæ acceptionis. 683. *Et seqq.* ut obliget, non sufficit culpa mere juridica. 686. neque Theologica venialis, non plene deliberata 691. item 694. suffi-

X x x x x 3

ciunt



ciunt tamen plura furta minuta, venialia, si pervenitur ad materiam gravem. 698. sufficit etiam actio, licet venialiter tantum mala quando saltem gravitas materialis scitur. 699. quando ad restitutionem obligetur, alterum negative tantum damnificans? 703. *& seqq.* item 707. *& seqq.* quando talis non obligetur? 711. *& seqq.* an, & quando hæc obligatio oriatur ex casu fortuito? 722. *& seqq.* aut ex culpa mere juridica? 726. *& seqq.* vel ex quasi contractu? 729. *& seqq.* aut ex damno per accidens, & præter intentionem dato? 734. *& seqq.* an compensari debeat excessus damni invincibiliter ignoratus? 741. *& seqq.* ad restitutionem obligatur errans in persona læsa. 727. an, & quando ad eam obligentur cooperantes ad injustam damnificationem? 765. *& seqq.* Causæ excusantes a restitutione. 771. talis ordinarie est extrema necessitas. 772. & impotentia restituendi in eodem genere. 776. *& seqq.*

Reus a iudice legitime interrogatus, tenetur fateri veritatem, etiam impendente periculo mortis. 893

S.

Sanctos licet religiose colere. 292  
sicut & eorum imagines 316.  
& Reliquias 310. utiliter invocantur. 301  
Sanguis Christi fuit immediate u-

nitus Verbo. 54. etiam, qui in resurrectione iterum erat assumendus. 60. num omnis, nullis in terra remanentibus guttis, fuerit reassumptus intra gloriosum corpus Christi? 68

Satisfactio Christi pro nobis non est facta ex rigore Iustitiæ. 245. eadem non est valoris simpliciter infiniti. 247

Scientiam infusam habuit quidem Christus. 165. quin & experimentalem: 171. quæ non erat abstractiva. 172. eam tamen non promeruit, sicut nec alios habitus infusos. 134. potuisset nihilominus eos mereri. 136

Servitutis definitio. 344. ejus divisiones. 348

Solutio totalis iterata ejusdem debiti non est actus rigorosæ iustitiæ. 625

Suicidium illicitum sine instinctu divino. 386. indirectum tamen in quibusdam casibus licet. 390

T.

Testamentum quid sit. 833. ejus divisio. *ibid.* quo jure sit introductum? 838. *& seqq.* quando sit irritum 840. *& seqq.* solemnne, quas requirat conditiones? 834. etsi careat una, vel pluribus solemnitatibus, valet tamen quoad aliqua. 843. *& seqq.* testamentum profanum ob defectum solemnitatum nullum, valet tamen quoad legata pia. 851. factum ad pias causas sine solemnitatibus Juris civilis pro-

ro



ro quoque externo valet. 852.  
insolemne posterius, ad pias  
causas tamen factum, derogat  
priori profano. *ibid.*

Testari possunt Clerici Beneficia-  
ti, ubi est legitima introducta  
consuetudo, ad causas profanas  
valide. 442. quin & licite. 444  
Theauri inventi ad quem perti-  
neant? 489 & *seqq.*

U.

Venatio quid sit? 483. an cuilibet  
liceat? 486. quomodo peccet  
venans contra prohibitionem  
Principis? *ibid.* & an talis ac-  
quirat dominium ferarum, quas  
capit? *ibid.*

Verbum divinum non potuit as-  
sumere naturam humanam, sup-  
positatam propria personalita-  
te. 51. eandem totam, & inte-  
gram univit sibi. 52. in triduo  
mortis fuit corpori, & animæ  
immediate unitum. 60. potuif-  
set assumere naturam Angeli-  
cam, aut omnino irrationalem.  
72. quos assumpserit defectus  
humanitatis? 286. Vide etiam  
*v. Christus.* & *v. Persona D.*  
*secunda.*

Visionem Dei intuitivam jam in  
terris habuit anima Christi 147.  
& quidem a primo statim in-  
stanti infusionis in corpus. 149.

quæ tamen non erat compre-  
hensiva divinitatis. 150. per e-  
am nihilominus anima Christi  
actu videt omnia, quæ ipsum  
Verbum intelligit. *ibid.*

Unio hypostatica quid sit. 42. &  
*seq.* non est maxima quoad en-  
titem, bene vero in ratione  
unionis. & doni. 44. est quoad  
substantiam supernaturalis. 45.  
est immediate facta in natura  
humana sine præcedente dispo-  
sitione 47. & quidem est facta  
in unitate Personæ 48. ratione  
sui non formaliter sanctificat  
humanitatem Christi. 194. ne-  
que ratione divinitatis, vel per-  
sonalitatæ divinæ. 196

Voluntas humana Christi efficax  
fuit voluntati D. in omnibus  
conformis. 181. hæc eadem fuit  
etiam semper impleta. 183. non  
vero inefficax. *ibid.* fuit ligata  
veris, ac rigorosis præceptis,  
obligantibus vi directiva. 186.  
præcipue naturalibus, ac etiam  
quibusdam positivis, inter quæ  
erat præceptum moriendi. 187.  
fuit libera tam libertate a coa-  
ctione, quam a necessitate. 214

Voluntas ultima quid sit? 832.  
quotuplex. 833

Ufusfructus quid sit. 344

Ufus Juris, & facti quid sit. 351



# Menda sic emenda.

Fol. Lin.		lege ly.
2. 10. li		
5. 7. hypostaticæ.	-	hypostaticæ.
6. 10. extrinsece.	-	intrinsece.
16. 17. nativitate.	-	nativitate.
cod. 19. bui.	-	qui.
26. 17. inutritus.	-	innutritus.
ibid. penult. sanguine	-	sanguine
27. 7. Dosithæus.	-	Dositheus.
31. ult. consumetur.	-	consummetur.
35. 20. Hagiogriphos.	-	Hagiographos.
36. 32. ædificanid.	-	ædificandi.
46. 12. si.	-	qui.
cod. 24. copax.	-	capax.
47. 4. suppositi.	-	suppositi.
58. ult. artes.	-	partes.
62. 5. Consentium.	-	ad Consentium.
69. 5. Goneth.	-	Gonet.
ibid. 10. oculati.	-	oculati.
72. 4. H.	-	H. N.
72. 33. possunt.	-	possent.
75. 32. habet.	-	haberet.
78. 14. ste.	-	est.
79. 20. Patripasiano-	-	Patripassiano-
rum.	-	rum.
98. 18. &.	-	est.
107. 3. decrevit tan-	-	decrevit Chri-
quam.	-	stum tanquam.
112. 22. Deum)	-	Deum?)
118. 24. convificavit.	-	convivificavit.
123. 33. authocitate.	-	authoritate.
ibid. 34. derretum.	-	decretum.
126. 27. loquantur.	-	loquuntur.
127. 17. Sylogismi.	-	Syllogismi.
89. 8. proximnm.	-	proximum.

Fol. Lin.		
192. 19. licherus.	-	Lichetus.
198. 23. sanguis.	-	sanguis.
206. 30. distinguatur.	-	distinguatur.
229. 9. syllogismo.	-	sylogismo.
264. 16. tatem.	-	talem.
270. 10. firei.	-	fieri.
312. 1. quadatenus.	-	quadatenus.
340t 22. doneo.	-	donec.
341. 2. contrarietur.	-	contrarietas.
ibid. 5. utile.	-	utiles.
ibid. 8. 11. & 14. passum.	-	passum.
348. 15. qua.	-	quo.
373. 25. Quid clarius.	-	Quid clarius.
382. 26. Petrs.	-	Petrus.
451. ult. proprium	-	dele semel.
proprium.	-	
461. 22. ac quæstus.	-	acquæstus.
507. 11. Erhizung.	-	Erfizung.
566. 31. cœmeteria.	-	Cœmeteria.
604. 7. distingui.	-	distingui.
615. 12. uo.	-	suo.
628. penult. infirmorum.	-	infirmorum.
629. 14. extinguit.	-	extinguit.
695. 2. Subsummo.	-	Subsumo.
719. 22. ccisivam.	-	occisivam.
807. 12. Relioignem	-	Religionem.
815. 14. sic si habens	-	dele si.
835. 13. hæreditaris.	-	hæredis.
844. 10. dele ly potest.	-	
848. 19. a te	-	lege ante.
853. 9. dominio.	-	domino.
857. 13. commodata.	-	commoda.
ibid. ead. quæ.	-	qua.



hir.  
D.

is.

as.

us.


l.

is.

n.

m.








Biblioteka Jagiellońska



stdr0030745







K. IV. 5



hujus qd tria sua nota sunt in principiis. Un-  
am <sup>vero</sup> ~~omnem~~ Sabat et p. disjunctum distincta e for-  
et pfecta ac in singulari accepta. Atq. ita fit ut  
quodam modo fuerit cognitum quodammodo incognitum. Cogni-  
tione incoinita in particulari cognitum confuse in  
distincta cognitione cognitum p. tate: incognitum quo ad  
Causa qd tria Ex quo p. tate p. tate sic apparet, erant et con-  
stuloni Platoni et causis qd huiusmodi erat. p. tate  
nant p. tate ~~omnem~~ Sabat sane conclusio: se huiusmodi  
tres Inq. rectis in huiusmodi occurbat so-  
aliqua huiusmodi quam q. Sabat ~~omnem~~ Sabat  
de huiusmodi Sabat huiusmodi et hoc dicitur huiusmodi  
lum qd non notat (non n. illud videtur)  
q. non sciatur de huiusmodi Sabat huiusmodi  
p. tate qd p. tate non est aliquid et  
h. n. Dum n. sola maior tunc  
ignorata ignorata qd non cognita in  
actu p. tate distincta formatu qd non dicitur cogni-  
m. sua no. p. tate nota conclusio: satis cogniti-  
confusa imperfecta particulari virtuali quadam cogniti-  
Plat. Dubit. ion in qua tunc conclusio p. tate Platoni in ~~omnem~~ Sabat  
caus. p. tate apparet ut non necesse sit refugere ad  
ann. n. sic arguitur cum virtute cognoscere quicquid non  
my vel ignoramus si cognoscimus inueniamus qd n. huiusmodi  
discamus p. illud qd non novimus si non ignoramus  
magis qd ex p. tate p. tate p. tate p. tate p. tate  
serviamus et facit non vult quod inuenit non arguit



